

# 閩書

第四冊

福建人民出版社

〔明〕何喬遠 編撰



〔明〕何喬遠 編撰

廈門大學

古籍整理研究所  
歷史系古籍整理研究室

《閩書》校點組 校點

# 閩書

第四冊

福建人民出版社

(閩)新登字 01 號

MIN SHU

閩 書

(第四冊)

[明]何喬遠 編撰

\*

福建人民出版社出版發行

(福州得貴巷 59 號)

上海傑申電腦排版有限公司排版

福州七二二八分廠印刷

開本 850×1168 毫米 1/32 27.875 印張 4 插頁 663 千字

1995 年 5 月第 1 版

1995 年 5 月第 1 次印刷

印數:1—2000

ISBN 7—211—02471—2

K·186 定價:48 元

書中如有印裝質量問題,可直接向承印廠調換

## 第四冊目錄

卷之九十四 英舊志縉紳	
建寧府甌寧縣	二八一九
卷之九十五 英舊志縉紳	
建寧府建陽縣一	二八五二
卷之九十六 英舊志縉紳	
建寧府建陽縣	二八六九
卷之九十七 英舊志縉紳	
建寧府崇安縣一	二九〇〇
卷之九十八 英舊志縉紳	
建寧府崇安縣二	二九二三
卷之九十九 英舊志縉紳	
建寧府浦城縣一	二九五二
卷之一百 英舊志縉紳	
建寧府浦城縣二 政和縣 松溪縣	
壽寧縣	二九八五

卷之一百一 英舊志縉紳	
延平府南平縣 將樂縣 大田縣	三〇二五
卷之一百二 英舊志縉紳	
延平府沙縣一	三〇六三
卷之一百三 英舊志縉紳	
延平府沙縣二 尤溪縣 順昌縣 永安縣	三〇八五
卷之一百四 英舊志縉紳	
汀州府長汀縣 寧化縣 上杭縣 武平縣	
清流縣 連城縣 歸化縣 永定縣	三一四
卷之一百五 英舊志縉紳	
興化府莆田縣	三一五七
卷之一百六 英舊志縉紳	
興化府莆田縣二	三一八二
卷之一百七 英舊志縉紳	
興化府莆田縣三	三二二一



卷之一百八 英舊志緒紳

興化府莆田縣四……………三二二五

卷之一百九 英舊志緒紳

興化府莆田縣五……………三二六五

卷之一百十 英舊志緒紳

興化府莆田縣六……………三二八八

卷之一百十一 英舊志緒紳

興化府莆田縣七……………三三二三

卷之一百十二 英舊志緒紳

興化府莆田縣八……………三三五二

卷之一百十三 英舊志緒紳

興化府仙游縣一……………三三八〇

卷之一百十四 英舊志緒紳

興化府仙游縣二 興化故縣……………三四二〇

卷之一百十五 英舊志緒紳

邵武府邵武縣一……………三四四六

卷之一百十六 英舊志緒紳

邵武府邵武縣二 光澤縣 泰寧縣

建寧縣……………三四七一

卷之一百十七 英舊志緒紳

漳州府龍溪縣一……………三五一五

卷之一百十八 英舊志緒紳

漳州府龍溪縣二……………三五四一

卷之一百十九 英舊志緒紳

漳州府漳浦縣 龍巖縣……………三五七〇

卷之一百二十 英舊志緒紳

漳州府長泰縣 南靖縣 漳平縣 平和縣……………三六〇二

卷之一百二十一 英舊志緒紳

漳州府詔安縣 海澄縣 寧洋縣 鎮海衛……………三六二七

卷之一百二十二 英舊志緒紳

福寧州……………三六五〇

卷之一百二十三 英舊志緒紳

福寧州福安縣 寧德縣……………三六七二



# 閩書卷之九十四

英舊志 縉紳(二)

建寧府 甌寧縣

唐

袁元應

袁元應 仕吏部員外郎。巢寇略閩，出爲本道撫諭使。未幾卒。葬湖山，民廟祀之。

宋科第

太平興國二年癸未 章袞 詹垂憲

雍熙二年乙酉 詹易知 張彝叙

端拱元年戊子 陳應元

二年己丑 章瑤

淳化三年壬辰 王冕

咸平二年己亥 王昱

三年庚子 吳應一 章萬 張安世 丘資一作貫

五年壬寅 吳曜卿

景德二年乙巳 章冲 章可法 張爲舟特奏同進士

大中祥符元年戊申 黃觀 張湜

二年己酉 陳詢

五年壬子 徐爽第一人 章侁一作張侁 陳商

八年乙卯 王述 章大蒙章一作吳

天禧二年戊午 徐的 童功成

天聖二年甲子 王初 任凱

五年丁卯 魏巽

八年庚午 章資 張鑑 吳師服 楊仲元 童志賢

景祐元年甲戌 吳秘 章君陳 章造 陳良 李格 張容 王俞

寶元元年戊寅 魏宏 黃昇 黃師古 張爲宣 陳鼎

慶曆二年壬午 黃握 謝策 丘與齡 陳立

六年丙戌 張達權 章京 葉敦 張安雅 楊煥 吳見推 葉北 劉泌 曾叔卿 魏軻 鄒何

皇祐元年己丑 張詳 楊景修 吳申 詹常 徐昂一作昂 徐洪 施彬

五年癸巳 丘同 游奎 陳絢一作詢 郭友賢 周可封 張聘賢

嘉祐二年丁酉 彭次雲 陳沂 黃翊 楊長聘一作長橋 黃洙 陳讓賢 丘高 徐昉

四年己亥 黃襄 張袞 陳讓夷 謝麟

六年辛丑 葉咫 王彝 陳沆 徐璠 陳世京

八年癸卯 吳毅 章及賢 黃顏 安緯 游勛

治平二年乙巳 范咨 袁符 魏森 廖平 陳讓能

四年丁未 劉尋

熙寧三年庚戌 陳稷 黃舒 丘述 吳悅 劉籲 章修

六年癸丑 施令 黃汝平 黃儒 黃頴 徐明 黃洽 黃安節 黃彥 王熙一作頤 吳棫 黃

詳 李端天 楊夙

九年丙辰 葉康弼 張元弼 呂常 黃考甫

元豐二年己未 詹國華 卓威 李桔 黃公綽 陳信臣 葉極 陳孟進 葉大方 吳子翼

五年壬戌 吳睿 黃毅 葉孝玉 張謀 呂企昌作吳 楊恕 謝黻 劉安行 劉幹 黃戴

八年乙丑 王叙 葉廷輝 游充 施邁 吳銓作令 董漸董作黃 章述之作市之，一作衍之

吳潛 吳蕃一作藩 張譚 徐遵

元祐三年戊辰 葉時 游煦一作照 董藐 陳渥 謝得人 練素

六年辛未 黃策 施述 黃同 江介 張訪

紹聖元年甲戌 黃覲 黃堅 黃獻可 何成之 何賁 陳修 李仲行仲一作中 葉楚材

四年丁丑 鄭存 黃逸 章防 章程 章榮 張公獻 徐弁 黃和甫 吳愈 陳溝 黃謙 陳遜  
陳器則

元符三年庚辰 呂沆 熊安行 吳伯止 陳煒 丁天民 呂稅

崇寧二年癸未 葉中行 葉煥 周豐載 黃會極 黃炳 黃平 張公黻 應廊 謝穆 張獻臣

五年丙戌 葉皋 黃銳轉運判官洧之父。 呂若常 葛安國 黃量 孫虞卿孫一作張。 徐陟 黃理

卓雄 吳仲交 翁廉一作兼。 張膺 魏揚用 練師中 范伯進

特奏名 徐適 吳枳師服子。

大觀三年己丑 徐大明 游時升 張績 張行己 楊尚文一作友。 呂祚 吳師中 葉昭隣 葉

伸 吳可 丘柔 江濤

政和二年壬辰 謝逸 翁孝昭孝一作化。 黃達 黃存道 丘棠 張敦書 鄧植 彭佶 吳競一作

競。 吳直亨 練居實練一作陳。 李正中 余文

三年癸巳 羅遲

五年乙未 黃偉 楊陞 曹穎士 黃積厚 梁之嘉 楊申 梁天衢 虞棐 吳安中 葉廷珪 葉

又 章芹

重和元年戊戌 卓特立 吳秉文 陳徹 章陟 陳觀國 葉發明 陳大中 范文

宣和二年庚子上舍釋褐 張憲武 龔日新

三年辛丑 謝嚮一作紹聖元年。建安人。 葉英傑 黃仲道 張參 陳瑀 魏懋 李京元祐六年亦有此

名 黃生 陳希孟 黃修

六年甲辰 嚴有翼 江祐之 黃處仁 祖日新 劉希亮劉一作謝 黃褒 黃悅一作元豐八年 周

适 江航 章驤 吳介然 黃朝佐 謝安仁一作民 張之邵 黃偉 范疇

建炎二年戊申 黃銓 呂希說呂一作吳 翁察 范周翰 張裳 丘之立一作立之 陳堯 歐陽穎

士 黃操

紹興二年壬子 陳廷傑 黃仲適 虞翔 葉榮 王勉 陳綱 范彥輝

八年戊午 黃箴 黃元量 黃萬頃 魏清臣 謝襲 黃拱 章綜一作儵 江廣 陳局

十二年壬戌 范文建一作達 陳元裕一作祐 程構一作擴 王旌一作旗

十五年乙丑 賈挺 王遵路 劉頎一作順 陳雲翼

十八年戊辰 丘密一作密

二十一年辛未 黃石 陳煥 魏諧 張孝立 蕭竑 施一靈

二十七年丁丑 虞機 葉齊山 裴叔度

三十年庚辰 虞少詹 虞韶

隆興元年癸未 范璋 陳洙 袁說友 徐鄰一作鄰 鄧高 葉肅 游岳 劉肅 施譽 翁國瑞

張咸 梅英

乾道二年丙戌 翁德廣 謝震 陳堯卿 鄭勛 葉才老 游零 黃碩

五年己丑 翁子翀改名子中

八年壬辰 張成招 李正通 盧特

淳熙二年乙未 吳挺

五年戊戌 詹炳 卓賁 陳申

八年辛丑 毛可釋一作擇 李睿 葉師德

十一年甲辰 李曼卿

十四年丁未 劉源 楊迪 吳魯卿

紹熙元年庚戌 程高 馬滂 吳遠

四年癸丑 李公明 吳璿

慶元二年丙辰 丁德元 翁珣 曹建國 劉拘 翁蜀

五年己未 陳梓嗣孫 王佖 何知 劉沐 楊圭 葉選 葉湜

嘉泰二年壬戌 丘櫛 劉文軌 陳熙甫 江沆 李芑 劉寅

開禧元年乙丑 呂稽叔 杜桂 劉升

嘉定元年戊辰 朱吉甫 甄世光 廖閩一作閩，一作閩。

四年辛未 吳文 王由之 艾丑 江孚江一作汪。 張洙

七年甲戌 熊源 劉世 范驤 陳晉卿

十年丁丑 黃自然 陳必大 劉天錫 范會之

十三年庚辰 黃應炳 張國梁 游定山 童英 張覺生 廖安



十六年癸未 黃清之 倪漢卿 鄭雷震 黃海

寶慶二年丙戌 廖武子 葉天藻

紹定二年己丑 楊可久 劉德權 周丙 游清夫 藍興祖 鄭彥實

五年壬辰 范純甫 劉公權 夙子興 蔡世德 周紆 朱繼芳一作繼

端平二年乙未 游渾 陳德夫 丁熙之 沈助

嘉熙二年戊戌 湯鑄 楊翼

淳祐元年辛丑 游旋叔 黃夢吳 葉采 龔榮卿 王恰 葉泰夫 毛天書 葉賓土 柯正夫

四年甲辰 陳可仁 吳述 趙汝照 陳謨 張桂子 陳子良 朱天雷 魏復

七年丁未 黃駟

寶祐四年甲寅 趙崇銘 劉夢駢 周清老 謝見斗 何德華

開慶元年己未 丘樞 陳德午 陳海 魏桂臣

薦辟、人材賢者雜見列傳中。

有傳

徐爽 徐的 吳師服子栻。栻子激。 吳秘 魏宏 吳申 徐洪 謝麟 徐大正 黃晁 張敦書

吳安中 葉廷珪 張以中 魏懋 呂希說 魏行可孫公壽。 魏孝友 陳庭傑 陳嗣孫梓。 陳元裕

虞韶 袁詵友 陳洙 翁德廣 黃洧 黃頌 葉湜 黃白然

徐爽 字武卿。博學能賦，試進士第一。天聖初，爲兩浙轉運使。蘇州多水患，爽度赤門以東，築上

石爲堤九十里，架橋樑四十餘，以濟不通。詔書褒美。後召知開封府。

徐的 字公準。補欽州軍事推官。言於轉運使鄭天監，請徙州瀕水以舒瘴疫。天監轉聞，從之。因奏留的使董役。的短衣持挺與役同勞，城廓、樓櫓、府舍、倉庫、溝渠、廛肆遂以畢備。遷大理寺丞。知吳縣。移梁山軍。通判常州。屬歲饑，出米食餓。累遷尚書屯田員外郎、知臨江軍。擢廣南西路提點刑獄。安化州蠻攻殺將吏，部卒畏誅，謀爲變。的馳至宜州，慰曉之，皆斂手聽命。改知舒州，徙荆湖北路轉運使。辰州蠻彭士義爲寇，的開示恩信，蠻黨悔過自歸。攝江陵府事，城中多惡少年，時時夜縱火，以便爲盜，一夜十數火，的籍其姓名，使相保任，火患遂絕。以兵部員外郎爲淮南、江浙、荆湖制置發運副使。奏通泰州海安、如皋縣漕河。詔未下，以便宜召兵夫濬治。出滯鹽三百萬，得錢八百萬緡。處制置發運使。(一)軍賊王倫起山東，轉掠淮南，的團兵待之。(二)會青州改遣裨將傅永吉追殺入歷陽。的與賞，遷工部郎中。復治泰州西溪河，發積鹽。加直昭文館。區希範、蒙趕寇衡、湘，命的招撫之。既至再宿，蠻酋相繼出降。三司以郊祠近，宜召還計事。既還，蠻復叛。除度支副使、荆湖南路安撫使。至桂陽，降者復衆。其欽景、石碇、華陰、水頭諸洞不降者，皆討平之。斬其酋熊可清等千餘級。竟卒於桂陽。

吳師服 字夢得。歷知蒙州。儂寇犯境，師服度州無城，兵不能抗，乃籍帑儲屬諸大姓，使輦而藏之，且聽民避賊，獨佩州印以守。賊知無所得，引去。改邵武軍。邵武產金，而品最下。朝廷嘗欲罪主藏者，師服力爭之，坐謫。後事直，以職方郎中致仕。元符中卒，壽百歲。子栻。

栻 字願道。崇寧中爲開封府推官。高麗自元豐後踰三十年不修貢，栻以給事中往諭。還，知開封

府，進工部、戶部侍郎。坐累削秩，知單州，爲宓子賤、巫馬期二賢請立祠，朝旨賜額。改知宛丘，公帑饒富，有庫二十四，拭書其門口：「陳宛丘，賜食錢，餼吏士，秩賓筵，勿浪費，法最先，保終吉，醴如泉。」大觀初，知蘇州、陳州、河中、成都府。召入奏事，除兵部侍郎。尋除龍圖閣直學士，再鎮成都，陛辭，徽宗稱其清謹循良。後知中山府，卒。子激。

激，字彥高。工詩能文，書畫俊逸。將命至金，被留。比還，命官翰苑。後遷待制、知深州。有《東山集》十餘卷。

吳秘，字君謨。爲侍御史，知諫院，以言事出知濠州，提點京東刑獄。好學著書，作《周易通神》五卷，註《揚子》，箋《太玄》。嘗歎《春秋三傳》同異，欲作集解，因乞閑郡，除同安。

魏宏，字損之。司理岳州，有囚不承罪，閉口不食，宏引問曰：「塞若鼻，則奈何？」囚懼，自服。人問其故，曰：「彼必善服氣。塞鼻，則氣結，故懼。」後遷朝奉郎，所歷多善政。

吳申，字景山。自南京國子監教授，召爲國子監說書。英宗初，爲睦宅都講。初，宗室坐序以爵，自賓主，講官位席設於東隅。申曰：「宗室當與講官分賓主，自以親族尊卑爲序。」卽不就坐，太宗正不能決，以奏聞。英宗是申說。神宗擢爲御史。時王陶以論宰相不押常朝班，出知陳州，申言：「風憲任重，宜留陶以勵其節。」又言內外官宜久任。又乞命內侍省保認內侍有無過犯，然後驅使，不得指名抽取，或在外作過，委開封府皇城司覺察之。尋知諫院。出知舒州。卒，詔賜其家絹二百疋。

徐洪，字孺興。父舉，尚書屯田郎中。洪爲人有志，讀書好其治亂得失之大旨，爲文長於辨說，其奔放馳騁，上下反復之際，有足壯也。未冠，聲號聞四方。初中進士，除洪州司戶參軍，不就。退居大江

之南。好儻非常之奇節，不肯少屈於人。居八年，以父命始強出，爲金谿主簿，非其好也。洪居家，遇人無親疏，豁如樂赴人急。爲主簿，不以非其好故怠其意，其治能有愛於人。金谿富人錮山林之利數十年，洪始奪之，而縣之貧人賴其利。攝安遠事，死安遠，年三十有二。曾南豐銘其墓。

謝麟 字應之。調會昌令。民被酒，夜與仇鬪，既歸而所親殺之，因誣仇。麟知死者無子，所親利其財，一訊得實。再調石首令。縣苦江水爲患，麟措米萬餘斛，疊石障堤千餘丈，人號謝公堤。通判辰州。知沅州。猺賊陷辰溪，麟招捕之。詔使經制宜州獠，降其種落四千八百人，納思廣洞民千四百室，得鎧甲二萬。加果州刺史，知荆南、涇、邠二州。元祐初，知潭州，加直龍圖閣，歷江陵、鳳翔府、渭、桂二州。融江有夷警，將吏議攻，麟以計平之。戍兵從北來，不習水上，麟部土人使極南，而北兵止屯近郡，賴以全者甚衆。卒於官。

徐大正 字得之。少舉進士。便馬善射，慷慨有氣略。其赴省試，過釣臺題詩，蘇東坡見之，遂與定交。及其人仕，齒髮不衰，輒欲處閑就幽。嘗築室北山下，爲閑軒居之，秦少游爲之記，而東坡爲賦詩，人以「北山學士」呼之。又少游贈詩：「建安自古多俊髦，徐子磊磊尤其豪。論兵說劍走湖海，身勤事左無所遭。綠水五校已屠膾，黑衣三衛羞徒勞。歸來故山便卜築，脫棄萬事輕鴻毛。」

黃覲 字東暉。知曹州之屬縣。童貫宣撫陝西，道出曹，郡縣羅拜於庭，覲挺立秉笏。貫密詢其姓名，覲遂棄官去。

張敦書 字載道。平生清白曠遠，遇事無凝滯。嘗爲弋陽丞，攝邑事，政平訟理，邑人爲立生祠。陞江夏令，卒官。

吳安中 字德固。宣和中爲建德丞。方臘竊發青溪，安中招降旁盜有力，特除御史臺主簿。歷知桂陽，監瓊州。所至有聲。

葉廷珪 字嗣忠。少嗜書，貧無可讀，其曾祖以差役至京，傾橐市歸，因得盡讀之。政和五年，累除武邑丞，府興燕山之役，廷珪三部軍餉，一粒不失。轉知德興縣，張邦昌偽詔至，不肯拜。中興後，差知福清縣，縣瀕海，民困鬻鹽，廷珪創增鹽錢，稍獲其便。又有《煮鹽利害圖》及書，州縣往往遵用之。召爲太常寺丞，輪對，乞搜訪遺書，補中秘府。高宗嘗問方今禮樂之事，廷珪以「兵革未息，禮樂未遑」爲對，秦檜聞之不悅，未幾，出知泉州、漳州。廷珪性故喜讀書，肄業郡學，升貢上庠，登名桂籍，牽絲人仕四十餘年，未嘗一日去手。每聞士大夫家有異書，無不借讀，讀卽無不終卷。嘗恨無貲，不能盡。寫作數十大冊，擇其可用者手抄之，名曰《海錄》；文多者爲《海錄雜事》，細碎者爲《海錄碎事》，其未知故事所出者爲《海錄未見事》，其事物興造之原爲《海錄事始》，其詩人佳句曾經前輩稱道者爲《海錄警句圖》，其有事跡著見作詩之繇爲《海錄本事詩》。獨《碎事》文字最多，初謂之《四錄》，言其自一字至四字有可取者皆錄之，後改爲《碎事》，每讀文字，見可錄者，信手錄之。既知泉州，公餘無事，因取類之，爲門七十五，爲卷二十有二，事多新奇未經前人引用者。復好爲詩，與吏部員外郎宋喬年以詩相善。喬年議論少許可，獨喜稱廷珪詩。在泉中，與傅自得一見如平生，會卽談詩，一日誦其所作《郡齋羅漢室》示自得，末句云：「幾多鴟鷂行間吏，衙退頻來禮釋迦。」自得謂廷珪：「予每讀韋蘇州詩，今朝郡齋間，欲問楞迦字，未嘗不廢卷太息，想像蘇州之風流蘊藉，而知其當時之政。泉，故劇郡，公使吏輩優游如此，此可觀公。」廷珪欣然以爲會心之友。

張以中 名禧，以字行。仕至都提舉。父沒，訃至，哀毀踰禮，自以親老在堂，宦游於外，生不能爲養，死不能爲殮，遂不食，哭死於道中。詔旌表其門曰純孝。

魏懋 字覺民。紹興初令零都。時江西盜起，出私帑犒勵弓級，誓與死守。有巨寇謝樵者來攻邑治，累日不能尅，遁去。大將岳飛將兵過境上，見其邑完，甚稱賞之。後范汝爲寇鄉縣，先墓被發，號慟棄官歸。比至，寇已平，緝得凶人，梟之墓右，上狀自劾。郡將義之，釋不問。後知南昌縣，卒。鄉太守魏玘爲誌其墓首，述其捍寇復讎之義，以爲訓。孫復中，延平法曹。

呂希說 爲劍浦令。剛介持名節，不爲苟合。

魏行可 字當時。建炎二年以太學生應募，見高宗曰：「四郊多壘，卿大夫之辱也，臣不敢愛其死。」高宗亦嗚咽久之。遂補右奉議郎、朝奉大夫、尚書禮部侍郎。使金，金人留之，行可遺金人書，誓以不戢自焚之禍。金人逼其仕，歎曰：「人誰無死？爲國猶生也。」仰天號慟，飲鴆而亡，時紹興六年。贈秘國修撰。先，已官其二子、一弟，至是復官其孫公壽。

公壽 字元齡。初尉龍游，以薦調莆陽法掾。直閣林孝澤家居，謝却賓客，公壽至，必延語竟日。執政黃祖舜聞其賢，招以書，欲論薦之。公壽曰：「招其來而薦之，非知我者。」竟不往。後爲韶州推官，以才智練達爲帥臣所知。

魏孝友 字移可。卓犖不羈。弱冠入太學，應詔論時政得失凡十餘疏。欽宗被留虜庭，孝友作歌一篇，情辭淒惋，傳播虜中。躬詣軍前，欲與粘罕辯，伏地兩日不得達。傅亮勤王至闕，檄爲幕府從事。慷慨請行迎高宗。比卽位，授迪功郎，令定遠。寇犯邑境，出兵與戰，邑僚先遁，孝友以孤軍弗支，遂死之。

贈朝奉郎。官一子。

陳庭傑 字朝彥。性資剛正，學問精深。顛仆州縣餘二十年，惡言詈詞，拂心逆意，處之晏如，爲張九成所稱。

陳扃 字純中。通判信州，有詔發郡兵戍江淮，郡兵欲因爲變，扃方攝郡，取首謀竄之，旋加撫諭，遂懾伏。以朱倬薦被召。陳康伯，郡人也，乞且留治所。除知信州，加直秘閣。遷提舉淮東常平茶鹽公事。乾道間，劉珙再薦，除江淮坑冶鑄錢使。孫梓。

梓 字處恭。注荔浦尉，易廣州司理，轉丞轄。李元礪叛，洞獠因之懷反側，州擇屬慰撫，獨梓承之，深入洞中，與其酋詣州，州官欲殺之，力爭不得，棄官去，諸臺勉回，酋得以全。州後有事於洞，洞獠拒曰：「必得陳丞乃可。」辟令信豐，治妖巫，葺黻舍。改知寧化，寧化民出入佩刀，梓曉諭之，俗爲之改。通判南雄。以薦知南恩，始到郡，例取公鑑若干，却之。有持一鹿獻者，如直償焉。江寇竊發，移鎮南安，皆相戒不敢犯，上民像祀之。陞本路漕使，屬部有餽贖，斥去，曰：「官以監司爲名，受所監臨賂，可乎？」吏以例冊進曰：「某也，可。」梓曰：「非君賜，皆不可。」就領安撫司事，年穀不登，力講荒政，誘致米商，卒爲稔歲。蠲合得金爲寄椿之庫，漕計充斥。積官朝請大夫。

陳元裕 字德寬。博學能文，補入辟雍。紹興十二年廷對，力詆和議。試教官八等，分教明州。湯鵬舉爲御史，首薦之，召除將作簿。

虞韶 字以成。舉進士。博通今古，善詩文，嘗纂集《小學日記》、《切要故事》行世。

袁詵友 嘉泰間守越州，有善政。累資政殿大學士、知樞密院。

陳洙 字聖涯。嗜學刻苦，博通群書。隆興初，試南宮，胡銓奇其文，欲以魁多士，詘於異議不果。後以銓薦歷官，知安豐縣，興學校，括廢田養士，修芍陂以興灌溉。性重義好施，家無贏餘。有貧貸者，鬻產不靳。終奉議郎。

翁德廣 剛直老成，孝友行誼，信宗黨。淳熙中，以朝奉郎知龍溪縣，實意愛民，不爲赫赫聲。朱文公守漳時，以刑獄、詞訟、財賦三事察其施爲，則見縣所解徒流以上罪，州司理院再行審鞠，囚無異辭，以爲委曲難問，縣得情矣，而刑獄清。縣理訴牒，日百餘紙，巧偽詆調，姦詐百出。隨事處決，終朝而畢，而未嘗有加責留禁之人，而詞訟平公。縣所賦人，龍溪最號浩繁，德廣止民追督，從容應辦，民自樂輸，而無抑配科斂之患，而財賦集。於是稱其治行，庶幾古循吏，而薦之朝。

黃洧 字清臣。父銳，官朝請郎，提點江淮、荆浙、廣南、福建坑冶公事。洧，以遺蔭補官，調高安尉。時江西群盜充斥，王師討捕相繼。洧以射士爲大軍前行，數與賊遇。秩滿，授興化軍司理參軍。問事既得其情，即復告以法所當得罪，且問：「若此寧有冤乎？」必反復無異詞，乃具獄上府。監紹興府錢，清鹽場。改宣教郎，知侯官縣。治尚寬簡，先教後刑。訟者反覆曉譬之，或失所爭去。民爭先爲里正，曰：「官無賦斂，里無盜賊，吏不敢囂號村落間，此時不可失也。」母江氏，故家福州，族黨衆盛，歲時往來，親親之意甚厚，而無一人敢以私事請者。簽書平海軍節度判官廳公事，郡守辛次膺、鄧柞、范如圭咸委重焉。秩滿造朝，給事黃祖舜薦之，欲留官中都，辭母老，求通判福州，以歸。未上，母沒，執喪哀毀。治葬勤劇。喪畢，除知南雄州。郡小，用度不饒，舊率法外科贖，至榷酒酤，增稅棚，洧一切罷之。州故與建、饒、贛三州代輸坑冶司歲貢白金各若干兩，故事：皆取於民以辦，洧請以郡大小爲差，詔悉蠲之。改廣南



東路提舉市舶，更爲轉運判官。廣學租，禮名士，益勸諸生學。番禺令近在帥守諸司治所，肆意爲姦，無按舉者，涓捕其吏屬劾之，一夕獄具，奏上閱實，抵罪以去，其餘不循法度以病民者，隨罪大小，以次繩治，於是一路肅然。市人困於官估，乞奪之擾，涓罷除之，復上奏，請均其法於諸路。丁籍久失，開收口賦之逋，均及鄰伍，流亡日衆，選吏覈除之。瀕海蛋戶數萬，生理至微，亦有役於州縣，涓悉免焉。按行所部，問疾理冤，不憚荒瘴。江浙歲饑，有旨發二廣義倉米航海詣永嘉。往時嘗有此役，吏並緣以擾民，而米不時達。涓處之有方，且并西道所發轉致之，不越月而至永嘉者八萬斛。改使荆湖南路。首論諸州以租米饋荆鄂、襄陽諸軍，地理之遠近不同，則運載之費出於民者宜有多寡。今諸州不能前知所當詣，因悉以遠地爲準，而取其費。謂「宜詔總領所前期下諸州，使知所當詣，而隨其遠近以收運費。異時郡縣預借民田租稅及他非法取民，如茶租，如甲札，如戶帖，如乳香，如茶引之屬，一切禁絕之。徽州縣勸民益廣陂塘，代以金穀」。尋被旨按行諸郡。人春陵界，聞榔、桂饑民相聚剽劫，卽日還車，披山通道，不一二日至榔，問賊所巢，乘夜深入，群盜不意，相顧駭愕，一夕潰去。涓召其酋豪，譬以禍福，慰安其餘，徽州運米，躬視賑給，遂以無事。兩郡民悉畫像生祠之。涓內剛外和，接物謙卑。人有片善，稱不容口。至論天下事，有不可意，則未嘗有所假借也。

黃碩 字興周。舉進士，對策稱孝宗意，親擢爲第。調平江教授。改宣教郎、鎮南簽判。再轉昭信軍，乞祠。年八十一。官至承議郎。

葉湜 字子是。舉進士，以父任調新化簿。遭母喪，服闋，從江淮宣司辟，以論軍事不合去。尉贛之寧都。改承事郎、丞惠安縣。時守泉者真文忠公。文忠嘗言：「僚佐之賢者數人，而湜與昭武李方子公

晦其最。公晦學邃氣平，本經術，明世用，子是堅彊介直，遇事無難意，處劇亡勸容。他人所不能爲與所不敢者，吾盡舉屬之。一人，勁易不同，同歸於是。」文忠既得二人之助，二人亦相得甚歡也。湜仕終安仁令。壯歲游朱文公之門，得直養之說。故其爲人，磊落明白，無所回隱。每自謂：平生與賓客言者，皆可語妻子。

黃自然 字元輔。嘉定末教授郡學，以理學誨諸生，齋宿問辯，率至夜分。及漕廣西，猶捐俸餘，助修禮殿。官至吏部侍郎。

皇朝科第子、午、卯、酉屬舉人，辰、戌、丑、未屬進士。

洪武十七年甲子 鄭輔 曹文 張文貞 張和俱府學。

十八年乙丑 鄭輔 曹文 張和 張文貞

二十年丁卯 吳道光 黃宗 李悌 姜宗德俱府學。 翁德

二十一年戊辰 翁德

二十三年庚午 陳觀 林安 董文貴 童文羅一作灝。 許壽俱府學。

二十四年辛未 按是年狀元許觀以死靖難削籍，仆題名碑。 林安 陳觀

二十六年癸酉 彭福 張貴

二十七年甲戌 張貴

建文元年己卯 按建文年號已經詔書仍舊。（四）今改洪武三十二年仍稱建文元年。 陳綬 劉德 李瑀 林保一作

保。

二年庚辰 劉德 李瑀 陳綬

四年壬午 張策

永樂二年甲申進士舊志有洪武三十五年一榜，考是歲革除，故元年開科而二年甲申會試。彭福

三年乙酉 饒賜一作賜。 林繼宗 謝善 林道安 魏福俱府學。 高第 張麒 王觀

四年丙戌 饒賜復姓陳。 林繼宗

六年戊子 徐表 張意 許繼俱府學。 吳安 黃鑄 張第

七年己丑 謝善

九年辛卯 孫應 張順府學。〔五〕 李惠 杜琮 杜自然

十年壬辰 高第

十二年甲午 鄭以誠 黃仲芳 任保 謝時清俱府學。 范忠 魏璫

十三年乙未 黃仲芳 魏璫

十五年丁酉 李衡府學。 陳祥

十八年庚子 陳悌 馮鐸 彭友 滕康 譚廣 范圓俱府學。 暨和

二十一年癸卯 吳惠清府學。 游賢

二十二年甲辰 陳第 范忠

宣德元年丙午 陳華

四年己酉 滕員府學。 吳智

十年乙卯 江漢府學。

正統九年甲子 馮鉉

景泰四年癸酉 劉璣府學。

七年丙子 范榮

天順三年己卯 徐鉉

成化元年乙酉 謝諫 吳文元

二年丙戌 吳文元智子。

四年戊子 滕祐康孫。

十年甲午 葉華府學。 范鑑 彭程

十三年丁酉 徐鍵 唐泊府學。 童錡

十七年辛丑 彭程

二十年甲辰 滕祐

二十二年丙午 張秀 童欽應天中式。

二十三年丁未 徐鍵

弘治二年己酉 黃塗仲芳子。

五年壬子 楊麟 范嵩

九年丙辰 張秀

十四年辛酉 謝龍府學。 唐汶

十五年壬戌 范嵩

正德二年丁卯 謝純

五年庚午 田賦府學。

九年甲戌 田賦

十一年丙子 李默府學。 王士策

十四年己卯 楊紹祖 王應詔俱府學。 高山

十六年辛巳進士是年以武廟南巡故，改庚辰爲辛巳。 李默

嘉靖元年壬午 陳儒祥 范宣嵩子。

四年乙酉 張雲漢

十一年壬辰 王應詔

十三年甲午 滕鶴齡 徐行俱府學。

十六年丁酉 陳濡應天中式。

二十二年癸卯 魏世熙

二十五年丙午 滕大本

二十八年己酉 張文獻

三十一年壬子 程實 張永昌 熊曉

三十四年乙卯 陳紀府學。 滕伯輪鶴鳴子。

三十五年丙辰 陳紀

三十七年戊午 黃居敬

四十年辛酉 趙秉忠解元。 張震時 朱東光府學。 陳應秋

四十一年壬戌 滕伯輪

四十三年甲子 楊道輔府學。 吳中禎 李應暉

四十四年乙丑 程實

隆慶元年丁卯 郭臣府學。 魏良臣 陳應熙應秋兄。 滕甘霖 湯謨

四年庚午 張沛

五年辛未 魏良臣

萬曆元年癸酉 黃應龍 謝桂芳俱府學。 虞大順

二年甲戌 趙秉忠

四年丙子 吳應陽府學。 龔懷義

五年丁丑 陳應熙

七年己卯 陳焜 陳燭府學。 (六) 朱東魯 陳三樂順天中式。

十年壬午 葉宗舜府學。 謝朝佐

十三年乙酉 徐夢熊

十四年丙戌 謝朝佐

十六年戊子 任本信

十九年辛卯 陳兆芳紀係。府學。 陳思尹 楊朝綰 周武烈

二十五年丁酉 李懋治

二十八年庚子 鄭際明府學。

三十一年癸卯 范燧 徐夢星順天中式。

三十四年丙午 劉道生第四人。〔七〕 任可受府學。 徐士奇

三十七年己酉 謝紹芳順天中式。

四十年壬子 楊廷植 徐天丁 袁文新順天中式。

四十三年乙卯 陳國鑰

四十六年戊午 李日登 蘇眉俊

四十七年己未 陳國鑰

薦辟、貢士、監生賢者雜見列傳中。

有傳

李鐸 趙友士 黃琮 陳琪 童叙 林道安 陳賜 杜琮 鄭以誠 黃仲芳子璠。 彭友 滕

康孫祐。祐係孫員。員子弘，〔八〕曾孫伯輪。 吳智子文元。 彭程 徐鍵 范嵩 田賦 高山 雷燮 李默

謝元 鄭明 范亮 徐淹 楊松 陳儒祥 陳濡 魏世熙 滕大本 張文獻 陳紀 黃居敬 池鍾

慶 張震時 程實 張沛 魏良臣 黃應龍 虞大順 吳從周 陳應熙 陳煊 謝朝佐 張鶴鳴  
李兆庚 張衷 徐性成 楊汝材

李鐸 涉獵《五經》，尤邃於《易》。洪武中，以明經薦授監利教諭。爲文一主傳註，不尚穿鑿。誘掖爲多。

趙友士 字志道，宋宗室裔。純厚樂易。洪武間，以明經舉爲府學訓導。正己率下，生徒樂從。官至國子助教。

黃琮 字用周。仕江西按察僉事，得風憲體。

陳琪 字良玉。永樂初由監生除常州通判。嘗部丁夫役天壽山，會車駕臨幸，上怒工役不力作，杖總督成山侯三十。同事者曰：「侯且若此，吾儕齏粉矣。」時有怒琪者，同事爲琪恐，或勸自引決。琪曰：「家有老親，豈可更遺其累？明主必不深求也。」翼日，有旨：「但杖如成山數而已。」郡有猾，官吏莫誰何，琪繫至庭，杖死之，合郡歡舞，望府門而拜。有富室周者，語人曰：「陳西衙杯茗款我，千金爲壽。」或告琪，琪若不聞也。未幾，檄治孟瀆河。召周勅之曰：「聞欲千金壽我。與其私一人，孰若公之孟瀆之河堤圯？吾若乃公，乃公爲我辦此乎？」曰：「謹如教。」遂完堤，堤甚堅。秩滿，民詣闕保留。進奉直大夫，協正庶尹，仍通判常州府事。

童叙 字景和。好學至孝。永樂四年，以孝廉薦至京。念母老，乞終養，詔許之。所著有《臨清集》。

林道安 洪熙間由給事中左遷德安丞，寬厚愛民，去而見思。



陳賜 字孟嘉。舉進士，授監察御史，遷知南雄府。蒞事精敏，寬猛得宜。廟學久敝，悉加修治。洪熙中，疏豁虛糧二千餘石，民困蘇焉。

杜琮 字孟清。永樂初應詔預修《大典》，領應天府。辛卯鄉薦，歷上高、全椒二學教諭。秩滿之京，吏部尚書王直聞其名，延之教子。其子稍失禮，拂袖歸。直聞，益重之。選監察御史，陞山東布政司左參議。皆舉其職。卒於官。

鄭以誠 字彥思。善籀文。自鄉舉擢吏科給事中。陞雲南參議。招撫干崖、南甸流民二千五百餘戶，開墾通海、河西二縣荒田二千五百餘畝。土官刺馬非、南八關殺不已，承命往諭解之。致仕，卒。

黃仲芳 字時茂。永樂中舉進士，選翰林庶吉士。仁宗在東宮，嘗語楊士奇曰：「孤介自守，英邁異人，惟見一黃仲芳也。」出知東陽，首鋤豪民奸吏。鄰郡有盜犯境，計殄之。市有三虎，移文城隍，射中其一，其二遁去。秩滿，邑民詣藩臬懇留，弗獲。大臣以才行薦擢湖廣左參議。施州有僞土官殺兄奪其官，拒捕十八年，設方略擒之。遷雲南右參政。尋奉勅選將平麓川夷，靖遠伯王驥薦爲副。時宦王振專權，仲芳自外疏論之，會振敗，得免。卒於官。子塏。

塏 字廷冕。任東莞縣，調清遠。剛方廉敏。歷官九載，囊橐蕭然。

彭友 字信之。授桐廬教諭，改分水，再改曹縣，陞荊州教授。所在，嚴教條，敦士習，學者懷之。

滕康 字景晉。正統中通判松江，改惠州。郡病水溢，而海運益急，力請得近輸，又請減虛稅之病民者。廣寇黃蕭養起，竭力固守，寇偵知有備，引去。藩臬交薦，陞惠州知府。孫祐。

祐 字吉甫。舉成化進士，授行人司行人。弘治初，擢監察御史。抗疏論傳奉官不宜濫授，太常清

職，不宜濫及黃冠。孝穆紀太后，孝宗生母也。太后，廣西賀人，早薨，莫知其親族。孝宗登極，追念太后，遣使人賀訪之。有司漫舉應詔，因得冒官賜宅。未幾，有訐其偽者，詔祐往究。祐微服問道，與猺獠叟媼指顧究質，潛跡其廬井丘壠以聞，偽者遂得罪。祐早孤，事繼母如所生，友弟睦族，置五世祭田。待母黨，處故舊甚厚。侄孫員。

員 字尚然。正統初授詔州同知。詔地介江、閩、湖三藩之衝，客戶倍土著，少拂其意，輒相煽弗靖。翁源、乳源尤甚。員巡行開諭，許其占籍，遂與編戶無異。值歲侵，傾囊告糴鄰郡，命里正籍其尤窘者，朝夕給之。郡治故爲淮王府，王遷國饒州，復爲郡治，規制侈大，且吏胥無所於處。員削雕還樸，復其常式。度地爲吏舍，限其出人，絕交構之弊。異時，吏鮮通律，員削牘示之。以憂去。服闋，耆老數百人詣闕，乞再任，會代者已赴，遂擢禮部郎中。正統己巳，（九）扈駕北征，歿於土木之難。贈奉政大夫，官其子弘。

弘 爲邵陽令。弘子澍，海州同知，有廉能聲。澍子鶴齡，南安府判，以朴孝聞。鶴齡子伯棠，豐城訓導，廉直著稱，弟伯輪。

伯輪 字汝載。令番禺，以德禮道民，若嚴師在上，不敢一日通蕩而嬉。會兵鼎沸，擊太守門，諸司捷戶避之，伯輪出，乃不至亂。人爲吏部郎。出督學兩浙，聲教整嚴。所掄錄，號得人。歷廣東按察使、布政使。粵人葉春及，以擬之先輩仕粵者，莆田彭公韶，臨海陳公選，華容劉公大夏、蒼梧吳公廷舉。擢都御史，操江南京，條上江防八事。督撫浙江，值歲凶，開倉煮粥，令材官四出告糴，芻粟鬻至。力疏請改折漕綱，停減織造，並見報可。颶風起海鹽，防海塘堤震壞，設方略發帑修築。春汛，海上忽島夷集數艘

煌將入犯，急率諸將擊之，捕首虜百。事聞，恩賚有差。頃之，遭疾卒。訃聞，贈兵部左侍郎。蔭一子，諭祭葬。

吳智 字本性。以舉人授弋陽訓導。陞曲江教諭，擢南京國子助教，致仕。爲人魁偉凝重，教導有方，時稱師儒之表。子文元。

文元 字善長。舉進士，選監察御史，巡按浙江。禁奸革弊，無所忌畏。歲當鄉試，鎮守內官以生員試事干請，文元摘姓名斥出之。陞浙江副使，建議海道便宜十事，上命巡視大臣議行。陞河南按察使，致仕。文元端重詳雅，居官存大體，處家庭至篤，居鄉里恂恂，無識不識，知其爲長者也。子正，儀真訓導，倜儻有志節，詩篇豪放，書亦道勁。

彭程 字萬里。舉進士，授戶部主事，左遷隰州同知，轉知州，擢僉事兵備宣府。所著有《兵法纂》。徐鍵 字啓之。舉進士，授戶部主事，歷員外郎中，奉命賞邊，贏餘悉以歸公。出知高州府。恬澹自處，鄉邦重之。

范嵩 字邦秀。父澄，見韋布。嵩舉進士，授寧國府推官，廉明有威，數決疑獄。六合有豪利某，家有贏貲，素以賄結近侍權要及中貴人，恣睢豪橫，前後部使者莫能舉按。巡按御史黎鳳以屬嵩，嵩廉得其殺人不法數事，置之辟。豪持重賄，人賂逆瑾，瑾詐旨逮鳳及嵩至京，未及推鞠，豪已斃獄，事得寢。擢監察御史，巡視京城。瑾有校尉某，橫甚，嵩因事召咎之，瑾來索賂，又復不與。會奉命校勘兩廣錢穀，事未竣，遭外艱，遂因考察，調之外任。服除，補襄陽府推官，法嚴心恕，多所平反。轉南儀制主事，主客郎中，陞河南僉事，廣西兵備副使。勦捕賊首黃武夫等，有白金、絲幣之賜。丁內艱，服除，補廣東。擒勦

臨高縣劇賊王來等，空其巢。選兵壯，立營防，遏萬瓊黎賊出人之路，皆脅息不敢變。有民黃桂商歸，姑往訊之，晨歸，爲賊所殺，焚其屍，姑夫訟桂。嵩心疑之，騎出城東門眺望，有異煙，導馬首至焚屍處，撻得婦人棄冠，默示其夫，卽婦物也。因密訪姓名，捕得首飾抵罪，人以爲神。陞廣西按察使、雲南右布政使，轉左。尋陞右副都御史，巡撫四川。時番酋據亂，嵩遣將運謀，先後斬獲賊首擦舌等六十九顆，擒獲陳汴等四十三人。因請修建武學，畜養將材以備邊。復言：「中國有夷狄，如晝有夜，陽有陰。古今制敵之方，惟嚴內外之防，治以不治而已。蜀地西接吐番，外連南詔，政教罕加，犬羊難馭。先朝控制整飭，至備至周。爲將者誠能固封疆、備邊塞、設險訓師，則威武自肅，盜賊自弭。夫何往年邊士以安靜爲無功，每窺伺番夷臨邊樵採，人少勢孤，輒出不意擒殺之，解報首級，以爲犯邊。彼見無辜被殺，糾集番衆索償報讎，大爲邊徼之害。又有貪功官員，罔顧事機，一概請兵征勦。不知軍旅一興，供餽萬億，鋒鏑之下，玉石俱焚。夫夷狄，禽獸耳，其入我田園，侵我稼穡，我縛執之，獵取之，宜也。若其飛翔山林之間，奔馳平曠之野，固其所也。乃恣貪恃力，過爲獵取，豈安內攘外之道哉？臣欲按行各邊將領守備等官，除犯逆干紀者，聽其殲勦立功，以靖邊塵。若所犯只是鼠竊，惟當固守嚴備，不許幸利饕功，虛張首級，以致勞師費財。若守邊盈年，寧靜而無戰陣之危，聽臣從宜犒賞。若二年以上，邊土保安而無起戎之憂，聽臣奏保陞用。庶幾守在四夷，有拒勿迫之道。」朝議韙之。陞南工部侍郎。未及期，會其子宣死，懇疏致仕。年八十餘，卒。嵩儀貌凝莊，談吐清亮，禮恭意下，生平不作一睚眦冰炭。恬澹勢利，不戀官爵，故以名位壽考終。宣，年十七領鄉薦，注意天下事，天下事悉考究有成說，年僅三十，士論惜之。

田賦 字用周。舉進士，選刑科給事中，奉勅攢漕兩淮，陞池州知府，調繁淮安。善詩文，所著有《齊

山志》、《紀行錄》、《管鳴集》、《巡漕集》、《困橫集》、《野樵雜言》。

高山 字仰止。家貧，授徒，隨所入分賑諸弟。以舉人訓導丹徒。終南安教授。所至，士尊師模。

雷燮 正德末，以貢士知平樂縣。值猺獠群起，民棄家逃賊，相聚依險自固。燮下令招撫，復業者免其賦，貧無牛種者官給之。郡志註：茲浦知縣，恐縣平樂改調。

李默 字時言。舉進士，選翰林庶吉士。明年，嘉靖改元，修迎立功，欲倣成祖封尚書茹瑺故事，擬執政封爵，默上執政書規之。改戶部主事。陞兵部員外郎。大同卒剽悍，動輒嘯呼，默奉命往覓軍士戰馬。至易州，下令約束。翼日，出居庸關，分給軍馬以數萬計，無譁者。頃之，胡侍郎瓚卿命赴鎮經略，措置乖方，卒復訛。默抗疏論列，請亟易帥。瓚即日召還，而大同兵變遂定。調吏部文選，陞驗封郎中。議復開國勳臣誠意伯暨常、李、湯、鄧四氏爵蔭。真人邵元和以符術方貴幸，請封誥，默奏勿予，朝論韙之。

屬天下計吏至，白尚書桂萼令條上境內便宜，輒加論次。編《輿地圖》若干卷，凡天下形勢、要害、兵賦盈訕，與夫修攘罷置之略悉具。尚書奇其書，以表奏。世宗嘉悅，出示輔臣，命藏副內閣。而尚書推薦默爲國子司業，默辭弗就。兩與文武會試，文試得葛守禮等二十三人，武試得陸炳等四十餘人，多知名士。當武試畢時，就兵部宴。兵部王尚書者，故侍郎吏部，常就宴，以屬官禮待默，默曰：「默本公屬，卿命與試，則賓也，何得貶賓禮？」稍與競。王尚書疏劾默，坐謫寧國府通判。默雖坐謫，顧世宗心是默所持，以此注識之矣。默判寧國，周咨隱痒，陶範髦俊，纂修郡乘，建靖難死亡陳尚書祠，精心受事，不厭薄官守。陞廣東僉事，主屯、鹽二政。署有大榕樹根蟠門，默官暇，輯國朝典故其中，名《孤樹哀談》。陞雲南副使，督學政，首經術，崇行誼，購遺書，廣厲學官，表賢者墓，窮荒僻遠，文學嚮風。歷浙江參政、按察使、左右布

政，大都端毅廉直，所至有聲。久之，大臣以公輔器薦起太常卿，掌南京國子監祭酒事，修監規，立饌法及殯賻諸儀，著爲令，甲官屬。博士等官得備臺諫選，自默發之。陞禮部右侍郎，改吏部右侍郎，尋轉左。奉旨撰《庚戌進士題名記》。虜大人寇，京城諸門戒嚴。默奉旨守正陽門，調營兵五千，畫守甚設，而奏令開門，無困居人。虜尋引去。陞吏部尚書。制：冢宰，非部長卿有殊望者弗與。世宗知默，特以卿貳陟，異數也。時相嵩當事。前此，吏部率以疑事嘗嵩，嵩得從中持之。默處置堅決，莫能短長，奏輒報可，無有留端爲嵩地者，遂與嵩却。久之，遼東巡撫缺，默推張布政臬，臬雖嵩鄉人，而素疎。上偶問嵩，嵩遂力言不任。上怒。而先是，咸寧侯鸞以千請不售，爲密書疑上。上遂罷默歸。明年，鸞以逆誅。會吏部尚書員缺，廷推數人，御批特令默復職。召直無逸殿，許乘馬禁中，與玄撰稱旨，御書「忠好」二字於名札間，時出內府金幣，徹御前饌賞賚。未幾，加太子少保，復兼翰林學士，命代祀文廟，又代祀先聖先師於永明後殿。方有爰立之命，相嵩每阻其進。客有諷默明哲自保者，默嘆曰：「吾備位公卿，年幾六十，尚復何求？惟有致身耳。」屬歲大覲，默內贊穆清，外秉吏計，戒門下毋人一賓客，卽同直大臣亦浹月不相往來，相嵩無所得爲人地，以此滋不悅。而先是，嵩子世蕃規機利，多請託侵官，陰執國政。默微諷嵩曰：「公身許國久，墳墓濡降，當在夢寐，曷不令嗣君一掃展？」嵩曰：「然。吾將念之。」久之，不遣。復爲請，嵩曰：「孰令我一子而不長侍膝下乎？君數請去，何言之亟也？」默曰：「外言藉藉，宜暫行以息之。」嵩忿然作色曰：「謂煩諸曹，不過交游多關白，其便亦無大故，何遽奪吾父子？依今在我也，人皆藉吾子者云何？無寧有意督過之也？」於是，怨默益深。會工部侍郎趙文華當浙，直禦寇，欲攘功，請視師，及還報，自施勞伐，謂本兵在掌握，默不爲引，大失望。世宗念倭殊未弭，方憂之甚，意趙文華虛言滅賊，時時間相

嵩狀。嵩爲支吾對。文華始大懼。遂密奏：「臣還京時，零賊可指日滅，至今未殄，坐吏部所選督撫不稱。此繇尚書默恨臣劾逮其同鄉張經，爲之報復，默黨逆不容誅。抑默部試選人策目，引用漢武、唐憲始以英銳興，晚節任用匪人至敗。默謗訕，無憂國奉公之心。」世宗大怒，逮默詔獄，論死。始，張經赴西市，默頓足歎，人有先告嵩矣，又數數於公卿間：「摧折文華過當。」至是，兩人引繩批根，以償其所交惡夙憾。默既得罪，踰年，從獄中再上書，世宗注覽久之。縉紳大夫咸知天威漸霽，冀其復用，而默溘然卒矣。隆慶改元，南吏科給事中岑用賓等爲默訟冤，詔復太子少保、吏部尚書，兼翰林學士，遣官祭葬。萬曆十三年，追贈太子太保，謚肅愍，錄其孫銓爲國子生。默博學任節，矜蹕奮激，言論截烈，屢蹈危機，飢餓自如。至於擘畫經濟，揚摧風雅，嚶嚶乎星貫川沛，發爲文章，淵閎俊達，有秦漢之風。所著有《群玉樓稿》、《孤樹哀談》、《建安人物傳》、《朱子年譜》諸書，皆傳於世。

謝元 字朝之。以貢授蘇州府訓導，轉教諭。篤友義，與丘湘交最善。長於文辭。

鄭明 字希賢。博白教諭。清若自將，口不及貧。晚年受徒自給。衣冠終日，不忒閑居。

范亮 爲太平縣丞。歲饑，先賑後聞，所活萬餘。去任，民立生祠，歲時致禮申問。

徐淹 字世達，一字希范。友人方帖遠游，適有母喪，淹出貲殯之。訓導海豐，學宮頽壞，捐俸修治。

楊松 字孟岳。正德中貢士，授廣州府訓導。作人育才，時時以禮教諸生。學士黃佐爲諸生時，貧甚，松却其贄，重遺贈之。佐父，善星曆，人多奇中，而松謂之曰：「子占人多中，余以文占汝子，亦奇中如子矣。」佐果以其年魁多士。以母喪歸，貧甚，莫自存也，乃時時自謂宇宙道義場中不會饑餓倒人。服闋，

復授廣之香山。香山僻在海隅，士習樂游衍，耽聲利，松時時謂之曰：「陳公甫非汝鄰邑偉儒乎？彼其一孝廉，倡道白沙，崛起南服，至今江門煙水、白龍池之風月，揭揭如在。同時握鼎鼐，持衡樞者，今安在也？而況如諸生者樂游衍，耽聲利哉？」諸生聞言，咸躍然感奮。卒於官。

陳儒祥 字明瑞。官至通安知州。歷仕，一力自隨，食無重味，例金贖鍰，盡却絕之。州地故不能通水，屢被旱災。儒祥相地開河，教爲水車，遂成沃壤。及歸，行李蕭然。鄉居，子孫困弱，不知所終。

陳濡 知無爲州。有惠政。歸家，敬祭祀，恭丘墓，以孝友率子孫。

魏世熙 嘉靖中令平遠。海寇至，設奇禦敵，四境賴焉。尋解任歸。當道上功於朝，有銀幣之賜。

滕大本 字子元。嘉靖中任廣昌令，有惠政。以親老歸養。將歿，預知了期，人謂悟化。

張文獻 字用徵。嘉靖中令英德，平流賊，却例金，守正不阿。改調定安，關節不通，豪右懾服。爲海忠介瑞所重。

陳紀 字仲理。父樅，見韋布。紀舉進士，初授漢陽令。浙中倭難，其守者遂調紀於鄞縣。是時，督帥方欲招撫王直，大索諸縣牛酒犒師，紀挺身白罷之。拮据多方，保障有賴。調爲貴州道御史，三疏時弊，世宗嘉納。陪祀郊天，執禮忤分宜相，卒莫能誅。分守嶺東，大帥妄殺職功，紀發其狀，論罪。歷淮陽副使。以父老乞歸。生平不以法假人，不私人一物，亦不一物自私。

黃居敬 字欽甫。歷亳州知州。敦謹禮讓，恬然自守。

池鍾慶 字必大。博極群書，剛介自持。與李肅愍默友善，肅愍擢冢宰，報至，慶方與對弈，終局自如。讀書窗下，雷擊窗樹，神色宴爾。嘉靖間，爲蕭山訓導。年九十餘卒。



張震時 以舉人授南寧推官，平反大獄，民服其斷。陞廣州府同知，有政聲，以母老歸養。

程實 字時彰。令秀水。執法除害，靡所假借。轉判大名府。以母老乞歸。

張沛 字德夫。隆慶中舉人。歷沅州知州。賑飢活民。鎮兵缺餉，洶洶且變，沛諭之，咸羅拜受命。及歸，行李蕭然。二十餘年，清醇真率。以孝友名其鄉。

魏良臣 字以忠。隆慶中舉進士，令崇明，邑有倭警，民復相率爲奸，設法平之。尋補溧陽，歲不熟，有易子者，捐俸賑之。入爲工部郎，築城建殿，多所營造。出知南寧府，平土人之亂，放交趾人貢，不受例金，捐椎關之羨以備邊儲。再補鄖陽，會大旱，人心思亂。爲罷一切煩苛之令，民咸感悅。轉廣西督學副使，卒。

黃應龍 字國瑞。署長葛學諭。賑貧却贄。陞知岑溪縣，拒李鎮守兵餉常例，撫陳三峰猖獗渠寇，創丁蘭祠，造黃華橋。邑裸獠獠，俗尚刁奸，應龍爲之蘇奸艾雜，民用按堵。離任，行李蕭然，軍民遮留之。

虞大順 字汝孝。性倜儻，輕財好義，不屑脂韋。令贛榆，甫載餘，拂衣歸。囊篋蕭然。

吳從周 字世憲。博學善文，以孝友爲學使宗臣所稱。萬曆中應貢，廷試第一。訓導海鹽，與友生商榷今古。致仕，杜門。所著有《石匏集》、《史辯》、《書疑》四卷。〔一〕

陳應熙 字仲穆。孝子榮玄孫也。舉進士，授潮州府推官，訊鞫論報，迎刃而解。擢戶部郎，權河西務，中官撓政，商賈不通，熙上狀置法。尋監兌湖廣，歲大歉，請易漕粟以折色，於是得留粟數萬斛，賴活者衆。陞員外郎，卒。

陳焜 官國子博士，卒。有孝友廉靜之譽。

謝朝佐 字良輔。父明揚，爲人剛直不阿，以歲貢遙授訓導。朝佐舉進士，授安化令，調繁南城。清除濫冒，不避權貴。出久冤之獄。捐貲賑濟。旱疫死者，構棺之。召入爲御史。屢上章言事，皆切時政。卿命巡按廣右，尋卒。

張鶴鳴 山歲貢任建昌訓導，署新城縣印，有「張老不費百姓一文錢」之稱。終羅源教諭，致仕。

李兆庚 字啓新。繇歲貢，初授太倉州同知，歲值旱疫，多方拯救。遷崇明令，設法防倭，殯埋白骨，屢出冤獄。去日，百姓追送於崑山。

張衷 字君正。繇歲貢歷任晉州學正。耳目嚴冷，冰蘖自甘。

徐性成 字仲善。繇歲貢歷通判廣信郡。雲霧山，礦穴也，舊患礦盜，封禁已久，性成掌府事，值中，官奉旨開採，多方阻罷。累署郡邑篆，興利除害，爲民造福。轉雲南祿勸州，致仕。

楊汝材 字以達。行誼恬卓，博古籀文。以貢授訓導，竟歸。未幾卒。

〔校記〕

〔一〕「縉紳」二字，各本原脫，據本書體例補。

〔二〕「處制宣發運使」上，《宋史》本傳有「遂爲」二字。

〔三〕「的團兵待之」，各本原作「伯團兵待之」，據文義改。

〔四〕「建文」，各本原衍「元」字，據文義刪。

〔五〕〔六〕「學」字，各本原脫，據文義補。

〔七〕「人」字，各本原脫，據文義補。

〔八〕「子弘」二字，各本原脫，據本傳補。

〔九〕「正統己巳」，各本原作「正統乙巳」，據《明史·英宗本紀》及方詩銘《中國歷史紀年表》改。

〔一〇〕「家有贏貲」，各本原作「有家贏貲」，據文義改。

〔一一〕「四卷」，疑誤。

閩書卷之九十五

英舊志 縉紳

建寧府 建陽縣

唐

熊博 熊袞

熊博 其父避黃巢亂，自南昌徙閩。博有財勇，尚氣節。中和四年，陳巖爲建州刺史，時州治被巢焚燬，博寓治建陽，巖卒徐範據州叛以應王潮，博遂遇害。

熊袞 其先南昌人。昭宗時爲兵部尚書兼御史大夫。性至孝。時當亂後，例無俸給，惟立功時有賞賚，袞悉散之部下。父喪不能葬，晝夜號泣，天忽雨錢三日，始畢葬事。所剩錢盡舉人官。其鄰里僕隸得者，悉化爲土。後人稱「忠孝雨錢公」。

五代唐進士

長興□□年〔一〕 江文蔚 阮思道  
有傳

## 江文蔚

江文蔚 字君章。爲河南府巡官。有高才，與韓熙載名相上下，而熙載不持律操，文蔚既擅價一時，又飾勵行義。自爲郎時，南唐禮文草創，文蔚撰述朝覲、會同、祭祀、宴饗之儀上之，遂正朝綱。後，元宗遷文蔚諫職，以熙載知制誥，論者以爲各當其任。文蔚秉心貞亮，不事阿徇。時宋齊丘拜諫議大夫，馮延己爲相，魏岑亦居近密，文蔚上表諫云：「三公移去，未稱民情，四罪盡除，方明國典。」元宗惡其人，可黜爲江州司士。延己尋亦罷相。文蔚既貶，奉母以行，怡然不以遷謫爲意。久之，詔還爲翰林學士、禮部侍郎，與徐鉉同掌詞命。卒，謚曰簡。有《唐吳英秀賦》七十二卷、《桂香賦集》三十卷。子拯，見後。

## 宋科第

端拱元年戊子 葉齊第一人。

江拯第二人。後唐文蔚子。

李晏如 陳應元

二年己丑 阮中度思道從子。

咸平元年戊戌 阮昌齡思道子。

景德二年乙巳 江任拯子。

大中祥符元年戊申 陳儼

天聖二年甲子 宋咸

五年丁卯 阮逸

景祐元年甲戌 陳升之儼子。

慶曆二年壬午 陳洙

嘉祐二年丁酉 范貺 陳郭

六年辛丑 傅鎔一作容。

八年癸卯 陳軒

熙寧三年庚戌 施述

六年癸丑 江側 江汝舟側族了。 江翊

九年丙辰 陳思錫第三人。 江立 熊俊民

元豐二年己未 游醇

五年壬戌 游酢醇從弟。 熊敦常 江準

八年乙丑 詹時升 范致祥

元祐三年戊辰 范致虛

六年辛未 江翊一作雄。 游醇

政和二年壬辰 江杞

五年乙未 江鈿

重和元年戊戌 游其藩舊作「其潛」，建安人。

宣和三年辛丑 游操醇從侄。 江奇一作錡。 傅仇作銑。

上舍釋褐 呂祉

六年甲辰 丘之起

建炎二年戊申 魏懋 吳樞

紹興二年壬子 丘之奇 劉淮

十二年壬戌 江符

十八年戊辰 陳旦 朱熹

二十一年辛未 宋翔 游峇 熊克韋布舊子。郡志作二十七年進士。

乾道五年己丑 熊可量 周明仲

八年壬辰 劉燾特奏懋了。忠簡頌之族。懋特奏，失其年。

淳熙二年乙未 劉崇之忠簡頌之弟。

五年戊戌 劉炳燾弟。 熊以寧

紹熙四年癸丑 陳總龜邑志作紹興五年。劉填懋係。

余翼

慶元五年己未 熊節 劉銓炳孫。劉炯懋子。

嘉泰二年壬戌 游金西

嘉定七年甲戌 宋鞏 熊剛大

十年丁丑 宋慈 劉子實

十三年庚辰 葉味道

紹定二年己丑 蔡杭諒玄係，韋布沈子。

淳祐元年辛丑 葉采味道子。

四年甲辰 宋秉係

咸淳十年甲戌 熊禾一作鉢

劉應李初名榮，炳孫。

熊新民

薦辟、任子賢者雜見列傳中。

有傳

阮思道子昌齡，從子中度。

葉齊 江拯子任，侄黜。

陳儼子升之，族人亞。

宋咸五孫翔。(二)

阮逸 陳

洙 陳郭 陳軒 江側族子汝舟。

陳師錫

江立

游醇從弟酢，從侄操，族人九言。九言弟九功。

江準

詹

時升 范致虛

江翹

江杞

江錕

江琦

呂祉

吳樞

施提

陳旦

阮思道 字元恭。穎異絕人，讀書一覽成誦。中南唐進士。歸宋，爲史館檢討，歷守韶、衢、永三州，

有政聲。終駕部員外郎。子昌齡。從子中度。

昌齡 字大年。年十七，試《海不揚波賦》，楊億稱其奇才。咸平初，進士甲科。仕劍外，有異政，爲

張詠所知。後得代，徒行北歸。詠貽以乘馬，仍薦於朝。終殿中丞。

中度 字正甫。博學邃《易》，居官仁恕。嘗知密城縣，盜過私相戒曰：「長官賢者，勿暴其民。」官至

員外郎。

葉齊 字思可。端拱元年中第，覆試擢第一，爲館陶令。會契丹擾邊，太宗幸河北，或言齊督芻糧不

足軍興，太宗怒，將罪之，齊曰：「使虜聞此，將輕中國。以臣計之，糧草可充十年。」太宗悟釋之，面授著

作佐郎、直史館。通判潁州，尋乞歸。

江拯 字公濟。歷典數郡，政聲籍甚。以太常少卿致仕。子任。侄黜。



任 有詩名。以秘閣校理知泰州。楊億稱之。

顥 字公舉。爲魯山令。邑多曠土，亢魃連歲，顥以黍稻性耐旱，宜高原，乃自建邑取種，教民藝殖，自是皆爲廩田。

陳儼 字仲莊。簿安福縣，歲饑，請州守發賑不聽，乃自發之，守怒。上狀自劾。攝常熟令，興利除害，濬福山河以溉民田。終泰州推官。累以才行薦。子升之。

升之 字暘叔，初名旭。舉進士，歷知封州、漢陽軍，入爲監察御史、右司諫，改起居舍人、知諫院。請抑絕內降，詔許有司執奏勿下。俗好藏去交親尺牘，有訟則轉相告言，有司據以推詰，升之請禁止之。又請嚴館閣之選，無使縉紳華途爲貴游子弟躡進。凡任官責五年，所上以數十百事，遂自侍御史知雜事擢天章閣待制、河北都轉運使，知瀛州、真定府，加龍圖閣直學士，復知諫院。上言：「天下州縣治否，朝廷不能周知，悉付之轉運使。今選用不精，又無考課，所以疾苦愁歎，壅於上聞。必欲垂意元元，宜從此始。」乃詔翰林學士承旨孫抃、權御史中丞張昇，與升之同領磨勘轉運使及提點刑獄公務。復申爲諫官時所請抑絕內降事，論罷樞密使賈昌朝。遷樞密直學士、知開封府。歲餘，拜樞密副使。諫官御史唐介、范師道、呂誨、趙抃、王陶交章以升之登進太驟，論其陰結宦者。升之丐去。仁宗曰：「朕選用執政，豈容內臣干預？」乃兩罷之。以升之爲資政殿學士、知定州。徙太原府。治平二年，復拜樞密副使。神宗立，以母老請郡，爲觀文殿學士、知越州。熙寧元年，徙許，中道改大名府。過闕，留知樞密院。故事，樞密使與知院事不並置。時文彥博、呂公著既爲使，帝以升之三輔政，欲稍異其禮，故特命之。明年，同制置三司條例司，與王安石共事。數月，拜中書門下平章事、集賢殿大學士。忤王安石意，稱疾歸卧逾十旬，神宗

數敦諭，乃出。會母喪，去位。終制，召爲樞密使，以疾辭，終鎮江軍節度使、同平章事、判揚州，封秀國公。卒，贈太保、中書令，謚曰成肅。

陳亞 與升之同族。真宗時知南恩州。以地多煙瘴，夷獠雜處，務行寬政，深得民心。其宦蹟視升之尤優。

宋咸 字貫之。慶曆初知尤溪縣，端慎公廉，剖決無滯，重建廟學，教養有方。累知邵武軍，立學置田以養士。移知韶州，奏誅悍卒，境內肅然。狄青經制廣西，移咸爲漕。以功轉職方員外郎，奏乞於瓊管立學賜經史，以變夷風。官至都官郎中。所著有《易註》、《毛詩正紀外義》、《論語增註》、《揚子法言註》、《朝制要覽》諸書。咸多歷外任，每任所撰著，輒爲一集，一時諸賢皆爲之序。而所註《易》及《法言》，大爲歐陽文忠所稱賞。五世孫翔。

翔 字子飛。七歲時，劉子輦命賦《燈詩》，援筆立成，曰：「耿耿照幽房，熒熒鶴焰長。昔年江上女，曾向乞餘光。」坐客皆獎嘆。紹興中，繇童選第進士，累官國子監簿。受知張浚，爲浚十客之一。時章太后既歸慈寧宮，祥瑞交至，獻《紹興樂府十二章》，其一章曰：「天意回，皇母歸，戢烽燧，敞宮闈，朝陽赫奕明鞠衣。皇之孝，惟母慈，陳仙仗，薦壽卮，從之冢后與庶妃，奏之九成與咸池。沓珍瑞，駢福祺，山陬水裔咸熙熙，惟天之相與帝之宜，千萬年無窮期。」一時文譽隱然動京師。尋差湖南帥司參議。以朝散大夫致仕。有《梅谷集》。

阮逸 字天隱。爲鎮東軍節度推官。景祐初，知杭州。鄭向上其所撰《樂論》十二篇，并《律管》十三。〔三〕與胡瑗俱召赴闕，命同校鐘律，分造鐘、磬各一簣。尋除鎮安軍掌記。康定元年，上《鐘律制議》

并圖三卷。皇祐中，更鑄太常鐘磬，又召瑗、逸與近臣、太常議秘閣，遂典樂事。遷尚書屯田員外郎。又有《易筮》及《土制井田圖》。

陳洙 字思道。令長溪、烏程二縣，皆有聲績。歷殿中侍御史。嘉祐中，同知諫院司馬光上疏乞選宗室爲皇嗣，仁宗令以所言送中書，而光欲出自上意，言：「此事止當造膝密言，非如他者可露章廷爭也。幸勿匆匆，俟明主自發德音，乃爲善耳。」洙數趣光曰：「若俟上自言，當在何時？」遂上疏極陳東漢建儲不蚤之弊，杜喬、李固徒取誅戮，無益於事。且曰：「陛下以臣懷異日之圖，莫若殺臣之身，用臣之言。」疏方上，卽仰藥死，以自明其無所覬。奏下，大計遂定。司馬光言於朝曰：「竊見殿中侍御史裏行陳洙，資性忠果，憂公忘私。稟命不永，奄辭聖世。垂沒之際，獨上章奏。冠紳之倫，靡不嗟惜。宜有旌嘉，異旌諸臣。家素貧乏，孤遺頗衆，歸葬閩越，道塗險遠。伏望朝廷特賜矜憫，依監察御史裏行張宗誼例，除子男一人官，及乞降朝旨下衢、信、建三州，候洙喪柩至彼，差人防護津送前去，亦足以示朝廷褒直勸忠終始之恩。」仁宗聞，賜洙錢十萬。元祐初，光復言：「臣竊見嘉祐中，仁宗皇帝未有繼嗣，故殿中侍御史陳洙奏乞擇宗室之賢者立以爲後，既發奏狀，謂家人曰：『我今日入一文字，言社稷大計，若得罪，大者死，小者貶竄，汝輩常爲之備。』下奏狀者未返，洙得疾而卒。臣時爲諫官，親聞見此事，竊憐其亡身殉國，繼之以死，而天下莫之知。近見故職方員外郎張術亦以請建儲貳子中伯特補太廟齋郎。伏望聖慈依張術例，除一子官，以旌忠義。」哲宗從之。

陳郭 字彥聖。授廬州司法參軍，再授歙州推官，徙知昆山縣。歲饑，屬邑希部使旨，不敢蠲賦，郭卒蠲之。後爲司農丞，未嘗私謁政府。請外除福建轉運使。元符中，以元祐黨廢。後復朝奉大夫，卒。

郭亮直清鯁，歷官五十年，帑無贏貲，退無居廬。舊史以郭貧，餽金數百兩，竟不受。

陳軒 字元輿。嘉祐八年進士。廷試本冠多士，有司以其賦用韻失次，欲黜之，有旨降第二。先是，賜進士袍笏，例釋褐於庭下，軒解衣若懸鶉，仁宗惻然，解黃衣賜之。其後賜袍笏有淡黃色，自軒始。初授平江軍節度推官。元豐中，知汀州，治尚清靜，蝗不入境，屢致豐年。元祐中，爲禮部郎中、徐王翊善，再遷中書舍人。高麗入貢，軒館客，其使求市歷代史、《冊府元龜》，抄鄭、衛曲譜，皆爲上聞。禮部尚書蘇軾劾其失體，以龍圖閣待制知廬州，徙杭州、江寧、潁昌府。徽宗立，爲兵部侍郎兼侍讀。論監司守臣數易之弊，願稍久其任，又言：「比更定役法，欲以寬民力，而有司生事，急切苟營贏羨。夫散青苗，本以抑兼并，拯難困，不當以散多予賞。」入侍經閣，每勸徽宗清淨恭儉，徽宗頗聽行之。加龍圖閣直學士，知成都府，不行，改杭州、福州。卒，年八十四。始，軒爲諸生時，夢一官府前有雙闕，闕各有金書額：一曰左丞陳軒，一曰右丞黃履。後履官至右丞，軒但龍圖閣學士耳。暮年謂諸子曰：「吾白屋起家，平生不作欺心事，今位不副夢，嘗思其繇：昔守杭州，有達官以一老兵執送府，欲杖之。此兵年餘七十，法不應杖，遂聽其贖。俄達官折簡相責，不獲已，呼人行決，即死杖下。至今吾未嘗不以自咎也。」

江側 字處中。以儒學教授其鄉，就石壁山肄業，游定夫、施景明、葉祖洽皆從之游。熙寧中，學究出身，除將作監簿。與族子汝舟號「二先生」。歷饒、信二邑令。恬於聲華，閑居未嘗妄言笑。

汝舟 字公濟。授主福州、福清、興化軍。葉祖洽誌其墓云：「先生文學馳名，未老退居，事母孝聞，宗族稱仁，鄉鄰稱悌。非有名位動人、財利交人也，而少者見之如其父兄，老者見之如其子弟，從容里閭，爲先生長者，所謂無爵而貴，處窮而榮者歟？」

陳師錫 字伯修。熙寧中，游太學，有僞聲。神宗知其材，及廷試，奏名在甲、乙間，神宗偶閱其文，屢讀屢嘆賞曰：「必陳師錫也。」啓封果然，擢第三。調昭慶軍掌書記。郡守蘇軾器之，倚以爲政。軾得罪，捕詣臺獄，親朋多畏避，師錫獨出餞之，又安輯其家。知臨安縣，爲監察御史。上言：「宋興，享國長久，號稱太平者，莫如仁宗。切考致治之本，不過延直言，御群下，進善退邪而已。明道中，親覽萬幾，見政事多辟，輔佐失職，自呂夷簡、張耒、夏竦、陳堯佐、范雍、晏殊等，一日罷去。寶元初，冬雷地震，用諫官韓琦之言，王隨、陳堯佐、韓億、石中立同時見黜。其後，不次擢用杜衍、范仲淹、富弼、韓琦，以成慶曆、嘉祐之治。願稽皇祖納諫御臣之意，以興治功。」神宗善其言。時詔進士習律，師錫言：「陛下方大闢學校，用經術訓士，不應以刑名之學亂之。」出知宿遷縣。元祐初，蘇軾三上章，薦其學術淵源，行己潔素，議論剛正，器識精深，德行追蹤於古人，文章冠絕於當世。乃人爲秘書省校書郎，遷工部員外郎，加秘閣校理，提點開封縣鎮。畿內將官苛慘，失士心，嘗大閱，群卒譁譟，將吏莫知所爲。師錫馳至軍，推首惡者致諸法，按閱如初，而劾斥其將，縣人歎服。樞密院猶以事不先白爲罪，罷知解州。歷考功員外郎，知宣州、蘇州。徽宗立，召拜殿中侍御史。疏言：「元豐之末，中外洶洶矣。宣仁聖后再安天下，委國而治者，司馬光、呂公著耳。章惇誣其包藏禍心，至於追貶。天相陛下，發潛繼統，而惇猶據高位，光等贈謚未還，墓碑未復，願早據宸略，以慰中外之望。」蔡京爲翰林學士，師錫言：「京與弟卞同惡，迷國誤朝。而京好大喜功，銳於改作，日夜交結內侍、戚里，以覲大用，援引死黨至數百人。鄧洵武內行汙惡，縉紳不齒，豈可滓穢史筆？向宗回、宗良亦陰爲京助。是皆陛下、宗廟、賢人君子之憂。」徽宗曰：「此於東朝有礙，卿爲我處之。」師錫遂上封事於太后言：「自昔母后臨朝，危亂天下，載在史冊，可考而知。至於手書還政，未有

如聖母退抑謙遜。而蔡京陰通一向，妄言官禁預政，不可不察。」時陳瓘亦與師錫同論京，卞，號爲「二陳」。俄改考功郎中，抗言：「臣在職數月，所陳皆當今急務。若以爲非，陛下方開納褒獎；若以爲是，則不應遽解官職。」如蔡京典刑未正，願受竄貶。」於是出知穎、廬、滑三州。蔡京當國，編置黨籍中，坐謫監衢州酒稅。尋因註《陰符經》削官，安置郴州。宣和末，復朝請大夫。卒，年六十九，葬丹徒。紹興中，（四）贈左諫議大夫，直龍圖閣。號問樂先生。有文集十卷，丞相葉衡爲上。章疏多被詔遣追焚，僅存十五篇，參政李光叙之。

江立 字伯穎。有文，工詩。官至左朝奉郎。以吏治循良，受知於司馬溫公。

游醇 字質夫。復猶子。復，見韋布。醇，夙以文行知名，所交皆天下士。從弟酢，得游程門，與楊中立倡道閩南。而醇私淑家庭，上下議論，參考互訂，文章理學，一時推重。仕至奉議大夫。

酢 字定夫。與兄醇俱以文行知名。其年雖少，老宿咸推。伊川先生以事至京，一見謂其資可適道。是時，明道先生知扶溝縣，設庠序教邑人，召酢職學事。酢欣然往從，得其微言，於是盡棄其學而學焉。楊龜山先生往見伊川，伊川謂龜山曰：「游君德器粹然，問學日進，政事亦絕人遠甚。」登進士，調蕭山尉，用侍臣薦召爲太學錄，改宣德郎，除博士，以食貧待次，奉親不便，就擬知河清縣。范純仁出判河南，待以國士，有疑議與參訂。移守穎昌，辟爲學教授。未幾，還朝復相，卽除酢太學博士。純仁罷政，酢亦請外，除簽書齊州判官。丁父憂，服除，再調泉州簽判。徽宗立，召還爲監察御史，出知和州。歲餘，管勾南京鴻慶宮，居太平州。兩乞再任，知漢陽軍。以親老再乞宮祠。丁母憂，服除，知舒州，移知濠州。不數月，會從官謫守衡，罷歸，寓歷陽，因家焉。卒，葬其處。酢自幼不群，讀書過目成誦。比壯，益自力，

心傳目到。儀容辭令，粲然有文望之知，爲成德君子也。其事親無違，交朋友以信，蒞官遇僚友有恩意，惠政在民，戴如父母。筮仕之初，有疑獄十餘年，酢攝邑，一問得情，精練如素宦。其後守四郡，處事優裕，民以晏然。有《中庸義》、《易說》、《詩二南義》、《論語孟子雜解》、文集各一卷。（五）學者稱廬山先生。謚文肅。弟醇，元祐進士。

操 字存誠，醇之子。少爲酢奇愛。長，工於文。紹興中，與潘良能、沈介、洪景伯俱爲秘書省正字，同日赴館職。少監秦熈會食次命對曰：「潘、游、洪、沈，泛瀛州」，操用「絳、繹、繪、維，綰綸紃」爲偶。蓋神宗朝，韓絳、陳繹、韓維、楊繪相先後除學士也。自秘書少監權禮部侍郎，僑居盱江，奉祠。晚號定庵居士。子開，同上舍出身，從朱文公游，編集《中庸》。文公稱其文學優贍，可與晤語。

九言 字誠之，初名九思。父耆，湖南安撫參議官。九言開爽慷慨，方十歲，卽爲文詆秦檜。及長，銳志當世，熟南北事。初筮古田尉。入監文思院，被旨視行在諸邑災傷，歸白都堂，放苗八分以上。孝廟攢官，有司妄費希賞，九言上書極諫。張栻帥廣西，辟幕下。栻弟杓，帥金陵，復辟撫幹。時禁方嚴，九言記《上元縣明道祠》痛譏之。調全椒令。開禧初，爲淮西安撫機官，尋知光化軍，充荆鄂宣撫參謀官，卒。端平中，特贈直龍圖閣，謚文靖。九言始學於栻，栻教以「求放心」。久之，有得。嘗序《太極圖》曰：「周子以無極加太極，何也？方其寂然無思，萬善未發，是無極也。雖云未發，而此心昭然，靈源不昧，是太極也。欲加太極，先識吾心。」讀者稱之，號默齋先生。弟九功。

九功 字勉之，一字禹成。用蔭補官，累遷咸寧令，辟充荆鄂宣撫司。時德安遣戍兵潰歸，有反意，九功卽絕江撫諭，衆皆帖服。嘉定中，興元失利，九功知金州，將兵備禦，收復鄰疆。除湖北運判，知鄂

州，召爲兵部郎官。首言「守邊必先結人心」，又言：「征役無藝，以資苞苴囊橐，而民心失；將帥朘削，功賞不以時下，而軍心失。倚仗諛佞，護疾忌醫，而士大夫之心失。」被論，知泉州。在郡，有清嚴之稱。南安令毛進、簿謝觀，作新學舍，考成之日，九功率僚屬諸生周旋廟庭，以慶其能。端平初，召爲司郎少卿。疏論姦貪多佚罰，諸賢或號召未至。又論沿邊夫役之弊。兼樞密副都承旨，出知慶元府，以循吏稱。入權刑部侍郎，丐祠，再調不赴，除待制，加寶直學士。九功清慎廉恪，與九言自爲師友，講明理學。平生真體實踐出於誠意，及門之士，皆心服之。號受齋先生。寶祐中，謚文清。

江準 字伯先。熙寧壬子預州辟，居太學。再擢開封薦，登元豐進士。歷南昌簿、掖縣丞、知侯官、僉書邵武軍判官、知漳州。眉宇超然俗表，篤學宗儒，綽有志量。

詹時升 字志行。歷通判興化軍、知汀州，改知興化軍。政尚簡易，切於愛民。歲大旱，迎五百佛士於設廳，自爲位於麗譙之下，每位設一拜，忽陰雲四合，而雨隨至。宣和初，就除福建提舉茶事。

范致虛 字謙叔。爲太學博士，鄒浩以言事斥，致虛坐祖送停官。徽宗立，召見，除左正言，出通判郢州。崇寧初，以右司諫召，道改起居舍人。進中書舍人。蔡京建請置講議司，引致虛爲詳定官，議不合，改兵部侍郎。自是，入處華要，出典大郡者十五年。以附張商英，貶通州。政和七年，復官。入爲侍讀，修國史。尋除刑部尚書、提舉南京鴻慶宮。初，致虛在講議司，延康殿學士劉昺嘗乘蔡京怒擠之，後昺坐連坐論死，致虛力爭，得減竄，士論賢之。遷尚書右丞。進左丞。母喪，踰年起知東平府。改大名。人見，時朝廷欲用師契丹，致虛言：「邊隙一開，必有意外之患。」宰相謂其懷異。致虛乞終喪，從之。免喪，知鄧州。改河南府。復移鄧。提舉亳州明道宮。靖康元年，召赴闕，道除知京兆府。時金人圍太原，



聲震關中，致虛修戰守備甚力。朝廷命錢蓋節制陝西，除致虛陝西宣撫使。金人分道再犯京師，詔致虛會兵入援。錢蓋與西道總管王襄聞京師破，皆遁走，致虛獨與西道副總管孫昭遠合兵。環慶帥臣王似、熙河帥臣王倚以兵來會。致虛合步騎號二十萬，以右武大夫馬昌祐統之，杜常將民兵萬人趨京師，夏俶將萬人守陵寢。有僧趙宗印者，喜談兵，致虛以便宜假官，俾充宣撫司參議官，兼節制軍馬。致虛以大軍遵陸，宗印以舟師趨西京。金人破京師，遣人持登城不下之詔，以止人援之師，致虛斬之。顧宗印徒大言，實未嘗知兵，而致虛勇而無謀，委己以聽，遂與宗印鼓行出關。宗印軍出潼關，致虛軍出武關。至鄧州千秋鎮，金將婁宿以精騎衝之，不戰而潰，死者過半。然致虛雖敗，其忠心勇氣有足稱者。高宗卽位，言者論其逗撓不進，徙知鄧州。尋加觀文殿學士，復知京兆府，力辭，復知鄧州。次年，宗印領兵出武關，與致虛合。會金將銀朱兵壓境，宗印兵不戰走，轉運使劉汲力戰死，而致虛亦遁，坐落職，責授安遠軍節度副使，英州安置。高宗幸建康，召復資政殿學士、知鼎州，行至巴陵卒，贈銀青光祿大夫。

江翹 字仲明。醇謹廉明。少力於學。初授沙陽尉，歷選武平、象山、永春三邑令。任永春尤久，八年乃歸。爲政崇大體，尚寬和，所致吏民懷之。

江杞 字堅老。歷仕州縣，民安其政。爲御史，致仕。里居十有五年，講學著書不倦。郡守魏仁見其所註《孝經》，嘆曰：「他日變此邦爲曾、閔，其必因此書也。」

江鈿 字元錡。善詩文，爲張魏公、劉信叔所推重。紹興初，甌賊范汝爲戰敗鳳凰山，郡以鈿爲本邑令，使捕餘黨。晚遷湘潭令，監司薦才堪應劇官。終左宣教郎。

江琦 字全叔。文學、行誼知名當世。仕永州學教授，終徽猷閣學士。覃思《春秋》之學，著《春秋經

解》二十卷，楊龜山見而稱之。又著辨疑一篇，《語》、《孟》說各五卷。子明，見韋布。

呂祉 字安老。建炎二年爲右正言。以論事忤執政，通判明州。紹興元年，盜起湖南、北，爲荆湖提刑。既至，招捕有方。踰年，盜平。進直秘閣。尋召赴行在。淮南宣撫使韓世忠將出師，辟祉議軍事，除直徽猷閣，充參議官，辭不行。三年，陞直龍圖閣，知建康府，上《東南防守利便議》，大略謂：「臨安僻在海隅，宜移蹕江上，聯絡淮甸荆蜀之勢，然後可以繫南北離散之心。」四年冬，金人攻淮，江左戒嚴，獨韓世忠統銳卒在高郵。金既陷漣水，破山陽，盱眙，遂犯承州，祉上章，言宜遣兵爲世忠援。既而，援兵不至，世忠退保鎮江，祉再上言：「置江北於度外，非命帥宣撫兩淮之意，且恐失中原心。惟當急遣諸將，且乞親御六師，庶幾上下協心。」於是降詔親征。車駕至平江，金人退師。五年，召爲中書門下省檢正諸房文字。尋除兵部侍郎，兼戶部侍郎，給事中。六年，遷刑部侍郎、都督府參議軍事。俄遷吏部侍郎。劉豫分道入寇，時車駕駐平江，或請回臨安，且令守江防海，祉獨抗言：「士氣背振，賊鋒可挫，不可遽退示弱。」七年，遷兵部尚書，陞督府參謀軍事，往淮西撫諭諸軍。張浚以劉光世持不戰之論罷之，乃命行營左護軍前統制王德爲都統制，又以統制官鄺瓊爲之副。瓊與德素不協，祉還朝，瓊與德交訟於都督府及御史臺。乃命德還建康，以其軍隸督府，復命祉往廬州節制之。祉至廬，瓊等復訟德，祉諭之曰：「張丞相但喜人向前，倘能立功，雖有大過亦闕略，況小嫌乎？當力爲諸公辨之。」瓊等感泣。事小定，祉乃密奏乞罷瓊及統制官靳賽兵權。其書吏漏語於瓊，瓊令人遮祉所遣郵置，盡得所言，大怨怒。會朝廷命張浚爲淮西宣撫使，置司盱眙，楊存忠爲淮西制置使，劉琦爲副，置司廬州，召瓊赴行在，瓊懼，遂叛。諸將晨謁，祉坐定，瓊袖出文書，示中軍統制官張環曰：「諸兵官有何罪，張統制乃以如許事聞之朝廷邪？」祉見大

驚，欲返走不及，爲瓊所執。瓊及兵馬鈐轄喬仲福、統制劉永、衡友死之。瓊遂率全軍四萬人渡淮降劉豫，〔六〕擁社次三塔，距淮三十里，社下馬曰：「劉豫逆臣，我豈見之？」衆迫社上馬，社罵曰：「死則死於此。」又語衆曰：「劉豫逆臣，爾軍中豈無英雄，乃隨酈瓊去乎？」衆頗感動，凡千餘人，環立不行。瓊恐搖動衆心，急策馬先渡，社遇害。慶元間，詔立廟，賜額以旌其忠。社爲人質直明白，好賢嫉惡。於學惟求實用，於文不侈空言。初除兵侍，自草謝表，有「願爲志士殺身以成仁，敢効鄙夫旣得而患失」之句，可以見所養也。子勝己，見邵武志。

吳樞 字行遠，一字子全。知長汀縣，每於耕斂之際，聽囚歸業，業畢復來，無後期。剖決曲直，多所原貸，百姓化之，幾於無訟。又請於郡，乞運下州鹽綱，就官貸本，俾胥吏掌之，而收其贏，縣計益饒。遂免配民請買之擾。秩滿，老穉感泣，遮道丐留，有及境外者。後仕朝奉郎、通判建昌，卒。

施提 字子安。建炎間以門蔭知寧化縣。葉儂叛，虛聲欲取汀，提率所部民守隘，卒不敢犯。帥司檄巡尉領弓級會建安，弓級中途懼不進，欲殺尉以應亂，尉知，給之還，至郊，又不入境，提撫定之，後仍不悛，提取其尤三十人置重辟，自是肅然。累遷朝奉大夫、知梧州。

陳旦 字仲明。登進士，與朱文公同榜。嘗偕張敬夫從文公游。未幾，天喪。文公誌其祖徽猷公墓，深慨惜之。

〔校記〕

〔一〕「長興」下，各本原闕二字。

〔二〕「五」字，各本原脫，據本傳及《宋翔傳》補。

〔三〕「並律管」十三下，當有脫文。

〔四〕「紹興中」，各本原作「紹聖中」，據李心傳《建炎以來繫年要錄》改。

〔五〕「文集各一卷」，《宋史·經籍志》作「《游酢文集》十卷」。

〔六〕「全軍」，各本原作「金軍」，據《宋史·趙鼎傳》改。

# 閩書卷之九十六

英舊志 縉紳

建寧府 建陽縣二

宋

有傳

朱熹子塾、塾、在。塾子鑑。曾孫浚。

蔡諒玄孫模、杭。

熊克 陳煥 魏揆之子應仲。

劉頴弟崇之。崇之

子純。族人懋。懋子煥、炳、炯。煥子昱，孫鑑。昱子欽。炳子填，炳孫應李、銓。

周明仲 熊以寧 陳總龜 余翼

熊節 宋鞏 熊剛大 宋慈 劉子實 葉味道子采。 游義肅 宋秉孫 吳居仁 熊禾

朱熹 字元晦，一字仲晦，婺源人。父松，爲尤溪尉，卽家建陽，見文菴。熹幼穎悟，甫能言，松指天示之，熹問曰：「天之上，更有何物？」松異之。就傳，授以《孝經》，一閱，題其上曰：「不若是者，非人。」從群兒戲沙上，端坐以指畫沙，視之，八卦也。年十八，貢於鄉。中紹興十八年進士。主同安簿，選邑秀民充弟子員，日與講說聖賢修己活人之道。罷歸，請祠，監潭州南嶽廟。明年，用輔臣薦，召赴行在，言路有託抑奔競以沮之者，遂以疾辭。孝宗卽位，詔求直言，熹上封事，首言：「陛下毓德之初，親御簡策，不

過風誦文辭，吟咏情性，又頗留意老、釋之書。夫記誦詞藻，非所以探淵源，出治道；虛無寂滅，非所以貫本末，立大中。帝王之學，必先格物致知，以極事物之變，使義理所存，纖悉畢照，則自然意誠心正，而可以應天下之務。」次言：「修攘之計不時定者，講和之說誤之也。願斷以義理之公，閉關絕約，任賢使能，立紀綱，厲風俗。數年之後，國富兵強，視吾力之強弱，觀彼釁之淺深，徐起圖之。」次言：「四海利病，繫民休戚。斯民休戚，繫守令賢否。監司者，守令之綱。朝廷，監司之本也。今之監司，奸贓狼藉，肆虐病民者，莫非宰執、臺諫之親舊賓客。其已失勢者，既按見其交私之狀而斥去之，尚在，豈無其人？第陛下無自而知之故。欲斯民得所，本原之地，亦在朝廷而已。」隆興元年，復召人對。其一言：「大學之道，在乎格物以致其知。陛下雖有生知之性，而未嘗隨事以觀理，即理以應事。是以舉措之間，動有疑貳，聽納之際，未免蔽欺，平治之効，所以未著。」其二言：「君父之讎，不共戴天，非戰無以復讎，非守無以制勝。」且陳古先聖王所以強本折衝、威制遠人之道。時相湯思退方倡和議，除熹武學博士，待次。乾道元年，促就職，既至，洪适爲相，復主和，論不合，歸。三年，陳俊卿、劉珙薦爲樞密院編修官，待次。五年，丁內艱。三促就職，會魏揆之以布衣召爲國子學錄，因論曾覲去，遂力辭。尋六年，工部侍郎胡銓以詩人薦，與王廷珪同召，以未終喪辭。七年，既免喪，復召，以祿不及養辭。九年，梁克家相，申前命，又辭。孝宗曰：「熹安貧守道，廉退可嘉，特改合入官，主管台州崇道觀。」熹以求退得進，於義未安，再辭。淳熙元年，始拜命。二年，孝宗欲獎用廉退以勵風俗，龔茂良行丞相，以熹名進，除秘書郎，力辭，且以手書遺茂良，言一時權倖，群小乘間。有言虛名之士不可用者，乃因熹再辭，即從其請，主管武夷山冲祐觀。五年，史浩再相，除知南康軍，降旨便道之官，再辭，不許。至郡，興利除害。值歲旱，講求荒政，多所全活。訖事，奏

乞依格推賞納粟人。間詣郡學，引進士子與講論。奏復白鹿洞書院遺址，爲學規俾守之。明年夏，大旱，詔監司郡守條具利病，疏言：「天下之務，莫大恤民。恤民之本，在人君正心術以立紀綱。必君心公平正大，無偏黨反側之私，然後紀綱有所繫而立。又必親賢臣，遠小人，講明義理之歸，閉塞私邪之路，然後此心可得而正。今宰相、臺省、師傅、賓友、諫諍之臣皆失其職，陛下所與親密謀議者，不過一二近習，上以蠱惑陛下之心，說以功利之卑說，下則招集天下士大夫嗜利無恥者，文武彙分，各人其門。所喜則陰援，所惡則密毀。交通貨賂，所盜者皆陛下之財。命卿置將，所竊者皆陛下之柄。陛下所謂宰相、師傅、賓友、諫諍之臣，或反出其門，其幸能自立者，亦不敢一言斥之。其甚畏公論者，乃能略警逐其徒黨一二，而終不敢正言以擣其囊橐窟穴之所在。號令黜陟，名爲陛下獨斷，而實此一二二人者陰執其柄。臣恐莫大之禍，必至之憂，近在朝夕，而陛下未知也。」孝宗讀之，大怒曰：「是以我爲亡也。」以疾請祠，不報。陳俊卿以舊相守金陵，過闕人見，薦之甚力。宰相趙雄言上曰：「士之好名，陛下疾之愈甚，則人譽愈衆，無乃適所以高之。不若因而用之，彼漸當事任，能否自見矣。」乃除熹提舉江西常平茶鹽公事。旋錄救荒之勞，除直秘閣，以前在南康所奏納粟人未推賞，辭。會浙東人饑，宰相王淮奏改熹提舉浙東常平茶鹽公事，卽日單車就道，復以南康納粟人未推賞，辭職名。納粟實行，遂受職名。人對，首陳災異之繇，與修德任人之說。次言：「陛下卽政之初，蓋嘗選英豪，任以政事，不幸其間不能盡得其人，是以不復廣求賢哲，而姑取軟熟易制之人以充其位。於是左右私褻使令，賤人始得以奉燕閑，備驅使，而宰相之權日輕。又慮其勢有所偏，而因重以壅己也，則時聽外廷之論，將以陰察此輩之負犯而操切之。陛下既未能循天理、公聖心，以正朝廷之大體，則固已失其本矣。而又欲兼聽士大夫之言，以爲駕馭之術，則士大夫之進見有時，

近習之從容無間。士大夫之禮貌既莊而難親，其議論又苦而難入，近習便嬖側媚之態既足以蠱心志，胥吏狡獪之術又足以眩聰明，是以雖欲微抑此輩，而此輩之勢日重，雖欲兼采公論，而士大夫之勢日輕。重者既竊陛下之權，輕者又借於重，以爲竊位固寵之計，浸淫耗蝕，使陛下德業日隳，綱紀日壞，兵愁民怨，盜賊間作，災異數見，饑饉薦臻，群小相挺，人人滿欲，惟有陛下了無所得，而顧獨受其弊。」上爲動容。熹始拜命，卽移書他郡，募米商，蠲其征。及至，則米舟輻輳。日鈞訪民隱，按行境內，單車屏徒，所至人不及知。郡縣官吏憚其風采，至自引去。所部肅然。凡丁錢、和買、役法、權酷之政，有不便者，悉釐而革之。救荒之餘，隨事處畫爲經久計。有短熹疏於政者，孝宗謂王淮曰：「朱熹政事却有可觀。」熹以前後奏請多所見抑，幸而從者，率稽緩後時，蝗旱相仍，不勝憂憤，復奏言：「爲今之計，獨有斷自聖心，沛然發號，盡出內庫之錢，以供大禮之費，爲收糴之本，詔戶部免徵舊負，詔漕臣依條驗放租稅，詔宰臣沙汰被災路分州軍監司、守臣之無狀者，遴選賢能，責以荒政，庶幾下結人心，消其亂意。不然，所憂者恐不止於饑殍，而害且上及於國家也。」復上時宰書：「朝廷愛民之心，不如惜費之甚，是以不肯爲極力救民之事。明公憂國之念，不如愛身之切，是以但務爲阿諛順旨之計。然民與財孰重？身與國孰大？財散猶可聚，民心一失則不可復收，身危猶可安，國勢一傾則不可復正。」九年，以賑濟有勞，進直徽猷閣，辭。知台州唐仲友與王淮同里爲姻家，遷江西提刑，未行。熹行部至台，訟仲友者紛然，按得其實，章三上，淮匿不聞。熹論愈力，仲友亦自辯，淮乃以熹章進呈。下紹興府鞠之，獄具情得，乃奪仲友江西新命，以授熹。熹以爲蹊田而奪之牛，辭不拜，遂歸。尋令兩易江東，辭。及辭職名，且言：「唐仲友雖寢新命，已具之獄，竟釋不治，則是所按不實，難以復沾恩賞，並不許受職名。」再辭新命，且乞奉祠，言：「所劾賊吏，黨與衆



多，並當要路。大者，宰制斡旋於上；小者，馳驚經營於下。若其加害於臣，不遺餘力，則遠至師友，淵源所自，亦復無故橫肆觚排。爲臣之計，惟有乞身就閑，或可少舒患害。」時吏部尚書鄭丙上疏毀程氏學以陰詆，而監察御史陳賈而對，首論近日縉紳有所謂道學者，大率假名濟偽，願考察其人，擯棄勿用，故熹有是言。十年，詔以熹累乞奉祠，可差主管台州崇道觀。既而，連奉雲臺、鴻慶之祠者五年。十四年，周必大相，除熹提點江西刑獄公事。以疾辭，不許，遂行。十五年，淮罷相，遂人奏，首言近年刑獄失當，獄官當擇其人；次言經總制錢之病民，及江西諸州科罰之弊；而其末言：「陛下卽位二十七年，因循荏苒，無尺寸之効可以仰酬聖志。嘗反覆思之，無乃燕閒之中，虛明應物之地，天理有所未純，人欲有所未盡，是以爲善不能充其量，除惡不能去其根，公私邪正，是非得失之機，交戰一念之頃。故禮貌大臣非不厚，而便嬖側媚得深被腹心之寄；寤寐英豪非不切，而柔邪庸繆得久竊廟廊之權；非不樂聞正論，而有時不容，非不聖讒說殄行，而未免誤聽；非不欲報復讎恥，而未免畏怯苟安；非不欲愛養生靈，而未免歎息愁怨。願陛下自今以往，謹察天理人欲之分，果天理也，則敬以充之；果人欲也，則敬以克之。拙而至於言語動作之間，用人處事之際，無不以是裁之，則聖心洞然，中外融徹，而天下之事，將惟陛下所欲爲。」是行也，有要之於路，以爲正心誠意之論，上所厭聞。熹曰：「平生所學，惟此四字。」及奏，孝宗曰：「久不見卿，浙東之事，朕自知之，今當處卿清要。」時曾覲已死，王抃亦逐，獨內侍甘昇尚在，熹力以爲言。孝宗曰：「昇乃德壽所薦，爲其有才耳。」熹曰：「小人無才，安能上動人主？」翌日，除兵部郎官，以足疾乞祠。本部侍郎林栗前數日與熹論《易》、《西銘》不合，至是遣部吏抱印逼以供職。熹以疾告，遂劾熹欺慢。孝宗謂栗言太過。周必大言熹上殿之日，足疾未瘳，勉強登對。孝宗曰：「朕亦見其跛曳。」左補闕

薛叔似亦奏援熹，乃令依舊職江西提刑。而太常博士葉適、御史胡晉臣相次論栗，栗出知泉州。熹再辭免，曰：「論者謂臣事君無禮，爲人臣子有此名也，罪當誅，豈可除任外臺耳目之寄？」章再上，除直寶文閣，主管西京嵩山崇福宮。未踰月，再辭。始，熹嘗謂口陳之說有所未盡，乞具封事以聞。至是，投匭進封曰：「今天下大勢，如人有重病，內自心腹，外達四支，無一毛一髮不受疾苦，且以天下大本與今日急務，爲陛下言之。大本者，陛下之心；急務，則輔翼太子，選任大臣，振舉綱紀，變化風俗，愛養民力，修明軍政，六者是也。古先聖王，兢兢業業，持守此心，精一克復，如對神明，如臨淵深，尤恐隱微差失，或不自知。是以建師保之官，列諫諍之職，凡飲食、酒漿、衣服、次舍、器用、財賄與夫宦官、官妾之政，無一不領於冢宰。使其左右前後，一動一靜，無不制以有司之法，而無纖芥之隙、瞬息之頃，得以隱其毫髮之私。陛下所以精一克復，持守其心，果有如此之功乎？所以修身齊家，正其左右，果有如此之効乎？宮省事禁，臣固不得而知，然爵賞之濫，貨賂之流，閭巷竊言，久已不勝其籍籍，則陛下所以修之家者，恐亦未及古之聖王也。至於左右便嬖之私，恩遇過當，往者淵、覲、說、抃之徒，勢焰熏灼，傾動一時，今已無可言矣。以臣之愚，竊謂此輩但當使之守門傳命，供掃除之役，不當假借崇長，使得逞邪媚，作淫巧於內，以蕩上心；立門庭，招權勢於外，以累聖政。臣聞之道路，自王抃既逐之後，諸將差除，多出此輩之手。陛下竭生靈膏血，以奉軍旅，顧乃未嘗得一溫飽，是皆將帥巧立名色，奪取糧資，行賂近習，希圖進用，出人禁闥腹心之臣，外交將帥，共爲欺蔽，以至於此。陛下不悟，反寵曜之，以爲私人，至使宰相不得議其制置，給諫不得論其除授，則陛下所以正其左右者，未能及古聖王又明矣。至於輔翼太子，則自王十朋、陳良翰之後，能稱其職者鮮矣。而邪佞闖冗之輩，又時得參錯其間，其所謂講讀，亦姑以應文備數，而未聞有規

箴之効。至於從容朝夕，陪侍游宴者，又不過使臣、宦者數輩而已，師傅、賓客既不復置，而詹事、庶子有名無實，其左右春坊遂直以使臣掌之，既無以發其隆師親友、尊德樂義之心，又無以防其戲慢嫖狎、奇袤雜進之害。宜討論前典，置師傅、賓客之官，罷去春坊使臣，而使詹事、庶子各復其職。至於選任大臣，則以陛下聰明，豈不知天下之事，必得剛明公正之人，而後勝任？其所以反容鄙夫竊位者，直以一念之間，未能撤私邪之蔽，而燕私便嬖，不能盡繇於法度。若用剛明公正之人以爲輔相，則恐其有妨吾之事，害吾之人，是以選擇之際，常取疲懦軟熟、平日不敢直言正色之人，於其中又得其至庸極陋，決可保其無所妨者，然後加之於位。是以除書未出，物色先定，姓名未顯，中外已知其非天下第一流矣。至於振肅紀綱，變化風俗，則今日宮省之間，禁密之地，天下不公之道，不正之人，顧得窟穴盤據其間，薰蒸銷鑠，使陛下好善之心不著，疾惡之意不深，其害已有所不可勝言者矣。及其作奸犯法，則陛下又未能深割私愛，付諸有司，是以紀綱不正，風俗頹弊，爲患日久矣。而浙中尤甚，大率習爲軟美之態，依阿之言，以不分是非，不辨曲直爲得計，甚者以金珠爲脯醢，以契券爲詩文，宰相可啗則啗宰相，近習可通則通近習，惟得之求，無復廉耻。一有剛毅正直、守道循理之士出乎其間，則群議衆排，指爲道學，而加以矯激之罪。十數年來，以此二字禁錮天下賢人君子，復如昔時所謂元祐學術者，排擯詆辱，必使無所容而後已，此豈治世之事哉？至於愛養民力，修明軍政，則自虞允文之爲相也，盡取版曹歲入窠名之可指擬者，號爲『歲終羨餘』，而輸之內帑。顧以其積累掛欠、空載簿籍，不可催理者，撥還版曹，謂內帑之積，將以備他日用兵進取不時之須。然自是以來二十餘年，內帑歲入不知幾何，而認爲私貯，典以私人，宰相不得以式貢均節其出入，版曹不得以簿書勾考其在亡，日銷月耗，以奉燕私之費者，蓋不知幾何矣，曷嘗聞其能用此錢以易

敵人之首哉？徒使版曹經費缺乏日甚，督促日峻，以至廢去祖宗以來破分良法，而必以十分登足爲限。又造爲比較監司、郡守殿最之法，以誘脅之。於是中外承風，競爲苛急，此民力所以重困也。諸將之求進也，必先培植士卒，以殖私利，然後以此自結於陛下之私人，而漸以姓名達於陛下之貴將。貴將得其姓名，即以付之軍中，使自什伍以上，節次保明，稱其『材武堪任』，然後具奏牘而言之陛下之前。陛下但見等級推先，案牘具備，則誠以爲公薦，而豈知其論價輸錢若晚唐之債帥哉？是陛下之所得以爲將帥者，皆庸夫走卒。猶望其修明軍政，激勸兵士，以彊國勢，豈不誤耶！凡此六事，皆不可緩，而本於陛下之一心。心一正，卽六事無有不正，一有私欲介乎其間，則雖欲憊精勞力，以求正夫六事者，亦將徒爲文具，而天下之事愈至不可爲矣。」疏入，夜漏下七刻，孝宗已就寢，亟起秉燭，讀之終篇。明日，除主管太一宮，兼崇政殿說書。會執政有指道學爲邪氣者，力辭，除秘閣修撰，仍奉外祠。光宗卽位，再辭職名，仍舊直寶文閣，降詔獎諭。居數月，除江東轉副使，以疾辭。會使者自金還，金人問「朱先生安在」，遂改知漳州。奏除屬縣無名賦七百萬，減經總制錢四百萬，采古喪葬嫁娶之儀，揭示以變民俗，命父老解說其子弟。有聚僧廬爲傳經會，作庵舍以居不嫁之女者，悉禁絕之。會朝論欲經界泉、汀、漳三州，熹訪法擇人上之，而衣冠之族以爲不便，第稍行之漳州一郡。明年，以子喪，請祠。時史浩人見，請收天下人望，除秘閣修撰，主管南京鴻慶宮。再辭，詔：「論撰之職，以寵名儒。」乃拜命。除荆湖南路轉運副使，辭，乞補官觀。又數月，差知靜江府、廣南西路經略安撫，辭。四年，又辭主管南京鴻慶宮。未幾，差知潭州、荆湖南路安撫，以辭遠就近力辭。黃裳爲嘉王府翊善，自以學不及熹，乞召爲官僚。王府直講彭龜年亦爲大臣留正言之。正曰：「非不知熹，但其性剛，恐到此不合，反爲累耳。」五年，再辭。有旨：「長沙巨屏，得賢爲

重。」遂拜命。會洞獠擾屬郡，遣人諭以禍福，皆降之。中勅令，嚴武備，戢奸吏，抑豪民，興學政，明教化。寧宗卽位，趙汝愚首薦熹及陳傅良，有旨赴行在奏事。熹行且辭，除煥章閣待制、侍講。辭，不許。人對，首言：「乃者太皇太后躬定大策，陛下寅紹丕圖，可謂處之以權，而庶幾不失其正。自頃至今三月矣，或反不能無疑於逆順名實之際，竊爲陛下憂之。猶有可諉者，亦曰陛下之心，前日未嘗有求位之計，今日未嘗忘思親之懷，此則所以行權而不失其正之根本也。充未嘗求位之心，以盡負罪引慝之誠；充未嘗忘親之心，以致溫清定省之禮，而大倫正，大本立矣。」復面辭待制、侍講，寧宗手割：「卿經術淵源，正資勸講，次對之職，勿復牢辭，以副朕崇儒重道之意。」遂拜命。又勸帝求放心、親儒學、咨訪臣僚數事。又乞遵行孝宗通喪之禮，及議僖祖不當祧。復奏言：「願陛下日用之間，以求放心爲本，而益用力於玩經史、近儒學。數召大臣切劘治道，群臣筵對亦賜溫顏，反覆詢訪，以求政事得失、民情休戚，而又因以察其人才之邪正短長，庶於天下之事，各得其理。」韓侂胄自謂有定策功，居中用事，熹憂其害政，數以爲言。且約吏部侍郎彭龜年共論之。會龜年出護使客，熹乃上疏斥言竊柄之失。因請筵留身，復申言之。御批云：「憫卿耆艾，恐難立講，已除卿官觀。」汝愚袖御筆還上，且諫且拜。內侍王德謙徑以御筆付熹，臺諫爭留，不可。樓鑰、陳傅良旋封還錄黃，修注官劉光祖、鄧驛封章交上。熹行，被命除寶文閣待制，與州郡差遣，辭。尋除知江寧府，辭，仍乞追還新舊職名。詔依舊煥章閣待制，提舉南京鴻慶宮。初，趙汝愚既相，收召四方名士，中外引領望治。熹獨惕然以侂胄爲慮。既屢爲上言，又數以手書啓汝愚，有「防微杜漸，謹不可忽」之語。汝愚不以爲意。及是，汝愚亦以誣逐，而大權悉歸侂胄矣。以疾再乞休致。詔：「辭職謝事，非朕優賢之意。依舊秘閣修撰。」二年，沈繼祖爲監察御史，誣熹十罪，詔落職罷祠，門人蔡元

定亦送道州編管。四年，熹以年近七十，申乞致仕。五年，依所請。明年，卒，年七十一。疾且革，手書屬其子在，及門人范念德、黃榦，拳拳以勉學及修正遺書爲言。翌日，正坐整衣冠，就寢而逝。自熹之去國也，侂冑勢益張，鄙夫憊人，迎合其意，以學爲偽，謂貪黷放肆，乃人真情，廉潔好禮者，皆偽也。科舉取上，稍涉經訓者，悉見排黜。文章議論，根於理義者，並行除毀。《六經》、《語》、《孟》，悉爲世大禁。猾胥賤隸，頑鈍無恥之徒，往往引用，以至卿相。繩趨尺步，稍以儒名者，無所容其身。從游之士，特立不顧者，屏伏丘壑，依阿巽懦者，更名他師，過門不人，甚至變衣冠，狎游市肆，以自別其非黨。熹日與諸生講學竹林精舍自如也。嘉泰初，學禁稍弛。二年，詔除華文閣待制，與致仕恩澤。是時熹已歿矣，建寧守傅伯壽以不聞，故有是命。開禧三年，侂冑伏誅，凶徒儉黨根株斥戮。嘉定元年，詔賜熹遺表恩澤，謚曰文。尋贈中大夫，特贈寶謨閣直學士。始，熹少時，慨然有求道之志。父松病亟，屬之曰：「籍溪胡原仲、白水劉致中、屏山劉彥冲三人，學有淵源，吾所敬畏，吾卽死，汝往事之。」故熹之學既博求之經傳，復徧交當世有名之士。延平李侗老矣，嘗學於羅從彥，熹歸自同安，不遠數百里，徒步往從。其爲學大抵窮理以致其知，反躬以踐其實，而以居敬爲主。嘗謂聖賢道統之傳散在方策，聖經之旨不明，道統之傳始晦，於是竭精訓釋。所著書有《易本義啓蒙》、《著卦考誤》、《詩集傳》、《大學中庸章句或問》、《論語孟子集註》、《太極圖通書西銘解》、《楚辭集註辯證》、《韓文考異》。所編次有《論孟集議》、《孟子指要》、《中庸輯略》、《孝經刊誤》、《小學書》、《通鑑綱目》、《宋名臣言行錄》、《家禮》、《近思錄》、《河南程氏遺書》、《伊洛淵源錄》，皆行於世。熹歿，朝廷以其《大學語孟中庸訓說》立於學宮。又有《儀禮經傳通解》未脫稿，亦在學宮。平生爲文凡一百卷，生徒問答凡八十卷，別錄十卷。熹登第五十年，仕外僅九考，立朝纔四十日而

己。理宗寶慶二年，贈太師，追封信國公，改徽國。淳祐元年正月，理宗視學，手詔以周、張、二程及熹從祀孔子廟。元至正中，改封齊國公。皇朝洪武初，追封徽國公，從祀孔子廟。嘉靖九年定祀典，稱「先儒朱子」。熹子塾、桢、在。塾子鑑。曾孫浚。

塾字受之。蔭補將仕郎。自幼開爽，不類常兒。文公恐墮於浮靡，不肯教以詩文。歿後，許進之出其所與唱和詩卷。文公曰：「予初不知其能道此語。」爲之揮淚。

桢字文之。淳祐間蔭補迪功郎，差監德清縣戶部贍軍酒庫。後文公十一年卒。黃勉齋誄之曰：「在昔夫子，性嚴氣剛，規矩準繩，動止有常。君承其顏，惟恐或傷。在昔夫子，朝圖暮書，遑恤其家，孰有孰無？君服其勞，使若有餘，內睦姻親，外交朋友，歲時享祀，般核清酒，囊篋瑣碎，俾無遺漏。非君之賢，孰左孰右？」贈朝奉大夫。

在字叔敬。用蔭補官。嘉定初，除籍田令。凡旱，上封事。歷將作司農簿，遷丞。十年，以大理寺正知南康軍。奉祠。起知信州。人對，以進學問、振紀綱、求放心爲言。除提舉浙西常平茶鹽公事，加右曹郎官，兼知嘉興府，召爲司農少卿，允樞密副都承旨，出爲兩浙轉運副使。寶慶中，除工部侍郎。進對，論人主學問之要，理宗曰：「先卿《中庸序》言之甚詳。」因奏：「閔、損以下九人並封公爵，獨曾參爲侯，乞並封公。揚雄、王雱，乞去其像。本朝有程顥、程頤、張載三人，若使從祀廟庭，斯文幸甚。」除吏部侍郎。請外，除寶謨閣待制，知平康府，遷煥章閣待制，知袁州，奉祠，卒。子玠，通直郎、兩浙運管。

鑑字子明，文公嫡長孫也。蔭補迪功郎，累遷奉直大夫、湖廣總領。寶慶間，隨季父在遷居建安之紫霞洲，建文公祠於所居。在子孫人建安，自鑑始。

浚 字深源，文公三世孫。少負奇節，累官兩浙轉運使，兼吏部侍郎。尚理宗公主。元兵入建寧，王積翁棄城遁，浚與公主入福州，誓與知府王剛中死守。迨元阿剌罕侵福安，剛中以城降，浚與公主仰天大哭曰：「君帝室王姬，吾大儒世胄，不可辱於犬羊手。」遂飲藥死。贈朝散大夫。

蔡諒 字守信。其先弋陽人。唐昭宗時，八世祖爐，從王潮入閩，爲建陽長官，卜居麻沙鎮。累傳至伯禧，宋真宗時以神童授春官伴讀，賜詩褒美。再傳生諒，紹興二十七年繇鄉貢入太學，除大名司訓，擢太學錄。崇寧間，表勸徽宗以剛仁勤儉。又語蔡京曰：「清慎正直，宰臣之度。司馬光日公著何等人品，而目爲奸邪，且鑄之石也！」京大怒。卽棄官歸，寄傲雲谷西山間，自號首陽居士。子發，孫元定，曾孫淵、沆、沈，俱見韋布。玄孫模、杭。

模 字仲覺，沈長子。操行高潔，風度夷坦，隱居篤學。王埜創建安書院，請任席長。嘗輯朱文公書爲《續近思錄》，及《易傳集解》、《河洛探賾》、《大學衍論》、《語孟集疏》等書。淳祐中，宰相謝方叔、湯恢乞表異以勸後學，有旨補迪功郎，添差本州教授。令有司錄所著書，並訪以所欲言。模疏言：「敬義，爲萬世帝王心學大旨，价人大師等六者爲國家守邦要道。」及請頒白鹿洞學規於天下。卒，學者稱覺軒先生。

杭 字仲節，沈次子。歷諸王宮大小學教授。奏對，論正心及內降斜封之弊。又言權奸不可復用，國本不可不早定。寶祐中，繇浙東提刑召爲國子司業，兼資善堂翊善。（三）續以試國子祭酒，兼侍玄修注官，仍兼資善堂翊善。歷遷工部侍郎、權吏部尚書，除端明殿學士、同知樞密院事，拜參知政事。落職踰年，復殿學，致仕。卒，謚文簡。以犯祖諱，更謚文肅。杭司著作，劾參知政事劉之傑黨於史嵩，不叶物議。爲國子司業，論京尹余晦凌辱三學，及奏權奸丁大全不可用。卽不待報，去。在州郡，所至祀先儒，



旌忠節，舉遺逸，表行義。居家孝友，四時祭祀，仍遵伯父淵遺制：「遇期功總麻之喪，必衰衣以終月數，及治喪，毋得用浮屠法。」子公亮，大理司直。

熊克 字子復，唐御史大夫博之後。父蕃，見章布志。克，第進士，知諸暨縣。越帥課賦頗急，諸邑率督趣以應，克曰：「寧獲罪，不忍困吾民。」他日，府遣幕僚閱視有亡，時方不雨，克對之泣曰：「此催租時耶？」部使者芮燁至其境，謂曰：「曩知子文，乃今見政。」表薦之，入爲提轄文思院。嘗以文獻曾覲，覲持白孝宗。孝宗喜之，出御筆除直學士院。宰相趙雄疑其由徑，阻之。孝宗意方向之，不能回也。遂以爲授書郎，累遷學士院權直。孝宗御選德殿，召諭曰：「卿制誥工且有體，自此燕閒，可論治道。」克自以見知於上，數有論奏。嘗言：「邊事宜以和爲守，以守爲攻。守則莫重淮東，援淮東之策，莫若卽江陰建水軍，置巡檢警督之，名爲備盜，無使敵疑，卽緩急可相應。」孝宗嘉之，召草明堂赦書，言：「二浙薦饑，蝗蟲大起，赦文不宜飾詞。」孝宗復嘉其識體。除起居郎，兼直學士院。以言者出知台州，奉祠。克幼而翹秀，好學，善屬文。自少至老，著述外，無他嗜好。淹習典故，酬對如響。家素儉約，貴不改舊，所居卑陋，門不容轍。嘗愛臨川童子王克勤之才，將妻以女，乏資遣，會草制獲賜金，遂以歸之。卒，年七十三。所著有《中興小曆》、《九朝通略》、《官制新典》、《帝王經譜》、《諸子菁華》等書。

陳煥 字其華。紹興間尉順昌，寬和廉靜，善政甚多，未嘗自能，人號陳佛子。

魏揆之 字子實，故名挺之，字元履。其以元履聞也久，稱者莫能易也。少師事胡憲，已，徧從鄉儒先長者游，又適四方，盡交其先達名士，聞見日廣，聲稱日以大。嘗客衢守章傑家，故相趙鼎以謫死歸葬常山，傑雅怨鼎，又希秦檜意，逮繫其家人，劾治甚急。元履作書嚙讓傑，長揖歸。兩以鄉舉試禮部，不

第。閩帥汪應辰、建守陳正同相與論薦於朝。時相尼之，又不得行。後數歲，詔舉遺逸，部刺史芮燁帥其寮與帥、守六人共言元履行誼。有詔特徵之，辭謝不獲，以布衣人見，極論當世之務。孝宗獎嘆開納，勞間移時。遂詔賜同進士出身，授左迪功郎、守太學錄。既就職，日進諸生教誨之，釋奠孔子祠。先事白宰相陳俊卿，請言於上：「廢安石父子勿祀，而追爵程氏兄弟，使從食。」又言：「太學之教，宜先德行，經術其次，尤當使之通習世務，以備官使。」至他政事，有係安危治亂之機，宰相不能正，臺諫侍從不敢言者，無不抗疏盡言至三四。上並不見納，則移病杜門。曾覲召還，元履移書與俊卿，責其不能救止。俊卿雅招徠元履，至是見其書詞峻切，亦不能平。而元履前已數求去矣，遂以迎親予告使歸。行數日，罷爲台州學教授，竟卒。元履於學無不講，而尤長於前代治亂、廢興、存亡之說，以至本朝故事之實。居家謹喪祭，重禮法，恤親舊，雖貧不懈。與人交，嘉善救失如不及。後進以禮來者，苟有一長，汲汲推挽之。嘗有病其太過者，笑曰：「不猶愈於橫目自營者耶？」至或訾其近名，則蹙然曰：「夫人而皆避此嫌也，爲善路絕矣。」既卒，孝宗嗟悼久之，卽下詔曰：「朝廷不可無直諫之士。挾之雖死，其以宣教郎、直秘閣告其第。」元履故與朱文公游，去國時，文公正被召，將行，聞元履出國門，遂止。子應仲。

應仲 字孝伯。舉進士。文公貽之書，勉其力學以副親庭責望之意，因教以起居、坐立、出人、步趨、處己、待人之節。

劉頌 字子誠，與幹同祖，幹之七世孫也。幹，見崇安。頌，紹興間爲廣州參謀，盜蔡母謹和尚陷三水鎮，帥兵勦捕。後爲淮東提刑，金主亮趨淮東，力戰死之，謚忠簡。弟崇之。

崇之 字智父。弱冠擢進士，授福清簿。梁克家帥三山，檄攝幕，甚器之。與詹體仁等六人同薦於

朝，除定詳三司勅令所刪定官。遷太府丞，應詔上書論弭變五說，除秘書省校書郎。光宗內禪，遷著作郎，尋罷。起知信陽軍，陛辭，留爲太府丞，上書請車駕起居重華宮。除行太常寺丞、權兵部郎中。朱文公罷經筵，崇之率同列請留之，轉朝請大夫。偽學禁興，力請外，得荆湖南路常平使者。嘉泰初，起知贛州。言者論周必大，併及崇之，因請祠。久之，除成都路提刑。應詔條上蜀民利害九事，以戶部郎中領四川宣撫兩司節制。未幾，吳曦變作，上表待罪，請師平賊，除荆湖北路提刑。被論，永州安置。開禧中，四川宣撫使安丙表陳崇之不污之節，乞加甄叙，詔復原官。崇之天資穎敏，居左塾讀書三十年，未嘗移他所。文章溫潤典雅，有光制誥，而用非其長，論者惜之。卒，謚文忠，號瑞樟先生。子純。

純字君錫。少年喜騎射，以父蔭授沙縣簿。歲大疫，治粥藥存活之。死而無收者，作大塚瘞焉。秩滿，丞分宜，復值歲旱，極力賑救，如簿沙時。繼入京，監和劑門。紹定己丑，閩寇晏頭陀等嘯聚汀郡，殘破寧化、清流、將樂，陷劍南，犯建寧。純適調湖北帳幹，聞賊迫近其鄉里，卽歸散家財，招唐石義勇千人討之。樵守王遂請於朝，命知邵武縣，俾將所招軍往。立官府，收散亡，軍勢大振。事聞，改宣教郎，詔號其軍曰忠武。與招捕使陳緯擊破連城潭飛潦，諭降其七十餘寨，頭陀計窮伏誅。而邵武又有劉安國者，先因民困貧暴，鼓衆而起，官軍不能敵，而又無以招撫之，坐是建寧復騷。建守趙紡夫請於朝，移純軍於縣。命下卽行，得賊所募爲首者二人，斬以獻。會盱守遣邑令將兵來援，爲賊所圍，斬數賊，拔令歸。又人富田，勦其渠魁。賊懼，合諸寨攻純，純令統制周喜領淮西軍繞賊後擊其巢，俘獲甚衆，安國就擒。次日，純率兵往招降下壘賊，爲賊所得，不屈死之。後有自賊寨歸，言純死時，備極慘毒。事聞，贈朝散郎，加謚義壯，立二廟於邵武、麻沙，賜額忠烈。建人以幹、子羽、珙、領並稱曰五忠劉氏。

懋 字子勉。祖勉之，見韋布。懋博學通經，文辭奇偉。長，受學屏山先生，得其論著。繼從胡籍溪游，始知爲學大旨。自是《易》象、天文、地理、律曆之奧，無所不通。受迪功郎，任會昌西尉兼學事。秩滿，轉文林郎，奉祠，監衡州南嶽廟。以朝奉大夫致仕。杜門掃軌，仰師聖賢，鄉人子弟多所造就，學者稱恒軒先生。以子燦貴，贈金紫光祿大夫。所著《禮記集說》、《語孟訓解》。子燦、炳、炯。

燦 字晦伯。舉進士，授山陰主簿。調饒州錄事參軍，爲太守孫紹所倚辦，判官黃奕忌之，忽捕廳吏，械脅詰問：「汝本官得無受率分頭子錢乎？」吏曰：「有案牘。」索至，則燦不曾受牒，還丞判久矣。甚慚，猶以他事罪吏。未幾，判以贓抵罪，對移，歛丞、徽守與奕有宿憾，拒不納，燦爲調護免，人服其德量。調連城令，蠲無名征斂，新其縣學，教諸生入德之方。改知閩縣，用清簡爲治，與民有信。大族、貴宦、頑庶、奸胥莫敢撓法。諸臺府合詞列薦，以與丞相趙汝愚有連，欲他用之，參政陳騭昌言於衆：「召試館職，非劉某孰可者？」竟避汝愚嫌，乞通判潭州。時孝宗升遐，光宗疾，不能執喪，人情憂疑。寧宗受內禪，燦寓書丞相言：「前日之事，如傷寒熱病，狂言迷悶，庸醫所驚，一旦解散，即便無苦。至於蠱毒中人，初不知覺，觸物而發，則必死矣。孔子曰：『抑亦先覺者，是賢乎？』」燦意蓋指韓侂胄，而丞相不能用。丁父艱，學禁方嚴，從文公講道讀書，怡然自適。服除，主管都大坑冶司文字，知德慶府，葺學舍，練軍實，罷兩邑不正科數。受代，入對，請恐懼修政，開言路，以廣忠益，闡公道，以進人才，飭邊備，以防虜詐。時執政議欲留燦，宰臣陳自強曰：「斯人閩縣之政，吾知之。然真是偽學。」遂以提舉廣東常平茶鹽。至官，痛加裁節，以足公用，縮通欠。時仕南方者，多自爲裨販，奪州縣征商利。燦請凡仕廣而商者，輕貨所經，許州縣没人之。嘉定二年召入對，言：「方今承凋弊之餘，履艱難之運，天下之勢不可爲安，所恃者人心。」

天下人心固未易一，所恃者公道。願陛下主持此道，不用一毫私心，不聽左右私言。大臣奉行此道，進一人，退一人，無作好惡，皆采公議。至於一號一令，莫不皆然。陛下主持公道，而大臣有不欽承，則天下之惡皆歸之矣。大臣奉行公道，而小臣猶有不精白，亦明時所不容也。」除吏部郎中，輪對，請開張聖聽於經筵講讀，大臣奏對，反覆問難，以采義理之當否，政事之是非。乞外，除兩浙西路提點刑獄公事。盛暑隆寒，巡察不倦。決遣平反，所劾不避權要，所舉不受干求。召爲國子司業，對言：「治道原於士風，士風本於學術。古有司徒之職，典樂之官。周衰，孔子取先王之大經大法，與其徒誦而傳之，雜見於《六經》。自漢以來，雖曰崇儒，然漢儒之陋，訓詁益詳，義理益晦。故韓愈曰：『軻之死，不得其傳焉。』藝祖皇帝干戈甫定之餘，召處士王昭素講《易》禁中，累聖相承，以爲先務。治教休明，儒宗間出，然後《六經》遺旨，孔孟微言復明。千載之後，天下學者誦而習之，故以事父則孝，事君則忠，世之所謂道學也。慶元以來，權倖當國，惡人議己，指道爲僞，屏其人，禁其書，十餘年間，學者無所依向。義利不明，趨嚮污下，望其旣仕之後，立名節，修職業，胡可得也？乞降明詔，更不施行。」又錄朱熹守南康日白鹿洞書院學規以進，請頒下兩學，與舊學規並行，從之。兼國史院編修官、實錄院檢討官。郊祀恩，特封建陽縣開國男，食邑三百戶，賜紫金魚袋，權刑部侍郎，兼國子祭酒、太子右庶子、左諭德、同修國史、實錄院同修撰。時廷臣爭務容默，有論事稍切者，衆輒指爲異。燾上疏，請「崇獎忠諫，以作士氣；深戒諛佞，以肅百僚」。又言：「虞運已衰，我之邊鄙當備者三：盜賊乘間也，姦雄崛起也，外夷猖獗也。蓋固藩籬、選將帥，在今日尤不可緩者。」除刑部侍郎，言藝祖置將，皆富之以財。其說曰：「待武吏，與待文吏不同。文吏責以廉恥，武吏取以才能。文吏任州縣，以節用愛人爲本；武吏任將帥，以醖賞得士爲先。臣願今日任將之道上法太祖。」

蓋時江上諸將多以微文細過坐黜，雖嘗有功，或不免吏議，故燾言及之。權工部尚書，兼太子右庶子，仍兼講讀。言於東宮：「帝王之學，當本之《大學》，探之《中庸》，參之《論語》、《孟子》，然後質之《詩》、《書》，玩之《周易》，證之《春秋》，稽之《周官》，求之《儀禮》，博之《禮記》，而又通之歷代之史、通鑑之書，以知古今之得失，君臣之事鑑，則物格知至，意誠心正，於修身治平之道猶指掌矣。」燾每講讀至經史所陳聲色、嗜慾之戒，輒懇切再三。以年過七十，屢請謝事，疏至二十上，並不允。詔七至，引趙抃留、歐陽修等以諭燾。比疾，懇祈卒不獲命，燾猶勉輔導。疾間復作，遂以不起，年七十二。積階大中大夫、爵建陽縣開國子，食邑五百戶，賜紫金魚袋，以通奉大夫致仕。遺表聞，贈金紫光祿大夫，輟朝一日，詔杭州府致其喪，邵武軍給葬事，謚文簡。燾爲人簡質端重，和易以莊，少習家訓，長得名師，其淵源一出於正。每夜斂衽默坐，虛心省察，嘗取徐節孝帖教其子弟，而言曰：「日人之後，至於夜中，事物俱靜，志氣俱定，是君子思慮經綸之時。」晚號雲莊居士。有《奏議史稿》、《經筵故事》、《東宮詩解》、《易經說》、《禮記解》、《講堂故事》、《雲莊外稿續稿》若干卷。子瑋。孫鑑。

炳 字韜仲。與兄燾從文公編集《程氏遺書》。炳兄弟研窮誦讀，展夜不息。舉進士，授迪功郎，知應城縣。好賢禮士，修飾儒學。訪求前令謝良佐遺跡，創上蔡先生祠於講堂東隅，朱文公爲記。再調劍浦丞，專以仁義教化，平易近民。民有訟，委曲訓戒之，後有鬪者懇於官，曰：「何面目復見公耶？」累官兵部郎中，朝請大夫，乞祠。閑居，誦讀不輟，自號悠然翁。所著有《陸堂類稿》若干卷、《四書問目》、《綱目要略》、《堂銘故事》傳於世。子瑋。孫應李、銓。

炳 字季明。授進賢丞，遷固始令。早從文公學。比掛冠，徜徉武夷九曲間，悠然自尋其樂焉。

卓 字伯醇。寶慶三年知江寧，爲政愷悌，不擾而辦。制闕以賢能薦於朝，俾兼幕府。以收李全功，轉朝請大夫、知常州、衡州，移南劍州，辭疾不赴。與學徒熊竹谷輩講道終其身。學者尊爲靜齋先生。所著有《毛詩解》、《家禮集註》、《心經集說》。子欽。

鑑 字子靜。以祖澤蔭桂東令。工詩文翰墨，如《題文天祥贊》、《答君虛齊僚》諸詩，深得風入之旨。鄧允薦稱其一生琢對匠語，洗削治澤，齒牙間纚纚有聲，大率精切得意處，前無古人。至老，皮毛落盡，孤興兀然，雷霹之琴、大成之鑠、潮湍激齧之山，皆天然成趣，不繩削而自合。

欽 字子時。幼在襁褓中，或啼哭，示以書帙，卽嬉笑。甫能言，母梁教以古詩，輒成誦不忘。七歲，日受數千言，每夜達旦，母憐而節之，乃匿膏室中，候寢熟復燃。從蔡沈學，精於《易》。以祖蔭補官承事郎、知嵯縣，有政聲。轉朝奉大夫，出知饒、處、邵武、南康。時江、汀、邵寇竊發，境內騷動，欽募義勇勦捕，誅其首惡，餘悉縱還鄉。事聞，陞殿中侍御史、同知樞密諫院事。歸隱武夷茶洞口，築茶巖小隱堂爲終焉計。自號冰壺散人。終朝請大夫，謚忠簡。所著有《書經衍義》、文集十卷。

填 字仲撫。教授撫州，尋爲廣東運屬，吏胥竦畏。徙知將樂，吏事精敏，豪猾警服。縣有廂西，拘者幾千人，皆負豪家債者，填悉縱遣之。

應李 字希泌，初名榮。謹厚莊重，博習修潔。舉進士，調建陽簿。入元不仕，與熊禾、胡廷芳講道洪源山，居十有二年。後建化龍書院於莒潭，聚徒講授，厚給課試，悉倣州縣法。

銓 字子平。博通《詩》、《禮》，學宗考亭。尉臨川，有聲。尤工吟咏，著《傷時歌》，深悼世人不務本實，穆然有返樸之思焉。

周明仲 字居晦。好讀書，有志當世。官宣教郎。淳熙甲辰，常平使者宋若水知其賢，以魏元履所立建陽長灘社倉事屬之。明仲力爲振聿，兼文公夏貸冬斂、收息什二之法，行之三年，什二之收，歲以益廣。文公爲作記而稱之。

熊以寧 少從朱文公游。舉進士，授光澤簿。剛直正大，一介不妄取予。嘗曰：「學顏子之學，志伊尹之志，分內事也。」有《大學釋義》、《中庸續說》行世。

陳總龜 字朝端。居近朱文公，日從朱文公游，文公與書勉之，問學不下百餘章。舉進士，授永豐尉，未赴卒。

余翼 字子羽。舉進士，尉宿松。與王荊公游。有文學，善議論。雖久困，無所合。一時文人多知之者。

熊節 字端操。十歲讀《易》，日誦二卦，卽知問難，至通曉而後止。慶元中，廷對，條陳三德。累官通直郎，致仕。有《中庸解》三卷、《智仁堂稿》十卷，又有《性理群書》。

宋鞏 字宜卿。判廣州，廉靜有聲。

熊剛大 少穎敏，從蔡淵、黃榦游，問學精專，操行篤至。爲建安教授。所著有《詩經註解》、《性理小學集解》。學者稱古溪先生。

宋慈 字惠父。歷湖南提刑，以朝請大夫直煥章閣，帥廣東，致仕，卒。慈，通經史，能文章，居官以民命爲重，嘗作《洗冤錄》。及卒，理宗以其爲分憂中外之臣，有密贊圖畫之寄。特贈朝議大夫，御書墓門旌之。



劉子寰 字圻文。蚤登文公之門。官至觀文殿學士。有詩名。自號篋嶠翁。劉克莊爲序其集。

葉味道 初諱賀孫，以字行，更字知道。其先括蒼人，後居建陽之后山。師事文公，建溪山精舍受學焉。試禮部第一。僞學禁行，味道對制策，率本程頤，知舉胡紘見而黜之曰：「必僞徒也。」既下第，復從文公武夷山中。學禁開，舉進士，調鄂州教授。理宗訪問文公弟子及所著書，部使者以味道聞，差主管三省架閣文字，遷宗學諭。輪對，言：「人主務學，天下之福也。必堅志氣以守之，謹幾微以驗之，正綱常以勵之，用忠言以充之。」至口奏，則又述帝王傳心之要，與四代作歌作銘之旨，其終有曰：「言宣則力減，文勝則意虛。」從臣有薦味道可爲講官者，授太學博士，兼崇政殿說書。故事，說書之職止於《通鑑》，而不及經。味道請先說《論語》，詔從之。帝忽問鬼神之理，疑伯有之事涉誕，味道對曰：「陰陽二氣之散聚，雖天地不能易。有死而猶不散者，其常也。有不得其死而鬱結不散者，其變也。故聖人設爲宗桃，以別親疏遠邇，所以教民親愛，參贊化育。伯有得罪而死，其氣不散，爲妖爲厲，使國人上下爲之不寧。子產爲立子洩以奉其後，寧神之義也。」味道所對，蓋諷皇子竑事。三京用師，廷臣邊聞交進機會之說，味道進狀，以爲：「開邊浸濶，應援倍難，科配日繁，餽餉日迫，民不堪命，龐勳、黃巢之禍立見，是先搖其本，無益於外也。」經筵奏事，無日不申言之，而洛師尋以敗聞，（四）人謂味道見微慮遠。味道奏陳，無一不開導引翼，求切君身，旁引旋折，推致於治道。遷秘書著作佐郎，卒。訃聞，帝震悼，出內帑銀帛賻喪，謚文修，升一官，故事未有也。味道所往來討論者，蔡仲默、黃惠卿、劉韜仲、童伯羽、真德秀、張洽輩，皆不負師託，傳心演繹。所著有《四書說》、《天學講義》、《易會通》、《祭法》、《宗廟廟享郊社外傳》、《經筵口奏》、《故事講議》。子采。

采 字仲圭。少從蔡淵、李方子學。嘗居武夷八曲鼓子書堂，游翫賦詩，陳安卿以其好躡高妙，屢促之，遂循序就實，構漁隱精舍，問學日進。淳祐初，登第，授邵武尉、昌化令，轉景獻府教授。集《近思錄》進呈，理宗嘉納，遷秘書監。論郡守貪刻。遷樞密檢討，知邵武軍，作郡乘，置田築祠祀朱文公於郡洋，復給田若干頃祀文公於光澤縣，以方子配之。累官翰林侍講，乞歸。景定初，詔起，病不能赴，尋卒。所著有《集解近思錄》、《西銘性理》等書。

游義肅 字秉孫。嘉熙間知連江。修學宮，益田贍士，浚東湖，復九井，創平糴倉，成南江橋，築相公堤，連江人植碑紀之。

宋秉孫 字彝父。篤志勵行，博學能文。初，知建寧縣，適值歲歉，悉力賑給，有劫民穀者，卽尸諸市以徇。邑舊無成壁，度地興築。後倖本郡，又撥餘鹽錢置田爲繕修費。官至朝奉大夫、尚書省主管架閣文字。入元，不仕，吟咏自娛。

吳居仁 字溫父。父齊，知侯官縣，有廉聲。居仁以特科歷古田尉、攸縣丞、融州節度推官。所至，以儒飭吏，聽訟必以人倫大誼斷曲直。邵使者下其所斷爲州縣式。居官奉法，無妄取。朱文公稱爲真廉吏。

熊禾 字去非，號勿軒，一號退齋。總角能屬文。志濂洛關閩之學。訪文公門人輔氏而從游焉。既博通《五經》，遍覽諸子百家之論。舉進士，授汀州司戶參軍。入元，不仕。築室雲門，從學累百。一時名士若胡庭芳、顏君履皆從之游，州縣咸尊以師禮。謝枋得聞禾名，自江右來訪。及會，共訴宋亡之恨，抱持而哭曰：「今天下皆賊也。所不爲賊，足下與我耳。」道義契合，不能卒別，相與講論夫子之道，益明舊聞，通徹新知。而胡庭芳素明《易》學，亦自江西挾道相訪，相與講切者十有七年。禾與庭芳論學，謂秦

漢以下，天下所以無善治儒者，無正學也。儒者所以無正學，《六經》無完書也。考亭夫子集正大成，平生精力在《易》、《四書》、《詩》、《書》、《儀禮》僅完書開端，而未及竟。雖九峰蔡氏，猶未大暢厥旨。《三禮》雖有通解，缺而未補尚多，至勉齋黃氏、信齋楊氏粗完喪祭二書，而授受損益精意竟無能續，若《春秋》，則不過發其大義而已。兵難之餘，學徒解散，文集燬亡，蚤歲成《春秋通解》一書，又厄於火，兼以齒髮向衰，抗我滋甚，余雖與君講切十有七年，《易》、《詩》、《書》僅爾就緒，《春秋》更加重纂，則皇帝王霸之道亦或粗備。惟《三禮》乃文公與門人三世未了之書，庭芳當分任此責，以畢吾志。」其後竟修《儀禮》，未及成書，卒。福寧陳益方足而成之，以爲《禮編》。所著有《四書標題》、《三禮考異》、《春秋論考》、《經序學解》。

### 元進士

至正八年戊子 宋巒宋宋慈孫。

薦辟、冑監賢者見列傳中。

有傳

游應翔 朱沂 朱彬 張昇

游應翔 字子善，酢七世孫也。值宋元兵革未靖，結屋武夷澄川之上，耕隱自晦。人稱其操履端方，無媿先世。後繇武夷直學遷學正。

朱沂 字泳道，文公三世孫。累薦遺逸，不赴。與謝枋得游，枋得稱其「論古今人物高下、國家興廢、善類仕止久速之故，掃盡華葉，獨存根株。文公之後世，濟其美者，泳道一人耳」。晚歲授考亭書院山長。

朱彬 文公四世孫。讀書有文，克紹家學，士子從游者甚衆。至正間，爲延平路知事。

張昇 字伯起。以神童舉入胄監，官至江西儒學提舉。至正戊戌，陳友諒據豫章，迫取諸司印，昇曰：「誰能苟生辱名？」投印井中，不食死。

### 皇朝科第

舉人 進士子、午、卯、酉屬舉人，辰、戌、丑、未屬進士。

洪武十七年甲子 羅寅 丁顯以貢，順天中式。

十八年乙丑 丁顯狀元。 羅寅

二十六年癸酉 李善

二十九年丙子 詹易

永樂三年乙酉 范普

六年戊子 饒廣 范澄

十五年丁酉 劉童

十六年戊戌 劉童

十八年庚子 陳恭

宣德七年壬子 游敏宋文肅裔孫。

正統六年辛酉 丁慈 蕭崇

九年甲子 丘福

景泰四年癸酉是年開科，福建中百三十七人。

趙文郡志作天順三年。

朱穩

五年甲戌 丁慈

天順元年丁丑 朱穩

成化元年乙酉 蕭泗

十三年丁酉 蕭銳經魁。應天中式。

二十二年丙午 袁鉅

弘治五年壬子 熊熙宋勿軒裔孫。虞金

十七年甲子 黃麒 李仕傑順天中式。

正德十一年丙子 朱煊文公裔孫。

十四年己卯 呂希武

嘉靖七年戊子 張敏

十年辛卯 朱凌文公裔孫。

十三年甲午 黃應魁

十六年丁酉 袁鶴齡銛子。張璿敏弟。

十九年庚子 李有年

三十年辛丑 朱凌

三十二年癸卯 徐一魁

二十八年己酉 李有則有年弟。 王秦

三十一年壬子 施在行 李朝佐 陳嘉謨

三十四年乙卯 朱壘煊第四子。 江龍

三十七年戊午 翁和卿

四十三年甲子 蔡國忠

隆慶元年丁卯 江騰鯨 趙鳴謙 蔡國輔國忠兄。 王密廬寧學。

四年庚午 傅國珍 黃應槐貢士。 三陽子。 順天中式

萬曆四年丙子 李世芳朝佐第三子。

五年丁丑 傅國珍

十年壬午 黃廷柱應槐弟。 府學。

十九年辛卯 李世科朝佐次子。 張汝桂

二十二年甲午 李聞韶有年第六子。 詹玉鉉

二十五年丁酉 朱以淡凌孫。

二十八年庚子 袁文紹 熊紹祖 朱洧煊曾孫。

三十一年癸卯 蕭鳴盛府學。 李震時

四十年壬子 涂良立

薦辟、貢士賢者雜見列傳中。

有傳

張智 王相 丁顯 程蕃 范宗諒 盧欽 黃璫 劉童 黃勝 丁慈 朱穩。煊。奎。用圭。  
凌。清。 袁銛 熊熙 虞金 袁鎬 黃麒 范育才 李有則 施在行 江龍 趙邦瑞〔五〕 黃三陽  
江騰鯨

張智 字玄略，昇之子。博學工文詞。洪武初，以明經薦授夷陵州學正。教條嚴肅，多所造就。召陞禮部右侍郎，制度儀文，嘗有建明。未幾，坐累左遷國子學錄。永樂乙酉，陞國子司業，卒。

王相 字舜舉，一名舉。七歲能詩，以奇童薦。洪武四年，應秀才舉，授健爲主簿。最聞，陞王府典簿。既復舉明經，授襄陽府知事。陞戶科給事中，轉監察御史，有蹇諤風，以疾卒官。相好吟咏，所著有《紀行稿》、《秦淮稿》、《淳雲稿》、《蠲庵稿》、《窮愁稿》、《省風稿》若干卷。

丁顯 字彥偉。博通經史，援筆立成。洪武十八年，會試第三人。其第一爲黃子澄，第二爲練子寧。及廷試，顯居首，子寧次之，子澄又次之。先是，高皇夜夢三絲墜地，將臚唱，以子澄年少，議論過激，抑置第三，而以二甲花綸易之。三人姓名俱有絲，適與夢叶。高皇喜甚，俱賜狀元，授翰林修撰。國朝開科，狀元及第自顯始。後坐事謫廣西馴象衛。時香山人周御史尚文，秦郵人杜武，緣伯恭，江西人羅時用、易大年、譚南宿，俱一時名流，與顯同謫，日相唱和，超然自得。久之，死戍所。太祖曰：「顯年少自喜，吾固裁之，武將何得不護持，令其廢志耶？」悉論武將罪。

程蕃 字伯昌。博學多識。洪武間舉明經，累典文衡，官至徽州府學教授。

范宗諒 字子貴。篤學通世務，好直言。洪武間舉賢良方正，授南寧府推官，陞員外郎。

盧欽 字士明。性好學，五經百氏，悉能貫解。曰：「讀書非徒記誦，將以行之也。」洪武間以明經聘爲詹州判，卒。

黃璿 字景衡。尚志節，通經史百氏，能言其同異得失，上下數千載。縣監生任霸州判官，致仕。潭故無志，璿輯古今纂修以傳。晚號知非子。

劉童 字良能。好學力行。知寧遠縣，觀風者薦其才略，以嘗忤時相，事竟寢。陞江西布政司經歷，尋陞蒙化州知州，致仕，卒。童廉能著聲，號稱循吏。鯁直不屈，遂坎坷終其身。

黃勝 縣楷書任戶部郎中。宣德間，陞衢州知府，有守有爲，禁豪軍，治強梗，民心翕服。去任，多垂涕者。

丁慈 字元凱。任監察御史，陞河南按察僉事。蒞政嚴明，獎鋤有聲。卒於官。

朱穩 字伯承，文公九世孫。授南戶部主事。歷福建運使，以父母之邦，辭不供職，改浙江。所至，公勤廉謹。文公之後登第自穩始。弟楸。

楸 字伯盛。丞餘杭，永年二縣。程敏政贊之曰：「觀其外如豹之隱霧，察其內如玉之韞輝。處家庭有難弟之譽，登仕籍無負丞之譏。」

煊 字孔溫，文公十世孫。少警穎，讀書日記數十餘言。舉鄉試。非公事不履邑門。令薛宗鎧嘆曰：「朱孔溫真儒裔也。」嘉靖初，授江西永豐令。永豐俗獷狠鬪訟，煊一鎮以靜。間有犯者，必懲而婉諭之。秩滿，乞致仕，囊無餘金。居家操行醇謹，子姓侍立，衣冠肅然。

奎 字原聚，文公十一世孫。以貢簿高安。有負贖鍰，辰朴申而納，詢：「何速也？」曰：「鬻妻。」奎



還其鍰，召令完聚。陞思恩經歷，招安八寨，單騎循行，酋長感泣曰：「朱公清正誠心來此，再不敢犯。」後自免歸。弟用圭。

用圭 字原信。選貢，任滁州同知，與巡按成子學、知州高警方講王文成之學。用圭，州同知，卑官，獨請就講席，以獨尊其祖文公之說。

凌 字原冲，文公十一世孫。舉進士，授戶部主事，督九江鈔稅，見所徵嘗溢額，遂議減稅。積一歲，去五之一。時楚地饑，男女流離，人因之爲利者，載至九江，關嚴不得出，輒溺死，乃稍寬其禁。檄令所司，修荒政，禁略販，全活者甚衆。報命之日，民勒石紀德。陞員外郎，出爲陝西僉事兵備。歲餘，以疾歸養。凌性孝友，家居二十年，不問產業。葛巾粗衣，絕無町畦。當道屢欲薦用，辭不就。

洧 字原正，文公十二世孫。教諭浦江，課士却黷。遷景陵令，邑值水旱蝗三災，捐一切逋負，請改行海運，以蘇民困。卒於官，貧無以斂，民哀惜之。

袁銛 字時敏。仕電白知縣。簡易清素，時論重之。

熊熙 字文明。少從侯官林圯學《易》，與晉江蔡清同稱高第。授翁源訓導。後謝病歸，門人感泣道左。所著有《四書周易管天》。

虞金 字宣之。任衡山知縣。蒞政勤謹，民樂其業，以剛方不徇時致仕。

袁鎬 字世京。弘治間，繇國子生任瓊州府推官，折獄詳明，罪人懾服。會瓊缺守貳，鎬署政，振紀綱，除宿弊，罪奸吏，所部肅然。卒於官。

黃麒 正德十一年任潮州府學教授。淡泊自適，樂教務施。捐俸以濟生徒，度不自給，又白上官爲

助，士咸屬心。陞九江推官。

范育才 正德十三年以監生任興寧簿，廉謹平易，甚得民心。

李有則 字子彝。知順德縣，敷政慈祥，士民愛之。

施在行 字用卿。知星子縣，捐俸改黌宮，以振科第，邑士德之。

江龍 字世霖。孝友勤學。授南寧府判。遷左州知州。以御史薦，改知鬱林。時州苦積荒田，朱龍力爲申豁，歲減二千有奇。又革除斗級、請保、牛稅諸不便事。陞高州府同知，議足兵糧，守要害，禁鬻子，正黃冊，豁清勾，急初屍。六年，當移調，未及赴，卒。龍居官廉明愛人，三仕粵中，皆見尸祝。

黃三陽 字元泰，黃端公之後。繇恩貢任安吉州同知。罷運儲常例，履畝均輸，悉心經營。兩視州縣篆，廉而有惠。擢保定判，卒於官。吉人祀之。三陽通《易》、《詩》、《禮》三經，弱冠便開講席，從游千數，三經並授。他如天文地理陰陽醫卜，靡不究心。在官，邸署蕭然，一編自適。

江騰鯨 字于潛。署教卽墨，轉銅陵府推官、萊州府通判。爲人恬介，不邀上官辭色。官暇輒稱詩灑墨，曰：「不敢以區區俗吏，荒廢吾心也。」其論詩法曰：「詩寫性情，天竅發而萬籟生，有不得而自知者。一近色相，詩而俳優；一着煙火，詩而土木；一苦思索，詩而鴆毒；一假剽竊，詩而穿窬。」

〔校記〕

〔一〕「官省事禁」，各本原作「官省禁」，據《宋史》本傳改。

〔二〕「在子孫人建安」，據傳記目錄，《朱熹傳》及本傳，當作「塾子孫人建安」。

〔三〕「翊善」，各本原作「翊贊」，據《宋史·職官志》改。

〔四〕「洛師」，各本原作「洛書」，據《宋史》本傳改。

〔五〕「趙邦瑞」，各本原闕本傳。

閩書卷之九十七

英舊志 縉紳(二)

建寧府 崇安縣一

唐

池繁禧

池繁禧 仕至五大夫。五季之亂，隱不復出。歲歉，出粟賑民，鄉閭德之，爲立廟。

五代南唐

彭璫

彭璫 字武仲。任建州兵馬都監，仕至殿中監。請以崇安場爲縣者也，語見建置志。(二)璫淹貫經籍，亦通釋典，與扣冰禪師友善。

周進士

顯德三年 張靄

宋科第

太平興國二年癸未 詹襄

雍熙二年乙酉 柳宜

端拱二年己丑 張倣舊孫。

咸平元年戊戌 柳宏宜弟。〔三〕

三年庚子 詹瑞

五年壬寅 詹靖

景德二年乙巳 劉滋 吳航

大中祥符元年戊申 詹庠

八年乙卯 劉夔 柳真

天禧二年戊午 柳三復 詹鸞

天聖二年甲子 詹保輔

八年庚午 吳誠航子。 翁紀 翁純紀兄。

景祐元年甲戌 柳三變又名永,宜子,宏從子。 吳評航子。 柳三接 彭鉦

寶元元年戊寅 游奎

慶曆二年壬午 徐九思

六年丙戌 柳說三變子。 翁肅紀子。

皇祐元年己丑 王鬲

五年癸巳 翁萬 柳淇 彭仲熊

嘉祐二年丁酉 翁仲通

四年己亥 江淑 翁敏政一作敏修。

六年辛丑 丁擇

八年癸卯 詹範

元豐五年壬戌 暨陶 吳仲虎

八年乙丑 吳逢道

元祐三年戊辰 江滋 劉約

紹聖元年甲戌 吳見推 劉鞏特奏民先子。特奏失其年。 余孝持 翁彥深仲通次子。

四年丁丑 胡安國第三子。宣義郎淵子。 翁彥國仲通第三子。 暨唐裔陶子。

元符三年庚辰 翁常

崇寧二年癸未 江信

特奏名 彭路第一名。

五年丙戌 游彬一作斌。

政和二年壬辰 彭拯 翁彥約仲通長子。 卓剛中 詹公薦

五年乙未 章元振 詹卓然 劉牧

重和元年戊戌 丁偕 柳綬 翁采 劉瑋

宣和三年辛丑 胡寅安國子。 何昌世 吳達 吳逾

六年甲辰 范元凱 江灝 吳明卓 彭南舉

建炎二年戊申 吳適 應孟明

紹興二年壬子 翁彬 范芑

五年乙卯 胡璉 丘確 何灝

八年戊午 詹如松 虞公輔 李弁

十二年壬戌 劉珙忠定公子。 劉如愚珙從父。

十八年戊辰 何昌邦一作邦昌。 詹輓 胡師徐安國族。

二十年辛未 程鶚

二十四年甲戌 哀彬 劉璠 彭爽路孫。 哀蘊元

二十七年丁丑 王文震 彭範

三十年庚辰 葉堯黃

隆興元年癸未 詹體仁信豐尉儲子。 詹岳 李獻明

乾道二年丙戌 李岐弁子。

五年己丑 江默灝孫。 吳靈特恩梅從子。 虞大中 黃鯉

八年壬辰 歐陽光祖

淳熙二年乙未 詹駸 林黻 翁華臨武令翁續孫。 暨壽隆

五年戊戌 劉褒 詹克愛 詹賢玉 應怡 翁允明贈朝散大夫。延慶孫。

八年辛丑 程晞

十四年丁未 江史 暨庚

紹熙元年庚戌 虞庠大中弟。 應薦 丘樞

慶元二年丙辰 詹師文 徐昌之 丘和

五年己未 詹淵 何大章

嘉泰二年壬戌 詹栗 胡翔卿

開禧元年乙丑 李仲光 陳雲 詹甫栗子。

嘉定元年戊辰 江埧顯曾孫。 蔡知方

四年辛未 李華 黃定 藍興祖《甌寧志》紹定二年亦有此名。

七年甲戌 哀夢松 翁浦 陳範

十三年庚辰 哀長吉 彭彝 鄭潛

十六年癸未 游汝梅

寶慶二年丙戌 翁甫 江寅顯從孫。 江鏊埧子。

紹定二年己丑 何元澤 吳七德

五年壬辰 尤德卿 翁酉 江己顯從孫。 江鎔埧子。

端平二年乙未 江文龍 詹必張



嘉熙二年戊戌 翁合

淳祐元年辛丑 吳益

七年丁未 范宏忠 蔡益

寶祐元年癸丑 蔡公亮 藍應午

四年丙辰 詹夢璧師文子。祝洙涵江書院山長。穆子。 陳正夫

景定三年壬戌 詹復

咸淳元年乙丑 魏公圭 翁燧 曹應時

四年戊辰 翁潤之

十年甲戌 江三德

薦辟、任子賢者雜見列傳中。

有傳

張靄子矯、岐，孫傲。 柳宏從子永。 劉滋 劉民先子幹、韓、輶。 幹子子羽、子翼、子肇。 子羽子珙。 珙子學裘。 子

聲子坪。 子羽從弟如愚。 吳航子訓。 詹庠 劉夔 翁紀子肅，孫延慶。 徐九思 王高 彭彝 翁仲通子

彥約、彥深、彥國。 彥約子挺。 彥深孫蒙之。 詹範 暨陶 吳仲虎子必明。 江滋

張靄 字伯雲。 好學，善屬文。 李氏據有江表，靄耻事僞朝，潛入汴京，登周顯德二年進士。 知蘄

州。 宋建隆中，除侍御史，數諫諍。 一日，太祖方於後苑彈雀，靄亟請人奏事。 及人奏，太祖怒曰：「常事

耳，何亟爲？」靄曰：「臣謂亟於彈雀。」太祖益怒，引斧柄撞靄口，墮二齒。 靄徐拾而懷之。 太祖曰：「欲

訟朕耶？」對曰：「敢訟？陛下自有史官。」出爲河中府判官。太宗卽位，召還，密啓裨質爲多。晚年齒落殆盡，太宗賜以嬪御，爲具膳羞。當時號爲國老，官至左司員外郎，卒年八十四。賜葬西京洛陽之尹村，贈太傅。子嶠、岐。嶠子倣。

嶠 字景山。隱居武夷，南唐主惡竊仕周，執嶠赴江南。後歸宋，通判歙州。盜盧絳入境，與守臣龔慎儀死守。太宗朝，拜御史中丞，累贈工部尚書。

岐 字郊卿。歷官大理，出爲永新令。邑逃亡逋租千餘緡，岐以次遞推，隱蔽皆彰，復其征賦，爲真宗所知。遷秘書丞、知瓊州。瓊俗悍朴，牧守得人，則歲時以香燭魚菓爲獻，否則群起爲盜。岐鎮以清靜，民夷欣服。其地多颶風，拔屋，盛夏猶寒。岐教以立屋之法，遂免其患。後倅曹州，移瀛州，卒。

倣 字希古。舉進士，調崇仁令。修梓堰萬金陂以增灌溉。蠻寇近境，視倣有備，亟引去，倣乃慈以撫之。後監鎮州糧料。真宗幸澶淵，聞倣名，累遷太常博士。仁宗時，歷知容、亳、泰、泗、岳、吉六州。會江淮發運張綸修復海堰，舉倣自代。再命知泰州以成之。復歷數郡，官至工部侍郎。子湜、衮，皆爲郎。

柳宏 字巨卿。父崇，見韋布。宏，咸平初進士。宏兄宜，官濟州，奉父就養，父歿於濟。宏適按獄密州，聞訃，跣雪奔喪。有詔起服詣闕，三上章乞終制，不報。後因官江東，過廬山，樂之，卒居焉。官終光祿卿、河南開國伯，贈司徒。子真齡，比部員外郎；真公，太子中舍，尚國子博士。兄子永。

永 字耆卿，初名三變。父宜，工部侍郎。永，舉進士，累官屯田員外郎。工詞章，尤擅樂府。仁宗誕辰，太史奏老人星見，永爲《醉蓬萊詞》以獻。有薦其才於仁宗者，仁宗曰：「此人不宜仕宦，且去填詞。」因自稱「奉旨填詞柳三變」。永與兄三復、三接，皆爲郎，而皆工文藝，時號「柳氏三絕」。范鎮見永

作，歎曰：「仁宗四年太平，鎮在翰苑不能出一語，乃於耆卿詞見之。」而歐陽凱贊之曰：「錦爲耆卿腸，花爲耆卿骨。名章雋語，笙簧間發。」王元澤追慕永才，亦有「賴有樂章傳樂府，落落驪珠照今古」之咏。子況，著作郎。

劉滋 字潤之。景德中試開封、禮部，皆第一，調知無錫縣，通判福州。仁宗時，知南劍州。州北黯淡灘，善覆舟，〔四〕滋別開灘傍灌，疏三巨洲，鑿七盤石，轉山曲二百餘丈，以舒水勢，自是舟行無患。歷典九郡，皆有惠政。官至職方郎中，累贈開府儀同三司、吏部尚書。始，滋未貴時，嘗夢神人携印一麓，令吞之，印大小凡百餘顆，滋吞至十四，印文纍纍然見腹間，後更中外十四任，而典郡者九。滋子同，大理寺丞，勳，知臨江軍；照，河陽令。孫元振。曾孫瑋，勉之。瑋有詩名，與劉子輩多所唱酬。勉之，見韋布。

劉民先 字聖仕。以特奏名人官。里人有爭，或不謁吏而決於民先者。作一枝堂潭溪之上。與弟民覺，奉母以終餘年。旣葬，廬墓，日夜哀悲，鄉評尚之。子幹、韓、輿。〔五〕

幹 字仲偃。登進士，調豐城尉。歲飢，多盜，他邑率以捕殺希賞，幹曰：「此飢民救死耳。」率豪右賑濟，多所全活。隴城令王厚鎮熙州，辟幹狄道令，提舉陝西平貨司。河湟兵屯多，食不繼，幹延致酋長，出金帛從易粟，就以餉軍，公私便之。遂爲轉運使，擢中大夫、集英殿修撰。劉法死，夏人攻震武，幹攝帥鄜延，出奇兵誘之，解其圍。夏人來言，願納款謝罪，衆以爲詐，幹曰：「此實情也。兵興累年，中國尚不支，況小邦乎？」密疏以聞，詔許之。款使愆期不至，諸將又言：「夏果詐，請會兵乘之。」幹曰：「容有他故。」會再請者至，幹戒曰：「朝廷方事討伐，吾爲汝請，毋若異時邀歲幣，侵軼疆場，以取威怒。」夏人聽

命，西邊以安。丐祠，除徽猷閣待制、提舉崇福宮。起知越州。方臘陷衢、婺，越大震，官吏悉遁，幹曰：「吾當與城存亡。」寇至城下，擊敗之。拜述古殿直學士，召爲河北、河東宣撫參謀官。時朝廷用童貫、蔡攸議，與金人夾攻契丹。幹以爲與夷同事非計。徙知真定府，又徙建州，改福州，加延康殿學士。尋落職。起知荆南。河北盜起，復以守真定。單騎赴鎮，招諭賊首柴宏，一路遂平。金人謀南牧，幹謀得實，急以聞，陰治城守待變。後金兵抵城下，知有備，留兵其旁，長驅內嚮，及還，治梯衝設圍，示欲攻擊，幹發強弩射之。金人知不可脅，竟退。自金兵之來，諸郡皆塞門，民坐困，幹獨縱樵牧如平日，以時啓閉。欽宗善之，拜資政殿學士，充河北、河東宣撫副使。太原陷，召入爲京城四壁守禦使，宰相沮罷之。初，虜之人真定也，父老號呼曰：「使劉資政在鎮，豈有此虜？」益知幹名，及京城不守，必欲得之，宰相詒以割地，遣幹使金營。金人命僕射韓正館之僧舍，正曰：「國相知君，今用君矣。」幹曰：「偷生以事二姓，死不爲也。」正曰：「軍中議立異姓，欲以君爲正代，得以家屬行，與其徒死，不若北去取富貴。」幹仰天大呼曰：「有是乎！」歸召指使陳灌等曰：「六」虜乃欲用我，我當以死報國耳。」灌等泣且拜，幹曰：「死生，命也。」即手書片紙付灌持歸報諸子，沐浴更衣，酌卮酒而縊。燕人嘆其忠，瘞之寺西崗上，遍題窗壁，識其處。死八十日乃就殮，顏色如生，年六十一。建炎元年，贈資政殿大學士，謚忠顯。幹莊重寬厚，至臨大節，毅不可奪。軍中家報有曰：「今日邊鄙多事，只得盡忠死節，餘不足言」，其素如此。靖康死難之臣，蓋幹爲尤著。子子羽、子翼、子翬。

韓 字仲文，一字潛文。有智謀，善兵。從兄幹平睦寇有功，補承信郎。再從守真定，適虜圍城，幹命韓以強弩射之。虜知不可犯，退去。轉修武郎，又隨幹宣撫河北。膽氣兼人。未幾卒。

韞 字仲固。以門蔭入仕，歷倅三州，典二郡，皆有聲。後以朝散大夫致仕。築室縣南，有臺榭花木之勝，自號秀野，與劉子翬、朱元晦諸賢唱酬甚多，時人謂之吟龍。子子翔，丞瀏陽，秩滿，不仕，亦能詩，有父風，時人謂之詞虎。

子羽 字彥修。幹帥浙東，子羽年二十四五，以主管機宜文字佐之，用羸卒數百破方臘數十萬衆，全其城。人主太僕、太府簿，遷衛尉丞。幹守真定，子羽辟從，父子相誓死守拒金，繇是知名。除直秘閣。幹死，既免喪，除秘閣修撰，知池州。以書抵宰相，論天下兵勢，當以秦、隴爲根本。改集英殿修撰，知秦州。未行，召赴行在，除樞密院檢詳文字。建炎三年，大將范瓊擁強兵江西，召之弗來，來又不釋兵，知樞密院事張浚與子羽謀誅之。一日，命張浚以千兵甲而渡江，若備他盜者。因召瓊、浚及劉光世赴都堂議事。方設食，子羽坐廡下，恐食已瓊覺，趨前出黃紙，麾瓊下曰：「有勅，將軍可詣大理置對。」瓊愕不知所爲，子羽麾兵擁置輿中，送獄。光世遂撫其衆。浚以此益奇之，宣撫川陝，遂辟爲參議軍事。至秦州，立幕府，節度五路諸將，規以五年而後出師。明年，除徽猷閣待制。金人窺江淮甚急，浚合五路兵進撓之。子羽曰：「始計五年，何太遽也？」浚不聽。比至富平，與金人戰，不利，退保興州，人情大震。官屬有請徙治夔州者，子羽叱之曰：「孺子可斬也！四川口有鐵山、棧道之險，不堅守而僻處夔，與關中聲援不相接，進退失計，悔將何及？若大軍留駐不移，急出關呼召諸將，收集散亡，分隘固壘，可觀釁而動。」浚然之。顧諸參佐，莫行者。子羽自請行，復至秦州，召諸亡將悉來會，命忠州防禦使吳玠柵和尚原，守大散關，而分兵悉守諸險。金人知有備，引去。明年，金人復聚兵來攻，再爲玠所敗。浚移治閬州，子羽請獨留河池，調護諸將，以通內外聲援。明年，玠以秦鳳經略使戍河池，王彥以金均房鎮撫使戍金州，二鎮皆

飢，興元帥臣閉糴，二鎮病之。玠、彥皆願得子羽守漢中，浚乃承制拜子羽利州路經略使，兼知興元府。子羽弛關禁，開褒斜道，通商輸粟。獲叛將，搜其衣箠，獲金人文移，約繇階城、梁洋、金商三路人寇。遂移書玠、彥，使備敵，彥不聽。已，金州果入，子羽聞之曰：「虜旦夕至，不亟守饒風嶺，是無蜀也。」卽遣田晟等馳守之，復具書報玠，列營以拒金人。金人從間道，繞出玠後，玠不能支，遽還漢中，且來邀子羽與俱去。子羽不可，留玠先柵定軍山以守，玠不從。子羽不得已，退守三泉，從兵不滿三百。與士卒同粗糲食，採草木芽蘗茹之。遺玠書曰：「子羽誓死於此，與公訣矣！」玠夜馳至於羽寢，則子羽方熟寐，傍無警衛。玠曰：「何簡易如此？」子羽慨然曰：「死矣，何復言？」玠慚嘆，泣下，竟不果留。子羽以潭毒山形斗拔，其上寬平有泉水，乃築壘守之。儲粟十餘萬石，盡徙將士家屬柵中，積石數十百萬，下臨走蜀道。居數日，候騎報虜大軍且至，諸將皆失色。人問計，子羽曰：「始與公等云何？今欲避邪？」下令蓐食。遲明上馬，先至戰地前當山角，據胡牀坐。諸將追及，泣請曰：「某輩乃當致死於此，此非待制坐處。」子羽不爲動，虜知不可攻，亦引退。自虜人梁、洋、蜀中復大震，宣撫司官屬爭咎子羽，更爲浮言相恐動，力請張浚徙治潼川。子羽復力言之，浚大悟，立止不行。虜遣十餘人持書與旗來招子羽及玠，子羽斬之，餘一人使還報。因復與玠謀，出銳師腹背擊之，未及期，而虜已遁矣，於是全蜀遂安。四年，坐富平之役，與浚俱罷。尋爲言者所論，責授單州團練副使，白州安置。明年，復原官，提舉江州太平觀，復爲集英殿修撰，知鄂州。未幾，權都督府參議軍事，撫諭川陝。還，奏：「虜未可圖，宜益治兵，廣營田，以俟機會。」時張浚以淮西安撫使劉光世驕惰不肅，密奏請罷之，而以其兵屬子羽。子羽復以爲不可。八年，以親老乞郡，乃以徽猷閣待制知泉州。僧人可度，賂結中貴人，屬戚里陳氏誣奏奪陳洪進守冢寺，符州奉行。子羽

曰：「此雖細事，然小人罔上，履霜之漸也。」卽疏以聞，可度等皆抵罪。既又大興學校，以教泉人。堂序規模，略放太學，爲閩中諸郡冠。已，淮西軍果亂，議者反謂子羽實使然，不責，無以係叛將南歸之望，遂以散官安置漳州。十一年，以張浚薦，復原官，知鎮江府，兼沿江安撫使。金人遣使來議和，植旗舟中，大書云「江南撫諭」。子羽怒，易之。伴使懼，索脇子羽甚急。子羽曰：「欲揭此旗吾境中，吾有死而已。」及伴使出境，始送還之。十二年，復待制，進爵子，益封二百戶。竟以不附秦檜和議，奉祠歸。卒贈少傅，謚忠穆，改謚忠定。子羽平生慷慨厲節，每有捐身殉國之願。众人惶惑失措，子羽色愈厲，氣愈勁。遇事立斷，凜不可犯。料敵決勝，雖古名將不能過之。至其爲政，敦尚教化，摘奸發伏，不畏強禦。一再貶徙，怡不介意，而許國之誠，至死不懈。朱文公嘗稱：「子羽在川陝，雖盛寒，必侵晨着單衣汗衫，人教場射箭三百，率以爲常。」又言：「幼嘗侍側，賓客滿座，見其目覽書冊，耳聽指受，口供應對，手答書疏，頃刻之間，百函俱發，并無差錯。真人傑也。」子琪。

子翼 字彥禮。少精敏力學。用蔭補承務郎，調秀州司錄。幹鎮真定，金人人牧，子翼沿檄間關兵刃走侍膝下。時朝廷割地議和，遣人持詔取河北監司分畫地界，幹稱詔拒之。靖康元年，幹遣子翼人奏事，賜對延和殿。欽宗見子翼進止閒雅，因而受知。未幾，除江西轉運使司，遷浙東提舉茶鹽事，轉承奉郎，歷轉宣議郎。建州熊志寧、范汝爲相繼叛。有旨除子翼知建州，道路梗澀，或勸子翼從王師航海進，子翼曰：「建，吾父母之邦，殺而勝之，可乎？」乃單車自崇安入。賊方棲山守險，所在屯布，子翼崎嶇行賊營，以誠信諭之曰：「汝輩誑誤及此！今王師且至，若能自新，釋兵歸農，太守能活汝。不然，悔無及。」賊皆曰：「我輩生矣。」羅拜去。王師尋下，多所俘獲，子翼分別善惡，縱釋之。賊首逸去，子翼設方略，明

賞購，不閱月獲其巨猾。其爲害幸免者，因事除之。良家子流落者，俾悉從良。尋知南劍州，蠲減科斂，一新郡治。紹興二年，應詔獻言，忤當路，奉祠。俄以薦知撫州，徙信州。爲人開明勤決，而本之以恕。所至簡易不擾，甚得民心。

子輦 字彥冲。以蔭補承務郎，辟真定幕屬。貽死難，子輦痛憤，哭墓三年。服除，通判興化軍。寇楊新犯閩境，<sup>(七)</sup>與郡將張當世畫計備衛，如素服戎事者，賊不敢犯。年方二十，自以哀毀致羸疾，不堪吏責，丐閒局。主管冲祐觀以歸。世家屏山下潭溪之上，有園林水石之勝。俯仰其間，盡棄人事，自號病翁。獨居危坐，嗒然竟日夜，意有所得，則筆之於書間。數日輒一走父墓，涕泗嗚咽，或累日乃返。與胡憲、劉勉之爲道義交，每相見，講學外無雜言。朱韋齋且死，囑文公師事之。子輦學深於《易》，家有東、西二齋，東以「復」名，西以「蒙」名。文公問人道次第，自言於《易》得人德之門焉，所謂「不遠復」者，吾之三字符也。子輦妻死，不再娶。以兄子翼幼子坪爲後。年四十七得微疾，卽入謁宗廟，泣別母夫人前，徧以書告訣素所往來者，召其侄珙付以家事，指示葬處，中外孤遺，人人爲計。既已，則與學者論說修身求道之要，作《訓誠》數百言，彈琴賦詩，澹如平日，居兩日歿。學者稱屏山先生。有文集二十卷。

珙 字共父。少長從季父屏山受書，知刻苦自勵。以祖貽死節，恩補承務郎。舉進士，中乙科，調監紹興府都稅務、潭州南嶽廟，主管西外敦宗院。遭外艱，連承重祖母喪。除諸土官大小學教授、權秘書省勘書籍、官禮部郎官、中書舍人。秦檜當國，一日，微示風旨，欲爲其父作謚，珙不亟奉行，檜怒，風言者論去之。踰年，檜死，乃得主管台州崇道觀。召爲大宗正丞，改秘書丞，兼權吏部郎官，卽真，尋除監察御史，避薦者復還故官。珙前在吏部時，善發杞吏奸，間攝侍郎，引選人改官班，占對詳敏，高宗悅之。故因



其引嫌，復委以選事，兼權秘書少監，遷起居舍人，兼權中書舍人。金虜渝盟，高宗將興兵復讎，一時詔檄多出拱手，詞氣激烈，聞者感奮，或至泣下。從車駕視師建康，兼權直學士院，既而，車駕將還臨安，江淮軍務未有所付，張浚方典留守，衆望屬之。而詔乃以楊存中爲宣撫使，中外人失望。拱不書錄黃，奏論其不可。高宗怒，顧宰相曰：「劉拱之父爲張浚所知，其爲此奏，專爲浚地耳。」宰相召拱諭旨，且曰：「再繳，累且及張公。」拱曰：「拱計國家，故不暇爲張公謀。若爲張公謀，不爲是矣。」再論愈力，存中，命乃寢。除中書舍人，直學士院。在掖垣三年，事例不便，知無不言，竟以數直諫，不得久居中，而宰相亦有陰忌之者。孝宗隆興元年冬，除集英殿修撰，知泉州。明年改衢州。始至，委事僚屬，一無所問，人以拱未更治民，意其懵事，或不屑爲者。既，乃一旦悉取而自爲之，辯察精明，區處的當，人始大服。宜章縣李金爲亂，衆萬餘人，分道南出，犯廣東西九郡境，旁人道州桂陽軍界，殺掠萬計，連破郴、桂、南城數邑大震。朝廷憂之，以拱爲敷文閣待制、知潭州、荆湖南路安撫使，乾道元年也。拱至，移書制置使沈介遣兵以來，介遣游兵奕車統制田寶、鄂州水軍統制楊欽率衆鼓行，數戰皆捷，金與其腹心黃谷等數十人皆被執伏誅，而部將趙彥復擒捕湘陰盜劉花三、李無對等三十餘人。其支黨詣降者，皆與以故田宅。所錄上諸將功狀，詳實無私。孝宗嘉歎再三，以爲敷文閣直學士，賜璽書嘉勞。拱自是一意撫摩之，政請於朝，擇守宰，寬賦斂。奏留鄂兵戍郴、桂，益廣蒐募以補州兵之缺，厚撫犒，嚴紀律，而時訓習焉。於是，湖南地方數千里，奸盜屏跡，商旅野宿。三年召還，以爲翰林學士，知制誥，兼侍讀。間復從容言於孝宗，請正心明理，以立萬事之綱。是歲小不登，請亟詔監司郡守，先事條畫荒政所宜否。又奏州兵營伍教戰之法甚備。孝宗由是益知拱學問精深，忠義慷慨，擢拜中大夫、同知樞密院事。辭謝不獲，乃就職。因薦汪應辰、陳良

翰、張栻，請召用之。孝宗可其奏。既入西府，日召諸軍將佐，從容訪尚，盡得其材器所宜，以待選用。一日，孝宗顧輔臣圖議恢復，珙曰：「復讎雪恥，誠今日先務，然非內條政事有十年之功，恐未可動也。」同列有言者，曰：「機會之來，間不容髮，奈何拘此曠日彌久之計？且漢之高、光皆起匹夫，不數年而取天下，又安待十年哉？」珙曰：「高、光惟起匹夫也，故以其身蹈不測之危，而無所顧。陛下躬受太上皇帝祖宗二百年宗社之寄，其輕重之勢，豈兩君比哉？臣竊以爲，自古中興之君，陛下所當法者，惟周宣王而已。宣王之事見於《詩》者，始則側身修行以格天心，中則任賢使能以修政事，其終至於外攘戎夷，以復文、武之境土。則其積累之功，至此自有不能已者，非一旦率然僥倖之所爲也。」四年，詔兼參知政事，與陳俊卿同時，夙夜悉心竭力，益圖所以敘進人材，寬養民力，討理軍政，而尤以輔成上德、振肅朝綱、抑僥倖、獎廉退爲己任。先是，潛邸使臣龍大淵、曾覲者，憑恃舊恩，暴起富貴，公論不平累年。孝宗一日發悟，逐去。未幾，大淵死。孝宗顧憐覲，欲還之。珙力陳其不可。殿前指揮使王琪以密薦和州教授劉甄夫，珙與俊卿召琪詰責，削其官，罷去，語在俊卿傳。珙與俊卿奏：「自今聖旨不經三省、密院者，所下之官，皆請俟奏審，乃得行。」孝宗欣然從之。明日，忽復有旨：「前奏審事勿行。」俊卿雖與珙合奏，而珙對尤切。孝宗不悅，遂罷爲端明殿學士，在外官觀。改知隆興府、江南西路安撫使。省輪納，寬租稅，暇日咨訪賓僚，講求利病，使得從容各盡所懷，以故下情宣通，人情厭服。明年，除資政殿學士，知荆南湖北路安撫使。始至，條上荆襄兵少財匱之狀，詔卽委珙措置。珙因行視襄鄂兵屯，並邊形勢，盡得其實，立番休之法，嚴訓練之方，資糧械器，皆爲處畫，各有條理。明年，遭內艱。又明年，起復同知樞密院事、荆襄宣撫使。遣中使奉璽書卽喪次宣押奏事。珙六上奏辭，引經據禮，詞甚切至。孝宗爲寢前詔。八年，免喪，乃復除知潭

州，安撫湖南。過闕，見上言曰：「人君能得天下之心，然後可以立天下之事；能循天下之理，然後可以得天下之心。然非至誠虛己，兼聽並觀，使在我者空洞清明，而無一毫物欲之蔽，亦未有能循天下之理者也。」因引其意以傳時事，言甚切至。孝宗加勞再三，進職資政殿大學士以行。湖南，珙舊鎮，威惠在人，及是再至，人愈畏服而敬愛之。淳熙二年，除知建康府，安撫江南東路，留守行宮。會歲水旱，高下田皆不收，珙大行賑貸法，置局府中，以府佐趙善珪、王以寧及寓士李宗思、劉煒領其事，而分遣群屬循行窮山僻壤，無所不到。珙又早夜咨訪，凡官吏奉行之不謹，民間冤苦之無告，幽隱纖悉，無不畢聞。起是年九月，盡明年四月，闔境數十萬人，無一人捐瘠流徙者。孝宗賜書褒諭。珙治財寬於民，而急於吏，蠲租振廩以數十巨萬，軍吏糧賜，皆隨月遣給。被旨覽城面，丈以萬計者數千，用錢八千萬，米千五百斛，而役不及民。又償前帥所負內庫錢三萬。孝宗積其勞効，賜手札勞獎，賚以鞍馬器物甚厚。明年，進觀文殿學士。五年，屬疾，請致仕。臨卒，草遺奏千餘言，極言近習用事之禍，至引恭顯、任文為戒，所薦則陳俊卿、張栻。卒年五十有五。贈光祿大夫，賜諡忠肅。珙為人機鑑精明，議論英發，遇事立斷，威不可犯。而居家極其孝慈，內外功總之戚，必素服以終月數，在官為罷燕樂。聞同寮有喪者，亦如之。有骨肉之訟，皆召至前，喻以恩意，責以義理，反覆詳盡，至或深自引咎，試意懇切，聞者悔悟感泣，往往去所爭而去。在朝廷，危言正色，直前無避，其忠義奮發，不以死生動心。而論事之際，務在審密持重，不肯為僥倖嘗試之舉。其飭躬應事，規模科指，晚歲皆益精密。上則人主知之愈深，下則學士大夫望之愈重，以至兒童、走卒，莫不知其忠烈。而在荊州時，北虜亦每使諜者詢珙家世，蓋知其忠義之有傳也。及卒，所臨方鎮軍民，往往罷市巷哭，相與祠之，而建康為尤盛。所著有《文集》八卷、《奏議》十卷、《內外制》二十卷。無子。

以學表、學雅爲後。學雅，官南雄通判。

學表 用父蔭補郎。守撫州，移守邕州，有惠政。後以疾，累得郡，不赴，終朝散大夫。

坪 字平父。事母以孝聞。用門蔭調邵武軍戶曹。後退居先廬，徜徉溪水，漁釣自樂，自號七者翁。名其居曰七者寮。每與朱文公諸名賢倡和，有詩集十卷。子學箕，見韋布。

如愚 字明遠，珙之從父也。與珙同時登第，調海鹽尉，改知古田縣。秩滿，倅德慶，權新州，尋除行在審計院，就除江西帥司參議。有才幹，善屬文，尤喜吟咏，與朱文公倡酬。

吳航 字公濟，一字汝楫。齡日誦萬言，七歲能屬文，與寇準俱以童選入太學，從仁宗學於潛邸。登真宗景德初進士，調咸平尉，召試秘書省校書郎，特授永康軍判官兼通判。仁宗卽位，賜書曰：「吳航，朕故人也。肅將明命，通守列城，方資率職之勤，宜切念勞之意，屬當凝沍，特示頒宣，勉荷寵榮，盍思報効？賜汝紫乾色大綾錦旋欄一領，至，可領也。冬寒，汝比好否？遣書指。不多及。」其被眷如此。子評。

評 字正詞。調鄞尉。歲大旱，部使者諱言以征賦。評覈視報實。郡有大辟數事以屬評，評棘棘不徇守意。通判常州，濬鶴溪，自蘇州引湖水灌民田。治平中，知懷安，自雲頂山開羊腸溪十餘里入城，通濟，民利之。神宗時，以職方郎中守南京，召爲太常少卿，判太常禮院。出知萊州，復興水利以濟民。尋奉祠。趙抃、陳襄、蘇頌皆言評不宜置散地。除命不拜，竟致仕。官至中大夫，累贈開國侯。

詹庠 字周文。舉進士，官至三門白波輦運判。景祐中，進《君臣龜鑑》六十卷，詔書褒諭云：「汝策名雋科，引籍華亭聖賢，夙究儒苑載馳，爰據敏辭，備存懿戒，因燕居之一覽，實體要之可稱。」三子：長彥

猷，官至屯田郎，次彥迪，季彥方，並應賢良。

劉夔 字道元。大中祥符八年應詔，獻《宋都賦》，送試禮部，登進士，補廣德軍判官，累遷尚書屯田員外郎、權侍御史。李照改製大樂鐘磬，夔以爲樂之大本，與政化通，其器不當輕易，願擇博學之士以補卿、丞，凡四方妄獻說要進者，一切罷之。真宗善其言。歷三司戶部判官，判度支勾院，江西、兩浙、淮南轉運使，加直史館，知陝州，改太常少卿，知廣州。所至有廉名。權三司度支副使、桂陽監。蠻唐和寇邊，以右諫議大夫、龍圖閣直學上知潭州，兼湖南安撫使。初至，遣人諭降，不從，乃舉兵破之，州境獲安。還，權判吏部流內銓，知審刑院。河北大水，民流入京東爲盜，詔增京東守備。仁宗問誰可守鄆者，宰相以夔對，進給事中、樞密直學士以往。至鄆，發廩賑飢，窮民遂不爲盜，賜書褒諭。大臣議復河道，夔極言不可，遂罷。遷工部侍郎，知福州，請解官入武夷山爲道士，弗許。知建州，尋告老，遂以戶部侍郎致仕。英宗卽位，遷吏部。卒年八十三。夔少，夜讀書山中，有鬼伸手窗隙，爲之剔燈。夔遽書字鬼手上，鬼手遂不能縮，因乞夔擦之，呼爲侍郎。晚節，遇隱者學養生，遂蔬食獨居，不治財產。田有餘穀，則以賑鄉里。死前數日，自作遺表，分祿親族，告家人曰：「某日吾死矣。」如期而死。無子。富弼稱夔天賦絕識，孫沔稱其進爲卿相，退爲神仙；范仲淹稱其高風孤躅，賀監以後一人。其見重於名流如此。

翁紀 字世則。試大理司直，兼觀察御史，知袁州，賢聲震一時。以子肅登第，遂解綬歸。時人高之。官至屯田郎中，累贈中散大夫。

肅 字彥恭。擢童子科，歷知寶、江、峽、袁、潭五州。廨無猾胥，市無醜夫，所至以最聞。嘗召人對，剛正敢言，朝廷重之，拜職方郎中歸。子延慶。

延慶 字德甫。以父蔭補官。靖康初，知聊城縣，舉義兵從王若訥等勤王，至京師南薰門，與金人戰，死。贈朝散大夫，官其子世修。剛直好學，（△）應湖北漕舉。

徐九思 字公謹。調蘄水尉，歷知雙流、宣州、南陵三縣。趙抃、唐介交薦，入判三司。坐忤時相，通判廣州。神宗召對，面賜褒論。王安石以其譏議新法，附司馬光，坐廢十餘年。元祐初，召爲江淮等路發運使。致仕，寓居浙西。世稱姑蘇十老，九思其一也。初，唐介謫英州，其夕雷震，九思送之詩，有「忠讜若教無竄逐，姦邪何計竊安榮？」最是中宵雷激烈，爲君特地發冤聲」之句。仁宗聞之，遂召介還。

王鬲 字景和。王審知之後。知閩祚將衰，遂避地邑之上梅里。皇祐初進士，知零都。縣俗囂訟，鬲至，感以誠，復圖釋古之好義者，列其事，誘勸之。縣南有泉，灌田千頃，忽產鉛錫，使者聞之，欲置官治，力爭不可。換朝奉郎，通判婺州。子獻，朝議大夫，直徽猷閣。

彭彝 初名夷，字武山。侍郎劉夔以彝七行清修，文章典贍，薦於朝。初，召赴闕，試紫微閣。仁宗喜，賜誥褒之，授將仕郎，試秘書省校書郎，終大理寺丞。有詩百餘篇，皆優柔平易之語，時人誦之。

翁仲通 字濟可。幼時賦《竹杖詩》，劉滋深獎之。後師胡安定，長於《春秋》。舉進士，調山陰尉，遷武平令，僉書興化軍，復令黃巖。所至，興築陂湖，控遏盜賊。武平陋不知學，仲通建學教之。在黃巖，聽民輸錢代米，民免流殍。以親不逮養，致仕。累贈銀青光祿大夫、開府儀同三司。子彥約、彥深、彥國。

彥約 字行簡。以父任遜弟，兩舉於鄉，皆首選。初，以免解進士應詔，上《格言》二十篇。政和二年登第，調龍興尉，改常州刑曹。江淮發運使人奏事，徽宗問所部人材，首以彥約對，驛召爲詳定《九域志》編修官。累遷太常博士，修因革禮，陳瓘見而器之。請外，提舉河北西路學事。陛辭，言：「朝廷舉八行，

復試以文，與立法初意異，請俱與廷對，以示詳行略文之意。」至河北，薦拔人材，訪問疾苦，講求實邊制勝之策。除知高郵軍。郡當淮孔道，茶鹽私貿之禁最嚴。彥約不能爲寬弛，顧有告者，亟決之，使吏不得爲姦。於是，一郡稱慶，知其心民。歲大旱，以禱祠積勞得疾。或以尤之，曰：「民蘇吾病，吾亡憾矣。」疾亟，乞休，章未報，卒。行道之人，莫不出涕曰：「失賢守也。」彥約爲文精微淵博，尤長於詩，有集十卷。子挺。

彥深 字養源。宣和初，遷右司員外郎，人對，極論讞獄之弊。已，以弟彥國人臺引嫌，改秘書少監，請訪國朝以來諸儒論纂可傳者，並以上之。盜起睦州，東南大震，彥深言：「民有疾苦不得上聞，宜取上書人名籍焚諸通衢，下詔求直言，則下情通而盜可弭。」又言：「羽書還至，諸路騷然，宜亟求忠臣義士列於諫垣。」其後，賊平，南軍凱旋，即議北征。復力言出師沮盟之害，以書白宰相，言與金人夾攻契丹非是。久之，除國子祭酒。時蔡修爲禮部尚書，讀彥深爲元祐學，彥深笑曰：「彼亦知有元祐學耶？」徙秘書監。宦者梁師成提舉秘書省，彥深不肯造謁，降兩官，出知濟南。改婺州，召爲太常少卿。從幸揚州，力陳維揚無險，宜蚤渡江，以定基業。歸老，卒。所著有《皇朝昭信錄》及文集各十五卷，《忠義列傳》二卷，《唐史評》一卷，《鍾離子自錄》一卷。子挺，密州司士曹事，亦以文行知名，早卒。係蒙之。

彥國 字端朝。宣和中，知本州、福建運判，累官御史中丞。靖康之難，彥國爲江淮荆浙制置轉運使，充經制使。朝廷令募兵入援，京師再被圍，彥國領兵東上。康王開大元帥府，檄召天下兵，未有至者，獨彥國屢遣使奔問官守。至淮寧，與帥臣何志等築壇歃血，誓獎王室，遣兒子挺詣大元帥府請旨。張邦昌使至，彥國拘之於軍，以其書申大元帥府，且貽書切責邦昌。既領兵至咸平縣，欲赴大元帥府，聞大元

帥屯濟州，乞移近邑，及早正大號。高宗卽位，除兼江南東西路經制使。卒，贈少保。

挺字仕特。政和中，用季父彥國恩補官，調宜章尉，改侯官簿，遷鍾離令。歲旱，請粟十萬斛，以貸飢民。薦除詳定《九域圖志》編修官，所陳皆朝廷急務，奏對移時，徽宗喜曰：「何見卿晚？」改授少府監丞。時相怒其不附己，逐之，遂不復出。號五峰居士，有集二十卷。李綱稱其文雄深雅健，淵源浩博，詩凌厲奮發，絕去筆墨畦徑。及卒，劉子翬奠以文曰：「羅萬象於筆端，煥丹青於胸臆。」

蒙之字子功。以蔭補登仕郎，調右迪功郎，尉常山。趙忠簡鼎以忤秦檜，謫死嶺海，柩還，將葬，郡將章傑者，故相惇諸孫，雅怨鼎，當國時奉詔治惇罪，又希檜旨，陽以善意檄蒙之護鼎喪，一日，下書蒙之曰：「趙氏私爲酒飲役夫，亟捕置法。」而陰使人喻意，使並搜取鼎平日知舊往來書疏，欲因以敗趙氏，且媚檜，取美官。蒙之不可，則陷以利；又不可，則脅以威，往返再上。蒙之度傑意壯，不但已，或更囑他吏，則趙氏立敗壞，卽夜往告趙，令悉燒諸書疏。翌旦，乃往爲搜捕，而以無所得告。傑怒，又廉知蒙之女弟適故禮部侍郎胡寅，實當時草詔罪惇者，乃誣蒙之它罪，劾之，會寅弟寧爲尚書郎，具以其事白檜，檜下安撫使問狀，徙蒙之官旁郡，趙氏亦竟得無它。孝宗卽位，近臣以其事聞，亟召見，嘉嘆，改秩蘭溪，更調明州司理參軍。以母喪不赴，主管吏部架閣文字，又以少母喪去官。改監登聞鼓院，出爲江南東路安撫司主管機宜文字。當塗滂疫，蒙之以檄按行，療瘳極力，全活甚衆。除軍器監丞，又主江西安撫機宜文字。復值歲凶，佐其府咨訪處畫，用力尤多。使龔茂良與諸使者合薦於朝，召爲大農丞。未幾，卒。蒙之家居，不問有無，仕宦，不計升黜，至於周人之急，則亦不復知有難易多寡之擇。歷陽張晉彥以子孝祥被親擢冠多士故，忤相檜意，逮繫廷尉，親舊莫敢與通，求所以爲橐餗費，無所得，蒙之慨然謁其兄，罄家



質得百金遺之。在江西時，同僚劉氏子琦奔父喪，病疫甚殆，人莫敢視，蒙之輿致其家，蚤暮治粥藥，得不死。平居食客滿堂，莫非有求於蒙之，而蒙之不之厭也。

詹範 字器之。知惠州，兵荒之後，野多暴骨，範瘞以叢塚。蘇軾謫居，與範賡和，有「江干白骨已啣恩」之句，且稱其治行超卓，類龔渤海也。

暨陶 字粹翁。俊朗豪宕，長於聲律。元豐五年，廷對，定陶第二，臚唱者乃以「洎」音呼其姓，不應，神宗顧考官蘇頌，頌奏：「當以人聲呼之。」陶果出。神宗曰：「卿何據耶？」頌曰：「三國吳時有暨醯，必其裔也。」問陶鄉貫，云建州。神宗喜曰：「果吳人。」方陶未應時，以次名遞唱已數人矣，陶怡然無恨色。官至承議郎。子唐裔，登第，累官中奉大夫。

吳仲虎 字公炳。性簡亢，疏財樂施。既登進士，舉其故田悉予宗族。司理容州，有商夜宿旅舍，同邸殺人者逃去，吏第執商，因自誣服。仲虎力爭於守，請緩其獄。已，果獲殺人者。遷石州通判，權知英州。仲虎貌故癯，初就試京師，有相之者曰：「公當以醜勝天下。」及唱第，神宗亦怪而哂之。或嘲以詩曰：「見說登科日，忻然動至尊。」子必明。

必明 字若愚。用蔭調侯官丞，以廉聞。後通判汀州，未赴，而集儂、范汝爲竊發，必明竭家財，集民兵，防護鄉井。已而，徐清等又倡亂，出牛酒招撫，復與知縣賈相協謀勦捕之。事聞，璽書褒異。除知邵武軍，轉朝奉大夫、廣東提舉。

江滋 字益之，一字德修。家貧嗜學，尤工於詩。舉進士，調未陽令。舍法行，滋至，鼎新學宇，作《學諭詩》七十韻以勵士。事聞，特遷一官。繼知長社，時蘇轍退居潁上，杜門謝客，惟滋得其容接，與相

唱酬，有《穎川集》。官至朝議大夫。

〔校記〕

- 〔一〕「縉紳」二字，各本原脫，據本書體例補。
- 〔二〕「建置志」，各本原作「規制志」，據本書卷三十二至卷三十七卷題改。
- 〔三〕「宜弟」，各本原作「宜孫」，據《柳宏傳》及其行輩用字改。
- 〔四〕「善覆舟」，各本原作「善復州」，據文義改。
- 〔五〕「鯁」，各本原闕，據本傳補。
- 〔六〕「指使」，疑作「指揮使」。
- 〔七〕「楊新」，劉子翬《屏山先生文集》卷九《送張當世序》作「楊勅」。
- 〔八〕「剛直好學」上，當脫「世修」二字。

# 閩書卷之九十八

英舊志 縉紳

建寧府 崇安縣二

宋

有傳

胡淵子安國、安止、安老。安國子寅、宏、寧、孫大正。安老子憲。族師徐。彭路孫夷。詹良臣 彭拯 詹公薦

章元振子才邵。翁采 何昌世 吳逵 江灝孫默、點、曾孫垣、玄孫鏗、鎔、從孫寅、已。翁績 詹慥子體仁。

李弇子岐。劉式 葉堯黃 丘隴 吳楫 虞大中 歐陽光祖 劉褒 江史 詹師文 徐昌之 丘

和 詹淵 詹栗 胡翔卿 李仲光 陳雲 李華 陳範 袁長吉 翁甫 李誼 翁合 祝穆子洙。

詹復 徐幾 俞翊

胡淵 字澤之。熙寧初以親老家貧，授學江浙。每歲終，度父母所須，力能致者，盡市歸以獻。後以母未疾，不復遠游，卽里閭教生徒，晨夕歸省。每諸生饋食，有甘脆，必持歸佐匕箸，而自甘蔬水。比子安國人官，盡斥其俸以贍。兄弟子，又取而教之。以宣教郎致仕。後以安國追贈中大夫。

安國字康侯。年七歲爲小詩，有「自任以文章道德」之句。少長，入太學，晝夜刻勵。同舍有穎昌靳裁之，嘗聞程氏學，與論經史大義，以是益進。登第時策問，大要欲復興熙豐之政。安國推言《大學》格致誠正之道，以漸復三代爲對，詞幾萬言。考官得之，定爲第一，將唱名，宰執以策中無詆元祐語，欲降其等。哲宗命再讀，諦聽逾時，稱善數四，親擢爲第三。除荆南教授，正身律物，務明忠孝大端。除太學錄，遷博士，除提舉湖北路學事。言：「聖門設科，成周貢士，皆先德行，下文藝，臣當以此仰奉明詔。」改使湖南，所至訪求人材，詢問利病，禮下賢士，刺舉必從公論。會有詔旨委諸道提舉學官論舉遺逸，安國以永州布衣王繪、鄧璋應詔。時蔡京已惡安國不爲己用，於是屬吏李良輔徑訴於朝，稱「二人者，范純仁客，而鄧浩所請託也。」京大怒，改良輔合人官，命湖南提刑司置獄推治。獄未成，移北路再鞠之，訖不得請託之狀。直除名，勒停。安國退居荆門漳水上，定省外，經籍自娛，家人忘貧，親心適焉。既，良輔以他罪發覺，臺臣乃辯明前事，有旨復官，改正元斷。政和元年，張商英相，除成都路學事。以親年寢高，乞侍養，得請。居二年，丁內艱，服除，政和八年矣。余深人相，薦名士十人，安國與焉。有旨召對，至京師，卧疾不出百餘日，遂巡謁告歸。宣和元年，除提舉江東路學事，復召上殿，未受命而父卒，遂稱疾掛冠，買田塋旁，將終身焉。宣和末，以侍臣合薦，除尚書屯田員外郎，謝且辭。靖康元年，除太常少卿，再除起居郎，三辭不允，乃至京師，方以疾在告。一日午枕，欽宗急召入見，即奏曰：「臣聞明君以務學爲急，聖學以正心爲要。心者，事物之宗。正心者，揆事宰物之權也。陛下昔在東宮，潛德韜晦，其於《六經》所載帝王制世御俗之大略，必有所避而不欲問。官屬之司勸講者，必有所隱而未及陳。今正位宸極，日月向久，願擇名儒明於治國平天下之本者，虛懷訪問，以深發獨智。臣又聞：爲天下國家者，必有一定不可易之計，謀

議既定，君臣固守，雖浮言異說，沮毀搖動而初計不移，故有志必成，治功可立。陛下御極越半年矣，紀綱尚素，風俗益衰，施置乖方，舉動煩擾，大臣爭競，而朋黨之患萌；百執窺覷，而浸潤之姦作；用人失當，出令數更。若不掃除舊迹，乘勢更張，竊恐姦雄不忌，夷狄肆行，大勢一傾，不可復正。望詔大臣，詢以修政事、攘夷狄之方，令各盡底蘊，畫一具進。先宣示臺諫，仍集百官議於朝堂，衆謀僉同，然後斷自宸衷，按爲國論，頒諸中外，以次施行，庶幾新政，可冀中興。」欽宗曰：「比留詞掖相待，已命召試卿矣。」語未竟，日昃暑甚，汗沾上衣，遂退。時門下侍郎耿南仲倚攀附恩，凡與己不合者，即指爲朋黨。見安國論奏，愠曰：「中興如此，而曰績効未見，謗聖德也。」乃言安國意窺經筵，不宜召試。欽宗不答。安國屢辭。南仲又言安國不臣，欽宗問狀，南仲曰：「往不事上皇，今又不事陛下。」欽宗不納。一日問中丞許翰寧識胡安國否，翰對曰：「自蔡京得政，天下士大夫無不受其籠絡，超然遠跡，惟安國一人。」欽宗嗟異，遣中書舍人晁說之宣旨，令勉受命。既試，除中書舍人，賜三品服。南仲知欽宗意不可回，乃諷臺諫犄角論安國積慢不恭，宜從黜削。欽宗終不許。中書侍郎何栗建議：「天下之勢，治平則宜重內，遭變則宜重外。乞分置四邑，帥臣以都總管爲名，各付一面，爲衛王室、禦狂寇之計。」安國上奏：「內外之勢，適平則安，偏重則危。今州郡太輕，理宜通變。然一旦遽以數百州之地，二十三路之廣，一分爲四道，則權復太重。萬一抗衡跋扈，號召不至，又何以待之？若但委諸路帥臣專治軍旅，每歲一按察其部內，或有警急，京城戒嚴，即各率所屬守將應援。如此則既有擁衛京師之勢，又無尾大不掉之虞。」時栗方得欽宗心，密說以京師不可守，則出幸山南，可以入蜀。而其意蓋自欲常南道之任。又以於安國嘗有推挽之力，必無駁異。及此奏上，大駭曰：「康侯，人物之表，乃專以異議爲高。古人謂山林之上不可用，今信然。」然猶不得已。

於四總管之地各削其遠外州郡而已。於後，京師被圍，西道王襄領所部兵翺翔漢上，不復北顧，大略如安國所策矣。吏部侍郎馮漸言：「劉珪行李綱責詞，實乃爲綱游說。」珪坐貶。安國言：「陛下聖度寬明，無私好惡。漸無故復稱黨與未殄，議論未一。欲殄黨與，一議論，此蔡京行於崇寧，脅制異己，而遂其跋扈之謀者，何更遵用之？陛下卽位數降詔，止追復祖宗善政良法，而漸獨建言祖宗未必全是，熙寧未必全非，推隆王氏之學，再挾紹術之議，國論至今，紛紛未定，則漸之故也。」於是，耿南仲大怒，宰相唐恪、何栗從而擠之。詔與郡。栗以安國素苦足疾，而海門地卑濕，尋除右文殿修撰，知通州。行至襄陽，虜已薄都城矣。欽宗亟召還，旨竟不達。高宗卽位，召爲給事中。安國雖辭避未行，而痛憤夷狄，心在王室，蓋有趨命之意。乃黃潛善方得政專權，斥逐忠賢，於心益戾，因言：「昨因繳奏，偏觸權貴，今陛下將建中興，而政事弛張，人才升黜，尚未合宜。臣若隱情緘默，卽負陛下委任之恩；若一行其職守，必以愚戇妄發，干犯典刑。」潛善惡之，諷給事中康執權論其託疾，遂罷。建炎二年，樞密使張浚薦安國可大用，再以給事中召，命州郡以禮敦遣。時子寅修《起居注》，賜手札曰：「卿父未到，可喻朕旨催促前來，以副延佇之意。」安國行次池州，聞駕幸吳越，遂具奏引疾返，除提舉臨安府洞霄宮。紹興元年，除中書舍人兼侍講，再辭，不允，遂行。以《時政論》二十一篇先獻於上，復除給事中。二年七月人對，高宗曰：「聞卿大名，渴於相見，何爲累詔不至？」安國辭謝，乞以所進二十一篇見之施行。居旬日，再見，以疾懇求去。高宗曰：「聞卿深於《春秋》，方欲講論。」遂以《左氏傳》付安國點句正音。安國奏：「《春秋》乃仲尼親筆，實經世大典，義精理奧。陛下方思濟艱難，削平恢復，儲心是經，則南面之術盡在是矣。」高宗稱善，除兼侍講，使專以《春秋》進講。安國以學未卒業，乞在外編集，庶幾成書，未允。會除故相朱勝非同都督江淮荆

浙諸軍事，安國奏：「勝非與黃潛善、汪伯彥同在政府，緘默附會，馴致渡江；尊用張邦昌，結好金國，淪滅三綱，天下憤鬱；及正位家司，苗、劉肆逆，貪生苟容，辱逮君父。今又委之重任，恐誤大計。」勝非改除侍讀，安國持錄黃不下，左相呂頤浩特以命門下校正黃龜年書行。安國言：「臣繇愚陋，致朝廷侵紊官制，既失其職，當去明甚。昔公羊氏言祭仲廢君爲行權，先儒力排其說。蓋權宜廢置，非所施於君父。《春秋》大法允謹於此。臣方以《春秋》進講，而與勝非爲列，有違經訓。縱臣無耻，公論謂何！」卧家不出。是時秦檜雖名奸邪，故深相知，而呂頤浩再相，欲傾檜，未得其方。會頤浩都督江上還朝，過姑蘇，太守席益知其意，謂曰：「目爲朋黨可矣。然黨魁在鎖闥，當先去之。」頤浩大喜，力引勝非爲助，而據安國奏，擬進責命，謂安國屢召偃蹇不至，今始造朝，又數有請，時方艱難，不肯致身。遂落職，提舉建昌軍仙都觀。是夕，彗出東南。檜三上章乞留，不報，亦即解相印，去位。侍御史江躋、右司諫吳表臣亦極言安國當留，頤浩即黜躋等二十餘人，以應彗變，勝非遂相。安國竟歸，乃渡江，休於衡嶽之下，作書堂其間，頽然當世之念矣。初，王安石盡屏先儒，獨用己意，著《三經新說》，謂之道德性命之學，於《春秋》聖人行事之實，漫不能曉，則詆爲斷爛朝報，直廢棄之。下逮崇寧，防禁益甚。安國自壯年卽有服膺之志，嘗曰：「六籍惟此書出先聖之手。」於是潛心刻意采拾，辯正，研玩沉酣以三十年。及得程伊川所作傳，其間精義十餘條，若合符節，益以自信，探索愈勤。至是年六十有一，而書始就，慨然嘆曰：「此傳心要典也，蓋於克己修德之方，尊君父、討亂賊、攘夷狄、存天理、正人心之術，未嘗不屢書而致詳焉。」紹興五年二月，除徽猷閣待制、知水州，不拜。差提舉江州太平觀，令纂修所著《春秋傳》，俟書成進人，仍給史史筆札，委疾速投進。安國卽再加刪潤，繕寫奏御，高宗屢對近臣稱善，除提舉萬壽觀，兼侍讀，委所在守臣以

禮津遣。安國以疾未行，會諫官陳公輔乞禁程頤學，安國奏：「孔孟之道不傳久矣，自頤兄弟始發明之。今使人師孔孟，而禁不從頤學，是人室而不由戶。本朝自嘉祐以來，西都有邵雍、程顥及其弟頤，關中有張載，皆以道德名世。王安石、蔡京等曲加排抑，故道不行。望下禮官討論，加之封爵，載在祀典。仍詔館閣哀其遺書，校正頒行。」奏入，公輔與御史中丞周秘、侍御史石公揆遂論安國學術頗僻，行義不修。復除知永州，提舉江州太平觀。久之，高宗念安國訓經納諫之忠，特除寶文閣直學士。卒，年六十五。詔贈四官，又降詔加賻，賜田十頃恤其孤，謚曰文定。安國彊學力行，以聖人爲標的，志在康濟。見中原淪沒，遺黎塗炭，痛苦切身。雖數以罪去，憂國愛君，遠而彌篤。自登第迄謝事，四十餘年在官，實歷不及六載。平生出處，皆繇內斷於心，視浮世名利如蟻蠅過前。渡江以來，儒者進退合義，以安國、尹焞爲稱首。侯仲良言必稱二程，他無許可，後見安國，嘆曰：「不意復有斯人。」安國所與游者，游酢、謝良佐、楊時。良佐嘗語人曰：「胡康侯如大冬嚴雪，百草萎死，而松栢挺然獨秀者也。」有文集十五卷、《資治通鑑舉要補遺》一百卷。弟安止、安老。子寅、宏、寧。孫大正。皇朝正統間，詔從祀孔子廟庭。成化三年，追封建寧伯。嘉靖初，去孔子封號，仍稱先儒。

安止 字□□。父淵，臨訣，以安止與其弟安老授安國，命嚴勅之。安國誓不忍撻，乃撫而教焉。皆感奮力學，俱以經術行義著稱。累官朝奉郎、岳州通判。政先撫字，不爲鉤距，民安樂之。

安老 字康年。恬簡淡默，喜周人急。用安國陰補官，嘗知宜春、羅江二縣。終知袁州。子憲。

寅 字明仲，安國弟淳之子也。寅將生，弟婦以多男欲不舉。安國妻夢大魚躍盆水中，急往取而子之。少桀黠難制，父閉之空閣，其上有雜木，寅盡刻爲人形。安國曰：「當有以移其心。」別置書數千卷閣



上，年餘，成誦不遺。長，從河東侯師聖游。年十九，人辟雍中。宣和中進士。靖康初，以御史中丞何栗薦，召除秘書省校書郎。復從祭酒楊時受學，遷司門員外郎。金人陷京師，議立異姓，寅與張浚、趙鼎逃太學中，不書議狀。張邦昌僞立，寅脫身棄歸。言者劾其離次，降一官。建炎三年，高宗幸金陵，樞密使張浚薦爲駕部郎，尋擢起居郎。金人南侵，詔議移蹕之所，寅爲萬言書上之，大略言：自古中興之主，所以能克復舊物者，莫不本於憤恥恨怒，不能報怨，終不苟已。未有乘衰微闕絕之後，以固陋爲榮，苟且爲安，而能久長無禍者也。今日圖復中原之策，莫大於罷免和議，以使命之幣，爲養兵之資。不然，則僻處東南，萬事不競，決無可成之理。因言：「大亂之後，風俗靡然，欲丕變之，在於陛下務實効而去虛文。夫治兵必精，命將必賢，政事必修，誓戡大慝，不爲退計者，乃孝弟之實也。遣使乞和，廣捐金幣，不恥卑辱，冀幸萬一者，爲孝弟之虛文也。屈己致誠，以來天下之士，博訪策略，信而用之，以期成功者，乃求賢之實也。未見賢，若不克見，既見，則不能用之，或因苟賤求進之人，遂乃例輕天下之士，姑爲禮貌，外示美名者，爲求賢之虛文也。聽受忠鯁，不憚拂逆，非止面從，必將心改，苟利於國，卽日行之者，乃納諫之實也。和顏稱善，泛受其說，合意則喜之，不合則置之，官爵所加，人不以勸，或內惡其切直，而用他事遷徙其人者，爲納諫之虛文也。將帥之材，智必能謀，勇必能戰，仁必能守，忠必不欺，得是人而任之，然後待以恩，御以威，結以誠信，有功必賞，有罪必刑者，乃任將之實也。庸奴下材，本無智勇，見賊輒潰，無異於賊與之親厚，等威不立，賜予過度，官職逾涯，將以收其心，適足致其慢，聽其妄誕張大之語，望其朴實用命之功者，爲任將之虛文也。簡汰其疲老病弱，升擇其壯健驍勇，分屯在所，安其家室，足其衣食，選將所畏信者，以董其部伍，申明階級之制，以變其驕恣悍悖之習，然後被之以精甲，付之以利器，進戰獲酋虜，

則厚賞，死則恤其妻孥，退潰則誅其身，降敵則戮其族，令在必行，分毫不貸者，乃治軍之實也。無所別擇，一切安養姑息之，惟恐一夫變色不悅，幸無事則曰大幸矣。教習擊刺，有如聚戲，金鼓之節，旗幟隊伍，皆習虜人之所爲，紀律蕩然，雖其將帥不敢自保者，爲治軍之虛文也。慎選部刺史二千石，必求明惠忠智之人，使久其官，懲革弊政，痛刈奸賊，以除民害，雖軍旅騷動，盜賊未平，必使寬恤之政，實被於民，固結百姓將離之心，勿致潰叛，乃憂民之實也。詔音出於上，虐吏沮於下，誑以出力自保，則調發其丁夫，誘以犒設贍軍，則厚哀其錢穀，弓材、弩料、竹箭、皮革，凡干涉軍須之具，日日征求，物物取辦，因緣奸弊，民已不堪，乃復蠲其稅租，載之赦令，實不能免，苟以欺之者，爲憂民之虛文也。若夫保宗廟、保陵寢、保土地、保人民，以此六實者行乎其間，則爲天子之實也。陵廟荒圯，上宇日蹙，衣冠黔首爲肉爲血，以此六虛者行乎其間，陛下載黃屋，建幄殿，質明輦出房，雉尾金爐夾侍兩陛，仗馬衛兵儼分儀式，贊者引百官以次入奉起居，既退，宰相大臣卑卑而前，摺笏出奏，司辰唱「辰正」，則駕入而仗出矣，以此度日而國勢益卑。彼粘罕者，晝夜厲兵，跨河越岱，電掃中土，遂有吞吸江湖、蹂躪衡霍之意。吾方挾持虛器，茫茫然未知所之，此則爲天子之虛文也。」遂言：「創業垂統之君，必有綱紀以遺子孫。繼世承序之君，必守綱紀以法祖宗。」因以進君子，退小人，爲綱紀之一事；右文左武，尊重文臣，以壓服將帥，爲綱紀之二事；養勸廉恥，恢張四夷，爲綱紀之三事；慎號令，重信義，爲綱紀之四事；慎擇郡縣之吏，爲綱紀之五事，而猶望高宗思迎父兄，誓報仇虜，奮志强厲，有進無退，庶足以感發軍情，率先將佐，於危絕之中，求生存之道。疏入，宰相呂頤浩惡其切直，除直龍圖閣，主事江州太平觀。二年五月，詔内外官各言省費裕國、彊兵息民之策。寅以十事應詔，曰修政事、備邊陲、治軍旅、用人材、除盜賊、信賞罰、理財用、核名實、屏諛佞、去

好惡。疏上不報。尋命知永州。紹興四年，復召爲起居郎，遷中書舍人，賜三品服。時議遣使人雲中。寅疏言：「昔孔子作《春秋》，以示萬世，人君南面之術，無不備載，而其大要則在父子君臣之義而已。魯威公爲齊所殺，魯之臣子於齊有不共戴天之讎。而莊公者，乃威公之子也，非特不能爲父雪恥，反與齊通好。元年，爲齊主王姬。四年，及齊狩於禚。五年，會齊同伐衛。八年，及齊同圍郕。九年，及齊盟於既。是年，爲齊納子糾。仲尼惡之，備書於策，以著其釋怨通和之罪。魯莊惟忘父子君臣之義也，魯之臣子則而象之，故公子牙弑械成於前，慶父無君動於後，卜齮圍人犖之刃交發於黨氏武闌之間。魯之宗祀不絕如綫，此釋怨通和之効也。女真者，警動陵寢，戕毀宗廟，劫質二帝，塗炭之民，乃陛下之讎也。頃者，誤國之臣自知其才術不足戡定禍亂，而又貪慕富貴，是故譸張爲幻，遣使求知，以苟歲月，九年於此，其効如何？彼之一身，叨竊爵位而去，曾何足道？而於陛下聖德、國家大計，則虧喪多矣。所幸陛下勇智日躋，灼然獨見於群邪久惑之後，奉將天討，罪狀豫賊，再安國步，漸圖恢復，天下忠臣義士，聞風興起，各思自効，以佐丕烈，譬如人行萬里，登車出門，又如支吾厦屋，初正基柱，存亡治亂，實係此時。今乃無故蹈庸臣之轍，踐阼國之址，犯孔子之戒，循魯莊之事，忘復讎之義，陳自辱之辭，臣切爲陛下不取也。或謂：『不若是，少有貶屈，其如二帝何？』臣應之曰：『自建炎丁未以至甲寅，所爲卑辭厚禮，以問安迎請爲名，而遣使者不知幾人矣，知二帝所在者誰歟？見二帝之面者誰歟？聞二帝之言者誰歟？得女真要領者誰歟？因講和而能息虜兵者誰歟？但見丙午而後，通和之使歸未息肩，而黃河、長淮、大江，相次失險矣。但聞去年冬，使者還言酋豪帖服，國勢莫安，形於奏章，傳播遠近，曾未數月，面劉豫挾虜稱兵犯順矣。女真者，知中國所畏在用兵，則常示欲和之端，增吾所重，平吾所恨，匿吾所畏，面中國坐受此餌。既

久而後悟，天下其謂自是改圖必矣，何爲復出此謬計耶？」高宗嘉納云：「胡寅論使事，詞旨剴切，深得獻納論思之體。」召至都堂諭旨，仍降詔獎諭。既而右僕射張浚自江上還，奏遣使爲兵家機權，竟反前旨。寅復言：「遣使十無益。今日大計，惟有明復讎之義，用賢修政，息兵訓民，以圖北向。儻或未可，則堅守待時。若夫二三其德，必不能有所立。」寅既言與浚異，遂乞便郡就養。除徽猷閣待制，知邵州，辭。改集英殿修撰，復以待制改知嚴州，又知永州。徽宗皇帝、寧德皇后訃至，朝用故事，以日易月。寅上疏言：「禮：讎不復，則服不除。願降詔旨，服喪三年，衣墨臨戎，以化天下。」尋除禮部侍郎，兼侍講，兼直學士院。丁父憂，免喪，時秦檜當國，除徽猷閣直學士，提舉江州太平觀。俄乞致仕，遂歸衡州。檜既忌寅，雖告老，猶憤之，坐與李光書譏訕朝政，落職。右正言章夏劾寅不持本生母服，（四）不孝，諫通鄰好，不忠。責授果州團練副使，新州安置。檜死，詔自便。尋復其官。紹興二十一年卒，年五十九。寅志節豪邁，初擢第時，張邦昌欲以女妻之，不許。始安國頗重秦檜之大節，及檜擅國，寅遂與絕。新州之謫命下，即日就道。在謫所，著《讀史管見》數十萬言，及《論語詳說》，皆行於世。其爲文，根著義理。有《斐然集》三十卷。

宏 字仁仲。幼穎敏，甫就外傳，銳然以求道爲心。年十五，遂自爲《論語說編》、《程氏雅言》，旦夕玩頌。安國懼其果於自用，乃授以所修《通鑑舉要》。於是肆力研窮。既冠，游太學，與樊光遠、張九成善。事楊時、侯仲良，而卒傳其父之學。優游衡山下餘二十年，玩心神明，不舍晝夜。張栻師事之。紹興間上書，其略曰：「治天下有本，仁也。何謂仁？心也。心官茫茫，莫知其鄉，有所不察，則不知矣；有所顧慮，有所畏懼，則雖有能知、能察之良心，亦浸消亡，而不自知矣。夫敵國據形勝之地，逆臣僭位於中原，牧馬

駸駸，欲爭天下。臣不是懼，而以良心爲說。蓋良心充於一身，通於天地，宰制萬事，統攝億兆之本也。察天理，<sup>〔五〕</sup>莫如屏欲。存良心，莫如立志。陛下試於朝政稍暇之時，沉思靜慮方今之勢，事孰爲大？又孰爲急？必有歉然而餒，惻然而痛，坐起徬徨不能自安者，則良心可察，而臣言可信矣。徽宗皇帝身享天下之奉幾三十年，欽宗皇帝生於深宮，享乘輿之次，及以至爲帝，一旦劫於讎敵，遠適窮荒，辛苦墊隘。其願望陛下加兵敵國，心目睽睽，猶飢渴之於飲食，庶幾父子兄弟生得相見，引領東望，九年於此矣。在廷之臣，不能對揚天心，克陛下仁孝之志，反以天子之尊，北而讎敵。陛下自念，以此事親，何如也？萬世不磨之辱，臣子必報之讎，子孫之所以寢苦枕戈，弗與共天下者，而陛下顧畏懼，忘之不敢以爲讎。臣下僭逆，有明目張膽顯爲負叛者，有協贊亂賊明爲羽翰者，有依隨兩端欲以中立自免者，而陛下顧慮畏懼，寬之不敢以爲討。守此不改，是祖宗之靈，終天暴露，無與復存也；父兄之身，終天困辱，而求歸之望絕也；中原士民，沒身塗炭，無所赴愬也。陛下念亦及此乎？末言：「陛下卽位以來，中正邪佞，更進更退，無堅定不易之誠。陳東以直諫死於前，馬伸以正論死於後，而未聞誅一奸邪，黜一諛佞，何推中正之力，而去奸佞之難也？此雖當時輔相之罪，然中正之士，陛下腹心耳目也，奈何以天子之威，握億兆之命，乃不能保全以自輔助，坐令奸邪得而殺之？臣竊痛心，傷陛下威權之不在己也。」高閌爲國子司業，請幸太學，宏作書責其「欺天罔人，當忘讎滅理。北面敵國之時，旣不能建大論，明天人之理，以正君心，乃阿諛柄臣，希合風旨，求舉縟節，粉飾太平。」聞者嘆服。初，宏以蔭補右承務郎，不調。秦檜當國，意欲用之，移寅書問：「二弟何不通問，寧作書止叙契好而已？」宏書辭甚厲，人問之，宏曰：「政恐其召，故示以不可召之端。」四方從學者甚衆，一隨其高下淺深，誘而進之，而汲汲於理欲之辯、仁敬之說。黃祖舜、沈大

廉以《論語辯論》取正，因卽其正處，詳爲發明，學者爭誦，目其書曰《論語指南》。宏身雖猷畝，心在廟廊，晚見國事日非，中夜起嘆者屢。檜死，陳武同、汪應辰、凌九夏、張浚等交剡於朝，召命沓下，而疾不可爲矣。所著有《知言》，張栻稱其「言約義精，爲通學樞要，制治舊龜」。又有詩文五卷、《皇王大紀》十卷。〔六〕學者稱五峰先生。

寧 字和仲。用蔭補官。秦檜當國，甚留意名家子弟，既召試館職，除勅令所刪定官。會秦檜拜元樞，檜問曰：「檜近除，外議云何？」寧曰：「外議以相公必不爲蔡京之所爲也。」遷太常寺丞、祠部郎官。初，寧以父兄故召用，及寅與檜忤，言者希意論寧兄弟阿附趙鼎，乃出寧爲夔路安撫司參議官，除知澧州，不赴，奉祠歸。安國之傳《春秋》也，修纂檢討多出寧手。寧又著《春秋通旨》以羽翼之，世稱茆堂先生。

大正 初名慥，字伯誠。用季父寅郊恩補官，調興化尉。鄭僑以疑訟繫於官，大正奇其人，力爲辯白，且勉以遠業。僑感奮，卒以大魁爲時名輔。再調南康軍司法，史浩、劉珙薦其賢明清介，改秩僉判泉州。劇賊羅動天者，逼漳州甚急。泉爲鄰郡，忽近郊有荷斧者四五十人，兵捕以聞。時郡守政尚勇決，同幕希意請肆諸城下。大正不書牘，曰：「賊欲破城，乃無戎裝攻具長兵耶？」詢之，果採山菌者，皆釋之，同幕慚服。郡爲蕃商之會，每舶至，驗視者得利不貲，大正秋毫無取焉。又，宏有季子大時，字季隨，初於湖南師事張敬夫，後講學於文公。

憲 字原仲。生而靜懋，不妄笑語。長從從父安國學。平居危坐植立，時然後言，雖倉卒，無疾言遽色，犯未嘗校。紹興中，以鄉貢人太學。會伊、洛學有禁，憲獨陰與劉勉之誦習其說。既而學《易》於涪陵處士譙定，久未有得。定曰：「是固當然，蓋心爲物漬，故不能有見。惟學乃可明耳。」憲喟然嘆曰：「所

謂學者，非克己工夫耶？」自是一意爲己，不求人知。旦，揖諸生歸故山，力田、賣藥以養其親。從游日衆，號籍溪先生。《朱子語類》：「籍溪廟上大榜曰文定書堂。籍溪舊開藥店，胡居士熟藥正舖并諸藥牌猶存。」折彥質、范冲、朱震、劉子羽、呂祉、呂本中共以其行義聞於朝。被召，以母老辭。及彥質入西府，又言之，趣召愈急。憲力辭，乃賜進士出身，授左迪功郎、添差建州教授。憲猶不出，太守魏玘遣行義諸生入里致詔，且爲手書力勸，憲乃就職。日與諸生接，訓以爲己之學。聞者，始而笑，中而疑，久而觀其所以修身、事親、接人者，無一不如所言，遂翕然悅服。郡人程元以篤行稱，龔何以廉節著，皆迎致俾參學政，學者自是大化。以母年高，不樂居官舍，求監南嶽廟以歸。久之，起爲福建路安撫使司屬官。時帥張宗元權鹽急，私販銖兩亦重坐。憲告以爲政大體。宗元不悅，憲復請祠而去。秦檜方用事，諸賢零落，憲家居不出。檜死，以大理司直召，未行，改秘書正字。既至，次當奏事，而病不能朝，乃草疏言：「金人大治汴京宮室，勢必敗盟。元臣宿將惟張浚、劉錡在，願亟起之。」時兩人皆爲積毀所傷，未有敢顯言其當用者，憲獨首言之。疏入，卽求去。詔改秩與祠，歸。憲每極論天下事，至於慷慨洒涕。其以館職召，適秦檜諱言之後，獨與王十朋、馮方、查籥、李浩相繼論事，太學士爲《五賢詩》以歌之。〔七〕在位僅半年，人惜其不究云。憲初與劉勉之俱隱，後又與劉子翬、朱松交。松將歿，屬其子熹受學於憲與勉之，子翬。熹自謂從三君子游，而事籍溪先生爲久。紹興中，年七十，卒。謚靖肅。所著有《論語會義》諸書，行於世。

師徐 字宗武。於安國爲疏屬。博學通經，尤長於詩，紹興第進士。幼失怙，事母盡孝，朱文公稱之。母喪，廬墓三年。以祿不逮養，竟不仕，卒。

彭路 字通吉。文思清新，四舉俱獲優薦。崇寧三年特奏名第一，徽宗褒賞，路謝以詩，徽宗命翰林

學士和之。孫奭。

奭 字伯勝。少擅名譽，經術爲海內所宗。樞密劉珙少嘗師奭，及珙主試於南宮，初得首卷，其文乃奭夙構以發解者，珙私喜爲奭矣，及拆卷，則爲蜀中士，珙大懊恨，頃之，隨得奭文於魁卷中，珙讀之，歎曰：「此老野狐精也。豪氣勃勃，真志在千里者。」遂登第。既，珙詢蜀士，何從得奭文，蜀士謂神實告之：「君欲及第，須熟奭義。」

詹良臣 字唐公。崇寧間鄉舉，調縉雲尉。盜方臘犯處州，良臣率弓兵往禦，隨見執。欲降之，罵曰：「若輩如有勇者，當出死力衛王室，胡反耶？往年反者，俱薰諸市，肉爲狗鼠食。若輩不鑒，誅戮在即，尚欲降吾乎？」賊怒，割其肉，使啗之，且吐且罵，死不絕聲。賊平，徽宗聞而愍之，官其子大方，紹興中，拜簽書，尋參大政。

彭拯 字原仲。歷辟雍博士、宗子學錄。論任子濫恩等事，不報，出判沅州。子昌言，知桂陽軍昭武縣。

詹公薦 字文舉。靖康末，金人犯闕，張邦昌僭立，素喜公薦才，欲官之，公薦匿，間道至行在，奏虜事甚悉，欽宗喜曰：「王室危疑，人心騷動，卿能捐身殉國，真忠臣也。」擢太常丞，遷祠部郎中。請補外，除廣東提刑。

章元振 字時舉。調寧鄉令，帥臣曾孝序廉其能，請移之長沙，寧鄉民願留，帥不能強。改休寧縣。縣，丁睦寇之餘，極力撫綏。屬嚴寇繼發，督兵捍禦，縣賴以全。改泰寧縣，鄰盜四起，據險立寨，遷帑庾，率民兵堅守。後知潮州，悉革蠹弊，民爲謠曰：「長言法到葵關住，今出葵關到海陽。」移肇慶府，以治行



遷朝議大夫、廣東提舉。秦檜與元振同年，元振不與通也。子才邵。

才邵 字希古。以父蔭補官。少時謁楊時，時教以熟讀《論語》，才邵玩味躬行。世目爲篤實君子。歷典賀、辰二州，改荆湖北路參議官。

翁采 字景文。大觀中爲太學士，屢上書言事。尋登重和八年進士。調歸州教授，疏論花石綱擾民。左遷漳州刑曹。

何昌世 字正卿。南渡時任台州司理。時虜猖獗，官吏望風遁去。昌世獨迎駕入城。高宗問何官，具以職名對。慰勞再三，剪御衣尺許書云：「朕南渡以來，盡忠獨汝。與此爲券，國定論功。」紹興中，特改宣教郎，除大理寺丞，終司農少卿。

吳達 字公路。調永福尉，以獲海寇功，改秩知泰寧縣，縣舊有敷茶引錢，過重，達力請上司爲蠲其半。改知順昌，閩盜蜚起，常身捍禦，威聲四馳。通判劍州，州有三溪，多險灘，最險者九，達上請部使庀工鑿平之。繼知肇慶府，置學田籍，以杜豪民吞併。改知濠州，奏乞墾民田，以廣兵儲。擢知廬州，兼淮西安撫司事。尋提點福建路刑獄，漕司食鹽害民，下憲臣核實，立定綱數，以去科賣之弊，達條奏規畫甚悉。除直秘閣，知鼎州。所撰有《帝王系譜》，自漢迄周顯德，每代略具數語。其論曹操「迫脅君后，無復臣禮，逆節已顯。會其病死，故篡竊之惡，漏在身後，昔人謂其不敢危漢者，亦不覈其情耳」，世謂確論。

江灝 字良弼。調上高尉，靖康間盜起，灝率兵擒其渠魁。高宗南渡，獨帥所部勤王，張浚深加歎獎。遷劍浦丞，未赴。范、熊二寇竊發，建、劍騷動，部使者聞灝上高之政，委督巡尉，統義兵捕之。尋爲無錫令，邑當孔道，困於師旅供饋，灝不忍重斂，移兌常平以佐其用。劉子羽宣撫江淮，貽書辟掌戎務，裨

贊居多。紹興中，知南康軍，却貧者例錢千緡，廉明藉甚。歷知郴、象二州，郡民繪像祠之。後有以廉吏薦者，高宗識名於屏，特賜紫金魚袋，進朝散大夫。孫默、點。曾孫塤。玄孫鎔、鏐、鉢。從孫寅、巳。

默 字德功。調安溪尉。丁外艱，歸詣武夷精舍，從朱文公講學。因携所著《易訓解》、《四書訓詁》以質文公，文公歎曰：「此先聖未發精蘊也。」每以「一意經史，無他嗜好」稱之。又輯本朝典故，撰爲《綱策》上之，略曰：伊尹告太甲，上述成湯之事。周公弼成王，近陳文武之謨。仰稽宸訓，俯綴舊言，敢獻一得之愚，用衍萬年之慶。孝宗賜璽書褒諭，兼賜緋魚袋。後歷宰光澤、建寧，皆有異政。卒於官，邑人像祠之。

點 字德興。以特恩補官，調郢州錄參。時郡庫失金，有賈人劉福得銀一笏，上有「田家抵當」四字，遂被首捕，福不能直。官籍其家，約萬餘緡。點疑其枉，言於守，得別委勘問，意與點同，獄懸未決。未幾，經總軍資二庫皆被盜，失會以萬計。時有小使臣李義者，供館一妓，用度甚侈。點疑之，密襲妓家，得會一束，白於府，即得千餘貫於義行囊中，皆三庫物也。福冤始伸，人皆服之。仕終漢陽軍僉判。

塤 字叔文。學於真德秀。調知永平縣，通判靖州，以廉白簡易稱。遷知南平軍，綏御夷漢，四境帖然。嘗條五事以奏，皆熟察民隱可永利者。帥臣上績，改知開州。未拜命，卒。塤貌肅氣和，自幼至老，惟事學問。倅靖日，魏了翁以言事謫至，塤築崔山書院居之。旦夕談折，清燈濁酒，相忘茹簞、竹几間。了翁稱之曰：「叔文表裏如一，當於古人中求之。」子鏐、鎔、鉢。鉢，見韋布。

鏐 字華叔。篤學有志操。舉進士，調光化尉，遷泰寧令。所至，以治績顯，人歌之曰：「前光化，後泰寧，清如水，平如衡。」汀、邵盜起，募勇敢守要害，設伏以待。盜至，殲其二酋，遂戒不敢入。一方恃無

官至臨安察判。

鎔 字成叔。穎敏特立。弱冠舉進士，知福清縣。下車旬餘，無所事事，群吏以書生易之。一日，肅衣冠，班吏階下，各摘其罪，加以鞭箠，始驚服不敢犯。時屬水旱，民鮮耕穫，爲疏濬積潦，易其田疇，歲獲粟數千斛。秩滿，懇留再任。在邑六年，代還之日，士民攀戀。

寅 字公亮。歷穀城、麗水、廬陵三縣，并以循良著，當路交薦之。屬兵興，上書言朝政得失，時相目爲狂躁，不之擢。終武安軍節度掌書記。

巳 字巽伯。少負才氣，兩貢於鄉，授沙縣令。地當盜區，已規畫縝密，而以慈祥愷悌行之，盜皆改行，胥吏銖兩之間悉不敢逞，治績最諸邑。以疾乞休，老稚泣戀追送。

翁績 字德功。博學負氣，尤喜談兵。建炎初，王燮、王延勝迭叛，績協王佐才集義旅，保障鄉閭。以誅賊功入仕，調惠州推官。屬邑多盜，績至，率郡兵勦之，獲賊首黃白旗等三百餘人。潮陽劇賊謝花九等聞風遁去。辟石橋鹽場，遷黃州推官、臨武令。所至皆有備禦，蠻獠懾伏。秩滿，乞致仕。孫華，登第，官至奉議郎。

詹慥 字應之。甘貧力學，砥節礪行。弱冠，首薦鄉書。試南宮，弗售，遂爲鄉學師，多所造就，爲文涉筆立成，人謂腹稿。晚調信豐尉。會金虜渝盟，往見張浚論滅金秘計，浚辟爲屬，裨贊居多。嘗渡桐江弔子陵，詩云：「光武親征血戰回，舉朝誰識渭川才？熊羆果有周王卜，未必先生戀釣臺。」其慨然有用世之志如此。有文集二十卷行世。子體仁。

體仁 字元善。始冠，登進士，調浮梁尉。郡上獲盜功，當賞，謝不就。兩爲歸安、晉江丞。宰相梁

克家薦於朝，入爲太學錄，遷太學博士，尋遷太常博士，遷太常丞。時高宗定謚，或謂宜稱「堯宗」，體仁言：「《謚法》雖有之，於古無據。大行皇帝功莫盛中興，請比殷武丁，謚爲高。」議始決。遷丞，攝郎金部。光宗卽位，提舉浙西常平。繼除左曹郎、湖廣總領，就遷司郎、少卿。剷革舊弊，軍餉饒足。奏蠲諸郡積逋百餘萬。時有逃卒千人大冶，鑄鐵錢，亂幣法，體仁言於諸司曰：「此去京師千餘里，若遲報，賊計行矣，宜速討之。」帥用其言，群黨亟壞。召爲太常少卿。光宗疾，省重華不以時，中外駭懼。體仁深陳父子至恩，激廷臣交疏迭諫，用意尤苦。孝宗崩，復率同列抗疏，請駕詣重華宮，親臨祥祭。時趙汝愚將定大策，外庭無預謀者，密令體仁及左司郎官徐誼達意少保吳玠，請憲聖太后垂簾爲援立計。寧宗登極，天下晏然。體仁與諸賢協贊汝愚之力也。時議大行皇帝謚，體仁言：「壽皇聖帝事德壽二十餘年，極天下之養，諒陰三年，不御常服，漢唐以來未有，宜謚曰孝。」卒用其言。孝宗將山陵，體仁言：「永阜陵地勢卑下，非所以妥神靈。」與宰相異議。除太府卿，尋直龍圖閣，知福州。出錢助修郡學，以畢前守辛棄疾之功。言者竟以前論山陵事罷之。徙居雪川，諷詩讀書。悠然自得，復龍圖閣，（九）知靜江府。始至勞農，觀田器薄小，不足以盡地力，教之更造，爲圖授之。開卜縣稅銀二萬四千，蠲雜賦八千。移知鄂州，除司農卿，再總湖廣餉事。歲凶，便宜賑救。侂冑議開邊，體仁移書廟堂，言兵不可輕動。皇甫斌自以將家子，好言兵，體仁謂斌必敗，已果然。開禧二年卒。體仁幼學於朱文公，沉潛經訓，徧考群書，誦說百家，本末條暢。屬意星曆，著《象數義》，以衍其奧。又嘗以今樂譜古詩。方響，無不協和，一詩率用一調，惟《七月篇》轉三調，乃知《風》、《雅》、《頌》之別。居官以利民爲心，立朝密扶善類，進達人才。郡人真德秀蚤從之游，嘗問居官蒞民之法，口：「盡心、平心而已。盡則無愧，平則無偏。」

李弇 字季純。知連城縣，政務寬平，教以孝友，人不忍欺。有兄弟，（二〇）連年不決，弇論以理，一時感釋。後贈中散大夫。子岐。

岐 字稚山。調應天尉，攝邑事，會歲凶，創利民倉賑之。繼知襄陽縣，捐俸代伍等戶輸納稅役。通判金州，處置軍餉，按月請給，軍卒便之。殿帥交薦，特差權州，兼安撫，除知南雄州。至郡，首書「忠廉公恕」四字於治壁。時貧民客戶以納丁米爲苦，悉奏罷免之。官至朝散大夫。

劉式 字抱一。紹興丁卯，領漕舉。博極群書，尤長箋奏。屬朝臣主和議，式上疏詆其非，曰：「葱嶺腥膻當靖。廣輪之士，翠華淹寓，誰無左袒之思？」竟繇特恩補光澤尉。

葉堯賞 字廷瑞。舉進士，調通城尉。用捕賊功改秩，歷知清遠、將樂二縣，以慈祥稱。又嘗論福建鹽弊，及治兵省財，宰相進取風俗論。終南安倅。

兵隲 字克盛。篤學不仕，行誼重鄉。隆興中，陳俊卿領使相出判福州，隲上書謁見，俊卿與語，大器之，及淳熙初，改判建康，遂薦隲可任，授嚴州司戶參軍，監建康椿積庫，兼節制使庫、諸司糧料斛院。公私交便，軍旅不乏。俊卿深用嘉獎，復欲援登於朝，隲觀時事日非，竟引年謝事。俊卿稱其出處不苟，非朵頤利祿者。

吳楫 字公濟。幼自雄其才，謂功名可立取。紹興末，試鄉省不第，遂主盟林壑，絕心仕進。與朱文公、吳郁研窮理學，嘗言：「逐日應接事物之中，須得一時寧靜，以養漸精神。要使事愈繁，而心愈暇，彼不足，而我有餘。」文公遣子師事之。晚年以特恩補官，調桂林簿。

虞大中 字士明。歷知新建縣、通判汀州，皆有惠政。嘉泰中，除知循州。陛辭，進慈幼恤孤等事。

先是，大中家居，朱文公倡立義倉，常與討論，至是言及之。至郡，廉潔自持，教化盛行。改知南康，却庫羨萬餘緡。嘉定中，遣使秤提會計，大中供張如常。坐忤上，乞閑，不俟報，歸。後文公人朝，白其事，薦除江西倉，不赴。

歐陽光祖（一）字慶嗣。九歲能文，人稱童瑞。從劉子翬、朱文公講學，子翬甚重之，文公亦遣子師事焉。乾道八年再舉，登第，不赴。汝愚、張栻列薦於朝，方欲召用，而汝愚去國。後爲江西運幹，致仕。卜築松坡之上，湛然終老。

劉褒字仲寵。十歲能屬文。舉進士，除司門郎中。才高見忌，不久朝列。終朝請郎，知泉州。歸老，自號梅山老人。有詩集。

江史字夢良。家貧好學，慕人魁木待問之名，不遠取正。淳熙十四年，就試南京。有賈寅者，太學名流也，試罷，徧謁同經，參問試文，私喜當爲選首，及見史文，驚曰：「屬公矣。」然而，某亦次之。」既，果然。歷袁、泰、吉三郡學官。

詹師文字叔簡。舉進士，調婺源尉。境內盜發，率土兵捕獲之。再調江西憲司檢法官，法獄無冤。討平赤水峒寇。秩滿，授西外宗教以歸，與真德秀、鄒應龍交游，有《幔亭遺稿》、《通典編要》。

徐昌之字應時。舉進士，調醴陵尉，有能聲。帥守史彌堅薦於朝。未幾，父母繼沒。慨然曰：「親不及祿，吾休矣。」繼調廬陵丞、寶慶錄參，皆不赴。

丘和字國瑞。舉進士，調光澤簿。慈祥溫潤，民安其政，吏不敢犯。居久之，知宋事不可爲，浩然賦歸。時從弟善，任潭州司法參軍，復寄詩相約，善亦解組同還，時人哲之。

詹淵 字景憲。舉進士，調臨江戶曹掾。數十年滯牘，一閱得情。凡所予奪，人無異論。部使檄致幕府。於是環十一郡之民有求質者，皆請屬淵，因爲語曰：「寧不詹寬，不願他官。」後監行在車輅院。

詹栗 字德寬。舉進士，調安福尉，有婦死非命，栗覆驗，見其腹脹，因得竹刃於隱壁間，賊亦隨獲。

遷瑞州法曹。賊欲劫銀坑，以酒誘匠，匠疑弗往，賊熏坑殺匠，取銀去。匠父兄誣訴其前日與匠爭者，栗閱案疑之，果獲正賊。

胡翔卿 字仲集。舉進士，調武陵尉，值湖右旱飢，人至相食，翔卿以郡委驗視，因懇勸分減賦，發常平濟之。尋改桂陽錄參，遷橫州判官。郡俗：有病者，潛殺人取肉以療，謂之「採生」。翔卿嚴正其罪，其害遂除。

李仲光 字景溫。才高見忌，仕途顛頓，自雷陽分教歸，養晦十餘年，放情山水。少精老、莊、韓、柳之文，善爲序記。晚年詩筆愈高。時相勉其出，調湖南幕屬而歿。

陳雲 字會甫。簿邵武、建寧二縣，招撫峒寇，境賴以安。辟海口鎮官，以鹽堤當水衝，燭俸障之。遷漢陽軍法曹，制置使趙方召置幕屬。

李華 字實夫。舉進士，調連州司法。曹州楞伽峽崩，水壞城郭，華力請於郡，身任疏鑿，水以不害。郡守留元長遷學，出俸錢五十萬助役。辟翁源令，人口瘴鄉，華笑曰：「今之仕者，視上官色爲懼喜，氣餒精搖，厥病甚瘴甚。無愧俯仰，將使匹夫匹婦無所患苦，焉能瘴予？」未幾，政聲爲韶五邑最。紹定間，汀州寇猖獗，禁卒謹嘏。華以安豐倅護淮軍來攝州事，勦外寇，平內叛，不動聲色。事聞，進三秩，除太府簿。朱積實爲亂，值歲饑，移粟給養，全活甚衆。續除直華文閣，所任如故。乃撤新郡治。削苗斛鹽。

價，置均濟倉，推見錢六千緡爲繹本，得米五千餘石，以蘇凋瘵。進直徽猷閣，知潭州，兼湖南安撫。端平二年，轉廣東轉運使。華性質忠義，輔以才略。真德秀嘗論當世人物如華者僅一二屈指。

陳範 字朝弼。從朱文公學。舉進士，調婺源尉。有大辟，範察其不當死，令佐受賕結正，吏請書獄，嘆曰：「人命如是輕乎？吾當力爭。」後發覺，令佐坐削。秩滿，調崇仁丞。令羅必元，豫章先生後也，日與講論，政化大行。一日疾作，曰：「不可尸素。」解官歸。

哀長吉 字叔巽。舉進士，調靜海軍掌書記。秩滿，命駕而歸。徜徉林泉，託興吟咏。結廬委順，因以「委順翁」自號。雖老，手不廢籍，至道、釋書亦精究。卒，年八十九。

翁甫 字景山。父易，見韋布。甫，寶慶初進士，薦知西安縣。政最，上聞，召監登聞檢院。陛對，理宗喜甚，除資善堂直講。舊有提點、中官對拜之禮，甫抗論其非，理宗嘉從。除兼太常博士。參政劉之傑充明裡禮儀使，跛倚失儀，甫論罷之。遷秘書丞，兼禮部郎，出知汀汀一作漳。但汀、漳二志俱無甫名。州。累官太府少卿，兼知臨安府。凡遇節序，供奉內殿儀物悉奏免之。未幾，兼太常少卿，直舍人院資善堂翊善、國史院編修、實錄院檢討。時有集慶太乙之役，甫極論其害。又言皇嗣人宮，而左右有以果實器玩獻者，乞加禁絕。皆不報。出爲江西轉運使，兼知隆興府。改知泉州，未赴。一日，聞有太學生言事被謫者，憂憤流涕，因動痼疾，卒。所著《蜀漢書浩同類稿》、《英雄錄》、《外制集奏稿》、《讀書壁記》。

李誼 字仲諧。苦學，通諸經，尤精《禮記》。與子喆，屢冠鄉薦。開門授徒。父子仕皆司理參軍。

翁合 字叔備。七歲能文，辟童選，登嘉禧二年進士。歷官有聲。賈似道謫建州，合上言：「建，實朱熹闕里，三尺童子亦知向善。聞似道名，咸欲嘔吐，況見其面乎？乞投荒裔，以禦魑魅。」似道坐責授高



州團練副使，循州安置。景定中，擢侍講。所著有《丹山集》。

祝穆 字和甫。曾祖確，歛名士，朱文公外祖也。父康國，始從文公居崇安。穆，少名丙，與弟癸，同事文公，遂以儒名。性溫行淳，文章富贍，嘗著《事文類聚》、《方輿勝覽》。諸司宰執程元鳳、蔡杭薦其賢，兼錄所著書以進。除迪功郎。子洙。

洙 景定中，爲興化軍涵江書院山長。舊在家庭，講論精密。比來涵江，闡揚師訓，發明經旨。知軍徐直諒薦其學行於朝，方欲擢用，拂袖歸。

詹復 字仁仲。舉進士，調豐城簿，遷金華知縣。簡易宜民。痛父蚤逝，迎母就養。母憚遠涉，鬱鬱不樂，寄詩慰母。未幾，解歸。

徐幾 字子與。通諸經，尤精《易》，得朱真理學之傳。景定間，與何基同以布衣召，詔補迪功郎，添差建寧府教授，兼建安書院山長。

俞翊 字羽道。以父日新死事，恩澤補官。改秩，知上虞縣，民安事治，廉震越中。薦知饒州，有政聲。就除提點坑冶，吏憚嚴肅，賂庖餽之。

元

延祐四年鄉舉 虞光祖

至正七年鄉舉 夏衷

薦辟賢者雜見列傳中。(一一)

有傳

李文 詹景仁 虞光祖 游應祥子欽。 藍山

李文 字士則。聰敏篤學，游熊禾之門，與杜本友善，談議間，一以講學爲事。聲聞四馳，學者群然取正。皇慶初，舉爲蘇州學教授。

詹景仁 字天麟。先世藏書甚富。景仁以文學辟爲三公掾。延祐中，出貳浙江憲幕，遷江西撫州總管。清江杜本以徵辟至京，景仁與善，因談及其先世藏書之富。本以忤時相歸，景仁請入武夷山，卽平川之上，築萬卷樓居之，相與剖析疑奧。宇內名流有過閩者，皆造廬請益。

虞光祖 字善繼。幼受學於熊禾。博綜經史。爲文有跌宕氣。官邵武學教授。

游應祥 字子善，酢七世孫。天資淳厚，博通經史。結屋澄川之上，隱跡白晦。後繇武夷直學陞學正，卒。子欽。

欽 字敬仲。幼受家學，研精覃思，求續前人。至元間，用薦省授邵武簿，遷建陽知縣。抗行厲廉，寬嚴迭濟，勤撫字，緩催科，邑人久而懷之。卒之日，士民奔哭其家。

藍山 字靜之。世居武夷山南，恬退不仕。與弟智學詩於清江杜本。慕林逋仙之爲人，杖屨武夷，遍跡諸峰，至其會心，放飲酣歌，徘徊累日。後辟爲武夷山長。遷邵武尉，不赴。有《藍山集》四卷。弟智，見皇朝縉紳。

### 皇朝科第

舉人 進士子、午、卯、酉屬舉人，辰、戌、辛、未屬進士。

洪武二十七年甲戌 童英 鄉試科年，舊志不載。

二十九年丙子 張志

建文元年己卯 建文年號已經紹書仍舊，今改洪武三十二年仍稱建文元年。

丘錫 丁護

永樂四年丙戌 斐旻鄉試科年，舊志不載。

六年戊子 張珪 李兆

九年辛卯 胡德

十八年庚子 林翁

二十一年癸卯 楊童 翁瓊

宣德七年壬子 方成

景泰四年癸酉是年，詔開科，福建中一百三十七人。

程勉 陳賜

天順三年己卯 暨文

成化十年甲午 彭崑

二十三年丁未 彭崑

弘治八年乙卯 李純貴州中式。 李綬

正德二年丁卯 陳翹

十一年丙子 李蕃

十四年己卯 嚴潮 吳道夫 藍涇瓊州推官。渭從弟。

嘉靖四年乙酉 藍釜

七年戊子 范梁 藍田璧順天中式。 李夔貴州中式。

十二年甲午 藍渫渭弟。順天中式。 李佐夔了。貴州中式。

二十六年丁未 李祐鄉試科年，舊志不載。

三十四年乙卯 黃嘉賓貢上谿子。

三十八年己未 黃嘉賓

四十年辛酉 丘史 黃大年 岳如厚 李大晉貴州中式。

隆慶五年辛未 李大晉

萬曆十年壬午 藍光璧

十六年戊子 李俶貴州中式。

二十二年甲午 彭維藩

四十年壬子 徐日升

四十六年戊午 黃世忠嘉賓孫。

薦辟、貢士、監生賢者雜見列傳中。

有傳

杜圻 藍智 方直 丘錫 裴旻 姚志 彭禧 藍渭弟渫。 丘雲霄 黃嘉賓 周維拱

杜圻 字德基，元杜本之孫。苦學砥行，以先哲爲師。洪武間，以薦舉授甌寧訓導，轉温州教授。

藍智 字明之。與兄山學詩於杜本。洪武十年，以明經薦授廣西按察僉事。廉介著一時。有《藍潤

集。元張旭嘗稱其衆體兼備，足追風雅。

方直 字孟周。洪武間，縣邑諸生授萍鄉尉，改豐城。廉能著聲，召纂修文淵閣，知海寧縣，改新鄉，用薦入爲御史，綽有風裁。後以不避權勢見沮。出宰新喻，卒。

丘錫 字永錫。初除衡州教授。永樂四年，預修《永樂大典》。改衡州教授。自筮仕，五典文衡，人服明公。性嗜學，至老手不釋卷。卒年八十。

裴旻 字士勉。任江西僉事，廉介嚴毅，威望凜然。

姚志 字伯啓。縣監生知東鹿縣。時屬兵後，流移未復，志課農桑，通商賈，嚴戢猾胥，湔雪冤婦。三年，治化大行。秩滿，邑人懇留再任，及致政，相率泣送於郊。

彭禧 字樂善。縣太學生授崇德丞，慈祥愷悌。代令，所區畫，犁然就理。六載，乞休，老稚留之不得，相與追送武林，泣別而去。越數載，民虛輿來請，至則老稚郊迎，敬愛如在位，易朔而還。

藍渭 字汝楊。嘉靖五年以貢授瓊州推官。秩滿，謝歸。渭學研理致，少年脫穎，耄歲猶喜屬文。弟濶。

濶 字汝汲。幼負奇質，受《易》於渭。選貢詣京，登順天鄉薦，授萬載教諭，陞松滋令。以清肅爲政，吏畏民懷。甫三月，卒。官民痛慕之。

丘雲霄 嘉靖十七年貢，官南京國子監典簿，廣西柳州城縣知縣。通古文辭，有聲士大夫間。

黃嘉賓 字子揚。舉進士，授常熟知縣。冰蘖自勵，不避豪右權要。邑有福山白茆河，自弘治間豪家分據，水利壅絕。嘉賓圖疏濬之，顧未有會。適邑豪有結盜黨千餘，販私鹽爲奸利，久布賂有司，有司

莫治，嘉賓以計盡擒其黨與，而語之曰：「汝輩作奸，法皆當死，吾第赦若，爲我盡疏白茆河者，吾出汝罪。」衆喜且恐，皆刻日受地，河流復故。既事，乃召其豪杖殺之，而赦其子與其黨與。於是，上官莫不才嘉賓。久之，擢戶部主事，承委督大通橋運糧。勤事朝夕，毫察奸蠹，益用嚴肅爲治。一日，晨出暮返而斃。或謂豪之子陰通於中官而私酖之。嘉賓父琮，貢士也。琮爲諸生時，治《詩》授徒，而晉江趙恒爲諸生，不利，遇之逆旅舍，奇之，知其困，授以所授館。恒曰：「子無館耶？」琮曰：「吾邑之館，歲以百金。吾館五年矣，得金五百，可以家。故以與子。」於是悉召其徒從之。恒曰：「甚謝子意。顧僕所治《春秋》，不習子經。」何琮曰：「僕爲子說經。」於是日詣恒館爲諸生說經，而館金悉歸之恒。恒撤館歸，謂琮曰：「僕請爲君教子。」乃携嘉賓入晉江，就學於恒。恒後舉進士，而嘉賓亦登第云。始，嘉賓令常熟，時恒過其治，聞其杖殺鹽豪事，就後堂笞嘉賓二十，曰：「既革化矣，而何求多焉？夫人也，雖死，豪有力在也。子其及矣。」至是果然。妻暨見閩閩志。

周維祺 萬曆中以歲貢任邵武府教授。學有淵源，辭章根理，常集諸生聚講。邵陽人士皆尊信之。

〔校記〕

〔一〕「二十三路」，各本原作「三十二路」，據《宋史·地理志》改。

〔二〕「謝」字，各本原脫，據《宋史》本傳補。

〔三〕「字」下，各本原闕二字。

〔四〕「章夏」，各本原作「章厦」，據《宋史》本傳改。

〔五〕「察大理」，各本原作「察天地」，據《宋史》本傳改。

〔六〕「十卷」，《宋史》本傳作「八十卷」。

〔七〕〔八〕「太學士」，據文義，當作「太學生」。

〔九〕「復龍圖閣」，據宋朝官制及《宋史》本傳，當作「復直龍圖閣」。

〔一〇〕「有兄弟」下，疑脫「一訟」字。

〔一一〕「歐陽光祖」，各本原作「歐陽公祖」，據本書卷九十七「宋科第」及本卷傳記目錄改。

〔一二〕「賢者」二字，各本原脫，據本書體例補。

# 閩書卷之九十九

英舊志 縉紳

建寧府 浦城縣一

唐

劉守謙

劉守謙 肅宗朝討安祿山有功，授處州刺史，今縣有刺史祠。

五代周進士

顯德二年乙卯 楊徽之後入宋。有傳。

宋科第

端拱二年己丑 黃震

咸平二年己亥 黃旦

三年庚子 吳待問 章頤

五年壬寅 章得象頤侄。



景德二年乙巳 章頰頰兄。黃覺 楊倚徽之從孫。

大中祥符元年戊申 張沔

二年己酉 徐陟

八年乙卯 張泌 黃鑑

天聖二年甲子 黃孝先 黃鑄旦子。

五年丁卯 吳育待問子。吳方 吳京俱育弟。章岷

八年庚午 楊翊 章峴岷弟。

景祐元年甲戌 章俞

寶元元年戊寅 吳充育弟。張誨 章岵岷弟。

慶曆二年壬午 章嶸岷弟。

六年丙戌 章訢

皇祐五年癸巳 章穎 黃萃一作莘。覺孫。

嘉祐二年丁酉 章衡狀元訢孫。黃好謙孝先子。

特奏名 楊昭述

四年己亥 章惇訢弟。

八年癸卯 練定

治平二年乙巳 章察頰孫。

四年丁未 黃轍 葉安節郡志作「元豐五年」。

熙寧三年庚戌 章甫

六年癸丑 黃寔孝先孫。 周常 葉棗 范鏗 楊郊 黃好信孝先子。 練亨甫

九年丙辰 章緯寮子。

元豐二年己未 章粹 何述

五年壬戌 楊訓 張巨 黃靜

八年乙丑 吳駿 黃輔國轍子。

元祐三年戊辰 章綜寮子。 劉毅 李允 練逢

六年辛未 黃贊震曾孫。 李宗

紹聖四年丁丑 章授得象從孫。 周武仲 葉常 周因

元符三年庚辰 郭汝賢

崇寧二年癸未 陳能千 陳彥弼 楊授郊子。

四年乙酉 上舍釋褐 周固因父。

五年丙戌 章誼 潘中 楊喚

大觀三年己丑 練繪 張彖

政和二年壬辰 劉汝舟穀子。

五年乙未 張大年 李穎士充子。 黃緩 謝郎

重和元年戊戌 楊公度訓子。 黃璘

宣和二年庚子上舍釋褐 祖秀實洽子。

建炎二年戊申 黃衡 吳叔虎

紹興二年壬子 黃子游

十二年壬戌 楊邦弼童子科，御擢第二人。億六世孫。

十五年乙丑 祖逢清

十八年戊辰 黃嗣廉轍孫。

二十一年辛未 徐詡一作翊。

三十年庚辰 祖世英

隆興元年癸未 郭德麟太平通判忠順子。

淳熙二年乙未 徐應龍

紹熙元年庚戌 張彥清

慶元二年丙辰 徐鳳

五年己未 真德秀

嘉定七年甲戌 徐清叟應龍子。 徐榮叟清叟兄。

紹定二年己丑 徐莘老（一）鳳子。

嘉熙二年戊戌 徐華老鳳子。 徐夢發華老子。



雅，分命編錄。歷遷刑、兵二部郎中，獻《雍熙詞》，太宗廣其韻以賜。端拱初，拜左諫議大夫，出知許州，入判史館事，加修撰。因次對，請訪求學古之士，補五經博士之闕，以獎人才，崇教化，太宗嘉納。未幾，改判集賢院。時劉昌言拔自下位，不踰時參掌機務，童儼爲右計使，欲傾昌言代之，嘗謂儼之曰：「上遇張洎，錢若水厚，旦夕大用矣。」直史館錢熙與昌言善，詣儼之，語次及之，熙遽以語昌言，昌言轉語洎，洎謂儼之遺熙構飛語中傷已，遂入白，太宗怒，召昌言質其語，出儼之爲山南東道行軍司馬，熙落職，通判朗州。未行，改鎮安軍行軍司馬。真宗尹京，妙選僚佐，驛召爲左諫議大夫，與畢士安並充開封府判官。召對便殿，諭以輔導意。東宮建屬，以兼左庶子遷給事中。既卽位，拜工部侍郎、樞密直學士，俄兼秘書監。咸平初，加禮部侍郎。二年春，以衰疾求解近職，改兵部，仍兼秘書監。人謝，命坐慰勞。是秋，特置翰林侍讀學士，命與夏侯嶠、呂文仲並爲之，賜宴秘閣，且褒以詩。未幾，以足疾請告，真宗賜之名藥。郊祀不及扈從，賜資如侍祠之例。車駕北巡，儼之力疾辭苑中，真宗顧謂曰：「卿勉進醫藥，見當不久。」及駐蹕大名，特降手詔存諭。明年春，車駕還，遣使臨問。卒，年八十。贈兵部尚書，賜其家錢五十萬，絹五百匹。無子，錄其外孫宋綬太常寺太祝，侄孫偃、集並同學究出身。儼之純厚清介，守規矩，尚名教，非道下進，尤所痛嫉。嘗言：「溫仲舒、寇準用搏擊取貴位，使後輩務習趨競，禮俗寢薄。」世謂其知言。寡諧於俗，惟李昉、王祐深所推服。石熙載、李穆、賈黃中，則與爲文義友。既沒，有集二十卷留於家，真宗令夏侯嶠取以進。後儼之妻卒，及葬，復以緡帛賜其家。景祐間，贈太子太師，謚文莊，祀白鹿洞。從孫億。

億 字大年。祖文逸，南唐玉山令。億將生，文逸夢一羽士自稱懷玉山人，覺而億生，白毛披體，其

長盈尺，踰月始墮。能言，母口授《孝經》，隨卽成誦。雍熙初，年十一，太宗聞其名，詔江南轉運使張法華就試詞藝，送闕下。連三日得對，試詩賦五篇，深加賞歎，命內侍送至中書。又賦詩一章，宰相驚其俊異，削章爲賀。卽授秘書省正字，特賜袍笏。俄丁外艱，服除，會徽之知許州，億往依學，徽之間與語，嘆曰：「興吾門者，汝矣。」淳化中，詣闕獻文，改太常寺奉禮郎，仍令讀書秘閣。獻《二京賦》，命試翰林，賜進士第，遷光祿寺丞。屬後苑賞花曲宴，召命賦詩坐側。又上《金明池頌》，太宗誦其警句於宰相。明年二月，苑中曲宴，億復以詩獻，卽令直集賢院，表求歸鄉里，賜錢十五萬。至道二年，遷著作佐郎。知其貧儉，屢頒霑賚。每有奏頌，時時稱善。真宗卽位，超拜左正言。詔錢若水修《太宗實錄》，奏億參預，凡八十卷，億獨草五十。書成，乞外補就養。知處州，真宗知其才長史學，留不遣。固請，許之。召還，拜左司諫，知制誥，賜金紫。咸平中，西鄙未寧，詔近臣議靈州棄守之事。億上疏曰：「臣讀史，見漢武北築朔方，平津侯諫罷之。漢武使朱買臣等發策難，平津十不得一。臣以爲平津非不能折買臣之舌，直以順人主之意爾。靈州，朔方故墟，僻介西鄙，數百里間無有水草。烽火亭障不相望。自邊境屢驚，兇黨猖獗，爵賞之而不恭，討罰之而無獲。曹光實、白守榮、馬紹忠及王榮敗後，資糧屢屨所失至多，將士丁夫相枕而死，以致募商人輸帛人穀，償價數倍。孤壤築城，邊民繹騷，國帑匱乏，數年之間，兇黨逾盛，靈武危蹙，歸然僅存，河外五城繼聞陷沒。平津所言罷弊中國以奉無用，正今謂也。昔者，太祖命姚內斌領慶州，董遵誨領環州，統兵裁五六千，付以閩外，士卒効命，疆場晏然。今亦乞選將臨邊，賜給廩賦，資以策略，許以便宜。倘寇擾內屬，撓以勁兵，示以大信，懷荒振遠，諭以賞格，彼則奔潰衆叛，安能與大邦爲敵哉？」景德初，以家貧乞典郡江左，詔令知通進銀臺司兼門下封駁事。俄判史館，會修《冊府元龜》，與王欽若同總其

事，序次體制，皆億所定，群僚分撰，詔經億竄改乃用。二年，召爲翰林學士，又同修國史，凡變例多出億手。大中祥符初，加兵部員外郎、戶部郎中。五年，以疾在告，遣中使致太醫視之，億拜章謝，上作詩批紙尾，有「副予前席待名賢」之句。以久疾，求解近職，優詔不許，但權免朝直。億剛介寡合，在書局惟與李繼、路振、刁衍、陳鉞、劉筠輩厚善。當時文士，咸賴其品題，或被貶議者，退多怨謗。王欽若驟貴，億素薄其人，欽若啣之，屢挾其失，陳彭年方以文史售進，忌億名出其右，相與毀訾，真宗皆不惑其說。億有別墅在陽翟，億母往視之，因得疾，請歸省，不待報而行。真宗親緘藥劑，加金帛以賜。億素體羸，至是以病聞，請解官。有疾憲官劾億不俟命去，授太常少卿，分司西京，許就所居養療。《冊府元龜》成，進秩秘書監。七年，病愈，起知汝州。會加上玉皇聖號，表求陪預。卽代還，以爲參詳儀制副使，知禮儀院，判秘閣、太常寺。天禧二年冬，拜工部侍郎。明年，權同知貢舉，坐考校差謬，降授秘書監。丁內艱，屬行郊禮，以億典司禮樂。未卒哭，起復工部侍郎，令視事。四年，復爲翰林學士，受詔注釋御集。又兼史館修撰，判館事，權景靈宮副使，卒。五年，真宗欲立德妃爲后，欲得億草詔，使丁謂諭旨曰：「勉爲此，不憂不富貴。」億卒不草。及卒，仁宗令議追贈，有司言：「故事，非曾任二府及事東宮，法不應贈。」仁宗曰：「億有君子大節，可贈禮部尚書。」謚曰文。億文格雄健，才思敏捷，對客揮翰，率精密有規裁。尤長典章制度。重交游，尚名節，留心釋典、禪觀之學，所著《括蒼》、《武夷》、《潁陰》、《韓城》、《退居》、《汝陽》、《蓬山》、《冠鰲》等集、《內外制》、《刀筆》，共一百九十四卷。無子，以從子紘爲後。弟偉、倚、備、倬。

紘字望之。以蔭歷官知鄆縣。鄆濱海，惡少販魚鹽者，群居洲島，或掠商人財物入海，吏不能禁。紘至，設方略，使識者質惡少船，及歸，始給還，且戒諭之，繇是不敢爲盜。以獻億文，賜進士出身。通判

越州，知筠州，提點江東刑獄，除轉運、按察使。江東饑，開義倉賑之，吏持不可。紘曰：「稍稽，人殍矣。」家居性嚴，雖兒女不敢妄言笑。御下卞急，犯輒不貸。常曰：「去一不法，不利一家爾，可使郡邑千萬家俱受其害？」聞者望風解去，或過期不敢之官。與王鼎、王綽號「江東三虎」。坐降知衡州，徙越州。爲荆南轉運使，徙福建，不赴。知湖州，復爲江東轉運使，官至太常少卿，卒。聚書數萬卷，手抄事實，名《窺豹篇》。

偉 字子奇。幼學於億。天禧元年獻頌，召試學士院，賜進士及第。以試秘書省校書郎，知龍游縣，再補蘄州錄事參軍。國子監薦爲直講，辟簽書鎮寧軍節度判官事，遷大理寺丞，知河間縣，再遷太常博士。用近臣薦，爲集賢校理，通判單州。會巡檢部卒李素，合州卒二百餘人，謀殺巡檢使，人鼓角門，州將不敢出，偉挺身往問若何反，俱曰：「非反也，將有訴於州。」偉曰：「持兵來，何非反？若屬無父母妻子乎？」悉令投兵，籍首悉斬之。徙知祥符，提點開封府界諸縣鎮公事，權開封府判官，又判三司開折司。累遷尚書兵部員外郎，同修起居注。常執小笏以朝，知制誥缺，中書以偉名進，仁宗曰：「秉小笏者邪？」遂命知制誥，權諫院。遷刑部郎中，爲翰林學士。祀明堂，遷右司郎中，判太常寺，爲群牧使兼侍讀學士，進中書舍人。卒，贈尚書禮部侍郎。

倚 字永年。歷開封府工曹。遭母喪，痛念骨立，歸棲故廬，不復從官，州曲高之。

備 以蔭補官，累遷虞部員外郎。有《金陵覽古》詩。

倬 字大明。祥符四年以恩補將作監主簿。考最，轉太常寺奉禮郎，遷大理寺丞，知會稽縣，遷知昭州、連州。以廉自守。



邦弼 字良佐。授常州判，改真州教授。太學初興，妙選學官，與同郡邵知柔、陳鵬飛同召對，即日並除太學博士。出知信州，遷中書舍人。

黃震 字伯起。進士及第，累遷著作佐郎，通判遂州。嘗給兩川軍士緡錢，詔至西川，而東川獨不及，軍士謀爲變，震白主者曰：「朝廷寧忘東川？詔書稽留爾。」卽開州帑給錢如西川，衆乃定，明日而詔至。累遷尚書都官員外郎，提點湖北路刑獄。還，判三司磨勘司，擢江淮發運使。先是，李溥自三司小吏爲發運使，十餘年姦贓狼藉，丁謂黨之，無敢言者。震將行，上書自陳，辭頗憤激。真宗知震意在溥，諭震曰：「卿與人處，當以和爲尚。」震曰：「敢不奉詔，第不敢和同負陛下者耳。」旣，發溥姦贓數十事，溥坐廢，而震亦爲溥訟，奪一官，罷。謂貶，復官。知饒州。徙廣東轉運使，廣南進異花數千本，至都下枯死者十八九，震奏罷之。震在真宗朝數論事，旣卒，詔進官一等。子瑊。曾孫贊。

瑊 字君度。以蔭補太廟齋郎，累遷殿中丞，通判台、潤。二年，除國子博士，出知撫州。以舉官不當，罷，知諫院。蔡襄言：「瑊明敏公廉，所至有聲，欲望特原與之，重難差遣。」嘉祐末，會恩復官。仁宗山陵起，發錢帛還朝，時相以名上，授廣濟都大輦運司，歲增數萬。官至朝奉郎。

贊 字仲實。爲贛尉，居官不能俯仰，罷去。再起爲宣城丞，久之，調奉新令，不赴。少年時，嘗著《易傳》推明大衍之數，號爲精確。

黃旦 字昇之。歷知德化、錢塘一縣，用薦除大理評事，知光州。代還，遷秘書丞。知黎州，鎮以清靜，卒，黎人思之，立祠祀焉。子鑄，進士，累贈銀青光祿大夫。孫敏用，朝散大夫、四川茶馬，敏頤，中散大夫。曾孫敦書，中奉大夫，直徽猷閣、兩浙轉運副使；敦彥，朝散大夫、江東提刑。

吳待問 字子禮。爲同縣楊億所知。咸平初，登第。遷大理寺丞。億爲延譽，稍歷要職，累官禮部侍郎。慶曆中，子育在一府，待問以列卿奉朝請。及育帥永興，肩輿迎養，時人榮之。贈太師、崇國公。育與弟京、方、充，皆進士高第，同時貴顯。方，終翰林學士。

育 字春卿。與其弟京、方，同年舉進士，試禮部第一，遂中甲科，而京、方皆及第。當是時，吳氏兄弟名聞天下。除大理評事，知臨安、諸暨二縣，遷寺丞。襄城縣，秦悼王葬汝州界中，其後子孫當從葬者，與其歲時上塚者不絕，宗室宦官常往來，爲州縣患。育在襄城，請凡官所須，皆具成數，羊豕悉出大官。繇是，宦官橫索遂省。異時，宗子所過，縱鷹犬，暴民田，人襄城境，輒相戒也。舉賢良方正，擢著作郎，直集賢院，通判蘇州，還。同知太常禮院，奏定禮文，名《太常新禮慶曆祀儀》。改右正言，歷三司鹽鐵、戶部二判官，尋以本官供諫職。元昊僭號，遣使上書，有不順語。朝廷亟命將出師，群臣爭言：「豎子可誅滅。」獨育謂：「元昊雖名藩臣，其實夷狄。業已誇僭名號，勢必不能自削，以取羞種落。第宜示以不足責，外置之，因而賜號若國主者。彼得其願，定不肯妄動。」時皆以育言爲不然。後師久無功，元昊亦歸過自新，朝廷卒以爲夏國主，議者始悔不用育言而虛敝中國。除同修起居注，遂知制誥，進翰林學士，累遷禮部郎中。契丹與元昊構兵，元昊求納款，契丹來請勿納，朝廷未不知所答。育言：「契丹受恩，爲日已久，不可納。叛羌，失繼世兄弟之好。宜使人諭元昊曰：『契丹，汝世姻也，一旦自絕，力屈歸我，我之所疑。若無他者，當順契丹如故，然後許汝歸款。』」告契丹曰：「已詔元昊，如能投謝轅門，即聽內附，若有堅拒，當爲討之。」如此，則彼兩無辭矣。」於是出契丹書，令兩制同上對，不易育議。尋知開封府，曰：「吾何有，以及斯人？去其害者而已矣。」居數日，發大吏一人，流嶺外。又得巨盜，積贓萬餘緡，獄具，輒再

變。帝遣他吏按之，卒伏法。繇是京師肅清。慶曆五年，拜右諫議大夫、樞密副使。頃之，改參知政事。育在政府，遇事敢言，與宰相賈昌朝數爭議上前，左右皆恐色變，育論辯不已，乃請曰：「臣所辯者，職也。顧力不勝矣，願罷臣職。」顧仁宗多直育，乃復以爲樞密副使。居歲餘，賈昌朝罷去。御史中丞高若訥用《洪範》言：「大臣廷爭爲不肅，故雨不時若。」因并罷育，以給事中知許州。徙蔡州，京師有告妖人千數聚確山者，詔遣中使馳至蔡，以名捕十人。使者欲得兵自往取之，育曰：「育在此，雖不敏，安有聚千人境內而不知者？卽信有之，以兵往，是趣其爲亂也。此不過鄉人相聚爲佛事，以利錢財耳。」乃餉使者，日與飲酒，而密遣人召十人者，皆至，送京師，告者果伏辜。拜資政殿學士，知河南府，兼西京留守司，又徙陝府，遷禮部侍郎，徙永興軍。丁父憂，去官。起復，懇請終喪。服除，兼翰林侍讀學士，以疾辭，且請便郡，遂以知汝州。久之，又辭以疾，卽以集賢院學士判西京留守御史臺。疾少間，復知陝府，加拜資政殿大學士。仁宗數爲大臣言：「吳育剛正可用。」復召還，判尚書都省。居一歲，諫官劉瑜誣奏育在河南嘗貸民出息錢，除宣徽南院使、鄜延路經略安撫使，判延州。夏人既稱臣，而並邊種落數侵耕爲患。龐籍守并州，欲築柵白草以備之，育謂：「要契未明而亟城，則羌人必爭，爭而受患者必麟府也。」移文河東，又遺籍手書及疏於朝，不報。已，夏人果犯河外，殺驍將郭恩，籍與將校數十人皆以此得罪，麟府遂警。復疾作，辭不任邊，求解宣徽使，復以資政殿大學士、尚書左丞知河中府。徙河南，卒。贈吏部尚書，謚正肅。育明敏勁果，強學博辯，能自忖度，不可，守不發，已發，莫能奪。方待問以列卿奉朝請，父子在廷，士大夫以爲榮，而育蹶躅不安，自言：「子班父前，非所以示人以法，顧不敢以人子私，亂朝廷之制，願得罷。」不聽。朝廷數推恩群臣子弟，育每先及宗族疎遠者，至其卒，子孫未官者七人。有集五十卷，尤長議論。

其在西臺，與宋庠相唱酬，追裴、白遺事，至數百篇。始，育之祖皆葬浦城，至育，始葬其父於新鄭，遂居新鄭。

充字冲卿。未冠，舉進士。調穀熟簿，人爲國子監直講、吳王宮教授。等輩多與宗室狎，充齒最少，獨以嚴見憚。嘗作六箴以獻，仁宗命繕寫賜皇族，英宗在藩邸，書之坐右。除集賢校理，判吏部南曹。選人胡宗堯者，翰林學士宿之子，坐小累不得改京官，判銓歐陽修爲之請，仇家譖修黨宿，詔出修同州，充願與修同貶，於是修得復留，而充改知太常禮院。以忤執政意，出知高郵軍。還，爲群牧判官、開封府推官，歷知陝州、京西、淮南、河東轉運使。英宗立，數問充所在，會人覲，語其爲王宮教授時事，嘉勞之，尋權鐵鹽副使。熙寧元年，知制誥。神宗曰：「先帝知卿久矣。」遂同知諫院。河北水災、地震，出爲安撫使。使還，以子安持爲王安石婿，引嫌解諫職，知審刑院、權三司使，爲翰林學士。三年，拜樞密副使。八年，進檢校太傅、樞密使。充雖與安石連姻，而心不善其所爲，數舉政事不便者爲神宗言之。安石去，神宗察充中立無與，遂代爲同中書門下平章事，監修國史。充乞召還司馬光、呂光著、韓維、蘇頌，及薦孫覺、李常、程顥等數十人。王珪與充並相，忌充，而充素惡確，確治相州獄，捕安持及親屬官吏考治，欲鉤致，充語神宗，獨明其亡他。及確預政，充與議變法於前，數爲所詘。安南師出無功，知諫院張璪又謂充與郭逵書，止其進兵，復置獄。充既數遭同列困毀，憂畏疾侵。元豐三年春，輿歸第，罷爲觀文殿大學士、西太一宮使。踰月，卒。贈司空兼侍中，謚曰正獻。充內行修飭，事兄甚謹。爲相，務安靜。性沉密，對家人語，未嘗及國家事；所言於上，人莫知者。將終，戒妻子勿以私事干朝廷。神宗益悲之。子安詩、安持。安詩，在元祐時爲諫官、起居郎。安持，爲都水使者，遷工部侍郎，終天章閣待制。安詩子儲，

安持子侔，官皆員外郎，坐與妖人張懷素通謀，誅死。

章頻 字簡之。咸平初，與弟頤皆以進士試禮部，預選，會詔兄弟毋並舉，頻卽推其弟，棄去。後六年，乃擢第。自試秘書省校書郎，知南昌縣，改大理丞，知九隴縣，遷殿中丞。眉州大姓孫延世，僞爲券奪人田，久不能辨，轉運使使按治之，頻視券，墨浮上，曰：「是必先盜印乃書。」旣引伏。獄未上，而其家人復訴於轉運使，更命他縣覆按，無異。他縣用此擢官，頻反坐不時具獄，降監慶州酒。徙知長洲縣。天禧初，增置諫官、御史十二人，頻以選得召對，稱旨，擢監察御史，累官刑部員外郎，出知福州。王氏時，賦民官田，歲輸租稅而已。至轉運使方仲荀，謂鬻之可得緡錢二十餘萬，頻疏悉蠲除之，所濟貧戶可九百餘人。徙知潭州，改廣西轉運使。擢宜州守，貪暴不法，守罷去，反訟頻私事，坐謫知饒州。復入爲度支判官，累遷刑部郎中。使契丹，至紫濛館，卒。契丹以錦車駕橐駝載在中京，以銀飾棺。詔遣其子奉職郎訪乘傳護喪歸。弟頤。侄得象。孫察。

頤 字朝宗。咸平初元，詣闕言時政得失，不報。明年，登進士，調洛陽幕官，用舉主改秩，遷大理丞，知巴陵縣。代遷職方郎中，卒。

得象 字希言。世居泉州，高祖仔鈞，以戰、攻、守三策投王審知，審知命爲將，戍浦城，遂家焉。得象身體長大，語聲如鐘，咸平五年，進士及第。爲大理評事，知玉山縣，遷大理寺丞，歷知台州、南雄州，徙洪州。楊億以公輔器薦之。未幾，召試爲史館，安撫京東，權三司度支判官，累遷尚書刑部郎中，使契丹，遂以兵部郎中知制誥。踰年，爲翰林學士，遷右諫議大夫，以給事中爲群牧使，累遷戶部侍郎，遂拜同中書門下平章事、集賢殿大學士。仁宗謂曰：「向者太后臨朝，群臣邪正，朕皆默識之。卿清忠無所干附，今

日用卿職，此也。」陝西用兵，加中書侍郎兼工部尚書，兼樞密使，辭所加官。明年，以工部尚書爲昭文館大學士。慶曆五年，拜鎮安軍節度使、同平章事，封鄆國公，徙判河南府，守司空致仕。卒，贈太尉兼侍中，謚文憲。皇祐中，改謚文簡。得象在翰林十二年，憲章太后臨朝，宦官方熾，太后每遣內侍至學士院，得象正色待之，或不交一言。在中書八年，宗黨親戚，一切抑而不進，然徒以簡重鎮止浮競而已，他無所建明。至其渾厚有容，喜薦拔人，天下終以爲長者。

察 字質夫。以叔得象蔭，爲孟州司戶參軍。應舉人京，聞父對獄於魏，棄不就試，馳往直之。還，試禮部第一，擢知陳留縣。歷提舉陝西常平、京東轉運判官、提點湖北刑獄、成都路轉運使，入爲考功、吏部、右司員外郎。元祐初，以直龍圖閣知慶州。時朝廷戢兵，戒邊吏勿妄動，且捐葭蘆、安疆等四砦予夏，使歸其永樂之人。夏得砦益驕。察言：「夏嗜利畏威，不有懲艾，不得休息。宜稍取其土疆，如古削地之制，以固吾圉。然後諸路出兵，擇據要害，不一再舉，勢將自蹙矣。」遂乘便出討，以致其師，夏果人圍環州。察用間知之，遣驍將折可適伏兵洪德城。夏師過，伏兵識其母梁氏旗幟，鼓譟出，斬獲甚衆。又預毒於牛圈澗水，夏人馬飲者多死。召權戶部侍郎。明年，除知同州。紹聖初，知應天府。加集賢殿修撰，知廣州，以禮化俗，日與學士諸生講論經典，士人翕然稱之。徙江淮發運使。哲宗詔以邊事對，合旨，命知渭州。至卽上言：「城胡蘆河川，據形勝以逼夏。」乃以三月及熙河、秦鳳、環慶四路之師，（一）陽繕理他堡壁數十所，自示其怯，而陰具版築守戰之備，帥四路師出胡蘆河川，築二城於石門峽江口、好水河之陰，二旬有二日，成，賜名平夏城、靈平砦。方興役時，夏以其衆來乘，察迎擊，敗之。旣而，環慶、鄜延、河東、熙河皆相繼築城，進拓其境，夏人睥睨不敢動。夏主遂奉其母合將數十萬兵圍平夏，疾攻十餘日，建高車臨

城，填塹而進，不能克，一夕遁去。竊謀其弛備，遣折可適、郭成輕騎夜襲，直入其帳，執其統軍、監軍之勇悍善戰者，盡俘其家，虜械三千餘，牛羊十萬，夏主震駭。哲宗爲御紫宸殿受賀，累擢察樞密直學士、龍圖閣端明殿學士，進階大中大夫。夏自連創之後，不復能軍，屢請命乞和。哲宗亦爲之寢兵。徽宗立，請老，徙知河南。人見，留拜同知樞密院事，俾其子絳爲開封推官，以便養。踰年，力謝事，罷，授資政殿學士、中太一宮使。未幾，卒。徽宗悼之，贈右銀青光祿大夫，謚曰莊簡。察七子：絳、綜、綜、綜、紹、縉、縉。縉、綜，最知名。縉，繇推官爲戶部員外郎，提點淮南東路刑獄、權知揚州兼提舉香鹽事。時方鑄崇寧大錢，令下，市區晝閉，人持錢無所售。縉飭市易務，致百貨，以小錢收之，且檄倉吏糶米，以大錢興之，民心遂安。未幾，新鈔發行，舊鈔盡廢，一時商賈束手，或自殺，縉請爲民兼行之。徽宗怒，罷縉，降兩官。蔡京再相，貶台州。綜，第進士，歷陝西轉運判官，人爲戶部員外郎。中書侍郎劉逵之妻，綜姊也，逵漸復元祐之政，綜多贊之。蔡京欲擠逵，且忌綜，使其黨攻之，出綜湖州，論者不已，差主管西京崇福宮。綜，歷通判常州。紹，知丹徒縣。縉，簽判西安州。縉，簽判蘇州。竊孫芟，承奉郎，蓋，監蘇州稅。俱列仕顯。及京復相，遂興制獄，以傾章氏，誣縉居蘇州時與州人郁寶私鑄錢，株連數百人，考鞠累月。縉坐刺面配沙門島，追毀出身以來文字，除名勒停，籍入其家。竊縉台州，綜秀州，綜温州，紹睦州，縉永州，芟處州，蓋均州。官司降罷除名者十餘人，時論冤之。張商英人相，始辨前獄，爲諸子皆量移復官。

望之，字表民。少孤，喜問學，志氣弘放，爲文辯博。初，以伯父得象蔭，爲秘書省校書郎，監杭州茶庫。逾年，辭疾去。求舉賢良方正，得象在相位，以嫌扼之。上書論時政凡萬餘言，不報。丁母憂，毀瘠過制。服除，浮游江淮間，艱苦求衣食，人勸之仕，不應也。其兄拱之，知晉江縣，忤守蔡襄，襄誣以贓，坐

貶。望之號訴於朝，章十餘上，卒脫拱之冤，復官如初。望之遂不復仕。覃恩遷太常太祝。大理評事歐陽修、韓絳、知制誥吳奎、劉敞、范鎮同薦其才，宰相欲稍用之，除簽書建康軍節度判官，不赴。又除知烏程縣，趣令受命，固辭，遂以光祿寺丞致仕，卒。望之喜議論，宗孟軻，言性善，排荀卿、揚雄、韓愈、李翱之說，著《救性》七篇。又以歐陽修論魏、梁爲正統之說爲非，著《明統》三篇。江南人李觀著《禮論》，謂仁、義、智、仁、信、樂、刑、政皆出於《禮》，望之訂其說，復著《禮論》一篇。

授 字榮之，得象從孫。少從得象游京師，學擅辭場。紹聖四年，省試第一。元符中，陳瓘薦其賢，除知海州。

黃覺 字民先。仕殿中丞。有詩名。楊億、劉子儀、章得象、宋祁，皆與唱和。子孝綽，見章布。孝綽子萃，仕職方郎中。

張沔 字朝宗。除蕭山尉，授青州千乘宰。膺薦得大理丞，遷寺正。明道二年，陞侍御史。排擊奸佞，不避權貴。出知信州。先是，丞相欲除臺官，沔謂：「臺官必繇中旨，乃祖宗法也。」既數月，呂夷簡復入相，因於仁宗前議之，仁宗曰：「祖宗法不可壞也。宰相自用臺官，則宰相過失無敢言者。」夷簡等皆惶恐。遂出守。仍詔：「自今臺官非中丞保薦，毋得除授。」沔雖繇此去職，人服其諒。

徐陟 字光明。年未冠，挾所爲文人京師，見孫何，何大加歎賞，上其奏議五十卷。召試，會有家難，不赴。時丁謂當國，陟不肯見，作詩寄意，有「止渴當擇水，覓憩須芳陰」之語。擢祥符二年進士，累官永州判官。陟雖老於諸侯賓佐，而氣不少衰，猶練邊事，嘗作《白馬謠》數百言以勵邊將，有「君恩山嶽重，汝命鴻毛輕」之句。官至朝奉郎。



張泌 字順之。父彝憲，見韋布。泌篤學，爲楊億所稱。舉進士乙科，主定陶簿、徐州觀察推官、擢實應令。慶曆中，以章得象薦，召試館閣，除秘書郎丞，獻《經國遠猷》十篇，仁宗嘉納，除右正言，知諫院。奏乞減後宮浮費，抑權倖請託之弊。皇祐中，改殿中侍御史，因彈張堯佐，出知維州。移河東路察訪使，未行，召爲侍御史。遷禮部侍郎、給事中。進刑部尚書，卒。仁宗悼之，謂近臣曰：「朕將大用，不謂遽亡！」賻槨加等，贈開府儀同三司。泌爲御史，挺挺敢言。元昊叛命，延安被圍，關隴騷動，郭勸知延州，李謂爲鄜延鈐轄，皆不以爲意。勸藉中宮之勢，止罷見任，泌五章極疏其罪，謂當斬首以徇。勸及謂等竟坐貶出，人咸壯之。

黃鑑 字唐卿。舉進士，補桂陽監判官，爲國子監直講。同郡楊億善其文詞，延置門下，以是知名。累遷太常博士，爲國史院編修官。國史成，進直集賢院。以母老出倅蘇州，修《三朝實訓》，未及上，卒。

黃孝先 字子思。爲廣濟尉，改宿州司理，活死罪十有六人，以善治獄薦遷大理丞。知咸陽縣，移綿竹縣。西夏用兵，詔蜀中稅絹錢。孝先曰：「歲饑民困，請益州上其不便。」從之。復移濟源縣，改太常博士，終通判石州。與蘇軾善。子好謙、好信。孫仁榮、寔。

好謙 字幾道。幼孤，事母孝。舉進士，調單州司理，改新蔡令。歲艱食，嬰兒多棄道上，好謙勸誘賑恤，且下令：「嬰兒給壯者半之。」全活甚多。遷著作佐郎。熙寧初，召對，除中書編修條例官，用薦爲監察御史裏行，論辨誣獄及時政闕失，出通判潁州。舊相韓億留守北門，丐以自助，遂通判大名。朝廷益知好謙材，除河北轉運判官、本路提點刑獄。明年，召對，神宗面諭：「知卿母老，子弟皆官京師，故特召卿。」好謙頓首謝，後知蔡州。哲宗登極，召爲駕部郎中，以疾辭，不允。知濮州，改潁州，未赴，卒。孝先

令咸陽日，主簿死，無以殮，孝先適出他縣，好謙時十五，即謁雍守杜衍白其事，衍答以當與僚佐議，好謙曰：「公爲近侍，典方面，屬吏死無以殮，欲誰議耶？」衍即賻之，一府稱爲奇童。王樂道，孤峻寡合，常言：「每見黃幾道，使人氣和體舒，其叔度之遺風乎？」

好信 字任道。少儻，篤學。累官職方郎中，知汝州，卒。

仁榮 字擇之。以恩補承務郎，主泰和簿，帥臣季陵辟爲錄事參軍，以薦知金谿縣，歷浙西提舉，後知信州，除江東運判，知衢州、直秘閣。建議請盡鬻州縣閑田。及對，高宗獎諭曰：「向論鬻田，戶部得緡錢五百萬者，卿也。」遂除度支郎中，有沮之者，改浙東提點刑獄，復命知秀州。執政以數更易爲名，高宗曰：「一州得人，更之何害？」明年，除兩浙轉運副使，尋加直敷文閣，知臨安。俄，丁母憂。服除，高宗付仁榮以提點諸路坑冶，再除兩浙轉運副使，復知臨安府。未幾，移贛州，卒。

寔 字師是，一云公是。舉進士，積官提舉京西、淮東常平。元豐末，徙提點開封府縣鎮，歷梓州路、兩浙提刑，京東、河北轉運副使。哲宗欲召用之，爲曾布、林希所沮。移陝州，爲江淮發運副使，除太僕卿。已，以實文閣待制知瀛州、定州。朝命籍民兵，旁郡因緣擾，寔懷檄不下，畫利害上陳之，事得寢。卒於官，贈龍圖閣直學士。（四）寔，章惇甥也。孝友敦睦，內外見稱。蘇轍與游，因結婚，寔兩女並嫁轍子，其後又與軾友善，乃曾布、林希所以沮寔謂其兩女並嫁轍子，義乏嫌微，坐出知陝州。紹聖黨禍起，以章惇甥獲免，然寔未嘗附麗也。《宋史》本傳載寔陳州人，意寔卒官，子孫家陳矣。

章岷 字伯鎮。嘗與范仲淹同賦《鬪茶歌》，岷先就，仲淹覽曰：「真可壓倒元、白。」官至光祿卿、正議大夫。

楊翊 字正臣。舉進士。調南安尉，偶得微疾，投檄不仕，以詩酒自娛。蔡君謨與翊同年，相善，始招以詩，繼率同列薦之，俱不起。

張詵 字樞言。天性孝友，廉財利。通判越州，民患苦衙前役，詵科別人戶，籍其當役者，行雇役法。知襄邑縣，擢夔州轉運判官。以建拓瀘夷地，即直集賢院，改陝西轉運副使。召對，神宗面諭曰：「朕每閱章奏，卿與蔡挺有所論請，使人了然。」及人辭，賜服金紫。明年，直龍圖閣，知秦州。前此，將吏貪功，多從羌地獵射，因起邊患。詵至，申令毋犯。得一人，斬諸境上，群羌感悅。遷天章閣待制，知熙州。董氈遣鬼章逼岷州，詵迎戰，破之。元豐初，加龍圖閣直學士，知成都府。徙杭州，將行，復簽權經略熙河事，趣使倍道。時倉卒治戎，有司計產調夫，戶至累百，（五）民多流亡，詵中塗爲請命，不報。會靈武師罷，乃赴杭，道過京師，神宗訪以西事，對曰：「彼勢雖弱，而我師未銳，邊備未飭，願以歲月圖功。」累官正議大夫。

章衡 字子平。舉進士第一，判湖州，直集賢院，改鹽鐵判官，同修起居注。言：「三司經費，有取領而無多寡，率不預知。急則斂於民，倉卒趣迫，願勅三部，簿正其數，即有所賦，先期下之。」出知汝、潁二州。熙寧初，還，判太常寺。時方議桃廟之制，衡請「尊禧祖爲祖，而次桃順祖，以合子爲父屈之義。復推禧祖侑感生之祀，而罷宣祖配位，以合祖以孫尊之義。自唐開元纂禮書，以《國恤》一章爲豫凶事，刪而去之，不幸遇事，則捃摭墜殘，茫無所據。今宜爲《原陵集禮》以貽來世。」從之。出知鄭州，奏罷原武監，弛牧地四千二百頃以予民。復判太常，知審官西院。使遼，燕射，連發破的，遼人異之，待之異他使。歸復命，言：「遼境無備，因此時可復山後八州。」不聽。衡纂歷代帝系，名曰《編年通載》，神宗覽而善之，且念

其嘗先多士，進用獨後，而賜三品服，判吏部。流內銓，嘗有員闕，既擬注，而三班院輒用之，反訟吏部。宰相主其說，衡連疏奏與辯，或至訴於御前。神宗命內侍偕至中書，宰相見之怒，衡曰：「衡爲朝廷法耳。」以狀上請而視之，宰相悟，乃罪三班。未幾，知通進銀臺司，直舍人院，拜寶文閣待制，知澶州，徙知成德軍，坐事免。元祐中，歷秀、襄、河陽、曹、蘇州，加集賢院學士，復以待制知揚、廬、宣、潁州，卒。

楊昭述 字景魯。性醇雅，長議論，鄉人多師之。以特奏名出身，授石埭尉。始至，進秀民教之，邑人相率趨學，呼爲「楊夫子」。任滿，調海康令，以疾卒。

練定 字公權。初調烏江尉，再除福州司理。紹聖初，呂惠卿知大名府，辟機宜。召對，論事以尊主強國爲先，忤時相，通判信州。久之，召爲將作監丞，除湖南轉運判官。崇寧間，提點本路刑獄，移廣南路。諸子不欲其踰嶺表，勸以乞祠，定曰：「臣事君，猶子事父也，可擇地爲去就哉？」官至朝請大夫。有《青丘集》二十卷。

黃轍 字遵晦。初調處州司理，秩滿，令安仁，率民墾田畝，治溝洫，進秀民於學。蒲宗孟辟荆湖訪察司幹官，改令新昌。發奸摘伏，拊摩良善，奏課天下最。終大理丞、通判筠州。子輔國。孫嗣廉。

輔國 字應圖。任青州司理，調浮梁簿，改南海令，知高郵軍。淮右旱蝗，極力賑濟，民賴不殍。帥曹列薦，得樞密院編修官。尋以大臣薦，除右正言。遷右司諫。嘗論列惠民之政，及學校之法，皆著爲令。擬改太常少卿，哲宗親擢爲起居舍人。時有旨看詳元祐以來臣僚章疏，欲籍爲奸黨。輔國不奉詔，出知袁州江寧府。詔落職光州。大觀初，知福、泉二州，召爲給事中，未赴，卒。

嗣廉 字景夷。弱冠，入太學，試以《孝事君則忠賦》，遂中魁選。紹興中，舉進士，終宣義郎。

葉安節 字亨之。初簿鄆縣，縣有海宴、太丘、靈巖三鄉介山谷間，王荆公嘗鑿巖，起斗門於海濱，未就去，安節踵成之，三鄉遂饒。改諸暨縣，辟管當陝西轉運司公事，召爲諸王官大小學教授，遷太府丞，移知吉、袁二州，所至鈎考發摘，政號神明。

童甫 字端叔。年十四，辭親求師友，薄游江淮間殆十年，卒以名聞。初調臨川尉，盜有劫商殺人者，吏以支辭蔓獄，株連至不可詰訊，甫呼囚環坐，以事驗之，俄引三人出曰：「汝也」，餘悉縱去，三人皆自伏。就移壽春令，除應天府、國子監教授，用舉者改著作佐郎。官制行，換宣德郎，知山陰縣，巨猾陸璋輩，竄易戶名，以避征役，甫閱籍，具得其奸狀，坐流配者數人。秩滿，轉奉議郎，監左庫北庫。哲宗卽位，轉承議郎，通判宿州。先是，南京押綱侍禁史士宗，侵耗官米數百石，反訟倉官交納不公，獄久不決。朝廷以委甫，甫至，片言折之，士宗雖坐流竄，自以爲不冤。兩遷爲朝散郎，繼丁親憂。久之，除太府寺丞，轉朝請郎。召對，稱旨。除府界提舉常平等事。鄆陵舊有雙泊河，數溢，爲民害，二縣以開濬請，甫爲親行堤上，得舊河經始之意，爲增濬河外故道。是歲，河朔饑民流入畿甸者不可數計，甫召而廩給之，因以用其力，堤成，民不告病，饑者得全活。徽宗立，轉朝奉大夫。未幾，除知處州。時承平日久，年穀屢豐，天下諱言災傷。甫還朝，首言：「淮甸歲凶，宜加賑恤。」大臣初雖不悅，而甫誠意懇惻。翌日，朝命遣使大發倉廩，民賴以濟。崇寧初，黨論復興，甫除郎官，得旨陞對，抗言：「元祐臣僚削秩投荒，皆緣國事，陛下卽位，稍令內徙，道路交慶。今復刻名著籍，禁錮其子孫，恐非陛下本意。」徽宗雖優容之，然亦繇是與時論不合。會宰相曾布得罪，言者因以微文詆甫，從坐降一官，罷。尋知泰州，遂掛冠退居吳門。未幾，特旨落致仕。復知泰州，之官數月，乞官祠，卒。甫莊重簡默，接人以和，行己蒞官一本於誠。其論天下

事，不苟不隨，期當理。讀書萬卷，增校精至，有文集二十卷、《孟子解義》十四卷。

周常 字仲修。第進士，補國子直講、太常博士。以養親，求教授揚州。年未五十，即致仕。久之，御史中丞黃履薦其恬退，起爲太常博士，辭。元符初，復申前命，起兼崇政殿說書，遷著作佐郎。疏言：「諸陵器物，舊用塗金，服飾又無珠玉。自裕陵至宣仁后，寢宮乃施金珠。願收貯景靈殿，以遵祖宗儉質遺訓。」詔置之奉宸庫。擢起居舍人。鄒浩得罪，常於講席論救，貶監彬州酒。徽宗立，召爲國子祭酒，起居郎，從容言：「自古求治之主，未有不尚志爲先。溺於富貴、逸樂，蔽於諂諛、順適，則志隨以喪，不可不戒。元祐法度，互有得失，人才各有所長，不可偏棄。」時以天暑，令記注官：「卯漏正，即勿奏事。」仍且爲令。常言：「本朝記注，類兼諫員，故凡言動得以所聞，見論可否。神宗皇帝時，修注官雖不兼諫職，亦許以史事於崇政、延和殿直前陳述。今若於炎暍可畏之候，暫停進對，著爲定令，則必記於日錄，傳之史筆，後人觀之，將以爲倦於聽納，忘先帝美意矣。」事遂寢。進中書舍人、禮部侍郎。蔡京用事，不能容，以寶文閣待制出知湖州。尋奪職居婺州。復集賢殿修撰，卒。

葉隸 字彥成。熙寧中登第，累官知福州。政尚平易，民甚安之。子煥，省試第一，歷帥名藩，遂登禁從。

范鏜 字宏甫。元祐初被薦入館。出知信州，以集賢校理知洪州。人對，除國子司業。太學作策問，例呈長貳，鏜每加點竄，博士劉夬甚不平，後取視，乃大愧服。拜工部尚書，除樞密直學士，知太原府。官至龍圖閣學士。

楊郊 字時中。通判寧化軍，集賢校理。余中銘郊墓，有絲絃、壺冰、白日、秋霜之比。子授。

授 字夢錫。任銅鞮尉，會攝邑事。邑俗故陋，前此無應進士舉者。授建學，擇秀民教之。秩滿，陞上津令。東歸，道經光化，愛其地沃民醇，買田築室，因居焉。

練亨甫 有文名，爲王安石所知，號爲「小友」。

章粹 字仲容。初調上黨簿，秩滿遷防禦、判守，充定州學教授，除廬江令。有巫以禍福惑人，粹究罪之。白湖田沃壤千里，頻年水患，粹築堤爲防。遷太府丞，通判恩州，百廢具舉，適河溢，亦賴其捍禦。

何述 字明道。初調奉符尉。知當塗縣，瀕江歲有水患，述築堤姑溪上，民用安堵。廣濟圩爲田千餘頃，夏潦，堤將決，述別爲長堤輔之，卒全其半。崇寧初，除開封府推官，從尹以職事對，徽宗顧尹曰：「何述詳雅，必能助剴決。」遷開封府少尹，歷除徽猷閣待制，知永興軍，移帥涇原，以恩信結諸酋豪，邊陲無警。所著有《禮記解》、《事類領要》、《廬江集》。

楊訓 字公發。初調符離尉。改江寧府司理參軍，府尹王安禮一見，待以國士。移密縣令，辟川陝都茶司幹官。禮部侍郎周常帥越，辟爲山陰令，薦知東陽縣，轉朝奉郎。初，訓與蔡京同受業王安石之門，及京當國，太宰余深備道京願見之意，訓辭曰：「辛勤力學，粗立門戶，今老矣，榮除非所望，他日蹟足，豈能僕僕與諸公爲嶺嶠之行邪？」故終老常調。卒年八十三。所著《禮記解》二十卷、文集十卷。子公度。

公度 字元宏。歷福州觀察推官。薦除福建常平主管，精勤勾考，得失錢八十餘萬緡。會歲歉，八州艱糴，公度出入阡陌，勸富民散糴，民賴不饑。丞相趙鼎出鎮溫陵，一見，待以國士，遂薦於朝。轉奉議郎。時同年侍郎秦梓累稱公度學問於其兄檜，或勸公度往見，公度誦其父不見蔡京之言以謝之。轉承議

郎。通判潭州，攝府事，軍兵更戍，有以浮言動衆者，公度立召主將，誅首惡數人。太尉馬公、承宣使劉錫聞而嘆曰：「權府文臣，而指揮號令，摧折奸謀，殆若生長行伍者，真可服也。」自號玉峰居士。所著有《玉峰集》。

張巨 字國材。知諸暨縣，徙襄邑，以治最稱。擢秘書省正字，出爲京西轉運判官。徽宗聞其名，召對，首論紹述事，拜職方員外郎，改殿中侍御史。燕雲之役，巨將論劾童貫、蔡攸，爲攸所知，有旨不許上殿，坐是出知泰州，改吉水，移湖南轉運副使，召爲司勳郎中，除利州路計度轉運使，尋謫池陽。欽宗初立，復元官。

黃靜 字安仁。敷歷州縣，所至有聲。政和中，除福建提舉，值歲歉，極力賑救，又置常平倉於仙橋鎮，以濟艱食。請於朝，從之，遂出錢數千緡爲羅本。秩滿，乞祠。官至朝奉大夫。

蕭顗 字子莊。少孤，事母以孝聞，母喪，廬墓有靈芝之異。與李郁、陳彥、羅從彥同受業楊龜山之門。嘗答友人書云：「士之所志，舍仁義何爲哉？仁必欲熟，義必欲精。仁熟，則造次顗沛有所不違，義精，則利用安身而德崇矣。」後以累舉得官，爲清流簿，終歲而歸，徜徉閭里，朱松嘗師事之。

吳駿 字晞遠。齟齬知名，登進士，調上黨簿，薦知虔化縣，通判永州，以謗謫池陽。政和初，中丞吳執中抗章爲辯其枉，通判饒州。未幾，告老。所著有《詩解》二十卷、文集十卷，雄深雅健，粹然備衆體之長。

何去非 字正通。學問該博，有識度，累舉進士不第。元豐五年，神宗臨軒策士，曾鞏奏：「得累舉之士一人，所對論用兵之要，非通儒碩學不能。」神宗覽而異之，後數日，御集英殿賜第，乃得去非名，引卽



殿陛，問曰：「昔嘗游邊乎？」對曰：「臣生長閩粵，每恨未識邊防制度。」又問：「何以知兵？」對曰：「臣聞文武一道。古之儒者，未嘗不知兵。」神宗喜，顧大臣優與之官。或奏宜授武職，使効所言，因擬左班殿直。〔六〕，遷左侍禁中、武學教諭。使校兵法七書，書奏，復見褒賞。尋擢博士。元祐四年，蘇軾得其所爲文，驚曰：「此班、馬也。」力薦於朝曰：「臣伏見左侍禁何去非本以進士六舉到省，元豐五年以特奏名就御庭唱名。先帝見其所對策，詞理優贍，長於論兵，因問去非願與不願武臣官，去非不敢違聖意，遂除右班殿直、武學教授。後遷博士。今已八年。嘗見其所著述，材力有餘，識度高遠，其論歷代所以廢興成敗，皆出人意表，有補於世。去非雖喜論兵，然本儒者，不樂爲武吏。又其他文章，無施不宜。欲望聖慈特與換一文資。仍令充太學博士，以率勵學者，稍振文律，庶幾近古。若後不如所舉，臣等甘伏朝典。謹錄奏聞。」詔加承奉郎。歲餘，出爲徐州教授。秩滿，知富陽縣，政課最一。道改通判滄州，撫綏流民。除司農丞，懇求外補，改廬州通判，卒。有集二十卷、《備論》四卷、《司馬法講義》三卷、《三略講義》三卷。子遠，自號韓青老農，所撰有《春渚記聞》十卷。

劉毅 字剛中。調吉水尉，再調豐城丞，政聲籍甚。知南豐縣，裁抑橫恣稅官，稅官陰諷亡賴悉少劫甲伏庫，以逞宿憤，毅密知其謀，伏弩徒吏舍，至期盡爲執之。郡將怒稅官，將加罪，毅復力爲解，人多其德。量徙知龍泉縣。子汝舟。

汝舟 字元造。政和元年，鄉舉第一。次年，第進士，調興化軍司法。民有王姓者，饒貲，死，尚有遺腹，人乃以戶絕告。守委驗實，得貲三十萬，欲籍之。王氏之妻以遺腹訴，弗受也，汝舟執不可。既產得兒，又爲辯析，守怒，汝舟納告身，乞歸。建炎初，獻平戎十策於張浚，浚辟爲參謀官。而王氏遺腹兒名濟

者，後登紹興中第。

李充 字仲實。除真州司戶，知臨海縣。方臘爲亂，二浙州郡相繼陷沒，台守遁去，充與倅李景淵、羅音的、鑠、劇、壘，州城獲全。詔賜獎諭，轉知壽光。山東盜起，朝廷方事北方，充嘆曰：「張季鷹之動歸興，陶淵明之耻折腰，吾慕前人，固已晚矣！」遂賦歸。子穎士。

穎士 字茂特。調建昌教授，任處州刑曹，轉餘干丞。改知餘姚縣，高宗駕巡海上，倉卒之間，供億辦治，高宗加之。秩滿，通判紹興。除大理丞。在棘寺六年，平反尤多。除刑部郎中，言者以爲趙鼎黨，謫監慈利縣稅，聞命卽行。後除江西帥司參議，未及赴，卒。

練逢 字彥默。授撫州司戶，改劍浦令。再調本州推官，用薦改秩，卒。縣志稱其「孝尊於親，學傳於人，政得於民」。

李察 字亮卿。弱冠登進士，兩任教官。高宗南渡，以近臣薦，得旨賜對，進劄，首尾以自治爲急。卽日除御史臺主簿。遷監察御史。挺挺敢言，權倖斂跡。累乞外，紹興九年，出爲廣南西路提點刑獄，未幾，奉祠。

周武仲 字憲之。父某，仕至知廣德軍，公正豈弟，多陰德，事親以孝聞。武仲第進士，歷知浙川縣，遇事刃解，邑以大治。政和中，累薦擢監察御史。宣和二年，有言淮南連歲荒旱，饑民相食，常平使者坐視不救，徽宗大怒，詔武仲察訪賑濟。將行，武仲登對，陳八事，徽宗一一開允，及付中書執政，竟從其四而已，人或謂曰：「執政不盡用公疏，意可見已。」淮南監司、郡守，皆出權倖之門，諸凡財用，又多供應御前爲名，公其慎之。」武仲曰：「吾敢趣時顧避，愛一御史，輕兩路生靈哉？」卽檄監司州縣，問民疾苦，悉

推行所以賑濟者。宿守吳壽寧，聞武仲且至，令諸門毋納饑民，遂至城外僵屍縱橫，悉差公吏穴地藏之，第申境無饑民。真守蘇之悌，夜遣兵仗，逼饑民載之江中洲上，悉皆致死。二守並宦官腹心，專以進奉花石珍禽爲務，旁連漕使孫點，雄視江淮間。武仲並劾奏之，繇是官吏風靡，兩路民全活無數。而所劾二守，造爲飛語以動朝廷，遂有旨促疾赴闕，更不賑濟。使遣請對，閤門宦官怒之，沮抑百端，卽上章乞外補，除權知常州。會常州係高麗使經縣郡，守臣例賜對，徽宗因問淮南事，武仲從容陳之，徽宗乃悟，留武仲不行，除尚書比部員外郎。遷右司員外郎，假太常少卿，接伴大遼賀正旦使，時遼使耶律懷義、留嗣卿，皆猾虜也，武仲一見，開懷待之，然與語，未嘗有假借。舊例，國信私覲，皆售偽濫物，武仲悉用精好酬應，虜甚悅服。及對，徽宗褒賞再三，且諭以將來送伴，如有合理會事，可一一憑內侍奏來。武仲遲疑頃之，徽宗卽曰：「卿識鄧文誥否？」武仲徐奏云：「臣起疏賤，於今內臣中，無有半面之交者。」徽宗嗟嘆良久，使還，差殿試初考官。進士對策，間有言極切直者，有例欲指爲謗訕，取旨，武仲云：「今盜起東南，正國家求言之時，可加此名自吾儕始？」遂改「謗訕」二字爲「涉異」奏之。宰相王黼建應奉司，武仲知黼不可盡言，姑欲警以利害，造黼問焉，黼云：「比以中官領供應者不一，凡物既不可考覈，而騷擾已倍，故總以一司。」武仲曰：「相公不嫌以論道之任，下領有司，意則美矣，第恐外庭既行之，北司仍復干預，則用度將愈無算，而騷擾又倍前日，是使中官得爲辭，而相公獨受其弊也。」黼變色曰：「理或如此，然掌九式、九貢，正《周官》冢宰之職。」繇是不悅。是冬，復假太常少卿充賀大遼正旦國信使。還，覩河朔軍政不修，將士驕慢，因使畢賜對上疏論之，徽宗嘉納，賜五品服，擢侍御史。先是，王黼採武仲察訪淮南之譽，意欲援之，從班後，以其議論不附己，屢奏出爲河朔漕使，惟徽宗察武仲忠直，故任以言責。武仲數上章言事，

每對，款盡既退，徽宗常目送之，累欲擢爲諫議大夫，皆爲王黼所梗。四年冬，金國遣泛使來，更除顯謨閣待制充館伴副使，賜三品服，又差報聘，充國信使。先是，政和間，遣歸朝官趙良嗣繇海道使金，約共起兵攻遼，許其歲賂銀絹，以燕雲地來歸。至是，金人已盡併契丹故地，又西破雲中，而宣撫使童貫、蔡攸，出師纔至蘆溝，百萬之衆望風奔潰，金人遂據燕城，志愈驕悍，需索無厭，徽宗既怒貫、攸，且疑良嗣，故特命武仲。良嗣見武仲專使，懼察其奸，力請偕往，乃改差充副使。既至，見其酋長、諸貴人恃強背約，欲增歲賂，武仲言：「本朝與貴國初約云何？某受命而來，除許增二十萬銀絹之外，一疋一兩不敢輒專。」酋長、諸貴人大怒曰：「公不望歸邪？」武仲曰：「某持節出疆，以死報國，分也。若失辭而歸，將何面目見主上？」酋長、諸貴人拂袖起，遣介胄者數十，起坐隨武仲，聲言欲拘留之。武仲居旬餘，談笑如常。虜覘其終不可奪，因爲改館，遣其酋領來見，武仲譏之，虜無以應，但曰：「憑公再請。」還至雄州，童貫、蔡攸懼武仲人見發其誕謾，堅留之，惟令馳驛具奏，取朝廷指揮而已。武仲因上疏，歷言金國驕悍貪詐，前後違約之事，於是大忤王黼意。既而，承朝廷指揮，前議增二十萬銀絹，更不施行，令別以中國所出物計直百萬緡爲賂。報聘禮成，與其使楊璞、撒母等同至，進徽猷閣直學士，復差館伴。撒母好爲大言，一日出語尤不遜，武仲正色曰：「使者勿謂本朝昨蘆溝小失利，遂有輕心。堂堂大國，若遇倉猝，忠臣義士不爲無人。」虜又言：「國書內何不便稱大金皇帝尊號，及將雲中別作一事目？當奏改之。」武仲曰：「國書出自聖裁，一字不可移易。」撒母云：「如此，則將去不得。」武仲曰：「遣使報聘，此自是本朝使副將去，何預汝也？」當武仲與虜爭，聲聞館外，徽宗知之，屢諭王黼，令再報聘，黼多端沮抑，遂差盧益充國信使，以武仲充送伴使。還，除尚書刑部。當國信，結局同僚並轉三官，進職三等，武仲不爲王黼所悅，止還直學士而

己。徽宗素知武仲，每加任用，在刑部供職纔九日，擢御史中丞，特封文安縣開國男，食邑三百戶。人對，首舉臯陶戒舜屢省乃成之說，徽宗悟其旨，因稱武仲雄州所上疏，武仲奏曰：「今惟當修政事以待之耳。」徽宗深然之，武仲因疏論蘆溝致敗之繇，皆童貫、蔡攸不能節制諸軍，而屬官李宗振、統制王稟，其罪爲大，乞重加竄責。章三上，方施行。童貫歸自河朔，徽宗俾致仕。貫復用太師、豫國公名號遍檄陝西、河東經略司，武仲復劾奏之。其他朝政失當，論列無隱，徽宗亦言無不從。顧武仲所彈擊，皆將相權倖或其親密，雖宸眷益厚，怨仇實多。差殿試詳定官，除兼侍讀。上疏乞外，薦楊時自代，徽宗曰：「朕得卿來，聞所未聞，豈可輕去！」會復起童貫宣撫三路，貫偃蹇出不遜語，徽宗再三敦諭，乃曰：「臣昔平燕之時，不能取信於陛下，致使周武仲乘間攻臣。今若武仲仍任言路，臣終不能成功。」徽宗不得已，罷武仲御史中丞，以本官提舉亳州明道官。遇赦，得右文殿修撰。貫復誣奏武仲使虜時，與趙良嗣結爲死黨，及爲中司，無一言及之。徽宗重違貫意，復落職，黃州居住。欽宗登極，復官。高宗卽位，除吏部侍郎，疏言當以固結人心爲本計，艱難之際宜慎舉動，不可輕妄，高宗深然之，因宣取雄州之疏，徧示大臣，稱其有理。大駕南幸，扈從至揚州，擢刑部尚書兼侍讀。遷吏部尚書，時胡寇稍息，上下偷安。武仲請對，引《孟子》國家閑暇之言，請詔二府大臣條天下事，取其大且急者深謀熟講，果斷而力行之。高宗方虛心倚佇，而武仲謁告，不復趨朝矣。高宗謂大臣曰：「當今人才如周某者，未見其比。」降旨賜寬假將理，而武仲求去益堅。除龍圖閣學士，提舉江州太平觀。尋轉朝請大夫，致仕。尋卒，特贈官，予恩澤。武仲剛方端慤，粹雅疏通，識量過人，不爲事物遷動。其於經術，務究大旨。至諸子百家，莫不該洽。留心翰墨，得歐陽率得筆法。

葉常 字權之。舉進士甲科，授太學正，遷博士。大觀初，除太常博士，遷工部員外。累丐補外，出知河中府，卒於官，年四十六。常嘗與同里侍郎黃應圖交厚，後以職事相失經年，因作《燕燕詞》以遺之：「燕燕出幽谷，短羽方差池。營巢依廣厦，辛苦將芹泥。崇朝濕丹領，一點污羅衣。重幕護綺繡，方簾放珠璣。平時頡頏地，咫尺天一涯。雨露不上天，水覆收之誰？王、謝堂前物，肯作尋常飛。吾才愧相如，願賦《長門》詞。」應圖得詩甚喜，相好如初。有文集五十卷。

郭汝賢 字舜卿。居喪以孝聞。調連江尉，再調南安，知福清縣。當官不私，邑人信愛。宣和初，通判興化軍，權郡事，國清塘歲久不修，僱工增築，民賴其利。丁外艱，服除，知沙縣，廉明簡重，治績彰明。後知瓊州，黎蠻叛，殺掠居民，汝賢遣兵據要地，絕其往來，前後掩獲數百，降其酋豪，海上寧謐。以功增秩，主管台州崇道觀。卒年八十二。官至朝請大夫。

周固 字適可。崇寧四年釋褐第一。調蕭山尉，以薦改舒州教授。秩滿，調漳州。移江東提舉司管勾文字，有旨令兩制各舉所知三人，尚書曾孝廣以固應詔，丞相何執中當國，奏宜處師儒之任，除太學正。遷博士，除京畿提學，詔拜監察御史。擢辟雍司業，累章乞外，直秘閣，知沂州，未任，卒。固爲司業八載，經題品者皆爲名賢，龍圖祖秀實亦門下士。有《壁水集》十五卷。子因。因子春年。曾孫嗣武，嗣恭。

因 字與道。除閩縣主簿，改勅命所刪定官。通判鞏州，時朝廷建明堂天章閣，鳩材於鞏，童貫營第，欲先得之，因不可，貫諷監司移判洮州，因以事聞，朝廷直之，亟命還判憲州。累遷京西轉運副使。宣和中，春旱，汴流壅塞，朝廷欲決溧口伊洛二水以益汴，因奏：「洛民恃二水爲生，決之不能益汴什之一。」

乃請於河陰決黃流入汴，民亦不失二水之利。唐、鄧、汝、蔡四州增新稅，民間騷動，奏罷之。累遷荆湖南路轉運使，徽宗語溪洞事，對曰：「有邊事，邊臣之福。無邊事，朝廷之福。」時初得燕、薊，故因語及，徽宗爲之改容。除直徽猷閣，知桂州。安南貢方物，慮啓戎心，奏乞受其貢，禮遣其從人。瓊州民陳韜焚澄邁、臨高二縣，欲擅有海外四州，憲司議招降，力爭不得，後果再叛，因討平之。當中原失守，盜賊紛起，因帥桂林五年，嶺表帖然。官至中大夫，致仕。

春年 字春卿。以蔭補將仕郎。調象山簿，象山瀕海，多盜，每歲偵伺買舶，殺人而取其貨，春年籍其名，犯者皆置於辟。爲撫州軍判官，江西和買，例半常賦，疏其害於部使者，因檄差次裁損之，仍下其法於一路。改秩，知仙游。聽訟，盡人之情，剖決精審。歲饑，計口授粟，不足，請於郡，又檄鄰邑通糴，民賴以濟。嚴法繩盜，盜盡奔他境。通判道州。紹興末，令侍從各舉可爲郡守者，禮部侍郎金安節條上春年，未及用而終。

嗣武 字功甫。用蔭補官，調江山簿，任興國軍司理，<sup>(七)</sup>改丞臨川。廉介自將，能聲籍甚。歲饑，奸民嘯聚，發巨室廩，聲言欲攻縣。父老勸嗣武避之，嗣武曰：「毋動。」給榜勸富民出賑，皆散去。陞臨川令。歲復饑，分饑民於寺觀，粥之，仍籍富室，使各贍其鄉里。郡督賦急，嗣武每寬其罰。一日，守厲聲責之曰：「賦人不登，而屑屑理訟，豈口能吏？」嗣武曰：「朝廷設官置吏，所以爲民。不辨曲直，但峻催科，下官亦不敢謂能也。」以外臺薦，赴闕奏利民三事。擢太府丞，提舉江西常平事，除夔路運判。改湖北提刑，蠻獠爲亂，以渠陽去賊巢甚邇，亟奏令荆南合兵督捕。戮蠻首七人，撫其餘黨。以功進直敷文閣，遷度支郎。執政以嗣武使蜀，稽考財計。奏乞往成都、潼川兩路科買一年，以寬民力。又奏蠲興元茶息錢

引二十萬。又言：「蜀號天險，捨劍門無他路，近歲文州輒開青唐嶺，利州輒開馬道院，率別駕棧道以引商販，悉宜撤之。」除太府少卿、湖廣總領。召爲戶部侍郎，卒。

嗣恭 字作肅。以世賞補官，授安南尉，陞南雄州推官。知邵陽縣，累政積弊，一日剗剗，不數月，庭無留訟。部使上其績，幹辦諸司糧料院。遷籍田令。奏對，論民疾苦，皆里閭根本，朝廷未及知者。知荆門軍，得泰州。既退休逸老，疾革，忽大雨雷電，家人問：「怖乎？」攝衣危坐曰：「平生無欺心事。」言訖而逝。官至朝請郎。

〔校記〕

〔一〕「徐華老」，各本原作「李華老」，據夾注「鳳子」，下文嘉熙二年戊戌「徐華老」夾注「鳳子」及卷一百本傳改。

〔二〕「環慶」，各本原作「淮慶」，據「宋史·地理志」及本傳改。

〔三〕「仁」，當誤。

〔四〕「閣」字，各本原脫，據宋朝官制補。

〔五〕「戶至累百」，「宋史」本傳作「戶至累百」。

〔六〕「左班殿直」，下文蘇軾語作「右班殿直」。

〔七〕「興國軍」，各本原作「興軍國」，據「宋史·地理志」改。

〔八〕「既退休逸老」，各本原作「即退休逸老」，據下文「官至朝請郎」改。



# 閩書卷之一百

英舊志 縉紳

建寧府 浦城縣二 政和縣 松溪縣 壽寧縣二

浦城縣二

宋

有傳

章誼 潘中 楊喚 練繪 張彥 潘殖 張大年子次變、次高 黃緩 黃璘 祖秀實 黃烈 黃

衡 黃子游 徐詡 祖世英 徐驥 郭忠順子德麟 郭縝 徐應龍子榮叟、清叟 張彥清 徐鳳子華

老、華老。孫夢發。 真德秀 劉翔 張炳 楊孝定 徐宗慶

章誼 字宜叟。舉進士，補懷州司法參軍，歷漳、台二州教授、杭州通判。建炎初，陳通寇錢塘，城閉，部使檄誼聚七縣弓兵以張聲勢。會王淵討賊，誼隨淵得人城。賊平，旋加撫定。高宗幸臨安，苗、劉爲變，出御樓，「三」宰臣百執事咸任，人心恟恟。高宗問群臣曰：「今日之事何如？」浙西安撫司主管機宜文字時希孟輒曰：「乞問三軍。」誼越班斥曰：「問三軍何義？若將鼓亂耶？」希孟却立屏息，高宗嘉

之。事定，竄希孟吉陽軍，遷誼二秩，擢倉部員外郎。奉使二浙，貿易祠牒以濟軍用。以稽遲罷。未幾，召爲駕部員外郎。遷殿中侍御史，獻戰守四策，謂有江海，必資舟楫戰守之具；有險阻，必資郡縣防守之力；有兵將，必駕馭撫循，不可爲將帥自衛之資；有糧賦，必漕運轉輸，不可爲盜賊侵據之用。詔問保民、弭盜、遏寇、生財之策，誼對：「去奸貪殘虐之吏，則民可保；用循良廉平之吏，則盜可弭；得折衝禦侮之臣，則寇可遏；得掌財心計之臣，則財可生。凡此四者，在任人，不在任法。」詔集議明堂配享，胡直儒等請合祭天地，而以太祖、太宗配。誼言：「稽之經旨則未合，參之典故則未盡，施之事帝則未爲簡嚴。國家既以太祖配天於郊，比周之后稷，則太宗宜配帝於明堂，以比周之文王。」紹興二年，除大理卿。宰相奏知平江府，高宗曰：「誼，儒者，賴其奏職平恕，使民不冤，勿令補外。」尋除權吏部侍郎。改刑部侍郎，兼詳定一司勅令，遷徽猷閣直學士、樞密都承旨。四年，金遣李永壽、王翊來求還劉豫之俘，及西北人在東南者，又欲畫江以益劉豫。時議難之，欲遣大臣爲報使。參政席益以母老辭，薦誼爲代，高宗曰：「誼母亦老，朕當自諭之。」誼聞命，略無難色，遂加龍圖閣學士，充軍前奉表通問使，給事中孫近副之。誼至雲中，與粘罕、兀室論事，不少屈，金人諭亟還，誼曰：「萬里叩命，兼迎兩宮，必俟得請。」金人乃令蕭慶授書，并以風聞事責誼。誼詰其所自，金人以實告，乃還。至南京，劉豫留之，以計得歸，高宗嘉勞。初，誼使金，戒其家人勿使母知。將行，告母曰：「是行，不數月即歸，大似往年太學謁告時爾。」至是還，母不知誼使金也。擢刑部尚書。冬，高宗親征，王師大捷於淮陰，誼扈從。還臨安，遷戶部尚書。五年，以疾請郡，除龍圖閣學士，知温州。適歲大旱，斗米千錢，誼用劉晏招商之法，置場增直以糴，米商輻輳，其價自平。部使者以狀聞，詔遷官一等。六年，移守平江。時將臨幸，供億繁夥，誼處分悉當。召對，賜帶笏，

高宗曰：「不足償卿，可毋謝。」明年，移蹕建康，復爲戶部尚書，奏言營田之策。七年，帝還臨安，以爲端明殿學士、江南東路安撫大使，知建康府，兼行宮留守。未幾，提舉亳州明道宮。代還，卒，謚忠恪。誼，寬厚長者，爲臺官言事持人體，立朝奏疏無慮數十百篇，皆經國濟時之策。

潘中 字民極。靖康初知長溪縣，天旱禱雨，爲文自責。徽、欽北狩，詔下，嗚咽流涕，觀者哀慟。翼日，作詩五章遺友孫伯虎，以泄忠憤。建寇葉儂犯叛，中慮其迫境，團結民兵，號忠義社，以備之。明年，賊勢益張，寧德令遺書報急，中率兵夜赴，控扼於白鶴嶺，賊却去。又烏合千餘，迎戰鹽田之麓，陷陣被執。賊脅使降，叱之曰：「汝輩狗奴，縣官皆衣食汝，何負汝？」作反，害我百姓，恨不斬汝萬段，肯俱生耶？」遂被殺，其身僵立，久之乃仆。及暮，有見其馳馬，僕從如蟻，歸邸舍中。事聞，詔贈朝請大夫，官二子。

楊喚 字元暉。舉進士，調鍾離簿，進《中臺甘露頌》，改郴州司錄。還朝，復進所業二十卷，徽宗奇其才，擢知太寧監。上殿稱旨，除主管官告院。以朝奉大夫出知蘄州。有文集三十卷、《宦游集》十卷。

練繪 字質夫。少與楊龜山游程伊川之門，伊川甚器之。浮沉州縣，不榮軒冕，而樂名教。官至朝奉議郎。

張彖 字正仲。調建昌簿，改南昌、弋陽二邑丞。靖康中，翁彥國自錢塘舉師勤王，辟參贊軍事。聞彥國與趙子松等會盟於宿、亳，登壇爭敵，彖以書苦諫曰：「淵聖駐危城中，宗社若綴旒。臣子當百舍一息，豈爭盟競長之時？漢末曹、袁故轍可復蹈耶？」彥國弗能用，遂不往。紹興初，知海陽縣，時當軍興，賦斂百出，彖與民約，必無追擾，軍需亦如期而集。曾孝蘊帥湖南，辟知武岡軍，命未下，卒。彖工駢儷之

文，孫觀嘗薦於當路，不獲用，多謝啟云：「魯箭高飛，謂聊城之必下；秦都不割，懷趙璧以空歸。」有《雙溪漫叟集》二十卷、《松窗撫遺》十一卷。

潘殖 字子醇。建炎中，以累舉除官，調真州推官。初好王氏學，後悟其非，「四」用力克己，至忘寢食，久之有得，於是述《忘筌書》五卷、性理書九篇，自號《浩然子》。劉勉之、胡憲、劉子輩皆喜其書。子輩跋其後，稱其得學《易》門戶於《易》之復。又嘗畫為《觀象》、《玄契》一圖，大抵以背境回光為主。

張大年 補臨朐尉，遷鍾離丞，知萍鄉縣。時虜騎深入江浙，群盜蠭起。萍鄉為江湖要會，大年日閱民伍，教以兵法，聲聞四境，盜不敢入。直徽猷閣周因帥廣西，聞之，辟為經略司幹官。會營道蠻獠率眾僭號，所在深嶮，官兵不能捕，帥司以屬大年。大年分據要害，持久以困之，賊眾果以饑潰。海寇陳韜等出沒，為二廣患，帥司復奏大年通判瓊州討之。韜聞大年威略，率眾來降。加秩二等，倅道州。後知韶州。子次夔、次高。

次夔 字和仲。以蔭補官福州理掾，部使者攝州事，以私意撓獄，堅持不可，使者不能奪。遷西安令。通判興國軍，郡多私鑄大冶，太守任幕官捕治峻急，擾及平民，次夔力言其不便。已而，群盜嘯聚湖島，諸司體訪得實，守幕皆坐罷，次夔以此知名。後奉祠，里居，適歲小歉，查洞源凶黨倡亂，聲震遠近，請邑宰俾遣弓兵掩捕，宰不經意，乃馳報府為備，府檄次夔糾集鄉民之材武者禦之，斬獲數級，賊退，鄉人為建祠立碑。

次高 字寬夫。以父蔭補官，任東莞尉。丁憂，服闋，調尉長溪。以獲賊功，知建昌縣。督造軍器，前期辦集，進秩一等，通直郎、南雄州倅。有論薦者，欲內遷，以母老辭。知南劍州，興學賑貧。轉朝奉

郎，辭，諭州縣科罰苦民事，孝宗曰：「聞州縣詞訟，時有科罰，且犯罪有條，豈應以是生財？卿當爲朕勤恤民隱，簿書、獄訟次之。」既到官，治績爲諸郡最，擢守徽州。丁母憂，既除，知邕州。歷講馬政，又乞減放廣東路丁米，孝宗俞其請，且曰：「廣東去朝廷遠，卿當以便宜從事，應邊防機密文字，可實封徑達。」次高頓首謝。徽外蠻蜚，接境交爭，次高視事三日，卽單騎渡江面慰撫之，於是盡得良馬。留邊甚久，夷俗甚安，馬亦溢額。朝廷方欲召用，以疾上章丐祠。命未下，卒。官至朝奉大夫。

黃緩 字用和。從楊龜山學，甚見器重。及爲工曹，守將高其才，多委以事。適諸邑大水，按視官希部使者，多不以實聞。緩獨減放，蠲田租十之八。使者怒，緩占答詳雅，卒如初請。再調西安丞。靖康初，李綱宣撫河東，辟幕屬。高宗朝，拜監察御史。首陳七事，深蒙嘉納。一日，問孟子與齊、梁國君問答之說，緩對，詞義敷暢，高宗曰：「卿可謂『非堯舜之道，不陳王前』。」因諭曰：「黃緩論人君治心事甚詳，當處以諫職。」會有沮之者，除江西提點刑獄。力求奉祠，卒。緩在臺越月，風節凜然，縉紳推賢，天下誦貞。有《奏議雜著》、《論語類觀》、《唐史篤論》共二十卷。

黃璘 字邦美。幼孤，嗜學。初除分水丞，改密州教官，再丞拱州、襄邑。靖康元年，金人犯闕，分兵襲拱州。城陷，太守死焉。虜據州治，驅迫郡縣吏，使爲鄉道。一郡風靡，獨璘移病不出。賊促行，急赴井而死。璘之死也，吏得故棺以殮。槨葬數月，其弟至，發棺視之，蓋有大書曰：「異日諸弟來，煩舉葬於先塋之側。」驗乃璘筆。建炎初，搜訪死節之士，或言璘姓名事實。詔贈朝奉郎，官其弟子之爲璘後者。

祖秀實 字去華。宣和二年釋褐狀元，授承事郎、國子博士。靖康之難，虜酋索米於太學，秀實叱之，酋擊以劍，絕，復甦。高宗聞其名，召拜禮部郎。既至，遷左司郎中、中書舍人。駐蹕維揚，臨安，及幸

會稽，皆使扈從。每贊張浚爲恢復計。時議主和，力求補外。以直龍圖閣出爲福建轉運使。害民之事，一切釐革。移廣東提刑，專以修教化、勵名節爲務。復以母老請祠。知泉州，未赴，丁母憂。居喪，不茹葷，不入寢室。張浚判福州，賻之百金，泣辭之。服除，知衢州。尋除禮部侍郎，辭歸而卒。

黃烈 字元功。宣和間守處州。時方臘盜發，麗水、松陽、遂昌、青田皆歿於賊，而龍泉獨完。烈奉詔卽龍泉治事，奮勇宣力，區畫得宜，賊將洪載遂以處降。烈遂與通守會稽石端中城，處城處民賴之。

黃衡 字平國。試南省第一，爲安福令。郡守呂源，方六月欲修城壁。衡以書諫止，謂：「廬陵諸邑，累困兵馬，加之亢旱，豈堪重役？」郡守得書，劾之。朝廷下憲司禮覈，得實，守因罷去，衡得福州教官。〔五〕未幾，用丞相趙鼎、參政孟庾薦，首試館職，除秘書省正字，遷校書郎。累乞補，得邵武軍倅。至家，卒。

黃子游 字叔偃。政和中，自倉部郎中知池州。檢察六邑歲籍，惟青陽稅偏，惻然曰：「皆池民也，相懸乃爾！」求弊所從始，與民之久阨不伸者，歸覲奏之，有旨悉蠲削如五邑例。命下之日，閭閻頌舞，祠而碑之。

徐詡 字元敏。父彭年，號散翁。詡舉進士，調會稽簿、上元丞，薦陞龍泉令。所歷三邑，政績彰著。召對，授監察御史，隨上六事，皆時政急務。適容寇李接竊發，以詡提點江西刑獄，權漕事，應辦軍需。賊平，除成都路轉運判官，移知遂寧府。樽節鹽引，爲民代租，捐公帑以置學田，出俸金以葺學宮，一時士風爲之振起。後有旨知泉州，至上饒，改除江東漕。被命次日，卒。有《東野居士集》四十卷。

祖世英 字穎仲。年十七，領鄉薦。紹興三年，擢進士。張魏公總戎金陵，留置幕下。調貴池簿。

教授衡州，講學勸課，尊胡瑗學規，以淑多士。改知南昌縣，鋤奸蠹，立條教，不以吏迫民，不以獄委吏。年饑，散常平米數萬賑濟，區畫有條。通判融州，薦知容州，遷承議郎。卒之日，宅無一區，產無十金。

徐驥 字士龍。刻意問學。居太學時，二帝北狩，上書行在所，朝奏暮召，會有沮之者，卒不用其言。太學初興，就試者萬人，驥遂冠多士。丞相秦檜邀與其弟游，辭不就。以疾請祠，授吏部架閣，卒於官。

郭忠順 字移可。以蔭得官，主程鄉簿。改連江，丞南康，知襄陽縣。金虜寇邊，荆、鄂兩軍戍唐、鄧，忠順餽運二十六萬斛，諸司交章論薦。改奉化令，以禮待士，以寬撫民，以法束吏，而尤崇重學校，士人愛之。通判太平州，未赴，卒。忠順博聞強記，與張九成游。子德麟。

德麟 字邦瑞，一字應之。注侯官尉，調信陽，爲荆南錄參。有強盜數十人，帥欲盡置於法，德麟爭力，帥深器之。知奉化縣，父所宰邑也，士民爲立二郭生祠。除勅令所刪定官，歷軍器、司農、太府三丞。使虜歸，奏虜事甚悉。除監察御史，建言：「乞肅清官闈，嚴內侍人官之制。」除宗正少卿，人對，孝宗問：「福建旱荒如何？」德麟奏：「常平已議賑恤，不足煩聖慮。控扼邊防諸帥皆未除授，此係朝廷輕重，願早加意。」不數月，卒官。有《奏議》二卷、《北征錄》二卷、《文稿》五卷。

郭績舊作緒 字天錫。將生之夕，母夢天上有金書數大字，既覺，止記「績」字，既生，因以名之。幼而岐嶷，讀書如素習。晚調上杭簿，留意邵雍象數之學，兼取揚雄所據《列山易》，以章會《統元》推之，久而成書，名《易春秋按圖布卦》，計二十萬言，釐爲二十卷，總之以圖。隆興紀元，以其書上，方議推恩，而卒。

徐應龍 字亢叔。累調湖憲司檢法官，與提刑盧彥德爭劫盜獄，獄盜獲生。改知高安縣，呂祖儉以言事忤韓侂冑，謫死，經紀其喪，爲文誄之。有勸之避禍者，應龍曰：「呂，吾所敬，緣此譴死，無所恨。」遷知南恩州，秩滿，陳自強當國，故與應龍同舍，欲留之，應龍不答，丐雷州而去。部使者交章上最，召監行在都進奏院。累遷國子祭酒，兼崇政殿說書。天旱，上言：「請烹桑弘羊，乃雨。」除秘書監，累遷刑部尚書，兼侍讀，屢指陳時政。一日，讀吳起爲吮疽事，奏曰：「起卒如此，故能得其死力。今將軍得以賄遷，專事剖剋，安望濟乎？」理宗驚曰：「憤帥之風，猶未除耶？」宰相史彌遠聞而惡之，改兼太子詹事。力乞奉祠。逮歸，奏乞立皇子曰：「高宗謂太祖艱難得居天下，而子孫不得居天位，遂以孝宗繼大統，三傳至陛下，皆太祖子孫。今陛下當於太祖位擇人。」徙吏部尚書，以煥章閣學士提舉嵩山崇福宮。卒，贈開府儀同三司，謚文肅，累贈太師、魏國公。子榮叟、清叟。

榮叟 字茂翁。歷永康令，以賑饑得民心，召爲太學博士，兼崇政殿說書。嘉熙中，繇左司諫拜右諫議大夫，人對，言：「內而京師，楮幣不通，物價倍長，米運多阻，粒食孔艱；外而郡邑，苛征橫斂，無所不有，嚴刑峻罪，靡所不施。甚者，巨室武斷鄉閭，豪宗侵凌民庶，此皆民怨所繇。」又言：「朝廷當以節義勵士夫，則緩急必無求生害仁之事。」遷權禮部尚書，兼吏部，拜端明殿學士，簽書樞密院事。淳祐二年，參知政事。李韶與宰相議不合，求去。榮叟發憤曰：「韶議論無阿朝廷，如此士夫絕少，安可去耶？」宰相卿之，力求與俱。除資政殿學士，提舉洞霄宮，致仕。卒，贈金紫光祿大夫，謚文靖。所著有《緝熙講議》、《諫垣存稿》、《西掖代言》、《南宮表箋》、《橘坡雜著》。

清叟 字直翁。調太平教授，虜犯宣化，制司令州禁采石渡，清叟曰：「虜今未至，奈何先自推赤子



魚腹中？」守從之，淮民得渡者三萬餘。紹定初，遷籍田令，應詔抗章，乞爲濟王置後。遷太常博士，復請厚人倫以釋群惑，惜名器以示正義，因人望而進人材，蓋欲復濟王爵邑，抑史彌遠恤典，召用真德秀、魏了翁也。端平二年，除殿中侍御史，疏論三漸，尤爲痛激。改太常少卿，兼戶部侍郎，改工部，除廣西經略，福建安撫。福州饑，貸南劍常平米七千石，旁招廣、浙米詣諸利，賑饑全活甚衆。累遷端明殿學士、簽書樞密院事、參知政事。余玠專制全蜀，理宗欲召還之，未決。清叟請理宗出不意徑召之，且奏：「玠素失士心，召之必不敢不來。」理宗遂召玠，遣余晦代之。制下，清叟復奏：「晦素無行誼，不堪重任，乞收回成命。」理宗不聽，清叟乞罷政，不許，竟不押晦誥勅。寶祐三年，令民自實田畝，清叟爭曰：「此秦法，不可用，福建、二廣、湖北尤當少寬。」既而，江浙民多不便，理宗竟不果行。尋以大資奉祠。開慶初，召提舉祐神觀，兼侍讀，出知泉州。景定中，致仕。卒，贈少師，謚忠簡。清叟與其父兄皆以品節相尚，立朝風采著於班行之間。獨其劾罷袁甫，少貶於公論。

張彥清 字叔澄。紹熙元年進士。初主光澤簿，教授泉州，丞安福，用薦者改秩，知慶元縣。彥清生紹興之季，長於乾道、淳熙間，初從朱文公游，得其大旨。及仕光澤，與隱君子李公呂游，質疑辨惑，造詣日深。其爲人以孝友忠信爲本根，潔廉勁挺爲質幹。親蚤沒，恨養弗逮，不茹甘服美者終其身。女兄未嫁，捐所有資之，一簪不自留。少從鄉先生徐君翺學，徐喜其開敏，欲妻以女，未及而死，既與薦，有富室將女之，彥清曰：「忍負徐公？」仕雖久，家亡旬月儲，歲莫貧且迫，里人有欲餉之者，曰：「得錢固所欲，然非吾本心。」卒不受。嘗被檄試十三山，時「偽學」方譁，同列以是發策，士子希主司意，爭詆訾先儒。彥清獨取持議不阿者與其選，帥謂彥清有守，歎重之。陳丞相自強嘗校文於建，彥清其所取士也，及爲僚昭

武，老矣，無刮目者，彥清獨謹事之，陳去而驟貴，銳欲鉤致彥清，彥清弗屑。陳語人曰：「張叔澄太彊項，不可收拾。」親故或以尤彥清，及陳敗，始歎服。其施之政，則自始仕，以勤民爲心，慎於治獄，不受誘休。汀有疑獄屢變，彥清被臬司命往鞠。未至一舍所，微服徒行，訪得其冤狀。至獄，破械將釋之，吏爭不可，弗聽。巡尉及初鞠官懼得失人罰，則以希賞詆彥清，彥清不顧。未幾，真殺人者獲於他邑，彥清亦絕口弗自言。吉安峒蠻竊發，燬永新，蹂龍泉，距縣不百里。彥清佐其長，聚兵防之，蠻訶知有備，引去。俄傳寇且至，同僚有懷印欲遁者，彥清曰：「寇來否未可知，吾曹一搖足，亂先至矣。」肩輿秉炬徧諭居人，俾勿動，而傳者果妄。郡檄彥清行視永新，既至，見餓民纍纍，請加賑恤，未報，而命彥清督其租。彥清歎曰：「此豈催科時耶？」以諗於州，於提點刑獄，得勿督。民逋酒息錢十萬，械擊至死不能償，白弛其負，皆見聽。臨川有獄久不能決，前鞠者既得其情，囚黠甚，使者臨問，則窒耳以紙，陽若不聞者，數問，則指其耳，使者疑且怒，以覆訊委彥清，移書郡幕，俾諭意：「苟活囚，將薦之。」彥清平心淑問，如鞠報，囚竟伏辜。晚，宰鴈元甫至，而目青作，然兩造在庭，猶諱之至前，兒女語之，人人得吐情實，吏束手不能欺誅髮。以疾請，主管台州崇道觀。

徐鳳 字子儀。舉進士，主漳浦簿，未上，服所生父心喪。祖母年餘八十，請監南嶽廟以養祖母。卒承重服。服除，教授溫州。時年方三十餘，渾然端且重。楊慈湖簡謂其可與語道。秩滿，得國子監司庫官，除吏部架閣，又除太學錄，遷武學博士。召試，除正字。未幾，兼翰林權直，遷校書郎，又爲郎秘書，內直如故。以疾請，主管華州雲臺觀。居數月，起知荆門軍，未對，留爲宗正丞，兼司封郎官。俄兼學士院權直，遷將作少監，權直院事，兼尚右郎官、玉牒所檢討，兼國史院編修、實錄院檢討，遷秘書少監。以疾

請外，直顯謨閣、知贛州。疾革，請致仕，直寶文閣，進一秩序，卒。所著《內制》十卷、《十箴》一卷、文集二十卷。鳳凱樂和易，蘭郁玉溫。浦城自楊億首居翰苑，以文章妙天下，鳳文與相差亞。乃其所作《十箴》，上自人主以及官掖，下至公卿大夫，規切略徧。其巖然山峙，見重朝廷，一時稱鳳不以文而以節。其始爲太學錄，時浮光虜退，或謂其國有內變，且力弗支，鳳因對言：「善爲國者，不以敵至而懼，敵去而喜。犬羊之性，情偽難測。遠巡示弱，安知非見羸以誘我？恭順請和，安知非遷延以款我？」及爲學士，寧宗給筆札，玉堂之廬，俾言時政。時山東諸豪新有功，未見跋扈狀，鳳言：「蓄毒所以攻疾，而施之常服，則元氣必傷。虎不縱之山林，而豢之家庭，久將噬人矣。諸葛亮曰：『民困兵疲，事不得息，則住與行勞費等爾。』今忠義之徒，官供家請，誠不可已，盍亦鼓舞歆動之，俾常以逐北爲利，而不復懷巢南之安，則責望於我者輕矣。否則，亟行賈誼衆建諸侯之策，爲置部落而少其力。力少，則易使以義，黨與散，則無邪心。」他所箴砭時病甚多。後六七年，李全執制置使殺之，又五六年，稱兵反，死揚州，鳳言盡驗，於是論者又謂鳳之有治才也。弟鳳、鸞，俱有文名。鳳，仕翰林侍講。鸞，中書舍人。子莘老、華老。孫夢發。(六)

莘老 用蔭補官，調長洲簿。以廉能薦，就陞爲令，累遷禮部尚書。遇事剖判有條，朝廷有所疑問，直對無隱。

華老 工文辭。累官朝散大夫、秘書丞。平生公勤著稱，遷國子司業，以疾辭，不拜。

夢發 累官朝議大夫、廣東招捕使。居官二十八年，平恕仁慈，未嘗一息忘忠孝。討捕所至，靡不望風來附。元兵南下，夢發守仙霞，襲兵猝至，左右皆潰，夢發踞坐大詬，遂遇害。唆都聞之，誅其害夢發者。

數人，特舉其子歲，授以平安軍同知。

真德秀 字景元，後更爲景希。舉進士，授南劍州判官。繼試中博學宏詞科，入閩帥幕。召爲太學正。嘉定元年，遷博士，時韓侂胄已誅，人對，言：「侂胄自知不爲清議所貸，至誠憂國之士則名以『好異』，於是忠良之士斥；正心誠意之學則誣以『好名』，於是『偽學』之論興。今日改弦更張，正當褒崇名節，明示好尚。」召試學士院，改秘書省正字，兼檢討玉牒。二年，遷秘書郎，尋兼沂王府教授、學士院權直。三年，遷秘書郎。人對，乞開公道，窒旁蹊，以抑小人道長之漸，選良牧，勵戰士，以抑群盜方張之銳。四年，選著作佐郎。宰相將用之，見觝言官，遂力辭。兼禮部郎。五年，遷軍器少監，升權直。六年，遷起居舍人，奏：「權奸擅政十有四年。朱熹、彭龜年以抗論逐，呂祖儉、周端朝以上書斥，當時近臣猶有爭者。其後呂祖泰之貶，非惟近臣莫敢言，而臺諫且出力濟之。則嘉泰之失，已深於慶元矣。更化之初，群賢皆得自奮。未幾，傅伯成、蔡幼學、〔七〕鄒應龍、許奕諸臣相繼以論事去，繇是人務自全，一辭不措。設有大安危、大利害，豈不殆哉？今欲與陛下言勤訪問、廣謀議、明黜陟三者而已。」兼太常少卿，充金國賀登位使，及盱眙，聞金人內變而還，言於朝曰：「臣自揚之楚，自楚之盱眙，沃壤無際，陂湖相連，民皆堅悍強忍，此天賜吾國以屏障大江，使強兵足食爲進取資。顧田疇不開，溝洫不治，險要不扼，丁壯不練，豪傑武勇不收拾，一旦有警，則徒以長江爲恃，豈如及今大修墾田之政，專爲一司領之，數年之後，積儲充實？邊民父子爭欲自保，因其什伍，勒以兵法，不待糧餉，皆爲精兵。」又舉邊防要事上言。時史彌遠方以爵祿縻天下士，德秀慨然謂劉燾曰：「吾徒須急引去，使廟堂知世亦有不肯爲從官之人。」遂力請外，出爲秘閣修撰、江東轉運副使。山東盜起，朝廷猶與金通聘，德秀朝辭，奏：「國耻不可忘，鄰盜不可輕，

幸安之謀不可恃，導諛之言不可聽，至公之論不可忽。」寧宗曰：「卿力有餘，到江東日爲朕樽節財計，以助邊用。」江東旱蝗，廣德、太平爲甚，德秀遂與留守、憲司分所部九郡，大講荒政，而自領廣德、太平。親至廣德，與太守魏峴同以便宜發廩，使教授林庠賑給。竣事而還，百姓數千人送之郊外，指道旁叢塚泣曰：「此皆往歲餓死者。」微公，我輩已相隨入此矣！」以右文殿修撰知泉州。番舶畏苛征，至者歲不三四，德秀首寬之，至者驟增至三十六艘。輸租令民自概，聽訟惟揭示姓名，聽人自詣。海賊作亂，將逼城，官軍敗衄，德秀祭兵死者，乃親授方略，擒之。復徧行海濱，審視形勢，增屯要害。十二年，以集英殿修撰知隆興府，承寬弛之後，稍濟以嚴，尤留意軍政。以母喪歸。十五年，以寶謨閣待制、湖南安撫使知潭州，用「廉仁公勤」四字勵僚屬，以周敦頤、胡安國、朱熹、張栻學術源流勉其士。罷權酷，除斛面米，申免和糴，立惠民倉、慈幼倉、社倉，以甦其民。月試諸軍射，捐其回易之利，及官田租。凡營中病者，死未葬者，孕者、嫁娶者，贍給有差。理宗卽位，召爲中書舍人。尋擢禮部侍郎，直學士院。人見，奏：「三綱五常，扶持宇宙之棟幹，莫安生民之柱石。我朝立國，先正名分。陛下不幸處人倫之變，流聞四方，所損非淺。雪川之變，非濟王本意，前有避匿之跡，後聞討捕之謀，情狀本末，燭然可考。願討論雍熙追封秦邸故事，濟王未有子息，亦惟陛下興滅繼絕。」理宗曰：「朝廷待濟王亦至也。」德秀曰：「人主當以二帝三王爲師，觀舜之所以處象，則陛下不及明甚。」理宗曰：「一時倉卒耳。」德秀曰：「此已往之咎，惟願陛下知有此失，而益講學進德。」次言：「雪川之獄，未聞參聽於公朝。淮、蜀二閩，乃出於僉論所期之外。天下之事，非一家之私，何惜不與衆共之？」且言：「乾道、淳熙間，有位於朝者，以饋及門爲耻；受任於外者，以苞苴入都爲羞。今餽賂公行，薰染成風，恬不知怪。」又疏言：「朝廷之上，敏銳之士多於老成，雖嘗以耆艾

褒傳伯成、楊簡，以儒學褒柴中行，以恬退用趙蕃、劉宰，至忠亮敢言如陳宓、徐僑，皆未蒙錄用。」理宗問廉吏，德秀以知袁州趙鉞夫對，御親擢鉞夫直秘閣爲監司。具手劄入謝，因言崔與之帥蜀、楊長孺帥閩，皆有廉聲，乞廣加咨訪。理宗初御清暑殿，因侍經筵，進曰：「此高、孝二祖儲神籙間之地，（八）仰瞻楹桷，當如二祖實臨其上。惟學可以明此心，惟敬可以存此心，惟親君子可以維持此心。」因極陳古者居喪之法，與先帝視朝之勤。寧宗小祥，詔群臣服純吉，德秀爭之曰：「自漢文帝率情變古，惟我孝宗方衰服三年，朝衣朝冠皆以大布，惜當時不併定臣下執喪之禮，此千載無窮之憾。孝宗崩，從臣羅點等議令群臣易月之後未釋衰服，惟朝會治事權用黑帶公服，時序仍臨慰，至大祥始除。侂冑柄政，始以小祥從吉，且帶不以金，鞋不以紅，佩不以魚，鞍轡不以文繡，此於群臣何損？朝儀何傷？」議遂格。德秀屢進鯁言，理宗皆虛心開納，而彌遠益嚴憚之，謀所以相撼，畏公議未敢發。給事中王堅、盛章始駁德秀所主濟王贈典，繼而殿中侍御史黃澤劾之，遂以煥章閣待制提舉玉隆宮。諫議大夫朱端常又劾之，落職罷祠。監察御史梁成大又劾之，請加竄殛。理宗曰：「仲尼不爲己甚。」乃止。既歸，修《讀書記》，語門人曰：「此人君爲治之門，如有用我者，執此以往。」紹定四年，改職與祠。五年，進徽猷閣，再知泉州。迎者塞路，深村百歲老人亦扶杖出，城中歡聲動地。諸邑二稅嘗豫借至六七年，德秀入境，首禁之。諸邑有累月不解一錢者，郡計赤立不可爲，或咎寬恤太驟，德秀謂民困如此，寧身代其苦。決訟，自卯至申未已，曰：「郡邑凋弊，僅有政平訟理可以惠民。」建炎初，置南外宗正司於泉中，公族僅三百人而已，至德秀時，增至二千三百餘人，郡俸緡半出於鑿空，德秀請於朝，增給度牒以足之。彌遠薨，理宗親政，以顯謨閣待制知福州。戒所部無濫刑橫斂，無徇私贖貨，罷市令司，曰：「物同則價同，寧有公私之異？」閩縣里正苦督賦，革之。屬

縣苦貴糴，便宜發賑。海寇縱橫，次第擒殄。召爲戶部尚書，人見，理宗迎謂曰：「卿去國一年，每切思賢。」德秀以《大學衍義》進，復陳祈天永命之說，謂：「敬者，德之聚。儀狄之酒，南威之色，盤游弋射之娛，禽獸狗馬之玩，有一於茲，皆足害敬。」理宗欣然嘉納，改翰林學士，知制誥，時政多所論建。踰年，知貢舉。已，得疾，拜參知政事，同編修勅令，《經武要略》。三乞祠祿，理宗不得已，進資政殿學士，提舉萬壽觀，兼侍讀，辭。疾亟，冠帶起坐，迄謝事，猶神爽不亂。遺表聞，理宗震悼，輟朝，贈銀青光祿大夫。德秀長身廣額，容貌如玉，望之者無不以公輔望之。立朝不滿十年，奏疏無慮數十萬言，皆切當世要務。四方人士誦其文，想見其風采。及宦游所至，惠政深洽，不媿其言，縣是中外交誦。都城人時驚傳，傾河奔擁出關曰：「真直院至矣！」果至，則又填塞聚觀。時相益以此忌之，輒擯不用。自侂冑立偽學之名以錮善類，凡近世大儒之書顯被禁絕。德秀晚出，獨慨然以斯文自任，講習服行。黨禁既開，而正學遂明於天下。所著《西山甲乙稿》、《對越甲乙集》、《經筵講義》、《端平廟議》、《翰林詞草四六》、《獻忠集》、《江東救荒錄》、《清源雜志》、《星沙集志》。既薨，理宗思之不置，謚曰文忠。皇朝正統間，從祀孔子廟庭。成化三年，追封浦城伯。嘉靖八年，去孔子王號，以「尊師德秀」稱真子。子志道，戶部侍郎。

劉翔 字圖南。通諸經，尤注意於《易》。以累舉得官，調蘄春尉。因上其所著《易卦辭》，有旨看詳監學，以通經旨聞。授福州教授，蒞政初，謂：「教官實風化所係，要當上不負天子，次不負州郡，下不負子弟入學之意。」在官軒輊抑揚，盡合公論。再任潭州教授，多士歸心。卒於官。有《經進易解》十卷，翰林洪邁爲之序。

張炳 字叔明。少有奇疾，在太學師事蜀士史載之，極醫方之妙。及歸鄉里，推心救物，無論貴賤貧

富，有謁必往視之。嗜學能文，老而不倦。同郡魏掞之嘗稱爲「太古遺民」。歷蘄水縣簿、澧州錄事參軍，卒年九十一。

楊孝定 字仁靜。以外祖蔭補官，調全椒丞，轉邵武錄參，擢靖安令，歷知銅陵、弋陽二縣。民有兄弟訟財，孝定降階執手泣，諭之曰：「以財物之微，傷手足之愛，同氣連枝，義如是耶？」言已，又泣曰：「此皆當職不能以德化民，致若輩至是！」爭者感泣退，不復訟。孝定事母至孝，母卒，廬墓終喪，鄉閭稱之。

徐宗慶 善議論，通經史，所著有《皇王大訓》、《經世明道》二書。《皇王大訓》以載古今帝王之道，與爲治之具。《經世明道集》則明聖賢之道之載諸言者。嘗辟教官以卒。

元

鄭旼 張寧 祖浩然

鄭旼 字德華。歷翰林國史院檢討。至正中，爲福建行中書省左丞。醞藉儒雅，巡歷所至，興學勸士。

張寧 字貴安。爲政和、福清二縣尹，政聲著聞。

祖浩然 字養吾。至元二十年，建安、政和有黃華之亂，朝廷命官軍來討，未至，盜已就縛，回軍浦城，掠人子女以歸，浩然母全氏遭掠北去，是時浩然年六歲，母子相失，不通聞問者，二十又八年。至大間，福建閩府檄浩然爲三山書院山長，將之任，或告之曰：「而母在河南，而不能名其處。」浩然遂棄職辭父爲河南行。每舍逆旅，聞操南音者，輒就與語，庶幾旦暮遇也。從軍之人猶有存者，或曰：「此地有趙



副使，故爲軍校歸，得婦人全氏，非其母也耶？趙死，而家眷全歸蒙古人氏，挈之而西，當在汝、澄間矣。」浩然驚喜，遂回汝州，抵鵲路山，不遇。行八百里至牛蹄白石，不遇。又行七百餘里至棗陽雀橋，又不遇。或指唐州以告曰：「彼有別蓋山，可尋討也。」浩然夢神人盼顧，有「月缺再圓」之語。既寤，復自雀橋三百餘里至別蓋，訪母，在焉，抱持涕泣，奉母南歸。一時能言之士，感詠歌其事。

### 皇朝科第

舉人 進士遇子、午、卯、酉屬舉人，辰、戌、丑、未屬進士。

洪武十七年甲子 章賜

二十三年庚午 劉亢

二十六年癸酉 詹普 莫保

二十九年丙子 鄭亮 陳顏

建文元年己卯 黃福 余保 徐奇 應天中式。按建文年號已經詔書仍舊，（九）今改洪武二十二年仍稱建文元年。

四年壬午 潘賜 徐安 陳滿

永樂二年甲申進士舊志有洪武三十五年一榜，考是歲革除，故元年開科而明年甲申會試。 潘賜 陳滿 徐安

三年乙酉 李存禮 蕭福 饒生 陳遜

四年丙戌 蕭福 饒生

六年戊子 史振 張琳

九年辛卯 徐瑄 王許 李祿 蘇賑

十年壬辰 陳遜

十二年甲午 葉恕 東珙

十三年乙未 葉恕

十八年庚子 張善 鮑寧

十九年辛丑 張善

二十一年癸卯 徐矩

宣德四年己酉 曾恕

七年壬子 翁賜 龔貴

正統六年辛酉 鄭遠

景泰元年庚午 黃智

四年癸酉 劉佐

成化七年辛卯 曾瑾

十年甲午 林奇 劉忠

十六年庚子 張璣應天中式。

弘治五年壬子 丘魁

十七年甲子 張鳳璣子。 張鵬鳳弟。

正德五年庚午 陳廷用

六年辛未 張鵬

嘉靖元年壬午 張明

七年戊子 丘廷梓魁子。

十年辛卯 張衢

十一年壬辰 張明

十三年甲午 周鳳岐 張爵應天中式。

十四年乙未 周鳳岐

十九年庚子 徐伯相

二十五年丙午 徐浦

三十一年癸丑 徐浦

三十七年戊午 徐栢 吳中立

四十年辛酉 姚英順天中式。

四十一年壬戌 徐栢

隆慶四年庚午 徐萬仞

五年辛未 吳中立

萬曆元年癸酉 徐民英

四年丙子 徐民式第二人。

八年庚辰 徐民式

十一年癸未 徐萬仞

十三年乙酉 徐民俊

十九年辛卯 吳鍾英順天中式。廣安知州文贊子。

二十二年甲午 周維鯤

二十五年丁酉 張邦教

二十六年戊戌 張邦教

二十八年庚子 曾六德

二十九年辛丑 曾六德

三十四年丙午 徐庚順天中式。

四十三年乙卯 吳長郊

薦辟、貢七賢者雜見列傳中。

有傳

楊遵 康尚文 季仲蘭 章善 章賜 劉亢 潘至善 陳顏 徐奇 黃福 潘賜 徐安 江惠

陳遜 蕭福 史振 王許 李祿 蘇賑 葉恕 張善 李善 曾恕 龔貴 真節 詹淙 黃智 張

璣子鵬 丘魁 李必昂 徐邦佐 李琦 張明 張爵 周鳳岐 徐伯相 徐浦 姚英 徐栢 潘

應科 徐兆驄 吳文贊 吳中立 徐民式 徐萬仞 黃煥

楊遵 字宗道。洪武初知鎮江府，廉明有爲，善於拊御。流離復業，百廢具舉。性好學，工詩善書，在郡多所題署。

康尚文 洪武十六年知南康府。治民事神，極其誠敬。大旱，齋沐，遍禱廟壇，甘雨連日，民因復甦。

季仲蘭 洪武中爲嚴州知府，勤惠及民，一郡翕化。

章善 字敏善。風神凝遠，制行峻潔。洪武十六年，以貢入太學。後任海陽知縣。

章賜 字永錫。蒐羅經史，文辭宏放。任西安縣學教諭，模範端方，士林重之。

劉亢 字惟幾。任清河縣學教諭，陞鉛山縣、工科給事中，嘗奉使外國。

潘至善 洪武二十二年以戶部郎中知撫州，當入覲，而樂安縣賦不足，惻然曰：「吾寧負後期之責，不忍民受逋租之罰。」親至樂安，召父老諭之，於是民爭出布帛銀錢易粟米，一月而數年之逋盡足。

陳顏 字士希。洪武二十九年以舉人任廬陵、泰和二學教諭。秩滿，太學生陳循時爲諸生，（一〇）請留終教，遂陞教授俸，署本學事。永樂十年，陞國子監學正。宣德五年，勅輔弼大臣各舉所知，楊文貞士奇舉顏才堪郡守，擢惠州知府。天性惻愍，因俗爲政，吏民愛之。

徐奇 字以正。父天祿，見閭巷。奇，建文中爲戶科給事中，封駁精詳。永樂二年，特陞江西布政，以任大辭。又命爲福建，以本貫辭。於是改廣東以往。既至，勤官廉躬，雅志愛民。嘗奏言：「公差員役皆令自給，無以督趨事。乞於所轄遞運曠役，悉任應付。又諸有司卒官，宜准律：故官家屬應付給與行糧，遞送還鄉，以厚死臣。」成祖皆從之。以朝覲至京，載上物一二，將以分遺在廷諸臣，或得其單目以

聞。時大學士楊士奇最承上眷，上閱單目，無遺士奇者，朝退，召士奇密問之，而又曰：「曷不遺爾？」士奇對曰：「徐奇往爲都給事中，雅游諸臣，卽臣亦交奇。奇之官，衆作詩文送之，臣適病未能。今有所遺，蓋酬昔覬臣之見遺，臣以病也。」上曰：「爾時不病，亦作送否？」對曰：「不敢異衆。」上曰：「然則，曷遺諸大臣？」對曰：「諸大臣受外臣餽，臣素不聞。殆意奇爲之，今受否尚未可知。抑其所列，不過嶺外土物而已，無貲賄。」上取疏記焚之，無所問。竟卒於官。

黃福 字汝錫。博通經史。任杭州府訓導，勤教善誘，陞太常博士。永樂中，預修《五經四書大全》及《性理大全》書，陞本寺寺丞。

潘賜 字文錫。才思高邁，操履方正。永樂中，授行人，出使日本回，獻德化書《永樂大典頌》，上覽之稱善。陞禮部郎中，轉鴻臚少卿，再使日本。還，陞江西參政。仇家摘其詩句，以「妖言」坐落職。洪熙初，起南刑部主事。宣德間，復除鴻臚少卿，復使日本，朝廷深嘉獎勞。未幾，卒官。

徐安 字處善。任翰林庶吉士，有文名。

江惠 字迪吉。沉毅尚氣節。永樂三年，以貢入太學。任兵部職方主事，陞郎中，再陞四川參政、布政。

陳遜 字必恭。永樂三年舉人，卒業太學。爲人行堅志勤，嘗以古人自期，「二人」人以「古樸子」稱之。以選，同監察御史甄庸行部廣西，清理案牘。靈川有豪民朱普秀者，以爭田謀殺鄉人廖昌子，賄有司，得不論死，謫役平樂州。遜閱牘疑之，秉燭夜坐，反覆再四，聞窗外若有訴冤聲。翌旦，直其事，論普秀於法，人咸驚異。未幾，丁外艱歸，哀毀骨立，喪葬盡禮。十年，登進士，試大理、兵部，皆有能聲。明

年，擢監察御史、彈劾糾舉，無所畏忌。歲乙未，朝廷以天下鹽場積弊滋甚，分命御史、給事中按蒞。遜得北京河間運司，具官吏奸弊事奏之，逮捕運使梅應魁以下數十人。先是，鹽場露積，風雨漂損，遜教以苫蓋之法，以是歲額不虧，所治爲諸道最。丙申，巡按陝西，首劾左參政王晏、按察使劉迪等貪濁罷軟，悉抵罪。久之，復劾右布政楊恭、按察使韓春。春恐懼，懷奏誣遜他事，遂自經死。事聞，成祖知其誣，置不問，竟籍春家。或謂太過，遜舉范文正公「一家哭，何如一路哭」語答之。己亥，坐累輸作房山。逾年復職。壬寅，巡按吳中。上海民濮宗文者，聚亡賴子弟數十往劫，官軍不能制。遜密授計守禦千戶李凱，詐令人若商賈棹舟載物，而伏兵其中。賊望見，爭趨之，舟中兵出，遂皆就擒。復捕逮蘇、松諸郡縣黠吏唐金等爲民害者千八百人，時呼爲「陳掃箒」，以掃除奸弊，爲之一空也。松江民顧阿虎者，爲豪右陳昇殺其母，嚮肉以飼犬，阿虎訴於郡，昇厚賂官吏，反誣阿虎舊嘗爲強寇，闔室九人皆伏重法。遜廉知其冤，爲訴鞠，盡釋之。執昇父子，械送京師，磔於市。其他平反獄訟，祛除奸蠹，多類此。甲辰，巡按北直隸，聲不減吳中。宣德初，秩滿，超拜雲南布政司右參政。嘗謁楊文敏，求生傳以自著，曰：「遜生平遇事任情，不暇顧忌，禍福一聽於天。人以『古樸子』見稱，遜心謂固常，遂不敢辭。先生素知遜，幸爲著於篇。」文敏爲傳，稱遜「性雖坦直，吏考行事，表表偉傑，不讓古人，以『古樸』名，可當無媿。」

蕭福 字九疇。學問該博，任翰林院庶吉士，預修《永樂大典》。除兵部員外郎，轉吏部考功員外郎。

史振 字思誠。授太常寺博士，擢監察御史。剷除宿弊，凡所巡歷，貪墨解綬。以終養乞歸。  
王許 字信之。任戶部主事，以惜名器、持廉節見重。

李祿 字思禮。少有清鑒。任交趾快州判官，苦節自勵，蠲除煩苛。以交趾叛，解組歸。

蘇賑 字汝濟。任饒州、德興二縣，在官清素。

葉恕 字以忠。任監察御史，犯顏擊奸，有柱石之望。

張善 字性之。授監察御史，以廉介自持。出按廣東，馬軍林思祐倚權肆剽掠，善捕其黨三十餘人置法，尸思祐於市，民害以除。正統間，以疾予告致仕。

李善 字志中。龍泉縣丞。捕盜有功，陞本縣知縣。待人誠，而處事公。致仕之日，士民不忍其去。

曾恕 字士行。任羅田教諭。博學能文，陶甄不倦。

龔貴 字廷璋。歷吳江、武進知縣，陞杭州知府。清白自操，所至興學教民，雪冤理滯。

真節 字仕和，文忠公十三世孫。宣德九年，以貢入太學。任開封府判，持廉守正，稱清白吏。

詹滌 字子源。博聞強記，通陰陽、地理、星命、卜筮諸書，善圖畫竹菊。累舉不偶。正統三年，以貢入太學，歷上海、進賢訓導。四川聘典文衡，號稱得人。陞南昌縣學教諭，秩滿，遷潮州教授。持身嚴毅，所歷四學，規條畫一。

黃智 字惟哲。任化州知州。寇擾雷廉，突入化境，智曰：「封疆之臣，吾曷避死？」與戰而沒。弘治間，州人鄧應仁來知浦城，爲表其坊曰忠。

張璫 字孔圭。任贛州府推官，陞同知。時汀、邵寇侵贛境，因之饑疫。璫曲爲全恤。瑞金、石城二縣，故無城，城自璫始。前後平反死獄四十餘人。在郡十三年卒，士庶奔哭，爲之立碑。子鳳、鵬，並登科。



第。

鵬 字搏南。博學能文，有志聖賢之學。與兄鳳同領弘治鄉薦。正德間，舉進士，授戶部主事，督馬廠。劾中璫私貸影射之弊，賴楊文恭一清、石文隱瑋保持之。武廟東巡，具疏諫止。轉郎中，上章歸養，以羨錢萬緡留庫。嘉靖初，起用，補兵部郎。陞山東按察副使，監司欲以賄脫二重獄，堅執不從，自免歸。龍泉山寇迫城，鵬與有司力圖守禦。年荒，聚衆給米活之。觀風使者歷薦，皆以疾辭。年八十卒。

丘魁 字文元。任奉化、咸寧二縣令。其在奉化，歲大歉，請於朝，蠲民租。在咸寧，擒賀堪、廖章二賊。丁艱，補宜城。以忤當道解印，賦《歸田》二十詠，自號景陶子。

李必昂 字時望。正德八年以選貢授雲南祿豐縣尹，當道委兼督羅次縣事，擒劇賊楊泰，又討平鳳姐索等，並蒙朝賞。先是，賊蹂躪六縣一州，時祿豐城孤勢迫，人無固志，必昂勉以忠義，悉力拒守，賊數戰不利，一二遁去。擢趙州知州。丁外艱，起補劍州。思母，乞歸。年八十卒。

徐邦佐 字之才。正德中以恩貢廷試第一，擢瓊州府推官。讞獄平允。征大羅山洞寇有功。

李琦 字師韓。父廉，先逝。母濮，在堂，琦與兄弟竭力孝養。母病，相繼奉侍，病篤，焚香祝天，爭以身代。同居三世，財無私蓄，家有義訓。嘉靖六年，以貢任開化丞，被檄署縣事。遇山寇猖獗，出奇捍禦，境賴以安。歲饑，捐俸賑氓。卒官。弟瑀，應貢，未仕，琦任沛縣學官，行誼均足稱述。

張明 字元亮。登第，辭牌坊銀三百，不受；里甲例撥人夫供役，亦辭曰：「何敢以一第累鄉人也？」授戶部主事，委齎金帛陝右、宣大，悉以溢銀數百貯邊藏。翰林程文恭、文德爲翰林編修，坐楊名言事左遷，衆憚執政莫敢贈言，明獨秉筆，且邀同輩錢文恭於郊。文恭嘆曰：「見交情矣。」大中丞王廷相以

明方正，疏改御史。而先是，部尚書有所委明減地租，增商額，明不從命，忤意，遂見沮，遷湖廣副使。章獻太皇太后梓宮祔葬郢陵，至則節藩需例三千佐陵費。世宗車駕臨楚，明急籌，卒辦。賜白金、文綺，擢江西參政。以勤勞卒。

張爵 字允修。授南昌府通判，秩滿，陞台州同知。倭寇逼郡，人心惶懼，當事者以閉城爲計。村落避賊萬餘口，號呼城下，爵奮然開門入之。又督兵與倭戰於檢橋，大敗之。撫按薦章交上，竟以勤勞遭疾卒。殯之日，囊無遺金，士民哭而碑之。

周鳳岐 字文徵。弱冠，登進士，授紹興府推官，陞刑部主事。議草忤中貴，出爲太倉同知。築七浦等塘，民立碑紀績，待詔文徵明爲之記。

徐伯相 字良夫。授柳州府推官。有荔波，饒地，沒於土官者且百年，伯相力還之。擢建昌同知、南京戶部員外郎中，調歸。伯相靜定簡默，酷嗜墳典，所著有《書暇叢紀》二十卷、詩集十卷。

徐浦 字伯源。舉進士，授弋陽令。奸民葉世豪聚衆煽亂，親詣諭之，設方略擒其渠魁三十三人，餘黨悉定。擢工科給事中，出爲廣西僉事，解綬歸。居鄉，數爲有司言政，鄉人德焉。

姚英 字彥實。署六合學諭，擢海陽令。潮民爲之立碑。年八十八卒。門人諫議林熙春誌其墓。

徐栢 字守卿。授戶部主事，筦通、德二倉。值米價踊貴，令輸者納緡，俟價稍損，則轉糴充庾，官民兩便之。遷員外郎中。徐、沛河決，工部尚書朱衡知其能，移咨擢用，贊襄疏濬。分署六年，出守廉州。嚴飭海防，月課諸士。授湖北右參政。以不能逢合當事，左遷四川副使，竟報罷。

潘應科 字彥登。敦尚廉潔，事大父母、父母至孝。周恤鄰里，不計有無，聞鄉有鬻妻兒者，代贖

之，見棄產女道傍，抱歸乳養。隆慶元年，以歲貢任利津訓導。陞含山教諭。宦歸，無餘貲，晚節更乏，縣尹褚國祥、任僖先後造其廬致禮，欲有所周，力辭不受。

徐兆驄 字時乘。幼喪母，事父至孝。雖處困極，怡然自得。學諭余永麟，鄞人，文敏有丁父也，嘉兆驄清修，召與文敏共學。歲薦北上，時文敏已在詞林矣，或勸其就試京闈，驄答曰：「遇不遇，命也。余公能賢於吾命乎？」隆慶二年，就選補長汀訓導，正己率物，振植士氣，擢諭廣昌，轉連州學正。凡五署邑篆，俱無所染。

吳文贊 字景皇。以邑庠人胄監，授廣安州同知，州守張澤有廉聲，文贊以能副之。澤以治行超擢，文贊攝守事。川東妖寇起，募善射者授以方略，伏殺渠魁李義等二十餘人，餘黨宵遁。子鍾英，鄉薦。

吳中立 字公度。舉隆慶進士，疏乞歸養。父沒，服闋，遂絕意仕進，以著述爲事，結廬武夷山中十有七年。越中太史張元忭直入山訪之，微諷以仕，則曰：「上各有志。」萬曆十五年，南禮部尚書袁洪愈、給事中周邦傑、巡按御史楊四知表其修節。詔府縣起送赴部，辭，乞終隱，貽相臣書曰：「昔唐元和進士費冠卿以祿不逮親，永懷罔極，隱於池陽九華山。長慶中，御史李行修薦舉，冠卿力辭，竟許終隱。愚願効之。」吏部復言：「聖世禮賢，首崇恬退，必使清節之臣虛被寵榮，乃可以廉頑立儒風，勸士人。」詔授禮部儀制司主事，疾病痊錄用。後推尚寶丞，報至，中立已逝矣。所著有《易銓》、《古本學庸大旨》、《論格物》、《書性》、《說氣》諸書。

徐民式 字用敬。起家松江推官，至安慶知府。時陳文憲於陞當國，請舉天下循良二千石處以京堂官，而獨民式應其選。歷巡撫應天。吳中田土十九縉紳家，其貧者復投托寄戶，不供徭役。民式請均之，

士大夫當復者，以官高下爲差，踰額者皆供役。吳中縉紳大不便，竟不能奪也。朝旨爲繫令。民式常言：「吾閩人，寡援，仕宦當甘人後，方不失爲海濱鄒魯。」其恬於仕進如此。

徐萬仞 字抑之。授金華推官，廉平不苟，鄰郡咸來就理。署篆蘭谿，不數月，弊政悉除。勸民起溺女，配臧獲，去狼鬪。遷荊州同知。荆有門攤役，一切行賄居送，取給民間，萬仞爲設九等法，令民季出金，吏自辦之。擢戶部郎，司樞崇文門，奏入羨金千餘。歲侵，捐俸糜民。歷曹郎，出守海寧，罷門稅農民例金千數，以贖鍰佐諸邑備邊餉，無重賦民。築河防三十餘處，全者數萬家。瘁卒於官，無以爲斂，當道賻之，始得歸櫬。

黃煥 字汝章。事父母，以孝聞。事兄姊，雖皓首猶追隨左右。浦人多溺女，煥曰：「此夷俗也，卽家四壁，忍乎？」所生九女，盡收養之，奩資荆布而已。萬曆十六年，以貢授安溪教職，從撫臺許孚遠講明道學。又精於醫，有詩曰：「黃卷窗前業，青囊肘後方。」年八十餘。

政和縣(一三)

宋科第

元豐八年乙丑 陳律

政和五年乙未 邵知柔

紹興二年壬子 吳球 謝譽

十八年戊辰 吳特 倪寬

咸淳四年戊辰 吳清伯

七年辛未 陳從史

有傳

陳律 邵知柔 吳球 謝譽

陳律 字宗禮。博學多通。元豐八年，破荒登第。

邵知柔 字民望。篤學有志操，累官國子祭酒、太子左庶子，兼太子伴讀。乾道初，告老，貧，食不給，東宮爲言於孝宗，孝宗嘉歎再三，遣中使就國學特賜金帛，以榮其歸，朝士皆載酒餞別都門外。

吳球 字元璞。建炎三年，高宗南巡，天下士人應赴省試者，權許就本路帥司類試，球以本路第六人中榜。廷對，首言：「陛下任相非人，太學生陳東以直諫見誅，臣恐異日有指鹿爲馬，無敢發其奸者。」又言：「陛下有畏避小心，而無規恢遠略。」降下州助教。紹興二年，賜進士出身，歷泰州、興國軍、福州、明州教授。

謝譽 字時中。朱韋齋松尉政和時，以公事行鄉落間，聞田舍中有誦書聲，屬耳頗異，亟下車，入其舍，則一少年書生，方對案危坐，吟諷自若。松前揖問讀何書，起對曰：「《儀禮》也。」是時，士方專治王氏經學，非《三經》、《字說》、《日錄》、老莊之書不讀，而譽之業如此。松奇之，引坐與語，酬應敏給。使出其文字，詞氣不凡。問其姓名，大喜，與歸。日授以經史百家之言，而勉其所未至。未幾，記誦益廣，文字益工，松益歎重之。中紹興二年進士，調泰寧主簿。性耿介不與世合，而居家極孝友，既得官，盡以先疇奉其兄，娶妻得田自隨，一旦亦舉而歸之。還自泰寧，慨然就閑以便養。年四十六卒。松深惜之。

元

陳楠老

陳楠老 字良材。至元元年，以鄉貢進士授興化路涵江書院山長，轉建陽雲莊書院山長。至正間，棄官歸。嘗過萬竹庵，題詩曰：「青山迴望合，萬竹淨娟娟。寶殿晴光冷，瑤階翠色妍。龍吟明月夜，鶴舞早秋天。坐聽涼風發，軒櫺響澗泉。」

皇朝科第

舉人 進士 遇子、午、卯、酉屬舉人，辰、戌、丑、未屬進士。

洪武十七年甲子 陳淇 范朗

十八年乙丑 陳淇 范朗

二十年丁卯 謝馬 楊原貴

建文四年壬午 吳廷用

永樂二年甲申進士舊志有洪武三十五年一榜，考是歲革除，故元年闕科而明年甲申會試。 吳廷用

三年乙酉 張美

九年辛卯 吳敦

十二年甲午 吳安

十五年丁酉 彭新

十八年庚子 金鏐 黃穆 范星

宣德四年己酉 周志

正統十二年丁卯 吳憲

景泰元年庚午 雷春 陳待

成化七年辛卯 林一寧

弘治十一年戊午 王良佐

十七年甲子 陳桓

正德八年癸酉 趙泮訓導鉅子。

十六年辛巳進士是年以武廟南巡故，改庚辰爲辛巳。

陳桓

隆慶四年庚午 陳瀚待玄孫。應天中式。

萬曆二十二年甲午 游應運

薦辟、貢士賢者雜見列傳中。

有傳

余應 黃童 吳瑾 吳廷用 吳義 趙熙 吳憲 陳待 張敬 吳政 陳桓 張旻

余應 字則亮。私淑朱文公之學，以《禮》自律。事繼母與處繼母弟，以孝友稱。洪武初，薦明經。

起爲儒學訓導。還留守司知事，越三載，坐公文不式，免歸。執父喪，一依《文公家禮》。邑人稱曰孝友先生。

黃童 字仕穉。以太學生擢陝西按察僉事。左遷寧遠丞。永樂初，超拜監察御史，奉命巡按南畿。

蘇、浙間，平望、八尺，<sup>〔四〕</sup>盜賊藪匿，童假民舡載粟，詐爲商販，賊至，密以灰水洒之，翌日，捕驗其有灰跡者，乃巡司弓手也，於是真盜悉得。仍奏卽湖口置石隄爲水門，時其啓閉，劫掠之患遂息。嘗出見一巨蛇，昂首若訴，童問曰：「冤乎？」蛇卽俛去，人圍中。令人尾之，就其穴掘焉，果得園主者殺人狀，人以爲神。後遷廣西副使，卒於官。

吳瑾 字士瑜，宋吳球後。洪武間以國子生授常州府推官。臨囚訊問，務推誠意，使自引服，及得情，哀矜見辭色。在官六年，廉恕之聲動於畿輔。以疾卒京師，輿喪過郡，常民爭先哭祭。

吳廷用 名棟，以字行。七歲喪母，日夜號泣，鄉黨稱孝。長爲諸生，循循雅飭，言笑不妄。登永樂中進士，授戶科給事中。仁廟在東宮時，以勤謹和緩受知，每呼爲「吳老實」。及卽位，吏部補資，陞雲南僉事。陞辭，上曰：「卿小心慎密，君子也，何爲遠去？」特陞刑部右侍郎。嘗奉勅清軍，江西吉安府有貧嫗，僅一子，與正軍同姓名，里正報以爲軍，無從辯訴，廷用勘察其情，釋之。宣德三年，採木湖廣，役夫觸冒寒暑，多染疾者，廷用詣岐黃，捐資藥焉。九年，通考，陞禮部左侍郎。正統元年，以親老請歸省。其年，父卒，年九十三，廷用亦六十有七矣，哀毀踰禮。上賜祭。及葬，啓土之日，得石棺於穴傍，人謂孝感。服闋，赴京，仍疏致仕。

吳義 字用宜。正統中以貢士爲零陵令。清介自持，未三載，吏畏民懷。屬丁艱，歸，囊橐蕭然，民爭致賻贖，郡守資以帑藏餘，不受。比服闋，詣部引疾歸。

趙熙 字文輝。正統中貢士，任濱州判官。持重篤實，勤於學問，自筮仕以至歸老，冠服不改其素。

吳憲 字廷綱。任新安教諭。還里，請於當道，復星溪書院，請表朱章齋父退林公祠墓之在政和



者。

陳待 爲光祿署丞。嘗承英宗顧問，特賜金鈔。歷官海南，值地方不寧，與副使林璟協力討平。卒於官。

張敬 天順中貢士，任安遠知縣。清廉有聲，居家賑饑厄，助婚葬，邑先達吳廷用敬重之。

吳政 天順中以歲貢任翁源知縣。清慎仁恕，翁源人祀之名宦。

陳桓 正德中以戶部郎出爲廬州府知府，再擢九江兵備副使。居官清廉，歸家蔬食布衣，居無垣牆，出不乘車。邑被他邑擬派驛傳，桓貽守令書，言：「建寧之有政和，猶中國之有邊方，田少於諸縣，民寡於諸縣，地瘠於諸縣，財貧於諸縣，而差獨視諸縣獨繁。」（二五）且爲諸縣之藩，偏受盜賊之衝，小民無知，尚欲諸縣量爲幫助。乃諸縣告將驛傳夫銀攤派本縣，此猶壯夫欲均重負於么麼、衰病之人。在己誠爲輕省，別人何以擔當？伏惟裁度轉達免派，以順民情，以寬民力。」守令皆如其言。邑人德之，而廬亦祀桓名宦。

趙旻 嘉靖中以歲貢任高安訓導，繼擢蘭谿教諭，續以年老解組，諸生詣學使阮鶚保留，鶚曰：「師德感人如此耶！」遂改行祠爲書院，留講學三載乃歸。歸則人粵受業於湛文簡。又二年，擴明道學，後進從游甚衆。嘉靖壬戌遭倭，厲聲罵賊，至鉗口不絕聲。

#### 松溪縣（一六）

#### 宋科第

慶曆二年壬午 吳概

嘉祐八年癸卯 吳執中概子。

元豐二年己未 李懌

五年壬戌 李規

大觀三年己丑 陳戢

紹興十五年乙丑 李扶懌子。

隆興元年癸未 董居安

嘉泰二年壬戌 葉元之

有傳

吳執中子廉夫。 李規 陳戢 李扶 董居安

吳執中 字子權。父概，著作郎。執中於呂惠卿爲同門婿，既登第，不肯附麗取進，浮湛州縣凡三十餘年，始提舉河南常平，連徙河東、河南、（一七）江東轉運判官，入爲右司郎中。大觀初，擢兵部侍郎，進御史中丞，論開封府、內侍省、京畿、秦鳳違法干請，詔獎其得風憲體。又言：「開封之治事、大理之決獄、將作之營繕、權貨之人中，皆職所當爲，乃妄以爲功，一歲遷官至五六。宜行抑損。」遂詔自今但賜束帛。鄭居中知樞密院，執中言外戚不宜在政地，徽宗還其章，而諭所以用居中之意。坐論張康國，黜知滁州。久之，復爲中丞。徽宗以星變逐蔡京，言者未已，執中舊爲京所引用，因言進退大臣當全體貌，京得不重貶。遷禮部尚書，爲御史張克公所論，降知黃州。未至，落職。尋奪一官，奉祠，卒。宣和初，追復顯謨閣

待制。靖康初，加樞密院直學士。子雋、巖夫。雋，官終光祿卿。

巖夫 字民瞻。以蔭補官，政和中，累遷考功員外郎。召對，論郡縣賦斂煩急，百姓悲苦。徽宗竦然異之，顧謂左右曰：「誠吳執中子也。」請外補，知洋、濠二州。欽宗內禪，召還。遷爲左司郎中。出，語宰相曰：「方時艱難，願拔寒酸，以求實材，毋專用虛名竊位苟祿而已。」宰相不悅，巖夫曰：「吾與公爲道義故，敢獻直，不然，自此辭矣。」高宗卽位南京，移光祿卿。時虜騎未退，率同列上章，願涓辰順動，以副四海望幸之心。章再上，乃退保揚州。後以言事不合，遷秘閣修撰，知福州，乞南劍州，乞祠，居建安，卒。

李規 字師正。初辟陶節夫幕府，時朝廷方討西夏，規協力裨贊，招散亡，築堡塞，夏人遠遁。通判環州，請革陝西錢法之弊。改夔州運判，就移本路提刑，被旨按大獄，原釋數百人。以平瀘功，轉朝議大夫。子文淵，富陽令。孫大正，四川茶馬。

陳戢 字冲休。建炎初以監察御史從幸江浙，時統制范瓊附苗、劉，有跋扈意，戢馳入瓊壘，諭以禍福，瓊頗從命。入對，高宗喜甚，陞太常少卿。車駕幸永嘉，又疏論諸將各擁重兵，將有尾大之患。於是創軍，號曰神武五軍。轉給事中，疏論：「今日有五失：宰執務姑息，將帥邀功賞，臺諫言細務，監司守臣多犯法，內侍權漸盛。宜有以禁止之。」詔臺諫、侍從條具保民、弭盜、遏虜、生財四事，戢奏：「省徭賦，尚本業，可以保民；聽盜自相糾摘，以追捕多少爲守令殿最，可以弭盜；占上流，據形勢，可以遏虜；躬節儉，量出入，可以生財。」高宗皆嘉納之。又論：「諸將詣政事堂，與大臣狎昵，紊亂朝綱，恐緩急不爲用。」以寶文閣待制出知處州，改知明州，尋移泉州，兼福建路兵馬鈐轄。不避權勢，朝廷聞而嘉之。後提舉武夷冲祐觀。卒，贈通奉大夫。

李扶 字持國。父懌，朝奉郎。扶幼孤，事母孝。第進士，調海鹽尉、永興丞。適大冶爲兵火所蕩，郡守及諸司檄攝其事。扶至，招撫流散，安集田里。秩滿，改宣教郎。知富陽縣，以平恕爲治。轉廣西帥司主管，諸司薦爲蒼梧守，治狀最兩廣。

董居安 字子安。乾道間知順昌縣，清儉明敏，時縣嵯更法，帑藏空虛，更請如舊。令計民產賃錢，居安以爲賦外之斂，不聽。優游措畫，不煩而辦。有追攝傳符下里，未嘗一遣隸卒。先是，令以隻日晨興收民訟牒，居安聽受無時，冤枉畢達。訟有所連，惟摘一二切要，餘無所問。民祠祀之。

元

葉景仁

葉景仁 字天德，唐刺史灝之後。至正壬辰，繇政和尉以軍功遷浦城尹，奉行省檄，討政和西里寨寇，值歲饑，出家貲餉兵，率先入南里，遇賊邀擊，敗之，擒戮魁黨，撫其脅從。次日進攻賊巢，抵西里蛟龍橋，賊悉衆來拒，景仁復戰，敗之。乘勝深入，後援不繼，爲所執，斷其右膊，大罵，死。子雋，見韋布。

皇朝科第

舉人 進士遇子、午、卯、酉屬舉人，辰、戌、丑、未屬進士。

洪武十八年乙丑 江觀 李濬上，舊志不載鄉試科年。

二十九年丙子 魏鐸

永樂元年癸未舉人 舊志有洪武三十五年一榜，考是歲革除，故元年開科而明年甲申會試。

程燧

六年戊子 楊誠 江麒

九年辛卯 游熊

十二年甲午 胡昂

十三年乙未 胡昂

十五年丁酉 葉敷 鄭旭

二十一年癸卯 劉恒

正統三年戊午 葉璣

成化二十二年丙午 葉鎮

正德五年庚午 楊茂 葉逢陽

九年甲戌 楊茂

十一年丙子 范璉

十二年丁丑 葉逢陽

嘉靖七年戊子 葉儒 范鑑

萬曆十九年辛卯 魏濬

二十二年甲午 葉憲

二十八年庚子 真憲時

三十二年甲辰 魏濬 真憲時

有傳

李濬 楊誠 葉鎮 楊茂

李濬 字彥深。除蘭谿知縣。蒞官六稔，惠愛著聞。

楊誠 字性之。永樂中授四會訓導，遷天台教諭，改縉雲。所至善陶淑。所著有《冀鐵稿》。

葉鎮 字邦靖。任丹陽學諭、瓊州府教授，教法嚴整。告老歸致，杜門養高。

楊茂 字叔亨。少有詩文名。弱冠舉於鄉，擢進士。告歸養，居湛廬山六年，學日益進。授大理評事，陞江西按察僉事。所著有《湛廬山人集》。

壽寧縣（二八）

皇朝科第

舉人 進士遇子、午、卯、酉屬舉人，辰、戌、丑、未屬進士。

天順三年己卯 姜英

正德十一年丙子 姜禮英子。

貢士賢者雜見列傳中。

有傳

姜英子禮。 周良 張資 葉時宣 葉惠

姜英 字士傑。授蕭山訓導，魏文靖驥稱其律己、教人有道。改南京武學，陞當陽知縣。去任，民有

「古循良，姜當陽」之謠。子禮。

禮 字用和。少孤，嗜學，事母以孝聞。通判梧州，政尚廉平。卒官，歸櫬，行李蕭然。

周良 字秉直。以貢士任永嘉簿。勤謹奉公，勦滅海盜，一境皆平。

張資 字世用。縣歲貢任廣東按察司經歷，以廉斷聞。

葉時宣 嘉靖庚子貢士，除泗州訓導，賑窮却贖。續補如皋，有寇至縣，令欲借民餉軍，民難之。謀於時宣，時宣擇諸生中練達者，□□□□□斂民也，「一九」第先儲釜粟於民間，以防寇至。寇而不至，皆民物也，官何取焉？今寇至犯城，則民亦烏能有哉！」皆踴躍從命，竟以却賊而全皋。陞泰州學正、慶府教授。

葉惠 嘉靖壬寅貢士，歷含山訓導、鄱陽教諭、思恩軍民府教授。棄官歸養，悉以家貲爲昆弟子侄分產、娶婦，族邑高之。

#### 〔校記〕

〔一〕「政和縣 松溪縣 壽寧縣」九字，各本原脫，據本書體例補。

〔二〕「浦城縣二」四字，各本原脫，據本書體例補。

〔三〕「出御樓」，《宋史》本傳作「帝御樓」。

〔四〕「初好王氏學，後悟其非」，各本原作「初好王氏，後學悟其非」，據文義改。

〔五〕「福州教官」上，各本原闕一字。

〔六〕「孫」字，各本原脫，據本書卷九十九「宋科第」及本卷傳記目錄補。

〔七〕「蔡幼學」，各本原作「蔡初學」，據《宋史》本傳及《真德秀傳》改。

〔八〕「此高、孝二祖儲神燕間之地」，《宋史》本傳作「此高、孝二祖儲神燕間之地」。

〔九〕「建文」下，各本原衍「年」字，據文義刪。

〔一〇〕「太學生陳循」，各本原作「太學士陳循」，據《明史》陳循行事及《明史·辛輔年表》改。

〔一一〕「以」字，各本原脫，據文義補。

〔一二〕「賊數戰不利」，各本原作「城數戰不利」，據文義改。

〔一三〕「政和縣」上，各本原衍「建寧府」三字，據本書體例刪。

〔一四〕「八尺」，當作「八斤」，地名。

〔一五〕此句後「獨」字疑誤。

〔一六〕「松溪縣」上，各本原衍「建寧府」三字，據本書體例刪。

〔一七〕「河南」，《宋史》本傳作「淮南」。

〔一八〕「壽寧縣」上，各本原衍「建寧府」三字，據本書體例刪。

〔一九〕「斂民也」上，各本原闕六字。



# 閩書卷之一百一

英舊志 縉紳

延平府 南平縣 將樂縣 大田縣(二)

南平縣(二)

宋科第晚科多趙姓者，未嘗分宗子，正奏，不敢妄去取，姑存之。

太平興國五年庚辰 廖亞之廖作康。

雍熙二年乙酉 江嗣宗

淳化三年壬辰 葉溫 羅鼎

大中祥符元年戊申 余寔 洪詢

五年壬子 廖淮 江虛舟

八年乙卯 鮑光

天禧三年己未 廖淳

天聖二年甲子 廖處平廖一作康。(三) 李幹

卷之一百一 英舊志

五年丁卯 李參

八年庚午 吳輔

景祐元年甲戌 張擬 吳昭

寶元元年戊寅 宋琪 李纁幹子。 余洸

慶曆二年壬午 李緯 鄭先

六年丙戌 李繹 范迪簡 葉斐恭 楊師顏 廖山甫

皇祐元年己丑 楊介石 胡試職

嘉祐二年丁酉 陳阜謨 吳潛

四年己亥 范峒迪簡子。

六年辛丑 范峒迪簡子。 官至龍圖閣直學士。 馮澤

八年癸卯 王端

治平二年乙巳 廖平 練愍 朱甲立

四年丁未 張冕 范屹迪簡子。 楊宇

熙寧三年庚戌 吳君偁 胡璞

六年癸丑 葉唐懿 余行之 葉恕 吳闢 林修 葉唐稽

九年丙辰 宋宜甫 宗毅 尤詢 余卞之

元豐二年己未 葉唐稷 吳擇 羅仲彥 朱起 張齊

五年壬戌 黃裳狀元。 魏任 范岵迪簡子。

特奏名 魏容

八年乙丑 楊烈 吳常

元祐三年戊辰 吳括 黃堯俞 鄧剛 范嶢迪簡子。 楊敦仁 李泳

六年辛未 徐麟符 胡璫 胡元勳

紹聖元年甲戌 張孝裕 楊循道

四年丁丑 馮躬厚 練祗剛 徐公輔

元符三年庚辰 楊道成 李麟 朱齊旦

大觀三年己丑 張濬 梁澤民

政和二年壬辰 尤深 范峒一作洪 廖方 吳權 尤申

五年乙未 吳播 張憲武 羅仁遠 張俞 劉天牧 吳溥一作符

重和元年戊戌 魏貫 練祗柔練一作陳〔四〕 范杞 張時彥 楊申 朱允

宣和二年庚子上舍 范惊

三年辛丑 吳方慶 余誼 彭澤 李邦 尤昱 劉浩 張傑

六年甲辰 楊諄 柯發 宗庠 謝方 林邦彥 劉昱

建炎二年戊申 魏郁 范津 伍淵 范邦彥一作彥邦 鄭桂

紹興二年壬子 張大中 廖拱 何鐸 陳仙 伍穎達 吳淦

五年乙卯 吳武陵

八年戊午 張維 宗序

十二年壬戌 張廷傑 蔡士龍 羅無咎

十八年戊辰 段有直 宗昇

二十一年辛未 廖挺 楊純臣 吳漸

二十四年甲戌 廖珪 王宋端

二十七年丁丑 石應城 黃藻 李信甫文靖侗子。 吳人瑞 李友直信甫兄。

三十年庚辰 李淙 張時發 吳天常

乾道二年丙戌 陳滂 高人傑

八年壬辰 田澹 黃衍 陳東 甯淵

特奏名 陳瑀

淳熙八年辛丑 高三美 李三有 羅大聘 陳民望

十一年甲辰 鄭光 李衍 鄭康成 黃公信

十四年丁未 張顯父 鄧文舉 陳遠 張如圭 石中立

慶元五年己未 黃友直 余談 吳渙 范倓范一作危。(五) 廖起宗 崇炳 楊晏 楊子文

開禧元年乙丑 廖渭

嘉定元年戊辰 陳鶻一作鶚。 趙崇彪 趙崇藩 趙崇厘 蕭榮祖 趙汝撫 趙希詠

四年辛未 趙崇隆 甯柄 趙崇魯 趙崇璘 趙時夫 趙時淳

七年甲戌 葉儀鳳 趙崇銳 劉次恭 黃宜卿 張庚

十年丁丑 彭申 魏夢社 趙崇濂 陳燁 黃由行 江楫

十三年庚辰 尤拱之 楊武 馮源

十六年癸未 楊浩然 楊淳子楊一作湯〔六〕 黃直卿直一作真〔七〕

寶慶二年丙戌 趙必延 趙必洪 趙崇麗 趙崇祺一作廣 趙崇兌 黃復 趙必逢 湯冲湯一作

楊。〔八〕 魏鼎 呂橋 馮子威 李多 葉參 葉濬 趙崇允 趙必躬 趙必曼 趙崇霄 趙崇照

趙崇需 趙崇寶

紹定二年己丑 楊武子 蔡應龍 趙必衍 鄧煥章

五年壬辰 吳一鳴 宗良一作良 趙孟垓一作核

端平二年乙未 吳瑞 趙孟崗一作崗 蔡簡夫 尤塋之 蕭虞韶

嘉熙二年戊戌 吳應酉 張時中 張晞顏 馮夢得 湯露湯一作楊〔九〕 趙崇倏

淳祐元年辛丑 謝華 陳徽鶚子。 黃應昇 陳宗

釋褐 趙若璉

四年甲辰 湯逢辰露作 張弇

七年丁未 陳雅 李公足 聶淵潛 陳燮

十年庚戌 馮寶 王應豐 鄭元芳 吳珩一作衍 李公孺

寶祐元年癸丑(一〇) 吳元之 趙必橡崇兒子。黃介龍 王必謙 趙必趨崇應子。

四年丙辰 陳桂 趙必趨必趨兄。嚴桂發 鄧觀光 聶慶隆 宋日隆

開慶元年己未 鄧儼 范又新 吳光國 鍾吉昌

景定三年壬戌 吳震應西弟。趙良燠 趙崇澤汝撫侄。楊自得 趙必璉崇魯子。趙孟塾孟孩弟。

咸淳元年乙丑 趙崇溥 李溶信甫曾孫。魏應 陳鄂 趙與燃 趙必途崇魯子。趙與環 趙必急

趙必太 趙良珫必璉兄。趙必鏐必璉弟。趙孟領必璉孫。趙孟 趙時僕 趙孟沐 趙時衍 趙必儻

趙孟潛 趙必儻 趙必 趙崇倘 趙良璉 趙孟璉 趙時 趙良玗 趙必鋹必璉弟。趙崇鉢 趙必

端 趙孟仲

四年戊辰 趙必道必璉弟。陳□(二) 范聯 趙時 羅誠子 趙必造 甯章柄子。

七年辛未 趙孟衍 趙與玉 湯傳 朱仲長 徐夢張 羅太係 趙孟謙 趙必湊 魏有慶應兄。

陳布祿 馮士選夢得子。曹暉 聶古淵潛子。

薦辟、人才賢者雜見列傳中。

有傳

吳輔 范迪簡 王端 練恣 胡璞 黃裳 魏任 吳播 魏郁族人虎臣。張維 黃藻 李信甫

范潔 黃復 吳一鳴

吳輔 爲道州推官。有傳寇至者，郡僚欲毀橋守城，(二)輔曰：「橋而南，皆吾民也，可棄乎？」寇卒不至。

范迪簡 字道卿。初登第，陳襄得其文二軸，大嘉稱賞。後調官至闕下，雖嘗受趙抃引薦，不肯一謁，識者難之。

王端 字道原。善講學，最爲范祖禹所重。

練愆 爲旌德令，雅有清操。人飲酒清者，必曰：「此練長官酒也。」

胡璞 工詩，嘗經采石渡，題詩吊李白云：「抗議金鑾反見讎，一杯蟬蛻此江頭。當時醉弄波間月，今作寒光萬里流。」蘇軾見之，疑唐人所作，嘆賞不置。

黃裳 字冕仲。爲書生時，常有魁天下志。博學宏詞，尤邃《禮經》。元豐五年，對策第一。政和間，知福州。嘗爲端明殿學士、禮部侍郎，遷尚書。方三舍法行，裳爲宜近不宜遠，宜少不宜老，宜富不宜貧，不如遵祖宗科舉之制，世以爲確言。建炎中，年八十七，卒。所著有《演仙集》六十卷。

魏任 字亨之。初尉海鹽縣，獲賊。循資授處州節度推官，太守方以嚴明自任，郡卒有忤其意者，將置極典，任力爭之，後獻於朝，卒從任議。徙蘄州防禦推官，承檄攝羅田縣事，縣適草創，經營有方，民不知擾。後以薦改宣德郎，知石城，豪橫斂手，盜賊屏跡，或雨暘不節，祈禱隨應。遇慶典，轉奉議郎、兵馬都監，賜緋。

吳播 紹興間知建寧縣，謹厚有吏才，飭以文學。省科役，擊強暴，奉法愛民，民甚便之。

魏郁 字周文。少游學京師中上庠。及登第，補漳浦尉，適洞蠻竊發，朝命招撫之，郁被檄先往，數日朝命不至，蠻以爲誑已，使立雨中，窘辱之，毅然不少屈。後洞蠻得命，悅甚，厚宴之，餽以白金五百，良馬二，郁不克讓，而納諸公帑。族人虎臣。

虎臣 政和間貢補豐城主簿，被檄按視陂堰，覈實無隱避。後遷潮陽丞，有清儉名。

張維 字振綱，一字仲欽。初調賀州司理參軍，不行，徙汀州軍事推官。盜起屬邑，附從萬衆，抄掠三郡境。維護巡尉兵會大軍討平之。身履巢窟，撫其餘衆。秩滿，丞龍溪。改左宣教郎，知閩縣，首定差役條約，貲倍者半其停年，民以爲便，遂著爲令。積餼錢數十萬，義不自取，民號曰張太清。以便親，自請得主管崇道觀以歸。會陳正獻公知建康府，辟通判府事，又遣攝守當塗，吏戢而民安之。擢廣南西路提點刑獄公事。自虜再通好，維每謂：「符離之役，失於輕舉，而人心終不以爲非。四郡之棄，急於休息，而人心終不以爲是。先嘗告執事者，宜將順正救，使上於起居食息不替坐薪嘗膽之誠，修明政事，俾人心曉然，知朝廷未忘中原之念。」及對，遂以「立志」開上心，且引益之所以戒舜者以謂：「今日正當汲汲自治，不可狃於小康，便謂太平。」語甚切至，孝宗曰：「朕何敢望舜？」維對曰：「有爲者亦若是，願陛下加之意而已。」孝宗嘉納，且俾察部內守令臧否以聞。到部，按行周徧郡縣，陳船渡海所至，邊氓歎噉，以爲百年未始見使者旌節，官吏有望風解印綬去者。還臺，條上臧否若干人，即日施行。就除直秘閣，知靜江府，主管經略安撫司公事。平易近民，拊循周洽。間召長老，從容與語，授以教條，使轉相告戒。禁吏妄賦，奏減經總之額。滯訟或數歲不決者，取故牘置便坐，暇日躬閱視予奪，咸得其情。有暴橫若亡匿者，立誅斬。作興學舍，按故典新社稷、風雨雷帥壇壝，月遣官屬潔除，爲圖以著其兆域，修登降之位甚飭。南丹徭莫氏，以賂結永樂王氏，藉兵以逐其兄而自立，既立，背約，王氏以兵攻之，莫氏困急，請輸，並塞田及銀冶、稅場以乞師。寮屬皆以爲受之便，維曰：「莫、王連兵，正坐貪此爾，又將以啗我耶？國家爲夷夏宗主，屬國不奉條約，正當以義結之。」於是遣一小校持檄往喻，二酋頓顙受命，即日釋兵。或告昭州故盜甘



文誠者謀叛去郡，紿而縛之，欲致之死，維察其非辜，撫遣之。未幾，象郡獯反，使者欲調兵逐捕，維曰：「以官兵人嘗歷險，與猿獠角勝負，非計也。」遣裨校戍山口，且文告之，獯曰：「前年殺凌鐵，往年殺王宣，今年又殺甘文誠，非從若招者耶？誰敢聽命？」維遣文誠示之，則皆大喜，亟遣子入謝罪。進直徽猷閣，留鎮五年。孝宗方謀北略，移軍建康，使者謀作屯營，不如旨，乃召維爲江南東路計度轉運副使。趣入面對，獎維治績，且屬以營屯事。營屯新治就，加秘閣修撰，以寵其勞。江東歲和糴以備儲積，先是，嘗糴三十萬，或以予直太高而損其半，維力爭不能止，至是復以命維，而詔問所以經畫狀，且曰：「監前失，毋傷民。」維卽條奏曰：「前事之失，民以陛下爲不知，故獨歸怨有司。今既知之，乃曰姑以爲監，而不能償，則天下將有以空言疑明詔者矣。」尋召入奏事，因訪軍務得失，稱旨，留爲尚書左司郎中。丁艱，服除，除司業少卿，<sup>(一三)</sup>再人都司。維姿稟端裕，不見喜愠。家無姬媵，祿稍以班族里。平居接物甚夷。剗劖之節，遇事乃見，敷歷中外，聲績藹然。朝廷嘉重，卒以不能逢世，不大見於設施。

黃藻 乾道間知清流縣，興學養士，課試激勸。請蠲貼銀、鈔鹽錢之爲民害者。凡有催科，必究利病，以無厲民。歲大歉，行勸分法，使不饑。鄰寇作亂，自相戒曰：「縣君善政，慎勿玩也。」秩滿，老稚攀轅，數日始得出境。

李信甫 文靖侗之子。歷監察御史，出知衢州，善政善教，不忝家學。擢廣東憲，以特立不容罷去。

范潔 字景圭。南渡初，知新昌縣。披榛櫟，撫瘡痍，以創縣治。紹興間，守光化軍，後守鄂州，終於漕使。二子留居新昌。

黃復 字乾叟。除山陽尉，聞汀寇猖獗，獻廟堂三策。真德秀、陳韓交薦之，教授高郵軍。改興化軍

興化縣。轉通判滁州，與守陳廣中協力拒虜，廣中主西門，復主北門，射殺數千人。後廣中中砲死，復攝州事，士氣復振，城被圍八旬餘，救援不至，<sup>（一四）</sup>遣子書云：「父老矣，食君之祿，繼之以死，猶生之年也。」前後數百戰而歿。總制趙葵、餉臣吳潛上其事，乞爲立廟。所著書凡三十卷。子垕、廣，皆從事郎。

吳一鳴 字伯大。爲潭州益陽尉，帥李華聞其賢，置之幕下，一委以政，復薦於朝，累調泉之德化令。三司歲例，得舉其屬一人，時康維新帥漕，獨無所薦，或問之，曰：「留待賢者。」問爲誰，曰：「吳德化也。」遂得長樂令。縣多上官寄莊苗糧，前官俱不敢督，坐是倉庾愕然，一鳴至，撻參知政事陳偉之幹人，一無所忌，諸勢家聞之，輸納恐後。邑有盧尚書，被賊劫，得其所遺一刀，一鳴悉召縣中冶工，出刀示之，得其工作手，知賊所繇，以計獲之，一訊而伏。後被誣去，邑民號哭於道，執政亦知其枉，復調臨安府僉判。時樞密鄭清，兼修大內，疾作，稔知一鳴賢，遂委代之。官終浙東帥司機宜。

### 皇朝科第

舉人 進士遇子、午、卯、酉是舉人，辰、戌、丑、未是進士，至洪武十七年始定爲例。

洪武三年庚戌鄉試 張文衡 尤旻

十七年甲子 季鏞府學。

二十三年庚午 周盛府學。 石壽

二十六年癸酉 祝壽 徐貴並府學。 王耆

二十七年甲戌 王耆

二十九年丙子 蕭訥

建文元年己卯建文年號已經詔書仍舊，今改洪武三十二年仍稱建文元年。

王壽府學。胡昭善

永樂元年癸未舉人舊志有洪武三十五年一榜，考是歲革除，故元年開科，甲申會試。方達 朱員 章綸並府學。

### 季鐔

二年甲申進士 季鐔

三年乙酉 吳恭府學。王禮

六年戊子 葉宜府學。施顯 朱隆 梁觀

九年辛卯 朱經 謝瑗 張清並府學。李勝 王勝

十年壬辰 葉宜

十二年甲午 丘良府學。范順

十五年丁酉 包耘 吳壽並府學。吳寧

十六年戊戌 吳恭

十八年庚子 朱廣 高祐 陳宗 彭壽 朱盟

二十一年癸卯 羅勝富 陳德宗並府學。鄧富

宣德元年丙午 王嶼考了。張斌並府學。

七年壬子 吳惠 劉祐並府學。符節

正統三年戊午 林同

景泰元年庚午 施觀府學。陳綸

四年癸酉 劉璋 羅明

天順元年丁丑 劉璋

三年己卯 朱顯府學。 胡啓

成化元年乙酉 吳拱恭係孫。

二年丙戌 羅明

四年戊子 曾拱辰府學。

八年壬辰 吳珙 曾拱辰

十年甲午 袁寶府學。 王福興子。 李鳳翔應天中式。

十六年庚子 鄭賢府學。

弘治五年壬子 吳從周府學。

八年乙卯 黃清府學。 陳一言

十一年戊午 陳邦彥 黃相清係孫。 蕭韶 李時修應天中式。

十七年甲子 吳泰 陳福綸子。 蕭欽韶弟。並府學。 吳臻順天中式。 陳璵應天中式。

正德二年丁卯 駱昇府學。

五年庚午 胡瓊府學。

六年辛未 胡瓊

八年癸酉 鄭慶雲 黃焯

九年甲戌 蕭歆 黃焯 鄭慶雲

十四年己卯 陳紳府學。

嘉靖四年乙酉 王滋府學。

八年己丑 王滋

十年辛卯 游居敬

十一年壬辰 游居敬

十二年甲午 黃煖相子。府學。

十六年丁酉 吳必學府學。 羅鍾

二十五年丙午 陳應鶚紳子。

二十八年己酉 鄧應登府學。

三十一年壬子 朱成文經玄孫。 黃成樂並府學。

三十四年乙卯 黃應林焯子。 朱成武成文弟。

四十三年甲子 甯烈

萬曆元年癸酉 王以蒙 陳正謨應鶚子。 朱廷獻成文子。並府學。

二年甲戌 陳正謨

四年丙子 林有梧貢士。瑄子。

七年己卯 林大亨若桂子。

十九年辛卯 丘憲章 應懋璜

二十二年甲午 黃夢瑞府學。

二十八年庚子 陳國禎

三十五年丁未 丘憲章

四十年壬子 魏懋績

四十六年戊午 徐尚卿

薦辟、人才、貢士、監生賢者雜見列傳中。

有傳

王宗仁 魏宗 朱經玄孫成文、成武。 李勝 葉宜 吳恭侄孫瑛。 符節 張榮孫體中。 吳毅 陳

綸 劉璋 朱顯 胡啓 羅明子雲誠。 陳嶼 胡瓊 黃中子焯。焯子應林。 鄭慶雲 陳紳子應鸞。

游綸子居敬。居敬子於北、於廣。 黃煊 羅鍾 吳必學 蕭源子崇禮。 查厚孫應秀。 林縉子應芳。 吳思

立 朱成賢 劉應鳳 黃金 吳思齊 鄧應登 吳道宣 丘舉 黃成樂 施明 徐登第 甯烈 林

若桂 黃縉 王以蒙 林瑄子有梧。 黃應春 黃起莘 陳應桐 楊秉紀

王宗仁 洪武初知會稽，以廉能著。秩滿，去，父老擁留。祀名宦。

魏宗 字本敬。美丰儀，尚寬恕，有幹濟材。繇國子生任台州府同知，陞廣州知府。永樂七年，調寧

波。至，則咨詢民情，察利病，而興革之。驗民丁稅，以均其役，揭示通衢，里胥莫能高下。置櫺座側，訟

至，納詞其中，以次推理，一出已斷，五邑之民，聞風自服，訟庭闐然，有獄空之頌。

朱經 字伯機。任江西德化縣訓導，孝友敦行，勤於訓迪。玄孫成文、成武。

成文 字希純。知於潛，嚴禦礦寇。時與田一菴、王龍溪、錢緒山會講天真書院，究心理學，著《讀書會要》、《越閩議略》、《天目劍津會語》、《鍾臺問答》、《續壤瑣吟》、《藝林枝語》等集。

成武 字維烈。令封川，大羅諸山洞強賊寇城，成武率所訓練兵力禦之。擢判潯州，歷仕柳州貳守，以母老歸養。

李勝 字仲寬。以楷書薦預錄《永樂大典》，書成，願就養。己，中鄉舉，授無爲州判官。崇儒術，有惠政，民爲肖像，祀李冰祠。

葉宜 字守義。除銅仁府同知，擢戶部郎中，遷知衛輝府，陞浙江布政司左參政，致仕。宜在衛輝時，蝗爲民患，齋沐禱城隍，後數日，群鳥飛食之。蝗盡，鳥死，宜出米與民，命盡收死鳥，穿大穴封葬，爲文以祭，號曰鳥塚。

吳恭 字敬昭。選爲翰林庶吉士，與纂修《宣宗實錄》，以疾告歸。久而踰限，部文督責，有司促行，勉強赴部。願就教職，授餘干諭，致仕，卒。恭篤志尚學，淡於世務，天性孝友，家業悉讓二兄。有《學古》、《文集》。侄孫珙。

珙 字廷瑞。知臨淮縣，時城被黃水，外塹高而內城窪，民遭墊溺，珙至，請上官開濬車水，築東西二壩，比舊岸復高丈餘，臨淮人德之。丁外艱，起復，補龍泉。凡衣布之類，悉自其家買置，不取於官。陞戶部主事，致仕。

符節 景泰初任荊州府推官，有學行，公勤清謹，闔郡賢之。

張榮 字顯仁。景泰間貢人成均。成化五年，授星子令。時民多流竄，巡撫、大理卿夏時正檄有司招徠之。榮括邑閑田，召使耕藝，諭富民助之牛、種，賴復業者百餘戶。九載，奏最，陞江西理問，致仕。孫體中。

體中 字居靜。縣歲貢任香山、宣城、福寧學正。學博行端，諸生執經問難者咸服其闡明宗旨。及歸，蕭然。著述有《弘菴詩集》、《溟螺集》，藏於家。

吳毅 字仲剛。以歲貢入太學。宣德間，授戶部主事。嘗督儲浙江，有遺之鮮衣四襲，毅對使者服畢，曰：「拜賜矣。」遂以還之。

陳綸 字孔經。成化初授新興知縣。時流寇充斥，土寇鄧李保等常與交通，所司屢招不服，巡撫、都御史韓雍、總兵范信，統大軍欲盡屠之，綸請緩師，詣壘撫諭，皆稽首降。還言雍、信、雍、信大喜，誅厥渠魁，餘所活萬計。忌者中以事，綸怡然去官。

劉璋 字廷信。授戶部主事，器度溫雅，濟以廉勤恭慎，大為部堂諸卿佐稱許。遷本部郎中，歷山東布政司左、右參政。歲方歉，與同官三人分道賑恤。其二人者，相繼染疫死，璋殫盡心力，經理其間。歷浙江左、右布政使。浙雖大藩，而諸郡倉儲甚少，璋通融一省歲計，損多益寡，支吾目前之外，尚欠米二十二萬石，邊海軍士月糧停支，皆欲棄伍赴省陳告，璋聞，亟遣諭之曰：「錢米具有，支給在旦夕，敢有擅離部伍者，罪。」時巡撫都御史王恕積貯餘糧價銀計數萬兩，璋徑取二萬五千兩散與軍士，然後詣恕請罪。恕知無他，不之責也。成化二十年，陞都察院副都御史，總督漕運，兼巡撫鳳陽。二十一年，改提治鄖陽。未幾，復改巡撫四川。播州宣慰楊輝鍾愛其庶長子友，為請於朝，特置安寧宣撫司，而以友為宣撫，



築城堡居之。其後，友又謀奪嫡，因誣奏其弟襲，宣慰曰：「愛者，有不軌謀，而愛亦許友以不法事。」朝廷遣大臣勘覈得狀，有旨革罷友宣撫，并家屬發保寧府安置。璋謂：「安寧道路險遠，城堡堅固，友少弟敏及其所親附天家、仲家士兵，素好驍勇，友親屬又有爲主謀者，萬一負固不服，連結黨與，行且爲變。」乃閱朝旨不發，先遣友親信者二人詣安寧慰諭友家屬曰：「巡撫謂宣撫遠出，弟敏年少，特遣吾二人者護宣撫印信，以防外侮。」又遣能幹土官數人，各領士兵分截安寧出入道，榜示天、仲二家，諭以逆順禍福，揭通衢，懸重賞，購爲友主謀者。區畫既定，乃出旨宣示，遣官詣安寧收其家屬印信而發遣之。尋復奉勅省刑。有僧如方者，被誣人命，法司以坐其徒月滿。璋訊知其冤，密詢而並出之。一時得平反、免死者四十餘人。遷工部侍郎、南京禮部尚書。在部清慎，以嚴待屬。七年，召爲工部尚書，議政決疑，公平直諒。朝廷有所營建，得璋委曲匡救，省免甚多。弘治九年，以老乞休。疏三上，乃允，特加太子少保，給驛舟還，仍命有司歲給俸米、人夫，優寵備至。璋蒞官四十餘年，喜怒恩威皆因其人，未嘗毫髮私。家居，屏絕戶外，觀書自樂。有所吟咏，本性情，關風化，當世賢士大夫推重焉。年八十三卒，賜祭葬。

朱顯 成化間知香山縣。性寡交游，門無私謁，扶弱抑強，悍卒、豪民戢戢。搏心在事六年，以憂去。

胡啓 任寧陵教諭。治家肅穆，居官廉潔。親喪，廬墓。爲鄉閭所重。

羅明 字文昭。授監察御史。初奉勅清理浙江鹽法，均徭戢橫，權家率斂跡，繼巡按廣西，適有內批，命鎮守少監黃泌取珍禽異鳥入貢，明奏止之。行部所至，憲度嚴整，首次貪吏，境內肅清。還，掌道事。會家宰員缺，覬覦者衆，率同列疏請公議推舉，必得才德兼茂、聞望素著，方以委任。東直門災，朝廷範白金爲真武像，遣中黃門送武當山崇祀，復率同列上疏謂：「徒費財擾民，無益弭災之政。」又因災異迭

見，率同列陳言修省，因及鑾輿游幸南城西海，賜賚無度，非敬天之實。時有人臣以賄罷，夤緣復進者，有近倖越例奏請，得錄幼子入監者，有方面以考察被汰，妄訴屈抑得復職者，俱率同列人奏，追寢前命，時論譴之。遷陝西按察司副使，奉勅撫治漢中，深山茂林，淵藪逋逃，奏立白河縣以安輯之。尋遭內艱，起復，仍副陝憲。州民有竊發嵩洛銀礦，因誣逮平民，論死四十餘人，明爲辯雪，坐者三人而已。遷本司按察使，值歲旱饑，人相食，條上救荒十二事。遷雲南左布政使，以其地去京師遠，民夷櫟居，爲政從簡易而已。未踰年，擢都察院右副都御史，奉勅巡撫甘肅，首奏罷貢獻，以息橫斂；請增貢額，以振淹滯；選秀民，著錄庠序。復奏奪勢家所擅草湖利還軍士。他如均水利、清兵馬、蠲逋負，多所建白。甘肅祭先聖，率用俗樂，至是，命所司講求制度，樂舞器服，一如古禮，邊方耳目如覩文明之盛。弘治己酉，東路有小警，且有詔錄囚徒，明舊苦中煩，至是以勞復作，遂卒。卒後旬月，方有璽書褒獎其區畫哈密功，尋以工部右侍郎召還，皆不及見矣。爲人外和內剛，歷官二十餘年，清介勤慎，始終一致。子雲麟。（一五）

雲麟（一六）字世瑞。當蔭叙，以讓弟雲鳳。以貢士訓導湘鄉。人稱其友。

陳璵 任田州知州，質懿孚於上下。嘗署上思州事，建議立學，士民感之。陞肇慶通判。

胡瓊 字國華。除慈谿知縣，公明自持，宦家勢族，不得出一語，三年邑治。召入試御史考授，一月，以疾歸，結廬東溪之麓，與二三同志講學。疾愈，復起，奉命巡按貴州。風采奮發，鈎刷奸弊，毫髮不遺。毀淫祠，興學校，考立鄉賢、名宦，以規範來者。夷苗作梗，畫計捕平。仍請設兵備雲南霑益控制之，人目爲才御史。以內艱歸。服闋，掌山西道事。屬大禮議起，與諸臣伏闕諫，被廷杖，因疾卒官。瓊孝友天性，事嫡母如所生。家事悉以付弟，私室不蓄一錢。詩文清新，流麗揮灑，道勁可觀。有《九峰稿》、《奏

議數冊。

黃中 字大本。以貢人南雍，授武康丞，視篆。疏河渠，廣儲，均役，民咸利之。性至孝，父疽發背，侍湯藥，匝月不解帶。待伯叔族姓，且篤於恩誼。子焯。

焯 字子昭。繇南禮部主事歷遷永州知府。永人情耕桑，親沒，輒破產飯僧，已則委之野。焯悉行禁教。前有司用兵九溪蠻，費悉出民。焯取郡鹽引錢，貯庫供餉，民賦漸紓，遂爲成式。置舜塚祀田，設守者二人。建濂溪先生祠。闢東山書院，聚文學弟子教之。擢湖省布政司左參政。會使人覲，焯攝事三月，以疾遄歸，羣羨無所取，楚人服其廉。居家，孝奉二親，親歿，祭葬如禮。日閉戶事翰墨，寡人城市。與鄉人居，恂恂如也。次子應林。

應林 字德甫。初令遂昌，以才優調太平。楚門海田多爲潮汐所齧，請當道築塘疏河。復調樂昌，治聲蔚起，致政歸。

鄭慶雲 字舜祥。知灤山、南昌二縣，用威禁惡，敷澤潤善，廉潔果敢，人無後言。召人爲禮科給事中，言論斬斬，是非利害，奮然當之。嘗名其讀書之堂曰劍溪，而請晉江陳琛爲記。琛記略謂：「加刃於心之謂忍，遇敵戰勝之謂克。忍性克己，勇不畏難，是吾劍溪所以爲劍溪也。」

陳紳 字文佩。博學有雋才，知楚寧遠縣。地介西粵，集以苗梗。紳至，徧歷鄉社，用禍福譬曉諸長老酋魁，民以安謐。以親老任遠不便迎養，懇乞改教，換授廣州府學教授。抵家次日，母喪，哀慟成疾，卒。士林惜之。次子應鶚。

應鶚 任濟南府通判。督餉遼東，出納惟允，教民接竹引泉，灌溉田畝。陞萬州知州，致仕。

游綸 字邦濟，宋御史酢裔孫，以貢任睢寧尹。安養休息，亟除民蠹，攘蝗災，濬河道，申減協濟邳州夫千餘名，睢民德之。致政歸。純實簡朴，鄉人無大小，並加信慕。子居敬。

居敬 字行簡。選翰林庶吉士，改授監察御史，以澄清自任。巡視蘆溝，按商人匿稅，語侵司農，司農竦然憚之。巡按應天，劾偽學之聚徒游談、騷擾驛傳者。捕奸黨王冠，置之法。出徽州民屢歲不決疑獄，劾池州守之倚相勢爲墨恣者。出爲浙江按察僉事，覈吏俗，畫民便利，禁湖游，戢戒壇，杭俗爲一變。擢廣東按察副使、湖廣布政參政。仍按察浙江，歷左、右布政使。丁內艱，復，補浙。倭夷猖獗，征調主客兵以數萬計，旁午倉卒，庫無美贏，百凡皆倚辦居敬。居敬處畫，無後一日。議者欲練土著，汰客兵，客兵當關而噪，督撫沮喪莫爲計。居敬挺身前，徐諭數語，皆解散。丁外艱，復，補山東，晉都察院副都御史，巡撫雲南。鎮守沐朝弼故恣橫，居敬以分義裁之，歸其所侵騰越州莊田。東川蠻酋阿堂謀篡東川，強奪府印，擅立作亂，奔烏撒，致與宣慰安萬銓、霑益州土官安九鼎治兵相攻，十餘年不解矣。至是，復侵及羅雄州，逼危會城。居敬上疏，請川、貴兵聯誅之。有旨令川、貴撫按勘明具奏。聞相仗莫先發，居敬又屢招阿堂，不服。乃出不意，督土、漢兵進剿，阿堂窘急，自刎死，三省平定。而沐朝弼故啣居敬裁抑之，言於巡按御史王大人：「討阿堂，朝命會勘，奈何不俟勘得旨，擅興兵者？」大人遂疏劾居敬，坐逮杖頌繫。已，論戍碣石，而前功盡抑。穆宗卽位，赦歸。廷臣交章訟居敬，召起南刑部右侍郎，尋轉左。高新鄭再相，欲甘心徐華亭，無上事，請考察科道官，凡見彈劾者，一網去之。居敬語其所善同官曰：「相君必不忘華亭暨所賞牴牾，此斤斤耳。僕爲相君，姑舍是而一心謀宗社，異日誦相業，孰光大者？」新鄭聞之，恚甚，示意於其門生。其門生以老論居敬矣。居敬方爲三疏，會上之。其一言中貴擅權，其一言時宰作威

福，其一請其鄉之羅豫章、李延平從祀孔廟。而先上從祀奏，新鄭以中旨摘其奏詞繁稱，罰俸三月。而居敬遂乞還，亡何，卒。朝廷遣官諭祭、營葬如故事。居敬學務實踐，身甘茹苦，衣粗食糲，一席十年，漆枕櫛匣，尚青衿時物。歿無幾何，諸子有不能舉火者。子於北、於廣。

於北 字懷蓋。以恩選令零都。有巨奸殺人匿尸，獄久不決，於北廉得狀，獲尸墻下，奸大驚服。再令醴陵，奉例度田，一洒夙弊，縣稱公平。

於廣 字懷約。方居敬之被逮也，蓋方討阿堂，在兵間云。兵間去會城五百里。時於廣從宦官舍，年方十六。念家鮮藏獲，冒寒凍，侵霜露，疾走三百餘里尾居敬。居敬行已至貴州界矣，於廣且饑且馳，旬日始逐得父於普定驛，而隨之。居敬曰：「孝哉，兒嬰！」既長，從閩王應鍾講學。居敬貽書訓之曰：「吾兒志行已逮古人，惟復造詣精純耳。」後以太學生蔭授太僕，歷官戶部郎，卒官。

黃熾 一名熾。歷黃州府通判，剛勁嚴明，以強執招怨。未踰年，陞王府審理。

羅鍾 改名汝賢。歷官南雄府通判，以慈愛稱。

吳必學 字以思。初以舉人署容縣教事，請容令大修學舍，籩豆堵圯，莫不飭修。題科貢姓名於堂左右，以興起之。邑絕科目垂五十年，自必學興學嚴教，遂有領鄉書者。遷知亳州，減徭役，建學宮。丁內艱，服闋，補海州，築城捍倭。改象州，設法靖徭，歲屢稔，竭力賑貸。遷九江、臨江二郡丞，所至清介有聲。致政，家居杜門，郡守重之。

蕭源 字本清。性至孝，母弟以戶役解料被拘之京，道遇寇劫，源恐貽憂其母，鬻己產償之。貢入太學。任南康知縣九載，致仕。子崇禮。

崇禮 以歲貢任枝江教諭，有孝友、文學之譽。

查厚 字文載。性至孝，雖貧窘，奉親必甘脆。任潮陽、星子二縣訓導，陞會昌教諭，用道義訓士。老而乞歸，蔬布晏如。孫應秀。

應秀 字思賢。博綜經史，善屬文。以貢訓長泰、武昌，歷崖州學正，歸。著有《宦游集》、《從祀七賢要旨》。

林縉 以歲貢任安化訓導，以文學稱。子應芳。

應芳 字茂實。弱冠，扶父柩楚南，颶風忽作，抱棺溺湖水中，俄觸沙畔，得留，歸葬如禮。繇選貢訓導，遷吉安教諭、南安教授，解綬歸。入仕、家居，惟以講明道學爲己任。

吳思立 字叔禮。繇選貢諭茂名，艱歸。服闋，補龍泉。尋陞國子典籍，轉典簿。出宰大埔，有壻坑看牛坪三賊巢，世爲潮患，思立至，諭以恩信，賊佯服陰叛。廉知其反覆，相機搗巢，賊黨盡平。終知上石西州。所著有《正學發軔》、《射禮全書》。

朱成賢 以選貢任都司斷事。嘗委署清遠縣，有惠政。卒官。

劉應鳳 以歲貢任潮州府訓導。以孝友稱。

黃金 以歲貢任樂昌知縣，擢淮府審理正，乞養歸。恬淡端嚴。蒞官，民頌。居家，稱於宗黨。

吳思齊 以貢士訓祁陽，陞都昌王府教授。以憂歸，遂不赴補。敦朴恬淡，貧素自甘。

鄧應登 知太和縣，政尚宜民。末期，卒。民思之。

吳道宣 以歲貢歷鄖陽教授。學問該博，模範端方。署邑篆，有清聲。養親孝謹，郡人重之。

丘舉 居家友于。以貢歷任校官。善誘諸生。和平學祀之名宦。終登州府教授。

黃成樂 字和卿。授茶陵知州，擢松江同知，畫策弭盜，治河通灌溉。以長史致政歸，時舉民間疾苦，言之當道，爲郡人造福。

施明 家貧苦學，六經子史，悉能通解。徐文貞司理於延，期以大器。領教南康，士慶得師。及歸，後進景從，鄉評高尚。

徐登第 字時傑。以歲薦授學博，教士以身心性命之學。部使者首薦之，擢令容縣。清守直行，竟掛冠歸。

甯烈 字思畏。令登封。勤慎儉樸，力持風裁，不詭闔宦。被誣，謫廣西臬從事。尋遷興業令，民謠處置兩宜。未幾，解組歸。

林若桂 字斯芳。以選貢授溧陽學訓導，陞遂昌學諭，規條嚴整，恩意流行。陞宜山令，因循舊例，悉行振作。歲旱，集誠禱雨。歲饑，捐俸濟民。辯冤，勦寇，具有能聲。

黃縉 字時升。以恩選授銅陵令。復社學，築圩田。銅陵無城，沿江多警，築城自縉始。

王以蒙 字養夫。令如皋。歲饑，賑貸活民。民以租調至者，令自封識投匭，毫無私焉。擢沔陽知州，卒。

林瑄 字仲和。孝事繼母，善視諸侄。爲諸生時，海忠介瑞方爲學官，特獎薦之。以貢選任博白令。及解綬歸，不問家人產業。子有梧。

有梧 字德陽。守姚州，清介自矢。姚，故土夷，選社師，嚴鄉約，化誨之。恤貧生，旌節孝，防盜賊，

嫩政種種。擢撫州貳守，調知秦州，操守彌勵。歲大旱，步禱疲勞而卒。秦人哀思，祀之名宦。

黃應春 字仁甫。爲諸生時，以孝友聞。以歲薦訓新淦，却貧生贄。遷感恩諭。署樂會篆，講鄉約，汰冗兵，革常例。兩臺交薦，擢國子監助教，致政歸。

黃起莘 字思衡。爲諸生時失偶，不再娶。弟沒，遺二女，長皆厚奩遣之。逼及歲薦，讓友者再，始就薦。訓莆田，識拔門下士，隨皆知名。遷泰寧諭，以骯髒解組。

陳應桐 字維澍。父祚蚤喪，曲撫幼弟。以選貢歷長汀教諭，師模端肅，捐俸賙貧士。

楊秉紀 字國理。以貢選。歷教官平、（一七）江夏、處州，所至却諸生贄。攝龍泉、青田篆，一無所染。嘗著《晚閣庭訓》，有「貽謀以積德爲先，處家以正倫爲主」、「留有餘於百姓，惠無疆於子孫」數語。

將樂縣（一八）

唐進士

天寶七年 廖廣

南唐

有傳

廖居素

廖居素 以剛直見忌。驟諫後主，不聽，服朝衣冠，立死井中，曰：「不忍見國亡也。」

宋科第



大平興國二年丁丑 廖如壘第三人。

咸平五年壬寅 吳濟

皇祐元年己丑 廖子孟第二人。

治平二年乙巳 廖正古子孟子。

四年丁未 蔡栢

熙寧九年丙辰 蔡元方 楊時

元豐二年己未 廖正一子孟子。

政和五年乙未 鍾建侯

童子科 鍾康侯郡邑志只載「政和間」，姑附於此。

宣和六年甲辰 楊選楊一作湯。（一九）

建炎二年戊申 鍾世明 廖瑜

紹興十五年乙丑特奏名 黃大聲

二十七年丁丑 李冲

淳熙八年辛丑 湯煥

嘉泰二年壬戌特奏名 黃宋隆

嘉定十六年癸未 楊淳

童子科 楊能龜山六世孫。郡邑志不載科年，姑附於此。

薦辟、人才賢者雜見列傳中。

有傳

廖正古弟正一。 蔡栢 蔡元方 楊時 張硯 鍾世明 李冲 黃伯固 馮初心

廖正古 字明遠。知西安縣，有惠政。屢言青苗不便，忤當道，乞致仕歸。日與故舊嘯傲山水。屢空，晏如。所著有《歸田錄》。弟正一。

正一 字明略。元祐中召試館職，蘇軾得其策，擊節嘆賞，名亞四學士。居言路，著直聲。出知常州，蔡肇稱其「汪洋之學，瑰瑋之文」。後人元祐黨籍。自號竹林居士。有《白雲集》。

蔡栢 字武子。書無不讀，詞翰傑然，爲藝苑宗。

蔡元方 初主郡陽簿，歷知懷安、博羅、南豐縣，以年勞改奉議郎。爲人果毅明達，遇事立斷。初在懷安，代有日，會更役法，乃親按，一日而畢，吏不得爲奸利。既去，旁邑吏以舞籍得罪，陷重辟，無一免者，吏始相慶。在南豐時，歲大饑，設法賑之。元方在事彊敏。與民約，輒不敢犯，然簡節疏目，使其易避。其破姦剔蠹，必去根本，故所至有風績。

楊時 字中立。熙寧九年進士。調汀州司戶參軍，不赴，杜門種學，淳澹澹涵，人莫能測。程明道在潁昌，時往從學。其歸也，目送之曰：「吾道南矣。」明道卒，復入洛見伊川，年已四十。初讀張橫渠《西銘》書，疑其兼愛，既得聞伊川理一分殊之說，遂大豁然。他日，與游酢侍伊川，伊川瞑坐移時，時與酢立側不去，覺則門外雪深一尺矣。歸，閑居累年，沉浸經史，推廣師說，窮探力索，務極其趣，學者稱龜山先生。久之，調徐州司法。丁繼母憂，服闋，授虔州。丁父艱，服闋，遷瀛州防禦推官。知瀏陽縣，安撫使張

舜民每見，必設拜席，與均禮。漕使胡師文惡張與時善，歲饑賑濟，劾時以不催積欠，坐衝替。舜民人長諫垣，薦之，除荆南教授。改宣德郎，知餘杭縣。遷南京宗子博士，會省員，知蕭山縣。蕭山人間時名，不治自化。人人圖時像家祀之。提點均州明道觀，成都府國寧觀，後例罷。差監常州市易務，年幾七十矣。是時，天下多故，懷安張翥館蔡京所，言時於京，謂此人在上左右，可救朝政之失。會路允迪、傅墨卿使高麗，高麗王問：「龜山先生今在何處？」兩人還，以名聞，遂以秘書郎召至闕，遷著作郎。面對，奏曰：「堯、舜言『允執厥中』，《孟子》言『湯執中』，《洪範》言『皇建有極』，（三〇）歷世聖人繇斯道也。熙寧初，大臣文六藝之言以行其私，祖宗法紛更殆盡。元祐繼之，盡復其舊。熙寧法，一切廢革。至紹聖、崇寧，抑又甚焉。自是分爲二黨，縉紳之禍至今未弭。臣願明詔有司，條具祖宗法，著爲綱目，舉所宜行，而損益其當損益者，勿問元祐、熙豐，一趨於中正而已。」除邇英殿說書，知時勢將變，陳論政事十餘條，執政不能用。而虜騎已入寇，則又言：「今日所急，莫大收人心。邊事之興，免夫之役，毒被海內，誤國之罪，宜有所歸。西城聚斂，東南花石，其害尤甚。宿奸巨猾，借應奉之名，豪奪民財，不可數計。天下積憤，鬱不得發，幾二十年。欲致人和，去此三者，實爲先務。」欽宗嗣位，時乞對，曰：「君臣一體，上皇痛自引咎，託以倦勤避位，而宰執叙遷，安受不辭，此何理也？城下之盟，辱亦甚矣，主辱臣死，大臣宜任其責，而皆首爲竄亡自全之計，陛下孤立何賴爲？乞稍正典刑，用戒不忠。童貫爲三路總帥，虜人侵疆，棄軍歸，置不問，故梁方平、何灌相繼逃去，大河天險，棄而不守，虜人掩至城下，而朝廷不知帥臣失職無甚於此，宜以軍法從事。防城所仍用閩人提舉，授以兵柄，此覆車之轍，不可復蹈。」欽宗大喜，擢右諫議大夫。虜人厚取金帛，又賂以三鎮，遂講和去。時上疏：「河朔，朝廷重地。三鎮，又河朔要藩，一旦棄之，虜庭以二

十州之地貫吾腹中，距京城無藩籬之固，戎馬疾驅，不數日至此，非經久之謀。四方勤王之師，逾月而後集，使之無功而去，厚賜之，則無名；不與，則生怨，不可不慮也。如聞三鎮之民，欲以死拒，若守令以兵躡之，使腹背受敵，宜可爲也。朝廷欲專守和議，以契丹百年之好，猶不能保寧，能保此狂虜乎？」於是欽宗乃詔出師，而議者多持兩端，屢進屢却。時又言：「聞虜人駐兵磁、相，劫掠無算。誓書之墨未乾，而叛不旋踵。肅王初約『及河而還』，今挾以往，此叛盟之大者。吾雖欲專守和議，不可得也。今三鎮之民以死拒之於前，吾以重兵擁其後，此萬全之計，望無惑浮言，斷自宸衷。」而議者不一，坐失機會，於是太原諸郡皆告變矣。朝廷遣姚古出師救援，古逗留不進，時乞誅古肅軍。又率同列上疏，論蔡京、王黼、童貫等罪惡，或死或貶，乞罷宦者典修京城事。且錄五代史以進。又乞褒復元祐名宦凡在黨籍者。力辯宣、仁誣謗，乞復元祐皇后后號。凡所論，皆切時務。李綱之罷，太學生伏闕上書，乞留綱與种師道，軍民集者數十萬，朝廷欲防禦之，吳敏乞用時以靖太學，時得召對，言：「諸生伏闕紛紛，忠於朝廷，非有他意，但擇老成有行誼者爲之長貳，則將自定。」欽宗曰：「此無逾卿。」遂以兼國子祭酒。時言：「蔡京用事二十餘年，蠹國害民，幾危宗社，人所切齒。而論京罪者，莫知其本也。京以繼述堯、舜爲名，實挾王安石以圖身利，故惟尊安石，加之王爵，配享孔子廟庭，自謂所爲得安石之意。議小有異，則輒目以不忠、不孝之名，痛加竄黜，而京得肆意其間。」因歷舉安石邪說，乞正其學術之謬，追奪王爵，明詔中外，毀去配饗之像。疏上，安石遂降從祀之列。時士習王氏學取科第已數十年，忽聞時說，紛然闢之。諫官馮澥上疏詆時。會學官紛爭，有旨皆罷。時卽上章乞出。除給事中，章四上，請去益堅。以徽猷閣直學士提舉西京崇福宮，又懇辭：「職名不當得。」有旨：「楊時學行醇固，諫諍有聲。請閑除職，累月懇辭。宜從其志，以勵廉

退。」改徽猷閣待制。高宗卽位，除工部侍郎，論自古聖賢之君未有不以講學爲務，高宗然之，除兼侍講。二年，以老疾乞出，除龍圖閣直學士，提舉杭州洞霄宮。四年，上章告老。紹興五年卒，年八十有三。近臣朱震奏：「時據經論事，不媿古人。所著《三經義辯》，有益學者。乞下本州抄錄，仍優恤其家。」有旨贈官，賜諡文靖。時天資夷曠，充養有道。積於中者，純粹而閎深。見於外者，簡易而平淡。浮湛州縣四十七年，晚居諫省僅九十日，凡所論列，皆切世道。推本《孟子》性善之說，發明《中庸》、《大學》之趣。渡江以後，東南學者稱爲程氏正宗，而朱熹、張栻得續程氏之統，以接不傳，其源皆出於時。皇朝成化元年，有請從祀孔子廟庭者，詔立祠延平，以羅從彥、李侗配。弘治八年，追封將樂伯，從祀。嘉靖九年正祀典，稱先儒。時子迪，見韋布。

張觀 元祐間通判解州，軍政尚寬簡，吏信民懷。

鍾世明 字仕顯。累官兵部侍郎，賢聲甚著。致仕歸，立義學以教鄉族子弟，發廩粟以賑貧乏。

李冲 字元翁。詞文瞻麗，爲時所重。

黃伯固 字子高。紹興中用薦授建昌尉，調知上高。剖決精明，抑彊扶弱。去官日，餘三千緡，悉留縣庫。累四川安撫使，〔二〕終兵部侍郎。爲人龐博堅凝，鈎經索史，嚴義利，重然諾。歷官中外，清譽流聞。卒謚忠簡。

馮初心 字夢得。篤志嗜學，博洽經史。理宗朝歷給事中，遷禮部尚書。居官不妄薦拔，時號名臣。

### 元進士

元統元年癸酉 張本

薦辟、人才賢者雜見列傳中有傳

張本 吳文誼

張本 字在中。以《滿輪賦》得高選擢第，官至寧都州判。

吳文誼 字宜甫。至正中爲延平路總管。制行高潔，博學，攻文詞。與虞集、張本相友善。

### 皇朝科第

舉人 進士遇子、午、卯、酉是舉人，辰、戌、丑、未是進士。

洪武二十九年丙子 王暹

永樂元年癸未舉人舊志有洪武三十五年一榜，考是歲革除，故元年開科，甲申會試。

吳復

二年甲申進士 吳復

十二年甲午 蕭驥府學。 張聚

十五年丁酉 楊賜

十六年戊戌 張聚

十八年庚子 伍訥

二十一年癸卯 蕭順

宣德四年己酉 黃資

十年乙卯 黃琛

正統三年戊午 溫儀

四年己未 黃琛

六年辛酉 黃英

景泰四年癸酉 傅軫

七年丙子 徐敏

成化七年辛卯 余廉解元。

十六年庚子 余泰

弘治五年壬子 伍聰訥子。

正德二年丁卯 蕭崑

五年庚午 徐濟 熊威應天中式。

嘉靖十六年丁酉 徐霖

二十八年己酉 楊大韶

萬曆十年壬午 張問達

二十八年庚子 余化淳 謝君惠應天中式。

四十六年戊午 林兆蘭

薦辟、人才、貢士、監生賢者雜見列傳中。

有傳

鄭克敬 張可大 王暹 黃玄 陳真 黃聞 吳復 李文殊 王旒 溫儀 黃琛 黃英 余泰

蕭恕 王文祚 楊大韶 車錡 官賢 柯名 王人聘

鄭克敬 字克敬。〔三〕洪武中賜名公正。以薦舉任延平府學訓導，陞監察御史，以廉介見知高廟。

嘗奉使，復命，賜宴不食，大官以聞，上詰其故，對曰：「今日臣父忌辰。」高廟曰：「尊者賜，少者，賤者不敢辭，況君命乎？」對曰：「臣聞：有父子而後有君臣。」上悅，賜寶鈔五錠。

張可大 洪武間以明經辟知龍溪縣，廉明公直，遇事條理不遺。先是，山民頑獷，不輸賦稅，不供□役，〔三〕可大示以約令，民歸順帖然。

王暹 字希白。除廣西興。安訓導，歷靈川教諭，遷國子助教。學行飭修，祭酒而下咸推重之。秩滿，除翰林院檢討。終編修。

黃玄 字玄之。福清林鴻爲將樂教官時，玄嚴事之。鴻有詩：「青衿二十徒，達者推黃玄。」鴻家居，玄挈妻子入福州，終身師焉。久之，以歲貢訓導泉州，卒於官。家養黃犬，玄出則送，玄入則迎。玄卒，犬鳴啁垂淚，俯伏戶側，旣斂，徬忽不見，遂投河死，泉人稱義犬云。

陳真 字思誠。恬淡寡嗜。以歲貢授饒州府通判，轉安慶，陞知揚州府。政尚平恕，加恤貧民。歲早，徒跣自罪，兩隨禱霽。所至，種蔬自給而已。

黃聞 以歲貢任本縣訓導，學贍才富，善於文詞。

吳復 字克初。除監察御史，陞廣東按察副使，以風節聞。

李文殊 字宗禮。永樂四年膺楷書薦，除工部給事中。左遷榮河丞。洪熙改元，召爲戶部照磨。陞



工部主事，轉刑部，陞郎中。尋陞廣信知府。歷仕中外，廉靜寡慾，政簡民安。布素蔬食，無異貧寒。正統間，沙、尤寇圍縣，城就陷，文殊年七十餘，力贊攻守。又奏減一縣糧差，乞勅大臣訪察，疏釋脅從，當沙、尤二縣之半，分置一縣，以兵守之。制可，名縣曰永安。

王旒 以太學生知萍鄉縣。廉慎公正，興學獎士，急於惠民。時增置一丞，專職賦稅，旒以冗員病民，奏革之。遷西城兵馬指揮。

溫儀 字仲威。除溫州府推官，廉慎善治獄。平陽葉八反，儀率土兵攻破夾嶼山，入賊壘，斬獲幾三百人，還所俘平民男女百八十餘。既而，泰順徐懷思復叛，儀直搗巢穴，斬獲甚衆，擒懷思并其黨三十餘人。巡撫、尚書孫原貞以聞，進五品秩。

黃琛 字廷獻。正統中授戶部主事，署員外郎。時朝廷遣使者巡撫江南，總督糧儲，有言其歲久糧耗而弊滋，繇是命琛出按。蒞事精嚴，覈實聞奏，不爲典司者隱，曰：「此皆國之賦用，民之膏血也。」陞郎中。景泰癸酉，陞江西左參政。進左布政使，洞寇朱紹綱叛，閩臬諸重臣議據要害，俟其出而擊之，琛曰：「賊所恃者，山谿之險耳，安知所謂戰耶？掩其未備，直搗巢穴，可繫頸矣。」衆意決，遂率師以行，夜二鼓，破其壘，俘紹綱，餘黨悉平。丁內艱，起復，調浙江，所至不察察簿書，而惟植善抑邪，保境安人，尤注意守令之選。成化丁亥，遷南京戶部右侍郎，奉勅四川巡視，撫按考察，悉從便宜，琛求民隱，精黜陟，偏州小邑，躬自涉歷，有所陳白，悉報可。辛卯，復任，奏乞歸展省，未得命，病卒。琛外和內剛，寡交與，有清鑑。好善嫉惡，出於至誠。自處潔廉簡約，於物澹然，而倫誼大節，則一事不苟。晉陵楊叔瓊常言：「黃公，可託妻寄子人也。」張節之曰：「交游中如廷獻，真不愧學者。」

黃英 任雲南府同知，持已愛民，卓有正聲。九載，陞本府知府。

余泰 任興寧知縣，剖滯訟，出誣繫。宋縣令顏袞，主簿徐千能同時死節，爲之收誌立祠，率父老祇謁。鄰封龍圭、石馬二洞，舊戍與賊通，隱爲陳利害，洞賊帖服。乞休歸。

蕭恕 字汝推。弘治中由貢任瀏陽丞，三五甫期，遂致仕歸。恕博學好古。蚤失怙，感先人踏雪處，作憶雪亭以追思之，吳文定寬爲賦詩。居母喪，一遵古禮，哀痛踰常。貢入北雍，爲祭酒謝鐸所重。所著有《平齋吟稿》、《三華百咏詩》。

王文祚 字祐之。以貢授撫州府知事，居官清儉。善書能文。年八十餘，卒。

楊大韶 字子舜。初令唐山，再補武緣。八寨叛獮章銀豹等分據爲梗，大韶單騎入寨，諭以威德，遂降之。監軍霍與瑕嘆曰：「楊君膽略可當萬夫。」弟大武，建安教諭，以長者稱。

車錡 萬曆初以貢授光澤教諭，平心率物，加意作人。

官賢 字子選。幼貧甚，父、母、二弟，饔飧不給，賢苦學贍養。以恩選任溫州司理，全活民命最多。工草書，善丹青、吟咏、著述。

柯名 字君正。爲諸生，食貧能孝。萬曆間，以貢選令易門。擢守河池，興水利，格夷酋。陞慶遠。二守治績可稱。解組家居，鄉人高其行誼。

王人聘 字良起。苦學勵行。膺貢選，訓導清流，以正學作人，賑恤貧士。遷南靖諭，乞歸。

大田縣〔二六〕

宋科第

元祐三年戊辰特奏名 連正臣原隸尤溪。

紹興元年甲戌特奏名 戴興原隸尤溪。

十二年壬戌特奏名 林格原隸德化。

三十年庚辰 陳師文原隸德化。

有傳

#### 俞亨宗

俞亨宗 以朝請郎知漳州，奏粥鹽，免場河渡等錢，捐俸代納民丁錢，及除四縣科罰錢。所著有《林山思古錄》、《群經感發》等書。

#### 皇朝科第

舉人 進士遇子、午、卯、酉是舉人，辰、戌、丑、未是進士。

正德十一年丙子 田瑱原隸尤溪。

十六年辛巳進士是年以武廟南巡，改庚辰爲辛巳。 田瑱

嘉靖四十年辛酉 田一儁

隆慶元年丁卯 陳宗寶

二年戊辰 田一儁會元。

四年庚午 田瑄一儁從父。順天中式。

五年辛未 田瑄

萬曆四十六年戊午 葉其蓁

薦辟、貢士賢者雜見列傳中。

有傳

田頊 田一儁 廖憲

田頊 字希古。領鄉薦，計偕，不赴，讀書秬麓。已，登進士，授戶部主事。改兵部，尋轉禮部員外郎中。與張治、廖道南、王用賓、鄭善夫輩以文章相砥。陞湖廣提學僉事，至則闢濂溪書院，采集郡士其中。飭士先行後文，時時與講究性命經濟之學。一時議拔皆爲名雋。遷貴州按察副使，念母乞歸，時年四十餘而已，撫按交薦五上，不起。後母九十七終，頊攀號擗踊，有如孺慕。家居三十年，絕跡城府。流賊掠城，頊出私財，募死士環守，賊因以遁，邑人德之。頊爲文簡奧，詩詞有李夢陽、鄭善夫風。

田一儁 字德萬。隆慶戊辰舉南宮第一，選庶吉士。讀中秘書，孫心經濟，雅以大節自砥。庚午，授編修。尋奉使淮藩，不受藩王餽。復命，充經筵起居官，修累朝實錄。旋陞修撰。晉侍讀，管制誥。萬曆丁丑，張江陵相奪情，輒假旨杖諫者，箝制天下。同舍郎趙用賢、吳中行二公與焉。一儁亟與趙公志舉謀抗疏論救，時王公錫爵視院篆，則相戒毋累聖德，姑過張所諷勸之。於是王公偕志舉及一儁、張公位、習公孔教詣張所，首爲杖者解。張默不應，則奮氣昌言，備責以綱常之義，且曰：「天地鬼神，其可欺乎？天下萬世之口，可盡箝乎？」語峻直甚。張憤慚無地，顧左右，欲引佩刀自裁，一儁與諸公大笑，拂衣出。張大恨，於是志舉、孔教被逐，而一儁與王公錫爵先期告歸。亡何，張敗，起故官，同修《大明會典》，然終非所樂，數月復引疾歸。久之，起家，以官寮視留篆，攝司成事。居二年，召修玉牒。已，擢國子監祭酒，飭

規條，絕貴近關說，出序視人，一無所假。有一生持刺求進越，一偶故召試，抑奪之。生驚甚，寓言譏訕。一偶曰：「吾抗顏爲弟子師，當爲生徒湔滌倘葛狀。」疏上於朝，斥爲編氓。諸士始遠遠閑軌。己丑，擢禮部右侍郎，兼侍讀學士。旋轉左，教習庶吉士，諄切不倦，時與講求經濟與立朝大節，無不人人顧化者。以病請，未發，卒邸舍。詔贈尚書，諭祭，給郵，予葬費。一偶恬淡寡慕，居恒辨一介，然不欲以潔自標。歷宦廿餘載，莫知其貧，迨病篤，諸門人更直侍卧榻，睹所食用，率粗糲疏布，夫然後知其蕭然寒士也。

廖憲 萬曆二年以歲貢守永安州，時諸峒初征，人懷猶豫，靡有固志，憲城杜莫寨以衛居民。會三峒殘黨復據山灣，密授部民方略，破之。修署廨，建學宮，纂邑乘，開支河。擢惠州府丞。

〔校記〕

- 〔一〕「將樂縣 大田縣」六字，各本原脫，據本書體例補。
- 〔二〕「南平縣」三字，各本原脫，據本書體例補。
- 〔三〕「廖」作「康」，各本原作「一廖作康」，據文義改。
- 〔四〕「練」作「陳」，各本原作「一練作陳」，據文義改。
- 〔五〕「范」作「危」，各本原作「一范作危」，據文義改。
- 〔六〕「一九」「楊」作「湯」，各本原作「一楊作湯」，據文義改。
- 〔七〕「直」作「真」，各本原作「一直作真」，據文義改。
- 〔八〕「九」「湯」作「楊」，各本原作「一湯作楊」，據文義改。

- 〔二〇〕「癸丑」二字，各本原脫，據本書體例及方詩銘《中國歷史紀年表》補。
- 〔二一〕「陳」下，各本原闕一字。
- 〔一二〕「守城」，各本原作「城守」，據文義改。
- 〔二三〕「除」字，各本原脫，據文義補。
- 〔二四〕「救援不至」，各本原作「舊援不至」，據文義改。
- 〔二五〕「一六」「雲麟」，傳記目錄作「雲誠」。
- 〔二七〕「歷教官平」，疑作「歷教宣平」或「歷教官平江」。
- 〔二八〕「將樂縣」上，各本原衍「延平府」三字，據本書體例刪。
- 〔三〇〕《洪範》，各本原作《皇範》，據文義改。
- 〔三一〕「安撫使」，各本原作「安撫置使」，據《宋史·職官志》改。
- 〔三二〕「字克敬」，原文如此。
- 〔三三〕「不供」下，各本原闕一字。
- 〔三四〕「此皆」，各本原作「皆此」，據文義改。
- 〔三五〕「由貢任」，各本原作「世貢任」，據文義改。
- 〔三六〕「大田縣」上，各本原衍「延平府」三字，據本書體例刪。

閩書卷之一百二

英舊志 縉紳

延平府 沙縣一

宋科第

開寶八年乙亥 張確狀元。

雍熙二年乙酉 陳世卿

淳化三年壬辰 鄧九齡 張若谷

天禧三年己未 羅覺

皇祐元年己丑 曹寶臣

五年癸巳 羅仲元

熙寧三年庚戌 蕭嶼 鄧裴 張靚

六年癸丑 曹格 余括余一作俞。 陳珏世卿孫，俱次子。 鄧甯

九年丙辰 張駕後改名翥。 羅畸 曹將美

元豐二年己未 陳瓘第二人。珏弟。余援一作授。

八年乙丑 曹約

元祐三年戊辰 陳戢瓘侄。黃習

紹聖四年丁丑 張汝楫 陳昇 曹恂

元符三年庚辰 張公裕公一作元。曹中輔弟。曹輔 陳戢珏弟。鄧圓中

崇寧二年癸未 鄧時可

大觀三年己丑 陳麟

政和二年壬辰 曹繼時 陳薦可復姓羅。樂公充

三年癸巳釋褐 曹立

四年甲午釋褐 張洙若谷曾孫。

五年乙未 曹璿賢

重和元年戊戌 鄧序 曹僊將美子。

宣和二年庚子釋褐 鄧文饒甯侄。

三年辛丑 張翊一作翹。張致遠翊弟。范引吉

六年甲辰 鄧秀 鄧驥 羅興

建炎二年戊申 鄧祚 鄧祥九齡孫。俞敷括子。葉隆吉

紹興二年壬子 張秀穎



特奏名 羅從彥

五年乙卯 曹偉將美子。 曹襲輔孫。 陳彭老世卿玄孫。

八年戊午 鄧鸞一作鸞。 陳淵璫從孫。

十二年壬戌 張夔 鄧觀甯子。 鄧服采

十五年乙丑 鄧晞一作晞。圖中子。

十八年戊辰 俞肇 陳良弼昇孫。

二十一年辛未 陳損城侄。 鄧郊琇侄。

二十四年癸酉 鄭木

二十七年丁丑 陳大年璫孫。

隆興元年癸未 蕭尹躬璫孫。

乾道五年己丑 鄧遠舉鸞孫。

淳熙二年乙未 鄧驛第三人。 曹溪襲侄。 張存之秀穎子。

五年戊戌 陳大應大年弟。

八年辛丑 陳芑戩孫。

十一年甲辰 鄧鵬舉明暉子。 鄧渙 范祥

十四年丁未 羅時用薦可孫。

紹熙元年庚戌 陳光遠璫孫。

四年癸丑 鄧文龍煥章侄。

慶元五年己未 張鈐虎

嘉泰二年壬戌 曹道輔孫。 羅博文崎孫。

開禧元年乙丑 鄧炎

嘉定四年辛未 胡清獻 陸順

特奏名 鄧駱 鄧襲之 陳升

七年甲戌 鄧宗仁杵侄。

特奏名 張安

寶慶二年丙辰特奏名 陳光輔

紹定二年己丑特奏名 鄧矩

五年壬辰特奏名 倪閃第一人。 羅號

端平二年乙未特奏名 蕭山一名石。 黃澄 蕭騶 陳章 蕭燃

嘉熙二年戊戌特奏名 鄧攀龍宗仁子。 黃注 樂師叔

淳祐元年辛丑特奏名 鄧世

四年甲辰特奏名 鄧文勉 陳卓

七年丁未 趙必嘸 鄧侃

十年庚戌 胡驛清獻侄。

特奏名 翁次益

景定三年壬戌特奏名 張淵 曹融 陳蒨 曹深 曹繪 陳羽 曹利用 黃當時 徐光大一作大

光 翁木

甲科 蕭璵

八行 鄧密密弟 鄧宗豐一作曹。自璵而下，舊志不載何年，姑附於此。

薦辟、人才、任子賢者雜見列傳中。

有傳

陳世卿子傳。偶子璵。璵從孫麟、淵。 張若谷 鄧甯 張弼 羅崎孫博文、侄從彥。 曹輔弟中。 羅

薦可 張致遠 鄧肅 鄧柞 鄧驛 鄧庚 倪閃 蕭山

陳世卿 字光遠。解褐衡州推官，再調東川節度推官。李順寇兩川，知州張雍使幕分守禦，世卿當城一面，射中數百人，而同幕皆自爲計，正色叱之曰：「此皆懦儒不足仗。」亟白雍遣出求援，賊既引去。

世卿適丁外艱，雍表其材，詔追出視事，就改掌書記，凡七年，召爲秘書郎，遷太常丞、知新安縣。或薦其堪任憲臺，即召歸。會張鑑出知廣州，表爲通判。將行，召見，賜緋，加太常博士。景德初，徙知建州。真宗知其材，踰月，授福建轉運使，規畫南劍州安仁等銀場，歲增課羨，詔書嘉獎。俄代姚鉉爲兩浙路轉運使，歷祠部員外郎，判三司三勾院。大中祥符四年，改度支員外郎，出爲荆湖北路轉運使。屬澧州、慈利縣、下溪等四州蠻人侵縣境四百餘里，朝命世卿與閩門祗候史方、知澧州劉仁霸同領兵討之，遂還所侵地。標正經界，取其要領。又令納所掠漢口千餘，復置澧川、武口等砦控制之。再有詔嘉獎。還朝，屢述

溪峒利害，召對，真宗器之。復請領劇自効，授秘書少監、知廣州，加賜金紫。奏除計口買鹽法，廣人與前守邵曄並稱。九年，卒，贈吏部尚書，錄其子南安主簿儼爲太祝，後官至比部員外郎。餘子：侃，古田尉；佩，衛尉寺丞；偉，同學究出身；偁，見下。

偁 字君舉。以父任補太廟齋郎，再調羅源令，有惠政。調通判蔡州，力爭死獄五人。知惠州，州有豐湖，稅民魚，湖廢而稅尚存，偁堤湖數里，時蓄洩，魚利歸民，奏免其課錢凡五十餘萬，民建祠祀焉。移治宿州，用嚴爲治，獄空訟息。召知開封府，屬新法行，請外，知泉州。未幾，坐開封府陷失青苗錢，罷，州人聞之，期三日哀錢五十萬償負，贖留之。改知尉州，築堤十里以防皖溪之患。元豐五年，再知泉州，歲旱，教民用牛車汲水人東湖溉田。舊法：番商至，必使詣東廣，否則沒其貨。偁請立市舶司於泉，哲宗立，詔從其議。以朝議大夫致仕，贈特進。子瑗，汀州推官；珏，校書郎；瓘，見下；璣，知吉州。

瓘 字瑩中。中甲科第三，調湖州掌書記。元祐四年，僉書越州判官，時蔡卞爲越州守，每事加禮，而瓘輒自遠，屢乞歸，章不得上。檄攝通判明州。章惇入相，瓘隨衆道謁。惇聞瓘名，邀與同舟，問當世務，瓘曰：「請以舟喻，舟勢偏重，其能行乎？移左移右，則皆偏勢。」因問：「今天子待公爲政，公將奚先？」惇曰：「司馬光姦邪，當辨耳。」瓘曰：「公舟偏矣，果爾，將失天下望。」惇曰：「司馬獨執朝柄，不務續述，大更神考之政，誤國如此，得非奸邪？」瓘曰：「跡則似矣。不察其心，又復改作，則誤國滋甚。」因爲惇極論熙、豐、元祐之事，以爲元豐之政，多異熙寧，則先志固已變而行之，惟司馬不明先志，而用母改子之說，（一）施之太驟，所以紛紛至今。爲今之計，惟當絕臣下之私情，融祖宗之善意，消朋黨，持中道，庶可救弊。意雖忤惇，然亦驚異，留瓘共飯而別。到闕，召爲太學博士。會淳與蔡卞合志，（二）瓘論遂絀。

遷秘書省教書郎，紹述之說盛行，瓘上奏哲宗言：「堯、舜、禹皆以『若稽古』爲訓。若者，順而行之，稽者，考其當否，所以成帝王之治。帝王之孝，與士大夫異。」帝反覆究問，語遂移時，意甚感悅，約再人見，有變更時事之意。執政聞而憾之，出通判滄州，知衛州。徽宗卽位，召爲右正言，遷左司諫。蔡京、蔡卞羽翼章惇，京復陰結權貴，徽宗將有大用之意。瓘上疏力言，先後凡十上，末疏言：「翰林學士承旨蔡京，當紹聖之初，兄弟在朝，贊導章惇，共作威福。卞則陰爲謀畫，惇則果斷力行，而京則且謀且行。哲宗篤於繼述，事無大小，聽惇不疑。卞於此時假紹述之說，以美私史。惇於此時因委任之篤，自明己功。京則盛推王安石之聖過於神者，又推定策之功毀滅宣仁。惇之矜伐，京爲有助，卞之乖悖，京實贊之。當此之時，言官常安民屢攻其罪，京與惇、卞共怒安民，協力排陷，斥爲姦黨。而孫譔、董端逸、陳次升因論京，相繼斥逐。哲宗晚得鄒浩，不繇進擬，置之言路。浩能忘身徇節，上副聖意，京又因其得罪而擠毀之。七年之間，五害言者，掩朝廷之耳目，成私門之利勢。言路既絕，人皆鉗默，凡所施行，得以自恣，遂使當日之所行，皆爲今日之所蔽。」遂舉京四事，皆天下所以議京者，爲徽宗言之。徽宗以瓘所論不根，罷右司諫，添差揚州糧料院。瓘上章：「臣上件所言，在既責揚州糧料院以前，陛下若以臣言爲是，則當如臣請，按京之罪，明正典刑，然後改臣差遣，以明聽納。若以臣言爲罪，則當重加貶竄，乃得允當。今臣章屢上，未蒙降出，則是陛下不以臣言爲信。不信而輕於改命，傳之天下，人必惶駭，其累聖政不少。」尋改知無爲軍。瓘判明州時，則已作《日錄辨》，以闢王安石傲妄。及是，以軍事奉行詔勅，乃知天下根本之財盡運於西邊，緣都司職事看詳內降劄子，因述錄之，名《國用須知》。明年，還爲著作郎，遷右司員外郎，兼權給事中。宰相曾布屢薦瓘於徽宗，遣人諭意云：「將大用。」瓘作書投布，兼以《日錄辨》、《國用須知》送布所，

言布：「尊私史而厭宗廟，緣邊費而壞先政，違神考之志，壞神考之事。二者天下所共知，而聖主不得聞其說，蒙蔽之患，莫大於此。」閣下試一讀璫《日錄辨》，〔四〕則所謂尊私史而厭宗廟者可見矣；試一讀璫《國用須知錄》，則所謂緣邊費而壞先政者可見矣。」布得書大怒，顧反嘻笑，語曰：「此書他人得之必怒，布乃不爾，雖十書不較也。」璫出，即錄所與布書及《日錄辨》、《國用須知錄》以狀申三省，乞行竄逐。信宿，出知泰州。徽宗語布曰：「卿一向引陳璫，朕道其議論偏乖，今何如耶？」崇寧中，除名，竄袁、廉二州。五年，遇赦，移郴州，稍復宣德郎。而璫子正彙在杭，告蔡京有動搖東宮之跡。杭守蔡鞏執送京師，先飛書告京，事下開封府制獄，併逮璫。璫入獄見正彙，笑曰：「不肖子煩我一行京使。」權尹李孝壽治其獄，璫對獄：「璫子聞京將不利社稷，傳於道路，璫得預知，以所不知指其爲妄，父子之恩情所不忍。挾私情以符合其說，又義所不爲也。」顧京之奸邪，璫嘗論之於先矣。」獄具，正彙坐流海上，璫安置通州。璫在通州，復取前在明州時所著《日錄辨》推而廣之，名《尊堯錄》。蓋以神宗比堯，徽宗比舜，助舜尊堯，以明紹述之非，釐爲入門，合論四十九篇。而爲之序曰：「臣聞先王所謂道德者，性命之理而已矣。此王安石之精義也，有《三經》焉，有《字說》焉，有《日錄》焉，皆性命之理也。蔡卞、蹇序臣、鄧洵武等，用心純一，主行其教。其所謂大有爲者，性命之理而已矣；其所謂繼述者，亦性命之理而已矣；其所謂一道德者，性命之理一之也；其所謂同風俗者，性命之理同之也。不習性命之理，謂之曲學；不隨性命之理，謂之流俗。黜流俗，則竄其人；怒曲學，則火其書。故自卞等用事以來，其所謂國是者，皆出於性命之理，不可得而動也。臣昨在諫省，所上章疏，比安石於伊尹，此時猶蔽於國是也。神考任用安石，止於九年而已，初用後棄，何嘗終以爲是。而臣所上章疏稱安石爲神考之師，此時猶蔽於國是也。臣以言取禍，賴陛下

賜之餘命，臣感激流涕，念念循省得改過之機焉。蓋臣所當改者，亦性命之理而已。臣伏見治平中，安石倡道之言曰：『道隆而德駿者，雖天子北面而問焉，而與迭爲賓主。』自安石倡此說以來，幾五十年矣。國是淵源，蓋兆於此。臣聞天尊地卑，乾坤定矣。定則不可改也。天子南而，公侯北而，其可改乎？安石性命之理，乃有天子北面之禮焉。夫天子北面以事其臣，則人臣何面以當其君？《日錄》云：『卿，朕師臣也。』乃安石矯造之言。又曰：『督責朕有爲。』豈神考親發之訓。既託訓以自譽，又託訓以輕君。輕君，則訕侮譏薄，欲棄名分。自譽，則驕蹇陵犯，前無祖宗。其語實繁，聊舉一二，誣脅臣鄰，何足縷道。上干君父，可不辨乎？自到闕以來，至爲參政之始，不錄經筵之款奏，但書七對之游詞。載神考降問之諮詢，無一語仰及於三代。言神考但慕魏葛，謂厥身不異乎皐、伊。仍於供職之初辰，首論理財之不可，謂宣利而壞俗，陳孟子之格言，凡他人極論之辭，掠爲己說。彼所獻管、商之術，歸過先猷，恣揮悖譟之筆，盡假神考之言，矯誣上天，孰甚於此？祖宗之威靈如在，聖主之繼述日新，若不辨託訓之辭，何以解在天之怒？神考禮貌勳賢，彼則曰含容奸慝；神考嘉納忠直，彼則曰不懲小人。又謂：『奸罔之徒，陛下能誅殺否？』比忠良於元濟，責神考爲憲宗，請不可以罷兵，當必勝而後已。神考守不殺之戒，以天地好生爲心，厭棄其言，眷侍寢薄，先逐鄧綰，次出安石。至熙寧之末，安石前日之所怒者復見收矣，至於元豐之末，司馬光前日所言者復見思矣。卞等不遵神考末命，但圖己私，以專紹安石爲心，以必行誅殺爲事，請於哲宗，而哲宗不許，請於陛下，而陛下拒之。人心歸仁，天助有德，遂使奸謀內潰，逆黨自彰。卞等不敢居金陵，人亦不復聖安石。侮從王氏，豈獨臣哉。聖人，人倫之至也。傲上亂倫，豈聖人乎？聖人，百世之師也。教人誣僞，豈聖人乎？身處北面人臣之位，而受子雋僭竊之名。雋爲安石畫像贊曰：『列聖』

垂教，參差不齊，集厥大成，光於仲尼。」蔡卞書之，大刻於石，與雋所撰《諸書經義》並行於世。乃者，天子幸學拜謁宣尼，本朝故臣坐而不立，躋此逆像，卞唱之也。輔臣縱逆而養交，禮官舞禮而行諂，驚冕夷俟，載籍所無。屢加於冠，何以示訓。自有中國以來，五品不遜，未有如此。尊主愛國之士，孰敢以爲是乎？極天下之所非，尚可爲一國之所是。昔者國是初立，使惇行之，惇既竄逐，移是於布，布又竄逐，移是於京。三是皆發於卞謀，三罪同歸於誤國。然則果國是乎？果卞是乎？神考之逐鄧綰也，可見悔用安石之心。哲宗之竄常立也，可見斥絕安石之意。兩朝威斷，天下皆以爲至明。陛下光揚，亦以去卞爲先務，掃除舊穢，允協人心，布澤日新，上合天意。臣因論私史，禍隙至深，得存餘命，全繇聖斷。臣身老病，決知處世難久，與其齋志於歿後，孰若取義於生前。義在殺身，志唯尊主。」張商英爲相，獨取其書，既上，而商英罷。又徙瓊台州，宰相遍令所過州出兵甲護送。至台，每十日一徙告，且命凶人石忼知州事，執至庭，大陳獄具，將挾以死。瓊大呼曰：「今日之事，豈被制旨耶！」忼曰：「朝廷令取《尊堯集》耳。」瓊曰：「然則何用許？使君知《尊堯》所以名乎？蓋以神考爲堯，主上爲舜，助舜尊堯，何得爲罪？時相學術粗淺，爲人所愚，君所得幾何，亦不畏公議耶？」忼時已窘瓊百端，而宰相猶以爲怯而罷之。在台五年，乃得自便，纔復承事郎。徽宗令再叙一官，仍與差遣，執政持不行。卜居江州，復有譖之者，至不許輒出城。旋令居南康，纔至，又移楚州，使不得一日安處，竟卒於楚州。靖康初，詔贈諫議大夫，召官正彙。紹興中，高宗讀《尊堯錄》而是之，賜謚忠肅。瓊謙和矜莊，通《易》數。嘗與校書郎范淳夫同事，淳夫論顏子不遷怒，不貳過，唯伯淳有之。瓊驚問爲誰，淳夫默然久之，曰：「不知有程伯淳耶！」瓊深以寡陋爲媿，作《責沈文》自責，自是從楊龜山而學焉。其云「責沈」者，謂葉公不知孔子，問於子路也。當瓊投書曾布時，命正彙爲



書，而語之曰：「吾與丞相議多不合，丞相遣人諭意，是以官爵相縻餌也。若受其薦進，復有異同，公議私恩兩有媿矣。吾獨投丞相書，以決去就。汝爲我書，顧郊祀不遠，彼不相容，則澤不及汝，以此介心。」正彙欣然書之。後官至直秘閣。次子正同，敷文閣待制。兄子正敏，朝奉郎。正式、興宗，皆以詩名。孫大方，建州通判。從孫麟、淵。

麟字夢兆。爲閩縣令，有富人誣里人爲盜，麟辨其冤，尋獲真盜，邑人神之。勢家欲徙人墓，以屬麟，麟不可。部使者杖縣吏撻之，終不爲動。部使者復令諸邑求翠羽、奇花、怪石，麟不顧。遣人謂曰：「汝何恃？敢此！」應曰：「孤寒小官，侍潔已耳。」時與黃宗、翁公號閩中三循吏。紹興初，知韶州，鄰寇至，率所部敗之，執其渠魁及餘黨數百人。擢湖南轉運判官。孫光遠，石城令。

淵字知默，初名漸。受學程門，獨先於瓘。楊龜山稱其深識聖賢旨趣，以女妻之。紹興五年，給事中廖剛、中書舍人胡寅、朱震、權戶部侍郎張智遠言：「淵乃瓘之諸孫，有文學，垂老流落，負材未試。」充樞密院編修官。會李綱以前宰相爲江南西路安撫制置大使，辟爲制置司機宜文字。七年，詔侍從舉直言極諫之士，胡安國以淵應。召對，改官，賜進士出身。九年，除監察御史，尋遷右正言。人對，論：「比年以來，恩惠太濫，賞給太厚，頒賚賜予之費太過。所用既衆，所入實寡。臣讀《周官》：『唯王及后、世子不會。』說者謂不得以有司之法治之。周公之爲此法也，非開後世人主侈用之端也。以九式均用節財，冢宰治之矣。王、后、世子若有越式，冢宰得執論之，若事事如式，又何待有司之會。陛下凡有錫賚，法之所無，而於例有疑者，臣請得使三省共議，戶部得人執奏。」而對，因論程頤、王安石學術同異。上曰：「楊時之學，能宗孔、孟。其《三經義辨》理甚當。」淵曰：「楊時始宗安石，後得程顥師之，乃悟其非。」上曰：

「觀《三經義解》，具見安石穿鑿矣。」淵曰：「穿鑿尚小，至於道之大原，安石無一不差。」上曰：「云何？」淵曰：「聖學所傳，止有《孟》、《論》、《中庸》。《論語》主仁，《中庸》主誠，《孟子》主性，安石皆暗其原。仁道至大，《論語》隨問隨答。以愛人語樊遲，特其一端而已，而安石遂以愛爲仁。其言《中庸》，則謂中庸所以接人，高明所以處己。《孟子》七篇，專發明性善，而安石取揚雄善惡混之言，至於無善無惡，又溺於佛，其失性遠矣。」因論和議，淵願以和爲息戰之權，以戰爲守和之具。章五上，益切。檜惡之。會檜親黨鄭億年復資政殿學士，奉朝請，召見於內殿，淵言：「億年，故相居中子，雖爲從官，而有從賊之醜，乞寢其職名。」不報。繇是檜益怒之，除秘書少監，兼崇政殿說書，以祖名辭。改宗正少卿，以何鑄論罷，主管台州崇道觀，卒。

張若谷 字德繇，一曰德謙，一曰德元。爲巴州軍事推官，會蜀寇掠鄰郡，若谷攝州事，率衆守禦，賊引去。調全州軍事推官。人見，真宗識其名，曰：「是禦賊巴州者耶？」特改大理寺丞、知濛陽縣。三司言：「廣寧監歲鑄緡錢四十萬，其主監宜擇人。」乃以命若谷。歲餘，所鑄贏三十萬緡。擢知處州，歷江湖、淮南、益州路轉運、江淮制置發運使。入爲三司度支、鹽鐵副使，累遷右諫議大夫，知并州。先是，麟府歲以緡錦市蕃部馬，前守輒罷之。若谷謂互市所以利戎落、通邊情，且中國得戰馬，亟罷之，則猜阻不安。奏復市如故，而馬人歲增。提舉諸司庫務，權判大理寺，進樞密直學士。歷知澶州、成德軍、揚州、江寧府。人知審官院，糾察在京刑獄，知通進銀臺司、應天府。改龍圖閣學士，授知杭州。歲饑，斥餘廩爲糜粥賑救之。權判吏部內銓，知洪州，累官尚書左丞，致仕。若谷素爲宰相張士遜引拔，然所至不激訐取名，自有循良跡。子庾，知臨江軍。

鄧甯 字仲吉。爲武威軍僉判，移漳州。福州浮屠侵民腴田，判歸於民。遷提轄江淮、荆浙、福建茶馬。東南鹽貨歲額侵蝕，爲條畫輸運，繇是歲增數十萬。信州饑，發粟賑濟，又嚴盜賊禁，州賴以安。召對，擢河東提舉。遷京西提刑、福建轉運判官，以微累坐謫。起知黃州，尋與祠。甯博學工詩文，有《七峰集》十卷。弟密，舉八行。子文饒，廣東提舉、知福州。

張胥 初名駕，字安時。徽宗朝，除宗子博士，改太常博士，賜擢監察御史。朝廷作複道，自太廟達南郊齋宮，以宦者董役，畿縣騷然，胥請付將作監。在京百司俱隸臺察，而閣門、殿中監多嬖倖，獨無所隸，胥請隸臺察如百司，從之。未踰月，輒復故。胥請罷，徙工部員外郎、知興化軍。召還，再除知信州。以工部郎中知廣濟軍，卒。

羅畸 字疇老。爲廣州司理，坐忤使者歸。杜門讀書邇十年，再除滁州司法。紹聖初，設詞科，畸首中選，除華州教授，召爲太學錄，遷太常博士。論孔子冠冕以「王者十二旒」爲定制，從之。被命作奠，獻章二十餘首。歷兵部郎中、秘書少監。崇寧中，辟雍成，命詞臣賦詩頌，畸居第一，進官一等。以右文殿修撰出知廬州、福州、處州，卒。有《文海》百餘卷、《講義》五卷、《道山集》三十卷、《秘閣秘錄》四十卷、《蓬山志》五卷、《洞霄錄》十卷。子彥溫，知甌寧縣。孫博文。從侄從彥。

博文 字宗禮，一字宗約。用祖蔭補將仕郎、福州司戶參軍，再調靜江府觀察支使。桂管爲嶺徼以西，都會，民物繁夥，常時幕府已不勝事，至博文爲當路所知，屬以事益衆，悉從容財處，無少疾遽。士大夫坐牀秦檜，竄斥南來，道出府下者，皆善遇之，至竭廩奉、鬻衣服以濟其乏。用薦者改右宣義郎、知瑞金縣事，轉宣教郎。始至，歲歉，先事儲備。及饑，發廩賑贍，無鉅細盡躬親，厝置纖密，辯察精明，又請推其

餘及旁縣。縣故多盜，飭巡徼，設方略，得渠帥數人，置諸法。在官餘九月，張浚都督江淮，請以爲幹辦公事，用嗣位恩轉通直郎，賜五品服。使募兵江西，繼建康，皆有成績。浚人爲幕府，得知和州，未上，而吏部侍郎玉山汪應辰制置全蜀，奏辟爲參議官。汪旣推心好問，博文亦推誠啓告，成都之政，遂最天下。則取二程遺文與他名臣論奏，纂述之可垂世者，募工鐫板。訪得張橫渠之家，避地流落，貧不自振，爲言應辰，延置府學。東方士大夫游宦蜀上，貧不能歸，或不幸死，死而不克葬，皆捐俸金振業之。累遷承議郎。秩滿，自請奉祠，得主管台州崇道觀，卒。博文姿稟和粹，沉靜寡慾，處己待人，一主誠敬，其樂善不倦如嗜慾。旣從同郡李愿中游，聞河洛所傳之要，喟然嘆曰：「儒佛之異，公私之間耳。」從是沛然自信，其守益堅。博文從辟江淮，愿中喜曰：「張公高明，閱大有餘，而宗禮以精密詳練佐之，幕府無過事矣。」其沒也，朱文公歎其不及大爲時用，又傷吾道不幸而失此人。

從彥 字仲素。自幼穎悟，不爲言語之學。初從吳儀游，已聞同郡楊龜山得河南程氏學，慨然慕之。龜山方爲蕭山令，徒步往學，初見三日，卽驚汗浹背，曰：「幾枉過一生。」而龜山亦喜其可與言道，於是日益親。嘗與論《易》，至《乾》九四爻，曰：「伊川說甚善。」從彥卽鬻田走洛，見伊川而問之。同邑陳淵、龜山婿也，每詣從彥，竟日乃還，謂人曰：「自得仲素，日聞未聞。奧學清節，南州冠冕也。」旣築室山中，絕意仕進，終日端坐。間謁龜山，將溪山吟咏而歸，充然自得。靖康中，採祖宗故事爲《遵堯錄》，擬獻闕下，會國難不果。嘗與學者論治，曰：「祖宗法度不可廢，德澤不可恃。廢法度則變亂之事起，恃德澤則驕佚之心生。自古德澤莫若堯舜，向使子孫可恃，則堯舜必傳其子；法度之明莫如周，向使子孫世守文、武、成、康之遺，至今存可也。」又曰：「君子在朝，則天下必治，小人在朝，則天下必亂。蓋君子進，則

常有亂世之言，使人主多憂，憂則善心生，故治；小人進，則常有治世之言，使人主多樂，樂則怠心生，故亂。」又曰：「天下之變，不起四方，而起朝廷。譬人之傷氣，寒暑易侵，水之傷心，風雨易折。故內有林甫，則外有祿山之亂；內有盧杞，則外有朱泚之叛。」其論士行曰：「周、孔之心，使人明道。學者果能明道，則周、孔之心深自得之。三代人材得周、孔之心，而明道者多，故視死生去就如寒暑晝夜之移，而行忠義也易。漢唐以經術、古文相尚，而失周、孔之心，故經術自董生、公孫弘倡之，古文如韓愈、柳宗元啓之，於是明道者寡，視死生去就如萬鈞九鼎之重，而行忠義也難。」又曰：「士之立朝，要以忠厚、正直爲本。正直，則朝廷無過失，忠厚，則天下無怨嗟。一於正直而不忠厚，則漸人於刻；一於忠厚而不正直，則流入於懦。」其議論淳正類如此。朱文公謂龜山「倡道東南，士游其門甚衆，然漸思力行、任重詣極，如仲素一人而已。」紹興二年，以特科授博羅主簿。未幾，卒。博羅士子哭之慟，民爲罷市三日。學者稱曰豫章先生。其遺書有《詩解》、《春秋指歸》、《語孟師說》、《中庸說》、《台衡錄》、《議論要語》、《二程龜山語錄》。淳祐間，賜謚文質。

曹輔 字載德。尉寧德，簿安豐。政和二年，以通仕郎中詞學兼茂科，歷秘書省正字。時徽宗數微行，乘小轎，導從數內臣，置行幸局。局中以乘輿出日謂有排當，次日未還，則傳旨稱瘡痍，不坐朝。始，民間猶未知，及蔡京謝表有「輕車小輦，七賜臨幸」，自是邸報聞四方，然臣僚莫敢言。輔上疏略曰：「陛下厭居法官，乘小輿出塵陌之中，郊坰之外，極游樂而後反。道塗之言，始猶有忌，今乃談以爲常，具知其時日、去向，悉能辨其輿飾。臣不意當陛下付托之重，玩安忽危，一至於此。夫君之與民，本以人合，合則腹心，離則楚、越。畔服之際，在於斯須，甚可畏也。昔仁祖視民如子，憫然惟恐或傷，一旦宮闈不禁，衛

士輒踰禁城，幾觸寶瑟，荷天之休，帝躬保佑。俚語有之：『盜憎主人。』主人何負於盜哉？況今革冗員，斥濫奉，去浮屠，誅胥吏，蚩愚之民，豈能一一引咎安分？萬一當乘輿不戒之初，一夫不逞，包藏禍心，蠱釁發毒，獸窮逞計，雖神靈垂護，威重已傷。又況有臣子所不忍言者。臣願陛下深居高拱，淵默雷聲，臨穹昊至高之勢，行日月有常之度。出則太史擇日，有司除道，三衛百官，以後以前。若欲省煩約費，以便公私，則臨時降旨，存所不可闕，損所未嘗用。雖非祖宗舊制，猶愈於微服晦跡，下同臣庶，堂陞陵夷，民生姦望。』帝得疏，出示宰臣，令赴都堂審問。太宰余深曰：『輔小官，何敢論大事？』輔曰：『大官不言，故小官言之，官有大小，愛君一也。』少宰王黼陽顧左丞張邦昌、右丞李邦彥曰：『有是哉？』皆應不知。輔曰：『里巷細民且無不知，相公當國，何獨懵然？若果不知，焉用彼相！』黼怒，令吏從受辭，輔操筆曰：『區區愛君，一無所求。』黼奏：『不重責輔，難息浮言。』遂編管郴州。輔草疏之夕，有惡鳥鳴屋極，聲若紡輪，心知不祥，初弗之恤。處郴六年，黼當國不得移，亦恬不介意。靖康元年，召爲監察御史，守殿中侍御史，除左諫議大夫、御史中丞。不旬日，拜延康殿學士、簽書樞密院事。前後論疏凡百餘章，皆一時要務。未幾，免簽書。金人圍汴都，要親王、大臣出盟，輔與尚書左丞馮澥使粘罕軍。高宗以康王開元帥府於相州，金人請欽宗詔召之，遣輔往。至曹州，不見而復，遂從二帝留金軍中。張邦昌請歸輔，輔得與鄧肅同歸。高宗卽位，輔仍舊職，未幾，卒。後贈太師、福國公，謚忠達。子紳，朝請大夫，綸，度支郎中，以詩鳴。弟中。

中 字久德，一作文德。除江寧上元尉。政和中，擢詞學科第一，拜秘書省正字，改著作郎，周旋東觀凡六年，同列俱擢美官，恬弗介意。或期偕詣執政門，至半途佯稱疾還。自知不合於時，請外，得永州，

爲永人奏減鹽額。上書論中與事，忤宰相，因罷。靖康中，聞京城失守，感憤卒。中忠信和易，篤孝友，文詞溫雅如其人。

羅薦可 字養蒙。初，調高郵軍司理。金人陷京師，張邦昌偽赦至，高郵守率僚屬欲拜之，薦可堅持不可，取赦書擲之。高宗卽位，詔下，守憂悸死，薦可名益著。知樂平縣，與守不協，罷。李綱制置江南西路，辟爲屬。人監登聞鼓院，忤秦檜，出知澧州，招集流亡，惠養凋瘵，他郡負未願受撫者比比，移知筠、常二州，卒。

張致遠 字子猷。旣舉進士，以宰相范宗尹薦，得召對，擢樞密院計議官。建寇范汝爲已降，猶懷反側，而招安官謝衢、陸棠受賊賂，陰與通。致遠謁告歸，知其情，還白執政，請鋤其根柢，於是捕衢、棠及制置司屬官施宜生付獄。詔參知政事孟庾爲福州宣撫使討賊，韓世忠副之，辟致遠爲隨軍機宜文字。賊平，除兩浙轉運判官。改廣東轉運判官，招撫劇盜曾衮等，賊衆悉降。紹興四年，以監察御史召，未至，除殿中侍御史。金人與劉豫分道人寇，宰相趙鼎勸高宗親征，朝士尚以爲疑，白鼎審處，致遠人對，獨贊其決，遷侍御史。會有旨修瓦屋權充太廟，致遠言：「中原陵寢故在，京師廟社僅存。萬一四方傳播，創建太廟，茲焉定都，將人人解體，失興復大計。」五年，除戶部侍郎，進吏部侍郎，尋復爲戶部侍郎，言：「陛下欲大有爲於天下，願力務省節，明禁僭侈，自宮禁、朝廷始。詔諸大臣，額員可減者減之，司屬可併者併之，使州縣無妄用，歸其餘於監司；監司無妄用，歸其餘於朝廷；朝廷無橫費，日積月聚，惟軍須是慮，中興之業可致也。」除給事中，尋以母老丐外，以顯謨閣待制知台州。朝廷以海寇鄭廣未平，改知福州。六年，廣降，致遠選留四百人，置營城外，餘遣還業。復遣廣討他郡諸盜，數月悉平。八年，再召爲給事中，

出知廣州。尋以顯謨閣待制致仕。十七年卒。致遠鯁亮有學識，歷臺省、侍從，言論風旨，卓然可觀。趙鼎以與常同胡寅、張九成、潘良貴、呂本忠、魏伋並稱之。

鄧肅 字志宏。少警敏，能文，美風儀，善談論，李綱見而奇之，結忘年交。居父喪，哀毀踰禮，芝產其廬。入太學，所與游皆天下名士。宣和末，東南貢花石綱，肅作詩十一章以獻，疏言：「臣聞：『功足利一國者，當享一國之樂；德足被四海者，當受四海之奉。』恭惟皇帝陛下，至仁所眇，神道所化，覃乎無外，不可量數。是雖移嵩嶽以爲山，決江河以爲沼，竭東風之所披拂以爲臺榭之觀，且不足奉聖德之萬一。區區官吏，輒以根莖之細，塊石之微，挽舟而來，動數千里，竊竊然自謂其神剗鬼劃，冠絕古今，若真是報國者。以臣觀之，是特以一方之物奉天子，曾不以天子之物奉天子也。臣今有策，欲取率土之濱山石之秀者、花木之奇者，不問大小，畢置陛下園中。若天造地設，曾不煩唾手之勞。蓋其策爲甚易，而天下初弗知也，臣獨知之，喜而不寐，謹吟成古詩十有一章，章四句，以叙其所欲言，雖越俎代庖固不勝誅，然春風鼓舞之下，則候蟲時鳥亦不約而自鳴耳，惟陛下留神。幸甚，幸甚。」肅詩十一章，其五章言：「皇帝之圃浩無涯，日月所照同一家。北連幽薊南交趾，東極蟠木西流沙。」其六章言：「是中日月磨星斗，下視群山真嵒嶺。千年老木矯龍蛇，天風夜作雷霆吼。」其七章言：「三月和風塞太空，天涯海角競青紅。不知花卉何遠近，六合內外俱春容？」其八章言：「聖主胸襟包率土，天賜園池乃如許。坐觀塊石與根莖，無乃卑凡不足數。」其九章言：「飽食官吏不深思，務求新巧日孳孳。不知均是園中物，還遠而近蓋其私。」其十章言：「恭惟聖德高舜禹，一圃豈嘗分彼此。世人用管妄窺天，水陸馳驅煩赤子。」其十一章言：「安得守令體宸衷，不復區區踵前蹤。但爲君王安百姓，天地一圃樂何窮。」是時群臣皆欲置肅死地，欽宗聞



位，仍賜召對。靖康初，賜對便殿，力詆權臣以爲狂，而淵聖容之。補承務郎，授鴻臚寺簿。金人犯闕，被命入敵營，留五十日還。張邦昌受僞命，國號大楚，肅義不食楚粟，饑餓殆不能興。萬死一生奔行在，擢左正言。既拜官，作自誓詞曰：「惟金賊息兵沙漠，作大寇攘。我力再造區夏，弗克念。帝乃拜臣左正言，臣用夙夜慄慄危懼，曰有宋宗社幾百有八十載，今日存亡弗繫於百職事，繫於冢宰暨二三議論之臣。臣罔有舟楫克濟巨川，謹拜手稽首，告於皇天后土，請自戒者三：其一曰，罔以國事用報我私德；其二曰，罔以國事用攻我私怨；其三曰，罔以國事用資我富貴服食。既盟之後，二三其德，以惑我后之聽，臣當拏戮。臣既單厥心，而罔有嘉猷嘉謀，可告於后，惟天祐之。嗚呼！惟天聰明，惟天念我太祖、太宗之德弗忝堯、舜、文、武，惟天嗟我九州赤子切切願治，若歲大旱徂霖雨，惟天察彼醜虜暴虐華夏，熾於虎狼禽獸。天用牖臣，俾事罔大小，臣咸知，入告於后，后克從德政惟新，天下悅服。蠻夷寇賊弗干我邊陲，萬民莫居，邦其休哉。庶幾臣小子亦克遄歸省厥母於北堂。若臣小子弗克有濟，惟天斥之，俾投荒服。速登俊良，救民於水火，毋俾小臣以蠹我家邦。」先是，朝廷賜金國帛一千萬，肅在其營，密視均與將士之數，大約不過八萬人。至是，爲上言之，且言：「金人不足畏，但其信賞必罰，不假文字，故人各用命。朝廷則不然，有同時立功，而功又相等者，或已轉數官，或尚爲布衣，輕重上下，但在吏手。賞既不明，誰肯自勸？欲望專立功賞一司，使凡立功者得以自陳，若功狀已明而賞不行，或功同而賞有輕重先後者，並置之法。」欽宗從之。朝臣受僞命者衆，肅請分三等定罪。欽宗以肅在圍城中，知其姓名，令具奏。肅分別言之。耿南仲得祠祿歸，其子延禧爲郡守，肅劾「南仲父子同惡，沮渡河之戰，遏勤王之兵，今日割三鎮，明日截兩河。及陛下欲進援京城，又爲南仲父子所沮。誤國如此，乞正典刑」。南仲嘗薦肅於欽宗，肅言之不

恤，欽宗嘉其直，賜五品服。范訥留守東京，肅言：「訥出師兩河，望風先遁，憤軍之將，豈宜與此。」訥遂罷。內侍陳良弼肩輿至橫門外，開封買人內女童，肅連章論之。時官吏多託故而去，肅建議削其仕版，而取其祿以給禁衛，若夫先假指揮徑徙江湖者，乞追付有司，以正其罪。因人對，言：「外夷之巧在文書簡，簡故速，中國之患在文書煩，煩故遲。」欽宗曰：「正此討論，故併三省，盡依祖宗法。」及建局討論祖宗官制，兩月不見施行，肅言：「太祖、太宗之時，法嚴而令速，事簡而官清，未嘗旁搜曲引以稽賞罰，故能以十萬精兵混一六合。自時厥後，群臣今日獻一策，明日獻一言，煩冗瑣碎，惟恐不備，此文書所以益煩，政事所以益緩。今兵戈未息，豈可揖遜進退，尚循無事之時？欲乞限以旬日，期於必至，庶幾法嚴事簡，賞罰之權不至濡滯。」肅在諫垣，遇事感激，不三月抗十二疏，言皆切至，多見採納。會李綱罷，肅奏：「綱學雖正，而術疏，謀雖深，而機淺，固不足以副聖意。惟陛下賞顧臣曰：『李綱真以身殉國者。』今日罷之，而責詞甚嚴，此臣所以有疑也。且兩河百姓無所適從，綱措置不一月間，民兵稍集，今綱去，兩河之民將何如哉？偽楚之臣紛紛在朝，李綱先乞逐逆臣邦昌，然後叛黨稍能正罪，今綱一去，叛臣將何如哉？叛臣在朝，政事乖矣，兩河無兵，外夷驕矣。李綱於此，亦不可謂無一日之長。」執政怒，送肅吏部，罷歸居家。紹興二年，避寇福唐，以疾卒。有《栟櫚集》二十卷。

鄧柞 字成材。初，授建昌軍簽判。金虜入寇，破洪州，傳檄至建昌，守率屬納帛，擬以城降，柞斥之曰：「虜使至，當殺之而焚其書，寧可降耶？」守欲執柞以畀虜，柞不為屈，遂棄官歸。李綱宣撫湖廣，辟為屬，復判靜江，遷泉州。以陳康伯薦，召對，擢廣西轉運判官，遷知泉州，除直秘閣、廣東經略。復起知隆興府、江西安撫。盜賊盈區，柞隨宜勦蕩，一道以寧。尋以疾請祠，卒。所著有《焦桐集》。從子宗仁，

江東安撫使。

鄧驛 字千里。舉進士，歷秘書省正字，遷校書郎，充嘉王直講。拜右正言，遂爲左司諫，亮直敢言，不避權倖。慶元初，召爲起居舍人，拜中書舍人。朱熹以忤韓侂胄罷講筵，面奏乞留，不許。李沐除正言，驛行詞寓規戒意，沐御之。呂祖儉上疏留趙汝愚，併論朱熹等不當逐，語侵侂胄，安置韶州，太學生楊宏中等以救汝愚，坐編管，皆封還錄黃，不草制。未幾，以集英殿修撰知泉州，進華文閣待制，奉祠。

鄧庚 字端友。以右朝奉郎任宜黃，鋤治強梗，發紓隱誅，期年政成。

倪閃 字泰夫。少穎悟，嗜學。家饒貲，用儉而好施，每出，輒錢自隨，遇貧窶則擲於其家，不問其知否。及領鄉薦，赴禮闈，在京師施與，不減家居時。紹興三年，寇起，蔓延廣東、江西，破汀州，侵縣境，官兵獲賊，縣獄充牣。閃以愚民無知罹法，日飲食之。已而，賊斬獄出，縱火焚民廬舍，火將及閃家，賊黨相與撲滅，鄰人賴以免。明年大饑，道殍相枕藉，則濟以糜粥，活者萬計。紹定五年，以特奏名除寧國府教授，出私帑創齋舍，置贍學田，所得俸餘分貽兄弟姊妹。秩滿，遷廣東提幹，卒。

蕭山 仕長溪丞。性穎敏，於書無所不讀，究極義理精奧。所著有《讀詩傳》、《論語講說》、《讀易管見》。

### 元進士

張秋水 曹道振上二人，舊志不載科年。

有傳

曹道振 字伯大。博學通經，除福州路判官。

〔校記〕

〔一〕「侄從彥」，《羅崎傳》作「從侄從彥」。

〔二〕「母改子」，各本原作「子改母」，據《宋史·司馬光傳》改。

〔三〕「淳」字，各本原脫，據《宋史》本傳補。

〔四〕「《口錄辨》」，各本原作「《日辨》」，據上下文改。

〔五〕「審官院」，各本原作「雷官院」，據《宋史》本傳改。

〔六〕「斥」，各本原作「升」，據《宋史》本傳改。

# 閩書卷之一百三

英舊志 縉紳

延平府 沙縣二 尤溪縣 順昌縣 永安縣(二)

沙縣二(二)

## 皇朝科第

舉人 進士子、午、卯、酉屬舉人，辰、戌、丑、未屬進士。

洪武三年庚戌鄉試 鄧原中

四年辛亥會試 鄧原中時科目年未定，故有庚戌鄉試、辛亥會試，至洪武十七年始有定期。

十七年甲子 丁永保

十八年乙丑 丁永保

二十六年癸酉 陳山 張康

永樂三年乙酉 黃皜

六年戊子 劉道祥府學。 陳篋

十二年甲午 上官儀府學。鄧祖 朱庸

十五年丁酉 廖文昌 蕭讓

十八年庚子 洪宗慶 鄧存性鄧一作鄭。(三)

十九年辛丑 上官儀

宣德四年己酉 劉嗣

七年壬子 周効先 張偉

十年乙卯 林慶府學。鄧福

正統元年丙辰 張偉

六年辛酉 賴成

十二年丁卯 吳麟

天順三年己卯 官榮順天中式。

八年甲申進士先是，七年癸未春二月，會試場屋災，詔移秋八月，至是春三月始廷對唱名。

官榮

成化十九年癸卯 曾侗

弘治二年己酉 黃鍾應天中式。

五年壬子 謝臻

正德八年癸酉 謝恩臻侄。

嘉靖十九年庚子 黃文梯鍾孫。

二十五年丙午 謝應元恩孫。

四十年辛酉 吳應雷

萬曆十年壬午 卓錕第二人。

十六年戊子 鄧焜

二十八年庚子 徐登瀛

三十一年癸卯 陳應揚

薦辟、人才、貢士、監生賢者雜見列傳中。

有傳

吳德用 彭文貞 王子罕 陳山 黃振 上官儀 廖文昌 洪宗慶 陳宗順 陳勝通 姜虔

陳侃 陳仁政 官榮 范本德 曾侗 黃鍾孫文梯 謝臻 王誠 廖顥 樂大護 子應奎附。 侄文

元。文元弟文解。 曹龍 陳才 謝應元 陳盛 林文翰

吳德用 洪武乙丑，繇通經秀才知瓊州府。爲政和易，利澤及人。

彭文貞 洪武中以儒士任泰寧訓導。剛介尚義，教誨諄切，多所造就。卒官，人爲營葬本邑，子孫因

家焉。

王子罕 洪武中以秀才辟，授文昌縣主簿。以清慎見稱，陞監察御史。

陳山 字汝靜，一字伯高。永樂初授奉化教諭。六年，召修《永樂大典》。陞吏科給事中。丁憂，起

復，擬陞廣東右布政使，特旨留掌六科事。十一年，偕張瑛侍宣宗皇太孫講讀。二十二年，仁宗嗣位，遷

左春坊左庶子。洪熙元年，陞行在戶部左侍郎。宣德元年，陞戶部尚書兼謹身殿大學士，入閣，詔領大學士日侍文華殿，充兩朝實錄總裁。嘗墜馬傷足，上親調藥酒賜之。上親征漢庶人，命山留守。師旋，山迎謁，請移師襲趙王，以杜蕭牆之變。上召楊榮，以山言諭之，榮頗然山策，至楊士奇、楊溥，則執爲不可。

上悟，已，命輟機務，專授內豎習書。九年，疏陳休致，塗卒，年七十。有詩稿，奏議藏於家。

黃振 正統初以貢士知安遠縣，慈祥愷悌，喜怒不形。在任九年，人咸戴之。

上官儀 字必達。年三十餘，貧甚，往役於縣。縣命征賦，賦逋，坐繫獄，賦《鬪鳩詩》書於闔戶，尹視獄奇之，使再和，應聲得，資給之讀書，遂入邑庠。畫錢於讀書之壁，矢之曰：「他日有寸進，決不爲浼也。」踰三年，聯魁科第，授咸寧知縣，體疾苦，任勞勩。擢知州，寧民扶携老穉，泣告當道，願再借寇，當道聞於朝，請得以知州復署縣事，許之。六年，改任滄州。休致歸，閉門却掃，授經後進，資其束修，以畜妻子。

廖文昌 字克盛。初授行人，轉御史。巡按廣東、廣西，擊奸翼善，燁有風裁。在廣西，會土夷亂，督兵勦之，爲所敗，坐調星子典史。擢安福主簿、東阿知縣，致仕。鄧寇破縣，執文昌，相與輿之，羅拜，以爲帥，文昌大罵曰：「吾朝廷執法吏，豈從鼠輩反耶！」遂被害。

洪宗慶 字文善。授衢州通判。初至，有富人途迂，潛有所獻，峻却之。衢民多積逋，察其貧極者，以祿粟代之輸。陞爲正兵馬。清慎能幹，畿轄肅清。

陳宗順 洪熙中知廣東長樂縣。導民以忠信禮義，冠婚喪祭，循用古典。久之，恥讓成俗，圉圉幾空。三載，卒官，上下哀悼。



陳勝通 字文達。宣德三年貢士，授大理評事。清慎明恕，一時卿佐咸稱譽之。陞湖廣按察僉事，行部所至，風節凜然。景泰元年，湖口十八洞寇發，勝通承檄撫鎮之，寇息民安。卒於官。

姜虔 字玄翁。正統中歲貢。初授梧州府推官，後改順天府。讞獄明允，民號爲姜秤。考最，進六品階。致政，里居，飯不足接餒，其妻曰：「清官可當食耶？」虔曰：「『三旬九食』，古人志我矣。」

陳侃 字邦直。景泰三年貢士，授潮州府推官。築雲步堤，以障海壩，居民免墊溺，而獲耕稼之利。三載考績，以母老懇疏歸養。

陳仁政 字用德，宋陳瓚十二世孫。天順間，以太學生授河南布政司都事。白冤獄，堰黃河水，使不爲災。其治河鑪粥，皆自具，不一侵錢穀。爲人朴直恬退。以進表赴闕，懇乞歸田，得陞一級致仕。

官榮 字邦顯。選兵科給事中，奉命冊封琉球，擢本科都給事中。未幾，卒。榮身長八尺，腰大十圍，和易質直，是非不妄，鬱有古長者風。不究其用，鄉人惜之。

范本德 字宗厚。性至孝，父歿，治喪一循禮制，既葬，廬墓三年。以貢入南雍，與謝方、石鐸投分甚厚。銓南雄府經歷，蒞事明敏，群守才之。流賊奔突入境，率民兵往禦，劉其衆百餘，擢保昌知縣。尋通判本府，剔蠹持廉。檄監商稅，常征外毫無所取。致仕歸，杜門謝客，邑大夫或訪焉，非強不見，見輒以病謝不答。四十喪偶，鰥居三十餘年，不畜媵妾。年八十三，卒。

曾侗 字良中。爲梧州推官，法律明審，獄訟不冤。猺獞亂，采人其穴，招降之。陞象州知州。丁內艱，復，補綿州。流賊入境，設奇兵出擊，賊遁去。尋致仕。

黃鍾 字朝陽。任六安州同知，信慎著稱。判寧波，出納惟謹。卒之日，囊橐蕭然。孫文梯。

文梯 字升之。博學善屬文。初令餘干，調繁保昌，皆有惠政。左遷歸，以談經啓後學。年八十餘，卒。

謝臻 字至道。授武寧知縣。劇寇羅萬陽亂，陰結其黨，外率死士夾攻之，遂空其穴。丁外艱，復補武陵，擢松江府通判，有政聲。

王誠 以貢任蒙城知縣。確愿剛方，恬靜寡慾。官纔歲半，卽致仕歸。布衣蔬食，晏如也。

廖順 嘉靖中以貢知雲夢縣。厲精秉正，毀撤菴宇，修葺譙樓。季校諸生，一準學使者，遴其優者置讌會，學官甚盛，用示獎勵。章聖太后梓官南葬顯陵，奉迎繁鉅，民賴調度，節省甚多。

樂大護 字伯聲。嘉靖中以監授濟南府經歷。博學能詩，工書畫。子應奎，繇歲貢授宣平、宣化二縣令，亦善詩文，能書。侄文元、文解。

文元 以貢授南海訓導，建□教諭。〔四〕嘉靖丙辰大水，沒城郭，祖母八十餘，病不能避，文元負之登屋，方置祖母，屋上前簷已朽陷矣。文元入水，半餉始出，人謂孝感。

文解 字廷冠。少好學，有思致，精詣窮理，沉思忘日夜。以貢授吉安訓導，從羅文恭洪先講學，洪先與語，忻然曰：「吾老友也。」檄署廬陵。歲值饑，著《救荒解》上當道行之，邑賴不困。擢鳳陽縣教諭，雷州教授，謝病歸，日與其從父大護、從兄應奎酬和，以老。

曹龍 字堯佐。以貢授瑞安丞，白令修學宮，爲永嘉入修築沙堤，具有成績。遷壽昌令，重士類，抑黠訟，悉民隱，節浮費，禁游惰，種種治辦。以不能從諛當路，落職歸，橐裝蕭然，惟閉門誦讀，日與蕭山韓惟論，里人樂應奎、樂文解、謝應元、黃文梯賦詩廣答爲樂。所著有《兩溪漁唱》十卷。

陳才 以貢任浦江訓導、會稽教諭、周府教授。易直子諒，飲人以和。兩任署縣，皆有甘露之祥，人稱甘露先生。

謝應元 字長卿。令定安，邑近倭寇，時困城月餘，設法防禦，賴以晏堵。擢武昌通判，劫盜扳誣富民陷獄，應元訊得實，俱解脫。後致政家居，屏跡公庭，爲後學所推重。

陳盛 以貢任懷遠訓導。和易善教，良士多出其門。

林文翰 以貢任繁昌訓導。剛正練達，鄉評重之。

#### 尤溪縣(五)

#### 宋科第

慶曆六年丙戌 林積

皇祐元年己丑 陳皓

五年癸巳 王知微

嘉祐八年癸卯 蕭斌

治平四年丁未 紀輝

特奏名 汪瑤汪一作江。(六)

熙寧三年庚戌 莊誼

六年癸丑 鄭安道 徐世英 周謂

九年丙辰 盧洙

元豐二年己未 施常

特奏名 施國張 朱秉彝

元祐三年戊辰 吳天民

六年辛未特奏名 林穆

紹聖元年甲戌 蕭恒一作瑱

元符三年庚辰 莊謙

崇寧五年丙戌 高仁彥 蘇均

大觀三年己丑 黃聲

特奏名 蔣安上

政和二年壬辰 嚴環

特奏名 余闕

五年乙未 黃舉

重和元年戊戌 林之純

宣和二年庚子上舍 吳仕逸

三年辛丑 盧安邦 李仕美

特奏名 莊訢一作誼

六年甲辰 嚴日休

建炎二年戊申 林致用 謝知常 莊光

紹興五年乙卯 黃光弼

十五年乙丑特奏名 陳惟則

十八年戊辰特奏名 黃作德

三十年庚辰 嚴均 陳通

隆興元年癸未 林希

特奏名 陳堯佐 詹時發 林邦幹 嚴日華

乾道二年丙戌 朱紘

五年己丑 王葵 林振

特奏名 林希文

八年壬辰特奏名 吳迺一作通。

淳熙二年乙未特奏名 卓雲 黃文綱 紀大奎

五年戊戌 劉文富

十一年甲辰 紀大章 王訓之

十四年丁未 紀徽一作微。

特奏名 林常

紹熙九年庚戌 范震

四年癸丑特奏名 吳虎一作沈 林搗

慶元二年丙辰 林善需

五年己未 陳子文 盧人瑞

特奏名 林樞 楊王廷 陳駟

嘉泰二年壬戌 王容

特奏名 陳雲卿 卓之才 嚴環

開禧元年乙丑 鄭淵 吳中 紀淵

三年丁卯上舍 鄧子克

嘉定四年辛未 王申

特奏名 鄭勳

七年甲戌 趙睢一作維

特奏名 張安

十年丁丑 鄭子實 黎大有 施穎

十三年庚辰特奏名 施政

寶慶二年丙戌 紀濟

紹定二年己丑 陳子大 吳安國 吳彪 紀玠 黃子春

五年壬辰 許合 上官鼎新

端平二年乙未 趙阜睢子。

寶祐四年丙辰 趙瑤阜子。

薦辟、人才賢者雜見列傳中。

有傳

林積曾孫震。 周謂 林致用 王必正

林積 字公濟。少人京師至蔡州，息旅邸，既卧，覺床間有物，視之，見一布囊中盛錦囊，實北珠數百顆，明詢主人，知爲商貨，佯語主人：「商，吾故人也，脫復至，幸命上庠相訪。」又揭名於室曰：「某年月日，劍浦林積假館。」遂行。商人至京師，覓珠無有，急沿故道，處處物色，至蔡邸見其榜，卽還訪積上庠，積具以告，曰：「但須投牒府中，當悉歸珠。」商如教，積詣府，盡出珠授之。府尹使商中分積珠，積曰：「令積受珠，向盡有之矣。」商不能強，以數百千就佛寺作大齋，爲積祈福，遂登慶曆進士。尤人登第自積始。初爲六合令，會罷歸，途遇王安石，安石方掌制，有盛名，且故知積才行，心欲見積。積不往詣，及服闋，以公事謁之政府而已，而安石稱之不置。熙寧間，繇知泗州召對，神宗嘉其廉能，除江西運判。徙廣東提刑，召爲三司度支判官，遷庫部郎中、太府少卿，出知福州，移河南轉運使。廉謹嚴方，所至宣聞，然終以鯁挺不得用。子義，官至吏部侍郎、敷文閣待制。曾孫震。

震 字有則。性至孝，丁父喪，執喪盡禮。初調保昌尉，改知建陽縣。止訟詬，時催科。郡守徐嘉以狀聞，調石城首。飭學舍，豐廩餼，以勵弟子員。其餘力，修治梁道，散濟藥餌，惠利悉舉。朝廷欲試以

郡，力請筦庫。歸，築室園圃，名曰廉白。

周諤 知新會縣。是時新法方急，郡縣望風，諤獨不奉行，免民青苗，且上書政府，力陳其弊，因求歸田里。所著有《孟子解義》，一時學者宗之。

林致用 字康民。初寓上庠二紀，以行義聞。宣和間，勅有司闢太學宣聖廟，致用具割上宰府，乞伏闕拜表請鑾輿臨幸，詔可。徽宗視太學，免致用試禮部。歷漳、福二州幕官。

王必正 紹定初除漳州通判，累官朝請大夫。尚濮雍懿王女。性至孝，事父母一飯必躬視，與其兄必學，必謙相友。嘗做范文正公，以郭外田五百餘畝創義莊，資族人。又設義塾，延師訓族里子。子四：慈、恭、勲、愍，皆登進士。

### 元進士

葉荆才 舊志不載科年。

葉荆才 幼時丰采特異，丞相伯顏遇於道，命載與俱歸。後第進士，累官總管。為人謙抑，似無位者。

### 皇朝科第

舉人 進士子、午、卯、酉屬舉人，辰、戌、丑、未屬進士。

永樂元年癸未舉人 紀子康 舊志有洪武三十五年一榜，考是歲革除，故元年癸未開科而明年甲申會試。

三年乙酉 范文彬 陳旋

九年辛卯 潘宗惠 陳琮 林祖

十二年甲午 詹源



十五年丁酉 陳淵

十八年庚子 施爲

宣德四年己酉 葉偉

七年壬子 梁高

景泰七年丙子 朱旭

成化二十二年丙午 林文璧

正德二年丁卯 陳貴順天中式

嘉靖四年乙酉 蔡文盛府舉

詹榮順天中式

三十一年壬子 蔡綱順天中式

萬曆二十八年庚子 蔡夢暘

薦辟、貢士賢者見列傳中。

有傳

楊丹珉 吳謙 趙獻

楊丹珉 字德玉。繇太學生知永新縣，興學舍，賑窮乏，抑強暴，決疑獄。歲旱，禱雨輒應。蝗起，不入境。後移溧水，終泰州同知，俱有治蹟。

吳謙 以明經舉，除監察御史，調知武昌縣。守禦千戶周頤挾勢虐民，謙劾奏之。尋卒。

趙獻 字景賢。萬曆初以太學生知潮州普寧縣。縣設嘉靖之季，民未鳩，賦無度，公私空乏，獄訟猥

詭，學舍之地，堂序無位，刺桐靡城，墨守無固，百雉缺焉。獻爲判都里，定賦役，詳聽斷。輸將送迎之費，出私財變通之。度田履畝，日在荆棘風日中。召諸生，飲食教誨如親弟子。於是揭陽缺令，借獻署。獻署揭陽，如其爲普寧。獻之爲普寧城也，業遷惠倅矣。監司盧公曰：「公也才，城成而後之倅。城則成矣，石工有流言，公以此得謗，拂衣歎曰：『誰謂青蠅，辱我白璧？歸歟，歸歟！』」

順昌縣〔七〕

五代梁進士

開平二年 廖澄

有傳

廖澄 少負忠義，遭迍不顯。後仕南唐，累官大理評事。宋曹彬取江南，師圍金陵甚急，校書林特勸之降，澄曰：「吾久仕唐，君臣之義，不可廢也。」乃預以死事，遺蒼頭亡歸，報其家。城陷，遂從容引決。

宋科第

大中祥符元年戊申 余諤

慶曆六年丙戌 張偁

元豐二年己未 鄧燦

七年乙丑 翁邵

元祐三年戊辰 張元暉 余大老

紹聖四年丁丑 吳璋 廖天覺

崇寧五年丙戌 張公厚 趙祚 廖剛

大觀三年己丑 鄧公衍 楊武烈

政和二年壬辰 余適 吳致堯

五年乙未 鄭公才 鄧公衍

重和元年戊戌 余適權 余適 謝天啓 廖揆

宣和三年辛丑 楊發

靖康元年丙午鄉試 廖晞 廖恢 楊理 余弼一作良弼

建炎二年戊申 余良弼 廖昂 李佑正

四年庚戌鄉試 廖國齡 馮機 鄭若水 陳光前 任常 廖光 余汝礪

紹興四年甲寅鄉試 余代言 王康一作康玉

七年丁巳鄉試 廖伯憲 連濟 余大雅良弼子 張師道 廖謙一作廉

八年戊午 廖伯憲 連濟 廖謙

十年庚申鄉試 余燮 楊當時 余邦直 余寧 吳作 蕭規

十四年甲子鄉試 李琥 吳如時 謝德粹

十七年丁卯鄉試 范彥思 張謙 楊晦之 蕭史 連茹 謝尚文 饒昌期 張挺

二十年庚午鄉試 馮顯 余萬 謝雄飛

二十三年癸酉鄉試 楊先之 余南夫 張介 張徽之 廖賓王

二十四年甲戌 余寧余作寧。〔八〕

二十六年丙子鄉試 蕭彥恭 張華 余衡 陳明嘏明作朝。〔九〕

二十九年己卯鄉試 葉秀穎 廖天俊 吳鞏 林大亨 余之才 廖武

三十年庚辰 楊當時

三十二年壬午鄉試 鄭良臣 楊進之 楊浮 張夢良 廖昇鑿 連致道 范丹 楊留卿 任孝友

張義

隆興元年癸未 任孝友

乾道元年乙酉鄉試 余朋一作明。 王如岡 廖宋弼 力會 謝肇得 廖柄 張爽 趙汝章 范

日孜 蕭遇 趙善永

二年丙戌 連茹

四年戊子鄉試 張正夫 廖德明 卓知微 范廷芝 廖則 張公項一作預。 楊龜年 范潤 皇

甫興 連城 張一之 廖俟 趙善春

五年己丑 廖德明 楊晦之 黃縑 廖俟

七年辛卯鄉試 余大方 張振之 謝申 鄭籲 虞庚 馮詹 馮必大 馮之才 趙彥環 趙汝圭

淳熙元年甲午鄉試 廖萃鼎 陳其昌 連掀 張如圭 鄒的 蕭有謀 廖謙之 王天睡 余孝立

趙汝瑱 趙彥通 趙善任 趙汝介 趙慧夫 趙彥道

嘉定四年辛未 姚瑋第二人。

薦辟、人才賢者雜見列傳中。

有傳

龔懋 翁邵 吳璋 廖天覺 廖剛 吳致堯 余良弼 廖德明 姚瑋 廖邦傑 張傑

龔懋 字君美。少俊偉穎敏。仁宗朝，舉茂才異等，除房州推官，與張方平友善。慶曆初，近臣薦，召爲館職，未幾卒。

翁邵 字好德，初名醇。篤信好古，博學工文，調崇安尉。時劉幹在布衣，邵待以國士。遷丞福清，廉謹方正。當路聞其名，欲羅致之，檄至公堂，猶責以苛禮，邵拂衣，面有棄官意。檄者愧悔，委曲慰安之。已，以疾歸里。縣令俞偉大興學政，屈邵主師席，邵牢讓不出。友人楊時貽書敦譬，不獲已，應之。數州之上，負篋雲集。官至宣教郎。

吳璋 字南玉。問學充博，游上庠，有聲。歷官州郡，所至奉法修職。以朝請大夫知韶州，賜三品服，致仕。子南老，有孝行，知廣州，直秘閣，主管經略安撫司公事。孫漢傑，知賀州，以廉直稱。

廖天覺 字仲先。勵志篤學。知餘妙縣，屬行方田法，天覺簡其事目，民甚便之。兼石堰鹽場，歲課增羨，應轉三官，不受。移古田令，編民負上供銀，布幾數百萬，多方爲理償。作《教民文》曰：「敦孝弟，力農桑，戒殺子，禁游手。」辭旨懇切，民從其化。官餘姚，時楊時適在會稽，每語人曰：「仲先真古君子。」閩中張穆爲部使者，稱其可比古循良。後以朝請大夫致仕，有《魚山集》十卷。

廖剛 字用中。少從陳瓘、楊時學。宣和初，自漳州司錄除國子錄，擢監察御史。時蔡京當國，剛論

奏無所避。以親老求補外，出知興化軍。欽宗即位，以右正言召。丁父憂，服闋，除工部員外郎，以母疾辭。紹興元年，盜起旁郡，官吏悉逃去，順昌民以剛爲命，剛諭從盜者，使反業。既而，他盜人順昌，部使者檄剛撫定。剛遣長子遲諭賊，賊知剛父子信義，亦散去。除本路提點刑獄，尋召爲吏部員外郎，遷起居舍人、權吏部侍郎，兼侍講，除給事中。丁母憂，服闋，復拜給事中。言：「江淮兵備，莫若屯田，可以免得哺轉餉之患。」因爲三說以獻。時朝廷推究章惇、蔡卞誤國之罪，追貶其身，仍詔子孫毋得官中朝。至是，章傑自崇道觀知婺州，章僅自大府丞提舉江東茶鹽事，剛封還詔書，乃並與祠。權戶部侍郎，尋遷刑部侍郎。求補外，除徽猷閣、知漳州。漳俗奢靡，婚喪踰制，剛首立條約諭之。七年二月，日食，詔内外官言事。請「正建國儲君之號，布告中外，不匿厥旨。異時雖百斯男，不復更易，乃可以承天意，示大公」。高宗讀之聳然，即召剛趨至闕，拜御史中丞。言：「臣職糾姦邪，當務大體。若捃摭細故，則非臣本心。」又奏經費不支，盜賊不息，事功不立，命令不孚，及兵驕官冗之弊。時徽宗已崩，上遇朔望猶率群臣遙拜淵聖，剛言：「禮有隆殺，兄爲君，則君之，己爲君，則兄之可也。望勉抑聖心，但歲時行家人體於內庭。」從之。殿前司強刺民爲兵及大將恃功希恩，所請多廢法，剛知無不言，論列至於四五，驕橫肅然。鄭億年與秦檜有連而得美官，初邊報至，從官會都堂，剛謂億年曰：「公以百口保金人，今已背約，有何面目尚在朝廷乎？」因顯疏億年之惡，億年奉祠去。復乞起舊相之有德望者，處以近藩，檜聞曰：「置我何地耶？」改工部尚書，而以王次翁爲中丞。次翁與右諫議何鑄劾剛薦劉昉、陳淵，相爲朋比，以徽猷閣直學士提舉亳州明道宮，明年致仕，以紹興十三年卒。子四人：遲、過、遂、遵，仕皆秉麾節，邦人號爲萬石廖氏。

吳致堯 字恪文，一字聖任。除安化令，以事忤當路，去官。因屏居衡麓，自次其文，號《歸愚集》。

工於詩，尤喜佳句，嘗作《調友》十章，達於禁中。

余良弼 字巖起。博學明經，歷樞密院計議官，通判漳、泉二府。陳康伯人參政，以將作丞召。會交趾回文廣西漕臺，用印異常時，邊吏以聞，道改良弼廣西漕，至則繳還之，蠻計道阻。復覈正冒籍之軍。移提點刑獄，平稽誅之寇。除知靜江府，經略廣西。滅蠻酋，禁販奴，撫諸洞，殲群盜，治効尤著。尋與祠，已而除直秘閣，致仕。良弼爲政知大體，每以教化爲先，聚書幾萬卷，自爲序，以教子孫。有《龍山文集》。子大雅，見韋布。

廖德明 字子晦。少學釋氏，及得楊龜山書，讀之大悟，遂受業朱文公。始，德明諸生時，乞夢大乾廟，見懷刺候謁，題曰宣教郎。既舉進士，以宣教郎知莆田縣，憮然不欲赴，文公語德明：「成虧有數，凡物則爾。人則趨向不同，禍福隨變，允廣德性，力行善事，吾子事也，又何疑夢？」德明拜受教。至縣，重風教，毀淫祠。邑有達官請邑旁閑地益宅，堅持不予，守會僚屬風之，正色曰：「請邑地卽以地予，令請郡治，明府將避正堂讓之耶？」達官聞爲色沮。累知潯州，諸司交薦之，固辭不受，選廣東提舉刑獄，彈劾不避權貴。歲當薦士，朝貴多以書相托，德明不啓封而還之，曰：「國家公器，可以私耶？」鄉人有爲主簿者，德明薦其能，會行縣，簿感知己，置酒爲壽，多盛假觴豆於富人，德明怒，追還其薦章。盜陷桂陽，迫韶，韶人震怖。德明燕笑自如，遣將馳擊，而親持小麾督戰，大敗之。乃分戍守，遠斥堠，明審賞罰，宣布威信，韶以晏然。徙知廣州，遷吏部左選郎官，奉祠，卒。德明初爲潯州教授，爲學者講明聖賢心學之要。知廣州時，立師悟堂，刻文公《家禮》及程氏諸書。公餘，延僚屬諸生，親爲講說。嘗語人曰：「吾自始仕，以至爲郡，惟用三代直道而行一語而已。」學禁方嚴，確守師說，不爲時變。有《文公語錄》、《春秋會

要、《槎溪集》行世。

姚瑒 字貴叔。性敏學博，讀書城南之禾材，慨然有魁天下之志。以直秘閣守建安，兼漕全閩。建安當寇焚之後，城中遺燼暴骸滿目，市區二十四，存者九，財殫粟竭，物情洶洶。瑒至，明誅賞，辨逆順，拊瘡痍，輯流散，審用度，規荒殘，軍紀以肅，民氣以和，官府人立，期月之頃，遂復舊觀。劉克莊爲瑒作《建州譙樓記》，稱瑒有德有言，不徒以吏幹顯者。

廖邦傑 字懷英。淳祐間知建寧縣，修學宮，增學廩，闢貢士莊，建惠寧倉，創仁壽廬。歲饑疫，治藥餌糜粥，活民甚衆。咸淳間，以帥參攝軍事，嘗修圖經，他政績亦多。

張傑 淳祐間拜御史，有蹇諤風，聲聞天下。

元科第 無考。

張昇

有傳

張昇 字伯起。八歲能誦九經，且以詩名。九歲應薦赴省，省臣奇之，以神童聞於朝。卒業胄監，年方十三，除秘書省正字，累官江西等處儒學提舉。陳友諒陷豫章，索昇所署印，昇嘆曰：「吾自幼蒙被國恩，今年幾七十，可苟生辱名教耶？」投印井中，不食死。

### 皇朝科第

舉人 進士子，午、卯、酉屬舉人，辰、戌、丑、未屬進士。

洪武三年庚戌鄉試按以上三科以庚戌鄉試、辛亥廷試兼鄉試者，洪武卽位之初，科試未定，至後十七年始有定期。徐光



十七年甲子 徐子潛

二十三年庚午 陳保

二十九年丙子 翁德

永樂三年乙酉 趙曦 盧聚

五年丁酉 鄧恭 張誠

十八年庚子 張彬

宣德十年乙卯 黃佐

景泰元年庚午 謝昱

成化四年戊子 廖中應大中式

十年乙未 廖中

弘治二年己酉 馮維應天中式

正德二年丁卯 廖元中孫

隆慶元年丁卯 盧應瑜 陳文著

萬曆十年壬午 吳三讓

二十二年甲午 張邦光

三十七年己酉 余敦盛

四十三年乙卯 張光斗

薦辟、人才、貢士、監生賢者雜見列傳中。

有傳

張智 黃立 蕭原 葉宗遠 鄧玘 余恭 任燦 廖中 盧泗 葉轍 盧兆 盧廷桂 楊懋

子烈。 官寅 盧應瑜

張智 字玄略，元儒學提舉昇之子。勵志學問，所交皆當世知名士。用薦補入國學。元季，以才出參閩省機務，省臣承制授同知新喻州事，已而知事不可爲，浩然退歸。皇朝初定天下，乃卽建陽之崇化里洒掃一室，置古今書籍其中，窮搜博覽，沛然有得。洪武十一年，以明經應薦，上吏部，授夷陵州學正。九載，以內艱歸，服除，入覲。尚書趙勉薦於朝，遂超拜禮部，試左侍郎。請以書籍頒布北方學校，未幾，實授右侍郎。是時，諸儒多有不稱任使者，至嬰顯謬，太祖敕智等曰：「古之儒者，務學以明體適用，窮則忠信篤敬，以淑諸人；達則忠君愛國，澤被天下。朕自御宇以來，擢用儒士，布列百司，思得其人，卒少見効，良繇師道不立，故成材罕聞爾。禮部宜以朕言諭天下，俾凡爲儒者，必恪遵古先聖賢，毋徒尚文。」智請首行於太學，從之。智尋奏：「歲貢生員，舊制：中試者送國子監，不中者，罪有司，停學官俸，生員罰爲吏。今不中者遣還讀書，有司教官罰如故，是生員不率教者無所勸懲也。」上乃命更定其制：不中者，有司官任及三年，論如例；二年者，停俸半年；一年者，停俸三月。學官無分久近，罰如例。生員廩食，五年者爲吏，不及者遣還讀書。次年，復不中者，雖未五年，亦罰爲吏。懿文太子薨，命智議喪禮，尋以時享在邇，令與翰林院參考古制。智奏曰：「《王制》：『三年不祭，惟祭天地、社稷』，不敢以卑廢尊。今定議：天地、社稷、先師、歷代帝王須用樂外，惟太廟乃祖先神靈所在，既有喪，而時享仍用樂，恐神不樂

聽。宜備而不作。」詔從之。十六年，以事左遷國子學錄，尋陞博士。建文中，陞司業。其教人一本於道德仁義之說，孜孜開道，老而弗衰，一時學者師宗之。永樂初，成祖幸學，衆推講《周易》，特蒙寵異，賜予甚厚。四年，卒於官，年七十有二。

黃立 字信道，勉齋五世孫。讀五經，富文詞。洪武二十八年舉儒士，歷闕鄉應天府學訓導，陞國子學正。所至造就人才，多成偉器。後致仕，鄉人俊秀多從之游。弟衡，亦讀書善詩文，永樂間舉明經，未官卒。

蕭原 字本初。卒業胄監，授監察御史，糾劾不避強禦，爲人擠陷，謫交趾新安府推官，單騎之任。屬交趾復反，欲降之，不肯，力抗死難。

葉宗遠 字源長。永樂間任刑部主事、戶部郎中。爲人沉厚長者，小心勤慎。尋乞致仕，人服勇退。

鄧玘 守仲珍。景泰間任桐鄉丞，廉勤明恕，收受倉糧，積弊盡祛。以母老告歸，行李蕭然。

余恭 字克讓。天順間以貢知來賓縣。廉慎明恕，民夷率化。泰寧侯征廣西，以其猺獞村民曾爲流賊，欲進勦之，恭以十口保其無他。從其請，使招之，果皆來。後有他賊侵境，聞風皆斂刃退。韓都御史雍征大藤峽，檄恭從，多得斬首功。及致政歸，猺獞村民遣子弟護送出險，泣辭而去。

任燦 字彥輝。天順間繇歲貢知南康縣，廉勤公直，愛民如子。邑當路衝，供給征廣餉役不支，出己貲以充，不取民償。順化北鄉民素梗化，感燦德惠，悉遷善服役。成化四年，告休。居數年，邑民群赴巡撫原侍郎傑求再任，其得民心如此。

廖中 字用中。初授刑部主事，轉員外。聽斷惟明，宦柄之門，當法亦無所假。陞山東按察僉事。都御史劉大夏奉詔督開運河，以中才，檄修築張秋一帶，功成，陞本司副使。久之，致仕。初，中爲郎中時，莆中林貞肅俊疏劾僧繼曉，逮治繫獄，僚友莫敢往來，中日往臨視，且令其弟供餉不絕。及俊南竄，又遣一僕供役，直抵謫所而歸。人有譬止之，中曰：「人死且不惜，吾何顧官爲？」

盧泗 字宗充。以貢授湖口令，民苦夫役算給法，泗裁革過半，更番差遣，夫無冗食，支給聽民自便，乾沒弊絕。以忤上官落職，歸囊索甚，湖人肖像祀之。

葉轍 字文範。嘉靖中以貢任靖安縣。敬以持己，慈以愛人，尤重學校。見《靖安志》。

盧兆 字吉夫。以貢任分宜訓導。博覽能文。

盧廷桂 字元芳。少穎悟，學行卓越，事繼母以孝聞。選貢上春官，乞歸養，授廣東藩幕，翰林王應鍾爲撰《紀孝錄》。

楊懋 字大德。幼孤，事母甚孝，友於兄弟。博洽善文辭，尤長於詩，從游士甚衆，稱爲西軒先生。以貢授吉安訓導，歸家常窘急，而文稿充笥。子烈。

烈 字武卿。孝友道學，綽有古風。萬曆中，以選貢任歸安丞，與令勤民恤災，疲勞而卒。

官寅 字思敬。嘉靖間應府庠貢。天性孝友，以道學爲己任。歷嘉興教授，所至教澤及人。視平湖篆，清介不染。及歸，杜門課子，立祭田，睦宗族。

盧應瑜 字叔忠。爲遂溪令，撫綏流移。遷潮州貳守，治河有功。掛冠歸養，著書闡明格致一貫、中和夜氣之旨。

永安縣(一〇)

皇朝科第

舉人 進士子、午、卯、酉屬舉人、辰、戌、丑、未屬進士。

洪武十七年甲子 鄧文鏗原隸沙縣。

十八年乙丑 鄧文鏗

永樂十二年甲午 賴福原隸沙縣。

成化十六年庚子 陳隆 蘇信應天中式。

弘治六年癸丑 蘇信

正德二年丁卯 林孜

十四年己卯 李璋

嘉靖四年乙酉 李杏

十年辛卯 曾守成

十九年庚子 林騰鯉貢士祥次子。

二十二年癸卯 林騰蛟第...人。祥季子。 謝昊

二十六年丁未 林騰蛟

三十七年戊午 蕭時中

四十年辛酉 吳應雷

四十三年甲子 賴萬嶼

萬曆元年癸酉 陳源湛應天中式。

三十四年丙午 嚴九岳

三十五年丁未 嚴九岳

貢士、監生賢者雜見列傳中。

有傳

鄧文鏗 陳隆 陳祥 李杏 林祥子騰蛟、騰鶴 張仁 陳源湛

鄧文鏗 字德聲。授茂名知縣，擢刑部主事，累都察院右僉都御史。不畏強禦，獨持風裁，劾貴戚之冒禁鬻私茶者，其人卒置法。文鏗亦坐是出知武昌，改知德安府，轉苑馬寺卿，以老致仕。

陳隆 字文星。任潮陽知縣，清勤慈愛，興學勸農，節夫馬費，革左右侵漁之弊。後調任，致仕。家居孝友，好學不倦。壽至九十。

陳祥 繇監生，弘治中授餘杭簿。蒞官清慎，奉身儉薄，憫孤窮，好賢士，仁義藹如。廨地閑曠，親自灌蔬，所其無逸，以示吏民。

李杏 字子芳。居父喪，哀毀廬墓。初，領鄉薦北上，中途聞母疾，即奔回侍養，當道所給贖金，盡送還官。母卒，如居父喪時。授東昌府推官。寒儉至家人不能堪。擢南大理評事，歷陞四川水利僉事。奉命採礦西蕃，遠涉瀘水，每廩給，惟受蔬米。行日，驛吏折乾以餽，悉峻却之。竣事乞休，明日遂行。四川

巡撫以應得柴馬銀送至其家，不人私帑，買田以供祀事，餘賙戚里之貧者。奉詔進階。年八十二卒，遺命服用布素，毋俾越禮。所著有身、心、家、鄉四範，容、忍、謙、恭四箴。

林祥 字時和。以貢人成均，選長沙府經歷。守閩學行，優重之，委以荒政，多所全活。後以宦誅不展，棄官歸。得壽九十。子騰鵠、騰鯉、騰蛟。（一一）

騰蛟 字士材。授知新會，習性敏斷，喜抑豪強。賊據謝大用群無賴肆劫里中，倚長潭盜何貳輩爲聲援，騰蛟知之，有語及，輒不答。適新寧賊嘯金鷄山，佯爲追捕，中道反兵襲大用，擒之，俘斬甚衆。方欲討何貳，會母訃至，即使人招貳護行，且曰：「爾素蓄毒弩，煩爾爲衛。」貳信之，請歸治具，與之期。密遣驍勇伺便縛之，餘衆奔白芒海，生擒六十人，斬首稱是，於是四境晏然。補任休寧，邑故無城，會倭夷倡亂，力建議創築，縣無逋事，政稱神明。以最擢監察御史，時三殿燬，朝廷欲新之，財用方詘，命督南直隸、江西、湖廣逋負，所至悉心規畫，徵其可徵，而奏免其不可徵者，疏曰：「是皆已焚之林，已竭之澤，田漁其間，所獲甚微，傷生實大。」世宗可其奏。出按廣東，道劾奏吏部，罷去數人。孫禮部陞稱曰：「林侍御一疏，數十年正氣復振。」復有命按江西公田，吏望風解印綬。當路畏其言論，改河南按察僉事。是時，伊王所行多不法，諸司莫誰何，騰蛟至，即條奏其數十事。世宗遣給事中按驗，與王置對，諸同官大率持兩端，騰蛟前，大言抵數之。獄未具，以疾卒。臨卒，命其子曰：「必結竟伊罪，而後殮之。」及王免爲庶人，其子乃以柩還，人謂其以屍置對。還柩之日，河洛、汝潁民送出境者千餘人，仍爲祠廟，或壘土作壇祀之。萬曆中，革亭方應選作《汝州祠記》曰：「公嘉靖間觀察洛汝，六條較著，風稜斬然，史不勝書。時伊負潁相勢張甚，官奴晝攫人，藏命作奸，稍繩三尺，則恚，且掠去，令伶工辱諸市。才者去，而來者多迴車也。公

至，投袂起，亟謀之參知某、郡守某，廉諸不軌，劾去之。一紙書剪強藩如秋葉。伊廢而公尋暴卒，何渠無天也！或謂伊卿公，恨不得傳刃公蓋中，鳩以死。嗟夫！裴中立、武元衡，夫非其人與，幸而爲中立，不幸而爲元衡，皆以身殉者也。」

騰鵠 萬曆中以貢任晉江教諭。諸生贊鵠，一概峻卻。陞王官去，諸生碑之學官。

張仁 字守性。居貧力學，善詩，精楷書。時晨炊或不舉，意氣自如。以貢訓南雄，踰年卒官。

陳源湛 爲和平令，有岑巢巨寇江月照、華英、李珍、賴元等，劫殺商旅，囚辱委官，源湛設計督鄉兵衝巢，月照就擒。珍、元等不服招撫，潰圍大亂。請大兵追之，至范羅洞，三戰殲厥渠魁。安集流移，給還被占田產，更請置營屯兵爲後障。兩臺上功，受欽賞。

〔校記〕

〔一〕「尤溪縣 順昌縣 永安縣」九字，各本原脫，據本書體例補。

〔二〕「沙縣」三字，各本原脫，據本書體例補。

〔三〕「邵一作鄭」，各本原作「一邵作鄭」，據文義改。

〔四〕「建」下，各本原闕一字。

〔五〕「尤溪縣」上，各本原衍「延平府」三字，據本書體例刪。

〔六〕「汪一作江」，各本原作「一汪作江」，據文義改。

〔七〕「順昌縣」上，各本原衍「延平府」三字，據本書體例刪。



〔八〕「余」作「李」，各本原作「余」，據文義改。

〔九〕「明」作「朝」，各本原作「明」，據文義改。

〔一〇〕「永安縣」上，各本原衍「延平府」三字，據本書體例刪。

〔一一〕「子騰鵠、騰鯉、騰蛟」，各本原作「子騰蛟、騰鵠」，據本卷「皇朝科第」改。

# 閩書卷之一百四

英舊志 縉紳

汀州府 長汀縣 寧化縣 上杭縣 武平縣 清流縣 連城縣 歸化縣 永定縣(二)

長汀縣(二)

宋科第

太平興國三年戊寅 羅彧

端拱二年己丑 吳簡言

咸平三年庚子 梁顥

大中祥符元年戊申 陳宗道 林務滋

皇祐五年癸巳 吳庚簡言曾孫。

元祐中明經 羅祝

紹聖四年丁丑 謝潛

大觀三年己丑 王明哲

政和五年乙未 鄭立中

重和元年戊戌 王宗哲明哲兄。

建炎二年戊申 羅烈

紹興二年壬子 王宣哲明哲弟。

五年乙卯特奏名 陳貫

十二年壬戌 黃烈

特奏名 謝郊 葉彥光 羅閻 歐陽元亨 王弁

二十四年甲戌 賴遂良

二十七年丁丑 李汝明 歐陽旦

特奏名 王仕 王佐仕弟。

隆興元年癸未 楊方

特奏名 陳肅 吳與權

乾道五年己丑特奏名 陳才 黃彬

淳熙二年乙未 翁熙

特奏名 鍾迪 鍾遂迪弟。 賴紹烈

五年戊戌 吳雄

八年辛丑特奏名 鍾秀穎迪弟。

十一年甲辰特奏名 蕭雍

紹熙元年庚戌特奏名 吳筠

慶元二年丙辰 鄭應龍

嘉泰二年壬戌特奏名 李克己

開禧元年乙丑 趙汝求

特奏名 李蹊 張煥

嘉定元年戊申 賴簡

特奏名 張旻 羅宗友

四年辛未特奏名 鄭興 黃鎬

七年甲戌特奏名 巨光遠

十三年庚辰 黃三益

十六年癸未 羅子純

特奏名 吳柔勝 李恕

紹定二年己丑特奏名 吳昊 李涇 賴炳

五年壬辰特奏名 王夢昌

嘉熙二年戊戌 曾華

特奏名 陳怡

淳祐元年辛丑特奏名 鄭文可 江天錫

四年甲辰 潘全

特奏名 賴記 賴應發 黃大中 鄒丁

十年庚戌 范廷傑

寶祐元年癸丑特奏名 歐陽應星

開慶元年乙未特奏名 林講 姜文茂 吳融 吳仲衡

薦辟、任子賢者雜見列傳中。

有傳

羅彧 吳簡言曾孫庚。 梁頤 陳宗道 羅祝 謝潛 鄭立中子穆。 王宗哲 羅烈 楊方 翁

熙 吳雄 鄭應龍

羅彧 字仲文。初授大理評事，雍熙以後，歷知惠、筠、成三州，所至有惠愛。筠珥筆風熾，彧曰：「非人好訟，聽者不明耳。」剖滯決奸，雀鼠衰息。澶淵之役，以太子贊善、太常博士、屯田員外郎扈從，命與宰相寇準參議機務。契丹乞和，爲報聘使。還京，乞歸里。真宗嘉其勞，特除諸路提點使，賜錦衣、金帶、錦旂，以示褒賞，仍知本州事。道卒。

吳簡言 字若訥。舉進士，調綿州戶曹。崇寧中，擢博學宏詞科，授著作郎。時方招撫西南夷，擇簡言往諭之。使還，以功遷祠部郎中。曾孫庚。

庚 字西羨。刻志問學，効古人鑄鐵硯以自勵。調黃州司理、泉州推官，改京秩，終清海軍僉判。

梁頤 字習之。博洽能文，陳堯咨屢加薦引，歷知廬州、漕廣東。以和戎功遷開封府判官，擢兵部員外郎、河南府少尹。

陳宗道 字道夫。以文墨議論見知於丁謂、寇準，擢開封府教授，卒。

羅祝 字叔和。閉戶讀書，人罕識面。再娶未期，妻卒，悉以房奩歸外族，契券皆未啓緘。元祐間，明經中第，調漳州法曹。漕使按行，欲秉燭入庫，祝堅執於律不可。嘗手釋《六經》及注《唐書》，尤精律數。終明州觀察推官。

謝潛 字致虛。舉進士，調衢州理掾。崇寧四年，應博學宏詞科，中選，調瀛洲教授。上封事，譏切時政。坐元祐黨籍，更赦，歷知古田、弋陽、建寧三縣。在建寧，治聲最著。建炎初，晝迎取二聖策以獻，進秩二等。終奉議郎。

鄭立中 字從之。初調崇安尉。時方臘餘黨寇閩，立中部民修分水寨，堅壁以守。賊恃衆衝突，立中出不意擊敗走之。改知海門縣，未赴，金人南侵，擢行軍總管。奉使募福建民兵，得數千人，轉面前，收復光、蔡等州，固守蔡。虜人再犯，遂被害，特贈朝散郎，官其子穆。紹熙中，再官其孫岫縣令。陳顯伯建道學六君子祠於邑庠，獨以立中及楊方配食。子穆。

穆 字應和。以父功調泰興令，浚河溉田二十頃。再調定遠令，梟捕寇，葬枯骸。丞常熟，攝縣事，有潰兵絕江繇福山闖關，單車撫定之。終衢州通判。

王宗哲 字廷俊。父格，見章布。宗哲初調南豐簿，歷泉州理掾、韶州教授、潮陽丞，終灌陽令。手植六柳堂前，號六柳先生。與郡守張憲武爲詩友，年八十一。

羅烈 字子剛。調泉州同安尉，寇楊勃自劍趨泉，烈部兵扞捕，邑恃無恐。再調興寧令，會群盜出沒，一日，賊突入縣執烈行，烈以理曉諭，賊不加害，送之還邑，各遁去。亡何復來，烈率千餘人擣其巢，皆潰走，得所掠子女二百餘人，遣歸家。終宣教郎、知廬陵縣。烈喜著述，有《博文新說》十卷、《古文類證》數萬言，註《杜甫詩事類》千餘條行於世。

楊方 字子直。清修篤孝，行己拔俗。舉進士，調弋陽尉，還道崇安，參謁朱文公，面受所傳，未赴，改清遠簿。廣廉憲姚孝資檄攝曲江，以廉介剛直聞。改武寧丞，秩滿，當路交薦，改秩趙忠定汝愚帥屬，辟機宜。尋薦於朝，召對，擢宗正寺簿。乞外，通判吉州。淳熙末，知建昌軍，召除編修官。首乞朝重華宮，辭甚懇切。寧宗立，除秘書郎，出知吉州。偽學禁興，坐汝愚、熹黨罷居贛州，閉門讀書。黨禁解，起家知撫州，未幾奉祠。嘉定更化，召爲侍右郎官，進考功郎官，不三月，復積忤去。踰再歲，除直寶謨閣、廣西提刑。至則循歷屬部，發摘奸貪。至象州，以疾卒。

翁熙 字正之。調袁州戶曹，長於吏事，三鞠疑獄，平反明允。守欲上其事，辭曰：「受賞則置前勘官何地？」被檄驗旱傷，徒步阡陌，不憚勞勩。王行賑濟，遍歷鄉落，勸分富民廩，民賴全活。攝倅，捐俸不受，仕垂滿，卒。

吳雄 字夢錫。篤學而深於《易》。調隆興府戶曹，監劄疑獄。宰靖安，有《勸民五事》、《諭民十詩》，自注《孝經》一編，戒諭上戶毋閉糴，務抑末。終廣西帳幹。

鄭應龍 字少慈。調潭州理掾，到官，凡枷械箠杖，稱輕重如法。罹狴犴者，以理開諭，悉得其情。有罪者雖編黜他州，亦辭謝去。有兵士盜，帥下獄，時連數人，皆坐流。應龍力爭，帥意未決，應龍曰：

「若使罪及無辜，有去而已。」帥嘆曰：「鄭君若不勝衣，執法乃爾。」

皇朝科第

舉人 進士子、午、卯、酉屬舉人，辰、戌、丑、未屬進士。

洪武十八年乙丑 張子恭

二十九年丙子 張齡 賴應祥

永樂二年甲申 蕭清 王中 曾子榮舊志有洪武三十五年榜，考是歲革除，故元年開科而明年甲申會試。

三年乙酉 葉任 童彥通 賴從善 雷迅 張源

四年丙戌 雷迅 藍必寧

六年戊子 謝慶餘 官謙

九年辛卯 吳得全 陳善

十二年甲午 吳得誠 徐瑀

十五年丁酉 王瑛 王泗 賴瑄 韓璿

十六年戊戌 陳善

十八年庚子 曾子盛 周冕 王振 林宗 郭友賢 賴琛 朱滿

十九年辛丑 吳得全

二十一年癸卯 張瀾

宣德元年丙午 王英



四年己酉 曾蘭

十年乙卯 王鑑

正統九年甲子 馬馴

十年乙丑 馬馴

景泰元年庚午 周璇

天順三年己卯 王秉昌

成化元年乙酉 王淮

二年丙戌 周璇

四年戊子 王昊

十年甲午 陳壽

成化十九年癸卯 鍾文俊第二名。

□□□年□□〔三〕 鍾文俊

弘治二年己酉 鍾文傑

十五年壬戌 鍾文傑

十八年乙丑 李堅

萬曆七年己卯 羅尚賓南京中式。

□□□年□□〔四〕 陳鳴春

二十三年乙未 陳鳴春

三十七年己酉 賴明選 戴振先俱府學。

三十八年庚戌 吳廷雲

四十年壬子 康時貢生，順天中式。

四十三年乙卯 鍾有容文俊曾孫。

四十六年戊午 張錚履祥孫。 林鍾桂府學。 吳日修府學。

薦辟、貢監賢者雜見列傳中。

有傳

張齡 官謙 王瑛 劉謙 馬馴 周璇 廖輔 鍾文俊弟文傑。 李堅 胡經 廖文 楊昱

羅尚賓

張齡 洪武間繇歲貢中應天解元，任海康學諭。永樂二年，再諭崇仁，孜孜興學，倡建葺造不下，下至祭器香爐，莫不整飭，自是科第歲不乏人。

官謙 永樂中知汝州，恭慎慈愛，政知緩急。先是民多流亡，謙四出招撫，貸種免役，民歡趨之，歸者動以千數。廟學頽圯，捐俸倡修。秩滿去，吏民思慕不已。

王瑛 宣德中除戶部主事，遷員外郎，歷山西參政，終左布政使。爲人清謹，所至有能聲。

劉謙 字廷豫。正統中以貢除南後府都事，陞北左府經歷。爲人清謹老成，精詳仁恕，累課居最，乞恩致仕。

馬馴 字德良。舉進士，授戶部主事，小心勤慎，循守繩墨。累遷郎中，奉勅總督宣府糧餉，悉心區畫，省遠輸費三之一，在部歷十六年，公勤慎密，楊尚書甚愛之，薦陞四川參政。時蜀寇作，方憂廩乏，馴至，覈已徵未用糧得百萬斛，以供軍賜。文綺嘉勞，尋陞本司右布政使。播州用兵，出庫錢糴米供餉，民免遠輸。寇平，勅書褒獎，陞本司布政使。松潘蠻叛，復議用兵，馴謂宜以德懷撫，力諍不從。後兵興無功，糜費過當，人益服馴遠識。擢都察院右副都御史，巡撫湖廣等處。會關中饑民流食荆襄，設策賑恤，全活甚衆。湖湘尋亦災傷，爲奏減歲人民賦。貴州守臣請征苗蠻，徵兵餉於湖南，上疏力止之。在湖湘七年，務持大體，不事小察。未幾謝歸，建數椽山麓，書古人勸世文，揭之壁間，以誨子姓。年七十六卒，賜祭葬。

周璇 字元吉。父冕，行誼、文詞，鄉評推重。璇爲南京兵科給事中，忠鯁有聲。

廖輔 字舜元。弘治二年以貢士知連州，政事明敏，士民畏服。工草書，有張弼筆意，爲世所珍。訓導董宣贈之歌曰：「壽州草書天下雄，翰林風月羅心胸。筆鋒清勁奪天巧，造化到處全無功。今年獻績來三殿，我在京華嘗獨羨。文卿詞客章縫儒，奔走門牆希一見。錦箋楮幣堆連屋，醉來一掃成千幅。胸中別是一乾坤，散落香葩香馥馥。丰神瀟灑清而癯，好古博雅尤能詩。作官清白不須說，神物一躍登天池。臨池忽驚風雲起，四壁翛然響春雨。陳玄力盡北溟寒，中書都在冰壺裏。龍驤鳳翥何足奇，海枯石出人生疑。天吳水怪露形跡，溫嶠不必然文犀。京城市子兼胥吏，懇求一幅情何至。須臾下筆不辭煩，雨露何曾擇其地。行行字字無嶮巇，龍蛇上下分雄雌。收拾前人舊家數，作成後學真珠璣。壽州與我交太密，我愛壽州一管五。色生花筆莫言價，重輕黃金四海有。」人收墨跡。按輔知連州，而云壽州，似當闕疑。

鍾文俊 字舜臣。初縣戶部主事，轉吏部文選員外，陞廣東參議、湖廣參政。廉謹寬厚，卓有賢聲。弟文傑。

文傑 字邦臣。初授戶部主事，轉工部員外郎，擢知廣州。威儀器度，見者欽之。中使潘忠橫恣，且以非禮相加，文傑談笑語之，忠爲愧屈。居官一廉自守，留心風教，勤敏治辦，竟以瘁歿。

李堅 字貞夫。孝友謹厚，博洽英敏。雄文麗句，落在人手，人爭收之。

胡經 以監生歷知吳川縣，剛介廉慎。

廖文 字宗道。以監生。嘉靖二年任義寧知縣，值蠻賊猖獗，民不聊生，諮問疾苦，給牛種，寬逋負，縣賴存活。

楊昱 知都昌縣，操履端嚴，布袍蔬食，減徭累民糧。歲旱，祈禱輒應。民居遭火，叩首隨滅。致仕歸。

羅尚賓 字晉卿。父病，嘗糞驗甘苦。父葬廬墓，墓在萬山中，虎跡所交，喪一犬一僕，尚賓弗顧，晨夕臚拜墓下，至僵仆，手足盡裂，下痢幾殆。母命之歸，終弗歸。此時姜公寶爲學使，聞其行，強其以纓經見，使再至，弗應。代者蔡公國珍旌其閭曰「知孝」。謁銓，除武陵令，屬有御史劾海忠介者，將疏爭之，友人曰：「不念養母耶？」爲焚其草。抵邑逢儉歲，裁罷一切供費，躬巡行賑貸，窮鄉僻壤，足跡殆徧。父老拜馬首：「胡不令丞簿來？」尚賓曰：「丞簿來，徒騷汝輩耳。」御史薦武陵令賑饑，日活百命也。土豪金某，居濱湖，出沒爲奸利，收捕殺之。陳按察某養子殺人，時蔡公國珍方分部湖北，爲請，不能得，竟論如法。人謂強執矣。乃大意常在寬恕，胥役張某以罪逮御史臺，禍不測，白御史：「胥不足惜，其祖母老矣，

且張氏僅此種也。」胥得末減。諸生賀當貢，方試疾作，尚賓歎息：「數十年辛勤，一朝棄之耶？」爲列其美行於學使者，得無恙。居武陵數載，治行爲三楚冠，僅遷工部主事。精鉤較，嚴關防，甚爲部尚書所重。亡何，有督造清江之命。清江督造兼司樞政，所當抽分，聽商自報，吏不得夤緣其間。往稅木者以意爲多寡，至一木而稅二三緡，尚賓繩圍之，（五）圍尺寸若干，輸錢若干。釘鐵過者，故事率三而留一，甚且課其輸金。尚賓罷輸金，又大減所留額，商大稱便，至勒石爲絜令。諸有事督造者，觀尚賓所釐革，歎謂從來將作使者未有也。而尋卒，篋中不贏一錢矣。始尚賓將至清江，時淮有厲鬼附人，言：「新城隍神自清江至。」而府主方逐之。至是飲淮守，醉卧，起，無疾逝。葉公向高銘其墓，曰孝廉先生。

#### 寧化縣（六）

##### 唐進士

大中十年丙子 伍愿改名正己。

##### 伍正己

伍正己 字公謹，舊名愿。擢第，累遷御史中丞，蒞官略細故，存大體。正人爲邪佞所擠者，極力營救。大臣或以讒貶，輒再三論列。旣而，朋黨漸盛，名流被錮，正己曰：「勢不兩立矣。吾祖子胥可鑒，吾能以杯水救車薪哉？」遂告歸田，未幾，唐室俶擾。卒時年八十一。有四子：泳、演、濬、洪。三子以蔭補官，洪獨不應，隱居武陵原，自號抱朴居士。

##### 宋科第

太平興國八年癸未 鄭文寶

景德二年乙巳 黃迪

大中祥符元年戊申 伍祐正己曾孫。

皇祐元年己丑 雷宣

五年癸巳 伍擇之祐子。

熙寧六年癸丑特奏名 伍錫

元豐二年己未 雷堯

紹聖元年甲戌 曾旦 伍文仲

元符三年庚戌 伍懋祐孫。

大觀三年己丑 伍仲休正己裔孫。

政和二年壬辰 雷協堯從弟。

五年乙未 張達觀

重和元年戊戌 黃或迪五世孫。

紹興五年乙卯 湯莘叟 伍杞 張良裔達觀子。

八年戊午特奏名 伍利用

十二年壬午特奏名 伍伯思

十五年乙丑 伍昇祐孫。

特奏名 雷靖

隆興元年乙丑特奏名 雷彥國 巫晦 雷碩 徐衍

乾道二年丙戌特奏名 黃槐

淳熙十一年甲辰特奏名 陰一鶚

十四年丁未 黃允升歲從弟。

紹熙元年庚戌特奏名 丘殿愛 曾義節

五年甲寅特奏名 伍周 曾光榮

慶元二年丙辰 趙與璵

特奏名 黃拱 伍群

嘉泰二年壬戌 黃頤允升弟。 丘唐傑

特奏名 雷倬

嘉定元年戊辰特奏名 巫夢文

四年辛未特奏名 張謙

七年甲戌 伍唐

十三年庚辰特奏名 巫潛

十六年癸未 伍夢諧

寶慶二年丙戌 趙與堂

特奏名 伍林

端平二年乙未 劉弁

特奏名 丘夢周

嘉熙二年戊戌 趙與岡

淳祐四年甲辰 張廷輔

十年庚戌 伍功甫唐孫

寶祐元年癸丑特奏名 黃旂

四年丙辰 黃潛 伍安然

開慶元年乙未特奏名 黃榮 伍子正 徐行忠 伍仲詢 伍邦彥 伍民瞻 伍文資 伍見獨 伍

純忠 黃唐臣 伍文炳 劉黼 巫藻

薦辟、任子賢者雜見列傳中。

有傳

鄭文寶 伍祐子擇之，族孫文仲、仲休。 李元白 雷協 張達觀子良裔。 湯莘叟 伍杞 劉并

鄭文寶 字伯玉。淳化二年爲殿中丞，奉使川峽均稅，奏蠲商人到岸錢。行次渝涪，聞夔州戍卒劫掠爲亂，乘舸順流一夕數百里至，悉擒斬之。使還，面加歎賞，賜五品服。尋爲陝西轉運使，會歲歉，誘豪戶出粟三萬斛，活饑民八萬六千餘人。官至工部侍郎。文寶嘗從徐鉉學文，尤長於詩，其題緱山詩曰：「秋陰漠漠秋風輕，緱氏山頭月正明。帝子西飛仙馭遠，不知何處夜吹笙。」後晏元獻守雒過而見之，取白



樂天語書其後曰：「此詩在在處處有神物護持。」又題綠野堂云：「水煖鳬鷺行哺子，溪深桃李卧開花。」歐陽文忠謂其不減摩詰、少陵風味。有集三十卷、《南唐近事》二卷、《江表志》三卷。

伍祐 字佑之，正己曾孫。舉進士，調零都令，歷知宣城、海昌，以廉能著。尋差楚州團練推官。先是，州有鹽場，自唐乾符間廢，蓋百四十餘年未有能起之者。祐至，首議興復，役不及民，甫期而就，歲入上緡錢數萬，人號伍祐場。天聖間，以列薦轉承奉郎，守秘書著作郎。爲人矜修寡與，同列讒忌，復出知海寧、華陽二縣。後加上騎都尉、通判濰州，轉承議郎，除太常博士。祐爲文近古，尤長於詩，有集行世。子擇之。族孫文仲、仲休。

擇之 字元賓。博洽有器識，恬於進取。舉進士，調南豐簿。時曾子宣、（七）子固猶未第，擇之一見奇之，與爲忘年友。治平間，以文彥博薦擢秘書少監。尋以故歸里，創義方堂，延明師，聚族黨子弟教養之。元祐間，復出宰長樂縣，時諸司酷暴相矜，輒興大獄，蹙然曰：「以忍附上，非我志也。」即日歸廬，觴咏自娛，不復出山。

文仲 字仲成。七歲能屬文，十六魁鄉薦，累七舉，紹聖中進士，後應宏詞科，卒。

仲休 字通遠。博學善屬文，充貢上庠。舉進士，調南康軍理掾，辟安遠令，尋知河源縣。丁母憂，勺水不入口，致瘠致疾。終承直郎。

李元白 名齊，以字行。博覽強識，肆力詩篇，而嗜杜尤酷。嘗集《大觀昇平詞》若干首以進。得初品官卽歸故廬，笑傲泉石而終老焉。

雷協 字彥一。充貢上庠，以《易》學知名，雖僻書雜傳，涉獵通遍。舉進士，調上饒尉，遷上猶令、古

田丞，終宣教郎、興化軍教授。

張達觀 字子周。才氣高邁，不拘小節，爲文逸宕，常於酒酣得之。舉進士，調洪州理掾、吉州推官。改秩，知邵武軍建寧縣。子良裔。

良裔 字景先。心非三經義，獨好程氏學。舉進士，調龍川簿，以伯父年踰八表，遂不赴任。郡守高其行，奏辟武平丞便養。到官，盜起，單騎造諭，皆感泣散。時有挾貴攘功者，良裔不之校，輒投劾歸。歸而群盜復作。再調零都，遷衡山丞，卒。良裔父與秦檜有進士同年之契，或勸之通謁，笑謝曰：「附麗謀進，吾先人所羞也。」

湯莘叟 字起莘。少好吟咏，有《馬上吟》：「夜雨洗山新綠嫩，曉風吹杏淺紅乾。」《幽居吟》：「葛巾簪下無多髮，茅舍門前有好山。」皆膾炙人口。終饒州推官。

伍杞 字卿材。舉進士，調南安理掾，治獄多所平反。時有外邑尉以貲入官，急於謀賞，盜不及格，誣平民充數。杞得其情，尉懼罪，求援至郡，郡欲曲從，杞力爭，且不欲貽尉失人罪，止下縣更訊，士論高之。終宣教郎、知潮陽縣。

劉并 字清叔。事繼母以孝稱。舉進士，調會昌尉，勒弓手申警，嵯寇無敢往來。嘉熙間，漕帥王埜差臨川和糴，時朝廷降見錢充糴本，他官皆易以楮，并獨用所降錢。後易楮者皆被論坐黜，而并繇此見知。辟大庾令，擒盜。累調辰州判官。辟知瑞金，築城建學，能聲章徹。以平洞寇功就任，改京秩，終奉議郎。

皇朝科第

舉人 進士子、午、卯、酉屬舉人，辰、戌、丑、未屬進士。

洪武二十一年戊辰 張顯宗何年舉人未詳。

永樂三年乙酉 陳子義

六年戊子 吳祿 伍宗源 雷汝康

九年辛卯 張彥銘 陳辰 羅潤 賴海

十二年甲午 吳得誠 徐禹 張彥志

十三年乙未 伍宗源

十八年庚子 伍志亨 伍志厚亨弟。

萬曆二十二年甲午 黃槐開 黃家謀

薦辟、貢、監賢者雜見列傳中。

有傳

張顯宗 張彥銘 謝道

張顯宗 字明遠。舉進士第二人，授翰林編修，奉勅撰述文字，稽閱經史。撰寫《榜文編錄》、《諸司職掌》、《逆臣錄》、《忠義錄》、《輔教錄》、《警遇錄》。隨侍親王往秦、晉、燕、周、齊諸國，遷太常丞。時國子祭酒宋訥以嚴訓士最被上眷，訥卒官，繼者多不稱旨，顯宗以年少被命署監學事，申明學規，諸生坐堂遂衆。太祖嘉之，尋命爲真。顯宗嚴毅方正，於諸生中罕與可，獨以吳溥爲賢，爲延譽公卿間，後溥試禮部第一，仕至國子司業。溥，吳與弼之父也。建文末年，陞工部右侍郎，卿命往江西招集丁壯，募民出粟，以

禦靖難師。還，復爲祭酒。成祖卽位，與司業張智歸附，尋以嘗募兵江西，謫戍興州。永樂五年，起爲交趾左布政使。當遠人款附之初，兵農以數萬計，顯宗勞來撫綏，號令所及，如歸父母。交趾人祠祀之。

張彥銘 歷任常州府通判，乞致仕終養。家居三十餘年，非公事不至偃室。壽九十七終。爲人崇正學，憎俗流，號素庵老人。弟彥正、彥隆，見韋布。

謝道 字宗魯。篤志勤學，文戰不利，卒業南雍。琉球官生來朝，奉朝旨讀書，國子大司成劉公遴師教之，以命道。後授歸善知縣，政和民宜。晚歸林下，多有吟咏。

### 上杭縣〔八〕

#### 皇朝科第

舉人 進士 子、午、卯、酉屬舉人，辰、戌、丑、未屬進士。

洪武三十二年己卯 高鵬

永樂元年癸未 李誠 舊志有洪武三十五年一榜，考是歲革除，故元年開科而明年甲申會試。

三年乙酉 陳詳 府學。

六年戊子 陳觀 林順

九年辛卯 游瑩 李綸 郭定安 梁弼

十二年甲午 周弘 劉贊

十三年乙未 梁弼 李綸

十五年丁酉 羅經 吳澄 曹寧 黃中 黃祐

十六年戊戌 羅經

十八年庚子 丘聰 劉誠 謝佐

十九年辛丑 陳詳 周弘

二十一年癸卯 范金 梁旻 闕和 龔興

宣德十年乙卯 張禎 陳選

正統六年辛酉 丘巖

景泰元年庚午 張弘府學。 郭緒

天順三年己卯 丘弘 羅懿

八年甲申 丘弘先是，七年癸未春二月，會試場屋災，詔移秋八月，至是春三月始廷對唱名。

成化四年戊子 李楫

七年辛卯 郭資

十一年乙未 李楫 郭資

十九年癸卯 吳琚

弘治五年壬子 梁喬

十一年戊午 溫明 周輅

十五年壬戌 梁喬

正德二年丁卯 周勳 吳珂

六年辛未 周勳

八年癸酉 丘道隆

九年甲戌 丘道隆

嘉靖十九年庚子 陳大猷

二十二年癸卯 丘尚志

隆慶元年丁卯 唐廷誥

萬曆四年丙子 張恩

四十三年乙卯 陳于階

四十六年戊午 鍾應明

薦辟、貢、監賢者雜見列傳中。

有傳

羅經 范金 丘弘 郭資 李楫 周輅 溫明 梁喬 丘道隆 何濬 丘佐時 丁致卿

羅經 字復常。宣德初令零都縣，愛民興學。再知淇縣，教民以桔槔溉田。後陞監察御史，終浙江

按察僉事。

范金 字文堅。性沈靜寡言。從王廬淵授《春秋》。永樂癸卯，以經義甲一道。正統間，典始興、陵

水二庠教。既，以疾歸養二十餘年。士子樂從之。

丘弘 字寬叔。天順中授戶科給事中。成化二年，淮陽大饑，弘奏賑恤之，陳時政十二條，遷都給事中。三年夏，地震，條上修德弭災七事，皆見施行。四年，因嬖幸求討莊田，具奏禁絕之，復劾奏張真人不法。五年，大祀南郊，受命出使琉球，未出境，卒。

郭資 字逢源。授嘉興知縣，察廉，擢監察御史。丁母憂，途卒。子幼家貧，不能舉二喪，僉事伍希閔爲葬焉。

李楫 字時濟。任新昌、分水知縣，常官以廉才著稱。陞戶部主事，卒。

周輅 字文載。知上饒縣，歲侵，請於朝，減常賦三之一。九年，以疾歸。

溫明 任潮州府推官。罷歸，出俸餘買屋贍貧族。

梁喬 字遷之。正德中爲刑部主事，嘗同疏劉瑾，下獄而解。守紹興，有善政。六年，以母老歸。母歿，卒於喪。生平長者，而後輩重焉。

丘道隆 字懋之。知順德縣，大畏其吏民，賑饑剪寇，毀淫祠，新學舍。三載，擢御史，首陳鹺政便宜，及言逐佛郎機不入廣南。其巡按，有風裁。知南雄府，端方，先大體，僚屬凜凜奉法，政不減治縣時。廣之郡縣志焉。

何濬 字通源。正德中以貢爲南康府判，有卻金之節。宦歸，餘俸八兩，至女無以嫁。結廬寓郡中，公室無其跡，雖郡守餽而曲辭焉。

丘佐時 字良輔。爲諸生，貧，而反遣人金。嘉靖中，以貢爲太平府訓導，署繁昌縣，有賂之百金者，懸於譙樓。陞隆南教諭。

丁致卿 字克修。嘉靖中爲臨安訓導。三年，致仕歸。捐貲爲族蒸嘗、婚葬費。

武平縣〔九〕

宋科第

紹興八年戊午特奏名 劉易簡

嘉定十六年癸未特奏名 鍾自強

元

李睿

李睿 字景明。至正間尹上虞，和易有守，是非必析於理。歲久旱，周視阡陌，免其稅租。嚴湖禁，重兵防。會世亂不能歸，卒葬於上虞。謝肅銘其墓。

皇朝科第

舉人 進士子、午、卯、酉屬舉人，辰、戌、丑、未屬進士。

永樂元年癸未 何志道舊志有洪武三十五年一榜，考是歲革除，故元年開科而明年甲申會試。

二年甲申 劉隆

三年乙酉 李俊 盧政

宣德四年己酉 馮瑩

正統六年辛酉 廖時中



十二年丁卯 胡泰 饒熙

弘治十七年甲子 舒綸

正德十三年己卯 舒泮

薦辟、貢監賢者雜見列傳中。(一〇)

有傳

劉隆 謝和 王瓊 陳璋 丘巒 鍾鴻 鍾鳳 林漢 舒通 李清 鍾天爵 王儼 鍾文表

李懋材 李玫 舒聳

劉隆 任南昌府推官，陞河南道御史。時太監王金酷虐青田民，潘孟吉聚衆殺之，成祖怒，欲盡屠其邑，隆奏誅首惡，民頌德立碑。

謝和 以歲貢任湖口知縣，躬率勤儉，教民力田，政多惠澤，民祠祀之。陞同知。

王瓊 字良玉。以歲貢任南京兵馬，撫院方有戎事，瓊從旁贊決，每中窾。會以才能授兵部職方主事。弟璘，見韋布。

陳璋 字良甫。以歲貢任西安簿，歲饑請賑，上司未報，璋嘆曰：「忍坐視耶！」捐俸倡邑民，出餘廩煮粥飼之。民頌惠焉。

丘巒 字弘銳。以《春秋》入監，初任通州判官，潞河理冤。補任連州，築城擊賊，以善最稱。

鍾鴻 字騰霄。以歲貢任上杭丞，民頌爲真父母。居家動依古禮，睦俗敦鄰，懸繩掛坑。寇亂三省，協攻勦平。良民多被誣累，鴻挺身爲辨，全活甚衆。年八十，卒。

鍾鳳 以歲貢知北流縣，猺蠻靖息，親老乞休。先業悉以讓弟。

林漢 以歲貢任雲南都司，斷事謹飭，無妄語。聞人善，喜揚之，有訊惡，則搖首。非賓禮鄉飲，不人公門也。

舒通 字廷亨。性鯁直，學門淵源。正德七年，以平寇有功，拔入胥監。初任會同簿，補任東陽，所至有聲。

李清 天性孝友，篤節義。既廩於學，遂讓產諸兄弟。壯年失偶，不復娶，曰：「吾有子矣。」開館授徒，造就甚衆。以貢授海鹽訓導，模範端謹，一時推重。

鍾天爵 字良貴。以歲貢任平樂推官，建平蠻八議，撫按采用之。設昭平、足灘、廣運三堡，番軍戍守，領兵與蠻賊戰，斬首級千餘。署富、賀二縣事，猺日翟貴進梗化，立屯堡八隘，團練鄉兵，搗巢斬之，昭州賴以保障。

王儼 以歲貢任常德府學訓導，纂修郡志，請創義倉，汰淫祠，上官悉從之。

鍾文表 字日章。以歲貢知梁山縣，政尚嚴明，民不敢欺。俗多輕生圖賴，有至者必痛懲之。繼任石城，崖獍猖獗，憲司征勦，慮邑不支，請撥他邑協濟。調度得宜，民忘勞費。以忤直取忤，乞終養歸。

李懋材 以歲貢任來安知縣，因俗爲政，加意學校。

李玫 字貞夫。任連山學訓導，以才華聞。署本縣事，遇大羅山賊攻城，幾陷，竭力繕禦，當路嘉勞。其居家孝友，遇荒凶，出粟賑人，而好爲施捨。

舒聳 以歲貢任邳州訓導，勤學樂育，泊然自守，有古狷介風。卒於官。

清流縣(一二)

宋科第

紹興五年乙卯 賴紱(二三)

十八名戊辰特奏名 伍時可 伍致達

隆興元年己卯特奏名 張九思

淳熙八年辛丑 張顥

十四年丁未特奏名 曾適 伍必勝

紹熙元年庚戌特奏名 吳夢得 蕭夢兆

慶元二年丙辰 賴添麟

五年己未特奏名 謝傳霖

嘉定元年戊辰 賴簡紱了。

四年辛未特奏名 陳子遇

十六年癸未特奏名 劉諤

淳祐元年辛丑特奏名 晏景春

四年甲辰特奏名 伍叔輝

慶開元年乙未特奏名 吳必勝

薦辟、任子賢者雜見列傳中。

有傳

江禮 賴紱

江禮 乾德初任潭州判官。乾德元年，慕容延釗討劉文表，取周保權，禮率鄉兵二千人，與保權力戰於湘陰而死，汀人義之，爲立祠。

賴紱 字冕仲。尉程鄉，會賊起，畫策招捕，境內悉平。遷鎮南軍節度推官，改京秩，知南劍州。某縣漕司增以民鹽，紱知其抑配，堅不奉命。終僉書清遠軍節度判官。紱居家嘗冒刃以救叔，詣賊壘以解衆，鄉人重焉。

### 皇朝科第

舉人 進士子、午、卯、酉屬舉人，辰、戌、丑、未屬進士。

洪武三十二年己卯 林應福 江文勝

永樂元年癸未 謝惠 張永隆

二年甲申 謝惠 張永隆舊志有洪武三十五年一榜，考是歲革除，故元年開科而明年甲申會試。

三年乙酉 賴添貴 湯叔良 黃志中

六年戊子 朱永明 陳馳惠

九年辛卯 巫章瑤 伍禮

十二年甲午 林慶宗

十五年丁酉 王瑤

二十一年癸卯 葉福

宣德元年丙午 葉興

四年己酉 雷亨 賴世隆

五年庚戌 賴世隆

七年壬子 呂續

正統六年辛酉 黃源

九年甲子 賴康

十二年丁卯 劉宗

景泰七年丙子 鄒以倫

天順三年己卯 雷瑤

成化十六年庚子 葉元玉 賴世傳

十七年辛丑 葉元玉

十九年癸卯 劉世寬

二十年甲辰 賴世傳

二十二年丙午 賴從善

弘治二年己酉 伍晏

五年壬子 雷世鳴 雷衡亨孫。

正德二年丁卯 賴希凱世傳子。

五年庚午 余本純

十一年丙子 雷蒙恩亨玄孫。

嘉靖十年辛卯 鄧向榮

十三年甲午 伍思召

二十三年甲辰 鄧向榮

二十五年丙午 劉梁

二十六年丁未 劉梁

二十八年己酉 鄒國卿

三十一年壬子 伍承烈

隆慶元年丁卯 鄒時泰 裴應章

二年戊辰 裴應章

四年庚午 葉甘瓠元玉孫。

萬曆元年癸酉 伍可受

五年丁丑 伍可受

四十六年戊午 鄒時豐

薦辟、貢、監賢者雜見列傳中。

有傳

羅永恭 張永隆 賴添貴子從善，侄世隆、世傳。祐。余珪 巫章瑤 張榮 黃源 劉宗 鄒以倫

雷宙寬 葉元玉 伍祐 雷慶 丘武 馬善 裴應章 伍可受

羅永恭 博通經史，當元末國初，隱居不仕。有司舉攝學事，教訓有方，諸士樂之。至山水登臨，善於吟咏，有《搗蕨歌》傳於世。

張永隆 字世昌。舉進士，任魯府紀善。楊文貞公嘗稱其寅畏小心，輔導以正。正統末，沙寇掠邑，永隆匿南極山，爲賊所獲，脇之不屈，且諭以禍福，戒其妄殺燒掠，賊加敬禮，遣肩輿載之歸。

賴添貴 字景望。教諭仁和，有生員通官租，及守糧者不能償，欲自縊，添貴出俸餘代之。尋陞鄭府長史。穴上得金，言於官，無取焉。子從善。

從善 字益謙。任山陰教諭，沉潛篤實，博記貫通。

世隆 字德受。舉進士，授翰林院編修，有才略。鄧茂七作亂，疏請擇智勇大臣征討，郎陳山川險易、進兵方略。朝命寧陽侯懋統師征之，因命世隆爲導引官，同軍招撫延、建。世隆請先領兵千人回汀招集，遂擒賊首陳美九、蔡田等，解赴軍門，招集延、汀散亡十萬餘人。後以事忤權家，前功竟掩，時人惜之。弟世傳。

世傳 字以仁。舉進士，任行人。八歲失怙，事母至孝。英敏有文，惜其天卒。

祐 字公弼。才敏博學，治《書經》，旁通《春秋》。以監生任臨桂教授，一時科甲，多出其門。

余瑤 永樂間任青田知縣十有五年，清慎廉能，興庠序，重農桑，設桔槔以救荒旱，罷場坑以甦民困。卒官，民祠祀之。

巫章瑤 永樂間以舉人補國子生，知建昌縣，嚴明廉介。卒於官。建昌人以爲前後邑令莫章瑤比也。

張榮 永樂以監生任衛輝通判，廉能考最。張秋河決，承檄恭事，竟賴成功。擢工部郎中，多有建明。于肅愍公稱其果愍之能，足當方面。

黃源 任汝寧教授，能文善書。年九十，卒。

劉宗 字惟元。任天台教諭，博學善教。擢湖州教授，天台士人數百從遠道間居起。

鄒以倫 字秉彝。成化間任分水知縣，勤慎清白。自陳致仕，民爲立碑。

雷宙寬 字德宏。成化間知樂清縣，寬平慈惠。自陳致仕，樂清人時來居起。年八十，終。

葉元玉 字廷璽。善詩，爲戶部郎，與李夢陽同舍，相唱和甚懽。其詩峭勁與夢陽同一格律。於役邊關，慨然有懷古固疆之志。出守潮州，以道義示潮士。潮有吳少卿者，玉同年也，向元玉求澳田。澳田者，番倭賊船依棲之穴，一番開耕，則有一番劫殺，爲潮害已久。元玉貽少卿書：「澳田關係地方甚重，智者不屑爲，仁者不忍爲。不屑爲者，以求利未得，而害已隨之。不忍爲者，以利於己，害於衆人。公今一子，年尚幼穉，何必以百年之人爲千年之計。又宅中僮僕數人，僕察其舉動，未見安靜。公方當路於朝，當思何以報君，何以補袞，何以功施社稷，澤被蒼生，以不負吾榜中得人之盛。蠅頭微利，何足動心哉？」少卿得書大怒，而元玉坐此罷官。元玉家居，有詩云：「山林乖僻性，自與世相違。人既以爲是，我獨辨



其非。假欲逐波流，未免濕我衣。自知不可容，抽身尋釣磯。」其錚錚自信可見也。按吳少卿者，吳一貫。一貫，以御史按閩，蔡文莊作《利民記》，已入文獻志。而居鄉如此，仕路、家食判爲兩節，人人然矣。

伍祐 字天錫。敦行孝義，言動法古。弘治中，以監生授安定知縣，廉介剛果，懲惡勸善。邑豪軍李剛久爲民害，莫敢誰何，祐曰：「吾知去莠榮苗耳。」白部使捕治之，置之法。未期，乞歸養，號八休翁。年七十餘，終。

雷慶 字積之。弘治間以監生任新會丞，政本於寬。去官，士夫賦詩，白沙陳先生書贈卷曰「遺愛」以美之。

丘武 繇監生任嵯縣訓導。涉獵史傳，耽詩至老，以壽終。

馬善 字循理。以監生任臨清訓導，辭官歸養。

裴應章 字元閻。自行人給事太僕、太常開府，佐大農，佐銓，累至南大司空。再起南太宰，不赴，終於家。其爲行人，嘗兩奉使，當陛見奏對，進止雍容有度，神宗目屬焉。當使遼，目擊遼左情形，有概於中，迨給事史科、畫善後六事條上之，悉見嘉納。三遷長兵垣，值虜勢方張，長昂諸酋數人犯，應章所奏制馭，悉中機宜。念邊將玩愒，大吏相與爲欺蔽，遂劾罷撫臣之棄師者、憲臣之昏庸與勳臣之不法、將臣之縱賊唆卒者。風采肅然，中外一新。江陵相國嘗建議三歲一遣大臣行邊，應章言糜費當罷。大璫保欲取罔寺馬三千匹，應章執勿予。中貴人訐大帥，執政方擬行，應章沮之，皆與江陵左。然江陵心折應章，不爲忤也。貳太僕，所上給關防、嚴舉劾、戒侵剋、覈寄養諸事，皆得旨著爲令。力請歸省，抵舍旬餘，而母氏病終。太常職祀事。高皇帝嘗定壽春諸王及妃與功臣胡大海等俱侑享四祖帝后廟，後四祖祧而侑享

如故。肅皇帝定六陵諸妃原窆金山者罷勿祭，而祔享各陵殿。其後，肅皇帝崩，諸妃祔享，莫爲請者。裴章言：「侑享非是，且功臣不宜與母后同堂，宜移之兩廡。諸妃祔享永陵，宜如制。」下禮官議，皆報可。鄭卒辱撫臣，將爲亂，廷議非應章莫能定，被命馳往。未至先檄，諭以禍福，語甚切至，亂卒計窮，自縛至數百里外迎應章。應章集衆斬其魁，餘無所問，圍境晏如。自鄭人爲少司農，復請歸養，久之而父沒。士大夫守官得視父母含斂，無憾於心，未有如應章者也。神宗卽家起應章爲少宰，而心有憾於銓臣，令應章甄別以聞。應章僅擬兩人，請上悉黜之。偽書獄興，言者阿旨，欲株及哲臣，上震怒，莫敢聲言。應章昌言：「以誹語中人，非盛世事。」攝銓，人不得私干，所推轂皆海內賢者。已，請歸襄葬事，遂得疾。力辭南司空命，屢疏不允，乃強赴。立法疏錢幣，諫採鷹架木，糾中貴人濫索，省水衡錢甚多。尋乞歸，未幾，南銓命復下，虛席者三年，應章竟卒。

伍可受 初知容縣，擢南禮科給事中，彈劾輔臣許國，降萬載丞。起開封府推官，歷山東參議，卒。可受生平剛直，清流人推爲正品。

# 連城縣（一四）

## 宋科第

嘉定十三年庚辰特奏名 丘鱗

寶慶二年丙戌特奏名 丘方鱗

有傳

丘鱗侄方。

丘鱗 字起潛。尉贛縣，有廉聲。歸，值紹定寇發，郡檄兼攝連城，令畫計禦寇。招撫使陳韓奏其功，辟知邵武軍建寧縣，終承直郎。侄方。

方 字正叔。耿介，優文學。任寧都丞，興學好士，政教著聲。

### 皇朝科第

舉人 進七子、午、卯、酉屬舉人，辰、戌、丑、未屬進士。

洪武□□年辛卯（二五） 鄧恭

六年癸丑 陳玉卿

十七年甲子 李子清 沈仲繼

十八年乙丑 李子清

二十年丁卯 黃宗岱

二十三年庚午 吳禧

二十六年癸酉 羅永良

二十九年丙子 伍明 李和了清弟。

永樂六年戊子 葉幹 江濬

九年辛卯 羅矩永良弟。 余遜 徐行

十五年丁酉 吳猷

宣德七年壬子 陳翊

正統三年戊午 魏得福

六年辛酉 許浩志 江朝宗

九年甲子 李慶

景泰元年庚午 蔣永洪 謝文寶 江譽

成化十六年庚子 童璽

二十二年丙午 林華

弘治八年乙卯 謝讓文寶子。

薦辟、貢、監賢者雜見列傳中。

有傳

沈得衛 伍清源 黃萬里 李子清 沈仲繼 吳禧 魏得福 許浩志 李慶孫元泰。 蔣永洪

謝文寶 沈紹祖 陳璉 吳文旭 黃斌 賴慶 李元祥 童璽 林華 李元瑄 李華 童體元 謝

魁 謝廷翰 羅九經第九功合傳。 李早 林彬 黃玕 謝必恭

沈得衛 字輔之。讀書善詩，陳有定重其材，置之賓幕，欲官之，以先隴未葺爲辭，自是隱居蓮峰山不出。山中有泉石梧竹之勝，日與朋舊登臨嘯咏而已。洪武初，郡邑辟爲本學訓導，講教有方，一時義重。所著有《東崖樵唱集》。

伍清源 字石泉。好讀書，善詩文。洪武初，郡辟爲儒學訓導，與諸生講解，昕夕不懈。十三年，郡

守楊大德以應明經舉，授寶鈔提舉司副使。以疾告歸，自號秋圃，構軒後山之陽，聚花木竹石其中，獨咏適趣。年八十九，卒。

黃萬里 字希鵬。以國子生除授監察御史，因巡馬有異政，太祖褒嘉之。巡按荆襄，貞度肅僚，奸權斂跡。卒於官。

李子清 仕至山東按察使，所至有聲。因忤權貴被謫，士論惜之。

沈仲繼 授會同教諭。以祭酒張顯宗薦舉，陞應州知州，弭盜安民，地方寧謐。永樂元年，陞吉安知府，改廣南府。卒於官。

吳禧 字君受。儀表魁梧。授戶部主事，奉勅督課，蠲租拯災，民賴以濟。擢禮部儀制郎，多所建白。詔舉皇太孫六禮，禮成，欽賜紅錦。值內艱，歸，至中途疾訃。清標卓行，連人仰之。

魏得福 授邵陽縣訓導，歷官教諭、教授，仕逾三十年，所至化導諸生，多致通顯，一時稱爲宿儒。

許浩志 正統中乙榜，以親老就養，授同安教諭。將奉親之任，抵家遇寇發，率鄉人登冠豸寨，協力保障，邑賴生全。

李慶 字善徵。受業於許浩志，素富文學，尤長詩賦。任封川學諭，多所造就。遷撫州學教授，便道抵家，值沙寇攻縣，與浩志籌力方略備禦之。寇平，偕其徒童昱倡道開講，後改任溫州，卒於官。孫元泰。

元泰 字汝嚴。講學遵禮，胸中具韜略。以歲貢授太平訓導，值倭亂，當道延之參謀，遂致克捷。忽聞弟訃，慮母慟弟，遂棄官歸養。嘉靖辛酉歲，饒賊逼城，元泰請推官劉宗彝署縣，偕友謝魁竭力贊畫，捐

財助餉。土寇羅三妹等與賊內通，設計擒之，用火攻平賊。次年，流賊羅袍擁衆萬餘，離城二十里而營，當道請元泰督勦，晝夜登陴，以勞致疾，卒。

蔣永洪 授訓導，蒞教三年，引疾歸。晚彌好學，鄉弟子從受業者口衆，守道安貧，恬如也。

謝文寶 潛心經學，操筆成文。授於潛訓導，造就有成，遷玉山教諭，以疾辭。

沈紹祖 貢士，授定陶知縣，爲政廉勤，民多懷德。去之日，遮留擁道。

陳璉 字廷器。貢士，知湖口縣，築城建學，救災禦寇，中賊矢，卒。縣人祀之名宦。

吳文旭 字景陽。少篤學，不溺時好。聞吳聘君倡道，遂受業其門。應貢授安遠訓導，啓迪生徒，規教丕振。會寇作，當道委其勦捕，直抵賊巢，諭以大義，賊皆感服。當道以能聞，遷銅鼓衛學教授。丁內艱，歸，以不得終養爲恨。隱居不出林下二十餘年，絕跡公門。其平居，敬義自持，勢利不人於心。睦族周貧，訓子孫以勤儉，或有過，引咎自責。年八十餘，卒。

黃斌 字德威。貢生，任通州衛經歷，改南京羽林衛。清慎自持，始終一致。

賴慶 字仲良。貢士。少有志操，動遵古禮。授長沙府照磨，月餘引歸。居家三十餘年，每以德義訓子孫，足跡未嘗一至公門。鄉人目爲古長者。

李元祥 少敦孝友，清苦自勵，賙貧睦族，楷模鄉邦。時掛坑障賊猖獗犯境，首倡捍禦，民賴以全。後任瑞州府經歷，平華林寇，厥功居多。棄官歸養，瑞人思之，從祠宋文山名宦祠。

童璽 字信之。授全州同知，累遷高州府同知。丁外艱，改廣州，力罷佛山鐵課，計靖增城獷寇，遷刑部員外郎，郎中。兩疏請築連城保障，未報，以公事乘便歸省，捐貲先築爲倡。尋遷徽州府，建城築堤，

遷學政府，平徭站以蘇民，畫奇策以弭寇。激人德之，爲立生祠，題碑曰墮淚。家居，年七十餘，尚有九十老母，朝夕躬養。母沒，持喪哀毀，邑人稱孝。

林華 字廷輝。任臨海教諭、都察院、大理寺二司務。忤劉瑾，降蕪湖教諭，科道交薦其節。瑾誅，除宿松知縣。在官廉惠有聲。尋陞刑部員外郎，終襄府長史。

李元瑄 字世玉。少年時，父患癰，躬爲吮舐。正德八年貢，授袁州訓導。知府徐璉檄往寧庶人府賀壽，還舟將行，而庶人反，脅諸校官爲之傳檄。瑄投裂冠袍，躍入水中，幸而救免。歸白知府，備兵應王公文成討賊之舉，人推忠孝焉。

李華 字景實。貢士，授東阿丞，持身敬慎，政績有聲。值詔求大木，秋毫弗利。遷保定知縣。清操愈勵。卒於官，民思之。

童體元 以貢士任宜春訓導，陞望江教諭、徽州府教授，致仕。博學孝友。居喪蔬食，不入閨房。久致疾憊，或止之，謝曰：「心有哀樂，貌斯應之。疾，人所時有也，豈以蔬水致憊耶。」待寡嫂，沈聲款必謹。當貢，以讓友人，人稱厚德焉。

謝魁 字公選。早失怙，事母至孝。娶於江，有廢疾，迎歸與篤好也。初訓高淳，蜚聲文學。繼諭惠來，振略禦倭。當道聘參戎畫，忽聞母病，棄歸，時爲嘉靖辛酉歲。流賊攻邑急，魁偕李元泰請劉推官借筋運籌，設糴賑饑，計擒土寇羅三妹之內叛者。招朗村士兵，計火攻，批搗之，賊遂逃遁。已，嶺後復亂，當道造廬問策，魁復爲計，而嶺後遂平。

謝廷翰 字德欽。貢士，授南雄訓導，陞安福教諭、施州衛教授。惓惓寡慾。生徒受業其門者，多所

進益。歷仕三庠，造士有聲。

羅九經 字一成。弟九功，字文輔。孟仲少警敏，淹貫。經史，善詩賦，有所扣問，輒記憶不遺。俱以明經應貢，振藻宦途。居家恂恂簡嘿，褒然鄉表。

李早 字永譽。博學嫻文。善事繼母，俸餘均分諸弟。振鐸蕭山，蕭山重之。有《自觀錄》。

林彬 字惟中。貢士。少穎悟，一覽成誦。家貧，兄森力耕助之，遂得專志苦學，經史百家，靡不洞徹。其事父母以孝聞，仕終澄海簿。

黃珩 貢士，授福州訓導，陞大田教諭，延平教授。以師道自持，士有貧者，捐貲助之。

謝必恭 字學安。八歲失母，哀慕不已。泊事異母，撫幼弟，宗族稱其孝友。父喪，蔬食廬居，葬祭行古禮。以貢授連山訓導，誠心教士，卽蠻峒之民，亦感化向學。連人祠祀之。尋遷平樂教授，卒官。

歸化縣〔二六〕

皇朝科第

嘉靖二十八年己酉 揭鴻澤州府通判。

永定縣〔二七〕

皇朝科第

舉人 進士子、午、卯、酉屬舉人，辰、戌、丑、未屬進士。



永樂二十一年癸卯 闕和上杭學。

正統六年辛酉 丘巖上杭學。

景泰元年庚午 張弘府學。

弘治二年己酉 賴先

三年庚戌 賴先

十一年戊午 賴守直先子。 李益

十四年辛酉 孔庭訓

十七年甲子 梁仁

正德八年癸酉 賴守方先子。

嘉靖□□年□□(二八) 張禧

十七年戊戌 張禧

四十年辛酉 沈孟化

萬曆二年甲戌 沈孟化

薦辟、貢、監賢者雜見列傳中。

有傳

丘德馨 胡子俊 賴先 孔庭訓 賴玉子希昌。 賴錦 鄭道 孔庭詔 賴洽 沈玉璋

丘德馨 字子瞻。元末，隱居教授，年五十餘。洪武中，知縣劉亨薦授武平訓導。晚歸，觴咏自娛。

胡子俊 名時，以字行。同子瞻以學行都，授於鄉，善詩工書。薦授上杭訓導，因材造就。卒於官。  
賴先 字伯啓。舉進士，念親老乞歸養。久之，始爲戶部主事，署郎事。齋邊餉，督鈔關，收京倉糧，清西蜀屯田，悉著賢聲。遷員外郎，引疾歸。正德初，逆瑾用事，例：京官養病者致仕。逆瑾誅，銓部屢檄不起。八年，擢常德知府，郡小民疲，方又修建榮府，中官誅求甚峻，痛加裁抑，民有利病，則力爲之。耻爲諛說，多忤當道，勇退而歸。先師事羅一峰，而與李空同相善，教鄉處家，後進推仰。

孔庭訓 起家杭州府通判，官至刑部員外郎。慈祥溫醇，決斷辨理，以清介著聞。

賴玉 字子成。正德間貢入太學。會小靖盜起，流劫鄉都，聞父伯瑛被害，卽繇南監奔京師奏勦。

嘉靖初，授臨高丞，視篆經載，吏畏民綏，黎蠻向化，臨人祠焉。長子希孔，見韋布。仲子希昌。

希昌 字純夫。嘉靖間以貢授建德簿，清勤出衆，慈厚得民。卒於官，民哀之。

賴錦 字子美。嘉靖間以貢領萬州牧，教養並行，黎蠻馴服，以終養歸。

鄭道 字弘夫。嘉靖間以貢授武義訓導，後陞潯州教授，凡三任司教，力行古道。三庠士子，慶得師焉。

孔庭詔 嘉靖間貢，授平陽判。奉檄督修大同等關邊牆，以捍寇虜，建營田五議，以裕軍需。有帑金之賜。陞賓州知州，申改歲運大軍倉米三千石爲折色，罷不急之徵，省里甲之費，民愛戴之。

賴洽 嘉靖間貢，判池州，終鄭州知州，卒於官。以清白聞。

沈玉璋 嘉靖間貢，授海寧簿。寧無城郭，人鮮知兵，玉璋至，以職司邏捕，勤於訓練。後值海寇掠境，躬率東倉兵禦之，邑賴以全。致政歸，愛弟玉振，弗忍分異，邑人稱友。

〔校記〕

〔一〕「寧化縣」上杭縣 武平縣 清流縣 連城縣 歸化縣 永定縣「二十一字，各本原脫，據本書體例補。

〔二〕「長汀縣」三字，各本原脫，據本書體例補。

〔三〕〔四〕「年」上、下，各本原闕三字、二字。

〔五〕「尚賓」，各本原作「高賓」，據文義改。

〔六〕「寧化縣」上，各本原衍「汀州府」三字，據本書體例刪。

〔七〕「曾子宣」，各本原作「曾子布」，據文義及《宋史·曾布傳》、《宋史·曾鞏傳》改。

〔八〕「上杭縣」上，各本原衍「汀州府」三字，據本書體例刪。

〔九〕「武平縣」上，各本原衍「汀州府」三字，據本書體例刪。

〔一〇〕「雜見」二字，各本原脫，據文義及本書體例補。

〔一一〕「以貢」上，各本原衍「以」字，據文義刪。

〔一二〕「清流縣」上，各本原衍「汀州府」三字，據本書體例刪。

〔一三〕「賴紱」，各本原作「賴緩」，據弘治《八閩通志》卷六十九《人物》、嘉靖《清流縣志》卷四《科貢》及本卷傳記目錄改。

〔一四〕「連城縣」上，各本原衍「汀州府」三字，據本書體例刪。

〔一五〕「洪武」下，各本原闕二字。「辛卯」，據《明史·選舉志二》、《明清進士題名碑錄索引》、方詩銘《中國歷史紀年表》及上下

文，當誤。

〔二六〕「歸化縣」上，各本原衍「汀州府」三字，據本書體例刪。

〔二七〕「永定縣」上，各本原衍「汀州府」三字，據本書體例刪。

〔二八〕「年」上、下，各本原闕二字。

# 閩書卷之一百五

英舊志 縉紳

興化府 莆田縣一

梁陳

有傳

鄭露

鄭露 字恩叟。其先出滎陽，過江入閩，居於永泰。遠祖昭，過莆口，愛其風土，因遷葬其祖於莆口南山。莆至陳時，猶未爲縣，人未知學，露與其弟莊、淑來廬墳側，據南山之勝，構書堂湖上，勤修儒業，莆人化之。皇朝吳四輔源謂：露豪傑士也，業儒於比屋未爲儒之時，事詩書於舉國不事詩書之日，而後之「十室九書堂，龍門半天下」，皆以湖山之絕響振之。露，大府卿，莊，中郎將，淑，常州別駕，後人稱南湖三先生。

唐進士

貞元七年辛未 林藻

光啓四年戊申 陳嶠

乾寧元年甲寅 徐寅

二年乙卯 黃滔

天祐四年丁卯 陳淑嶠從子。

薦辟賢者雜見列傳中。

有傳

林披子藻、蘊，從孫。

陳嶠 徐寅

林披 字茂則。祖元泰，瀛州刺史。父萬寵，饒陽太守。披年十五，手抄書史約千餘卷。二十，以明經擢第，授臨汀郡曹掾。郡多山鬼淫祠，披著《無鬼論》曉民。御史樊滉奏署臨汀令，以治行遷汀州別駕、知州事。復以御史大夫李栖筠奏授檢校太子詹事，兼蘇州別駕。贈睦州刺史。子九人：葦、藻、著、薦、曄、蘊、蒙、邁、諤，官皆刺史、司馬、長史，莆人稱爲「九牧」。

藻 字緯乾。少有志尚，慨然奮勵，不以荒遐自局，與歐陽詹刻意攻文。貞元七年，省試《合浦還珠賦》，稿成，假寐，恍惚見人語曰：「何不叙珠去來？」寤，援筆修之曰：「珠之去也，山無色兮氛霧冥冥。海無光兮空水浩浩。珠之來也，川有媚兮祥風習習，地有潤兮生物振振。」及擢第，往謝主司，杜黃裳曰：「叙珠去來，有神助耶？」莆人擢第自藻始，官至殿中御史。

蘊 字夢復。亦嘗應賢良方正科，其對策之詞曰：「臣遠祖比干因諫而死，天不厭直，更生微臣也。」語大而肆，坐不見收。貞元四年，乃以明經及第。西川節度使韋皋辟爲推官。皋卒。劉闢代之，有反謀，

蘊曉以逆順，不聽。復遣書切諫，闢怒，械蘊獄，將殺之，顧惜蘊才，陰戒刑人抽劍磨頸以脅服之。蘊叱曰：「死即死爾，我頸頑奴砥石耶？」闢亦尋來釋蘊矣。闢敗，蘊方爲唐昌尉，名重京師。李吉甫、李絳、武元衡爲相，蘊貽書與談安邊事甚悉，大意以將帥驕慢，士卒饑寒，而朝廷所用多取舊將，不知彼位已極，寧思奮効？宜得建功立事之士，特達不次，以備秦隴之虞，以除西河之患。宰相亦不能用。滄景帥程權辟掌書記。權上四州版籍請吏，而權軍畏內屬，挾權拒命，蘊陳大誼諭首將，人人釋然，於是權得去。遷禮部員外郎，刑部侍郎劉伯芻薦之於朝，出爲邵州刺史。第其人嗜酒忤物，又嘗杖殺客陶玄之，投尸江中，籍其妻爲娼，復坐贓杖流儋州，卒。

權 字會道，披從孫也。舉進士不第，從事塞垣。貞元初，爲福唐尉，聞母病，棄官還。母卒，哭泣盡哀，負土作塚，白鳥來，甘露降。事聞，德宗褒詔賜祿，立雙闕表之，時號闕下林家。

陳嶠 字延封。先祖邁，唐初令莆田，卒家焉。父真，南安尉。真生蘊，蘊生大理寺評事齊。忠信篤敬，不類世俗。有子九人，皆力儒學，嶠其長也。嶠弱冠能文，與許龜圖、黃彥修居莆北巖精舍五年，復居北平山讀書。光啓三年，登禮部上第。莆自貞元中林藻冠東南科第，十年而許員外稷繼翔，其後，詞人疊疊，若陳厚慶、陳泛、陳黯、林顥、許溫、林速、許龜圖、黃彥修、許超、林部，俱以夢筆之詞，蠶金之學，半生隨計，沒齒啣冤，曠乎百年。至嶠，始追林、許之後，自是徐寅、黃滔相繼而起矣。嶠爲人謹信，居家純孝，事繼親彌善，廬先人墓，泣血有聞。其所爲文，扣孟軻、揚雄戶牖，凡三百篇。表記、奏牘，爲先輩推工。初攝京兆府參軍，司空王審知帥閩，辟爲大從事，受大理評事，兼監察御史，奏大理司直兼殿中。年七十餘。

徐寅 字夢昭。博學經史，尤長於賦。乾寧初，舉進士，試《止戈爲武賦》，有「破山加點，擬戍無人」之句，侍郎李憐奇之。擢秘書省正字。寅嘗作《人生幾何賦》，四方傳寫，長安紙價爲高者三日。又有《斬蛇賦》，傳播外國，外國人悉以金書帖幛。時朱全忠以梁國兼制四鎮，寅投所業，引見閭，無雲而雨，全忠索詩，寅立成一絕，全忠大喜。一日，謁全忠，醉誤觸諱，全忠色變，殺其主客，寅大懼。時全忠竊窺唐祚，屢與李克用相攻，時時夢淮陰侯授以兵法，寅遂作《游大梁賦》以獻，有「千年漢將，感精魄以神交；一眼胡奴，望英風而膽落」之語。漢將指韓淮陰，一眼胡奴指克用也。全忠讀之大喜，令軍士誦之，手酬一緡，不責前慢。及梁太祖受禪，再試，進士第一。梁祖曰：「是賦『人生幾何』者耶？」三皇五帝，不死何歸，此語盍改之？」寅曰：「臣寧可無官，不可改賦。」遂拂衣歸。梁祖怒，削其名。歸則卜居延壽溪上，泉州刺史王延彬招致之，<sup>(一)</sup>如布衣交。有詩賦及《探龍》等集行於世。

### 五代梁

開平二年戊辰 陳沆

有傳

潘承祐 陳致雍

潘承祐 字乾休。初仕吳爲光州司法參軍，因爭郡大獄不得，棄官歸閩，遂歸建州。及王氏據閩，仕爲大理少卿，屬王延政領鎮武節，辟承祐判官。閩主曦與延政治兵相攻，互有勝負，承祐屢請息兵修好，不從。閩主使者至，延政大閱以誇示之，辭氣甚悻悻。承祐長跪強諫，其言益切。延政怒，顧左右曰：「判官之內可食乎？」承祐曰：「與不義而存，孰若抱義而亡？事勢如此，蚤死爲幸。」久之，乃解。及僭



號，以承祐爲吏部尚書，而用其佞臣楊思恭爲兵部尚書，並同平章事。承祐上書陳十事，大指言：兄弟相攻，逆傷天理，一也。賦斂繁重，力役無節，二也。發民爲兵，羈旅愁怨，三也。楊思恭奪人衣食，使怨歸於上，四也。疆土狹隘，多置州郡，增吏困民，五也。除道裹糧，將攻臨汀，曾不憂金陵、錢塘乘虛相襲，六也。括高貲戶，財多者補官，逋負者多被刑，七也。延平諸津，征果菜魚米，獲利至微，斂怨甚大，八也。與南唐、吳越爲鄰，卽位以來，未嘗通使，九也。宮室臺榭，崇飾無度，十也。延政怒，削其官，勒歸私第。及查文徽下建州，以禮致之。人南唐，爲衛尉少卿，改鴻臚卿，委以南方之事。升降人物，制置州縣，多用其言。唐主以其弟景達爲元帥，將兵拒周。遣承祐詣泉、建，召募驍勇。承祐薦許文稹、陳德誠、鄭彥華、林仁肇可用，唐主乃以文稹等隸景達爲諸將，皆著奇効。俄遷禮部侍郎。就除尚書。致仕，隱於豫章之西山，卒，子孫遂爲西山人。子慎修，見宋縉紳。

陳致雍 仕僞閩爲太常卿。人南唐，以通禮及第。憲章典故，多所精練。後歸宋。開寶中，除秘書監，致仕。既還，陳洪進辟掌書記。撰《海物異名記》及《閩王列傳》、《五禮儀鑑》。

### 宋科第

太平興國八年癸未 李欣

咸平二年己亥 陳絳 嶠曾孫。

三年庚子 方儀 方慎言儀侄。

陳甲 沆曾孫。秘書監請子。

五年壬寅 劉若虛

景德二年乙巳 方慎從慎言弟。

大中祥符元年戊申 李昂欣子。

四年辛亥 陳正辭

五年壬子 陳端沆孫 李冕昂弟。

八年乙卯 林徽藻族孫。 陳深嶠孫。 黃肇

天聖二年甲子 鄭充 翁損 林瑀藻裔孫。

五年丁卯 宋堂 劉師古 陳用之 王獻可 林偉

八年庚午 陳說之絳子。 陳動之說之兄。 陳溥 方峻 林襲明 林茂先 游振

景祐元年甲戌 鄭隣 鄭伯玉 陳可 翁操損弟。 翁鑑承贊孫。 蔡昌齡 徐冶 李昭物 陳良

王洞 方倪任從弟。 方嶠峻弟。 陳利和 方龜年儀從孫。

諸科 黃價滔曾孫。 徐交 方正中儀子。

寶元元年戊寅 陳安國嶠孫。 林讓 丁彥先 吳世延 李昭用 黃琦 楊伯華 翁彥升

慶曆二年壬午 鄭伯英充從子。 宋渝堂從子。 鄭之尤充從子。

諸科 鄭蒨充從侄。 陳衍 陳鑑臣 林策

六年丙戌 林英 丘舜元 陳照 洪牧 林諮 林汝平 劉孝基 陳藻 方士寧峻子。 鄭伯喈

伯玉從弟。 陳琪 黃從正 方藁慎言侄。

皇祐元年己丑 杜諮 黃長裕 林俛 黃允滔從孫。 李昭文 方簡宸峻從侄。 歐陽愿 徐諤

方遵度 王公輔 陳啓期沆孫。 林卞

五年癸巳 方子容峻子。鄭季膺濟從弟。鄭叔明伯玉子。吳評 黃論肇之從子。方齊卿儀從曾孫。

方孝錫 鄭希韓備從弟。陳奎淑侄孫。鄭介卿希韓從子。

諸科 游慥 方慎交慎言從弟。蔡禹謨

嘉祐二年丁酉 林輔德 陳若賓 林伸偉弟。顧宗 陳侗勳之子。林冕 林子春

諸科 宋并堂族孫。俞則之 黃維翰潛玄孫。王世卿

六年辛丑 陳陸勳之子。徐向 方場 吳志寧評族孫。

八年癸卯 黃祖陶 陳彼望淑曾孫。鄭令卿介卿弟。李昭遠 陳核 王祺

諸科 劉景陽 李昭逢

治平二年乙巳 周譚 柯濟 方希皋養子。

四年丁未 黃降一名隱。林端 黃理降從叔。方孝述孝錫兄。陳儒 鄭剛 方仲宇嶠子。黃君

俞

熙寧三年庚戌 陳邇 林辟非 陳之邵

諸科 方演慎言從子。鄭挺希韓從侄。徐布 林伯材

六年癸丑 劉覺師占孫。方价舊名綠。慎從孫。方輔宋一名甫。嶠子。陳孝純端孫。鄭毅希韓從侄。

方毅齊卿子。黃憲章 鄭仔 林嗣先 鄭盤 方通慎言孫。陳中復端孫。王劭 陳瑛

諸科 歐陽伸詹後。翁抃損弟。林嗣宗嗣先兄。劉希文 陳礪 吳世南 徐清臣 周長卿 林

說 李昭素 方潛演弟。

九年丙辰 徐鐸狀元。寅孫。方會簡宸佐。徐銳鐸兄。林植茂先子。葉胄 林回甫一名深之。卓

厚 陳志 陳瑗

諸科 陳箴 宋琮堂從子。方湊演弟。蔡士衡 林識 黃周輔維翰弟。鄭伯奇伯玉從弟。王繹

元豐二年己未 宋觀堂孫。黃中 鄭至道叔明子。方師顏倪子。劉秘 謝斯立 陳嘉劭淑孫。

莊柔正 李敦錫

諸科 徐楷 方伯通孝錫從子。郭甫 劉景山 林楷 方濬濬弟。洪倣 林矩藻族孫。方延年龜

年從弟。張國

五年壬戌 徐確 吳公輔評子。吳公懋評子。林萱嗣先子。林貺 林定英子。鄭濟 王焯 方

伯鎮孝錫從子。黃恭一作泰。鄭僉

特奏名 翁景文損子。鄭若谷 宋號堂從子。郭宋

八年乙丑 方希樸泰從子。楊英 鄭叔僑叔明弟。黃叔延 方琰

特奏名 鄭伯輿伯玉從弟。顧孚 王觀 宋理堂侄。徐膺確從弟。陳南 黃恕滔六世孫。

元祐三年戊辰 陳彥恭同子。許國 丁景常彥先侄。

特奏名 蔡元龜 方櫓慎言從子。方參 陳君弼 鄭子卿介卿弟。蔡叔庠

六年辛未 方臨櫓從弟。宋珍堂從子。鄭亨道至道弟。余萬 鄭事道伯玉孫。吳卞 翁景述損

子。

特奏名 方師旦 方頤正中子。劉晞 陳因 林峻 方元察士寧弟。

紹聖元年甲戌 方佩慎從侄孫。 鄭元與濟從弟。 王壽 陳惟中甲孫。 阮駿 陳彥和勳之孫。

特奏名 吳詔評從弟。 鄭貽慶

四年丁丑 方天若正中子。 方監龜年從孫。 陳國瑞 鄭嚴 王楫 陳道本 林積仁 陳難 陳與

京國瑞父。 黃玖 方旬

特奏名 翁希愈承贊孫。 方伯宗 陳觀 歐陽翼

元符三年庚辰 葉居中胄子。 宋執中堂從孫。 陳彥直勳之孫。 蘇燁 陳武佑 方縉慎從侄。 黃

國鎮 鄭升之 蘇械煒弟。 顧天均一名端禮。 余祖禹一名祖夷。 萬從弟。 方禧慎從曾孫。 姚安仁 黃琮

允玄孫。 鄭敏之升之弟。 方振龜年曾孫。 王諮 林宋翰 林冲之 陳彥方彥和兄。 宋邦光堂從孫。

特奏名 李國良 方伯達孝錫從子。 林載華 方适慎言從孫。 宋瑒理弟。

崇寧二年癸未 林震冲之從子 林扑 阮天輔 林思明定子。 陳筑 方叡 顧天倪天均兄。

特奏名 林安義 翁師回朴子。 阮輅

四年乙酉賜進士出身 方昭會子。 陳彥文睦子。

五年丙戌 林之平 林伯顯 方里慎言從子。 陳孝寬 王適壽弟。 李德昭 朱明叔 林孝淵仲從

子。 方略子容孫。 林儔藻族。 劉烜 姚合

特奏名 林辰 黃陳降弟。 林尚友 方惟深龜年子。

大觀二年戊子特賜五經及第 黃泳卷子。

三年己丑 徐師仁確子。 郭彥成 林宗孟 黃詹 宋旅邦光弟。 方敦夫會從弟。 方邵天若子。

陳隆奎從子。李敦廉昭遠子。吳公誠公輔弟。陳武平

特奏名 林權 徐昭 詹道中 柯新之 陳處約 王震 方希呂希朴兄。王劭 陳明術

四年庚寅上舍釋褐 陳伯貺彼望子。郭千之 林正漢十一世孫。(二)

政和二年壬辰 李宗師 陳範 歐陽盼仲子。阮校 方天任天若弟。黃宣 黃靜潛七世孫。陳

繹之 方侯慎從孫。

特奏名 阮晞 阮中 阮時發 方慎進 卓立 吳京 陳希孟 方維 林軒 方師常

四年甲午按樂補官 洪子陽

五年乙未 吳贊 吳庭書公輔子。陳顯 翁子禮承贊族。陳喘 李特正宗師從子。陳則 王誥

蔡元璋士衡從子。詹汝升 林君卿 李和衷 宋棐堂曾孫。陳膏淑曾孫。陳夢符 林霆冲之從子。戴

緯 李宗雍宗師弟。黃仲南 方廷實監子。林伯興伯顯弟。

特奏名 吳綰 王可 宋執古 蔡覺 陳覺 陳安中 陳南卿 陳本 翁寮師回子。

重和元年戊戌 吳燦 林亨時 方漸伯通從子。陳南仲 方時希呂子。郭景純 李德輝德昭弟。

游輔 李邦傑 林天禧 顧汝美 方楫士寧孫。陳武任武佑弟。

特奏名 鄭浚 林環 陳子翼 方復禮漸弟。鄭文 方柄葉孫。黃天顯

宣和三年辛丑 蘇良 林郁冲之子。方鞬 阮符 李汝舟 郭之純 方敦允監弟。丁廣景常從

弟。黃亮靜從子。黃彥輝 陳榮

特奏名 鄭測伯喈侄。龔久中 阮持駿弟。

六年甲辰 王希韓晞亮弟。 劉渙 方異 徐多遜實族孫。 方罔慎言孫。 黃亨晞弟。 楊世榮 陳

南復 林孝澤孝淵弟。 葉棠 陳鶴嘉邵子。 黃公坦 蕭掄 阮鵬

特奏名 許憚 顧時亨 陳仁遠奎子。 林正 吳巨源 方秩里從兄。

建炎二年戊申 黃埴卷子。 陳貫 劉孔修 方可適從子。 李敦正持正弟。 吳時修

特奏名 林壽千 歐陽曄 方僎慎從孫。

准赦文推恩附特奏名 歐陽方仲子。 鄭安世伯玉孫。

三年乙酉賜進士出身 許搏

紹興元年辛亥賜同進士出身 王晞亮晞韓兄。

二年壬子 方升之昭子。 陳騰 王谷 林庭信 林庭彥林一作許。 方擴慎言從子。 歐陽清卿盼

子。 劉粲恒弟。 鄭俊民

特奏名 鄒天麟景純兄。 陳振 朱正叔 李瑰 陳當 陳師文仁遠弟。 鄭擢 李發 林佺 林

孝宗伸孫。 陳中 方翊 徐石 方安正伯通子。 黃卷周輔子。

推恩 李汝礪汝舟兄。 陳橄 方敦 許持搏兄。

五年乙卯 林大鼎 黃顏榮 黃郃 宋椿葉弟。

特奏名 黃璫 歐陽亶 陳邈 王庭俊 陳武佐 游駿 黃元吉 阮詵 徐礎

八年戊午 黃公度狀元。 靜子。 陳俊卿榜眼。 黃童價玄孫。 龔茂良 林瀛矩從子。 林闡 李處宜

姚廷瑰 林鄧 方羲元家孫。 歐陽迪 謝史 顧汝義 宋藻理從曾孫。

特奏名 黃卓周輔孫。 林靖 黃宋臣長裕孫。 黃邠 李宗旦 黃敦節 洪嗣 鄭汝義 李彬

十二年壬戌 王悅 李次辰 林偉 黃端恕弟。 吳璉 陳仕宏

特奏名 鄭庭止庭芳弟。 劉貫恒弟。 方夔演從弟。 陳季仲 黃須 林國材 徐武京 徐邵 宋

範堂孫。 郭邦文 林彥常

十五年乙丑 鄭耕老元興從孫。 陳宣 方典異弟。 林懋

特奏名 林洵美 周希孟 吳大任 李文 林邦遠 方復明孝述孫。 王侗 徐捷

十六年丙寅應詔獻書補官 方于實伯通孫。

十八年戊辰 林公望國華子。 盧彥文 陳伯山 李清 李淵彬子。 龔夢良茂良從弟。 方簡興子容

孫。 顧澣天筠孫。 黃岱

特奏名 陳邦光 魏繹 陳安仁晞孟子。 李依仁持正弟。 鄭安邦禧從弟。 鄭文 方泌監從弟。

二十一年辛未 劉夙 陳居仁齊子。 林宋可偃子。 黃芻 吳頊 余鳳祖夷從弟。 林枏孝澤子。

劉洵直 盧炎 林羔 蔡驥

特奏名 陳維嘉 方號慎從曾孫。 徐多文 蘇廷彥 郭義重 郭宏 黃允升恕從孫。

二十四年甲戌 王洪焯孫。 林桴矩孫。 魏占甫 林觀嗣宗孫。 吳珪璵弟。

特奏名 林伸 方庭秀潛孫。 葉宏中 黃稟亮弟。 陳緯 林庭俊積仁從弟。 方昌朝葵孫。 劉珪

王揚庭

二十七年丁丑 彭澤宗 黃庚公度弟。 林文瑞 方台符參孫。 林穎 張羔 柯岳 王日章洪從



了。彭樂休

特奏名 方濟世顯子。 方唐卿适從曾孫。 鄭箕老耕老兄。 顧瞻 方興慎從曾孫。 徐斌 朱庭異

渭老 彭與

三十年庚辰 劉朔夙弟。 龔遂良茂良兄。 林嶽源弟。 林準徽弟。 謝瑩 阮竑駿孫。 鄭守浩

王燁 王進之 李綸 方萬慎從孫。

特奏名 方昕肅從弟。 歐陽渭卿盼侄。 劉瓊 陳夢卿 戴元喜緯侄。 方元老異從子。 王必晞亮從

弟。 顧汝隆 徐克仁師仁弟。 郭祖仲景純從子。 楊提

隆興元年癸未 林慮孝宗子。 林光朝 林窠孝澤子。 方竑濟卿孫。 劉焯秘孫。 陳雁鶴子。 謝之

任 方崧卿儀六世孫。 鄭搏傳曾孫。 戴規元喜子。 鄭揆搏兄。

特奏名 吳衡 林積蘊九世孫。 吳文瑞 黃郭 徐敦智確孫。 鄭宜民 阮處約僉子。 陳邨 李

逸持正從子。 游允之 林褒 李憫持正從子。 朱賡 柯廷賓 徐可用 鄭邈 李才美 方起莘 黃文

璨 陳士龍端子。 葉建居中子。 朱玠 朱玖

乾道二年丙戌 彭奎澤宗弟。 翁黠 范薰 盧篆彥文子。 吳源 陳煥 林叢 戴桂先緯侄。 鄭

栗濟孫。 方烈侯從子。 方未仲字孫。 郭惟仁 黃晔 方渭价孫。 陳匪白

特奏名 徐利用確孫。 方翼亮那從子。 林天復

乾道五年己丑 黃黼降曾孫。 方丞烈弟。 王由焯曾孫。 蘇卜能 方元功佩孫。

特奏名 黃濤 林允襄兄。 游伯絢兄弟。 鄭端忠耕老從弟。 鄭畋 吳端甫 歐陽寅卿

八年壬辰 黃艾文燦從子。 陳士楚 鄭東蓓曾孫。 李夏卿 張熊羔弟。

特奏名 鄭莘夫 林白孝澤從孫。 方拱辰翼亮兄。 黃鳳 黃補端子。 馬驥 黃濬靜孫。 黃價

鄭資深備孫。

淳熙二年乙未 方復禧從孫。 林井孝澤從子。 龔史良茂良從弟。 方秉文伯逢曾孫。 方士高昭孫。

特奏名 曾會 林阜 方謨 黃真 林洪 陳由仁 林渭洪兄。 林汝阜

五年戊戌 劉起晦朔子。 黃汝嘉亨孫。 陳宗士楚從子。 黃度輔從子。 王元鼎浩從子。 方晏復弟。

張品羔從子。 方同萬從子。 龔友良茂良從弟。

特奏名 陳士器士宏弟。 黃德基邵子。 楊珍

八年辛丑 劉渠洵直子。 方仲能 劉彌正夙子。 顧杞孚孫。 顧偉杞從弟。 林浩卿偉從子。 王林

晦韓子。

十一年甲辰 林庚矩孫。 鄭崑起舊孫。 方可達同弟。 黃裳 方析穀子。 徐初平師仁孫。 林立

義洪子。

特奏名 方贊演孫。 鄭農叔明曾孫。 方應庚湊孫。 徐文

十四年丁未 方芹之元京玄孫。 林旂叢從子。 方壬芹之從兄。 李志甫綸從子。 林十全伯顯從孫。

陳舜耕鐸孫。 林立節渭子。 鄭浦

特奏名 方鎬輔宋孫。 吳溶源弟。 黃彥聳陳孫。 林懋和之平子。 余嘉會 陳愈仁遠子。 李芾淵

子。 李才英

恩賜出身 李茹 陳儵

紹熙元年庚戌 阮砥鵬從子。 吳昺 方叔治祁從子。 劉棠棠弟。 李宗之德輝孫。 程汝發 黃治

汝嘉從弟。 方阜周彥寶孫。 陳卓居仁子。 吳樾孝珪從子。 葉孝錫 王龜從 余子復祖爽從孫。

特奏名 康鼎成 方士璜昕子。 唐岳 陳軫中復曾孫。 方綱 方稷系從弟。 林喬木枏從弟。 吳

璉 何湯選 徐清卿師仁從弟。 林真 龔元夢良弟。 曾敷會弟。 方將适曾孫。 阮初符子。 林孝友

阮秀朋從子。 郭鼎卿天麟子。 林士隆 方安世轉子。 鄭士表耕老侄。 葉登建子。 徐湘師仁侄。 龔驥

四年癸丑 宋鈞藻孫。 王彥廣晞亮曾孫。 康夢庚鼎成侄。 吳錫疇 林百嘉 鄭燭栗子。 方霖浚

子。 龔日嚴茂良侄。 陳庶 戴孺篋規子。 陳榮士楚侄。 張楚熊子。

特奏名 林冊 余驪祖禹侄孫。 卓先厚從弟。

慶元二年丙辰 龔日章茂章侄。 趙寵夫 黃雲翼公坦曾孫。 林光中庚侄。 黃誥文侄。 顧杙孚孫。

黃汝猷汝嘉從弟。 林誠枏從侄。 趙希灝 黃鉞童孫。 方孺良適從玄孫。 鄭達可濟曾孫。 鄭起沃伯玉孫。

劉起世朔子。 吳穎 方秉文秉成弟。

特奏名 李肅茹弟。 吳煥頊子。 徐甯 陳起莘 柯庚 林仲興孝淵子。 黃察靜曾孫。 李若茹兄

阮頌明子。 王申壽孫。

釋褐出身 王宗烈晞亮侄。

五年己未 黃景淵宋臣孫。 黃宿恕玄孫。 方灼玆從侄。 蔡關開弟。 黃伯劑誥侄。 陳道元夢符侄

孫。 李貞 方武子秉文侄孫。 龔日孜日章弟。 劉世鈞綽子。 黃翼元吉孫。 方符可從弟。 鄭渙起沃從

兄。鄭叔潛累從侄。

特奏名 宋褒邦光孫。黃字補子。方申壬弟。林壽白子。吳琳 陳閱檄子。方士价所子。李

頗茹侄。方賁演孫。葉字建子。方來未弟。周士貴 曾玲 吳箕 黃寧公度子。陳習之

嘉泰二年壬戌 林益嚴洵美從曾孫。王濯晞韓從子。方秉哲秉文弟。劉南叔架侄。丁伯桂彥先孫。

黃非熊靜玄孫。李宗邁 柯進德岳侄。黃康黼子。吳銓源子。陳宗起中復從曾孫。黃亦靜曾孫。

特奏名 陳聞詩居仁侄。戴東桂先侄。方公顯可達弟。阮端叔中曾孫。吳叔同卞元孫。李昇才美

從子。林成季光朝從子。

開禧元年乙丑 林起辰 姚直夫合從孫。方大琮萬孫。蔡衡 林起初寢族。陳誼卿 林彌大庚

弟。

特奏名 黃琮顏榮從侄。吳鏐溶子。黃渠長裕曾孫。方蔡嵩曾孫。蘇子牧子能侄。黃起白

嘉定元年戊辰 歐陽偉盼玄孫。林汝西瀛孫。王太冲晞亮曾孫。鄭冲之農子。黃榮庚孫。劉用

行

特奏名 戴員末兄。鄭牧之冲之弟。方阜鳴 黃汝震亮從孫。陳宜公 朱洸

四年辛未 張茂發平叔孫。吳彬煥子。顧孺履代侄。林益亮益嚴弟。陳思誠居仁侄。林與之觀

孫。方阜高阜鳴弟。劉希仁起世子。顧孺俊孺履兄。張林秀羔子。林子貴 林壽公游一龍 吳震

龍昂子。黃君亮

特奏名 林子華舉從弟。方雍烈從侄。陳中居仁侄。陳東榮弟。鄭可學濟從孫。陳準居仁侄。

陳伯受

七年甲戌 吳志立鐔子。 鄭直公 林益之積仁侄孫。 李籌宗師曾孫。 鄭涇甫伯玉六世孫。 趙時帥

特奏名 陳必先 劉察洵直子。 方汲渭從弟。 黃由道庚子。 方其義漸孫。 李顏頤弟。 林立成渭

子。 柯夢得

十年丁丑 趙希濟師禮侄。 林龜從 阮敷駿玄孫。 余伯鯉 陳秉直僮侄。 李俊甫廉孫。 陳秉規

僮子。

特奏名 林萬石起初族孫。 鄭國 林必先誠之弟。 林琮庚弟。 朱楷紱孫。 林季學 黃由義由道

弟。 黃叔甸

十三年庚辰 顧益亮時亨曾孫。 陳煒雅孫。 林汝忠嗣宗孫。 趙時棣寵夫子。 黃俊求 趙希淑希濟

弟。 蘇應衡千能侄孫。 方正子武子弟。 林廷濟 劉希道起世子。 姚亨震合侄孫。 吳令發穎從弟。

特奏名 方萱天若孫。 戴佃桂先侄。 方節 林復亨 方林秀适曾孫。

十六年癸未 方逢吉慎從六世孫。 趙時朴寵夫子。 趙麒夫 朱檜 趙必英崇玠子。 趙時楚寵夫子。

趙崇校 趙甯夫 顧夢丙樟弟。 顧孺采孺俊弟。 黃汝宜端孫。 蔡宗 洪中立聚孫。

特奏名 阮杰天輔曾孫。 卓續冠侄孫。 陳雲從端曾孫。

推恩 鄭西畝子。 方聞一朴子。 黃景思長裕孫。 柯淵岳子。 徐叔雲師仁侄孫。 黃師文琮弟。 鄭

隆起巖起兄。

寶慶二年丙戌 鄭奇 黃績汝嘉從侄。 陳秉善僮侄。 趙必迥汝皓孫。 方洞叔昕侄。 顧孺傑 劉

成夙孫。趙汝儒。趙希龐。張麓熊子。黃煒周輔玄孫。林肯深曾孫。楊大震

特奏名 王震 張必疆平叔侄孫。王彥大彥廣弟。陳伯範

推恩 柯立義進德兄。徐千能初平弟。朱義方檣兄。余正平 方林秀符叔。

紹定二年己丑 黃愚孫復侄。茅貢 游震輔從侄。林洪庭彥孫。余薦鶚復子。

特奏名 朱雍檣從侄。劉光叔南叔弟。鄭垠栗侄。陳鳳翔 黃堯雲 謝立道 宋鑑鈞弟。戴夢

白個弟。陳夢書渙曾孫。蔡吉甫言子。石龍友 林起犀 陳恭甫卓弟。方瑩會旬孫。陳千能煒兄。

傅一枝 李箕籌弟。陳雷 陳伯免伯受兄。林百揆百嘉弟。

五年壬辰 趙時願庚夫子。卓得慶厚玄孫。黃桂 朱珪雍弟。趙必道必過。(三) 陳有功榮侄。

李叔宏貴侄。王公瑾 方之泰壬孫。楊一夔珍孫。李日新茹侄孫。余君舉薦鶚侄。趙與楔希商子。

趙時樞寵夫子。趙必仁必邁兄。陳直上有功兄。李一鳳并子。

特奏名 朱履常檣弟。陳啓惟仲孫。陳潔俊卿侄孫。方元鈞申子。葉良遇 陳夢英鶴孫。詹萬

石汝升曾孫。陳得遇匪白侄。陳介可宗起叔。鄭域 魏夢極吉甫侄。劉權叔南叔弟。蘇子嚴 陳秉愈

孫。

端平元年甲午舍選 方大鈞萬孫。

二年乙未 方大東傳鳥叔符從弟。林彬之 李丑父宗之子。方景楫卓鳴子。鄭侃叔僑玄孫。林拱

辰皆侄孫。方碩子卓鳴從子。鄭珽嵩起子。

特奏名 王聲叔壽孫。鄭南起禧玄孫。王幼曾聲叔子。方儒元士高族孫。(四)

嘉熙二年戊戌 鄭玠庭兄。 方克昌同子。 方克嗣慎從八世孫。 黃星卿治從侄。 宋之望邦光玄孫。

鄭龍甫叔僑玄孫。 方濯 鄭有得

特奏名 方元達 宋鑄邦光曾孫。 黃炳公度曾孫。 方壽甫

淳祐元年辛丑 許一鶚國孫。 趙時錡 林希孔矩玄孫。 黃辰恕五世孫。

特奏名 林汝礪矩玄孫。 方元龍

舍選 方文炳實廷五世從孫。 方藻慎言裔孫。

六年丙午特賜進士出身 劉克莊彌正子。

七年丁未 方蒙仲一名澄孫。 大東子。 方吉甫 吳起沃叔告子。 鄭珪岩起子。 鄭子廣

特奏名 彭彝甫

舍選 方虎臣丞孫。

九年己酉舍選 宋國器範玄孫。

十年庚戌 方應發其義孫。 鄭潛甫伯玉族孫。 林演起初子。 鄭天驥揆玄孫。

特奏名 鄭鎔巖起孫。 方大鈞萬孫。

寶祐元年癸丑 丁南一伯桂侄。 林丑父徽孫。

四年丙辰 李會龍揆曾孫。 鄭與言伯玉玄孫。 黃中鉞孫。 方義夫琥曾孫。 林夢協彬之從子。 余士

明謙一弟。 趙若珩 趙與認 方霖孫大琮從子。 林季昌廷信曾孫。 王一奇希亮曾孫。 趙與得 趙若珩

若珩兄。 阮次膺騰曾孫。 朱及甫 林黃 余君錫

特奏名 方高萬從子。 方德元

舍選 鄭與言伯玉世孫。 方大猷義夫兄。 方大亨慎從八世孫。 黃大林資孫。 方時戊大琮從弟。

開慶元年己未 方辰孫霖孫。

特奏名 鄭薦玉剛子。

舍選 方仲立慎從八世孫。 方應箕慎從族孫。 方鈞之承孫。

景定二年辛酉賜進士出身 林光世霖曾孫。

三年壬戌 黃鏞隱七世孫。 李濟孫丑父了。 林寅公汝礪子。

特奏名 林德遇拱辰弟。 鄭子簡叔僑裔孫。 林有道庭信曾孫。

咸淳元年乙丑 陳文翁仲元兄。 余謙一祖爽玄孫。 鄭希點東孫。 吳鳳舉

舍選 林鑄

四年戊辰 方公權澄孫了。 徐玉嘉 蕭桂發掄侄孫。 方巖得元宗七世孫。

特奏名 徐端衡寅十一世孫。 陳薦魚作父了。

七年辛未 鄭用吉濟甫子。 林汝大積仁族孫。 黃仲元續侄。 林棟汝太子。

十年甲戌 林桂芳琮曾侄孫。 郭廷煒義重玄孫。

特奏名 鄭鉞一名少偉。 鄭時中事道玄孫。

舍選 方斗南 陳麟之文龍弟。

薦辟、人才賢者雜見列傳中。



有傳

陳靖孫惟德從孫中復。

潘慎修

李欣

鄭褒<sub>(五)</sub>

王平

陳勳之子何、睦。

侗子彥恭。

睦子彥文。

陳靖 字道卿。祖沆，梁開平進士，爲天雄節度巡官，父沒嶺表，棄官負喪。知梁必亂，人聞依王審知。審知辟以官，辭不應。父仁璧，仕陳洪進爲泉州別駕，勸洪進納土，太祖嘉之，授檢校膳部員外郎，泉州錄事參軍。靖初與黃觀請兵於漕，版授泉州德化尉，參議軍事。賊平赴闕，補陽翟簿。契丹犯邊，王師數不利，靖遣從子上書太宗，求人奏機略。詔就問，上五策，太宗異之，改將作監丞。未幾，爲御史臺推勘官，遷太常博士。太宗詔有司議均田之法，以興農事，靖請命大臣或三司使爲租庸使，或兼屯田制置，仍擇三司判官選通知民事者二人爲副，先檢籍兩京荒地及逃民之產，次募耕人，賜以室廬、牛犂，責州縣勸課，請印券，<sub>(六)</sub>分殿最，別賞罰，行之數歲，可盡罷官屯田，悉用賦民，略倣井田制，計畝量授，度地均稅，施之四方。太宗善之，召見賜食，下三司雜議。以靖爲京西勸農使，竟以副者大理寺丞皇甫選、光祿寺丞何亮有異議罷。出知婺州，再遷尚書刑部員外郎。真宗卽位，復列所論勸農事，言：「國家禦戎西北，仰食東南，東南食不足，則誤國大計，請自京東西及河北諸州大行勸農法，以殿最州縣官，歲可省江淮漕百餘萬。」復下三司議，皆不果行。歷度支判官，河南、京西、京東轉運使，知泉、蘇、越三州。累遷太常少卿，進太僕卿、集賢院學士，知建州，徙泉州，拜左諫議大夫。靖好學，通古今，多書畫，尤詳農事，嘗取淳化、咸平以來所陳三十餘道目曰《勸農奏議》。以秘書監致仕。天聖三年，進潁州郡開國伯，卒。熙寧元年，諫臣以靖《勸農奏議》進呈，神宗嘉獎，贈尚書左僕射。子六人，長甲，舉進士，累官大理丞，餘皆以父任補官。孫惟德。

惟德 字微之。以靖補太廟齋郎，爲長樂尉。鄰郡民有因鬪服毒死，尉勘視罪，與鬪者已誣伏，檄惟德覆視，惟德用銀針探屍喉，得其服毒色，復得所服餘毒於其家，遂出與鬪者罪。時年方十九，吏民皆大服。慶曆間，舉能吏治廣南，除知雷州。公田歲入數百斛，悉還官。罷州採珠戶，終任不持一珠。遷太子中舍，知長洲縣，轉國子博士、知連州，復不取公田之人。以虞部郎中致仕，卒。

中復 字從道。靖從孫也。年十八，與兄孝純同登熙寧進士，調懷安尉，監州茶務，植茶百萬本，國課立辦。歷轉任提舉京畿西路茶鹽香事。時朝廷議行茶法，當塗有欲括利源者，以中復任茶務，令悉陳利害，欲進用之，中復謝曰：「吾豈以身計，爲權利作俑者乎？」累遷提舉廣西黔南常平事。黔南賊熾，師出輒敗，中復自提軍決戰，賊遂平。邊吏邀功者，奏奪蠻境置從、允二州，築城防禦。中復以爲得其人不可教，得其地不可守，力奏罷之。歷廣南東路提舉刑獄事，屬盜劉花三嘯聚潮、梅、循、惠四郡，又與連寇合勢，徽宗手札委規畫，不踰月，盜妖平。累轉中大夫，召還，卒。中復簡淡冲粹，言不妄發，篤族誼，重交契，八歷外臺，獎拔成就者多知名於世。

潘慎修 字成德。承祐子也。以父任仕江南李煜爲起居舍人。開寶末，王師征江南，煜遣慎修從其弟從鑑入貢買宴錢，求緩師，留館懷信驛，而江南已下。邸吏促從鑑入賀，慎修謂：「國且亡，何賀也。奉表請罪而已。」太祖嘉其得體。煜歸朝，以慎修爲太子右贊善，煜表求慎修掌記，許之。煜卒，改太常博士，直秘閣，累倉部、考功二部郎中、兩浙巡撫使、右諫議大夫、翰林侍讀學士。慎修善弈，太宗屢召之弈，因作《弈說》以獻。大抵謂：「弈雖一藝，道在恬默，而取舍爲急。仁則能全，義則能守，禮則能變，智則能兼，信則能克。」因舉十要以明其義。寇準數毀慎修，及準守鄧，有告準者，詔慎修驗治，乃密疏：「準將相

才，所坐不足問。」江南舊臣多於真宗前言李煜閹儒，真宗以問慎修，對曰：「煜或懵理，何得享國十餘年。」真宗深加獎歎。子汝士，工部員外郎，直集賢院。慎修風度醞藉，博涉文史，多讀道書，善清談，士大夫與游者咸推其素尚，然頗恃前輩，倨慢後來。

李欣 字公愉。曾祖丹，令莆田，見文苑。丹子崇，仕唐爲校書郎。梁改唐祚，崇歎曰：「吾寧能爲劉國師耶？」棄官歸。欣，其孫也，歷階州推官，以清謹聞，擢通判耀州。時關輔盜賊充斥，欣陳討捕之策，踰月悉平。歷知儀、解、福州，有善政。累廣東、廣西、京西轉運使。始，仁宗爲太子，欣處師儒，及卽位，贈璽書褒問，除衛尉卿，遷諫議大夫，卒。

王平 大中祥符中知福州轉運使。王贊言福州官田宜課租如漳、泉例，平曰：「額外增稅，民何以堪？」奏止之。

陳動之 高祖嶠，見前。祖正則，從陳洪進入朝，以詩爲太宗稱賞，授平原簿。未幾，卒，太宗聞之，曰：「正則詩得古人風格，朕將大用之，何天奪之速耶？」父絳，福州守，別見。動之與弟說之同年登第，俱官至秘書丞。王安石、歐陽修甚愛重之。子侗、睦。

侗 與弟睦相繼第進士。英宗命輔臣韓琦等舉館職，侗兄弟預焉。富弼知汝州，辟爲從事。後弼執政，召試，除館閣校勘，歷知陝、湖二州，遷衛尉少卿。襟懷磊落，喜愠雙忘，快飲百觴，絕無一語論饑飽。蘇文忠、文定、劉忠肅三公皆與游。子彥恭。

睦 熙寧中以秘閣校理除浙西提刑，除監察御史，被命校讎《六典》，以定官制，除赴召之人。高麗國自天聖以來，職貢稍闕，至是連歲修貢。中國之使不踰海者幾百年，始命門下安燾往聘，又謀爲副，皆畏

縮不行。及命睦，睦慨然無難色，神宗嘉之，特賜仙花金帶。睦使還，奏言：「本朝故事，惟實文閣直學士以上乃服金帶，臣前以使事不敢辭，今願還所賜。」特旨令服之，進□□寺卿，〔七〕除起居舍人，終知潭、廣二州、廣南東路經略安撫使。子彥文。

彥恭 字子愿。登進士乙科，調太平州司法，擢編修勅令所刪定官。以事忤蔡京，改通判保州。代還，京當國，復通判代、鞏二州。熙州帥姚雄請以弓箭手墾田實邊，宣撫使童貫忌雄，陰阻之，惟彥恭推行其法。貫至鞏，守帥以下囊鞬拜道左，彥恭朝服長揖而已。貫滋不悅，坐罷歸。復除提轄河東坑冶鑄錢，京以其黨王桓兼之，桓欲增監鼓鑄，其數倍經，彥恭曰：「山澤之利不可竭，祖宗之額不可踰。」桓怒，以聞，復罷。久之，提點九路坑冶，地綿百餘州，前職率憚險遠，彥恭冒風濤瘴癘，周行萬里，至課贏十倍。知壽春，金人寇京師，王室告難，彥恭讀詔泣下，悉禁旅而西。既，叛將李安提兵及境，劇賊李全亦闖城宵掠。彥恭單騎叩安營，諭安會兵討賊，安遂聽命，竟擊斬全，州以無事。歲餘，請祠，避地會稽，老卒平江。

彥文 從父居平江，以職事登對稱旨，崇寧中恩賜進士，歷知慶、洪、楚、江四州。江州盜犯城，擊走之。建炎初，除江淮制置使。

〔校記〕

〔一〕「王延彬」，各本原作「史延彬」，據吳任臣《十國春秋·閩》改。

〔二〕「彥十一世孫」，各本原作「彥士世孫」，據本卷梁陳《林藻傳》改。

〔三〕「必適」下，當有脫文。

〔四〕「王幼曾曾叔子。方橋元上高族孫」，各本原作「王幼曾曾叔子。叔方橋元上高族孫」，據本條上文「王聲叔」及上文「淳熙二年乙未」條「方士高」改。

〔五〕「鄭褒」，各本原闕本傳。

〔六〕「請印券」，各本原作「請印卷」，據文義改。

〔七〕「寺卿」上，各本原闕二字。

# 閩書卷之一百六

英舊志 縉紳

興化府 莆田縣二

宋

有傳

方儀侄慎言。慎信孫通。(一)通子軫。慎言弟慎從。慎從孫价。(二)曾孫禧附。(三)慎言從子橫。(四)從孫适，從侄孫符。

符從侄東叔。(五)東叔子澄孫。澄孫子公權。慎言族孫旬。(六)旬從孫廷實。廷實從子崧卿。崧卿子信儒。慎從七世孫大琮。大

琮子演孫。

方峻峻子士寧、子容、元宗。子容孫略、响。(七)簡輿。元宗孫壽。壽曾孫未、壬。(八)泳之。壬孫之泰。峻弟

蟠。蟠子伯壽、仲宇、叔完、由。蟠從孫會。

林瑀族積仁、應承、之平。徐晞 鄭伯玉孫起沃、煥之、裔孫獻翁。

鄭濟

從曾孫可學，裔孫鉞。

吳世延 林伸孝淵，弟孝澤。孝澤子樹。

黃君俞族子隱。隱曾孫輔。(九)從孫彥輝，七世孫鑄。

黃琮 黃靜子公度，從子泳。補。續。續子仲元。

徐確子師仁。

徐膺弟昭。

林深之子秀，弟冲之。冲之子郁，從子

震、霆。

莊柔正 黃穎 阮駿 葉居申 蘇燁侄孫續。(一〇)余祖奭子武弼、武揚。武揚曾孫謙一。

徐漑

李德昭從曾孫丑父。

宋旅 吳公誠子廷秀。

方儀 其先歛人，至廷範者，歷知長溪、古田、長樂三縣，居莆刺桐巷。六子皆仕於閩，其次子曰仁岳者，爲閩秘書少監。儀，仁岳季子也。歷官大理寺丞，遷著作佐郎。興化廟學，首其所建，語見建置志。子正中，泉州長史。正中子天若，爲蔡京門客。天若子邵，歷陝西等七路訪使。朝命俾廉童賈所爲，邵盡發賈罪惡，罷居筠州，終直龍圖閣。五世孫廷實。

慎言 字應之。仁兵弟，仁載孫，儀再從侄。初赴廷試時，仁宗爲太子，見其試硯，喜之。慎言曰：「請遂事。」既遂事，仁宗至，拉袖拭硯，跪進。仁宗以聞，真宗嘉其恭。唱名日，仁宗立御案傍，指曰：「是於思者，而予兒硯。」知信豐、蘭谿二縣。祥符初，以殿中丞往淄、青數郡均給蠶賦，使還，稱旨，許擇近地便養。通判福州，再判建、泉、徐、徐三州，歷殿中丞。仁宗卽位。改侍御史，屬丁謂得罪，遣慎言籍其家，得士大夫于請書，悉焚之，人稱長者。歷廣東路轉運副使，請便郡，知泉州。歲饑，大發官廩貸民，奏免其丁稅。父老相泣曰：「微方公，我輩無生，何有子孫？」自是生子多以方名。歷兩浙轉運使。錢塘江決數十里，慎言庀工授財，疊石立梃柱以殺潮勢，賜璽書褒美。改知潭州，潭人像祀之。入爲諫議大夫，會擇重臣鎮南越，遂以朝請大夫知廣州。卒，贈開府儀同三司。人謂慎言：上結主知在其廷試進硯時也。弟慎從。孫通。通子軫。

通 字叔時。慎言有七子，當其貴時，先推恩於從父昆弟，而後及子。迨慎言歿，諸孫尚白衣，獨通舉進士，遷親賢宅博士。徐邸福國夫人馮氏，安康郡王孝騫母也，謫居瑤華，通啓王：惟勤與孝足以動天地、感鬼神。因爲草奏，叩哀請命，朝廷爲之惻然，得宥。出知睦州，以最聞，除王府翊善。坐子軫上書論列蔡京，謫官，以朝請大夫老於家。有文集二十卷、《詠史》十卷、《雜志》十卷、《詩書文解》三卷。

軫 以父任太廟齋郎。大觀元年，京復相，軾極論京過惡，所疏列凡千餘言。詔宣視京，京請付有司推究。於是命御史臺鞠治，罷父通職，勅軾貸命，追毀出身以來文字，編管嶺南。尋放歸。政和間詣登聞鼓院進狀，乞收權獨斷，毋令國賊肆奸。朝廷以軾長惡不悛，編管永州。後以收燕、雲，赦放歸。靖康元年，復收叙。父通尚在，亦叙其原官。後遷鄭令。貧不能歸，家於慈谿鳴鶴場，至今子孫繁盛。

慎從 字惟之。歷知弋陽、懷寧、同安、懷安、導江、蘭谿六縣、潮、漳、嘉三州。再知漳州，改都官郎中。以老歸，卒。慎從所至，有德於民。在導江時，有楠木連理、喜禾九穗之祥，璽書褒異。守漳之日，適慎言守泉，旌麾相望，一州榮之。及再至漳，漳人夾道歡呼：「吾父復來矣。」子諫臣，侍父於漳，手斷合水擊蛟。死，漳人祠之。孫价，舊名儼。大觀初，知安豐。用薦召赴都堂審察，不肯私謁蔡京，報罷。後知侯官縣。曾孫禧，殿中侍御史。初，慎從在嘉州，手植荔枝於郡圃，賦詩有「留取清陰待子孫」之句。至大觀中，禧持節按蜀部學，嘉父兄稱詩爲賀。

擴 字端之，慎言從子。歷知閩、平陽二縣。部使者上治狀，增秩，特授臨安府判、知岳州。條利害十三事。急內治而後攻守。居官自奉粗薄，惟周貧恤舊之爲急。

适 字彥周，慎言從孫。元符三年，以特奏對策殿廷，乞復元祐皇后，哲宗不加罪，第命置下第。尋上書，謂秦人緘口腹誹，而享國日蹙，東漢宦官擅權，而桓、靈以降僅存位號，武王數紂之罪在於臺榭、陂池、侈服，以殘害百姓。所言皆譏切時事，衝替永不得改官。崇寧元年，詔籍上書邪等人，适與焉。仕終福清丞。初适所對乞復元祐皇后，策略曰：「昔陛下迎后於西宮也，天下之人舉欣欣相告者，亡他，得君母也。及遷后於北宮也，天下之人舉疾首蹙額而相告者，亡他，失君母也。臣願陛下力排群議，還后西



宮，而道路籍籍之言息矣。」其時陳瓘覆廷對策，嘆曰：「是何舉人，敢言乃爾！」後因與徽宗論事，復舉策中語爲徽宗誦之。徽宗曰：「卿力搜訪其人。」適竟不肯自達。瓘亦莫知名姓云。

符 字子約，慎言從侄孫。少受學於叔大壯，以鄉試上春官，道考亭，拜朱文公於精舍，留語累夕。既第進士，文公以書賀大壯，稱符清苦自勵，窮達得喪，惟命之安。歷潤、衢二州教授、知瀏陽、通判徽州。從弟東叔。

東叔 亦廷範裔。父大壯，兄韋布。東叔弱冠，文藝絕流輩，年五十始與二子洧、澄孫同拔漕解，以進士乙科調永春縣主簿，卒。按東叔，志名人東。父子俱名人，不審何故。故因其字曰東叔。

澄孫 名蒙仲，以字行。淳祐七年，廷對萬言，大約欲聚君子、明公論以續國脉，強精神。又請立涪陵後，錮秦檜子孫，竄史嵩之，以謝天下。擢甲科，教授邵武軍。實禮書宿，作成俊乂，哀學庫贏錢，及教官例券，置貢士莊。秩滿，監激賞所酒庫。以憂去。入爲國子監庫官，校藝南宮。坐商論去取不能下氣，出通判泉州，攝守兼舶。黥籍舞文，吏不得逞。辟淮西制置司參議官。適虜渡江，治法征謀，悉見咨訪。虜退，知邵武軍。邵武時三易守，公私赤立。澄孫清苦節縮，支吾乏絕，拊柔獷悍，表倡儒術，著《女教》一書，以崇風化，請立樵川書院祠李忠定，以廣教學。郡最聞，增一秩。尋以秘書丞召，卒。澄孫高才能文，有氣節。初以文字爲賈似道所知，似道薦澄孫語妙天下，及似道相，澄孫獨求補外。所著有《通鑑表微》、《洞齋集》。子公權。

公權 字立道。學有淵源，尤粹於理。歷廣州教授，至太常寺簿，而宋亡矣。莆中耆舊或變胡人衣冠往見峻都，公權責以大義。所著述甚富，時稱石巖先生。

旬 字時發，慎族孫。歷京西提舉學事，坐忤權臣，通判建州。時范仙桂嘯聚，旬揭榜，許脅從自首者免罪，能殺賊首來獻者受賞。賊徒相視曰：「此方監州榜也，豈欺我哉？」俄有數人棄大趨軍中，（二）悉給據使還。其夕果殺仙桂以獻，首領一十二人皆懼，自經死，餘衆遂潰。移衢州，後復廣東提舉。

廷實 字公美。父監，紹聖四年與曾從祖旬、從子天若三人同榜，官至廣東提舉。廷實賜進士出身，累遷御史臺檢法官。秦檜方主和議，虜使適來，廷實疏言：「虜使以江南詔諭爲名，或傳陛下欲屈膝受詔。夫陛下縱未能克復神州，尚可保守江左，何至遽爾貶尊？」除監察御史，尋以宗正少卿被旨宣諭三京、淮北。廷實至京西，伏謁陵寢，見永昌諸陵皆驚犯，而秦陵暴露，解衣覆之。比還，檜預使戒曰：「幸見上，無言及。」且約以美除。廷實既見，爲高宗涕泣歷道，遂力求補外。除直徽猷閣、提點福建獄。至則首請解官贖胡銓罪，檜益卿之。時海寇竊發，廷實謂當以盜禦盜，有習歷風濤心懷歸正者，即可用之。有鄭廣輩，故繇此塗得武官，廷實不以逞事遇之，延問方略，廣感激自効，盜相繼遁去。復奏除鋪例免行錢，發常平米賑泉州饑。尋改知泉州。未上，丁內艱歸。服闋，除廣南東路提刑。廉察挾檜勢爲威福者，章再上，不下，遂上章納祿，未報，卒官。廷實工詩律，有集行世。平生薦士如林安宅、龔茂良、何大圭、傅自得、林孝澤、吳達、宋藻、黃濬，皆名時選，世稱其鑒裁。

崧卿 字季申，廷實從子。知上饒縣，以政績聞。通判明州。秩滿，知南安軍，平易得民。移知吉州，罷米運力勝錢歲萬餘緡，減放諸邑月斛錢歲六萬八千緡。作六一堂祀歐陽文忠，搜遺墨八卷刻其中。除廣西轉運判官，改定鹽法，奏罷歲解鄂靖錢十一萬緡。徙京西轉運判官，卒。崧卿嚴己和物，平生祿賜半用抄書，家藏卷軸四萬，並出手校。嘗會合諸本，考定《韓昌黎文集》，別作《舉正》十卷，論所以去

取之意。蓋昌黎好奇，而崧卿所校亦爲奇解。又詳其經行，次第爲《韓詩編年》，凡十五卷。子信孺。

信孺 字孚若。未冠能文，周必大、楊萬里見而異之，以父蔭丞蕭山。韓侂胄舉恢復之謀，諸將憤軍，邊釁不已。朝廷尋悔，金亦厭兵，乃遣韓元靚來使，信孺以近臣薦其可使，遂以丞召。既至，命以使事，假朝奉郎充樞密院參謀官，持督帥張巖書通問於金。至濠州，金帥紇石烈子仁止於獄中，露刃環守，絕其薪水，要以五事：曰反俘，曰歸幣，曰縛送首謀，曰稱藩，曰割地。信孺曰：「反俘、歸幣，可也。縛送首謀，於古無之。稱藩、割地，則非我忍言。」子仁怒曰：「不求生耶？」信孺曰：「將命出門，不望生矣。」至汴，見金左丞相、都元帥完顏宗浩，出就傳舍。宗浩使將命者來，堅持五說，且謂稱藩割地，故事在彼。信孺曰：「昔靖康倉卒，割三鎮。紹興以太母故暫屈，今日可用爲故事耶？」請見丞相決之。將命者引見，宗浩盛陳兵衛，坐帳幄中，曰：「五事不從，兵下南矣。」信孺辯對不詘，宗浩曰：「前日稱兵，今何求和？」信孺曰：「興兵復讎爲社稷也，屈已求和，爲生靈也。」宗浩不能詰，授以報書。信孺還，詔廷臣集議所以復命。衆議還俘獲，罪首謀，增歲幣五萬，遣信孺再往。時吳曦已誅，金人氣頗索，猶執初議。信孺曰：「本朝以增幣已爲卑屈，況名分地界哉。且以曲直較之，本朝興兵在去年四月，若貽書誘吳曦，則去年三月也，曲有在矣。以強弱言之，若得滁、濠，我亦得泗、漣水。若誇胥浦橋之勝，我亦有鳳凰山之捷。若謂我不能下宿、壽，若圍廬和楚，果能下乎？五事從其三，而猶不已，不過再加兵耳。」金人見信孺忠懇，乃曰：「割地姑寢，但稱藩不從，當以叔爲伯，歲幣外別犒師可也。」信孺固執不許。宗浩計窮，遂密與定約。報命，再差充通謝國信所參謀官。奉國書誓草及許通謝百萬緡至汴。宗浩盡變前說，怒信孺不曲折建白，遽以誓書來，有誅戮禁錮語。信孺不爲動。將命曰：「此事非犒軍錢可了，當別出事目。」信孺

曰：「歲幣不可再增，故以通謝錢代。今得此求彼，吾有隕首而已。」將命曰：「不爾，丞相留公。」信孺曰：「留死，辱命亦死，不若死此。」會蜀兵取散關，金人益疑，信孺還，言敵所欲者五事：割兩淮，一；增歲幣，二；犒軍，三；索歸正等人，四；其五不敢言。侂冑再三問，至厲聲詰之。信孺徐曰：「欲得太師頭耳。」侂冑大怒，奪三秩，臨江軍居住。信孺自春至秋使金三往返，以口舌折強敵，金人憤其不屈，議用弗就。已而，王柟出使，定和議，增幣函首皆前信孺所持不可者。柟還，言每見金人，必問信孺安在。乃詔信孺自便。起爲番禺尉。盜劫海賈，方聚沙分財。信孺密使人先負盜舟而走，捕者至，盜趨舟不得，悉就縛。嘉定元年，擢通判端州，復奉議郎。峒寇竊發，被旨同廖德明措置收捕，就命知韶州。赤水洞賊踰嶺入寇，遣義士秦綱禦之，斬其魁率。尋知道州，俄提點廣東刑獄。奏縱屬郡久疑之訟。遷淮東轉運判官，兼提刑、知真州。信孺判轉運，踐父世職，深知鹽筴利害，操幹裁樽，自出新智，蠲諸郡鹽逋二十六萬緡。其知真州，卽北山置水築石堤，袤二十里，人莫知其所爲。後金人薄儀真，守將藉以卻敵。山東初內附，請選威望重臣將精兵數萬往開幕，以主制客，以重馭輕，則可以固江北、瞰兩河。坐責降三秩，再奉祠。稍後官。信孺豪爽揮霍，糞土視財利，所至賓客滿後車。使北時，年甫三十。既齟齬歸，營室巖竇，文酒自放。其後，貲用竭，賓客落，信孺死矣。

大琮 字德潤，慎從七世孫。弱冠，擢南宮詞賦第三人，授南劍州教授。式楊時廬，祀八賢於學。改知將樂縣。丁外艱，服除，知永福。值兵饑，守隘立柵禁港，發廩無虛日。時延名士講論文義。丁內艱，起復，累遷大府寺丞。大琮不祈速化，沉鬱下僚餘三十年。端宗初，鄭性之當國，搜進名士，拔置諫垣，危言正論。選親賢，遠聲色，杜佞幸，以襄之失，蜀之敗爲耻，荆襄之擾爲懼，及繳駁數事，尤忠懇所難言，而

大琮悉無忌諱。申大義以雪濟邸之冤，追罪奸相彌遠，屢言之。臨安火，又言之。爲其黨蔣峴所中，予祠。鴻禧尋起，知建寧府，中寢。嘉熙末，爲福建轉運判官。時歲荒，閩人艱食。首發常平賑糴，自鄉郡始。上四州委寓士蔡抗措置糴事。創廟學，決滯訟，禮高年，關防鄉郡撓政，未嘗以公帑遺故舊。淳祐元年，改集英殿修撰，知廣州、廣東經略。四年，加寶章閣待制，并升使。六年，進直學士，因舊任。大琮帥廣六年，以儒飭吏，以政徵俗，與人士討論古禮樂器服，以行廟祭鄉飲酒禮，遂事而無倦容，下至官治門閭，悉行改飭，翼然爲海藩之重。調知隆興府。卒，謚忠惠，贈寶謨學士，依尚書例致仕。大琮祖尚晦翁，沾漑醇馥於真西山、魏鶴山，而追慕劉元城之爲烈。與劉後村同時，著述甚謹，尺楮片翰，刊落陳言，辯博雖間不及後村，而粹續過之。命詞運意，以心術爲根柢，氣節爲枝幹，義理爲華實，名賢爲標格。有奏議、外制、雜著若干卷。子演孫。

演孫 字景行。侍父大琮，未嘗跬步離側。繇薦調建康府糧料院添差，通判南劍州，剖決如流。攝邵武軍，增郡儲二十倍，創學田百餘畝。景定更化，除諸司審計。當對，傷父坐言濟王事老死遠方，乃疏曰：「舜有有庠之封，周公有蔡仲之命。陛下之聖豈愧古人。三十年間因循未行者，存亡繼絕一事耳。」累遷大府丞，請外，知建昌軍。會度宗卽位，陛辭，上言皆關係新政之大者，復申繼絕之請。至郡，首尊李、曾二先生之學，以表勵風俗。以鹽酒息鐵錢代納民稅，街道橋梁無不修葺，政化大行。移守贛州，尋歸。蕪湖潰師，國事幾殆。演孫家居，猶運粟米以助京師，集民丁以固鄉郡。卽家除工部郎官。益王嗣位福州，一二除軍器監、司農少卿，進大司農，權宜措置以濟危急。用憂勞卒。子廣翁，人元，宣授承事郎，本路鹽使。晚年棄官學道，樂善好施。

方峻（二三）字景通，廷範之後。天聖中爲建安簿。景祐初，試秘書郎、福州左司理。嘉祐中請老，分司南京。榜其家堂曰植德，聚徒講學，鑿井舍傍，禱曰：「願子弟居官如此水。」初，峻官潤州，識程大中珦，及卒，明道先生頤狀峻行，托范祖禹爲撰神道碑，其見重如此。弟嶠。子士寧、子容、元察。

士寧 字彥昌。推究經史，工古文詞。令劍浦，有治績。蔡襄薦其才，官至都官郎中。

子容 字南圭。守惠州，時蘇子瞻謫居惠，雅與善。子瞻貽子容詩，稱其有拔薤之政。子絢，見韋布。孫略、昀、簡輿。

元察 字道輔。特科出身，官終威武軍節度推官。少與程伊川同游，後伊川貽之書曰：「聖人之道，坦如大路，學者病不得其門耳。求人其門，不繇經乎？今之治經者衆矣，誦其言辭，解其訓詁，無用之糟粕耳。觀足下繇經以求道，勉之又勉。異日見卓爾於前，然後不知手之舞之，足之蹈之，將不加勉，而自不能止矣。」朱文公書帖後云：「伊川先生德盛言重，不輕與人接，今觀其眷眷如此，則方公之賢可知也。」孫翥。

略 字作謀。大觀中，累遷修書局。請外，提舉廣東常平。宣和初在京東，以不附燕雲之議忤王黼，貶知瓊州。清潔戒謹，恩威並行。改知潮州。建炎中，秩滿歸，上章乞祠。家有萬卷樓，廖剛嘗還所借書，其詩曰：「平生何啻兩瓶酒，古語：『借書一瓶，還一瓶。』瓶音痴，酒器也。歸計元無擔石儲。」

昀 字文耕。以兄略奏補官。紹興中，知長溪，用廉謹聞。其清貧，爲葉頤所稱。調潮州通判，未上，卒。昀故無室，寓居華嚴寺。其卒也，郡守鍾離松助之俸緡三百。

簡輿 教授藤州。以致知謹獨教學者。終長樂令。

翥 字次雲。父佗，與鄉書，終身不至都下。翥六歲而孤，多所通解。其從兄略作萬卷樓，儲書千二百筥，翥能盡讀之，弭然而長，曳然而強，弁然而張，皮然而揚，緣尺寸而下之又下。自視若無所用，聞客如不欲出，而世人謬目之爲高簡誇誕。登進士，調閩清尉。到官三百日歸，而閩門跌宕於風煙無人之處。有旨召對，除秘書省正字，凡九月，以風聞論事聽外補。翥道古，非緣章句，而終不肯著書。有所吟寫，多出偶然，不以爲長技。群處毋羈束，有寒蟬、野鶴蕭然出俗之度。與林光朝善，光朝初喜嵇康、阮籍、李白、石曼卿之爲人，翥謂之曰：「今也不然，有一等人物可同出於舞雩之下，則翥也。」唯恐後光朝聽之，躍然如宿醒之欲去。曾孫末、壬。

末 字耕道，仲字曾孫。〔二四〕少孤苦學，家貧奉母。既師事朱文公於建安，文公稱其以明敏強毅之資，懷進學不倦之志，勸其敬爲人門，以自抑其高簡之習。乾道中登第，調善化尉，往謁張南軒，南軒深喜之，謂其可與共死生、同禍福。後南軒帥荆南，辟末及游九言爲屬，曰：「是二人者能攻吾過。」末感激知己，遇事無隱。改知縣，終宣教郎、知連江縣。弟禾，見韋布。

壬 字若水。淳熙中游太學，往謁朱文公，以靜退之說爲請。擢第，除長泰簿。會文公守漳，請壬主學事，壬條上講說、課試、差補等十事，文公命屬邑皆倣之。龍巖有灣卒殺人，獄吏逼同行者誣伏。漳浦有僧死於佃，而鞠驗者皆曰飲鴆。壬閱實抵罪。文公稱其能使無罪不冤，有罪者莫逃。秩滿，除知寧鄉縣，未上，卒。壬性孝友，與弟申終始無間，家人議析產分籍，籍具，流涕而不忍觀。孫之泰。

泳之 初名芹之，字子實。亦與文公游，廉介好學，不肯俛仰於世。登淳熙第，教授衡州，改知南豐縣。樽節浮費，抑罷科敷。知巴陵縣，撫摩甚至，縣中稱治。

之泰 字嚴仲。歷英德府教授，用中州法課試，陋士變習。方大琮爲閩漕，辟幕府，與洪天錫、徐明叔號幕中三賢。遷知長溪縣，以邑前輩楊楫、楊復及師儒黃榦並祠，汰庠序冗職，增子弟員，蠲民間取例錢。終袁州通判。

嶠 字次山。初調平陽尉，改福州司理參軍。州民有誣繫獄者，守促令引服，嶠力辯其冤。累改秘書丞、著作郎、知山陽縣，移知循州。陰察不法吏數人，流之，郡中肅然。就遷太常博士、知潮州，潮人喜曰：「循州使君也。」不教而服。既去，立祀祠之，以配韓愈。改屯田員外郎，通判淄、濰二州，權密州。撫循有方，密人德焉。會遣使寬恤諸路，嶠得福建，詢訪利害，條上甚覈，勅令施行，多出所言。英宗卽位，改職方員外郎，通判吉州，遷屯田都官郎中、守汀州。汀、虔鹽寇剽劫，至悉討平之。有巡檢戰賊死，部卒懼失主帥并誅，遂謀爲亂。嶠斬其首謀三人，餘悉奏免。其爲政，懲猾吏，撫疲民，以盜弭盜，盜舉必發。遷司封郎中，改太常少卿，卒。與峻並贈金紫光祿大夫，莆人稱白社二金紫。子伯壽、仲宇、叔完、宙。

伯壽 補侯官尉。有盜劫人，追捕亡驗，伯壽聚里人詢其姓名，至曾忍者熟視之，曰：「汝也。」一訊而服。移建陽丞，部使者行縣，欲摭令事諷使言，且許薦之，謝曰：「塹人以自進，所不敢爲，知固不言，且實不知。」終會昌令。

仲宇 少穎悟，日誦數千言。年十二，從胡安定學，諸生嘗千餘人較藝，屢居上列。官終知南安縣。

叔完 元豐中補侯官令。民以築港瀦水害懷安民田，二邑交訟，叔完往按之，曰：「敢私吾邑？」遂命改築。時曾鞏帥郡，少所與可，獨信委叔完，檄權節度推官，且上薦之。移知祥符縣，治繁劇，無留獄。遷知建州，命攝提舉常平，奏罷縣令監稅數人。



宙 初名輔。舉進士，召對，除司農丞。章惇、蔡確、蔡京交薦，將處以臺閣，宙耻之。力請外，補得京西提舉常平，奏乞給還程頤舊買汝州荒田。范鎮子百揆以非辜罷官，唐介子義問在謫籍中，皆爲論奏。官至河東轉運判官。曾孫審權，見韋布。

會 字子元，嶠從孫。登進士，調揚州司法參軍，以薦移建州教授。學政大修，八州士嚮至。朝廷爲賜田，給廩。部使者上狀，詔進秩再任。後以集英殿修撰知河中府，遷知越州，充南浙安撫使。繕城隍，創樓船，上所造水戰法。其法方圓縱橫，用舟六六爲陣，如六花八陣之意。以時肄習，疾徐進退如在平地。居越五年，杜私謁，簡廚傳，省追呼。政和二年召還，人對，除給事中兼編修《國朝會要》。遷工部侍郎，以寶謨閣待制試太子詹事，提舉醴泉觀。編修《六家謚法》，書成，加大中大夫，累爵文安郡開國侯。卒，贈太師。子昭，駕部員外郎；暄，光州司法參軍。始，會在壽春，愛羅山之境，因葬焉。建炎初，虜發兩淮塚，暄恐及，號泣赴援，遂遇害。曾孫士繇，見韋布。

林瑀 九牧藻之裔。舉進士，授太常博士。康定初，仁宗親擢天章閣侍講，尋命與徐復同修《周易天人會紀》，賜五品服。

積仁 字充美，蘊之後。登紹聖中進士，歷知甌寧縣。時以八最四善課吏，積仁居第一。徙濰州北海縣，以治狀聞，凡留五年，被召除提舉河東路。屬靈夏用兵，轉餉盡出河東，特轉知平陽府。纔歷旬朔，革去蠹壞。及移京畿提點刑獄，人皆牽衣泣送。靖康初，平陽父老走闕下乞積仁爲守，以中大夫直秘閣再領平陽。望馬首而拜者合沓，至寫像家奉之。進直龍圖閣，充秘閣修撰。未幾，以疾乞致仕。紹興初，起知筠州，封長興縣男，解去。起爲廣南東路轉運使，卒於官。初，潮陽有獄，累歲不辨，逮至數百人，積

仁過潮，一日而決。及是，柩東下，潮人酹哭之甚哀。贈左光祿大夫。積仁身長七尺，豐額駢齒，發聲如鐘，爲人彊直，若不可犯。與人交，呈寫肺腑。僚屬或過差，未嘗輒加怒辱，婚戚空乏，悉分祿賙之。

應承 字汝大，積仁之後。嘗受學於黃績，咸淳中，與長子棟同登第，歷官宗正寺簿、宣撫司機宜。宋亡，不仕。年七十二卒。孫以辨，見韋布。

之平 字國衡，晁十世孫。崇寧中登第，歷監察御史。高宗幸臨安，群臣請招募海舟以備長江，之平御命爲福建廣南招募使，歷閩、廣，募舟六百餘，繇溫、台赴行在。適移蹕永嘉，海道支費無闕，之平有力焉。時朝議福建行鈔鹽、榷酤之法，之平請罷之。召赴行在，除右司員外郎。金虜犯浙右，朝廷以所募舟破賊，推恩轉朝散大夫，遷左司。高宗欲選朝臣守永嘉，執政薦之平忠力可倚，除直龍圖閣、知温州。丐祠，再論功，特授泉州。卒於官，贈左朝請大夫。

徐晞 字仲齊。父復，見韋布。初，仁宗賜復官，不受，因命晞爲秘書省校書郎。歷長溪、海門簿，將樂尉，威寧令，以母老請爲武康尉。未幾，拜太子洗馬。年五十餘，致仕，居杭之萬松嶺，閉門讀書。再召，守國子博士，陞淮南運使，累大中大夫。元豐三年卒。晞質直清慎，恬於分義。居官有能名，所至聽訟，必逆得其情，而下不敢爲奸，民多懷之。

鄭伯玉 字寶臣，五代露之後。舉進士，累撫州觀察推官。韓魏公薦爲殿中侍御史，動觸權貴，勁直著聲。有詩三百篇，名《錦囊集》，時人以與陳著作作珙、方提舉孝寧類爲烏山三賢詩。年未五十，棄官歸養。子叔明、叔僑，孫至道、亨道、事道，相繼擢第，皆及見之。方叔明贈詩曰：「壺公簪紱數如沙，三世青雲第一家。」叔明知順昌縣。叔僑知清溪縣。至道知天台樂昌。事道歷知邵武軍。叔僑、事道有集行世。

而叔僑尤奧古整潔。

起沃 伯玉來孫。尉會昌，宰揭陽，歷廣東提舉。居官清介，輟已俸以補軍需，移私財以供公用。渙之 伯玉來孫。令處寧，調永興。救荒恤民，發官倉不待上報，全活萬計。歷廣東憲使，所至常祿外無餘資。

獻翁 字帝臣，伯玉裔孫。少從黃績學，第咸淳初進士，終漳州推官。宋亡，避元不仕。爲人修偉疎秀，豁達洞朗。當舊德淪謝、胡風習染之日，獨以所學傳諸人。

鄭濟 字興梁，亦露後。元豐五年進士，調潮州司理，就移端溪令。縣廨有古木爲妖，縣官踵死，濟斧之，妖遂絕。秩滿，擢考功員外郎，書上考。中丞石豫，蔡京客也，欲薦之臺職，濟力辭不遷者四載。政和初，除衛尉少卿，出知海州，移亳州。推行保伍法，道無拾遺。召赴闕，改提點荆湖南路刑獄。陸辭，徽宗曰：「湖湘多盜，卿何道處之？」濟以保伍對，曰：「此元豐法也。」徽宗曰：「神考此法正爲盜計，卿尚勉之。」既至，悉力推行，盜賊屏息。受代赴闕，慰勞甚厚，除知泉州，尋請祠。從曾孫可學。裔孫鉞。

可學 字子上。受學朱文公，自知性卞，用力懲忿。久之，得其精要。四方來學，文公多使質焉。文公知漳州，延置西塾。其後刪定《大學》一編，曰：「此書惟子上可託之。」前後三奉大對，晚以特科授惠州文學，調衡州司戶。著《春秋博議》十卷，《三朝北盟舉要》一卷，《師說》十卷。

鉞 一名少偉，字夷白。咸淳中特奏名，與黃仲元、郭堂俱閩中之望。宋亡不仕，嘗記陳文龍遺事，言甚痛憤。所著有《雲我存稿》、《孔子年譜》。黃仲元序其《存稿》曰：「吾友雲我，芳年妍韻，凌霄一武，謫墮人間。嘆滄海之爲桑田，醉六經而營四海。於《易》獨論筮、變、占，以測天機之乘除；於史專論漢、

蜀、晉，以閱人世之新故，於人則論箕子、子車，以明道統之絕續。韻語掀龜倒鯨，散語峭崖怪石，對語崢嶸水擲戟，紙上皆現光怪，前無俗人，號文章家。」

吳世延 舉進士，授屯田員外郎、知梧州。工詩，與周濂溪唱和。

林伸 字伸之，孝子攢之後。舉進士，調永靜幕官。內侍程昉陳屯田實邊之策，欲閉舊河，開新葫蘆於孟家口。伸念：孟家口開，則滄、景、德、埭四州俱被其害。條具以聞。昉劾伸，褫一官，改知新會縣。民有以獲盜賞迎合其子者，伸知而寢之，責其子曰：「朝廷數路求賢，汝不能讀書應選，乃欲陷我作欺耶？」邑多諸司職田，歲歉，伸放其租稅十之九。吏持不可，伸曰：「不過爲民一衝替耳。人以爲辱，我以爲榮。」後果符吏言，伸恬不爲意，以朝奉郎致仕。

孝淵 攢八世孫。舉進士，歷泰州、南劍教授。王黼當國，以同年屢遣堂吏屈一見，曰：「要職可得也。」孝淵曰：「有命，竟繇選格。」歷建州通判，改泉州。泉卒習亂，屢犯郡守，信孝淵一言，不敢暴守。鄭司業謁告歸覲，孝淵攝州事。會建炎登極，時守臣該捧表恩，鄭亟還，已無及。謂孝淵曰：「公青春未艾，母年且老，所愛唯一孫，願以與之。」孝淵慨然無靳色。他郡有類此者，守佐輒交訟，至降旨以拜赦者得之。聞者益服。弟孝澤。

孝澤 提舉廣東市舶。有番婦滿持珍異賂禁掖，爲子求官。中人助之。孝澤曰：「夷人非時請貢，明主猶謝遣之。豈可以一賈婦廢二百年互市成法？」上書力爭，固持不遣。就除轉運判官，郡縣解印綬者數十人。改知漳州。至州，值邊戍還家，索添支錢，諫堂下。孝澤置爲首者二人於法，遂皆帖服。其清介特甚，至不用官燭於私舍。再除廣東提刑、福建轉運判使，加直秘閣。年八十餘，卒。子枏。

枅 字子方。主簿閩縣，累調福清丞。敏公清惠，每徵里正，必下階與語，人人感激。召對，首言：「持祿固寵之臣似無過，而緩急無所用。骨鯁鯁直之臣似無用，而大節不能及。」又言：「兵強財豐未足恃，所恃者得人心。得人心者，修德而已。」孝宗稱其忠實，除秘書省正字，與修《中興會要》，遷校書郎。求補外，知信州。陛辭，言：「監司都邑用武人參之，非祖宗故事。」至郡，裁驕兵，斥公帑代輸物力錢。提舉廣東常平茶鹽，就爲轉運判官。再調福建轉運判官，移使江西。發漕司緡錢二萬六千助諸縣歲計，瘞豫章疫死者浮樞三千，爲塚六百九，皆函五百餘。寔其士大夫之貧而不能自寔者，以三百樞。會泉州缺守臣，孝宗於班部中求一風力之士補之，遂以授枅。枅以清德律貪，除諸色無名科斂，訟牒庭盈，剖決不滯，一時豪強斂跡。莆、泉密邇，親故莫敢干者。召除直秘閣、福建路轉運判官。減放寧化、泰寧二縣苗米，論漳州子斗司收諸絕產，爲除豁諸縣稅色。有旨兼領泉州。光宗卽位，拜監察御史。言：「漢宣帝親政，舊臣張安世日凜凜，而恭顯反用事。魏明帝政自己出，而內倚孫資、劉毅，公卿大夫不與接者辛毗一人耳。權臣專制，務強主威，輔臣畏避形跡，言官承望風旨。願以二臣爲戒。」除江東運副，奏鑄廣德、建平和買多取之額。改知慶元府、知福州。福州城，其所城也。卒於官。枅剛方廉介，濟以慈仁，雖不登禁從，持節分閫，所至吏畏民懷，爲當世稱道。

黃君俞 字廷僉。校書璞玄孫。父問，見韋布。君俞著書百卷，有詞賦名。治平四年，試開封進士第一。已，四黜於禮部。鄭獬、滕甫、王珪、陳襄交章論薦，歷官崇文院校書，改館閣校勘，卒。族子隱。

隱 字仲光。初名降，字從善。與從父理同第治平四年進士。其歲，族父君俞見黜於禮部，隱乞以所得恩命命君俞，君俞遂得補官。隱知無錫縣，以最聞。元豐中遷殿中侍御史。神宗問學術，隱以司馬

光對。時方尊尚王氏，不稱旨。元祐初，守國子司業。力排新語，取《三經》板火之。出守泗州，謝表猶有爲王氏發者。歷監司、郡守凡七任。坐尊司馬氏學人元祐黨籍。臨終戒家人毋得請致仕。徽宗聞而異之，與一子官。曾孫黼。從孫彥輝。七世孫鏞。

黼 歷給事中，改殿中侍御史。慶元初，韓侂胄攻偽學愈急，黼言：「治道在黜惡任賢，使才者不失其職，不才亦無所憾。」仁宗皇帝嘗曰：「朕不欲留人過失於心，此皇極之道也。」除起居郎，兼權兵部郎中，竟罷，名人黨禁。終權刑部侍郎。

彥輝 字如晦。弱冠有俊聲，以伯祖隱名在元祐黨籍，錮不得試。禁解，貢太學，第進士，攝侯官尉。募兵以衣糧不給作亂，監司促附城三尉捕之，彥輝獲七十餘人。二尉一無所俘，當譴，彥輝分畀以免。差知羅源縣，宗室不塾暴橫，彥輝榜其事跡，申安撫使追還所奪民財。轉奉議郎，差丞永春。時知縣洪旦德勝於才，泉守趙鼎以旦與彥輝兩易其任。彥輝事旦益恭，交相得也。會朝命濱海諸縣造戰船，州牒彥輝權知晉江。刷縣帑本分錢爲之，不加民賦，成船獨先。差知同安縣，築城壁周環六里。差通判潮州，卒。潮一作饒。累贈大中大夫。

鏞 寶祐間爲太學生，與陳宜中等攻丁大全，坐放，時稱六士。大全敗，丞相吳潛奏還廷試，擢第，除監察御史，遷給事中、同僉樞密院事，兼權參知政事。

黃琮 字子方，亦璞後。尉長溪，戢吏便民。丁父憂，徒步護喪。邑令鳩錢千緡爲賻，峻却之。調尉福清，捐俸築盧嶺道，行者失峭險。陞知泰寧縣，內使楊安時來廉訪，數私干，拒不納。調閩清，時方興道藏，帥命十二縣分疏斂民錢，縣各數百萬，琮獨不應。既聞他縣皆辦，乃自詣郡，以己俸四月輸之，帥雖不

平，然心服其賢。改知同安，俄被命爲福州方田指教官。閩清人喜琮復來，聚落歡呼如一口，郡通判許景衡撫民謠爲《公復來詞》刻之。檄攝侯官。有余太宰香火寺侍勢不輸上供銀，每移增於他刹，琮嚴徵如額，乃罷。諸司爲語曰：「黃君清廉無比，執拗有餘。」通判漳州，鄉人方翼爲漳守，琮可否相濟。未幾，致仕。給事中傅崧卿薦三循吏於朝，琮爲首，其二則陳麟、翁谷。琮居母喪，哀瘠不食，甘露降總幃，郡縣廉訪，琮曰：「敢以冥漠要人沽名耶？」琮始令泰寧時，數拒內使楊安時請。安時還朝，每見朝士輒切齒溢詆之。一日侍徽宗，徽宗問安時：「閩有賢令否？爲我道之。」安時腹不素辦，所懷但琮，遽舉琮賢，蓋刺漳之命在於即日。歷官三十年，無一夫之田，半畝之宅。退休十八年，處之泰綽。年八十，卒。

黃靜 字至一，滔七世孫。任校書郎、通判澧州，以湖外有四可罷之事力請於朝，曰：博易務、茶鹽司、弓弩手、廉訪司，皆施行如章。終提舉京西路鹽事。子公度。從子泳。

公度 字師憲。紹興八年舉進士第一，初任平海軍節度判官，兼南外宗簿。有流民數百輩自汀、虔下，守將疑而繫之，公度力爲辨解，得縱去。代還，除秘書省正字。秦檜當國，坐與趙鼎往來，又貽書臺官譏詆時政，居數月罷，主管台州崇道觀。十九年，差通判肇慶府，攝南恩守。決滯訟，除斂橫。南恩之俗，遭喪者椎牛釀酒破產營齋祭，公度作文諭絕之。增學廩二百餘斛，擇秀民與登降揖遜，學士勸興。南恩自唐貞觀置郡，至是始有登第者。檜死，召對，乞攬乾綱、厚風俗，高宗嘉納。因詢以嶺外弊事，公度曰：「廣東小郡，有十年不除守臣者，權官苟且爲治，民弊多矣。」高宗曰：「卿歸吏部，此弊當除。」遂以爲考功員外郎，兼金部。終左朝請郎，累贈正奉大夫。公度工詩律，在肇慶題官舍詩：「簿書休吏早，花塢向人開。」《秋夜獨酌》詩：「溪山態足身無事，天地功深歲有秋。投老相從管城子，平生得意醉鄉侯。」又有雨

意欲晴山鳥樂，寒聲初到井梧知。還鄉且盡田家樂，舉世誰非市道交。醉鄉歸去疑無路，詩筆拈來似有神。」世人誦之。所著《知稼集》十二卷。

泳 字永平。三歲時，書過目輒成誦。大觀二年，應童子科，得旨赴闕，十二月引見。徽宗摘《毛詩》「如南山之壽」句以發誦，泳應聲曰：「不騫不墜。」徽宗曰：「誤對。」曰：「詩人不識忌諱，臣敢復道？」徽宗大悅。時泳冠儒冠以見，有一侏儒傳粉戲於上前，脫其冠曰：「闍梨子乃求官耶！」即頓首跪謝：「臣何罪，而免臣冠？」臣實非僧，故以儒冠見。此曹非男子耶，安得爲婦人飾？」徽宗笑而奇之，令偏見妃嬪，爭遺之金錢、菓餌。越明年，賜五經及第。

補 字季全，亦滔後。父端，歷惠州教授，終安溪令。補侍父惠州時，永嘉陳鵬飛謫惠，補師友之。其學用心於內，視利達蔑如也。林光朝講學城南，而補在城東，並爲學者宗尚。乾道八年登特科，授高州文學，調高要尉，卒。有《九經解》、《論語人物志》。

續 字德遠，滔十一代孫。兄績，寶慶二年進士。續仕爲學正，少而凝重。稍長，慨然求道，出游淮浙，遍參諸老。中年還里，聞復齋陳宓、瓜山潘柄從黃榦得朱文公學，遂拜爲師。宓、柄卒，續築東湖書堂，讀約聚講如二師，以布衣爲鄉先生者三十年，門人著錄牒以數十百計。先是，郡守楊棟建尊德堂以處劉彌邵，彌邵卒，後其堂遂虛，邦人推續繼之。涵江書院始賜額，舉續兼山長，然皆非其好也。晚聞趙以夫作《易通》，與上下其論，以夫謂續爲益友。年七十一，卒。劉克莊與續兄弟善，目續曰愛，目績曰畏。續以「獨不懼」名齋，克莊爲記。所著有《四書遺說》等書。子仲元。

仲元 字善甫。少刻意周、程、張、朱、呂、真、魏及父所傳潘柄、陳宓之書。以其餘力，抄唐宋名文二



百餘家。同邑方澄孫一見稱賞。咸淳七年，中省闈第五。廷對，以直言忤時宰，賜同進士出身，調監瑞安府比較務。需次，食貧。陳文龍延仲元於二劉祠堂，一月兩講，爲學者師。九年，捧檄考類試。歸，過劍州，時江萬頃爲劍州守，留之郡齋。未幾，萬頃兄萬里招致芝山。十年，請假歸省。明年，德祐改元，始之官。守相陳山泉屈致幕下，深喜得人。又明年春，端明陸秀夫至自平江，偶同邸舍，一見褒歎。飲食必俱，炙燭對酌，劇談達曙。及聞杭陷，挑包辭歸。資送仲元，又留行囊。夏，五趣仲元赴行都，充益王府撰述官，兼處置使司幹辦公事。景炎元年，改刑、工部架閣，以通直郎陞武學諭，遂轉朝奉郎、國子監簿，兼福建路招捕使司都參議官。仲元雖受知諸公，屢膺超擢，然未嘗供一日職，升斗不批券曆，曰：「斯時何時？穀而耻也。」秀夫拜樞使，將有異除，仲元力辭母老。秀夫全家投海，仲元爲詩哭之，遂更名淵，字天叟，號釣鄉聲翁。嘗夢孔夫子遺之雙筆，自占曰：「筆者，述也。述事而書之也，斯文之祥耶。吾夫子筆絕獲麟千八百年矣，麟後之史，猶可得修耶。漢司馬子長《史記》始黃帝，終麟止。而十二國世表起成周，共和庚申以上，傳疑矣。班孟堅專志西漢史，而秦霸、莽盜世，經微寓書法，乃以更始帝著紀，宜削。遷、固而下無譏焉。唐陳伯玉自漢武迄唐爲《後史記》，未及竟，亦弗傳。宋邵堯夫《皇極經世》，上稽唐堯受命甲辰爲編年譜，黜呂娥姁，進儒子嬰，以上后魏附梁，以宇文周附陳，夫豈無見？而書少帝恒山王，書曹魏接獻帝，或者疑焉。張敬夫《經世紀年》，夏少康出處、復國，甚悉。所假立惠帝子不得紀元，關涉世運稍大。而最可議者，山陽公尚存卽絕漢，而予蜀。司馬君實先約戰國至秦二世，如左氏體，名爲《通志》。後作《通綱》，劉道原之力居多，而是非予奪一出光手。秦以前或卽《通志》也，《舉要曆》、《稽古錄》、《歷年圖》俱助此書之不及。其曾孫伋經緯離析圖，又惟與兩漢、西晉、隋唐以一統。然一統與正統異。一統而

正者，若唐、虞、夏、商、周，其次漢、唐與宋。若西晉、若隋，雖一而未正。朱元晦《綱目》於始皇二十六年大書而不分註，意謂前亡後繫，朝覲皆歸，卽爲正統，當送一難。左氏傳終魯悼之四年，實周貞定王之五年也，繇貞定王戊寅距威烈王丁丑六十載，間史闕如，此大是欠事。呂伯恭以《魯史》、《左氏》、《國策》、《史記》、《說苑》諸書修之，曰《大事記》，上接西狩，下止征和，繫楚義帝，繫高后，一失一得，識者自識。然於周魯七國事跡疏略，此史所以不可不修，其或繼周者世可知。吾夫子授筆之意，或在茲乎。」其《約鄉記》曰：「此鄉何鄉，四達皇皇。山潤川媚，月湛霜明。有天叟者游處中央，宇泰定而發乎天光，四如居士一日徑造主人，叟杖藜應門，顏色種噲，而眼如點漆，舉止寒澀，若無甚技，解然不言，而四時之氣備，坐良久，沃三焦葉，情浩浩，笑云云。飲罷荐茗，商較一水兩水。建安關茶，以水痕耐久較勝負，相去一水兩水。居士曰：『昔叔度何如人，並世者時月不見，鄙吝復萌，或往從之，累日方還，莫議其將。』少間，願聞此鄉之風。」叟曰：「春之朝，綺花淨擢，香入肌骨。夏之日，竹陰清闕，門自可款。秋之月，鮮鮮寒榮，愈晚愈好。冬之雪，疏枝冷葉，怪怪奇奇。此鄉之勝致也。蓬茨桑樞，牖室褐塞。門庭藩落，皆著紙筆。一榻炷香，人意幽遠。堂上九十餘尊，含飴弄孫，眉間漏出喜色。伯仲如坡如穎，夫婦如鴻如光。此鄉之居室也；架無多書，古文六經外惟左氏語、蒙莊書、馬遷史、子雲玄、淵明、少陵詩、昌黎、柳州集，不貯他物，此鄉之簡素也；湮墨沉鼎，遺款墜刻。偶有流落，收於几案。無弦一琴，折脚一鐺，老瓦一盆，此鄉之器玩也；暑裙白練，寒衣白衲，時捉蒲葵，擲麈尾，炊雕胡飯，釀真一酒，送菊苗蠶蘆服鮓，此鄉之服食也。或安山林，枕流漱石，不纓塵垢氛，大鵬六月而有閒意；或著富貴，一龜一鶴，旁無姬侍，清規粹德，與雲俱潔；或寓京師，未嘗候公卿，門人欲卽之，終不可卽；或浮湛里閭，同鷄豚社，對田父飲，坐深而鄉黨敬，

或遇儁人勝流，飲酣論豪語，古純孝貞烈。從臾尚友，或耻徇財。馮生之夫慷慨劇詆，直欲不與同世。胸中雖竟一紙識，不肯讀人間非聖書。文雖未至小好、大好，古氣可參彖繫。詩雖不能天然可愛，口中時有稷契。輩語碩膚，几几之似周公威儀，抑抑之似衛武侃如，闐如，檐如，翼如，似夫子手之舞之，足之蹈之，似孟軻陋巷簞瓢，不改其樂，似回春暮舞雩，浴沂詠歸，似點道學自修，盛德至善，似參簡文溫理，似偃不屈其志，不累其身。夷惠之間，似蜀賢人鼓有虞琴，賡文王操，優游高明似唐儒生，此鄉之老成人也。」居上曰：「其國，其敢不知其爲人也。溫柔敦厚，深於《詩》；疏通知遠，深於《書》；廣博易良，深於樂；恭儉莊敬，深於禮；此鄉此人之謂與。雖然，願聞先生之風。」叟曰：「良如金玉，重如丘山，儀如鸞鳳，氣如芝蘭。知居士所以爲居士，則知叟所以爲叟。」居士相視而笑，乃相與忘言乎此鄉之天。」仲元讀書萬卷，其爲文，文質相參，奇不可句。元皇慶元年卒，享年八十有二。皇朝宋濂、歐陽德、羅洪先序其集。

徐確 字居易。唐正字寅六世從孫。曾祖昌嗣，以明經除秘書郎，陳洪進辟掌書記。首勸納土，洪進欲害之，遂走京師。江南平，洪進始悟其忠，乃命其弟昌圖與陳仁愿奉貢納土。確，元豐五年試禮部第四策丙科，授江陰尉。歲潦，承計司檄視田，以傷告，當減租。令不悅，白計司曰：「尉意也。」確曰：「某知驗實而已。若不實，敢避罪？」計司是確而非令，令大慚。調尉永泰，俗喜屠牛，確嚴禁之。會令子病，思啗牛心，屠者市一犢，將殺之。犢啣刀奔廨，確驗治屠人，送牛承天寺，名曰長生。既改守，時蔡京方相，故與確有舊，欲留置講議司。確辭，從吏部選，知象山縣。久之，召爲宗正丞。出使兩浙提舉常平，適大水，歲饑，確考《禹貢》三江之說，得吳淞古江以爲大湖，東注入海。吳淞江在下流，向者潮泥湮塞，水溢爲患，請自封家渡古江開洶，至大通港，直徹海口，計七十四里，役徒二百二十萬七千餘人，用常平錢米一

十八萬三千餘貫石，充和傭之費，水道遂通。明年三月詔，以役人死亡者衆，水仍爲害，百姓怨咨，皆坐貶降。後守江州。中貴人使具舟載花石，確曰：「吾州所有，糧船綱耳。」陳瓘方謫居，確時往來，且書抵蔡京曰：「瑩中久廢，宜平前冤。」入爲刑部員外郎，轉朝奉，致仕，卒。子師仁、壽仁、克仁。

師仁 字從聖。七歲過外祖家，外祖讀《霍光傳》，疑光何名不學。師仁曰：「伊尹放太甲，光不知也。」外祖大驚。年十八，與從叔昭同登第。任泉州司法參軍，調袁州司曹，召爲秘書省校書郎，被命修史，極選四人，師仁與焉。其三人者，曰倪若川，曰劉大中，曰汪藻。除編修遺史檢討官，兼次《崇文總目》。閱再歲，遷著作佐郎，得讀東觀未見書，文章益汪洋瀚肆，追配作者。有《壺山集》七十卷。壽仁，見韋布。克仁，漳浦主簿。

徐膺 字思文，亦寅後。七歲而孤，孺慕若成人。弱冠舉特奏名，奉母不仕。母病，備極扶持。既沒，摧毀骨立，負土爲墳，蔬食廬墓，時時長號慟絕，甘露一再降廬側。墳側有深塹，非役千夫不能塞，一夕有聲如雷，旦視，塹已平矣。鄰里歎異，從父吏部尚書鐸爲記。弟昭。

昭 令潮陽縣在官嚴方，守將諸司有所誅求，一切拒之。

林深之 字原叔，初名回甫，唐殿中侍御史諫之後。舉進士，調南劍州錄事參軍。侍御史張汝賢察訪閩部，見建、劍訟牒叢委，付深之理決。時他郡連起大獄，追逮相屬，二州見深之不冤，交頌其美。爲福州觀察推官，溫益知州又事事委之。深之在告，益曰：「今日廢吾手矣。」改知下邳縣，秩滿，以知開封府都廂致仕。子雱。弟冲之。

雱 以父任，補明州刑曹掾。州守毛友嚴峻爲治，付雱決讞，一不徇阿。友首薦之，改秩，歷知錢塘、

安吉一縣，遷通判福州。適朝廷計僧口給食，籍餘財輸戶部。雋以閩民貧瘠，州郡率取辦寺觀，若盡籍餘財，州之歲計必復斂民，請以餘財但充州計。府帥張澄以聞，得止不籍。終朝奉郎。

冲之字和叔。舉進士，調邵武軍司戶參軍，歷御史臺檢法官、大宗正丞、都官、金部郎，以不能阿當路，滯省寺者十年。出守臨江、南康。靖康初，召爲主客郎中，副中書侍郎陳過庭使金，同被拘執。虜初猶給乳酪，迨宇文虛中受虜命，虜亦以是邀之。冲之奮勵見詞色，虜怒，徙之奉聖州。既二年，過庭卒。虜逼冲之仕偽齊，不屈，徙上京。又不屈，置顯州極北地，幽佛寺十餘年。病亟，語同難者曰：「某年七十二，持忠人地無所恨，恨國讎未復耳！」南向一慟而絕，僧窆之寺隅。洪皓還朝以聞，詔與二子官。子郁。從子震、霆。

郁字襲休。舉進士，調解州司刑參軍。州兵以衣賜不均，訕訕謀變，郁爲言之部使，諸兵曰：「司刑生我。」再調福建茶司幹官。靖康初，建州勤王卒自京師還，求卸甲錢，郡守張動以事屬計司，持不與。衆恚，取庫兵爲亂，殺轉運使毛奎等。郁聞變，急入諭之，衆業殺轉運官，徑前取郁。郁且罵且叱，至死不絕。事聞，詔各與一子官。

震字時專。父渙之，官至朝奉郎。震累官左正言、權給事中。以論諫不得其言，遷太常少卿。歷知鎮江府。時蔡卞王夫人得請賜地，建閣儲御書，因取素所不快者腴田，并有其禾。震俾償之，王恚，上其事，朝廷移震守汝州。部使者祝林受中人旨，籍魯山民田五萬頃入御府，以爲冒耕官田五萬頃。民誘亡命，謀爲變。震遣錄事於敷諭解之，因列上其狀，詔部使者履畝定租。召人，除起居郎，遷秘書少監，卒。震志在攻京、卞，多所論列，有聲。崇寧、大觀間，自文館出守九郡，甫至，輒徙間關，道途以卒。自號

介翁，長於集句。一日，與客飲，壁間有陽關辭，客舉以侑曰：「勸君更盡一杯酒。」震續曰：「與爾同消萬古愁。」又嘗晚春至山光寺，覽觀陳迹，則曰：「青山有恨花初謝。」有問曰：「流水無言草自春。」前後所集，釐爲七卷。徐師仁跋其後，云：「胸次應餘五色線，世間爭認百家衣。」所著《禮問》三十卷、《易問》五卷、《易傳》十卷。

震 字時隱。擢第後，太宰余深、參政許將爭欲妻以女。震曰：「貴人女，安能事吾母乎？」力辭却。初爲鄧州兵曹，調烏江丞。冲之被命使金，震三上書請代往，不報，還里不仕。紹興中，秦檜以震有庠序之舊，召爲勅令所刪定官，震謂檜曰：「公何忍置二帝萬里外，博一相公耶？」檜怒，會死，得通判衢州，改湖州。未幾，掛冠去。震人仕四十年，歷官五任而已。在鄧州時，與趙不群同僚，有監司欲逞私憾，以事囑趙，趙謀於震，震曰：「吾人初委質，豈可以一生名節徇他人？」及趙知建州，謂震曰：「某平生不墮小人之域者，賴公鄧州一言也。」震博學，深象數，與鄭樵爲金石交，而林光朝師事之。聚書數千卷，皆手校讎，謂子孫曰：「吾爲汝曹獲良產矣。」莆人稱爲忠義林氏。

莊柔正 元符間知福清。嘗改築天寶陂，陂旁有大榕，柔正往董役，兼聽訟其下。凡投牒者，人負一石，曲者輸石贖罪。數月訖工，名元符陂。

黃穎 字仲實。嘗從學陳襄，質疑於孫莘老，爲襄、莘老所愛重。元祐間，舉經明行修，不就。時天下弗就舉者二人，而穎其一。適莘老爲中丞，因哲宗問及，條其學行以對。詔降袍笏，卽家起之。更三期，母促之行，始調清溪尉。歷知長泰縣、劍浦簿。郡守方全道以改官薦，力辭，請畀同列。知長泰縣，晨興治事，日中與諸生講肄。有職田穀三百餘石，悉與耕民。尋權龍溪尉，卒。二縣士民齎賻金帛，其子公

坦一無所受。公坦，舉進士，官終通直郎。〔二五〕

阮駿 字千里。祖遵，節度推官。父之才，知南雄府。駿舉進士，監台州稅。方臘犯台，率兵擊射，死其五百餘人。轉朝散郎、知建陽。建炎元年，除河南少尹，兼西京留守。金人南寇，與孫昭遠率兵拒戰，不利。以神御在府，亟收兵護神御殿。出餘兵再戰，又敗。乃抱神御指賊大罵，死之。朝廷褒贈三官，進朝議大夫。

葉居申 宣和末除通判睦州，道聞方臘寇發，從吏勸勿行，曰：「叱馭何人？」前與戰，不利。衆欲擁之去，不可，遂死之。

蘇燁 字天寵。與弟械同入太學，聲華籍甚。同登元符進士，提舉成都府學事。乞便親，移節淮東。時械適提舉淮西，迎父迭養，兩淮人榮之，爲築華萼亭界上。人爲國子司業，所取程文不合新經，坐補外，知泉、福、建三州。召爲禮部侍郎，丐祠祿。欽宗卽位，再以禮部侍郎召。時適多故，戒諸子曰：「不能死君而竊其祿，非我志也。」乞致仕，加大中大夫，充徽猷閣待制，卒。械，仕終國子司業。其人太學時，以書謁蘇軾。軾喜，延之與序宗盟。孫績。

績 以遺澤補官，知沙縣。時有黔涅者數十百，操戈鼓譟出。績束帶盛服，徒步，令三數輩前導往，衆知爲績，却立不敢動。績曰：「長官獨不可白，乃弄兵俱死耶？雖然，汝卽一來，尚能活汝。」明日皆來，悉言狀，得所三名於庭下，撾殺之，餘置不問。林光朝銘績墓，稱其爲海內豪雋。

余祖奭 字景召，初名祖禹，唐校書鏞之後。未冠，補太學生，爲學官鄭穆、范祖禹及同舍生胡安國、宗澤所器愛。登進士，通判建州。鄉人林學淵母老，遠倅邠，慨然請易之。自邠移蘭，會地大震，公私廬

舍陷拆，祖奭若有神護，置隙地。乃亟拯傷扶殘，瘞死賑饑。代還，主管福建轉運司文字。屬葉儂叛，挺身諭賊。以功轉南恩州。海寇卓全高沿海焚掠，祖奭內嚴控制，外示閒暇，賊不敢犯。召對，指陳時弊，忤相檜意，引疾乞祠歸，封文安縣開國男。祖奭居母喪，廬墓。父喪，過時毀瘠，甘露降塋林者兩月。子武弼、武揚。

武弼 紹興四年中法科第一，移福建檢法官。時臨汀嘯聚，成擒多武弼之策。轉知南安縣，民甚戴之。以父老，力乞歸。

武揚 始任福州司理參軍，與守王之望爭獄，納官歸。子秀實，知衡州。孫師魯，添差浙東路安撫司參議。師魯子謙一。

謙一 字子同。與弟士明連中江西漕試，而謙一第咸淳進士。調泉州石井書院山長，累知化州。人元不仕。好爲古學，辭語混成警切，名文章家。士明亦以進士得官，知南安縣。

徐漑 字叔清，宣奉大夫銳之子。以世賞入仕。高宗幸維揚，虜騎侵逼，臣僚奔潰。漑以國子監丞護駕渡江，殞於難。紹興初，授將仕郎，官一子。

李德昭 字子晉。歷知和州。朝廷議選常平官，令赴闕親諭遣之。諸路凡八人，德昭提舉廣東，賜對稱旨，留除度支郎。建炎初，差知建州。建卒三百人先屯廣州，至是聞葉儂賊平，徑還郡。官疑其從叛，請殺之。德昭力請，全活。苗傅、留正彥敗走人閩，韓世忠追獲正彥於浦城，而傅逸。德昭分兵遏守，獲之，檻送京師，功爲提刑林杞所攘，僅轉朝奉郎。尋謝病歸隱，築庵名「待盡」。戒諸子毋得蔭叙占仕版。建人祠之白鶴山。從曾孫丑父。



丑父 字良翁。父宗之，通判邵武，博學多文。丑父文學如其父。擢端平第，調邵武司戶參軍，添差通判福州。嘗攝福州教授，上聞其來，皆喜，遂兼領學事。移建寧府，就攝學事，除太學博士，遷諸王宮教授，坐忤丁大全罷，予祠。遷著作郎、權禮部郎官。班對，草兩疏，首言苛征、戚畹、贖貨、聽讒四事，次言競、侈二習。理宗悉嘉納之。請外，提舉湖南常平義倉。直冤獄，決滯訟。西全、寶慶兩守貪虐，方擬疏論，事露，爲臺疏劾罷，畀祠，卒。丑父篤實清修，胸次洒然，與人無新故，一語必用情。所得祿賜僅自給，而銖積其餘爲義廩，與弟侄共之。詩文新潤，有集藏家。

宋旅 字廷實。累朝奉郎、知剡縣。方臘既陷歙、睦、杭、衢、婺五州，且犯越，越盜亦起應之。旅繕城固守，以忠義激士。俄盜大至，旅躬冒矢石，雖頗殺獲，以不敵死。事聞，贈朝散郎，錄其四子。

吳公誠 字君與。舉進士，調古田尉。政和初，林利等寇山谷，公誠將數卒擒利置法，盡散其餘黨。以功改承奉郎，轉朝奉大夫，致仕。歷官三十年，凡家用所須，悉因鄉里市致，不取之民。奉祠時，計所受俸日費之外，餘悉歸公。二子：廷表、廷秀，皆以父任得官。

廷秀 歷知德慶府。劇賊李全劫湖南，乘勝擣嶺外，直抵晉康，廷秀率吏民募僚丁拒守。賊薄城下，勁弩齊發，斃其二酋，分騎追擊，郡以無事。事聞，轉兩官。

〔校記〕

〔一〕「慎言」二字，各本原脫，據《方慎言傳》、《方通傳》補。

〔二〕「慎從」二字，各本原脫，據《方慎從傳》補。

〔三〕「禧」，各本原作「僖」，據卷一百五「宋科第」及其父行輩用字改。

〔四〕「橫」，本傳作「擴」。

〔五〕「符從侄東叔」，〈方符傳〉東叔爲符從弟。

〔六〕「慎言」二字，各本原脫，據〈方甸傳〉補。

〔七〕「昀」字，各本原脫，據本傳及〈方子容傳〉補。

〔八〕「翥」字，各本原脫，據〈方翥傳〉補。

〔九〕「隱」字，各本原脫，據〈黃隱傳〉補。

〔一〇〕「侄孫續」，下文作「孫續」。

〔一一〕「棄大」下，疑有脫文。

〔一二〕「益王」，各本原作「廣王」，據〈宋史·益王傳〉改。

〔一三〕「方」字，各本原脫，據傳記目錄及本書體例補。

〔一四〕「仲字曾孫」，〈方翥傳〉作方翥曾孫。

〔一五〕「通直郎」，各本原作「通直節」，據〈宋史·職官志〉改。

# 閩書卷之一百七

英舊志 縉紳

興化府 莆田縣三

宋

有傳

宋 宋棐子煜，曾孫翹，從子藻。藻孫鈞。黃宣 李持正孫揆。陳膏子煒。方漸孫其義，曾孫應發，（一）族孫阜鳴。

游輔 陳鶴（二） 王晞韓弟晞亮。晞亮曾孫太冲。族子悅。許搏 林廷彥 歐陽直卿 陳俊卿子守、定、宏，從

侄孫文龍、璜。龔茂良子晟。李次辰 鄭耕老 陳大年 劉夙子彌正。彌正子克莊、克遜、克剛。彌正侄晟。夙

弟朔。（三）子起晦，（四）孫希仁。（五） 劉洵直 黃弼 郭義重 陳宇

宋 宋棐 字材成。建炎初知餘干縣。盜張遇驅掠向餘干，棐率民臨水植幟、聲鼓，若將出迎敵者，盜疑引去。徙知邵武縣。盜毛涅龍、范汝爲者初出就招，所過需丁壯負擔，小拂意卽屠啖之。棐令民空縣遁，寇見縣虛，夜群譟持兵直入棐卧內，棐徐起喻遣之，不爲調一夫。紹興中，人爲金部員外郎，扈從幸建康。時方用張浚、韓世忠圖恢復，棐請詔中外臣僚，不時薦舉勇略之士。因留總大軍錢糧調度，兵食不擾。

而治。爲秦檜所忌，予祠。起知通州，以治最聞，用薦累遷主管淮東安撫公事，召爲太府少卿，充金國迓送正旦使。還，錄其語以聞。高宗嘉其專對，遷太常少卿。自南渡後，典故多出有司省記，至恤章文諱不錄。屬章太后崩，斟酌一出其手。權禮部侍郎，出知紹興府，兼浙東安撫使。明年，虜人淮甸，聲搖近輔。裴鎮以無事，一方晏然。力析去，除敷文閣待制，提舉江州太平興國宮，凡五年，上章納祿，以通議大夫致仕。卒，贈少師。子煜，歷知循、賓、惠三州，皆有惠政，官終朝議大夫，直徽猷閣。曾孫詡。從子藻。

詡以祖蔭入官，知程鄉、歸善二縣，撫字無擾。通判汀州，史彌遠當國，罷歸。端平初，起判廣州。摧鋒軍士作亂，帥臣曾治鳳棄城遁，詡戮力備禦，且以聞於朝，朝旨命崔與之領帥事，詡佐與之，開門延敵，賊奔循州。與之薦詡知州事，勞軍平寇，簡徭薄征，通商裕民，流移復業，開渠建橋，美績大著。循人立生祠於學宮。官終直煥章閣，知潮州，未上，卒。

藻字去華。紹興初試禮部，進《中興十君論》，遂以布衣召見，占對如響。高宗欣悅，欲爵以京秩，試編修官，政府以上書不先白阻之，僅注廬陵尉。既進士，改邵武軍教授，添差福建轉運司幹官。詣闕上書，指陳時政，又牴牾故相，累年不調。久，乃補英州學官，改知益陽縣。進時議二十篇。除江南西路轉運司主管文字。會金亮渝盟，朝廷分遣屯戍，以藻充湖北京西招討司機宜，與主帥分畫形勢。虜犯信陽，果一覩而退，不敢復窺漢上，乃悉引兵瞰瓜州。藻復言主帥奏乞悉艦防江。虜既殺亮還，朝廷以五招討使追襲，藻至楚泗，知虜班師有律，恐我軍深入昧利，馬上占奏，上之。高宗卽命班師，擢知江陰軍。金兵繼擾淮甸，居民日夕渡江。藻勞來安集，至者如歸。金兵既退，諸州疫癘盛行，獨江陰無恙，父老守闕上

狀。孝宗卽位，除提舉浙東常平茶鹽公事。至則築梁湖廢堰，更創三衢義倉，罷猾胥六百餘人。永嘉有風濤災，藻躬行阡陌，瘞死骸，發粟寬租，捐竹木稅。四膺召對，孝宗嘉其勁直，無不開納。坐彈劾温州守臣，爲權貴所擠，丐祠歸。藻自布衣從主，以忠鯁自奮，剛毅寡合，雖妻子不見其笑容。居官以身臨民，未嘗少自恕。後除守漳州，提舉江東，不拜。結廬先塋側，讀書自娛，所著有《群經滯穗》百篇。年八十二卒。臨沒告諸子曰：「平生無負所學，老矣何恨？但《易解》未成耳。」贈大中大夫。孫鈞。

鈞 字茂洪。舉進士，調晉江尉。捕盜有方，改授荆門軍簽判，移廣德軍。究徵賦源，委告部使者，裁其額。知南海縣，考核丁口登耗，吏不敢上下。育秀鋤奸，政聲突起。通判饒州，會楮幣更奉行，督迫告訐滋熾。鈞疏言展收換之期，寢編籍之科。坐忤時相，貶。後擢知嚴州，諸邑無名征斂，次第蠲捐。被召總領淮東軍馬錢糧。虜人光州，疏陳攻戰方略。又議移沿淮諸軍進屯邊面，以圖中原。加司農少卿，改知泉州。州舊爲台、信、建昌、邵武包納上供銀，大爲民病，奏乞用初賦，從之。創局救荒，所活萬計。除海苔、蠟房、葵葉、鹽鮓等稅，捐俸代輸畸零戶，民畫像祀之。以父喪歸。服闋，直顯謨閣，經略廣東，進秘閣修撰。以蛋族悍戾，刺爲權卒，戍壽昌，南人善水可用也，且除境內盜，又免番更之勞，一舉三得。會虜擾淮甸，朝廷以鈞暢曉淮事，趣還。未行，卒，年五十八。鈞警敏精厲，學問以行己爲本，濟世爲用。三國六朝得失成敗之數，歷歷如身履。凡江淮攻守大勢，援古証今，具有本末。子應先，通判泉州。

黃宣 任辟雍博士，出知遂平縣。時李彥附蔡京，力助公田，脅制州縣。有奸民乞籍遂平之租以供延福內藏，三奉御札專委按勘，宣三執奏，中使到縣覆實，扞之以免，繇是蔡州十邑，遂平獨無公田。召爲太學博士，卒。靖康初，梅執禮、孫傳等列奏，言：「附彥之人，朝廷旣皆貶黜，如宣輩，宜加褒表。」詔與一

子官。

李持正 字季秉。少與諸父宗師馳名太學，號大小李。歷知德慶、南劍、潮陽三縣。在南劍日，魔寇入州，將領急捕，持正憫民愚陷擒，戮魁渠，餘令歸業。終朝請大夫。子三人，皆以父官。孫揆。

揆 以祖澤尉於潛。屬孝宗爲高皇舉慶，內外臣僚皆得獻牋表賦頌，揆上《頌堯賦》，文詞藹鬱，宣付史館。改永春縣，轉通判泰州。陳俊卿愛其藻才，欲大薦用，未任卒。

陳膏 初爲邠州教授，佐守臣張克猷捍金。後知惠州，賊寇犯惠，經略使連南夫會兵攻衮，弗克。膏單車詣，降之。官至太府少卿。徙居明州，鄭僧王法恩謀逆，事覺，或請屠城。膏時爲御史，力論之，脅從者得見寬。子居仁、煒。居仁竟家於明州，見裔派。

煒 字光仲。淳祐中爲監察御史，首論執政。有令換疏者，煒曰：「斷頭可了。」除太府少卿，不拜，而行召奉事，力辭，除廣東轉運判。

方漸 紹興中判韶州，知梅、湖、南恩，積官朝散郎。平生無千金之產，而好積書。所至挾書自隨，不解衣而寢。林光朝質之，答曰：「夜或有尋討，便不懷安。」其榜藏書之閣曰富文，人稱富文方氏。子林，鄉貢進士。孫其義。曾孫應發。

其義 字同甫。工詩文，好關、洛諸書，與族子阜鳴齊名太學。嘗受業金壇王遂家，一日心動，裹裝徑歸，未入門而母沒。終從仕郎。

應發 字居節。歷宗學諭、史館校勘。主別頭試，時相丁大全有密客，力囑以子，應發峻却之。除太學博士。董宋臣方用事，與學官徐庚金等六人伏闕言，不報。補外，添差通判建寧，召除國子監簿，復申

前請，語益峻切。時賈似道爲相，遣幕客諷應發爲文獻壽，不答。坐罷去，尋起潮州。適潮陽盜起，應發急赴郡招撫，皆帖服聽命。召人，兼權禮部郎官、國子司業，出知漳州。賊尤猖獗，聞應發威名，投戈効順。吉賊鍾先，久窟漳之磐山，及是遁去。應發以其地爲定南寨，不禁民簪。龍巖巨賊關維石亦聞風遁汀界，而應發必捕擒之。會除江東提舉，未行，亟劾易老謬戍將，薦有威望者爲統制，雖爲所擠，坐劾予祠，竟擒賊乃歸。奉祠里居。仙游賊熾，傾困出帑廩犒兵士，登陴指揮，悉就俘馘。德祐初，除國子司業。景炎時，累陞禮部尚書，以端明殿學士充福建招捕使。應發以文章進身，而排難拆衝有過人者，遇事剛果決烈，有奇男子風。獨陳文龍繕守興化時，勸文龍降元，文龍手劍而逐之。宋亡後十年卒。

阜鳴 字子默。父秉白，見韋布。阜鳴，嘉定中調泉州僉判，時真德秀爲守，阜鳴嘗言：「滅門刺史，破家縣令，此衰世事。古人惟曰：『愷悌君子，民之父母』而已。」德秀擊節嘆賞。改鎮南軍僉判，阜鳴宿儒，而兢抑特甚，居官秋毫不苟取。德秀恨其仕晚而用違。

游輔 歷知潮陽縣。值梅州猺賊起，朝廷以輔威名，特除知梅。比入境，群盜斂跡。以憂改官，起復，知象州，卒。

陳鶴 字聞野。調海陽尉，授建安丞。秩滿，簽判惠州，與守吳達老大興學校。鶴親典教，執經者歲數百人。捐判廳合得錢，置田以增廩，表置學官。惠文彬彬，倡自鶴始。轉廣州通判。海寇猖獗，帥遣鶴督捕，鶴斂兵寂若，俄而掩襲三百，原有二百餘人，以止貪誅。踰年卒。

王晞韓 莆田令保隆之後。紹興間，樞密樓炤宣撫關陝，辟爲屬，遷改京秩。屬朝廷欲借兵西夏，犄角金虜，差管押生蕃三百餘口歸夏國，道無疎虞。累遷大理少卿。方廷賓宣諭陝西，贈之詩，晞韓和之。

曰：「誰憐定遠不生還，驛騎翩翩出漢關。未肯西風回馬首，要傳飛檄過千山。」秦檜方主和議，深嫉之，且誣置之死，朝廷憫其勞，移潯州。赦歸，卒。弟晞亮。

晞亮 字季明。歷建汀教授，福州宗教，遷太學錄。時秦檜爲太學正，素知其行藝，及當國，除勅令所刪定官，（六）權太學博士。已，察其不附己，罷授福建安撫司幹官。會山寇發，請兵於朝，帥委晞亮從軍，俾授方略。時大將馬鈴、韓京不相稟承，最難調護，晞亮周旋其間，處置得宜。諸將或陷賊，或罔上，晞亮以輕重論罰，功罪明允，以故，俞徹明、五里龍數年逋誅之寇，皆束手請命。諸司列薦，檜憾不釋，差通判江州，復判台州，流落二十餘年。檜死，始以國子博士召，除吏部郎官，奏乞優取經義之士，以十分爲率，詞賦人才不得過三分。累遷工部侍郎，兼國子祭酒，除給事中。金亮據淮甸，晞亮舉李寶於偏裨中，以爲水軍統制，卒焚虜萬艘。尋忤權要，出知漳州，更以秘閣修撰致仕。晞亮天性忠純，爲高宗所器。自謂立身當有本末，最惡進不繇道，故多積忤於世。前後哀集所作五百餘篇，號《過庭遺錄》。子五人，皆蔭補官。曾孫太冲。

太冲 字元遼。歷湖北、浙東提刑司檢法官，讞議平恕。知吉水縣，兵饑，按產數羅，官不抑價，巨室樂從。挂帥趙師恕辟經略司幹辦公事，會宜卒據城叛，以帥檄攝州事，并力夾攻梟賊，全城。知梅州，改大宗正丞。輪對，言：「陛下何不以太平責宰相，以謙言責臺諫，侍從，以富強責主兵財者？」又言：「漢桓帝時，魏桓被徵，鄉人勸行，桓嘆曰：『後官千數，今可損乎？厩馬萬匹，今可減乎？左右權豪，今可去乎？』遂隱不出。今之君子得無發魏桓之歎者？」除考功郎中，以郎中班對，言括田權契、遣使興利非便。兼實錄院檢討官，輪對，言：「須考太學秋試，參詳省闈。論體貴精圓而今粗疏，策體貴明整而今繁



元，賦引語錄殆類方言，宜有以變之。」理宗稱善。奉祠，除知汀州，需次卒。太冲少擅聲律，多通古書，俸人奉親，餘共諸弟，惟以理學爲質俚而非之。

悅 字習之。與晞韓同族。嘗被召見，論駁講和，孝宗稱善，除國子監丞，兼吏部員外郎，出知衢州。州旱饑，發廩勸分，竭誠禱雨，早晚一粥九十餘日，有「願減十年之算，化爲三日之霖」之語。纔得雨，卒，民哀之，爲立廟塑像於徐偃王廟，大書二語於麗牲之碑。事聞，贈直龍圖閣，（七）衡廟號王龍圖祠。

許搏 字公執。調泉州教授，以參政謝克家薦召對，累遷監察御史。綜察無苛。南渡後，典籍文物十不存一，當科舉故事靡稽，特遷禮部員外郎。搏辨決真偽，士流清肅。初，忤秦檜，檜得政，丐祠，以宣教郎終。

林廷彥 字朝美。一作姓許。調臨江尉，臨一作連。改永春縣。當官俸餘，不入私室。屬草寇猖獗，代者辭難，廷彥獨當之。在永春凡四考，百里按堵，下民賴焉。

歐陽直卿 字溫叟，四門詹之後。少嗜學，能屬辭。調劍浦簿。張魏公浚鎮福州，檄決長樂縣滯囚，薦爲惠州軍事推官。白郡守以河源餘菽麥令輸送，而海豐瘠土聽人直，自是爲故事。自清漳以南山谷多剽鹵，龍川卒有警，分屯守將不卽援。直卿走龍川，面數纖悉，歷涉阻隘，民吏皆感慨，爲擊賊。改知漳浦縣，簽判惠州，轉判台州。直卿能才素著，所至易治。

陳俊卿 字應求。紹興八年進士第二人，授泉州觀察推官。秩滿，改宣義郎。故事，第二人再調，卽爲館學清選。而俊卿以不附秦檜故，第調南外睦宗院教授而已。丁內艱，尋通判南劍州，未行，檜死，乃以校書郎召。孝宗方爲普安郡王，高宗特命俊卿著作佐郎兼王府教授輔導之。王好鞠戲，俊卿誦韓愈諫

張建封書以諷。累遷監察御史、殿中侍御史，數論事，高宗稱善再三，遂劾奏韓仲通、劉寶二人抵罪，公論快之。湯思退秉政無狀，俊卿與同列論罷之。同列共議請褫思退職，俊卿曰：「事貴適中，祖宗時免相恩禮未可殺也。」遂不復論。金虜自燕徙汴，謀使人寇，而楊存中久握兵柄以衰斂，交結得幸，士卒嗟怨。俊卿劾奏存中罪狀，語甚切，高宗爲奪存中兵。又言：「虜人窺伺，其意叵測，兩淮藩籬未固，荆襄聲勢不接，宜擇近臣有威望者盡護荆襄諸將兵，假以它用。陰遣間使往來江上，密問諸將計策，或令各遣心腹赴堂稟議，使諸大臣從容延問，詰難往復，以盡其情，參酌去取，以定其論，庶幾緩急內外相應。其他則選練犒賜，以作士氣；擇吏蠲賦，以輯鄉兵；修城築壘，以嚴保障。而大要則在朝廷處置得宜，有以服人之心，而陛下益堅睿斷，無以憂疑自爲退沮而已。」是時，虜人侵軼之勢已形，而江淮備禦之方未講，大小惴惴，莫敢發言。俊卿力言，且蚤置統帥，使擇間探，遠斥堠，謹烽火，修城池，以待其變。而當是時，莫有堪其選者，中興舊臣惟張浚無恙，方困讒口，謫居湖湘，中外物情，翕然歸之，高宗尚以爲疑，不肯用也。俊卿疏薦甚力，高宗首肯。久之，內侍張去爲陰沮用兵之策，且陳避狄之計，俊卿抗言，請按軍法斬之。高宗愕然曰：「卿可謂仁者之勇。」除權兵部侍郎。竟用浚守建康，如俊卿策。既，邊報益急，王師始北渡江，屯據要害，而用兵之意猶未決也。俊卿言：「今守禦略備，士氣亦振，若得虜人便離巢穴送死而來，以吾重兵與之相持，而別遣銳師分出，以擣其虛，虜成擒必矣。臣之所慮，獨恐其知吾有備，僞以利誤我耳。然彼或出此，而吾能益嚴備禦，修築營壘，大開屯田，以爲久駐之基，俟其退歸巢穴，然後姑與之和，此則猶爲中策。但恐淺謀之士，苟於目前，更勸受其甘言，反以今日之計爲非是，遂斂兵增幣，墜其計中，則爲無策，而大事去矣。」虜兵尋果渡淮，俊卿受詔措置浙西水軍，李寶遂有膠西之捷。俊卿因勸上幸建康，指

授諸將方略。高宗戒嚴，未發，而虜軍自亂，殺其主亮，歸。詔俊卿措置淮東堡寨屯田。虜中更立新酋，遣使來申舊好。朝廷方議酬答之宜，而議者或謂得故疆實利也，正名分虛名也，朝著多附其說。俊卿亟上奏曰：「陛下前日和戎，計非得已。虜使來，正審事機、正名分之時。若以得故疆爲實利，則得之未能必守，是亦虛名而已。豈若因此先正名分，名分一正，雖未能即復中原，遽謁陵廟，亦足作頽墮之氣，慰神靈之心。矧今虜人挫衄之餘，急於自定，汲汲求和，情亦可見，是豈能復以強大之勢，取必於我如前日哉？當此機會，臣以爲非獨名分可正，而歲幣亦當可減，惟在朝廷先定規模，有以俟之。」因策選將練兵，并圖上兩淮戍守屯田事宜。又請戒諸將，申嚴逃叛之法，擇文臣之有膽略者以爲諸將參佐，察軍政，除宿弊，因習戎務，以儲將才。其言甚悉。孝宗受禪，慨然有恢復志，屬張浚閩外，以俊卿忠義奮發，沉靜有謀，特授中書舍人，以本職充江淮東西路宣撫判官，兼權建康府事。時吳璘將蜀漢之兵北征秦隴，雖頗略定城邑，而勝負久不決。俊卿爲浚言：「請襲虜以分其勢，因請分遣兩淮舟師出其不意直擣山東，則彼必還西師自救，而璘得乘勝以定關中。我又及其未至，長驅深入，潰其腹心，不世之功可立也。若其有備，我回驕轉施，亦信宿可還耳。」奏人，會朝廷有力主和議者已詔璘班師，俊卿計不行。其冬召人奏事，既對，面賜金帶，會給從臣筆札，條上時弊，俊卿復陳十事。隆興改元，都督府建，改參贊軍事，力辭建康，得免，別除禮部侍郎，領職。浚初大舉北征，俊卿以爲不若養威觀釁，萬全而後動，浚從之。會諜報虜多聚糧邊邑，諸將以爲，如此，則其勢秋高必來，不可當，不若先其未動舉兵破散之。浚以爲然，請於朝。出師，幕府次盱眙，大將李顯忠、邵宏淵連下虹縣、靈璧，遂將乘勝長驅。俊卿曰：「盛暑興師，深入敵國，兵家所忌，宜亟還。」浚復然之，亟檄召顯忠，則顯忠等已進破宿州，而虜大發河南之兵來矣。顯忠身出塵

戰，城下殺傷過當，會夜，兩軍不相聞知，各驚潰去。道路流言以爲官軍死亡數萬，賊且乘勝南來，素主和議者又侈其說，以搖衆心。俊卿從浚駐兵不動，潰兵聞之，稍稍來歸。計所亡失，實數千人。浚檄俊卿亟入奏，且勸孝宗勿搖浮議。俊卿見孝宗，具道其事。浚抗章待罪，俊卿亦奏請從坐，詔皆貶秩兩等。湯思退復相，諫官尹穡陰附思退，建議罷浚都督使，復以宣撫使治揚州。俊卿上疏曰：「朝廷果以浚爲不可用，則罷之，而更屬賢將可也。若猶欲責其後効，則貶官示罰，亦古法也。乃使之去都督甚重之權，居揚州必死之地，凡所奏請，臺諫又從而沮之，如此則人情觀望，無不解體。願下詔書戒勅中外，相與協濟，使得畢力自効，贖其往愆。如度其終不可用，則請先治臣阿黨之罪，而後改圖。」疏上，未報。又奏言：「陛下必以浚爲不可復用，則請速詔中外，別求智勇可代者拔用之。不然，勿加沮撓，使得支吾，畢此殘歲。」詞益懇切，孝宗感悟，卽詔浚復開督府，卒召相之。然不數月，竟爲思退、穡等所擠，而俊卿亦累章請罪。明年，除寶文閣待制、知泉州，復以自請提舉江州太平興國宮。思退貶死，孝宗思俊卿言，而太學生數百人伏闕下拜疏請起之，詔復命知泉州，未至，召赴闕。以乾道元年入對，撫勞再三。俊卿引歐陽修、司馬光之言，極論朋黨之弊，願詔大臣並用恩仇，兼忘物我。又勸孝宗察群情所甚欲者行之，所甚惡者去之，捐其所甚愛，謹其所可戒，審真偽，辨忠邪，從諫任賢，以格天心，以作士氣。除吏部侍郎，尋兼侍讀、同修國史。嘗言：「本朝之治，惟仁宗最盛。願治心修身，專以仁宗爲法。」又言：「今日積弊千條萬端，朝廷非不知之，而不能革者，蓋大臣受任不專，用事不久，不能以一身當衆怨，而風俗頹弊，人各有心，有所建立，輿訛造訕，百計傾搖，必罷乃已。願詔大臣力任此責，力行堅守，必冀有成效。」又言：「人材，國家命脈。而論材，當以氣節爲主。祖宗盛時，作成培養，名公巨人爭以氣節相高。自蔡京、秦檜用事，摧喪略盡。」

太上更化之初，力救其弊，未能盡革。臣願陛下深以爲念。」於是孝宗顧俊卿甚厚，蓋有意於大用矣。會錢端禮起戚里，秉政，駸駸人相，館閣之士上疏斥之，皆爲所逐。工部侍郎王弗陰附端禮，建爲國是之說，以助其勢。俊卿力詆其非。〔八〕翌日，進讀《寶訓》，適及外戚事，極言本朝家法，外戚使不預政，陛下所宜謹守。孝宗首肯久之。端禮繇是深忌，諷使求去。除寶文閣直學士、知漳州，改建寧府。中書舍人閻安中封還詞頭，力爲請留，命復下，安中竟得罪去，而端禮卒不相。在建期年，治用寬簡，省節廚傳，官無浮費。三年，執政請徙帥江東，孝宗稱其鯁亮，召赴闕。既至，人對，而諭曰：「卿前去國，蓋有譖卿者，卿無一語自辯。朕益服卿厚德也。」授吏部尚書，遂從容言：「今日人材衰少，士氣不振，若必求備，遺賢多矣。要當君臣一意，公聽並觀。」又言：「一時弊政可更，而祖宗成法不可改。就所當更，亦必計審議熟，使其可守不變。」又言：「州縣間號能吏者，往往務爲急刻，專以趣辦財賦爲功，而視撫字聽斷爲不急。其間有斂羨餘之獻者，非增市征，則督逋賦。朝廷不察，反謂有才，願有以深戒戢之。」時孝宗猶未能解糶戲，又將游獵白石。俊卿上疏力諫。後數日，人對，孝宗迎謂曰：「前日之奏，備見忠讜。」俊卿再拜謝。孝宗曰：「朕久知卿忠。」十二月，受詔館北使，遂拜同知樞密院事，兼參知政事。首薦陳良翰、林栗、劉翥等五人。時龍大淵、曾覲以舊恩竊寵，士大夫頗出其門。及俊卿館伴，大淵爲副，公見外，〔九〕未嘗與交一言。大淵造門納謁，亦謝不見。及除右史某，淵、覲共漏洩省中語，俊卿奏事面質上前，而孝宗遂出二人於外，中外快之。孝宗以當郊有雷震之異，內出手詔戒飭大臣，宰相葉頤、魏杞坐免，俊卿亦俟罪，不獲命。越數日，遂除參知政事。從臣梁克家、莫濟俱求外補，俊卿奏二人皆賢，其去可惜，蓋近列中有以騰口交關，致二人不安者。於是遂與同列劾奏洪邁姦險讒佞，不宜在人主左右，罷斥之。亡何，蔣

帝以憂去，俊卿獨持政柄。尋兼知樞密院事，即奏言曰：「臣自叨執政之列，每見三省、密院被內降指揮，苟有愚見，必皆密奏，多蒙開納，爲之中止。然比及如此，已爲後時。今以參預首員奏行政令，欲乞自今內降恩澤有未允公議者，容臣卷藏不示同列，即時繳奏，或次日面納。」孝宗曰：「卿能如是，朕復何憂？」每勸上親忠直，納諫諍，抑僥倖，肅紀綱，講明軍政，寬恤民力，用人之際，隨才任使。龍大淵死，孝宗憐曾覲，欲召之，俊卿曰：「自陛下出此兩人，中外無不稱誦聖德。今若復召，必大失天下望，臣請先罷去。」孝宗遂止。同知樞密院事劉珙進對語切，遂忤上意，既退，御筆除珙端明殿學士，在外官觀。俊卿即藏御札，密具奏，請留珙再三。孝宗色悔，久之，願業已行，俊卿請與珙大藩，以全進退之禮。孝宗乃以珙爲江西帥。既退，又自劾草奏抵突、被命稽留之罪。孝宗手札固留，俊卿請益堅。制授尚書右僕射、同中書門下平章事，兼樞密使。俊卿爲相，以用人爲己任，所除吏皆一時選，或才可用而資歷尚淺，即密薦於上，有忽被召對、改秩、除用，而不知所自者。時虞允文宣撫四川，俊卿薦其才堪宰相。孝宗即召允文爲樞密使，拜俊卿左相，以允文爲右相。既而，孝宗頗向允文，俊卿亦數求去，遂以觀文殿大學士知福州，兼福建路安撫使。俊卿治福州，政尚寬厚，而嚴於除盜。遷銀青光祿大夫，力辭，不許。又明年，力請閑，遂以提舉臨安府洞霄宮歸第。淳熙二年，再命知福州，辭不得，請乃行。民習其政，不勞而治。久之，會州校有部綱至在所者，孝宗召入，問俊卿治行甚悉，即降親札撫勞，賜以帶笏、香藥。三年，太上皇帝聖壽七十，頒慶字內，俊卿以紹興從官，特轉金紫光祿大夫。四年，復累章告歸，除特進，提舉洞霄宮。五年，起判隆興府，未視事。改判建康府、江南東路安撫使，兼行宮留守，且詔赴闕奏事。既至，入對垂拱殿，孝宗改容加敬，命坐賜茶，宣問款至。俊卿因舉一時朝政，爲孝宗從容言之。賜金器、犀帶、香茶，命二府飲饌浙江。

亭。俊卿去建康，至是蓋十五年，父老喜其重來，所在焚香迎拜。至則罷無名之賦，嚴治軍之食。每聞邊面利害，無不論奏。尋上章請致事，答詔不允。孝宗又手札付三省，除少保，加恩判建康如故。八年，請老，累詔不允。請益堅，除醴泉觀使，進封申國公。九年，以年七十謝醴泉俸，復申前請，表五上，孝宗手批卻之。是歲，親祠，召人陪老，俊卿力辭，三表告休。詔以少傅致仕，進封福國公。十一年十月七日，以俊卿生朝，遣使賜手詔、金器、香藥。十二年，又詔陪祀南郊，且以增太上尊號，來歲當行慶壽之禮。俊卿疏辭，復手札促至，竟懇辭。慶典告成，冊拜少師，進封魏國公。十三年冬，疾革，遺表無求恩澤，惟以選用忠良、恢復境土爲請。卒，孝宗嗟悼輟朝，贈太保，令本路轉運司給葬事，賜謚正獻。子守、定、宓。

守 字師中。寬宏剛直，用蔭補官，歷太府寺丞、工部員外郎，凡六授郡符，三持使節，俱以廉靖介持稱。晚爲將作監，卒。

定 字師德。年十二三已知爲己之學，林光朝與之特甚。既長，與其兄守、弟宓、從兄址等，俱從學朱文公。文公告以聖賢之學，必自近而易者始，遂反求之。平生未嘗應舉，以父任爲右承奉郎。卒年二十五，文公銘其墓。址，字廉夫。父寔，福建帥參。址幼知志學，亦以蔭補承事郎，卒年一十八。

宓 字師復。少及朱文公之門，長從黃榦游。以父任歷泉州南安鹽稅，主管南外陸宗院，再主管西外，知安溪縣。縣陡絕一隅，商旅不至，唯貧困無聊之人，僦力藝事，往來山谷間。秋冬之交，疾病交作，相望偃偃，無所棲止。其或託廬以息，居民恐其遂死，驅去恐後。宓立安養院以待之，取廢寺粟若干粥之，爲惠民局以藥之，病瘡則裹糧送之，死則棺葬之。盡心所及，盡力所爲。縣各色錢不係上供，例以歸官，吏進宓，宓曰：「人縣卽爲官錢。私有，賊也。」卻之。良久曰：「此一例字，壞許多賢士大夫。」安溪士

民不名爲令，而尊之曰復齋先生。嘉定七年，人監進奏院。天不雨，上言：「宮中宴飲或至無節，非時賜予爲數浩穰，一人蔬食而嬪御不廢於擊鮮，邊事方殷而椿積反資於妄用，此宮闈儀刑有未正也。」大  
臣所用非親卽故，執事擇易制之人，臺諫用慎默之士，都司樞掾，無非親暱，貪吏靡不得志，廉士動招怨  
尤，此朝廷權柄有所分也。鈔鹽變易，楮幣秤提，安邊所創立，固執己見，動失人心。敗軍之將，躡躑殿  
巖，庸鄙之夫，久尹京兆，宿將有守成之功，以小過而貶，三牙無汗馬之勞，託公勤而擢，此政令刑賞多  
所舛逆也。若能交飭內外，一正綱紀，天且不雨，臣請伏面諫之罪。」奏人，丞相史彌遠不樂，而中宮慶壽、  
三牙獻遺爲之罷卻。尋遷軍器監簿。九年，輪對，言：「人主之德貴明，大臣之心貴公，臺諫之言貴直。  
陛下臨政雖勤而治功未舉，奉身雖儉而財用未豐，愛民雖仁而實惠未徧，良繇上下相蒙，務於欺蔽。匭奏  
囊封，有懷畢吐，陛下任近臣差擇，是有意於行其言也。而有司惟取專攻上躬與移咎牧守之章，騰播中  
外，以答觀聽。今赤地千里，蝗飛蔽天，如此可畏，猶或諱晦以早不爲災、蝗不害稼，其他誣罔，抑又可  
知。臣故曰人主德貴明。大臣施設，浸異厥初。凡建議求言之人，則以他事逐，諫官言事稍直，則以他職  
徙。忠憤者指爲不靖，切直者目曰沽名，衆怨所萃，則相繼超升，物論所歸，則以次疏外。某人之遷，是嘗  
重人罪以快同列之私忿，某人之擢，是嘗援古事以文邇日之天變。直節重望以私嫌而久棄，老姦宿憾以  
巧請而牽復。使大臣果能杜倖門、塞邪徑，則舉錯當而人心服。臣故曰大臣心貴公。臺諫平居，未嘗立  
異，遇事不敢盡言。有如金人再通，最關國體，近而侍從，下至生徒，莫不力争，冀裨廟算，獨於言責，不出一辭。輦轂之下，乾沒巨萬，莫之誰何，州縣之間，罪僅毫髮，撫以塞責。大臣所欲爲之事則遂之，所不  
右之人則排之。仁宗時，有宰相奉行臺諫風旨之譏，今乃有臺諫不敢違中書之請，豈祖宗設官初意哉？」



故曰臺諫言貴直。」疏上，遂請罷歸。擢太府丞，不拜，出知南康軍。詣史彌遠別，彌遠曰：「子言甚切當，第愚昧不能行，殊有媿耳。」至官，奏蠲賦役，流民而食之，以惠凶年。造白鹿洞，與諸生講解。改知南劍州，會歲亦旱疫，蠲逋賦十數萬，弛新輸三之一，持錢粟藥餌，躬率僚吏戶給之。創延平書院，悉倣白鹿洞規。知漳州，未行，聞寧宗崩，嗚咽累日。亡何，請致仕。寶慶二年，提點廣東刑獄，章三上，迄不就。以直秘閣主管崇禧觀，拜祠命，辭職名，卒進職一等，致仕。三學諸生以起必爲請，而必沒矣。必天性剛毅，信道尤篤。自言居官必如顏真卿，居家必如陶潛。而深愛諸葛亮身死家無餘財、庫無餘帛，庶乎能蹈其語者。端平初，殿中侍御史王遂首言：「必事先帝，有論諫之直，而不及俟聖化之更，宜褒身後。」詔贈直龍圖閣。所著有《論語注義問答》、《春秋三傳抄》、《讀通鑑綱目》、《唐史贅疣》之稿數十卷。孫瓚。

文龍 字君賁。俊卿初從兄弟之玄孫。先名子龍，咸淳五年廷對第一，度宗爲更名文龍。（一二）文雅負氣節，爲丞相賈似道所愛重，繇鎮東軍節度判官歷政殿說書、秘書省校書郎，不數年，拜監察御史。諸臺諫凡有建白，須先呈稿似道，至文龍獨卽疏聞，似道繇此不悅。出知臨安府。襄陽圍困，似道陽請督師，而陰使其黨留己，襄陽竟沒。文龍上疏極言之。范文虎總師無功，似道力庇，使知安慶。又除趙潛知建康，黃萬石知臨安。文龍言：「文虎當罰而賞，潛乳臭子耳，萬石怠荒，皆不勝任，宜罷。」似道大怒，黜知撫州，旋使臺臣李可劾罷之。未幾，呂文煥導元兵東下，文虎首迎降，似道兵潰魯港，潛最先遁，文龍言驗，始起爲左司諫，尋遷侍御史。時邊事甚亟，王倫與陳宜中不能畫一籌，而日爭私意。文龍疏言：「《書》稱：『三后協心，同底於道。』北兵今日取某城，明日築某堡，而我以文相遜，以迹相疑，譬猶拯溺救焚，徐行安步。請召大臣同心圖治，無騰虛說。」宜中與倫卒不相能去，及其再來，而宋事不可爲矣。文龍

一歲間累遷參知政事，此時張世傑、文天祥之師俱敗北，元兵已進至杭北關外。文龍請身督殿旅合江下義丁決一死，議不合，世傑等遂以益王、廣王趨閩。衆議降元，文龍上章乞歸養。既，悔之，復上疏求還，不報。益王卽位於福州，復以文龍參知政事。廣州畔，以文龍爲閩廣宣撫使，討之。文龍辟前漳守黃恮爲參謀官。興化石手軍亂，復命文龍爲知軍，平之。元將董文炳、阿剌罕等以兵至福州，益王趨廣，命依前官充閩廣宣撫大使。文龍殫家財募兵，卽興化軍開闢。已，降將王世強導元兵入廣，建寧、泉、福皆降。知福州王剛中遣使徇興化，文龍斬之，縱其副持書還責世強，剛中負國，遂發民兵自守。時城中兵不滿千人，元人來攻，不克。使二使持書招降之，文龍焚其書，斬其二使。使其將林華偵伺境上，華亦降元，且導元兵至城下。通判曹澄孫開門以降，執文龍與其家人至文炳軍中。不屈，左右凌挫之。文龍指其腹曰：「此皆節義文章也，可相逼邪？」引就館，元將唆都往來諭意，且以母老子幼感動之，文龍情詞慷慨。械送杭州。文龍去興化卽不食，至杭謁岳飛廟，大慟，其夕死。母繫福州尼寺，亦死。訃聞，詔謚忠肅，賜廟號昭忠。元至正間，詔訪其子孫，且錄用之，無一人應者。

璣字瑟玉，視文龍爲從侄。少有大節，知天下必亂，無意仕進，散粟出帛以濟饑寒，曰：「家世受國恩，吾當爲國收人心耳。」賈似道潰師蕪湖，文龍起參知政事，璣語文龍曰：「今天下已危，列郡團兵自守，何足討賊，莫若勸上盡召四方兵屯聚沿江要害，擇賢王與文武才幹臣分督之。敵若來戰，併力齊奮，猶可爲也。」文龍慨然曰：「叔父策甚善，柄國非人，恐不能用。是行也，某必死之。」德祐丙子，端宗趨廣，璣出家財三百萬緡，航海助張世傑軍。世傑欲授以官，璣曰：「某激忠義而來，豈買爵耶？」不受，辭歸。十二月，叛將林華、陳淵與通判曹澄孫以城降元，文龍被執北去，璣曰：「侄不負國，吾不負侄。」卽陰部署賓

客，募丁壯。景炎二年二月晦，以兵攻林華等，誅之，復興化軍，告華首於祖廟，遂獻於朝。端宗嘉其忠義，命以通判權守興化，且令乘勝與世傑犄角，復福、泉二郡。九月，元將唆都兵攻興化，璦號令嚴整，每巡城必南向號慟，士皆感奮。十月既望，元兵蟻附登城，璦力不能支，尚率家僮及丁壯五百人巷戰，元兵死者千餘。璦被執，唆都欲降之。大罵曰：「汝知守城不降者吾侄耶？吾家世忠義，豈向汝胡狗求活？」唆都大怒，車裂於五門以殉。屠城三時，血流有聲。張世傑以其事聞，贈兵部侍郎，謚忠武。子若水，張世傑辟爲督府架閣。

龔茂良 字實之。年十八，舉進士，爲紹興戊午。是年莆中大魁則黃公度，亞魁則陳俊卿，林鄧年七十三爲榜尊，茂良年十八爲榜幼，莆人以爲四異。調南安簿，邵武司法，調泉州察推，以廉勤著。改宣教郎，用薦召試館職，除秘書省正字。累遷吏部郎官。張浚視師江淮，茂良言：「本朝禦敵，景德之勝本於能斷，靖康之禍在於致疑，願仰法景德，勿效靖康。」除監察御史。江浙大水，詔陳闕失。時內侍梁珂、曾覲、龍大淵用事，茂良首言之，遷右正言。內侍李珂沒，贈節度，謚靖恭，茂良言：「中興名相如趙鼎，勳臣如韓世忠，皆未有謚。施之於珂，實爲可惜。」復言：「今積陰弗解，淫雨益甚，熒惑人斗，正當吳分，天意若有所怒。曾覲、龍大淵二人害政甚珂百倍。」孝宗諭茂良：「二人皆潛邸舊，有文學，敢諫諍，非他近習比。」茂良再言：「盧杞姦邪，唐德宗自言不覺。今覲、大淵所爲，行道之人能言之，而陛下更頌其賢，正與杞類。」疏人，不報，卽家待罪。章再上，除太常少卿，五辭不拜，除直秘閣、知建寧府。自以不爲群小所容，請祠，不允。起廣東提刑，就知廣州。召對崇政殿，左相陳俊卿欲留之，右相虞允文不樂，會俊卿亦罷，除直顯謨閣、江西運判，兼知隆興府。時孝宗銳意恢復，茂良陸辭，劄子有勸慎審圖之語。旣至，會連

歲大旱，講求荒政，以右文殿修撰再任。疫癘大作，命醫治療，全活數百萬。進待制敷文閣，賞救荒之功。召對，奏：「潢池弄兵之盜，卽南畝負耒之民。諸郡荒田最多，願詔監司守臣募人，從便請耕。民有餘粟，雖驅之爲寇，亦不從矣。」除禮部侍郎。孝宗亟用茂良，手詔問國朝典故有自從官徑除執政者乎？明日卽拜參知政事，奏事賜坐，顧葉衡及茂良而命曰：「兩參政皆公議所與，事設有誤，皆須力爭。」淮南旱，茂良奏取封樁米十四萬，委漕帥賑濟。或謂：「救荒常平事，遽取封樁米，無乃不可？」茂良以爲：「淮南咫尺敵境，民久未復常業，饑寒所逼，萬一嘯聚，患害立見，寧能計此米乎？」他日，孝宗獎諭曰：「淮南旱荒，民無饑色，卿之力也。」潮州守奏通判不法，得旨，下帥臣體訪。通判者，茂良鄉人，同列密以省吏付棘寺推鞠，欲及茂良。奏事退，同列留身，出獄案進上，茂良不知也。孝宗厲聲曰：「參政決無此！」茂良遜謝，不復辨。葉衡罷，命茂良以首參行相事。慶壽禮行，中外覲恩，茂良以覃轉多官，歲俸難給，尼罷之。因請召起朱熹。錢良臣侵盜大軍錢糧累數十萬，茂良奏發焉。時曾覲欲以文資祿其孫，茂良以文武官各隨本色蔭補格法繳進。覲叩之，因茂良入堂道間，俾直省官賈光祖等當道不避，街司叱之，光祖曰：「參政能幾時？」茂良以奏，孝宗諭覲往謝，命茂良先遣人於覲衡替而後施行。茂良批旨，取賈光祖輩下臨安府捷之。手詔宣問施行太遽，茂良待罪。孝宗復委曲宣諭之。謝廓然者，曾覲客，賜出身，除殿中侍御史，中書舍人林光朝繳奏，不書黃，遂補外。茂良力求去，孝宗曰：「朕極知卿，欲保全卿。去，俟議恢復，卿當再來。」是日除職與郡，令內殿奏事，手疏恢復六事。上曰：「卿五年不說恢復，今何及此？」退朝，甚怒曰：「福建子不可信如此！」謝廓然因劾之，乃落職，放罷。尋又論茂良擅權矯旨，輒斷賈光祖等罪，遂責降，安置英州。父子卒貶所。覲與廓然死後，茂良家投匭訟冤，復通奉大夫。周必

大獨相，進呈復職，復資政殿學士，謚莊敏。朱文公跋茂良奏稿，言：「茂良平生不喜言兵，去國陛辭，乃請大舉恢復，以迎合上意，聞者莫不怪之。」及沒後數年，從其二子得陛辭副本讀之，乃極論不可輕舉之意，猶所素論，而心尚以未見真筆爲疑。過之數年，其子若孫復出手筆見示，益見其指意詳密，與江西奏劄實相表裡。因再跋其後，言：「公平生之言，未嘗少變，而被譖。人真可畏豺虎。天下之事，必久乃見是非之實也。」子晏、晟，皆升朝。

晟 慶元四年以蔭補知惠安縣，增置書籍以教士。初，茂良與史浩不合，及彌遠當國，修先世故怨，晟亦不復求仕。前後除知汀州，不赴。

李次辰 字拱之。舉進士，調龍溪尉。嘗佐浙西憲幕，民坐鹽逋，獄繫充斥，瘐死幾半，命次辰往決，以非辜悉縱之。守懼不聽，次辰請獨任其咎。終南外睦宗院教授。

鄭耕老 字穀叔。父安正，少負才學，一時名士多從之游。耕老登進士，主懷安簿。母喪，服闋，調温州法曹，改明州教授。明州自女真焚蕩之後，教弛學陋，耕老更營區序，興起斯文。以薦召見，面奏引太祖嘗問趙普天下何物最大，普對道理最大，知道理爲大，則必不以私意失公中。孝宗悅，親擢國子監簿，添差福建安撫司機宜文字。滿秩，徑歸。著《詩易庸範》、《語孟訓釋》。

陳大年 字彥永。紹興中貢辟雍。同舍生陳仲防患疫，人皆避之，大年獨爲周旋醫診。以特奏名再調昭州推官，攝州事，民皆宜之。

劉夙 字賓之。與弟朔師事林光朝。添差建寧府教授。而朔爲温州司戶，迎母就養，因乞與温州教授莫冲兩易，以便親。孝宗卽位，召對，除樞密院編修官，以親老屢求去。無何，兼國史院編修官，力辭不

就。除著作佐郎，輪對，首論馳射、近侍、備淮三事。又以江浙水，奉詔陳得失，疏言：「陛下與曾觀、龍大淵輩觴詠唱酬，字而不名，罷宰相，易大將，待其言乃決，嚴法守，裁僥倖，當自官掖近侍始。」又及黃門溢格宰相，臺諫不振職，及謹邊防、辨才德，凡六事。丐外，章再上，以爲荆湖北路安撫司參議官。乾道元年，以親老丐祠，主台州崇道觀。三年，差知衢州，期年政平訟簡。會曾觀副賀金正旦，道衢謁夙，不納。復求去，徙知温州。明年，引疾歸，卒。是歲王龜齡、芮燁俱卒，而夙復繼之，呂祖謙悼之以詩：「今年襟上淚，三泣萬夫雄。」林光朝答士友慰吊書有云：「賓之愛君，均於愛親，憂國切於憂身。古有遺直，今難其人。」其爲一時推重如此。子彌正、彌邵。彌正子克莊、克遜、克剛。

彌正 嘉泰初以承議郎知臨川縣，人爲諸司糧料院。時韓侂胄爲相，兵禍有萌，召使如兩淮議鐵錢，實欲付以邊事。彌正還言：「無故先發，天理不順。不豫輕舉，人謀弗從。」侂胄怒。嘉定初，爲考功郎，定朱熹謚曰文。終吏部侍郎。林偁之建臨川三賢祠於學宮，以祀黃勉齋、文丞相，而彌正與焉。彌邵，見韋布。

克莊 字潛夫。嘉定二年以郊恩補將仕郎。調靖安簿。以宣教郎知建陽，新考亭祠，祀朱、范、劉、魏四賢於學，糴賑糶倉二千斛。方以邑最聞，而言官李知孝、梁成大箋其所詠《落梅》有朱三、鄭五之句，以謗訕撫其罪。鄭清之力爲辨釋，得通判潮州。改吉州。真德秀辟爲帥參，且以學貫古今、文追騷雅薦於朝。與祠。未幾，漸致從班，遂除樞密院編修官，兼權右侍郎。輪對，言：「服天下莫若公，今失之私。鎮天下莫若重，今失之輕。」又言：「權臣壞朝綱，開邊釁，兵驕、楮賤、貪饕之僥倖之俗不可回，諸賢起而當之，天人未應。願堅凝初意，無使邪說淫奪。」又拳拳於濟王荅川之獄，雖復其爵，未雪其冤。皆人所難

言。尋除知漳州。嘉熙元年，改知袁州。坐先言濟王事，爲御史蔣峴所劾，與方大琮、王邁同罷。既與祠，擢廣東提舉，就升漕，攝舶。俸給、例券皆却不受。買田二百畝爲南仕歸喪之費。淳祐四年，除將作監。改直華文閣，因舊任。六年，令赴行在奏事，道除大府少卿。既至，而對三劄，特賜同進士出身，除秘書少監，兼中書舍人。史嵩之服闋，御筆除職予祠，令克莊行詞。克莊奏：「嵩之有無父之罪四，無君之罪七，舊相致仕合有誥詞，今臣行嵩之之詞，未知爲褒爲貶？」論奏不已，爲殿中侍御史章瑛劾罷。尋依舊職，知漳州，就除秘閣修撰、福建提刑，以便養。甫及月，丁內艱。方禪，除崇政殿說書、史館同修撰。時事多內出，克莊言：「祖宗盛時，內降絕少。今中外除授，不繇大臣啓擬，求者、予者、奉行者習以爲常，臣竊惜之。」忤當國意。尋除起居舍人，進言愈切，力奏不草史宇之答詔。除右文殿修撰、知建寧府，改福建轉運使。以鄭發疏覈職，寢新命，提舉明道宮。景定元年，賈似道還朝，歷遷權工部尚書兼侍講。以年迫，堅乞納祿，除煥章閣學士，守本官致仕。咸淳四年，特除龍圖閣學士，致仕仍舊。年八十三卒，謚文定。所居後村，人因稱爲後村先生。彭韶祠堂記曰：「維莆至宋，文獻特盛，蔡忠惠、林文節、陳正獻三五公爲冠冕，最後先生起而繼之，文章流布，事業兼備，論者謂三五公而下，一人而已。賈似道當國，貪收德望，以慰人心，公爲之出，蓋賈蹈蔡氏用龜山之故智云。」

克遜 字無競。以父任補官，調古田令。以救荒、捕盜著績。辟江西帥幹，累遷知邵武軍。咸愛並行，除劇盜，興教化。改潮州，初銀價平，每丁賦錢五百，後銀貴，加至四倍，克遜下教蠲之，曰：「卽得罪，無恨。」移泉州，以疾奉祠。一生清貧，尤工於詩。葉適、趙汝談皆稱之。

克剛 字處和。爲泉州錄參，真文忠薦知沙縣。寶祐二年，知惠州，清約多才，修弊起廢。建豐湖書

院，祀羅豫章，闢四齋以居生徒，擇州學博士一人兼山長領之。惠人始知伊洛之學。病劇，尚延州博士至卧內，捐羨錢千緡以增學舍。

歲 字孟容，彌邵子。寶慶二年進士，歷古田、羅源令，改青田。明敏警悟，吏不敢欺。居官用儒飭吏，以風俗教化爲本。

朔 字復之。與兄夙齊名，時稱二劉。繼夙魁南省，又號大小省元。調温州司戶參軍。屬歲饑疫，火焚千餘家。守袁孚以朔董其事。朔囊藥釜粥自隨，濱死者與緒被。道傍棄兒，收募乳飼，聽無子者擇取。所活數萬，孝宗初，與林光朝同召對，曰：「陛下何不延納憤激敢言之士，而聽訐直難堪之言，因以自考察成敗得失。」且及曾覲、龍大淵罪狀。改知福清。縣更兩令，不治，朔至，一待以誠。聽訟，使兩辭自詣，無追呼者。市食，挂錢於門，民當其物持錢而去。邑庭常空，械索失所在。以疾請祠歸。始，朔在縣時，嘗病而服藥，一夕，夢一白髯翁止之曰：「藥無妄，不可試。」朔不之信，至晚增劇，又夢翁曰：「但買某散服之，當尋愈。」果愈也。及請祠，又夢翁送之曰：「邑土地神也，限在界疆，不得遠別，前途幸自愛。」其爲明神敬護如此。及再召人對，虞允文贊孝宗恢復，十多嚮之。朔極諫宜選兵將，廣儲貲，責成端重堪事者，不可馮虛鑿空，決天下於一擲。孝宗竦然。免試，除秘書省正字。丐外，除福建安撫司參議官。行至信安傳舍，卒。朔與其兄夙，皆時望所推。夙挺持無假借，朔則濟以和易。至於輕祿位，重出處，厚名義，薄勢利，蓋不相讓云。二子：起晦、起世。

起晦 字建翁。擢淳熙五年第，知貴溪縣，召試秘書省正字，歷益王府教授。蔚有時望，材行不忝其父，而言官指爲僞學，劾罷之。起世，擢慶元第，南海尉。子希仁。



希仁 字居厚。嘉定中進士。因郊有雷雨雹之異，撫七事應詔，尤於人才致意焉。又曰：「論事之臣，惟知攻上躬，任事之臣，惟知舉權要。」所言皆劇切貴近，時論壯之。在仕途六十年，屢以謫退，閑散時多。顧每遇遷擢，必有論建，身雖屏處，箴諫惓惓。

劉洵直 字子浩。少孤，苦學，篝燈筵几，號慟畢，即誦書。嘗夜半，諸父聞哭聲甚哀，問故，曰：「讀《馬周傳》，至其言少失父母，犬馬之養無所施，爲之悲感，不能自止。」諸父奇之。登紹興第，調永春縣簿。秩滿，授漳州教授。終通判平江府。

黃芻 字季野。少從林光朝學，志行高古，自劉夙、劉朔、林亦之而下，皆推讓焉。登第，調懷安簿，未上，卒。二劉葬之，表其墓，而銘其坎，曰：「歎耶！歎耶！吾黨有若人而乃爾耶！千百載道傍，其敢以無禮施之耶！」

郭義重 宋史無重字，蓋誤。 字處仁。早游太學，以操尚稱。靖康之變，諸生空學北去，義重守節不屈。紹興七年，隨高宗駕至錢塘，聞母喪，徒跣奔歸，每一慟輒嘔血。聚土爲墳，廬於墳傍。甘露降，烏鵲馴，郡上其事。紹興十三年，詔立雙闕於所居之前。飾白，間赤，植所宜木。義重貌古心專，視不過尋丈，口不及時事。其旌孝時，猶未婚仕。紹興二十一年，年五十餘，始以特科奏名補官，歷德慶州錄事參軍。年六十，始娶，以高年終。鄉士大夫爲立孝子祠，私謚曰孝節。四世孫道卿，見問巷。

陳宇 紹興二十一年以大理正知梧州。歲適旱，手寫救荒十餘事行之屬縣，米商四集，人以不饑。郡留斛餘六萬，建炎盜起，增額且半，宇累疏，得仍舊。流徒來歸，猺獠帖然。

〔校記〕

- 〔一〕「曾孫應發」，各本原闕，據《方漸傳》、《方應發傳》補。
- 〔二〕「陳鶴」，各本原闕，據本傳補。
- 〔三〕「夙弟朔」，各本原作「夙弟翔」，據卷一百五「宋科第」及本卷《劉夙傳》、《劉朔傳》改。
- 〔四〕「朔」字，各本原脫，據《劉朔傳》補。
- 〔五〕「孫希仁」，各本原作「侄希仁」，據《劉朔傳》、《劉起晦傳》改。
- 〔六〕「勅令所」，各本原作「勅令所」，據《宋史·職官志》改。
- 〔七〕「閩」字，各本原脫，據《宋史·職官志》補。
- 〔八〕「卿」字，各本原脫，據文義補。
- 〔九〕「公」字，各本原脫，據《宋史》本傳補。
- 〔一〇〕「官闕」，各本原作「官閑」，據《宋史·陳宓傳》改。
- 〔一一〕「度宗爲更名文龍」，各本原作「度宗爲更之文龍」，據文義改。
- 〔一二〕「奏」字，各本原脫，據《宋史》本傳補。

# 閩書卷之一百八

英舊志 縉紳

興化府 莆田縣四

宋

有傳

林光朝侄季成

翁點 黃艾 陳士楚 王必誠 卓先族孫得慶 方武子 丁伯桂子南一 李俊

甫 柯夢得 林達 徐千能 吳叔告 林彬之 陳圭 林興宗 林仲國 方械 方士端 林光世

林光朝 字謙之。再試禮部不第，聞陸子靜得程門尹焞之學，因往從游，自是專心踐履。四方來學，亡慮數百，號曰南夫子。歸莆設講於東井紅泉。閩之洛學，光朝其宗也。然惟口授，未嘗著書，曰：「道之全體，六經發明之矣，注解已支，若復增加，於道愈遠。」隆興元年，年五十，以進士及第，調袁州司戶參軍。乾道三年，龍大淵、曾覲以潛邸恩倖進，臺諫、給舍論駁不行。光朝與劉朔方以名儒薦對，頗及二人，繇是改知永福縣，而大臣論薦不已，召試館職，爲秘書省正字兼國史編修、實錄檢討官，歷著作佐郎兼禮部郎官，進國子司業兼太子侍讀，史職如故。張說再除簽書樞密院事，光朝不往賀，遂出爲廣西提點刑

獄。淳熙元年，移廣東。茶寇自荆湘剽江西，薄嶺南，鋒銳甚，光朝自將郡兵，檄摧鋒統制路海、二本路鈐轄黃進控塞要害。會有詔徙轉運副使，以賊勢方張，留屯不去，督二將遮擊，連敗之，賊驚懼宵遁。孝宗喜曰：「光朝儒生，乃知兵耶。」加直寶謨閣，召拜國子祭酒兼太子左諭德。四年，孝宗幸國子監，命講《中庸》，大稱善，賜金紫，不數日，除中書舍人。是時，吏部郎謝廓然以曾覲薦，賜同進士出身，除殿中侍御史，命從中出，光朝立封還詞頭。孝宗度光朝決不奉詔，改權工部侍郎。請外，遂以集英殿修撰出知婺州。引疾，提舉興國宮，卒，年六十五，謚文節，學者稱艾軒先生。光朝之沒也，朱文公嘗嘆曰：「某少年過莆，見林謙之、方次雲談道，極其精細，及再過，則二公已死，更無一人能繼矣。」陳宓序其集，謂：「上參經訓，下視騷詞，他人數百言不能道者，直用數語，雍容而有餘。」劉克莊亦謂其：「高處逼《檀弓》、《穀梁》，平處猶與韓並驅。」世亦不以其言爲過。侄季成。

季成 興國軍判官。從朱文公游，有學行。

翁點 字沂伯。家泉州。歷提點江東刑獄常平使者。行役法，民訴不便，點貽書亟諭止之。開禧初，有旨召赴行在，被御史徐枬劾，寢。枬，韓侂胄黨也。點聞，上章自辯。侂胄追點三官，送新州安置，卒貶所。

黃艾 字伯耆。乾道八年，廷對第二。累歷清要。朱文公知漳州，奏行經界，朝議未定，艾輪對，人劄子言：「今日以天下之大，公卿百官之衆，商量一經界，二年而不成，使更有大此，將若之何？」光宗即發行之。淳熙末，以秘書丞充嘉王府贊讀，已，補外。嘉王卽位，歷權工部侍郎，兼侍講。會朱文公罷講筵，艾因進講，問逐熹之驟。寧宗曰：「始除熹經筵耳，令乃事事欲聞。」艾惴請再三，不聽，除中書舍人。

明年，充金國正旦使，還，改刑部侍郎，以待制終。卒方盛年，人咸惜之。

陳士楚 字英仲。從學林光朝。登進士，調臨江戶曹，攝新喻，縣政大治。改秩，調侯官。丞相周必大薦之，以國子監簿召對，孝宗獎其誠實。紹熙初，除宗正丞，兼嘉王府直講。一日，百官已趣班，雪大作，宰相索表稱賀，援筆立就，朝士稱嘆。青宮開經筵，講《周書·無逸》章。其解穡稼艱難曰：「百穀麗於土，荏萌既敷，方有實。三農力於田，莠草既除，方有秋。」以諷小人防君子之意。壽皇傳諭：「陳直講說書，議論精詳，理致深奧，得師儒之道。」賜金樽、玉甌、金錢。歷軍器少監、提舉江南東路。歲儉，民饑，不憚巡訪，荒政最良。再除侍右郎、右史。慶元初，除侍講，卒。

王必誠 淳熙中知翁源縣。首崇禮教，捐俸修黌宮，行保甲，禁奸宄，恤孤老，明敏勤慎，士民蒙澤。

卓先 字進之。少從林光朝學，年十五，拔鄉解，以特科調龍溪簿，累建寧軍節度推官。歲亢旱，松溪、政和、建陽、浦城四邑仰食下流客米，府禁米舟出城，先爭曰：「四邑非建民耶？」平生居官廉靖，言論據經，與人寡合。陳宓、鄭燠許與特甚，而傅伯成尤敬重之。族孫得慶。

得慶 字善夫。五世祖厚，吏部員外郎，崇寧間，與修《樂書》。得慶教授道州，歷左曹郎官，以忤賈似道出知漳州。平畬寇，召還，授兵部郎中，兼國史院編修官、實錄院檢討官，不拜，提舉雲臺觀。德祐丙子，以大理卿趣行，辭以疾。景炎二年，便旨除右文殿修撰、戶部尚書兼福建制置司參謀官。是冬十月，元兵逼城，得慶與家人訣，且人家廟自殺。俄見執，并二子規，權皆被害，年七十二。得慶早以詞賦名，晚深於《易》。丞相江萬里深器之，扁其居曰順寧精舍。文天祥爲作三十韻詩云：「卓氏居七翁，方心不姿媚。蒙讒以去國，七年無怨懟。」其送知漳州詩：「昔予援西銘，期子以前修。願覲弘濟學，四海放一舟。」

及其死事，人擬之卞壺父子。仲子準，承直郎，監福州海口鎮。

方武子 字景綯。博學精文，歷循州教授，口講指授，士學一變，梅之矜佩，有越境來者。坐累免官。方信儒漕廣西，辟博白令，改梧州通判，延致幕下。梧缺守，遂攝州事。大蠲弛，痛節縮，補總漕通綱，支吏兵積俸。卒於官，二子貧不能歸，竟葬於潮。

丁伯桂 字元暉。祖彥先，秘書郎。伯桂兄弟八人：伯林、伯樟、伯梅，貢於鄉；伯杞，太學生；伯桂，累樞密院編修官、監察御史、秘書少監、中書舍人，擢吏部侍郎，遷給事中，皆御史職方。史彌遠當國，陳宓、鄭寅之流皆不安於位，於是朝無肅人。彌遠死，伯桂始爲御史，居言路二年，諫疏盈篋。後雖出臺，然轉對奏事，指陳愈峻，咸人所難言者。未幾卒，贈通議大夫。子南。

南一 字宋傑。寶祐元年，年五十七，始奏名別院廷試。以累舉恩，陞兩科，調懷安尉。決疑獄，奇中，出人意表。以介特忤外臺，改東莞監稅。帥使謝了齋曰：「此非所以挽儒者，欲處以他職。」力辭，復辯疑獄者屢，復以忤外臺劾罷。貧不能出嶺，嶠南士人皆來師事。漕使鄭協辟爲廉泉書院山長。洪天錫至，檄攝海陽州學教授，兼文公、元公兩書院山長。潮州方喜得師，而南一以悼亡返。

李俊甫 字幼傑。舉進士。自其爲貢士時，則作《莆陽比事》，上考史記，旁摭紀錄，下至諸家文集、行實、碑碣、書尺，悉從採掇。詢於耆儒，參諸故老，積十餘年心目之勤，釐爲七卷，儷詞偶事，珠聯璧合，林瑒、陳謙爲序之。

柯夢得 字東海。以特科人官。一生苦吟古詩，學孟東野，有《抱甕集》。

林達 居官清白，司泉舶，嘗受鮓十甕，他日發之，金也，遽還之。嘆曰：「昔畏四知，予畏一心。」

徐千能 紹定間興寧主簿。任未及月，強賊陳三鎗、羅動天迫境，千能與令顏公衮往諭，不聽，遂與公衮厲聲罵賊。賊并執其長子某、次子萬金，并其二僕，將殺之。一賊喝云：「且留一少年。」僅萬金得免。郡守林杲給萬金一據，爲之申狀，欲令到京。一時諸公掩不以聞。

吳叔告 字君謀。端平二年，理宗策士於庭，叔告以發強、密察立論。理宗覽而異之，擢第一。累遷秘書郎，輪對，首言：「金虜冰合未來，交口談清野之効；裸享雲光偶霽，動色稱格天之祥。大臣意向回隱事機，牽制百執事。默默容容者多，慷慨許國者少。」又言：「邪封曲徑，借曰御筆。奏篇束閣，報曰旨依。室垂磬而襲承平之用度，家四海而事藩邸之營繕。」時稱其直。四年，權都官郎官，以親老乞外，知撫州。正風教，扶善良。乞祠，不允。尋除刑部郎，以不善迎合爲中外所攻，寢新命，貶一秩。淳祐三年，復元階，歷領袁、漳、衡、常、嚴五州，皆不果行。景定二年，召除尚右郎官，人對，言：「天下萬事，本人主一心，心不一，則二於物。向湖廣惟蜀四而皆敵，今瀘城歸，連海復，山東版圖再入職方，儆戒之意得無少怠？樂身之事得無切於心乎？」四年，除大理少卿。丐外，除直寶章閣、提舉浙西常平事。是冬，召奏事，再祈免，得請。歸裝蕭然。明年卒。

林彬之 字元質。調福建常平司幹官。爭榷鹽新議，上帥漕數千言，曰：「此法果行，山有紅巾，海有孫恩矣。」歷監察御史，首疏天命、人才、民心，次言括田之害，又誦皇祐中太常博士張述請立皇嗣語。又言：「史彌遠用鄭損棄關中，而基蜀漢之固；史嵩之召北兵入城，而兆襄樊之變。今主兵之臣，以閉門自守爲上策，運米江浙，以餉兀坐之兵，竭財大農，以守不耕之野。徒曰虜來自去，可以苟安，豈不中其滅水困魚之計。」九年春，雷雪大作，積陰彌月，極陳科抑、榷法、括田三害。夏四月朔，日食，抗言扶陽抑陰。

三事，遷左司諫。會仲冬雷，又言：「一陽方復，內卦爲震，而有雷聲之異，豈天以此示警爲國本計乎？」十一年春，將有事於明堂，史嵩之規爲相，彬之立言，乞扶公論，讀疏未畢，理宗曰：「嵩之斷不復用矣。」除殿中侍御史，累權工部侍郎，爲殿廬詳定官。丐外，以集英殿修撰知婺州，復知寧國府。予祠。景定三年，卽家除寶章閣待制。命未至，卒。彬之安貧盡孝，居家有繩束，立朝無附麗。平日謙信，若無異同，及至榻前、階下，爭辯是非，寧忤不辱。自少至老，丹鉛不廢。

陳圭 字表夫。淳祐間知潮州，以惠民養士爲政。

林興宗 字景復。父叢，知橫州。興宗以門蔭補官，調泉州節度推官。李全既降，命興宗爲淮安州法曹，遷淮安令。未幾，全復叛。已而兵敗，其妻楊被俘以去。興宗流落海州膠西，青社十餘年，採拾橡以充饑，或賣卜教小童自給，家人不知其存亡，母妻憂以死。淳祐中，趙葵在淮閩，遣間物色，得之，屢以帛書報虞機事。庚子，遂自拔歸。葵驗其縣印，告身如故，奏旌擢以勵臣節。高行簡等議置之朝列，不果，詔改通判海州，改淮安州。乞解官，追服母喪。服除，改通判廬州，歷知南恩州，擢知韶州，卒。興宗豪爽磊落，嗜義輕財，例應轉秩受賞，皆耻自言。喜爲詩，在兵火不廢。自號全壁，有集若干卷。

林仲國 字定叟。咸淳間爲古田西尉，廉慎自持，處事不經宿，雖饋送如錙銖亦却而不受，典貸衣食以補月俸之虧。

方械 知福清縣，愛人下士，新學校，創祭器，文章政事，斐然可觀。

方士端 字德明。以授室宗邸補登仕郎，試吏部，復授有迪功郎。調同安簿，代文公。文公嘉其才。攝尉，得盜，當受賞，棄不顧，後遷知福清縣。沒，文公銘其墓。



林光世 景定中賜進士出身。初，淮東漕臣黃漢章上其所著《易鏡》，繇布衣召爲史館檢閱，提舉浙東常平，改京秩，繇將作丞知潮州。開慶元年，召爲都官郎中，銜命趣宣撫丞相賈似道進師。提舉浙東常平，進嘉言二十篇，詔賜出身。人爲司農少卿，兼史館。

元

延祐二年乙卯 鄭南吉

五年戊午 林岡孫宋咸淳進士種子。

至治元年辛酉 林以順岡孫弟。

三年癸亥鄉試 朱文霆

泰定元年甲午 朱文霆

三年丙寅鄉試 鄭天瑞

元統三年乙亥鄉試 鄭桂

至正十年庚寅鄉試 方德至

十一年辛卯 方德至

十九年己亥鄉試 穆僕輝 克霖 林善同 薛彌克 林琚

二十三年癸卯 薛彌克

二十六年丙午 方景章

薦辟、人才賢者雜見列傳中。

有傳

黃方子 陳旅 林以順 陳惟鼎 朱文憲 方德至 薛彌克(三) 顧長卿 林善同

黃方子 字潛剛，唐御史滔之後。博學強記，好著書，書以數十種。嘗攝武成學職，僅三載，歸。

陳旅 字衆仲。先世業儒，父子修，兄震，皆一時名士。旅幼孤，穎異。稍長，負笈泉南，從傅定保游。博學多聞，聲名日著。用薦爲閩海儒學官，御史中丞馬祖常使泉南，一見奇之，因勉游京師。既至，學士虞集見所爲文，慨然曰：「在茲付子矣。」延館中，爲游譽。趙平章世延復力薦之，除國子助教。滿考，諸生爲請於朝，乞再任。積官國子監丞。有《安雅堂集》十三卷，集爲序之。林泉生亦序旅文，謂旅「學博而通，識高而敏。使之裁繁理劇，有兼人之能；或者處意制變，有濟時之智」。

林以順 字子睦，宋積仁之後。以進士調慶元尹，弟殺兄而以賄免者，按誅之。移浦江縣，改台州路推官，治獄多善狀。海寇滋熾，總管議撫，以順曰：「恐遂以姑息亂天下。」歷江西儒學提舉、福清州知州。廉靖寬簡，以禮爲政。時元政已熄，所在盜起，劫殺鄉邑，以計剪除之。尋除福州路同知，致仕。

陳惟鼎 字元中。以明經薦游洋教諭，致仕歸，與郭維貞等結社壺山。

朱文憲 字元道。舉進士，擢同知瑞安州事，改汀州路總管府推官，調甌寧縣尹，除福建宣慰都事。丁內艱，起知瑞安，授福建儒學提舉，遷同知泉州路總管府事，以泉州路總管致仕。所至多蹟，博學善文。宋文憲廉銘其墓曰：「在元中世，士患無位，持經挾策就有司試試者爲誰？或哲，或遇，或以微類棄照乘珠。及其既獲爾州爾邑，有所不通，爲吏侮。執有美朱公游薦而登左經右律，吏駭且偵，剔蠹平僞，如衡稱物。有撓之者，正色不屈。既典方州，亦司儒臺，黜士之僞，誅盜之魁，曷其致。然作學知要，以

爲政，天下猶少，彼何不思訾儒爲迂，刀筆拘拘，視公何如？」所著《葵山集》，亦濂爲序，稱其「言醇理彰，於理不合，雖強之言，不言。其所言者，未嘗不本諸道」。子瀟，洪武初進士。

方德至 字遂初，宋公權之孫。幼能讀先世書，長而求諸三古四聖人及宋程、朱二氏之經之傳，沉潛厭飫，豁然以通。至正間登第，授永嘉丞。家故貧，授徒養親，與其婦廖相安羈窮淡苦中。已，廖雙盲，德至永嘉代歸，父母堅欲其別娶，德至婉辭，邑人義之。

薛彌充 字文美。爲上都路興州判官，兼翰林國史院編修，作文典重明潔。國初，以閑良官留京師。

顧長卿 字子元。以薦歷安溪、南平二縣，建寧、福州二路學官，再調泉州潯美場司丞。嘗起草作遼、金、宋三史。及謁，選京師，會史事開局，番具以所草上中書，得辟史屬，以議不合，移疾出。

林善同 宋福州守圻四世孫。好學，工詞賦，授泉州書院長。元亡，不仕。國初，以閑良官召起，以祖母年老辭。既，復起之，行至建州，寄所作《顧氏義妾詩》，有「妾猶知遵禮義，（四）此身那肯負綱常」之句，竟死於道。

### 皇朝科第

舉人 進士子、午、卯、酉屬舉人，辰、戌、丑、未屬進士。

洪武三年庚戌舉人 鄭潛 龔與時 林衡

四年辛亥進士 鄭潛 龔與時 林衡時科年未定，故有庚戌鄉試、辛亥會試，至洪武十七年始有定期。

五年壬子 方徵宋大琮五世孫。 壬寅 黃至唐滔十四世孫。 朱瀟文鑑孫。 方毅

六年癸丑 方徵 王寅 方毅

十七年甲子 黃雋至族 黃裳 周弼 黃性初 鄭永 陳著 高成應天中式

十八年乙丑 黃雋 周弼 黃性初 高成

二十年丁卯 鄭雲 程士 吳士崇 林泳 阮顯 李仁 顧褰 張則銘

二十一年戊辰 鄭雲 程士

二十三年庚午 張善 林義 陳莊 余鵬 王瑛 林隆

二十四年辛未 林義

二十六年癸酉 林曾元以順孫 蕭保 許遇生賜名議一鶚孫 林要 林士敏 張振

二十七年甲戌 林曾 許遇生

二十九年丙子 方安 吳陽保源侄 鄭怡生 林洪 黃畊至子 王宣儒士 陳立 林文正 吳

宗端俱應天中式

建文元年己卯 林泰第二人元闕縣知縣 鄭觀 陳道潛 黃重至族 林岳 黃壽生至族 林和

葉保 朱津 方定 李良 陳繼之以儒士中式 魏仙

建文二年庚辰 林洪 陳道潛 黃重 陳繼之

永樂元年癸未舉人舊志有洪武三十五年一榜，考是歲革除，故元年開科，甲申會試。 陳用 顧本德 陳安泰 戴

員保 王信功 黃謙 周慈 陳磐

二年甲申進士 黃謙 陳安泰 林要 顧本德

三年乙酉 林恒肅 鄭鏞 黃暘 陳居 陳吉生 方濬源 陳實 黃建偉從弟。 朱隆 陳永儀  
俞智孫 林環輩族。 林長懋 方陽 李全 黃正 吳公榮 黃坦 朱侃以儒士中式。 趙仲行 孫光  
陳熊觀子。 林乾曾侄。 俱歲貢，應天中式。

四年丙戌 林環狀元。(五) 王信功 陳實 黃建 趙仲行

六年戊子 楊慈解元。 陳中 林賢洪弟。 吳誠陽保從弟。 林熊 黃啓晦 王凱 林經仕敏侄。

趙紹獻 鄭濟義榮子。 洪鎮 黃壽生應天解元。

九年辛卯進士七年己丑會試，成祖巡狩北京，以中式八十四人寄監，是年還，乃舉廷試。 黃暘探花。 楊慈 陳用

黃壽生 戴員保 林熊

本年鄉試 吳潛 方鼎 余文 洪成宗 黃常祖順天中式。 鄭興宗 盧質中俱應天中式。 林遵節

江西中式。

十年壬辰 吳誠 王凱 吳潛 余文 黃常祖 盧質中

十二年甲午 朱顯宗 林時 林勤士敏子。 林坦經從侄。 陳渠 朱勝 余耀 郭爵 黃普 林

潛 黃宦 黃察應天中式。

十三年乙未 方鼎 林遵節 林時 林坦 朱勝 余耀 黃察

十五年丁酉 吳公榮 鄭述 方鯉 鄭孟良觀子。 吳任 黃坦 林季恒肅弟。 翁瑛 林祿 吳

宿 趙滋 魏矩 林講岳弟。 林壽英潛叔。 王偉 顧童本德弟。 鄭道 林孫 徐資用 翁長上二人，

俱儒士中式。 翁文昶 鄭球 林應芳應天中式。

十六年戊戌 陳渠 方鯉 徐資用 王偉 林庭芳

十八年庚子 吳觀解元。 陳中 鄭慈 黃進傳。 鄭毅 吳杞 葉珙 朱忠 方懋 黃壽俱府

學。

徐存書 林惇衡傳。 郭逞 王時若 黃奎 洪琰 朱畱儒士中式。 林佑軍生。 陳祿順天中式。

十九年辛丑 陳中會元。 鄭述 吳觀 顧童

二十一年癸卯 黃清寧 陳恭 宋燦 卓望俱府學。 鄭洋燧傳。 林崇 陳均 董復 黃興 李

銅 陳可晦上三人，俱以儒士中式。 林輝英子。河南中式。

二十二年甲辰 林輝

宣德元年丙午 林時望解元。 劉武 林文恒肅從弟。 方熙大鈞六世孫。 鄭溶 吳鎮俱府學。 陳珪

陳師輿 徐安祖 蕭爲保子。 朱環儒士。 翁福 鄭思陳

二年丁未 吳任 郭逞

四年己酉 李蒲解元。 陳嘉府學。 黃謙約仲子。 吳福觀弟。儒士，順天中式。

五年庚戌 林文探花。 劉武 方熙

七年壬子 林同解元。 鄭觀 吳儼俱府學。 林祥鳳畱子。 李廷修職傳。 方迪 陳喜 林同 林

繼環子。 宋雍順天解元。

八年癸丑 李庭修 方迪 宋雍

十年乙卯 蔡亮 周哲俱府學。 鄭炤 翁森 林道昭環從侄。 林渚環從侄。 黃龍應天中式。

正統元年丙辰 黃龍

三年戊午 張勉 周坦 楊瑛 林瑱俱府學。 顧孟喬 方述 謝遜 許賜 鄭夏師陳從弟。 方澥  
上二人，俱應天中式。

四年己未 方澥 楊瑛

六年辛酉 方玘解元。 黃深壽生孫。 吳膺徽從弟。 林時望諸弟。 丘瑀 陳瑩俱府學。 許濟 林

長清供從侄。 翁世資瑛子。 順天中式。 鄭熊師陳子。 浙江中式。

七年壬戌 翁世資 顧孟喬

九年甲子 黃譽解元。 宦侄。 黃暉 盧同質中子。 鄭遷善興宗子。 鄭立杞從弟。 林麒 鄭賢 黃

朝章信初從子。 俱府學。 林智熊侄。 柯潛 陳瑣 李煥 陳暄 林宗乾侄。 方璿徵嗣子。 黃滋清事從

弟。 順天中式。 黃原謹興弟。 林時讓肆子。 俱以儒士中式。 朱復勝子。 興化縣學。

十年乙丑 陳暄 林長清 林時深 周瑩

十二年丁卯 陳俊解元珪子。 翁世用世資兄。 葉巒琪侄。 嚴詮 陳善俱府學。 鄭循初 林渠倬從

侄。 林英 蔡瑄 吳智 周琰 鄭重光 林暄上四人，興化學。 徐宗海廣東中式。

十三年戊辰 翁世用 黃譽 陳俊 周琰

景泰元年庚午 吳琛儼子。 林榮廷芳侄。 陳敬 李榮綱從弟。 李純 朱寬 許文燁賜侄。 陳載

瑩從侄。 陳聰俱府學。 黃謹 洪楷溥侄。 宋澄邦光十一世孫。 朱貴陽 林思承環侄。 陳諧 鄭庸 林

憲穀子。 鄭華 陳思綱上二人，俱儒士中式。

二年辛未 柯潛狀元。 陳敬 黃深 陳善 吳琛 葉巒 吳智

四年癸酉 許評解元。卓天錫 周轍登侄。陳經德 盧享 林泉集從弟。方守陽孫。林敷庭芳

子。方遠述弟。高橙 陳博文 方和叔 高霖橙叔。張紹振孫。鄭傑 徐文漳資用侄。陳貴俱府

學。吳繹思第二人。李珏 蔡瓊瑄從弟。林籽實子。吳徹 呂澄 李體廣純從弟。林審憲弟。陳

亨 林炯籽子。陳崇書 蕭光甫爲子。林偃繼子。林伋偃弟。黃士學 陳朝卿求儀孫。吳承宗福

子。林彌贊洪侄孫。鄭啓善遷善從弟。林誠輝子。吳輔宿從侄。方杰熙弟。儒士中式。王福 史慶俱

本衛軍生。周瑛夢從弟。鎮海衛軍生。莊賢平海衛軍生。

五年甲戌 卓天錫 林時讓 嚴淦 黃謹 鄭華 宋澄 林思承 方達 陳貴

七年丙子 陳岳道潛孫。方朝宗鼎從侄。陳紀 彭韶 黃綸龍子。黃洙隆生孫。林漢時望子。

丘諒 方繹 林載文子。陳克仁 黃緒俱府學。林橙 許純雅 方寬 張同 鄭欽 陳鼎中孫。張

洽 周惇仁琰侄。宋叔昭 許文著文燁從弟。吳琦任子。劉學滋上三人，俱儒士中式。黃庸平海衛軍生。

天順元年丁丑 彭韶 林榮 楊瓊 朱寬 陳載 吳繹思 周轍 陳亨 高橙 徐文漳 方朝宗

張洽

三年己卯 楊琅解元。黃仲昭深弟。林大猷勳孫。周軫登□。〔六〕黃師貢壽侄。鄭焯 姚綿

吳希賢 方臨熙侄。宋□瞻雍子。〔七〕鄭淮興宗從侄。林時厚時讓從兄。俱府學。李仁傑煥子。陳華玉

蔡元美 鄭大江 吳宏密實從侄。陳謙實孫。林正 吳清觀侄。黃璉 陳傳 林鑑齋從侄。丘山諒

從兄。鄭續濟侄孫。吳孜繹思兄。上二人，俱儒士中式。

六年壬午 黃初解元。儒士中式。復姓王。許伯清仕從弟。林潤懸子。宋汝勤勳子。吳禮 彭鑑



張文淵勉子。陳音 余康 方榮 林仲壁 黃銅 陳按 林純顯侄。洪忠俱府學。林鈞但從侄。余祈繁文從侄。陳叔勉 王克謙 黃鐸官孫。林廷榮從叔。周卷弘侄。林堂 林孟和子。鄭師烈 顧宗美 李元鎮體廣侄。黃綱 朱文環 陳綱紀弟。上二人俱儒士中式。吳烈平海衛學。洪溥歲貢。應天中式。

八年甲申先是，七年癸未春二月，會試場屋災，詔移秋八月，至是春三月始廷對唱名。陳音 林誠 楊琅 吳宏密 吳希賢 鄭淮 陳按

成化元年乙酉 吳仲珠宏密從弟。林和 楊義瑛子。曾瑤 陳元綱岳侄。劉正隆 蔡信瑄從弟。

黃孟喬士弘孫。劉景輝學滋侄。翁槐世資從侄。鄭憲續侄。常福 林祥 陳懋源續從弟。俱府學。鄭

恩享華侄。朱弘紀復從弟。鄭鑣 許廷齊 方岳淵孫。儒士中式。葉璫繼從侄。陳良 柯燉潛族弟。

方珪 李元塋子。林講廷榮從弟。陳叔疇 吳世騰鐸思從侄。陳裕朝卿從兄。方廷章徵侄孫。許珀純

雅侄。鄭廉孟良侄孫。陳純 陳麟祥應魁子。林體英 黃銓 林光甫

二年丙戌 林孟和 林敷 陳岳 陳肅 黃仲昭 林正 黃璉 丘山 余祈繁 朱文環 余康

柯燉

四年戊子 黃文琳解元。銓從叔。儒士中式。謝宜善 朱愷 趙文仲紹獻子。陳察珪子。林釗文孫。

黃曰矩朝章子。史欽慶侄。林源坦侄孫。廖德徵 鄭繼 顧續 周公安倬仁兄。楊元銓子。俱府學。吳

腆 黃榮 李長源元鎮從弟。方彬守從弟。林謙 方文煒廷章從弟。宋嶽雍侄。吳詠宏密從弟。黃萬

碩泰侄。林瑱講從侄。朱悌悌弟。陳則孔紀子。上四人俱儒士中式。陳鯉應天中式。林本從 王玉榮平

海衛學。高昂儒士中式。

五年己丑 周瑛 方守 李元鎮 林和 方岳 方珪 廖德徵 陳鯉 蔡元美舊名添美。

七年辛卯 黃穆書子。鄭琳容侄。方朝清朝宗從弟。方秉元珪從叔。黃以禮 林文仁英弟。李

伯通體廣侄。陳熊敬侄。楊清琅侄。許仁評侄。陳聲遠 郭紹俱府學。黃節甫榮從叔。方以順熙

侄。載墀 柳照 林賓 許邦瓚戈著從叔。戴日新 潘偉 鄭璋 陳輪道潛孫。黃盪啓晦孫。黃體

勤興子。鄭欽 劉樂揚 黃瑛上六人俱儒士中式。徐聰安祖孫。順天中式。周剛 徐孟溥 余琦上三人俱

平海衛學。

八年壬辰 李仁傑探花。周軫 陳裕 黃榮 方彬 王玉榮 宋嶽

十年甲午 黃乾亨解元。深子。林淮 宋端儀汝勤子。方永 鄭漸 陳璟 翁端述子。翁巖世用

從侄。王朝器 陳瑞輪從兄。程禮 林元甫 黃芳體勤從弟。吳鑑 卓榕天錫從侄。顧叔龍孟高子。

林華 朱世增忠孫。陳邦瑞俱府學。吳昭陽保孫。吳黍徹侄。俞釗 吳希達希賢從弟。林選 黃

紀 李敬甫 彭甫鏐侄。吳講詠弟。王原雍偉侄。鄭徽立子。林沂榮子。宋璠貴陽從侄。李德美宏

曾孫。以上三人俱儒士中式。吳穀仲珠從侄。吳球俱平海衛學。陳衍長樂縣學。

十一年乙未 黃鐸 吳仲珠 陳懋源 朱愷 余琦 鄭欽 陳熊 黃乾亨 林淮 林元甫 吳穀

十三年丁酉 方憲守弟。鄭瑗義和子。黃秀穆弟。陳璫中侄。林典憲子。方珊珪弟。張宜珍文

淵姪。方璋璫兄。林俊宗孫。梁璋 余一正康從弟。鄭朝馨續從孫。李仁 程樂禮弟。吳濠續孫。

方維翰孟載子。陳員音弟。黃縉新民侄。方景淵朝清侄孫。俱府學。游儒 黃文璋文琳從弟。徐良珠

陳鍾璣侄。鄭育師陳孫。林邦輝 彭景 朱權津曾孫。丁襄 陳文履常孫。黃燮紀叔。鄭敏重光侄。

李文獻伯通從弟。蕭玉 陳暹上八人，俱儒士中式。陳玉振漳平縣學。

十四年戊戌 林俊 吳世騰 黃文琳 朱梯 黃節甫 吳昭 李德美 王朝器 吳球 陳邦瑞

十六年庚子 吳稜解元。觀侄。平海衛學。蔡大宣信從弟。高俊 李文利元弟。鄭中孚循初從弟。

陳世顯恩子。周傑榮從侄。張瑞治侄。黃士英 鄭光與 張連朝孫。陳珀璣族兄。程琮禮從弟。林

堪洪曾孫。陳倫 翁睦世用子。林哲甫元甫弟。俱府學。黃華榮弟。方山淵孫。黃憲緒從弟。鄭師漸

弟。柳熙照弟。黃瀾 周進隆坦子。林文昌坦從侄。李璜 吳鵬 丘天祐璣從侄。林英甫光甫兄。

洪幼愚上三人，俱儒士中式。張澤 余徵文孫。陳元俱平海衛學。

十七年辛丑 宋端儀 林沂 彭甫 翁巖 鄭瑗 張宜珍 丘天祐 林堪

十九年癸卯 陳仁解元。邦瑞從弟。丘汝亨天祐從侄。姚鳴和 歐泰 曾發 丘泰 周瓚 柯德贊

燮從弟。黃大中朝章孫。李有嘉元鎮從弟。鄭寶 余雲龍康子。宋時著 黃秩穆弟。吳瑄 林長繁

彭濬韶子。廖綱 周梯軫從弟。俱府學。陳晦純子。林道充智侄。鄭愈鑣侄。方璘寬子。陳士元

林宗重 朱泰愷從侄。朱文魁世增侄。上四人，俱儒士中式。鄭廓用大江子。平海衛學。

二十年甲辰 方璋 黃華 周進隆 姚鳴和

二十二年丙午 方良節朝清侄。林燮大猷子。藍璧 陳嘉謨克仁侄。陳彰諸侄。翁茂南世寶從

侄。李濬珏侄。藍應璧弟。陳曰漸潛子。陳允諧 曾琰瑤弟。俱府學。方讓繹從弟。鄭嘉祐循初子。

黃乾仁仲昭從侄。楊鐸琅從弟。吳教世騰侄孫。鄭庠廉弟。崔儀 洪創 王鑾 林汝明正從弟。楊文

命瑛孫。林光重 吳天與仲珠從侄。上七人，俱儒士中式。陳茂烈本衛軍生。林貫 鄭義 林華俱平海衛學。

陳珠鎮海衛學。柯拱北潛從侄。四川中式。

二十三年丁未 黃穆 彭景 張瑞 余徵 陳仁 陳晦 歐泰 林長繁 藍應

弘治二年己酉 鄭釗續侄。黃顯瑛孫。方瑛榮從弟。卓文涓天錫侄。鄭鍾 謝愷宜善孫。鄭岳

方琪秉元子。黃開顏常祖孫。丘謙謙弟。(八) 陳汝秀 郭紀紹弟。卓文徵天錫侄。林齊獻孫。俱府學。

陳伯獻瑛侄。黃銘 謝復 方良永良節兄。康恭 陳大咸 方文敏榮子。彭申甫弟。陳邦器邦瑞弟。

黃輝榮從弟。李天民瑛子。黃黍 黃相紀侄。陳謙山 吳明通仲珠從侄。林大霖上四人，俱儒士中式。

鄭京義從兄。劉朝興 鄭暨夏孫。俱平海衛學。

三年庚戌 方良永 方憲 崔儀 林夔 方良節 楊鐸 黃顯

五年壬子 張廷槐 李汝和 楊渤琅侄。蒲宣 林紹宗津孫。吳琬 陳舉音子。林有年元甫從

侄。林文集坦曾孫。陳華舉弟。俱府學。陳琳 黃守廉 方玘 張乾 林裡俊子。顧惟質 陳瓚

吳珍琛從弟。林鑑 吳彰德希賢侄。林康俊從叔。楊曰宗瓚從侄。林有祿哲甫子。陳世傑 方嶠上三

人，俱儒士。林照 陳箴 林瑩華叔。陳瑛上三人，俱衛學。

六年癸丑 陳珀 黃瀾 吳鵬 翁茂南 方璘 鄭岳 柯拱北

八年乙卯 宋元翰解元。端儀子。徐大用 李廷梧張源子。許効忠廷齊子。黃文雍 楊鳳日宗弟。

陳文淮元綱侄。柯英潛侄孫。林奎洪曾孫。林渠劍侄。朱子方勝曾侄孫。林侃俊弟。吳希由 林僖

侃弟。林與軫子。陳曰淑曰漸弟。翁機世用孫。鄭敏飾漸弟。林希範劍子。黃文鸞俱府學。徐元

稔錄後。李應舉純侄。林符廷榮侄。彭昆 余洛 李恭 黃汝顯 劉琳 黃元和 泰子。朱子宣子方

從兄。余經 李純 游昂 王中孚 玉榮侄。朱斌 陳汝玉上八人，俱儒士中式。

九年丙辰 陳茂烈 陳琳 丘泰 黃相

十一年戊午 林季瓊 智子。夏泰和 林富 彌宣孫。陳大謨 旅後。陳文滔 元綱子。黃希英 仲昭孫。

陳九疇 嘉謨子。俱府學。方以嘉 熙侄。黃科 雙弟。林茂達 思承子。鄭大有 中孚弟。方璐 臨子。陳世昭

林昇 渠侄。方師禹 熙孫。黃瑀 崔耀 林公正 林琨 余朝 方宜賢 瀾侄孫。周濂 梯從弟。陳餘鑒

環侄。上九人，俱儒士中式。吳景諒 應天中式。

十二年己未 陳伯獻 陳邦器 李廷梧 柯英 林季瓊 吳希由 陳文滔

十四年辛酉 黃肯堂 瀾子。林塾 彌宣子。陳河 載侄。黃元瑄 英子。周宣 球子。陳懋 仁子。彭

球 鑑侄孫。俞應辰 釗子。周大恒 瑩侄孫。陳深 河弟。馬思聰 余雲鴻 雲龍弟。趙宣 王鏐 俞慶雲

釗從侄。俱府學。陳艮山 謙山弟。黃鞏 林禎 俊子。程一嘉 樂子。余瓚 林近龍 載子。彭大治 甫子。

許瀚 評子。王詳 福侄。吳宗器 陳義 林大昇 黃體行 原謹子。方珩 珪從弟。朱儼 寬從侄。戴大資

許効 廉効忠從弟。趙神甫 文仲從侄。上三人，俱儒士中式。劉伯善 平海衛學。黃濂 警孫。仙游縣學。周啓 東湖

廣中式。宋源 廣東中式。

十五年壬戌 張廷槐 林茂達 徐元稔 林富 許瀚 林塾 黃體行 朱儼

十七年甲子 黃如金 解元。乾亨子。鄭玉 郭清 藍渠 應子。王大用 吳恕 沈健 黃希濩 希英

弟。周正瑛 侄。鄭敬道 傑子。林世明 時曾孫。楊大黍 日宗子。李孚先 濬子。陳咸 則孔子。俱府學。

宋卿 吳大田 秦侄。 顧標 吳文忠仲孫子。 陳贊 葉弟。 廖梯 黃待顯 綸侄。 陳傑 日漸子。 丁裕 襄

弟。 林馨 黃潛 高孟弟。 張慶 葉珩 上四人俱儒士中式。 林文卿 平海衛學。 歐亮 順天中式。

十八年乙丑 黃希英 黃輦 周宣 馬思聰 顧標 黃如金 陳贊

正德二年丁卯 林文俊 解元。 典從弟。 周大謨 瑛子。 鄭瓚 周澄 鄭懋德 邢鵬 卓居傳 丘茂

模山子。 陳黻 珠子。 姚永 綿孫。 黃希雍 如金弟。 吳洲 陳克恭 瑄孫。 張瀾 王萬山 王榮從侄。 俱府學。

李從龍 珏孫。 郭湍 清兄。 林以善 瑄從弟。 鄭光琬 遷善侄孫。 鄭棕 大有侄。 陳朝贊 儒士中式。 翁洪 世資

子。 順天中式。

三年戊辰 戴大寶 及弟 第三人。 陳華 李純 林近龍 王大用 吳恕 宋卿 鄭瓚 陳傑 姚永

五年庚午 黃庭宣 解元。 清寧曾孫。 林有孚 元甫子。 朱洪 梯子。 朱守為 黃行可 文雍子。 楊國本

高仁 姚鳴鸞 黃大源 變子。 黃珠 方彥 守子。 方從鯤 岳子。 鄭公奇 重光孫。 俱府學。 陳孔彰 劉大

清 林壇 洪曾孫。 林豫 孟和孫。 陳嘉譽 嘉謨從弟。 歐溥 洪子 誠楷侄。 游大川 周大柱 進隆侄。 廖

慶 鄭祥 華侄孫。 林嵩 世祥弟。 朱鳴陽 高通 林繼賢 瑄孫。 上四人俱儒士中式。

六年辛未 余瓚 鄭玉 郭清 沈健 林文俊 翁洪 鄭懋德 林有孚 朱鳴陽 高仁 黃大源

廖慶

八年癸酉 廖雲龍 德徽從侄。 林達 俊子。 馬明衡 思聰子。 洪珠 創侄。 黃漳 鐸侄。 洪鏘 忠侄。 常

儒甫 福子。 林介 鄭一 鵬 遷善孫。 丘其仁 天祐侄孫。 林益 謙兄。 林若周 時讓孫。 宋宣 張曰 韜 劉

勳 武曾孫。 周章 林大 輅 熊玄孫。 林仕鳳 吳音 承宗孫。 劉宣 俱府學。 陳士 載 姚鳴鳳 鳴鸞弟。 顧

陽和孟高曾孫。柯維熊英子。陳應之後侄孫。陳文講衍子。鄒思魯儒士中式。

九年甲戌 周大謨 俞應辰 彭大治 黃廷宣 林豫 鄭公奇 林達 馬明衡 劉勳 林大輅

十一年丙子 朱制解元。陳騰鸞 鄭洛書祥子。方夢麟岳孫。林茂竹文俊從弟。史梧欽孫。柯

維騏維熊弟。余濂琦子。陳琦 丘茂中山孫。郭日休 吳大本智侄孫。黃日敬相子。李詔 方重熙

良節子。方一桂宜賢子。方瀾迪孫。吳綾希由子。黃仕達謙玄孫。王鳳儀玉榮侄。王鳳靈鳳儀弟。俱

府學。林應聰堪子。方召南徵孫。林遷喬廷綱六世孫。王魯偉孫。林大謨黥孫。詹寬 蘇璞 陳大

珊 黃大經穆孫。姚正上三人俱儒士中式。黃抗平海衛學。吳大奎鎮海衛學。朱可宗璣子。河南中式。

十二年丁丑 藍渠 廖梯 黃待顯 葉珩 車居傳 姚鳴鳳 丘其仁 柯維熊 陳應之 林仕鳳

林應聰 鄭洛書 林茂竹 林遷喬 方瀾 王鳳靈 朱可宗 林若周 張日韜

十四年己卯 鄭弼倬侄。林德輝 劉富 鄭彥 吳一東 陳繼芳 陳大奇 吳翰詠孫。方重杰

良永子。黃世範俱府學。周寧宜從弟。許一新 林萃賢 鄭登高□子。(九) 周鳴鸞公安孫。吳選大田

從侄。儒士中式。吳從龍平海衛學。

十六年辛巳進士是年，以武廟南巡故，改庚辰爲辛巳。黃行可 姚鳴鸞 洪珠 洪鏘 林介 鄭一鵬

顧陽和 陳騰鑾 林益 史梧 丘茂中 郭日休 黃大經 姚正 詹寬 鄭登高

嘉靖元年壬午 丘愈解元。謙子。黃大廉 姚文炤永子。方一蘭一桂弟。宋大挺 黃金 陳祥麟

鄭綱瓚子。陳篋篋弟。馬呈瑞 林應標與詔侄孫。黃廷用廷宣從弟。林國輔 方重耿重熙弟。林文

華 曾志澄 黃懋恩洙孫。鄭子克 黃希韶希美弟。侯成志 翁泳洪弟。姚文燁永侄。柯維熊維熊

弟。俞昌言 魏一恭俱府學。 林雲同 潭子。 陳欽 吳裡鑑孫。 林大道 劉璋 周懋鼎進隆侄。 朱道

瀾 黃德純以體侄孫。 黃桂香守謙侄。 蔡廷春 林汝永洪玄孫。 林斌上五人，俱儒士中式。 余洲一正子。

黃九霄華子。 翁榛澄子。 俱順天中式。

二年癸未 廖雲龍 朱澍 陳大珊 柯維騏 方一桂 鄭弼 姚文炤 林文華 方一蘭 黃金

陳箎 林應標 朱道瀾 余洲

四年乙酉 林東海解元。 宗重子。 俞獻可應辰侄。 黃文炳洙從侄。 張秉壺文淵侄。 陳光華光明弟。

鄭大同 瓊侄。 陳雲程 陳憲 彭希賢 王俊 陳叙岳孫。 宋茂熙卿從侄。 沈良俱府學。 陳光明光華

兄。 余拱北 林華 陳待科鼎侄孫。 陳驥 林通大道兄。 張希虞洽孫。 林允宗 鄒守愚師曾子。 翁

桂泳侄。 周錕宣子。 上三人，俱儒士中式。 林穎澄孫。 歐志學俱平海衛學。

五年丙戌 林雲同 張文鎬 陳繼芳 吳翰 陳祥麟 鄒守愚 宋茂熙

七年戊子 陳彝孔彰子。 方宗重文煒孫。 吳煥章 高昭俊孫。 鄭道夫 雍瀾 林人紀 鄭汝舟

吳文煥 吳梓選侄。 鄭應鵬中孚子。 俱府學。 謝炯 張應鳳宜珍侄。 陳富春 丘隅 黃謹容潛侄。 儒士中

式。 戴廷璋平海衛學。 方直璘子。 順天中式。 楊汝惠日宗從弟。 廣西中式。 周包荒啓東子。 湖廣中式。

八年己丑 鄭綱 魏一恭 林東海 陳光華 鄭大同 林允宗 黃體容

十年辛卯 方正梁廷璋侄。 鄭顯弼從弟。 姚虞鳴鸞子。 方國佐 向延賢 林應鳳文俊侄。 林兆

金富孫。 陳須樂華子。 林培大霖侄。 余一鵬璣子。 俱府學。 黃應星宦去孫。 王一貫鳳儀子。 方大順

楊中孚慈去孫。 林煥 宋天民 鄭芸敬道侄。 吳雲臺教子。 陳位懋源孫。 陳雲衢岳孫。 黃獻可縉侄。



周瑞宣從弟。 唐時雍儒士中式。 王鵬廣東中式。

十一年壬辰 方召南 王大廉 黃德純 林華 雍瀾 鄭汝舟 姚虞 宋天民 陳位 黃獻可  
周瑞

十三年甲午 鄭富 林成立壽英玄孫。 林應采應標從弟。 朱端表儼子。 林萬潮富子。 周瀾哲從  
孫。 鄭質夫 李典廷梧從弟。 丘茂糖茂模弟。 謝明勗炯子。 方大樂永侄孫。 李仰止俱府學。 楊萬程

國本侄。 朱端明端表兄。 陳亮采 陳策琦子。 吳佐琛孫。 林一山渚曾孫。 康大和 陳烜 鄭鳳敏政  
子。 俞維屏應辰孫。 吳炳煥孫。 應天中式。

十四年乙未 康大和 黃廷用 鄭芸 黃文炳 陳雲衡 鄭富 楊萬程 陳策 鄭質夫  
十六年丁酉 歐天然泰弟。 黃洪昆肯堂子。 鄭鑒 陳應魁儼孫。 林應箕仕鳳子。 林安禎 張春

陳自然 鄭東白弼子。 劉自省 丘秉文茂糖子。 黃懋官希獲子。 黃繼宗 黃希白仲昭孫。 鄭用寶俱府  
學。 林懋植文侄孫。 黃兆亨章侄孫。 鄭文煥思亨侄孫。 龔雲從 鄭俊徵曾孫。 方鯤以順孫。 鄭守德

丘預達 陳賓憲從弟。 儒士中式。 吳紳希由子。 仙游學縣。 楊皆 方夢龍廷侄。 順天中式。 黃必賢九曾侄。 監  
生。 順天中式。

十七年戊戌 周寧 張秉壺 彭希賢 陳叙 周鯤 方國佐 林萬潮 俞維屏 林懋植 黃洪昆  
陳應魁 林應箕 黃懋官 楊皆

十九年庚子 李長盛孚先子。 徐觀瀾元穆侄孫。 黃玉藻秩子。 林芸崇玄孫。 柯本維熊子。 周讓  
姚鳴佩正侄。 周京卷侄。 俱府學。 陳九經 方興邦山曾孫。 朱資璠侄。 林秋英華弟。 黃應策璠子。

林議璋孫。陳甘雨世傑孫。宋曰仁 林鳳鳴奎孫。羅士智 張英口轄弟。趙大華 李宜春 昌應會 李德用仰止弟。上三人，俱儒士中式。阮琳顯侄孫。順天中式。

二十年辛丑 方大樂 龔雲從 李仰止 黃應策 李長盛 林議 張英

二十二年癸卯 黃繼周解元。繼宗弟。黃謙華曾孫。林仰成元甫孫。江從春 盧士行 曾彬 李

日新長盛弟。吳應徵 陳文信箋子。傅卿 吳三畏希賢曾孫。彭文質大治子。高萬仞昭子。林茂桂

茂竹從弟。俱府學。趙世德 鄭茂敬道子。張斌 顧日新陽和從侄。朱文漢 陳其箴大奇子。黃啓初謹

曾孫。張重同侄孫。林應樵應采弟。林應鵬 俞紹應辰侄。黃應升 林應昌 鄭廷俊述曾侄孫。上七人

俱儒士中式。徐純觀瀾從侄，仙游縣學。陳九德順天中式。林文寶廣西中式。吳廣徵曾孫。廣東中式。

二十三年甲辰 余一鵬 丘秉文 陳甘雨 李宜春 傅卿

二十五年丙午 陳南星 陳言 郭應聘謝子。林炳章希範孫。俞大有慶雲孫。吳階音從弟。方

萬有臨孫。陳所有應之子。徐一陽 吳元王大田子。林鳴岡 林應節 高超通子。陳裕俱府學。陳

文靜聲遠曾孫。陳龍琳侄。游日就 林建邦培子。楊繼宗元曾孫。黃佳 張佐 林大震 楊休鐸孫。

鄭雲鵬 李思謙元鎮曾孫。王絹上三人，俱平海衛學。

二十六年丁未 鄭東白 丘預達 宋曰仁 朱文漢 陳言 高超

二十八年己酉 黃士觀解元。洙子。昌應時應會弟。彭希顏希賢從弟。方叔猷里照子。黃夢韓

林應元 翁夢鯉 林澄同玄孫。林挺章應標子。張秉鐸秉奎從兄。陳燁雲衢侄。蕭謙光甫孫。林燦章

挺章兄。方攸躋叔猷弟。楊舉俱府學。游日章日就兄。廖寶 蕭奇勳桂子。林憲滄國輔侄。平海衛學。

林萬里江西中式。

二十九年庚戌(二〇) 郭應聘 林挺章 林兆金 柯本 黃謙 黃士觀 昌應時 翁夢鯉 方攸躋

三十一壬子 黃星耀解元。日敬侄。 黃休泰 蔣龍 李寅實誼子。 林文星 陳雲桂 翁廷瓚桂

侄。 蕭標奇勳叔。 吳泮 林大觀智曾孫。 翁瑩世用曾孫。 林大槐豫從孫。 林大輔仲瞻孫。 陳志叙子。

林啓昌炳章從弟。 方瀚攸躋子。俱府學。 陳希登世顯孫。 宋大昇元翰侄。 余應鴻 林潤還高從侄。 方攸

績良水孫。上二人俱以儒士中式。

三十二年癸丑 鄭茂 方萬有 吳元玉 蕭奇勳 黃休泰 李寅實 陳志 方攸績

三十四年乙卯 黃懋冲解元。 陳誥琳侄孫。 黃鳴春希英孫。 鄭文昇淮孫。 方攸賓良節孫。 唐時

雨時雍弟。 王宜綢子。 陳應秋 朱文科 戴科廷璋子。 史應嶽梧侄。 林敦謙俱府學。 林奇迪祥鳳孫。

林大輪大轅弟。 康雲程大和從侄。 方繼曾以嘉孫。 陳宗虞瓊孫。 林應騰 顧望海 陳紀 葉士賓弟

子。儒士中式。 康日章懷安縣學。

三十五年丙辰 林潤 戴科

三十七年戊午 林三重 林民悅允宗子。 徐廷龍 陳大璘克仁曾孫。 陳其範其猷弟。 鄭應齡一鵬

子。 史頌梧孫。 高世芳昂孫。 程拱宸 林焜章炳章弟。 朱彬文漢侄。 陳徽言日漸孫。 曾知經俱府

學。 林澄源 陳思忠欽從侄。 陸應豸 余翔 林民止民悅兄。 方亮采平海衛學。

三十八年己未 彭文質 林應節 游日章 林燦章 陳雲桂 林奇迪 林澄源 陳思忠

四十年辛酉 葉九金士賓侄。 方有翼鼎玄孫。 宋効周 張觀光 宋邦達 唐維城時雍子。 陳應梅

七載侄孫。俱府學。鄭三俊、林東升、吳一奇、吳日強、紳子。鄭遷憲侄。胡秉文、平海衛學。鄒迪、守恩子。廣東中式。

四十一年壬戌 葉士賓 王宜

四十二年甲子 王大道解元。林敬冕、陳經邦言子。林鳴盛、敬冕從兄。林廷陞、汝水子。沈夢熊

良子。唐守欽、蕭奇熊、奇勳弟。周希賢、俱府學。李廷春、陳文星、吳道立、三畏侄。平海衛學。康、韓太和子。應天中式。黃議謙弟。順天中式。

四十四年乙丑 陳經邦 陳誥 唐維城

隆慶元年丁卯 方沆、攸隣子。陳文熙、曾夢鰲、黃陽、夢韓兄。唐師錫、時雍子。游桂芳、陳一飭、宣

子。林廷鶴、應節子。俱府學。宋萬集、宣嗣子。黃元美、秩孫。林兆箕、富孫。林恒茂、竹子。陳祖堯、吳時及。林大經、上一人、俱平海衛學。戴洪謨、科從侄。順天中式。

二年戊辰 程洪宸 葉九金 鄭遷 林敬冕 方沆 陳祖堯

四年庚午 陳瑛 林維嶽 吳紹馨、腴曾孫。林應龍、懋植弟。廖參可、雲龍從侄。俱府學。姚養科、僑

上。黃起先、上觀子。平海衛學。

萬曆元年癸酉 陳王道 柯南金、濟族孫。陳王策 林煥章、應采子。魏雲琳 段全斌 方元突、宗

重子。俱府學。許一星 林烱章、敬冕從弟。蘇廷龍 曾應雷 黃宸、應策孫。林兆珂、富孫。徐應麟 吳日謹、紳侄。李多見、德用子。上二人、俱仙游學。

二年甲戌 周希賢 許一星 陳瑛 李多見 曾夢鰲 林鳴盛 林兆珂 宋萬葉 林民止 陳一

魴

四年丙子 吳獻台三畏子。鄭正規 鄭須德富孫。朱邦羣 俞近華維屏子。余星琦曾孫。方浩

良節曾孫。林綜汝永孫。鄭元輔弼孫。曾光魯俱府學。沈維坦健孫。黃闓仲昭曾孫。陳揚善 林休

徵 林柱邦 方攸箴良永孫。謝應典 林清偉上二人俱順天中式。

五年丁丑 唐守欽 林休徵 謝應典 陳揚善 黃袞

七年己卯 宋獻瑞卿孫。陳其志伯獻曾孫。李廷英寅實子。林堯俞煥章子。吳洪績 黃鳴廷仲昭

曾孫。柯茂竹維驥孫。林翰英熊七世孫。俱府學。余雲標應鴻子。蔡元旦 方涑叔猷子。魏雲璜雲琳

弟。林道楠輝玄孫。平海衛學。游應龍 黃騰春俱順天中式。陳善監生。應天中式。

八年庚辰 林民悅 吳獻台 游應龍 林廷陞

十年壬午 林璣璋曾孫。曾曰唯 趙晉弼世德子。宋光台萬葉子。程達林 鄭俶弼子。俱府學。

劉宗卿 方萬策萬有弟。林懋卿福州府學。蘇眉山監生。黃松林洪昆子。監生。俱順天中式。戴大槐洪讓

子。監生。應天中式。

十一年癸卯 方萬策 陳其志 柯茂竹 黃騰春 林道楠

十三年乙酉 宋萬略 戴士衡洪讓孫。郭維藩清孫。林叔果傳孫。謝國珍 侯清成志侄。鄭陽

復俱府學。丘憲周天祐玄孫。昌維基應時侄。黃鳴瀾希白孫。林憲曾大猷孫。蕭奇休奇熊弟。李文瀚

林文輝上三人俱平海衛學。陳翰臣經邦子。監生。應天中式。

十四年丙戌 鄭瑞星 吳洪績 林璣 蕭奇休 曾光魯

十六年戊子 李允懋 林維喬 林兆珣富孫 方承郁叔猷孫 俱府學。 陳箴宸 黃敏獻可孫 彭憲范文質子。 方演攸賓子 劉養純 蘇子芳 陳濤上三人俱平海衛學。

十七年己丑 林堯俞 戴士衡

十九年辛卯 張文煥 游鳳翔俱府學。 陳玄藻九德孫 朱文瀾 陳南金 盧三聘同五世孫 盧廷

選質中七世孫。 林如喬上二人俱平海衛學。 林諸雲同子 應天中式。 張鰲監生 順天中式。 彭悌湖廣中式。

二十年壬辰 盧廷選

二十二年甲午 黃起龍布英曾孫 林應材 林恭章萬里子 俞維宇紹子 曾拱璧雲鸞子 鄭鯉俱府學。

陳名岳 周如磐 鄭如璋 朱之臣邦彥孫 方進上二人俱平海衛學。

二十三年乙未 朱文瀾 俞維宇

二十五年丁酉 林剛中 曾應聰知經子 阮萬欽琳曾孫 林翹楚 曾光弟 許大經 吳起閩

吳堡俱府學。 陳泰交 黃景星 方承簾沆子 許穆

二十六年戊戌 周如磐 黃起龍 方承郁 林恭章

二十八年庚子 林咨益大輔子 黃休烈休泰弟 黃堯臣 姚瀚鳴鸞曾孫 方尚祖 張濤秉鐸子。

游伯槐日章子 俱府學。 俞一黼 張名時 陳臣忠王策子 吳獻宸 徐秉元 謝巽卿 宋祖騰上二人俱平海衛學。

陳天馨 林之瀚俱順天中式。

二十九年辛丑 黃景星 陳名岳

三十一年癸卯 余上芳翔從弟 徐景濂 黃鳴喬懋官孫 陳騰鳳 林光庭 林雲翔 陳閩麒日淑

玄孫。張士旂 黃上龍順曾侄孫。卓邁俱府學。柯杲茂竹子。潘應龍 周賀鳴鸞侄孫。陳拱壁南星侄

孫。唐玉時雨曾孫。鄒潘平海衛學。鄭懋華寶玄孫。應天中式。

三十二甲辰 宋祖騰 黃堯臣 林光庭 陳臣忠 柯杲 黃鳴喬

三十四年丙午 林玄安祖侄孫。周燭京曾孫。鄭爲 黃諫卿陽侄孫。林鳳翀時望玄孫。俱府學。林

贊 倪宗文 徐羽驊 宋光蘭 李宗著廷春侄。林高楠遷高侄。陳鍾英 歐燁上二人。俱平海學。余震星

子。監生。順天中式。柯重光 陳應元志從弟。俱應天中式。

三十五年丁未 陳騰鳳 周燭 游伯槐 潘應龍 唐玉 鄭懋華

三十七年己酉 周迪解元。澄曾孫 武觀光 周憲魁希賢侄。朱家相 王良臣洋玄孫。林銘鼎堯俞

子。彭成昭 林鳴璠 葉天陞九金侄。何鳳瀛 林震元大輔侄。許國器 龔兆龍霖子。俱府學。宋禎

漢光台子。黃日炳

三十八年庚戌 林銘鼎 陳玄藻

四十年壬子 林齊聖富玄孫。游雲鴻應龍侄。黃官待顯曾孫。黃飛鯤懋恩孫。俱府學。林鳳翥鳳翀

弟。楊振元萬程孫。林中星近龍玄孫。陳會江應梅子。曾楚卿 黃繩武兆京孫。郭世忠逢高子。林

上鼎幾侄。吳兆元獻宸從弟。橋上中式。方承笏沆子。監生。順天中式。朱純卿文科子。林尚炫俱應天中

式。

四十一年癸丑 朱之臣 陳應元 方承笏 徐景濂 曾楚卿 吳兆元

四十三年乙卯 宋修對卿玄孫。朱繼祚鳴陽孫。俱府學。彭汝楠文質孫。陳光翰其箴孫。林銘盤煥

章孫。

吳學曾煥玄孫。許璟 李元勳 黃幼珪景星侄。上三人，俱平海衛學。

四十四年丙辰 林贊 葉天陞 宋禎漢 游雲鴻 宋光蘭 林鳴璠 彭汝楠

四十六年戊午 陳其仁思忠侄。林一桂恒孫。俱府學。林堯勳 張鑛 宋元輔光蘭弟。徐人玉

陳廷機志孫。黃鳴俊鳴喬從弟。

陳璫平海衛學。

陳勳平海衛學。

陳明時平海衛學。

鄭仲友儒士中式。

四十七年己未 林咨益 陳其仁 朱繼祚 卓邁 許國器 黃鳴俊  
薦辟、貢、監賢者雜見列傳中。

〔校記〕

〔一〕「海」字，各本原脫，據《宋史》本傳補。

〔二〕〔三〕「薛彌克」，本傳及弘治《八閩通志》卷五十四「選舉」作「薛彌充」。

〔四〕「妾猶知遵禮義」上，據詩律，當脫一字。

〔五〕「林環狀」，各本原作「狀元林環」，據本書體例改。

〔六〕「瑩」下，各本原闕一字。

〔七〕「宋」下，各本原闕一字。

〔八〕「謙弟」，原文如此。

〔九〕「子」上，各本原殘一字。

〔一〇〕「庚戌」，各本原作「丙戌」，據方詩銘《中國歷史紀年表》改。



# 閩書卷之一百九

英舊志 縉紳

興化府 莆田縣五

皇朝

有傳

林廷綱曾孫遷喬。遷喬從侄孫潤。(一) 林昂子祥鳳。祥鳳孫奇迪附。 林圭孫宗。宗孫俊。俊子達。 林洪曾孫

堪、塾、壇、奎、玄孫富、汝水。堪子應驄。壇子雲同。富子萬潮。洪從侄長清。 林長懋弟道節。 林環孫倖。倖子楨附。環侄

思承。思承子茂達。 林文曾孫集、希範。(二) 玄孫焜章。曾侄孫應標。應標子挺章。(三) 從弟煥章。(四) 煥章子堯俞。 林智

曾孫大輔。 林時讓孫若周。 林永齡 林淮 林元甫子有孚。孫仰成附。侄有祿。從侄有年。 林大輅

林廷綱 唐「九牧」藻之裔。洪武初，詔郡縣弟子員學優者入國子監，廷綱在選。太祖親試，擢吏科

給事中，盡言直諫，因賜名恒忠，錫之上尊。十二年，以歸省請，太祖欣然可之。明日，陛辭，上親製勅符諭之，且令人書副以歸。還朝，陞中書舍人，兼太子贊善，與宋璉、揭樞同知制誥。詞藻聲華，適出人上。

太祖游江間殿，首倡詩，廷綱奉旨足之。太祖命作《春江漁父圖》詩，廷綱特稱旨，命題於內殿。後以他事

賜自盡，上意尋悟，然已無及。命葬太平門外，立石旌之。有《林舍人詩》若干卷。孫書童，見閭巷。曾孫遷喬。

遷喬 正德進士，以刑部郎諫武廟南巡，罷官。從侄潤。

潤 字若雨。除臨川令，嘗以勾攝之永豐，適盜猝至，城幾殆，潤爲畫守便宜，賊竟卻。以治行選南御史，將行，分宜相嵩子世蕃，侍郎也，置酒與諸南御史別，諸御史座上戢戢爲恭敬，獨潤抵掌發舒，若無世蕃者。通州人祭酒沈坤，家居，素跌宕負氣，借糾衆防倭，以軍法殺其鄉人，縱妾父持鹽利，受賈人金，營葬父，謀敵其旁地，人墳墓有妨者，輒剷除之。潤至，首發其事，坤坐下獄，死。副都御史鄢懋卿者，分宜相嵩最近幸門士也。副都御史既坐院，例無外遣，忽有詔令權理長蘆、河東、兩淮鹽，佐縣官備邊費。懋卿所至，搜括以奉嵩子世蕃歡，其所權金無能佐備邊，半歲而道路罷供億，有司窮苞賄。伊王典模爲淫暴，欲廣拓王邸，開地脉，以當王氣，疏請修治其先王墳，先遣人賂相嵩，取中旨可之。潤並具條上，且詆及相嵩。嵩在事，取中旨，並報聞而已。居無何，相嵩爲御史鄒應龍所劾，世宗赫然怒，罷嵩相。嵩子世蕃坐謫戍。懋卿、伊藩亦先後敗，懋卿坐戍，伊藩坐削爵。而其端皆自潤發之。世蕃之戍也，其籍在雷州，而有徽人羅龍文者，自總制胡宗憲所得通於相嵩，除官中書舍人，素與世蕃厚善，亦坐遣戍，其伍籍在潯州，然皆私過其家，不往之戍所。世蕃家居，多不法事，大治私第，役使鄉衆。而龍文時時人分宜，陰與世蕃計事。會潤巡視江上，備江洋盜，江盜之強劫人者，皆有土豪巨室爲窩主，而龍文有匿盜跡。潤密檄徽州推官栗祁偵捕龍文，具知龍文在世蕃所，卽上書：「世蕃、龍文二凶狂諄，當誅死，陛下寬其罪，不自悔恨，反懷怨望，蔑國法，身坐私家不赴伍。龍文居常，衣蟒衣，環列妓女，招集惡少，出人靡常。世蕃

暴橫鄉里，不異其在朝，或肆訕毀，或縱淫樂，或奪人財產，鄉里頌冤官司動百計。近以造屋爲名，聚衆至四千餘人，人心動搖，百姓逃竄。以世蕃之逆，濟以龍文之險，蹤跡莫測，禍機所伏，乞械致京師，明正二凶罪。」疏入，世宗卽以世蕃、龍文付濶逮捕。此時世蕃兒紹庭尚官錦衣，急足報世蕃，世蕃急赴戍。濶馳下九江，遣軍捕世蕃，則世蕃到戍二日耳。而龍文自分宜走入梧州，梧守得朝旨，直卽謁舍收捕之。濶既得世蕃、龍文，送京師，復論世蕃招致無賴亡命人諸不法狀，勢且爲大逆不道。於是天子爲置獄，誅磔世蕃、龍文，搜捕其黨與，籍其家貲財。相嵩獨身貧，寄客以死。於是天子知濶，擢南京通政司參議，累陞副都御史，巡撫應天。濶之始至官也，江南大吏曰：「夫夫也，死祭酒，削藩王，戍都御史，餒故相，磔一侍郎與中書舍人者也。」皆重足立。濶至，則寬然長者，所按部延見父老，問民疾苦，其所條上封事，皆鑿鑿關極理道，究生民之利病。尋卒官，年四十而已。櫬歸，莆人背城四十里，各爲位，遮道祭哭凡三日。人城之日，士大夫素車白衣迎之郊，而持幡酌酒嚮哭，擁觀至不得行。蓋先是莆城陷後，濶爲莆人疏請蠲租三歲，仍乞帑金復學建宮，并予諸書生金，郡人德之，故其櫬歸之日，德之深而思之至也。

林岳 字魯瞻，亦藻裔。洪武中鄉貢，授蘇州訓導。九載秩滿，諸生詣闕乞留。又九載，陞程鄉教諭。丁外艱，改仁化，移疾歸。爲人簡儉自得，疏散冲曠，有晉人風度。家無甌石，不計也。每歲大比，交聘文衡，赴者以得人爲賀。詩文敏速，兼精書法。名家屏障，士夫卷軸，不得岳書筆詩草，相誚謂俗。弟講，天台訓導。子祥鳳，舉鄉貢，爲鄆城訓導，重義善教。正統中，擢監察御史。扈從北狩，死土木。孫奇迪，嘉靖中進士，禮部郎中，有才尚。

林圭 字信玉，唐「九牧」蘊裔。元延祐進士岡孫，其祖也。洪武初，舉明經，爲莆庠訓導，陞寧國教

諭。治經有法，工古文詞，勤渠教事。居儒官三十餘年，六典文衡。永樂間，應召修《大典》，以老，予致仕。平生篤倫敦誼。元季兵起，祖母避難山中，與兄璜繼歿。其後，兄瑛、璉又歿。圭辛苦負葬，并葬其從父兄、外父母，凡數喪。孤幼盈室，撫教成立。及致仕，歸視其子教諭乾於如皋，遇道殣，善視之，至與同飲食。年九十四而終。孫宗、越，皆舉鄉薦。

宗字存敬。天順中授蘄州學正。溫雅醞藉，教人以體用之學。晨夕察生徒勤惰，諄諄教誨，出於至誠。學者建祠學官祀之。孫俊、侃、僖。俊，見下。侃，南雄通判。僖，壽州知州，性嚴政肅，崇儒愛士。

俊字待用。成化中進士，授刑部主事，遷署員外郎。僧繼曉以秘術得幸，藉朝命建永昌寺，而太監梁芳主之，費內帑以數十萬。時言路久塞，臺諫噤莫言。俊上疏曰：「謹按妖僧繼曉，本壬儉宵人，多方賁緣，誤蒙眷異，敢肆無忌，惑亂聖聰。大發內庫，蓋造佛宇，使陛下蹈唐憲、梁武之轍。居者遷毀，勞者不休，坐令民生不安，邊境不寧。而於聖壽未必能益，國祚未必能綿。太監梁芳，欺罔如趙高，奢侈如石崇。數年以進貢買辦爲名，盜祖宗百餘年府庫殆盡，家貲山積，尚懷不足，所在風擾，過昔汪直，薦進繼曉，陰求蓋寺，外謂陛下欲之。夫天下猶身，賢才元氣，財貨骨肉，小人疾病也。梁芳耗元氣，削骨肉，引以疾病，重爲身危。臣謂不斬繼曉，天下之禍未可言也。」疏入，下錦衣獄杖三十，謫姚州判官。後府經歷張黻疏救，亦下獄，謫施宗州知州。初，俊書疏鎖吏邸舍，吏大駭，扣頭泣曰：「疏入，彼此均死。公義激，或所甘心，何吏累也？」俊曰：「不爾相及。」俊妻覺之，不敢以諫。侍講吳希賢與俊厚，來止之。俊曰：「死後煩君一傳耳。」投赴通政司。通政使張某屏讀，嘆曰：「君言甚正。雷霆之下，尚宜再思。」俊曰：

「吾思已三。」至是，直聲大震，都下傳草，有繪圖而驚者。成化二十年也。其明年元日，星變，叙復南部。孝宗卽位，廷臣交薦，擢雲南按察副使。南京御史姜綰等爲守備太監蔣琮劾奏，多左遷者，俊上章論救。明年，用薦擢本司按察使。又明年，調湖廣。內臣以事至境，例有餽送，俊獨不與。從此，吏部屢擬遷，不報。會境內雨雪災異，俊疏曰：「竊見湖廣一省，自弘治六年十一月 日以來，連大雨雪二十九日夜。至十二月初四日夜，大雷電，風雨卒暴，雹霰交作，陰霧晝晦，雨水成冰，膠結纏綴，折裂震野。鷹饑附人，虎窮入市，其他禽獸手可攫取，頭畜凍死殆盡。薪米踊貴，軍民僵絕。地方之變，誠爲非常。刑之爲道，召災尤易。臣提刑無狀，死不足贖，然或疑他有致之者。貴州借調官軍，借運糧餉，軍苦戰鬪，民疲輓輸。都勻之征，勢或不得已者，斯臣所未喻也。見造興、岐二府，役繁浩大，吉府比復增益。夫府第太大，則驕侈隨之。淺近而論，創蓋艱鉅，則修葺爲難，居人寂寞，則疾疢多生。臣恐興、岐二府宜小不宜大，吉府宜修不宜蓋，又宜循寧、襄、德三王府故事，屋用銅瓦，毋用琉璃及白石雕刻闌干等物，且著爲定令，廣諭親王，則陛下內不失親親之恩，外不失愛民之仁。臣聞直隸、河南、山陝、江浙、川貴又皆大雪，臣復疑焉。夫雨，陰也。雪，雨之陰也。雹，亦陰也。大雪連月且廣。又雹，陰縱也。雷雹不應冬而有，不應雪而有，不應諸郡同有陰脇陽急且甚也。水少，陽也。陰脇，則冰。是皆陰盛之象，恒寒之罰。陛下宜默思博考，深究致災之原。」奏上，皆觸時忌，久不調。尋引疾乞休。已，言官交章論薦，十二年，起廣東右布政使，辭。又二年，起南京右僉都御史，總督巡江，兼管操江。既至，再疏乞歸，不許。頃之，復疏：「臣聞雲南等處，地震山崩，災變異常。今年正朔，陝西延安、朝邑等二十餘處，同時地震，搖倒官民房屋五十餘間，壓死人民頭畜甚衆。地裂水湧，災變尤異。方今北虜陸梁，久聚河套。萬一制勝無常，可憂非小。又荆、

瑞、九江等處，烏合強徒，輕竊名號，敵殺官兵。臣觀近時，科差日重，人民日貧，誠恐草澤間有相煽起者。臣又聞，漢宣帝本始間地震，詔問經學、賢良方正之士，無敢端言，故有霍家之禍。夫宣帝賢君也，霍光賢臣也，謂帝不念光家耶？事不可料，政亦類然。臣望陛下於宮闈、外戚、內侍、柄臣，靜思而善處之，未有謹而太過者也。他如齋醮之設，褻天瀆神，不惟無福，實足召災。南京、蘇州織造，花樣太巧，丈尺太長。松江大紅布、太倉洗白布太細。古人謂之，服妖費財勞人，災亦繇此。至於占役當清，冗食當汰，工作當止，供應當省，賞賜當節，儉德當謹，逸欲當戒，佞幸當遠，士君子當親，皆陛下所宜修人事以回天變者。臣又聞華封人祝聖人曰：『多男子。』詩歌后妃則曰：『百斯男。』今中外人心日願陛下支庶振詵，而難於言，臣不忍終負，敢併昧死。」時上獨篤張皇后，不選置後宮，廣儲貳，外戚寵盛，奄宦寬縱，其他齋醮、織造、冗食、蠹用，皆朝紳所諱。頃之，疏薦禮部侍郎謝鐸、太僕少卿儲瓘、光祿少卿楊廉、致仕副使曹時中、處士劉閔可錄用以教太子。因言：「陛下不邇聲色，不事游畋，勤學納諫，畏天敬民，誠孚九廟，孝徹兩宮，此身教也。然古先帝王暨我祖宗，鷄鳴視朝，終日接見群臣，詢民講治。在深宮極少，不驢神佞佛，不作無益。飲食服用，至朴無華，誅罰爵賞，至公無私。故德修政舉，化洽俗成，允陛下所宜夙勉者。更望陛下以嗣息未多，及西北邊爲意。其大小臣工，有直率積忤如周經、許進、楊茂元輩人，乞亟收錄。是亦教皇太子弘量容直之一端。」江西建昌民王武作賊，巡撫都御史韓邦問捕擊無功，上命俊往視。俊至，招降擒撫，武等悉散，有旨即以俊代邦問。俊奏：「昔朱熹劾提刑唐仲友，奪命授熹，熹辭不拜。包拯劾三司使宋祁，解職與拯，拯拜不辭。二人美刺，具見當日。臣跡類然，不敢竊位。」不許。於是，均稅糧，平徭役。教民自爲義倉、義學、義塚，名阜俗三義。發賑賤糶，慎獄申禁，西政大舉。居頃，以母喪歸，爲寧

庶人所奏，責對狀，乃罷。故事，凡外官，朝廷有大慶賀禮，惟三司掌印官合行會城，其他若鎮巡、守巡有使委者，則隨所在展敬而已。時寧庶人逆節有漸，俊數裁之。庶人嘗乞換琉璃瓦殿，有旨於引錢內支二萬兩給換，俊言：「古者采椽不斷，茅茨不剪，土階贊堯，卑官頌禹，儒服河間，樂善東平。湘州之儉約，鎮西之輕財，皆帝王藩服美德也。寧府移封之初，序則至親，再造之會，國值至富，然皆不用琉璃瓦者，寧之先王豈非有遐慕焉。今遽改之，數世之後，非孝子順孫所以承前美。賢王讀書識事，言多師古，臣數侍教，被禮獨優，亦宜私有以報王。但小人先合，君子不同，孟軻曰：『齊人敬，莫如我也。』伏望聖明篤懿，親斷大義，毋涉叔段京鄙之求，吳王几杖之賜。」庶人以是啣俊甚，至是，奏俊「每於萬壽節近日，不行慶賀，便巡所屬」。旨令對狀云。武宗卽位，兩京言官交薦，得旨起用。及奏授，竟不行。江西士夫群詣吏部，必再得之，乃陞右副都御史，巡撫其地。俊復疏辭，寧庶人不欲俊往，密賂劉瑾特許焉。尋丁父憂。正德四年，改巡湖廣。四川賊藍廷瑞、鄢本恕、廖恩等倡亂兩川，總制尚書洪鍾等連年討之無功，復改俊四川，勦平之。俊素輕官爵，屢起屢辭，至是欲殺賊報國，乃倍道去。至通江，先後斬獲賊首廖麻子、麻六兒、饒老人，生擒廖惠、王仲甫，凡得首級三千三百五十餘，因追過大小巴山，分蹙之於星子，於住河，於麻柳，於齊眉，於高冠山，於神廟岡，於三十六盤，每戰皆捷。至繡鷄嶺，兵奮勇過河，衝陣追北二十餘里。至修溪，復前後擒斬千三百餘人。而頃之，瀘州故盜曹甫謀據江津，俊馳赴之，卽以其年元旦乘賊醉，夜半圍燒之，遂斬曹濬、曹洵、曹玉等，前後斬獲千三百二十餘人，燒死九百餘人。而藍、鄢與其黨復熾，復使永順土舍彭世麟擒之以伏兵，凡得廷瑞、本恕及王金珠等二十八人，餘賊奔潰過河，官兵追圍擒斬及溺死者七百餘人。捷聞，降勅獎勵，進右都御史，賜銀幣，是爲正德五年也。俊以殺賊非本心，不能撫，徒勦

之，悉疏辭。其冬，曹甫餘黨方四等復收合數萬人來攻，江津總兵追擊，大敗之，復有銀幣賜俊，復力辭，歸功將吏焉。先是，劉瑾竊政，俊正家居，嘗具草劾瑾，且上之，後以在軍，無暇，至是瑾誅，疏賀并錄前奏聞，且曰：「非欲銜事後之贊詞，亦欲天下後世知忠憤所激，雖老病退遠之臣，猶不能已。制治保邦之主，所以信文武之臣者，不得不專，杜塞禍亂者，不得不早。」疏末更言：「先朝王振之後，保無振也，面有吉祥，吉祥之後，保無吉祥也，而有劉瑾。得隴望蜀，窺竊富貴，其人何限量？」蓋指切後來當事者。有旨責俊：「草久成，當日不奏，明懷奸畏罪。」令對狀，俊自服妄言，乃已。又，軍中奏功，故多爲權要所冒，俊一切拒之，至是益見嫉。忽中旨毋辭賞，聽辭右都御史，致仕。俊當官精勤切實，所至爲民求隱，嚴官吏而黜陟之。其在雲南，深險瘴毒，莫不涉履。巡撫江西，人山穿谷，茅宿草飯。詣視賊屯，或入其穴壘，單車撫諭，或住坐旬日，或再三至。凡八月，巡八郡三十七縣，其勤如此。故言永昌寺也，又好斥毀淫祠。雲南鶴慶寺有活佛，歲時士女萬人爭泥金其面，俊命焚之，以金人官。父老言：「犯者能致雹損稼。」俊不聽，既連歲登稔，民乃不惑。及他先後所至，斥毀以萬計。吏部尚書楊一清連薦爲南北掌院及本兵，皆不果。寧庶人反後，科道官薦俊：「當庶人竊名賈譽之日，獨發京鄙，几杖之譬，先見足錄。」亦不用。世宗卽位，勅起工部尚書，凡三辭，上曰：「新政之初，群賢滿朝，朕佇俟焉。」尋改刑部尚書。上欲推尊獻皇帝，舉朝謏詞，俊遂次考輯《歷代成禮論》以進。又疏請親君子，遠小人。及陛見，上注視久之，朝士皆竦觀曰：「林先生來矣。」俊權寓朝房，並不僦室，遇事屢有論奏。居歲餘，五乞致仕。頃之，管工太監崔文名下李陽鳳等，時向作頭宋鉅科斂不遂，因譖鉅於文，捉杖幾死，事下刑部。文夤緣內降，取付鎮撫。俊留人不遣，疏言：「祖宗朝以刑獄歸法司，自劉瑾、錢寧等擅權相繼，雖元惡大憝，意中所愛，輒奪付鎮撫，



文致爲奸，坐使劇盜四起，巨逆繼作，皆陛下所習聞而痛惡者。今天下方仰頌中興，不意有此未思之舉，乞仍付臣或都察院問治。」上不納。明日，俊復執奏，上怒，再責俊。俊回奏：「我祖宗以刑獄付法司，以緝獲姦盜付鎮撫，訊鞫既得，猶必繇法司擬罪。未有奪取法司未聽之囚，反付鎮撫推問者。臣伏見陽城裂麻以止延齡之相，狄兼善封勅以阻藏吏之赦，竊慕古人，思報國恩，誠不忍見漏奸之崔文靈惑希寵，嫁左道以興齋醮，蕩上心亂我嘉靖清明之治。」是時，廷臣交章八十人。俊五乞歸，最後八上，因爲上述孝宗待劉健、謝遷等故事，言：「自古未有不親大臣而能治者。將歸之言，望聖明納焉。」許之，加太子太保，與驛還鄉，令有司給米，輿夫，歲時存問。俊復辭免，不許。嘉靖二年也。俊去一年，諸臣以爭大禮，廷杖至有死者。俊卽家上疏，言：「人君以寬仁爲德，剛正爲威。方推隆本生，廣弘孝理，而威懾群議，恐人命輕脆，包荒之下，爲容納一欠。臣奄奄待死，敢倣古人遺表遺直之義。臣惟：古者撻人於朝，與衆辱之而已，非必壞爛其體膚，致之死也，亦非所以待士大夫也。成化時，臣及見廷撻三五臣，容厚綿底衣，夾以重氈疊帕，然猶卧病數月。正德時，劉瑾用事，始啓去衣之端，釀有末年諫止南巡撻死之慘。新詔收恤，士氣始回，不謂議禮異同，偶干宸怒，輒復有此。臣又聞：成化、弘治間，詔獄惟叛逆、妖言、強盜，方有好生打着問之旨。其餘常犯，送錦衣鎮撫推問，鎮撫奏送法司議罪。中間情重，方有來說之旨。部寺覆奏，方有降調之旨。今一概打問，無復低昂，恐非祖宗仁厚之意。臣又見去歲以來，舊臣謝遺殆盡，朝署爲空。近聞石瑄欲乞休致，伏惟留念老臣，時加延接。他若羅欽順、王守仁、呂柟、魯鐸輩，人望所屬，亦宜引置左右。臣舌梗意長，授書難盡，不勝懸結。」不報。嘉靖六年，年七十六，得疾，復草遺表勸上勤學政，親賢才，保聖躬，以衍儲貳，及預辭恤典。漬甚，呼聖躬、皇儲者再。俊好讀書，慎交游，接引後進，惟恐不及。

士大夫論當世人物，推俊於韓、范、富、歐間。《明倫大典》書成，上追罪俊進《歷代成禮》，論革其生前官職。穆宗改元，追恤復舊，加贈少保，賜葬祭，謚貞肅。子達、適。

達 字志道。歷南考功郎中，疏歸養病，坐父俊議禮，爲時宰中傷，以違限弗叙。工篆隸，能古文，有《自考集》。適，以貢入太學，官香山知縣。

林洪 字文範，唐「九牧」葦裔。知辰溪縣，奏蠲逋租四千石。滿去，民留靴奉之。遷滄州同知，改脩州。曾孫堪、塾、壇、奎、玄孫富、汝永。堪子應驄。壇子雲同。從侄長清。

堪 字舜卿。知長興縣，純厚廉介，政先教化，講書授經，下及小民、閭巷。改漢川縣，政如長興。陞南太僕寺丞，士民爲立懷德之碑。久之，陞曲靖知府。中官劉瑾遣尉緝事雲南，堪無私賂，被讒，免。嘉靖改元，例起用，以老致仕。都御史何孟春薦堪行超流俗，政媲古人，宜令有司存問優恤。得旨舉行，時稱曠典。年九十七卒。

塾 字從學。弘治中授順天府推官，陞南考功郎中，出爲浙江參議。端雅廉介，浙人稱爲菜林。卒官。

壇 字世崇。教諭繁昌，將父官舍，出集諸生講論，退以質父。後補新會，擢南雄教授。督學使歐陽鐸稱爲博士第一，委以修纂《全粵人物志》。久之，擢程鄉令，鋤奸抑暴，興學化訟。以從子富巡撫兩廣，引嫌，調太和。旁邑蝗災，吏請用巫史禳厭，壇痛自引咎，緩征弛禁，憫惻便利，蝗竟不入境，曰：「此吾禳厭術矣。」子雲同。

奎 字世隆。穎敏博學。授桂陽知州，廉介自持。三載，乞休，卻贈金，民爲立生祠。

富字守仁。正德中以進士授大理評事。有臺臣子請恤典，劉瑾下之獄，欲法司重繩之，富執不從，并下獄，庭笞三十，謫潮陽丞。瑾憾未釋，隨以大理事文致，罷官，仍罰米百石。瑾誅，起袁州同知，陞寧波知府。市舶闖橫甚，奴奪民縑不與價，富捕治之，籍閩貪狀，欲上聞，閩懼引罪，敢不敢肆。日本貢夷素驕蹇，館於郡中，時其廩餼，約以禮分，夷悉感服。郡西有廣德湖田，科額繁重，儒士楊欽乞行全折，累奏見格，富至，力主欽議，卒得所請。外艱，服闋，補處州。山氓聚徒盜礦，計擒首惡，斃之，分散其黨，代諸邑民兵。其後兵力既勁，礦患亦息。孝豐寇倡亂，富提處兵爲前鋒，擒魁黨，盡殲之。嘉靖初，陞廣西參政。人覲，廷旌卓異，連陞廣東右布政。立驛傳，定里甲均平法，修築南海衛城，開設大埔縣治。爲忌者所中，調廣西。田州岑猛叛，兩廣都御史姚鏌奉朝命征之。猛死，其土目盧蘇、王受爲變，挾猛子邦相叛，據思恩，出掠至膺墟，將進逼武緣。富部分諸將，密遣將徑趨思恩，先發銳卒潛入爲內應。受至武緣，萬弩俱發，克其巢穴。賊勢既挫，乃議撫處。會鏌解去，代者新建伯王守仁，遂以撫處委富，蘇、受率衆七萬來降。田州役罷，相方獻夫議於朝，別設一都御史鎮田州，守仁薦富。會己陞四川右布政，連陞右副都御史，撫治鄖陽八寨。斷藤峽賊久爲亂，守仁移兵征之。富時已聞都御史之擢，猶督兵入巢，破賊乃出，以是守仁復加奏薦。守仁卒，遂陞富兵部右侍郎，兼右僉都御史，代提督巡撫兩廣。富雖繼王守仁剪除蕩平之後，至其處置事宜，一以持重老成爲主，不顯顯如守仁議。守仁上《田州善後議》，故請添設田寧府，統以流官知府。富言：「田州自洪武初岑伯顏歸附，世襲上知府。傳至岑猛，驕縱不法，遂下天誅。一時蒞事之人，見元兇授首，群惡離散，議改流官，如往時岑濬思恩之例。此其意固在爲國闢土開疆，而不知夷夏之界不可墮，駕馭之機不可失，刑誅之章不可濫，貪倖之階不可啓也。今天下一統，萬國咸賓，際天

薄海，皆通職貢，豈須此彈丸黑子，兼設流官然後快哉？臣切意但當循土夷相傳舊俗，降爲州治，以岑邦相爲土官知州，使統屬其頭目，不必再設流官知府，第仍土官衙門事體，選吏目一員，而又如王守仁所議，推選頭目，設爲土巡檢，使分管而世守之，令如原額出辦兵糧。夫降爲州治以削其權，分設土巡檢以殺其勢，無事則犄角而守，有事則彼此相防，將見岑邦相當奔蕩罪廢之餘，感恩懷報，自不容已。昔宋臣楊時言：『邊事之興，多出饕功幸利之人。蠻獠無知犯法，自古已然，不務撫循，使恩威兩行，乃欲幸其有事，草薶禽獮以求有功，一有失律，患不可言。』宋臣之言，今日之鑑也。」又守仁舊議，改設鳳化縣治於三里，添設流官縣治於思龍，富一切議罷，曰：「使其爲我籬藩，不益固乎。」富撫督兩廣五年，平歸善亂民王基、忠州官族黃廷器、封川石現等山猺，斷藤峽、七都、板塘、古雍、古風蠻，新寧、新會亂民，那潮墩寨、搥藤峒、九逕、雷坑、大隆山賊首、海賊黃秀山，平南蠻雷公招等亂，累蒙詔書褒獎。顧其意則不喜用兵，曰：「保固疆圉，休息士民，爲國家衛元氣，邊臣責也。」持此見也，屢與御史異同，於是累疏乞休。相方獻夫家怙勢奪民產，富屬僉事龔大稔裁以法。乞休疏至，獻夫取旨回籍聽勘。富將歸，海寇許折桂爲梗，御史適行部海上，輒檄巡海副使某出兵，及兵敗將沒，則反以失事爲富罪。獻夫從中應之，遂落職。大稔隨被逮，以死。富修偉特達，言議英發，面攻人過，然一霎卽解，他日遇其人，談笑自若。遇盤錯直前負荷，而斤刃之施，悉中肯綮，有古豪傑之風。初下詔獄時，與王文成講《易》，桎梏間爲知己。比治兵思田，同心共濟，用有成功。年六十六卒。子萬潮。

汝永 字君修。授南樂教諭，陞國子博士，擢南戶曹，歷郎中，出爲思恩太守。值盧順、蘇蘭等叛，計擒之。丁內艱，復，補黎平。簡易爲政，夷民安堵。陞長蘆都轉運使，致仕。與諸老結社賦詩，杜門屏

跡。

應聰 字汝桓。以戶部員外郎論救御史朱濶、馬明衡詔獄，謫徐聞丞。以忤霍文敏輅，落職。

雲同 字汝雨。嘉靖五年進士高第，選庶吉士，以不謁時宰出補郎署，授戶部主事。七年，出主廣西試。已，權稅九江關，作《晉江文》自勵。舟至隨發，即夜分顛倒開關鑰，及瓜當行。歲計外，羨金千餘緡，檄寄府藏，不持錙銖。擢禮部員外郎。十一年，同考會試。明年，轉浙江提學僉事。敦德崇行，以古道訓諸生，行部與諸生講論，多歸於仁義中正。以艱歸，服闋，補河南僉事，備兵潁上。十九年，復轉廣東提學副使，功令如浙中。御史某欲以射圃爲邑宦園林，雲同曰：「必取射圃者，請先歸學篆。」再轉浙江參政、右布政使。時左使爲建安李默，並負時名，浙稱良覲。當人覲，行李蕭然，廷旌治行第一，尋轉左。公正威嚴，精幹勤敏。其於民生國計，劑量擘畫，咸中程度。擢都察院右副都御史、巡撫湖廣。辰、沅師興，督府檄取行糧數十萬，雲同蹙然曰：「楚比歲不登，物力盡矣，可竭澤乎？」奏貸輸邊歲例粟十五萬給之。屬縣李某者，以賄還內臺，昵於分宜相子世蕃，雲同疏摘之，李亦自辯，坐回籍聽勘。勘竟，李坐視官也。隆慶改元，起刑部左侍郎，轉南京都察院右都御史，掌院事。值大察京官，與冢宰秉公旌別。給事中石星等以言事獲罪，抗救之。明年，轉南工部尚書，以歲漉奏免江南十縣蘆洲課十之五。兩疏請老，溫旨慰留，章五上，乃允。蓋在隆慶四年。至萬曆二年，復召爲南刑部尚書，再辭，不允，強起就道。比至，辭如初。有旨：「雲同力疾趨命，懇疏乞休，得大臣進退禮，俾乘傳歸。」卒，年七十八，贈太子少保，謚端簡。雲同居恒愛孟子「人有不爲，而後可以有爲」之言，終身佩服，不失尺寸。其讀書中秘時，則題其邸壁曰：「寧餓死，不爲不廉之夫；寧布衣，不爲干進之士。」莆人謂：自林貞肅而後，完璞純名，雲同一再見云。

萬潮 字養晦。初授寧波府推官，其父故所守郡也。諸所讞斷，悉依仁恕。父憂，服闋，補贛州。贛交江、廣，關有權稅，萬潮以次當代，數辭不赴。年三十八，卒於官。萬潮有奇思，奏記臺使者，手自削牘，牘多古文詞。其命掾作書通諸故人，憑几口占，各有意致。故與唐公順之游，而因得以交於羅文恭公洪，先其沒也，文恭爲銘墓。所著有《贛州集》。七歲時作《聞鼓詩》：「誰擊堂前鼓，如聞出地雷。梅花猶未發，全仗數聲催。」集中如「半山斜日含青輦，萬里晴空度白雲。一帆淮浦晴雲細，三月黃河春水多。」世人賞之。子兆誥，游鄉學，有文才之譽。

長清 正統進士，歷行人、戶部員外郎。天性廉儉，未六十致仕。母鄭，年八十餘，沉疾委頓，長清設榻母側者累歲，一夕數起，皆親扶持。有旨甘以奉之，自食粗糲。母歲生日，輒夙興爲櫛醢，背負中堂，與家衆上壽。母沒，哀毀骨立。士大夫見其老而篤孝，咸歎仰之。

林長懋 字景時，亦蘊後。父獻中，泉州府學訓導。長懋舉永樂鄉試，除南昌教諭，陞青州教授，翰林編修，侍宣宗於皇太孫。仁廟初，太孫立爲太子，轉春坊中允。自處老成，悉心匡救。仁廟崩，從臣扈從宣宗赴京，長懋以不耐疾驅，從舟後至。既，宣宗已卽位，諸臣皆進官，長懋獨出知鬱林州。因言其二弟宦學京師，奉母以來，乞降繁難京職，忤旨，坐繫十年。英廟登極，遇赦。之官，以恩信撫下，清儉自奉，朝夕惟食鹽菜，人呼爲林鹽菜。卒，葬桂林縣黃陝口，州人歲爲增土，建祠祀之。弟道節。

道節 字景宣。平樂通判，遷知瀘州。廉介公勤，留心學政。終鶴慶知府。

林環 字崇璧，亦輩後。永樂四年及第第一，授翰林修撰，陞侍講，預修《永樂大典》，爲《書經》總裁官，兩考會試。以扈從巡幸，卒於北京，年四十。環材負通曉，音語洪亮，爲文廟所器，一時儒碩亦厚望

之。歿，無不悼惜焉。子繼，考城教諭。繼子偃、伋。偃，黟縣教諭。伋，訓導壽昌，歷崇仁、泰和教諭。勤於誨迪，典四省文衡，清儉自持。終國子助教。伋子禎，弘治中教宜春，以能師稱。

思承 名統，以字行，環弟珪之子。珪有文行，舉泉州府學訓導。思承，景泰中進士，選御史，辭弗就，除知冀州。奏蠲蕪田歲賦，增築堤堰百餘里，捍漳河水患。部內選郎某之弟毆死平民，驗治正罪，祈免不得，曰：「以人命媚人，非民父母也。」滿九載，遷淮安同知。賑饑有方，蠲逋無濫。年未六十，引疾致仕，所親止之曰：「公旦夕金紫矣。」思承曰：「心苟知止，一命有餘，若其無窮，三公不足。」子茂達。

茂達 字孚可。授行人，選監察御史，出按畿甸。時奄瑾肆作威福，茂達慎重風采，雖巧伺弗能傷。擢湖廣按察副使、貴州左參政。計擒川寇陳聰，益兵攻者岳者，得其巨魁。諸夷鈔略迤西烏撒，逼城堡。諭官屬備禦之。夷據溪以渴城人，茂達卽上流鑿石爲涵，行地中二里許，夷人怪之，遂弗敢逼。擢雲南按察使，以內艱歸。嘉靖初，補四川，連擢左、右布政使。居蜀邸四歲，二僕戒候作變若逆旅然。會人覲，兩疏乞歸，朝廷嘉其廉退，陞都察院右副都御史致仕。居二年，起南大理寺卿，復疏辭。年過八十，會明堂禮成，有司奉朝命備禮勞問。久之，卒。茂達平生論事不數語，執彝定志則毅然莫奪。少與方良永、良節兄弟同學，而弟視之。及二方貴顯，茂達猶諸生。一日祭社，二方盛服立左右，茂達以一欄衫居中，委蛇自若。爲藩伯清軍，御史疑其簡易，欲撫諭之。范御史永鑾抗言曰：「林公靜修方介，何得瑕疵！」辭大理，所親或勸止之，艷然曰：「不聞歐陽公之語蔡承禧乎！」

林文 字恒簡，亦葦後。宣德五年廷對第三人，授行在翰林院編修。正統初，預修《宣廟實錄》，充經筵講官。《實錄》成，陞修撰。景泰二年遷右春坊左諭德，兼修撰。四年，修《歷代君鑒》成，七年，修

《寰宇通志》成，皆有襲衣文綺之賜。陞左春坊左庶子，兼侍讀。英宗復位，罷景泰中官僚，改尚寶司卿，仍兼侍讀。命往祀淮瀆之神，還，拜翰林院學士，兼東宮講讀官，充國史副總裁。前百年，無正拜學士者，自文復見，以年及乞致仕，上諭李文達賢曰：「林文老成忠厚，不可令去。」四年春，充廷試讀卷官。自是屢請老，皆不允。憲廟登極，褒進舊學，遷太常寺少卿，兼侍讀學士。未幾，復懇辭歸老。傾城士大夫迎候羅拜，觀者以爲百年盛事。年八十七卒，贈禮部左侍郎，謚襄敏。文神觀清爽，酬應安詳。暮年神色安康，賓祭惟謹，大小不慢，人盡服其耆德。黎文僖語彭惠安曰：「翰苑中，古意時流時時相半。若林先生，醇乎醇者也。」李文達亦稱其「德性堅確而不移，氣質沉靜而不躁，處心平易，操行潔修，矜然若不勝衣，而志不懾，氣不餒」。其爲時推重如此。曾孫渠、希範。玄孫焜章。曾侄孫應標。

渠 字希瑩。令茂名，謫判通州。武宗南巡，州守以不支遁。渠獨當事，百需稱貸。陞建水知州、周府長史。歷宦三十餘年，俸錢所人不足償負，上先廬之券於公，請有司分割，雜付債家。

希範 任漢陽同知，調岳州府，終楚府左長史。居官清操，惠利及人。

焜章 字振世。嘉靖中以乙榜授六安州學正，擢國子助教，出丞平樂。以平蠻功三拜金幣之賜。九年，進激江知府，不染珍貨。內艱，服闋，補馬湖。值採木用兵之際，道路騷然。故事：上司差役，得給戶馬，又例索惜馬錢，民殊不堪。焜章自捐金買馬數十匹供驛遞，戶馬自此罷。居鄉二十餘年，一室僅蔽風雨。故人通顯，來爲當道求一見，不得。予嘗至其家，磨礪籛籛混雜。廳事中設一几，日作大書，其書殊有法度也。

應標 字君儀。嘉靖初爲禮部主客司主事。是時，郎主客者，陳九川。天方國夷人來進玉，九川揀



退過當，又怒罵通事胡士紳等，夷人皆怨，尋亦失玉，士紳等因詐爲夷人怨詞，訐奏九川。時永嘉張孚敬方欲攘費文憲宏相，誣九川以貢玉饋宏，玉故坐失。九川坐下詔獄，妄委應標以自解。應標與九川並繫，受杖不輒白。久之，夷人再對玉，譯者問之曰：「是日也，孰主爾？」熟視應標，數搖首，指九川，撫掌頷之。朝士稱應標長者也。出爲江西僉事，累陞廣東按察使。有取夷舟覆漂物爲怨家所中，久置重刑，應標廉出之。轉江西右布政使，尋遷左。江西歲出籍錢數十萬市上方物輸內府，時分宜相當國，前官率聽分宜子婿與駙儉之徒司之。應標至，相婿復以請，力拒之。又藏中無名錢，先是，諸左使輒括之以問遺分宜。應標誠封識，慎筦庫，無纖毫闌用。坐調山西。晉府以子錢蠶食諸王子祿，諸王子祿盡入於晉府。應標每給祿，必召諸王子，以次面授。晉府積空券無所舒，憤撫他事誣訟闕下，分宜相從中可其奏，應標嘆曰：「吾獨不念主客時不輒白耶？」趣裝歸。子六人，燦章、烜章。燦章孝友恬素，舉進士，未官卒。

烜章 字繼暉。嘉靖進士，歷工部郎，出爲貴州按察副使，備兵威清十七司。土酋薛紹榮輩，久搆兵通賦，絕跡臺府。烜章至，約身率下，諸酋稍稍受約束，賦亦寢復。嘗以平邛水逆苗，討白泥司叛酋功，兩拜帑金之賜。普安州判某以墨敗，直指下烜章按治，而趙中丞以姻好故爲周旋，烜章不應，坐被中丞疏論候勘，歸。後直指爲剖白，起雲南左參政，擢貴州按察使。牙州之役，常事者急首功，烜章悉召諸護軍，爲稱引古名將事，誠莫妄殺。賊平，蒙賞。擢雲南右布政、廣東左布政。至官踰月，裁冗費，議役法。以察計調，人駭惜之。烜章簡質寡言，當官持法，位踐通臚，志存恬素。

燦章 字繼照。烜章從昆弟也。父應采，令瓊山，有惠政，終南寧同知。燦章爲永平同知，有撫定南兵功，擢刑部員外郎，出爲湖廣僉事。播州土酋作亂，飭兵轉餉，以成功蒙賞。子堯俞。

堯俞 字咨伯。既成進士，改庶吉士。讀書翰林，潛心大業，博通蘊奧，於凡古今治亂、昭代典章，探討編摩不遺餘力；凡詞林榮艷事輒處後處鐔，不屑不競。十年史館，量移官坊，以萬曆己亥歲爲省觀之請，歸。尋奉母諱，居八年，以吏部薦章，政府催取，始起補原官。官寮之淹，向未曾有。明年，轉南祭酒。南祭酒，詞林所薄，堯俞曰：「吾先人嘗爲國子先生，視南司成如天上，寧不足耶？」自請行，尋乞歸。去之十有四年，熹廟臨御，特起禮部左侍郎，管國子監祭酒事。控辭，不允。旋以禮部左侍郎，尋拜尚書。堯俞寅清益虔，夙夜不懈，軌物章程，燦然明備。凡郊祀、幸學、殿工、陵寢、冊號、選婚、實錄、貢舉，以至宗藩、四夷封貢諸大典，繹舊肇新，不爽條貫。每有面恩致詞，神意安詳，威儀嫺習，群工目屬，主上心嘉。其他章疏文檄，悉手創撰，彬彬班班。而尤留心於遵祖制，裁冒濫，抑倖門，杜請託，矢公矢慎，蹇蹇諤諤，去就爲輕也。《光廟實錄》成，擬進，御製序文有「金縢無圭璧之祈，靈藥寡瞑眩之効」等語，頗爲權貴所不喜。奉旨選閱，增額逾制，疏爭至再，中引祖制訓辭，而繼以「願垂履霜之戒，毋啓旁落之端，便嬖惟供乎使令，繼述充成乎大孝」，語極諒切，觸撓逆璫。魏忠賢每向人恚曰：「林宗伯無意綸扉，席地耶？何遽張拳相向。」堯俞聞，笑謝曰：「予知祖制，不知其他。」及奉命選閱，巨璫援故事，欲據中坐，堯俞預戒胥吏，席兩柱間虛堂，中設篆案，闕揖下，愠見，堯俞徐徐曰：「公等故繇本部選進，安可一旦輒相躋躡？」璫爲氣沮，竟均席拂拂罷去。熹廟薦幸太學，園橋填壅，導從大僚多踉蹌失次，堯俞奏對，趨蹌失常度。郊天導駕，熹廟玉步甚迅，堯俞壅不得前趨，重腫屢回，戒璫讓路，其眷遇如此。每值頒曆受璽，實錄進呈，天顏咫尺，授受相親，堯俞音吐洪亮，盤辟周旋，悉中規矩，熹廟爲之肅然。嘗恭進大祀冊，繇中御路直抵皇極門。上親起受，閱視良久，立而目送。煌煌天語，每蒙褒嘉，大內傳宣，時承召對。諸大

禮既成，上尊珍饌朱提文綺拜賜，尚方貢相望於邸舍。累加太子太保，誥贈三代，予玉予蔭，蓋異數云。以乞骸請，再疏慰留。最後情辭益懇，予告傳歸，而遂卒，贈少保。堯俞簡儉清貞，冲和慈惠，尺寸自將，毫鎰靡罅家園。結留雲間南谿草堂，拉名縉勝侶其間，染翰賦詩以爲樂事。臨沒遺命：「衿帽惟時，含斂不施，欲造極樂之國，以登兜率之天。」可謂異王孫之僕葬，笑司馬之石槨，一空天壤，齊視死生者矣。

林智 字若濬，亦蘊後。正統中鄉貢，授宜興訓導，教條嚴整。味爽，衣冠燃灼，坐明倫堂朗誦經書，以倡諸生。平明，生徒畢至，乃與講學論文，娓娓不倦，諸生皆自奮發踴躍。遷銅梁教諭，以憂去。比起復，宜興人復乞爲其學教諭，陳恭愍選督學南畿，舉以自代，吏部格於例，注縣令，力辭。葉文莊盛爲少宰，乞爲其郡教授。滿九載，諸生懇留再任，智請老歸。凡司教三十年矣。子季瓊，監察御史。曾孫大黼。

大黼 字朝介。爲人孝友，以鄉薦授浙川令。丁外艱，補廣之河源。發粟賑民，修復古城以扞水患。以最擢上元令，循阡陌，均徭役，省刑剗苛。歷南戶曹郎，出守銅仁。有當道私憾一土司，欲窮治，撼其蔭。大黼曰：「吾平生不能殺人媚人，況殄人血食乎！」遂拂衣歸。

林時讓 亦九牧裔。父肆，宣德中以貢官員外郎。時讓，景泰進士，授戶部主事，監臨清倉糧。中貴縱其下人攬納，多收蘆席價，時讓禁抑之。因相訐奏，逮至京，廷議直時讓。朝旨取還中貴，令時讓復職。遷郎中，出爲廣東參議。孫若周。

若周 字吾從。正德進士，授博羅知縣。靜肅精練，聽訟無越宿。流寇入境，集民兵襲殺之。嘉靖初，徵爲南御史。內閣楊廷和議世襲伯爵王守仁江西功次，被人毀抑，外戚蔣輪、邵喜累寵濫恩，內官張

銳、張雄免死漏網，及崔文、扶安等之不法，治中王槐、監生何淵効尤張孚敬、霍輅，淆亂大禮，悉行論列。以父老疏病侍養。無何，接丁內、外艱，家居久之。會孚敬爲相，嚴養病違限之禁，而霍在吏部，遂概罷若周職。都御史劉節、巡按白賁等前後連薦若周直道安貧、清介絕俗，俱不報。年七十餘，城陷，遇賊責賂，被楚毒。既釋，不數月卒。從侄英，歷貴州左參政，母老，疏致仕。

林永齡 字延年，「九牧」饒裔。天順二年以貢士教諭翁源。病邑染夷風，令諸生習禮三月，方出詩書訓之。嚴立課程，約束不倦，貧者助粟，病者給藥。當道才之，檄攝英德。巨寇黃蕭養荼毒嶺南，英德尤甚，永齡招徠散亡，賑恤貧窶，蠲貸征賦，不數時邑復舊觀。乃募義民築垣，徙廟學，召生徒，講學如在翁源。二年，卒官，兩邑士民像祀之。

林淮 字長深，亦蘊後。舉成化進士，授刑部主事。永平有疑獄，一家十八人論死，前官持兩端，淮一訊立辨。暑月，提牢汛掃臭穢，剪剃鬚鬢，湯艾浴之。早喪父，奉母至孝，迎養京邸。有女弟適人，母愛之，挾與俱。每旦入署，戒婦謹奉母。母念歸，請急還。居三載，部檄趣供職，以母不耐寒，乞改南便養，遷員外郎。弘治初，陞雲南僉事。淮曰：「吾棄北就南，爲養母也，今天末哉。」自陳乞近地學職。朝議宜從淮請，爲人子勸。吏部奏授常州教授，俟親終注僉事如初，以慰淮母子，以勵臣子忠孝。制曰可。

林元甫 字秉仁，亦蘊後。修偉玉立，心量弘遠。選工科給事中。上言請如宋制，分進士科爲五甲、四甲。五甲皆授以學職，以盡天下之才，重師儒之任。時元甫已受詔冊封占城，以建言忤旨，罷不遣。後遣他使，有海禍，或以罪戍邊，人謂元甫有天幸。久之，有旨：都御史戴恭、簡珊、蕭顯等六人皆外叙，元甫與焉。尋以母憂免。服闋，有爲地者，改南禮科，復憂去。弘治中，仍署本科。未幾，擢都給事中。請

定國本、攬朝綱、却土魯番獅子之獻。時議復用汪直、王越，元甫言：「二人投之未遠，可復用耶？」遷山東左參政。齊魯旱甚，所司議多斂額外以備賑。元甫曰：「與其多取以賑之，孰若寡取以安之。」德王葬其妃，大拓塋域，廢民田爲之。元甫曰：「有制。」王再三令諭之，又面諭之，終不可，乃易人董之。遷雲南右布政使，尋轉陝西左布政使。虜酋火篩寇邊，餽餉繁重，元甫隨宜調度，軍興無乏。陞右副都御史，巡撫四川。蜀寇作，設策平之，有銀幣賜。松潘不靖，劫殺防禦官。元甫督捕過當，而渠醜未獲，言者謂元甫緩賊，乃與貴州巡撫兩易之。貴撫至，市夷兒斷首抵賊爲功，爲言者所彈，始明元甫之不欺。孝宗悟，移撫雲南，將收而人之。以疾告，太宰馬文升奏留之，三疏乃許，竟卒。子有孚。孫仰成。侄有祿。從侄有年。

有孚 字以吉。正德中進士，以才名，爲御史。伏闕諫大禮，疏劾內監芮景賢、勳戚陳萬言等人，望風裁督南北畿學政，歷大理少卿、右僉都御史。林居時，督學使者潘潢，提督南學時所取士也，修謁門牆，立廳事移時，有孚散服出見，受其北面伏謁，已，語不及私，送不出戶，報之一刺而已，抗顏師席，儼如行部，時人稱其持重高自貴矣。仰成，字集英。仕紹興府通判，有能聲。高亢寡諧，歸卧東臯，樹藝自樂。

有祿 字以賢。元甫弟哲甫之子。哲甫仕教諭。有祿任安慶同知。寧庶人反，引舟師攻安慶，知府張文錦率僚佐匿妻子深山中，有祿時公事在外，其孥亦與僚佐同匿。聞變，馳還返之，佐調兵食，畫地守門，先出扞蔽，不解甲者十八晝夜。圍解，庶人敗。論功，文錦得超擢，有祿僅轉貳淮運，時論缺然。歷瓊州知府，致仕，壽八十。

有年 字以永。蚤孤，自奮，事祖母暨母盡孝。以乙榜乞就學職，得蕭山教諭，迎養二母。太母制

終，補東莞，迎母偕謁張詡於南海，訂朱、陸同異，刻正學階梯，以端士習。潘督學稱其好古甘貧，疏舉自代，不報。滿九載。母沒，廬墓，有遭火反風之祥。服闋，擢繁昌知縣。歲連饑，益俸以賑，出積贏，創義塚，修橋坊，蠲蘆洲課。最上，擢南御史，一歲中七言事。武宗遣使迎活佛於西域，有年上疏曰：「臣聞：明天地之性者，不可惑以神怪。彙萬物之情者，不可罔以非類。若佛老之流，乃神怪之甚，非類之尤者。陛下不以夷狄爲非，不以外國爲遠，不以有司供應爲費，勅遣內臣迎取活佛於人所不到之地，是豈表正萬邦之道也。陛下若反之於身，致力修己，早視朝，以向明出治，勤經筵，以涵養德性，去奸惡，以振肅朝綱，重師保，以講明治道，則善積厥躬，德修罔覺，百祥駢集，天休滋至，又何必以宵旰圖治之時，輒爲此無益之舉。夫梁武三度捨身爲佛家奴，國喪身亡，往事不足道也。聖朝頒律，凡師巫邪術，及妄稱彌勒佛、白蓮社、白雲社、白雲宗等會左道亂正之術者，治以重法。陛下以天縱之聖，嗣大歷，服祖宗成憲，罔知所遵抑獨何歟！伏望即將原差內臣取回，其隨行番僧悉遣歸國，則天下幸甚，斯道幸甚。」上怒，逮詔獄，謫武義丞，量移樂清知縣。嘉靖改元，復御史，擢衢州知府。毀淫祠，創社學，選教讀，訓民間子弟。公餘臨視，親爲句讀。朔望謁文廟，進諸生講學，修築號舍，群之肄業。衢驛孔道，供億不給，立節省法，視昔減半。歲丙戌，自五月不雨至七月，竭誠而雪，雨降年登。九月，火焚室千餘家，賑濟之。丁亥，歲大饑，捐俸粥民。六年，當遷，五邑民相率乞留，臺司擢貴州憲副。未上，爲鄉族忌者所擠，致仕。臨行，老稚群泣送之，立德惠祠，請方豪爲記。

林大輅 字以乘，亦蘊後。舉正德進士，授工部主事，轉員外郎。武宗南巡，同邑黃鞏與諸臣疏諫，武宗下鞏等疏首六人詔獄，餘同罰跪。大輅偕同官蔣山卿、何遵疏救曰：「罪不及臣，臣實耻之。」疏人，

亦廷杖百，下詔獄，尋外謫之。當大輅下詔獄時，其妻黃氏日夜焚香籲天祈大輅免於罪，而有緝事緹騎居大輅邸舍旁，輒言大輅妻爲詛咒。武宗大怒，復逮大輅併黃人獄，當廷鞫，銅拶鐵箠，備極毒楚，至斷指不承。鞫者微諷之，黃哭曰：「妾夫被繫，妾居邸舍日夜焚香祝天，冀皇輿勿出，宗社大安，則誠有之，寧敢有他意？且妾夫小臣能直，妾敢媿爲其婦？」人獄，則與大輅訣：「妾今有身分，不任刑，且死矣。國恩未報，老親弱子，君自珍重。」居五月，得釋，夫婦出獄，都人聚觀，稱黃氏鐵夫人也。補夷陵州判。嘉靖初，擢江西按察僉事，歷副使、河南按察使、右布政使、湖廣左布政使，尋陞其地巡撫都御史。居無何，值災沴，大輅出常格自劾，朝旨遂與罷歸。大輅氣誼激越，語觸時諱。歸家，文酒自好，顧一聞世變官回，輒不勝憤嫉，有時撫膺慟哭。都御史責倨矣，其父時與布衣友人讌集，大輅終日左右侍，諸布衣蹑蹠離席伏，大輅父曰：「小子禮當如是。」人以賢其父子間。

〔校記〕

〔一〕「遷喬從侄孫潤」，《林遷喬傳》作「喬從侄潤」。

〔二〕「希範」下，各本原衍「附」字，據本傳刪。

〔三〕「應」字，各本原脫，據本書體例補。

〔四〕「煢章」二字，各本原脫，據《林煢章傳》補。

〔五〕「右春坊左諭德」，據《明史·職官志》，誤。

# 閩書卷之一百十

英舊志 縉紳

興化府 莆田縣六

皇朝

有傳

鄭文華 伍衡 吳源侄陽保、陽保孫旺附。 李苾 張仕國 方樸 方徵子璿、曾孫召南附。 侄孫正梁。〔一〕

鄭俊德 葉允吉 陳觀弟賢。賢六世孫言附。 言子經邦。 鄭雲 鄭彥成曾侄孫洛書。 鄭瑗 鄭循初子嘉

祐附。〔二〕從侄孫弼。 鄭岳 鄭玉弟傑。〔三〕傑子敬道。 敬道子茂、侄言。〔四〕 鄭一鵬子應齡、侄光琬。 林士敏曾

孫大猷、諸孫孟和。 孟和孫益、豫、從孫大槐附。 張振 黃麟 顧文子孟喬。〔五〕 洪彥昇 陳彥回玄侄孫璿。〔六〕

李傑 林和 黃重 黃壽生子肅。 嘉子仲昭、嘉孫乾亨。 乾亨子如金、希雍附。 仲昭孫懋官、仲昭族孫洙。 洙從侄文炳。

黃察 陳繼之 陳道潛裔孫叙。 黃謙 黃約仲 余師孔 曾景修 楊慈 陳用 黃常祖 林時 余

耀〔七〕翔。 林庭芳子敷、侄榮。 榮子沂附。 王偉 徐資用 陳中侄孫珣、璿、從侄鉞。 鄭述 蕭爲 方熙侄

臨、從子鯉。 林同 李廷修 陳璉 黃謨孫順。 曾侄孫待顯。 林典從弟文俊、茂竹、繼賢。 方灝子、桂、曾孫



興邦。(八) 方玘 翁世資 鄭立 陳暄 周瑩從弟瑛，作軫。(九) 黃譽 陳俊 宋勸孫端儀，曾孫元翰。端儀任元岳附。(一〇) 林慶 洪楷從子珠。柯潛玄孫維驥。維驥曾孫泉。(一一) 任本。族子德賢。 陳敬 葉巒

蕭光甫 嚴淦 林漢(一二) 朱寬從侄孫端明。

鄭文華 國初以薦辟爲廣東僉事。題齋自勵曰：「一貧未必饑寒死，百病皆因飽煖生。」

伍衡 字時敏。工古文詞，律詩瞻麗，七言歌行有溫庭筠字長吉之風。洪武初以薦爲增城令。

吳源 字性傳。曾祖鳳舉，博學多才，第宋咸淳進士，歷官宗學博士。人元，逼起知興化縣，數月辭歸。源蚤孤，力學，惇禮好義。至正末，舉泉州路訓導。洪武三年，授興化府教授。以林廷綱薦，召赴

闕。綱，源門生也。既召見，首以得賢才、敦教化、養黎元爲對。時太祖方立四輔官，委以調均變理之任，兼太子賓客，位列公侯都府之次。源與杜敷、龔敷、李祐、趙民望同膺其選。繼令各司春夏季上中下旬，以夏季中旬屬源。太祖游東苑，命源與敷等應制聯句，恩禮優洽。尋以老乞歸。明年，選公侯子弟入國子學，司業員缺，上念源賢，復賜詔召之曰：「卿爲朕一來講道授經，無筋力之勞，而有成就後學之益，亦儒者素志也。」未幾，卒官。有文集二十卷，《莆陽名公事述》二編。侄陽保，開封府教授、國子博士，勤於教誨。陽保孫旺，仕憲副，所至以賢能見推。

李苾 字叔英。元季不仕，與友人方樸爲壺山文會，商榷今古，沛乎其不窮。蚤孤，事母至孝。母卒，獨居三年，衣素茹齋。吳源作《述孝》美之。洪武初，舉仙游訓導。

張仕國 洪武初知始興縣。兵燹之餘，百事草創，仕國撫瘡痍，弘惠鮮，粵人頌焉。

方樸 字時舉，初名槐生。父應元，見關柝。樸通《詩》、《書》、《春秋》三經，年二十爲人師。元末，以

隱逸三薦不起。洪武初，舉本府訓導，在職七年，推所學以淑士，爲郡丞李景齋所敬禮。民有誣承者，訟丞於部使者，詞連樸，既白遣歸，御史疑其有贓，復逮之。樸曰：「不能再辱。」辭孔廟、先祠，自沉於井。樸謹愨有禮，出言秩秩，與人交，恭以和，久而不變。卒時年四十有五，宋文憲濂銘其墓曰：「麟或死於斤，豚或被繡紋。天道焚焚，孰知其門。命之方屯，賢哲莫伸。自昔皆然，豈獨乎君？」

方徵 字可久，宋大琮六世孫。洪武初，以進士選人武英殿，授刑科給事中，兼齊王府錄事。嘗侍太祖游後苑，聯句有《和醉學士歌》。一日，太祖晚朝退，顧問徵，知有母在，賜白金五十兩，給驛歸省。還京，改監察御史，奉旨微行廣西、山東，察事月餘。陞懷慶知府。明習吏務，於民無所勞費。因星變求言，首言：「風憲官以激濁揚清爲職，今乃計其事績多寡，定爲優劣，以故不聞旌拔廉能，而專務羅織人罪，多徵贓罰，此大患也。」又言：「去年諸行省官吏悉坐空印被罪，而河南參政安然、山東參政朱芾無恙，顧反得陞擢，朝廷賞罰有失明信，曷示勸懲？」太祖曰：「安然率齊東軍民內附，朱參政有幹才，吾之鄉舊，所得陞擢，議功能也。爾言羅織人罪，何人？多徵贓罰，何官？具對。」徵指河南僉事彭京實之。太祖怒，降沁陽驛丞。十二年，以事逮至京，卒，年三十一。嗣子璫，正統鄉薦，諸暨訓導，操守嚴慎。九載，卒官。易簀前一日，儼然冠服，扶辭大成殿，諸生思慕之。曾孫召南，嘉靖進士，文藻行誼，引重於林貞肅，惜其未官卒。曾侄孫正梁。

正梁 字兆之。蚤孤，事母至孝。嘗授經里中，歸起居母，日一再。至母病，籲天乞代。比卒，哀毀逾常，掬土治葬。領嘉靖鄉薦，授禹州學正，轉南國子監學正。祭酒程公文德深重之。已，遷趙府長史。趙王喜詞賦，善詞賦者爲上客。正梁每應教，輒寓規諷，王乃命正梁爲講性命之學。久之，卒，王悼痛累

日。會江左道警，停櫬再歲。王每張燕，樂作，輒命罷去，歎曰：「智悼子在堂。」櫬歸，王素車出租，而銘其墓。子元浩、元淇。浩有孝行。淇善聲律、尺牘、楷書。

鄭俊德 用薦授刑部主事。洪武九年，以上《弭災疏》忤旨，罷歸。

葉允吉 洪武九年任博羅簿。廉靜寡慾，雖果菜一無所納，人不敢干以私。

陳觀 字廷賓，宋僕射靖之裔。元末不仕，與方樸等二十二人爲壺山文會，以莒峰耕者自命。明興，舉遺逸，擢本府訓導。洪武十四年，寧國簿林一初應詔薦觀文學，被召至京，朝謁，偉然玉立。高皇帝異而問之，觀具對。上試以《王猛捫髭論》，稱旨，擢陝西布政司右參政。居二年，忽馳符召之，比至則曰：「按察司有短爾才者，爾可就儀禮司供事肄禮。」已，復召觀日侍左右尚膳，至晡乃休出。嘗應制撰《鍾山說》，立就，甚蒙眷賚。未幾，以祖母喪歸。服除，赴闕，卒於京。方觀持服歸時，兒孫或從容問曰：「陝有礦是何狀也？」觀驚曰：「吾待罪藩寮，幸無遺汝曹戍籍，足矣。何金之問耶？」子熊，永樂初應天鄉試，卒。弟賢。

賢 字廷傑。治《春秋》經，結廬西山巖瀑間，以耕以學，時乘黃犢讀書逍遙岡之原。洪武末，以儒士薦授本學訓導，歷清河、湖口、南康三邑教諭。精勤教士，皆孝弟忠信、真知實踐之言。兩考鄉試，召修《水樂大典》。八年，書成進呈，與群儒宴集桃林之陰，分韻賦詩，名《桃林讌集》，一時重之。爲人色莊氣和，內仁外方。父母蚤歿，即知盡哀，致力喪葬。兄觀，持廉卒官，爲代償官責，以免兄妻子於窮阨。鄉有某掾，客京師，雅相慕，未面也。疾亟，囑左右必請見，至則掾已不能言，數目床間囊，意若有屬者。賢爲探得白金五十兩，語之曰：「悉致君子。」掾即瞑目。後召掾子歸之，子拜奉三之一，謝不受。南康邂逅嶺

外病人，爲同舟所棄，舁歸舍，予飲食醫藥，戒家人謹視之，且移文其家，不報，竟死。又爲治斂葬，時皆服其厚德。子淮，五世孫官，並見韋布。宣子言，嘉靖中進士，仕終南刑部員外郎，惴惴簡易，浮湛仕籍間。言子經邦。

經邦 字公望。舉會試第二，選翰林庶吉士，授編修。時神廟在東宮，妙選官僚，經邦爲講讀官。神廟登大寶，日執經侍左右，每進講，明白懇切，音吐洪亮。上時改容竦聽，賜資甚渥。嘗命詠御前筆墨硯劍，立就詞四闕，上大悅。又應制賦大閱詩，題御扇詩，獻嘉禾賦。聖駕臨雍，賦皆稱旨，御書「責難陳善」四大字賜之。時上方冲年向學，優禮儒臣，游情筆札，而經邦儀度莊雅，進退雍容，詞章華贍，凡在經幃，莫不屬目，上常呼爲「白面先生」，而不名。轉諭德，掌坊事，進侍讀學士，掌院事，擢禮部侍郎，加太子賓客，轉吏部左侍郎，改掌詹事府事，教習庶吉士。嘗偶一在告，詔特免朝參，遣中使齎上尊醪貯存間。扈駕登天壽山，賜麟衣、銀勺、匕筯、環刀。兩宮召見慰勞，各有賜，皆異數也。亡何，轉禮部尚書，兼學士。自爲史官至正卿，皆直講，未嘗輟。既典春曹，所條畫釐正，皆有關典禮。前此，江陵爲相操切，貢生廷議多駁放，餽於庠者，試四等卽停奪，大比彙送既限名，又有降黜，督學諸臣承風以刻覈爲能，庠序喪氣。經邦疏言：「明經貢舉，乃國家盛典，學校人才所出，宜稍寬假，以作興士類。諸非令甲，而創新例，過爲繩督者，皆一遵其舊。」上報可，海內爲之伸眉。未幾，壽宮役興，輔臣與言路二三君議異，經邦奉命覆視，不盡如輔臣指，坐此被言，再疏乞歸，遂允，時年尚未艾。林居三十年，每銓宰閣臣缺，廷議輒推經邦，天子亦勞念舊學，時問陳先生亡恙，而卒不得其用。其沒也，贈太子少保，錄孫入太學，予祭葬，仍加祭一壇。

鄭雲 字行從，梁陳露後。洪武進士，授監察御史，歷廣東右參議。廉慎仁恕，長於文詞。

鄭彥成 亦露後。洪武間，薦授閩縣教諭。爲人清介，遂於講《易》，學者宗之。孫華，國子助教。曾孫思亨，淳安訓導，喜讀書。華侄孫祥，電白教諭，亦能文。祥子洛書。

洛書 字啓範。授上海令，年方二十餘。辨獄詰盜有聲，擢人爲御史。立臺僅三十三月，章凡四十七上。內閣費宏、詹事張璁交惡，洛書疏論之。李福達獄起，世廟以三臺論報不實，欲御門親聽，其時大司寇以下有事斯獄者，並就械繫。洛書疏言：「王逸臣勞，天道也。禮：刑不上大夫。陛下操獨斷之威，法行貴近如此，則張釋之不得持罰金棄市罪抗辯漢文帝前，而田蚡、灌將軍當時又何必令東朝雜問也。請下公卿博議，毋効撞郎。」疏入，世宗責洛書數喜事，今復以狂言蔽主尊臣，大不敬。內閣楊一清爲請得釋。久之，推爲南直隸督學使者。丁外艱，闋，補前職。洛書爲人，意不可一世，側目者相與傾之，而柄國者亦陰有以嫉之。會京察畢，有科道互糾新例，而給事中饒秀失職怨望，疑洛書中之，乃摭他狀誅奏，部院方擬量調，特旨從中罷歸。道吳門、上海，士庶走迎者數百人。居再歲，病卒。上海復數百人齋賻作誄來吊。卒後三十年餘，莆城陷。其子開，貧困往依上海人。上海人群泣曰：「此故孫叔敖兒也。」贖金置縣田，請開間歲一來收，以奉洛書祀。

鄭瑗 字仲璧，亦露後。父儀和，仕訓導。瑗，成化中進士高第，授南禮部主事，歷郎中，卒官。爲人穎悟淳靜，一意嗜學，談今古故實，如身履目擊。爲文渾雄深粹，詩穩潤，有唐人風。與人坐，言及則酬，未嘗露所蓄。一時名公鉅人皆敬重之。子登高，廣西參政。

鄭循初 字子初，亦露後。正統鄉貢，訓導餘杭。莊嚴先士，祁寒暑雨，講解無間。滿考，被選爲駙

馬周景府學錄。有以莊田獻景者，賂循初爲通，循初峻拒之，且戒景毋輕聽。其後，有貴近以請莊獲譴，景繇是益敬重之。秩滿，遷南國子博士，尋陞魯府右長史。啓陳六事，其一言：「肅宮闈以清內治」，頗忤王意。未幾，外艱歸，王坐是得罪，悔不用循初言。及起復，特奏乞還循初舊任，而循初已補秦府右長史矣。五載，以老懇歸，年八十餘。孝友簡靜，讀書著文，不跡公府。子嘉祐，任訓導，嚴立科條，正身率士，陞富陽知縣。

弼 字楷甫，循初從侄孫也。登嘉靖進士，爲工部郎，出賑江南，全活甚衆。權稅蕪湖，廉平有體。出爲廣南知府，嘗平木邦宣撫之亂。年九十二卒。子東白、任、倖。東白，廣東僉事，孝友，有詩名。任，以貢任魚臺知縣，亦孝友。倖，吉安知州。

鄭岳 字汝華，亦露後。弱冠登弘治進士，授刑部主事。錦衣衛千戶張福同監市囚，恃勢越坐，岳奏論，詞涉中貴。孝宗怒，下之詔獄，賴堂官救免，轉員外郎。時邊事孔棘，侍郎許進督師大同，貴近惡其剛方，議代。廢將趙昶賄，謀復起。京軍屢出無功，又議再遣。岳抗疏論列，人咸稱允。擢湖廣按察僉事，聲望綽起。正德初，擢廣西兵備副使。征黑松洞，奏捷，撫諭土酋岑猛，連受褒賜。築廣運、足灘、昭平三堡，亭障屹然，府江以壯。調廣東副使，滯獄一空，治稱第一。尋擢江西按察使，連擢本省左右布政使。時寧庶人宸濠有反志，方橫甚，岳先後力裁之。宸濠大奪民田，民皆驚散，設寨聚守，濠諷總制集兵勦民，岳復沮止之，濠以是怒岳甚。會提學李夢陽者，有才名，濠納交焉，遂與相好。夢陽與江御史萬實相計，奏下藩臬會勘，岳心兩平其理，而夢陽意務求勝，濠從旁嗾之，遂以用公堂銀事誣岳，執岳察司舊役門隸，鍛煉送濠禁錮。事聞，下鎮巡勘按，濠左右夾持成獄。科道暨撫臣交疏岳枉，遣大理寺卿燕忠、給事中黎

夷覆按，濠收衆證妻子，逼脅無異詞。衆環泣曰：「王府費萬金，必欲陷公。公堅求白，我輩無噍類，而公亦禍叵測矣。」乃誣服，坐罷。濠敗，內外交薦，起四川左布政使，以母喪未終制不赴。嘉靖初，陞右副都御史，巡撫江西。奏賑恤受兵郡縣，定次討逆軍功，及贈祀死事之臣，皆報可。尋擢大理寺卿，陞兵部侍郎。大同兵變，赦而復叛，岳密令總兵桂勇斬首惡數人。事定，主兵者奪其功，以與奏帶大璫弟侄，御史又輒爲覈實，岳署部事，駁改之。內侍崔文用事，其侄指揮昂欲躡陞裨將，岳執不用，權倖從茲側目。岳先議大禮，忤旨，奪俸，及是，群小媒孽，會寧夏總兵种助行賄求調，爲東廠捕，追金幣。助嘗失事，爲岳所劾，禮單無岳名，言官風聞論之，疏白乞休。岳嚴毅端諒，好禮劬書。林卧時，白首矣。交於林浩，浩一老儒耳，第以齒先岳，居恆呼岳而字之，岳安受焉。子泓，初爲宸濠所陷，充戍，赦回，蔭授詹事府錄事，終養不出。

鄭玉 字于成，亦露後。沉毅粹永，自守介然，舉正德進士，歷戶部郎，出知徽州府。敦化振俗，戶揭聖祖《教民六諭》，令民相厲爲善。郡故多豪，率以貲相雄長，訟牒牽連先後守，多緣賄囑受污轍去。玉聽訟，以情理風諭。有挾貲求勝及請託營解者，彈治不少假，徽人嚴焉。會宮殿役興，下令採皇木殊急，玉走家奴上書闕下，爲徽人請命，徽人乃知太守親己也。擢江西按察副使，自免歸。侄敬道。

敬道 字自修。父傑，歷教萬安、河源、青陽三縣，峭直持正，用不盡才。敬道教諭曹縣，嚴毅持重，薦擢河源令。賊酋廖和等據險倡亂，敬道佯傳檄爲撫，勒兵從間道出不意勦之。民有李甲者，與博羅閭姓素仇，父病且死，乃密昇其父至閭所，冀旦夕絕命，中以奇禍。博羅人詣訴，敬道跡甲，甲逃矣，乃令里閭人交證其父狀，白當道。後李父死，甲控訴，以誣抵罪，博羅人免株連之苦也。寶江驛丞華兼司巡徽，

怨家誣其縱舍盜賊，坐繫獄，廉枉解之。引疾致仕，河源人以鄭有世德，與其父傑撰爲鄭氏世家，曰《儒林循吏二傳》。子茂。侄芸。

茂 字士元。嘉靖癸丑進士，授海鹽令。時浙中方倭，茂始至，卽堅城深河，增築女牆，建敵臺要地，募勇健戍守瞭望。明春，賊大至，燬舟登岸，以示不還，避賊民人數千，極負爭城，諸衛官恒怯，請疾閉城門。茂戒掩東南北三門，獨啓西門，自往蒞之，悉縱諸避賊者入。人且盡，門者請茂曰：「可已。」甫肩鎗畢，賊至，見有備，氣沮，佯引去。茂籍丁壯登陴，每堞軍一民二，比屋更番，日夕乘城，或時微服巡行，獎勞扶情，不少徇僭。又衣寒食餒，攬涕啣哺，士盡感奮。凡月餘，賊倦，解圍，轉掠人吳矣。乙卯元春二日，倭賊登白沙灣，屯柘林，亦自毀其舟，有沙賊千餘繇金山南來，適與合，將入境，故閩帥王國賢方家居，謂茂曰：「賊勢乃爾，如此孤城，何卽請援幕府，宜張倭聲謀逾萬，庶得濟也。」茂曰：「不然，夫倭僅僅數十，猶橫行江南，無能當者。若至萬，則省會爲急，豈遑及我。軍機何事，其可欺乎？必以實報。」因密飭健士三百伏海塘蘆葦中，須其過，砲石齊發，鉦鼓聲動天地，倭賊大驚，亦有負傷者，遂奔突逸去。五月，復沿海南掠，至硤石而還，道出鹽境，茂堅壁清野，整衆以俟，賊不敢近。其冬，又有倭舟東來，泊秦駐塢，茂與指揮徐行健計，乘不意卽日撲滅之，得首虜八十，督府特疏奇功，與行健並蒙獎錫。丙辰春，柘林賊以乍浦新破易襲，又趣圍其城，行健愈自勵，率兵往救，衆寡不敵，身被數十鎗死。茂得報慟哭，以忠義獎吏士，人人奮激，賊聞宵遁。質明，官軍出，不見一倭而還，自是，不敢復窺海鹽矣。徵人兵科給事中，就道之日，合邑男女號哭攀轅者三日。萬曆初，累遷河南按察使，尋左遷府江兵備。時高天古帶諸巢作亂，茂奉檄督兵進巢，斬首四百七十九級，餘悉奔潰。乃於六巢各設一堡，置兵屯守，諸殘黨帖然不復逞。先



是，兩岸諸猺憑險出沒，伏箚勾劫，當事者不能禁，於是有灘冲魚鹽之例犒之，使不出，而肆釐如故，官民舟航非聚至百，不敢發。茂上狀軍門，大集漢土軍民，直搗其巢所，斬賊千二百有奇。又以三峒爲諸巢腹心，改二土司，屯兵扼險，開仙迴、馬尾二營以通永安，復廣運、足灘二堡以控府江，創昭平縣治以控平梧。星羅棋布，刁斗相聞，兩岸殘猺斂跡擬款，至今鹽政不滯，行旅安夷。何子曰：鄭公守海鹽，舊志無如此詳。有海鹽人朱季長者，感公守城功，書而志之，出以示予，蓋去之五十年矣。上亦有好事如此乎！海鹽人錄之如此其詳，予烏得僅如舊志也？

芸 字士馨。嘉靖進士，令松陽縣，有精敏聲。移上虞，落沙河，通商舶，甦置傳，復上妃、白馬、夏蓋三湖，卽以湖歲入魚蝦錢倡築上虞城。後十五年，倭寇浙東，獨上虞以城完。遷監察御史，按居庸等門。疏修外堡，防間道，并上《三邊圖序》，得俞旨。尋與御史陳策、伊敏生論劾分宜相嚴嵩，坐奪俸。出巡按山東，尋按廣東，卒。

鄭一鵬 字九萬，亦露後。曾祖興宗，祖遷善，俱鄉薦爲儒官。兄一鶚，以貢歷桃源教諭，致仕，養母。一鵬未冠，領鄉薦，登正德進士，選翰林庶吉士。世宗登極，議封楊文忠廷和伯爵。上書廷和，勸其力辭。撤館，授戶科給事中，轉吏科左給事中，巡視光祿。疏諫十四事甚悉。既，復論內豎攬納侵冒需索，置之法。大禮初議，與百官伏闕請命，被廷杖。先后論席書、桂萼、張孚敬、方獻夫等妄議搖國是，武定侯郭勳通賄賂，皇親張鶴齡占人田土。復請重經筵，罷齋醮，卻貢獻，宥諫官，處邊儲，設兵備，疏不一。丁亥歲，考察京官拾遺畢，桂萼復請用成化三年故事，令科道互相糾劾，上是之。一鵬復言非體，被廷杖，罷爲民。隆慶元年，贈光祿少卿。子應齡。

應齡 令淳安。清甚，隸役皆自求退，最後一役來求，應齡曰：「吾素以汝可用，何爲亦爾？」隸曰：「譬之，主人一堂清潔，容一糞穢其間耶？小人亦有妻子，欲餬口耳。」應齡曰：「自今民以事至者，大事許爾取五分，小事許爾取三分，可餬口矣。」既陞任，一老里胥泣送之，應齡問故，曰：「小人明年當應役，不得明府，必且破產，偶自念身家，不覺真切。」人謂應齡令淳安，繼海忠介瑞之後，而無媿於忠介。終銅仁知府。

光琬 字世寶，遷善侄孫也。領正德鄉薦，起家餘姚訓導，以賢能徵入爲御史，巡鹽直隸，奏免鹽課數多。世宗登極，上新政十五事。巡按應天等府，興利鋤奸，風裁甚著。陞湖廣僉事，禁戢宗藩害民，擒湖寇，督勦粵土官有功。陞陝西叅議，以督運有績，被旌。再擢臨清兵備副使，不赴。

林士敏 名懋，以字行。父善同，見元縉紳。士敏，洪武中由鄉貢入太學，踰年，署大理寺少卿，除戶部郎中，以陳言謫南丹衛軍史。永樂初，起知南康府。寒暑衣服，至給取於家。丁艱，服闋，改知淮安，清介愈厲。部臣至淮，卿士敏與抗禮，乃以不防水患劾之，貶南寧府鑲鄆巡檢。捕盜有功，不願陞遷，改宜興縣教諭。子勤，奉新教諭，學行淵博。曾孫大猷。

大猷 字子道。天順鄉薦，教新建。遷國子學錄，轉監丞，再轉翰林檢討，陞徵仕郎，監丞如故。贈博，善考禮儀。築宿嚴而內冲晦懇款，館中執經以五百六輩，齋舍至不能容，輪番聽講，又約日通集，謂之普講。所以處諸生，貧者授衣，病者給藥，死者貲貲哭殮，或屬其鄉人扶喪歸，或捐俸以葬，力弗能給，又以疏告於好義君子。滿九載，陞翰林檢討，仍掌監丞事。以疾卒官，六館諸生咸哀悼之。林見素銘其墓，謂其秩則卑，而其品在彭惠安、陳康懿之間。子夔，戶部員外郎，有雋才。

孟和 士敏諸孫也。父暄，汝寧教授，嘗註文公《小學》及《孫子》十三篇。孟和，成化進士，官禮部主事。尚書倪謙容優人，收良民子女充樂籍，孟和諍不聽，遂以上聞，調慶陽通判。孫益，知象州，甯州城爲堅障，官至黎平知府。豫，正德進士，令巴縣，賑饑有功，終廣東左布政使。從孫大槐，嘉靖舉人，初授汾州學正，有文聲，擢懷遠令，休息丁壯，懷遠人立祠祀之。

張振 字尚玉。洪武中舉人，授乳源知縣。乳源初設縣，振爲首官，撫創功多，民生祠之。陞刑部員外郎。孫紹，吳江教諭，有聲。

黃麟 字伯厚。洪武中，以文學薦對大廷稱旨，賜第一人，授翰林應奉。冬至祀園丘，御製門聯云：「大明日月光天德，洪武山河壯帝居。」麟佯狂踴仆之，上怒，麟奏曰：「此陳後主句，天朝効之，不旣羞乎？」上曰：「爾便易之。」麟口占曰：「乾坤一統歸洪武，日月雙輪照大明。」上稱善。一日，亂髮敝冠以朝，上命械繫之，麟應聲曰：「髮亂冠不正，頭中蟻蟲多。若能皆剃盡，願唱太平歌。」上解其意，宥之，命作《京城曉望詩》，援筆立賦，賜帽帶紵絲，不受。拜疏乞歸，從之。

顧文 字在忠。穎敏該貫，文章簡朗秀整。洪武中，以儒士薦爲興化訓導，秩滿，遷教諭。歷任將樂、金華、九江三邑。典江西、湖廣文衡，皆名得上。宣德初致仕，正統間卒。祭酒李時勉爲作小傳。族子孟喬。

孟喬 善治經，遠近皆造門受業。既中式禮部，請告歸，以經授諸生。七年，方赴廷試，意在急流占官錄，增年至十餘歲，授刑部主事，改南刑部郎致仕。孟喬在官，雖刑名錢穀，不廢傳習指教，成就多爲達人鉅公。子叔龍，肇慶同知。曠爽，能詩，有治行。

洪彥昇 洪武間知汾西縣。建壇壝，修學校，有遺惠於民。

陳彥回 字士淵。父立誠，洪武初舉秀才，知保德州，徙應州，降知博白縣，坐罪廢，歸居。久之，復起爲歸安丞，留彥回在家養其父母，而自之任。久之，陷非辜，坐重辟，家孥無大小悉隨坐遣戍。彥回與祖父母從家中戍滇，其弟妹則皆坐先遣於歸安，莫知所在。行至荆夔間遇赦，祖父及其子善需皆道死，送戍者哀彥回，縱之。無所寄食，聞其鄉人黃積良宦蜀之定遠，乃與祖母往依，爲其家僮，蒙其姓，更名禮。

久之，積良亦坐廢，彥回轉依南充丞於仲和。閩中學教諭嚴德政知彥回才，以明經薦爲保寧府學訓導，三考至京陛，承顧問四十日，太祖悅之，陞平江知縣。到官一年所，太祖崩，彥回入臨，給事中楊惟中薦之建文帝。帝召見之，遂陞知徽州府。下車數月，政教一新。居一年，考覈稱職，蒙賞賚。其冬，祖母死，當承重，徽人上章保留。建文帝奪情，使蒞事，乃葬其祖母於徽北山下。詣闕自首出身所以，并求弟妹存亡。

詔復其故姓名，釋前罪，并覈弟妹戍籍，所在釋之。彥回還郡，謂徽人曰：「吾故前罪人莆田陳彥回也。」因具道平生曰：「向所亡命冒姓，蒙恥受祿者，以吾祖母耳。祖母沒，固宜自請死，上矜宥之，恩大已，何以報？」靖難兵起，朝命募兵赴援，則其弟彥國解戍籍自遼東歸。彥回謂曰：「骨肉重聚，上恩也。汝歸，吾將報國矣。」靖難兵渡江，彥回率所募兵往，而事已定。新安武卒興縛致於成祖，謬謬不服。成祖誅焉，奴其妻浣衣局。彥回在徽州，望祖母葬處旦夕泣，徽人哀之，及死，名其北山曰太守山。曾侄孫琳。

琳 字玉疇。弘治進士，選庶吉士，授監察御史，提督南畿學政，疏陳端本、修政十五事。正德初，劉瑾亂政，顧命大臣劉健、謝遷並去位，諫官戴銑諸人以言被逮，琳言：「臣伏見南京冬月之雷，非時屢震，正朔之日自天告凶，推數度理，咎徵匪微。陛下當此之時，正宜委心元老，圖維化機，博採忠言，深懷治

本。而老成不憖，狂直不容，甚非所以回天變、固人心之道也。且如人之生也，股肱完固，耳目聰明，然後身得安焉。大臣不宜去而去，是自痿痺其股肱；諫臣宜容而不容，是自蔽塞其耳目。欲求天下之安不得也。」疏入，謫揭陽丞。瑾矯旨榜列劉健等若干人爲奸黨，琳與焉。瑾誅，除嘉興府同知，隨擢知府、山東提學副使、河南參政、廣東左布政。嘉靖初，錄先朝言事諸臣，陞右副都御史、巡撫江西。時逆濠始平，兵荒交病，琳請蠲租賑乏。改南京大理寺卿，擢南京兵部右侍郎，卒，賜祭葬。琳孝友清亮，與人交坦夷溫款，所至祀名宦。侄宗喜，嘉靖初貢士，歷安化、武宣、鉅鹿三學教官，所至有教澤。龍，邳州知州，天性孝友。

李傑 建文三年任南康推官，通曉律法，獄無冤滯。永樂中，陞瓊州同知，南康人祀傑於三賢祠。

林和 字致雍。永樂中授博羅知縣。蒞官寬恕爲民，修蘇材堤以防水患，終戶部郎中。

黃重 字孟光，唐黃滔十五世孫，宋公度之裔也。登建文進士，知陽江縣。平易清謹，用薦人爲刑部郎中，陞瓊州知府。

黃壽生 字宏中，亦滔十五世孫。兄和中，行在禮曹郎中。壽生，建文初與兄同舉鄉薦，求歸侍養。

親終，入太學。永樂六年，再試京闈第一。明年，登進士，選翰林庶吉士，預修《性理大全》諸書。既成，授檢討。九載，將滿考，試禮闈，得疾卒。壽生莊重敦行，通史百氏，尤邃於《詩》，甫之《詩》學，以壽生爲初祖。子子嘉。

子嘉 有孝行。國初，卒官者，家人類焚殖以歸。壽生卒，子嘉獨扶柩還葬安福。教諭徐安祖聞其事，舉爲其邑訓導，薦知束鹿縣。正統己巳之變，障縣有功，民戶生息。都御史陳泰上其治行，賜勅旌

異。滿九載，邑民保留，加俸復任三載，乃歸。長子深，監察御史，奉命巡視京倉。先是，廷議樽節糧儲，守倉衛卒月餉十減四，苦弗給。深至，會計京儲已裕，遂奏復之。未期，卒官。次仲昭。深子乾亨。

仲昭 名潛，以字行。舉進士，與羅倫、章懋、賀欽、莊昶、陸克深、謝文祥、鄭克修同榜，以名節相激勵。逾年，以庶吉士除編修，與懋同官，而昶官除檢討。是冬，命詞臣預撰明歲元夕煙火花燈詩，仲昭與懋、昶上疏曰：「切惟某月日，內閣遣郎中定，持至揭帖東閣及史館，分與翰林諸臣，令各賦煙火花燈等詩，備明歲上元賞翫者。臣等伏覩陛下卽位之初，首下溫詔，赦田租，絕貢獻，蠲逋負，停不急，與民息肩，天下欣然。頃因災異，勅諭群臣同加修省，目擊耳聞，拜手稱頌，以爲陛下貞游心經術，邁跡堯舜。今締觀煙火花燈諸詩舊式，率多鄙褻之語，安燕之詞。臣等復賦，諒不出此，輒相私語：陛下明聖，所不留情，或者以歡宴兩宮，助孝養萬一。臣又伏見兩宮母后，恭儉慈仁，著聞中外久矣。今者兩廣弗靖，四川未寧，遼左雖云告捷，虜情尚難測量，北虜毛里孩蛇豕窺伺。江西旱乾以數千里，其他災傷之處，未能悉數。雖蒙詔恤，公私匱乏，殊可寒心。此陛下宵旰焦勞，兩宮母后同憂之日也。翰林之官，論思爲職。宣宗章皇帝御製《官箴》有口：『啓沃之言，惟義與仁。堯舜之道，鄒孟以陳。』若以燕樂鄙褻進之君上，曲引蘇軾、宋祁教坊致語爲解，是以不仁義堯舜望陛下也。伏願採蕝蕘之言，端耳目之好，移此視聽。爲文如傷爲舜，若決省此冗費，以活流離，以賞勞役。《書》曰：『不矜細行，終累大德。』又曰：『不役耳目，百度惟貞。』惟陛下深思力行之。」書奏，上曰：「元宵張燈，儒臣應制，歷代故事。朕已減舊，但取上奉兩宮，何至妨政害民？懋等妄言譏議，其杖而調之外職。」於是，仲昭調湘潭知縣，懋臨武知縣，昶桂陽州判官。未行。明年正月，刑科給事中毛弘等言：「三臣初出草茅，敢言直諫，實盛世事，乞復其職。」特旨改仲昭

右評事，懋南京大理寺左評事，昶南京行人司左司副。蓋是時仲昭除官纔四十日耳，京師稱三君子。而羅倫以編修論學士李賢坐謫，又通稱翰林四諫云。仲昭氣岸屹立，思致安詳，既改南大理，清守執法。連居父母憂，却去葷酒，不離苦塊者四年，遂辭疾乞休。弘治元年，薦起爲江西提學僉事，品文校行，毫髮不爽。時朝廷以學校冗滯，行法沙汰，仲昭謹奉勅書，於宦家子弟，無所寬假，人不便之。自以信古不諧，再乞休歸。嘗辨《易》卦未濟，《春秋》褒貶，《雅》、《風》升降。及編次，或間裁定《通鑑証異書法》，咸有發明。又刊布《冠婚喪祭之儀》以示後學。所修有《八閩通志》，延平、邵武府志，《南平縣志》。又與周瑛共修《興化府志》。有《未軒集》若干卷。豐城楊廉採其學行人理學，而子孫多以科第顯。

乾亨 字汝亨。中成化甲午第一，與壽生稱祖孫兩元，門盛事。既聯登進士，授行人，副給事中林榮使滿刺加國，冊封其國王。事竣還朝，溯海。事聞，上愍之，遣官諭祭，贈司副，錄子胄監。自壽生至乾亨，居官立身，皆廉約恭慎，學問文章，世濟其美。子如金、希雍。如金，初錄胄監，後登弘治進士，選庶吉士，授御史，終廣西提學副使，持身嚴而敷教寬。希雍，正德舉人，守綿州，同知蘇州，清慈勤慎，所至有聲。

懋官 字若辨，仲昭孫。嘉靖進士，授禮部主事，改吏部，歷文選郎中、太僕卿、順天府尹，晉南京戶部侍郎，督儲胥。其抵任，在嘉靖二十六年之冬。南中儲胥，先是經戶部題請，貸去百餘萬。懋官至，按籍稽數，裁可半歲給而已。而南本兵張整復以海警，議選各營精銳訓練之，不足則益以四方趨健，名振武營，是所團集，皆惡少無賴子。營軍月米，故事：有妻者一石，無妻者減十之四，春秋二仲月，每石予折色銀五錢。及馬坤爲南戶部尚書，奏減四錢，諸軍已怨矣。懋官爲人，既精核治辦，又按籍稽數，莖莖半歲

給，於是斤斤爲縛繩，凡放糧予士，必詰其逃亡多寡，使毋得冒。又奏停補役軍丁妻糧，諸軍益忿。坤召人爲北戶部，懋官縮部章。至三十九年，歲大侵，米石銀八錢，軍中爭求復折色舊額，懋官謂事宜奏請，不許，諸軍日噉噉。張本兵、門本兵謾語之曰：「若第自言，不者，黃侍郎且云我右若輩。」又誠意伯劉世延微與懋官有卻，凡給軍，以月之初旬，適其月已再旬，而猶未給，諸軍遂鼓譟圍懋官第。懋官聞變，束髮踰墻，東有老退卒，急前抱之，匿於室，枕以股，比舍兒聞之，亦潛來擁護。頃之，騶聲從墻東來，懋官問爲誰，枕者曰：「張、劉二公。」懋官推枕挺身出，讓二人甚厲。二人見卒伍稍稍近，輒引車疾馳，且於車中微語曰：「若等好爲之。」而懋官遂不免。時言官不考情實，惟掇軍士流言爲疏章，世宗謬意其賸士，猶以得全屍而死爲失刑，僅坐首惡三人而已。論者以懋官綜核清介，不免於鼃錯、李深之禍。無不惜之。

洙 字裕魯。景泰舉人，授麗水訓導，勤教有功，去，而士思之。佐仲昭纂修閩志，文采斐然。子士觀，禮部郎中。孫懋恩，嘉靖舉人，知密縣，有惠政，歷戶部員外郎，司權揚州，清譽著聞。從侄文炳。

文炳 字以約。父鉞，見韋布。文炳登嘉靖進士，授南戶曹郎，權北新關。蠲除苛細，以稅金屬仁，錢二縣，示無所染，羨以上計司。歷江西僉事參議，慈惠著稱。坐不能取容分宜相免。文炳與鄭汝舟同升，舟子子，而文炳悶悶，時人評之曰：「震撼擊撞，炳不如舟。含垢茹疾，舟不如炳。」

黃察 字廷祥，亦潯後。永樂進士，刑部主事，陞江西僉事。時山谷民屯聚爲寇，察蒞兵事，軍校欲屠之，察不可，使人喻禍福。翌日，賊首蕭彥真出降。按察使石璞表察清介仁厚。有文集藏家。

陳繼之 建文中進士，授戶科給事中。以江南僧道多占腴田，奏人給五畝，餘以賦民，從之。靖難師起，繼之間有建白，輒肆指斥。嘗請除徐增壽，以阻靖難陰謀。成祖登極，與方孝孺俱伏誅。父秀，母黃，



謫戍甘肅，道死。妻子沒官爲奴婢。弟余、朔等，悉邊戍。

陳道潛 字孔昭。建文中進士，授給事中，與修國史。與楊文敏榮同事，文敏時時稱其學行。永樂初，謫夷陵判，復爲監察御史，預修《性理大全》諸書。〔三〕於時纂修諸儒卽翰林春坊，多不得預，獨道潛以行己恭慎，學問該博在選。裔孫叙。

叙 字邦禮。父文濱，見閭巷。叙舉嘉靖進士，授兵部主事，歷車駕郎。車駕主傳檄，乘傳者率影響假借，叙嚴格之，一如法。時翁襄敏萬達爲人司馬，服其有執。襄敏，潮人也，言吏部乞爲其郡守。居三年，禁海航，寬期會，以長者爲政。解綬歸，年八十餘。子志，嘉靖進士，監察御史，按留畿以北四郡。時島夷內訌，武備久疏，志督師走泗上，以衛鳳陽陵寢。疏發帑金萬餘兩、粟麥數萬石賑淮、揚饑。仕終僉都御史。

黃謙 字益甫。祖思永，洪武初以明經薦授福安教諭。謙與林岳同時，詞翰並爲士林所重。舉永樂進士，授魯府伴讀。魯王作字，謙借筆以諫。又有諫獵之書。嘗曰：「吾主爲東平、河間，臣之願也。」

黃約仲 名守，以字行。精楷法，爲詩語意清婉。永樂初，應詔至京，文皇試《上林曉鶯天馬歌》，擢第一，官翰林典籍。預修《永樂大典》、《四書》、《五經》及《性理大全》諸書。書成，進檢討。在官二十餘年，疏乞終養。約仲官翰林時，學士曾榮、胡儼皆重之，珥筆西清，扈蹕北伐，只有著述。子謙，舉宣德鄉貢，高才夙學，有父風，以母疾侍養，不赴禮闈，卒。

余師孔 繇儒上舉爲本府訓導，善教，工文詞。

曾景修 名生，以字行。學尚躬行，好深沉之思，持辯博之論。永樂間，應貢入太學，授玉山教諭，陞

德安教授。與諸生處，情同家人，答問講解，終日不倦。出其門者，才質高下，各有成立。卒，葬德安。

楊慈 字則惠。舉永樂鄉試第一，會試第二，廷對二甲第一，選翰林庶吉士。尋卒，得年三十。慈少孤穎悟，爲文間有論辯，出人意表，凡所賦作，操筆立就。恒以科第文詞爲儒者末事。無年，而人惜之。

陳用 字時顯。永樂初鄉試第一，舉進士，選翰林庶吉士。與陳道潛、黃約仲被選預纂修，書成，授檢討。歷官侍講。爲人質實醇厚，言動不妄。歿而無嗣，鄉後輩以義起祭於社。門生江浦、張瑄來爲巡撫，刻詩墓石：「四十余年翰墨場，皇明人物漢文章。惜無子姓承宗祀，徒有門生酌酒漿。」

黃常祖 字邦經。中永樂壬辰三甲第一，授刑部主事員外。嘗有進天書者，五日不得報，懼而自刎。詔旨疑有他冤，鞫其居停，婦將抵死，常祖原實平反。丁內艱，服闋，工部尚書吳中董營建，奏爲其屬。採木於山西、湖廣，時督促嚴急，常祖爲上爲下，悉心彈智。有周御史者共事，不法，人劾罷之。事竣歸省，以楊文敏薦，陞山西布政參議。招徠流亡，民悉復業。平陽界有盜聚千人爲害，推誠諭之，皆降附。尋致仕，年八十六卒。彭韶志常祖墓言：「韶人郡學，獲見前輩風致，及其時禮俗大概，老成樸素，遠浮蕩驕奢之習。時若會元陳公中舜用、郡守方公廷訓、鄭公季述，及澹軒黃公，皆朝野鉅望。公於居室，不插一椽，尤爲舊俗繁重。」澹軒，常祖號也。

林時 字學敏，唐侍御史謙之後。永樂進士，觀政刑部。坐門籍事誣誤繫獄，例發北京營建。有女淑圓年七歲，擊登聞鼓訴冤。仁廟監國，釋其罪，出爲陝西按察僉事，巡歷邊荒，辯反疑獄。鳳翔、延安等府，歲發粟以餉寧夏、甘涼戍卒，時謂其地寒，少布，奏聽民與戍卒以布與粟自相對輸，至今便之。又奏設武學，令武胄得由科目進用，今天下多設衛學，起時議也。陞貴州按察副使，持節兩部，風力廉介，爲

世所稱。

余耀 字叔炫。永樂進士，除進賢知縣。廉介不阿，斷事以義，蒞下以信，爲楊文貞所知。九年，最滿常遷，以母老告歸。文貞公薦之，命傳詣闕下，授吉安通判，掌其邑事。人呼石余，又目爲沉水船，言其堅執也。母喪，解任。服闋，通判饒州。

翔 字宗漢，耀後。嘉靖鄉薦，令全椒。一日假寐，夢五大夫環水祈籲，頃之，有來告疏井獲一枯髑髏者，翔瞿然曰：「髑有五，此其一耳。」求之，果然。密遣偵之，而得其殺人者，江淮間神明之。居頃之，會議里甲，欲縮其縣以甦其民，御史不是也，即日拂衣去，之金陵，爲詩酒游。已，客游梁，登吹臺，謁五先生祠，蹠而酌者三，起而引滿者五，因仰天絕叫，人以爲狂。五先生者，唐杜甫、李白、高適，及本朝李夢陽，何大復也。去梁之歟，與汪司馬道昆游黃山，舉瓢大釀，袒跣就車，山中小兒怪之，堵而觀。他客語之曰：「故全椒令也。」翔客游二十餘載，在金陵居多，王司寇世貞贈之詩，比之陶令，曰：「陶影不出山，余跡不入里。當其傀俄時，千載如一軌。」晚歸三洲里中，至與諸少年狎飲，而貧益甚，顧不能爲慙，有所獲，求輒應，人盡高余先生也。

林庭芳 永樂進士，知新會縣。敦朴能詩，善選體。子敷，韶州知府。初知眉州，威令大行，眉人信服。侄榮，嚴重謙和，事寡姊、寡嫂有恩，爲鄉黨所稱。登天順進士，授南御史。成化初，疏言七事，皆中時弊。轉廣東僉事，改江西，卒。子沂，貴州參議，博學強記。

王偉 字士俊，宋希亮九世孫。永樂中進士，授大理評事，陞雲南府知府。仁厚爲政，夷民悅服，卒於官，民哀慕之。偉邃經學，工文辭。宣德、正統間，莆先輩在翰林者俱已凋謝，惟偉與會元陳中爲文章

宿老。

徐資用 宋朝奉郎確之後。永樂中進士，令揭陽。博洽有才，舉動端謹，興學訓士，有良吏聲。疾作，辭歸，與弟資茹講行禮學，以肅家教，鄉人稱爲二徐。侄孫元稔，弘治進士，南兵部郎中。爲人磊落，嘗請陳瓚、陳文龍二忠祀典。觀瀾，嘉靖中舉人，爲南戶部郎中，工詩及古文詞。

陳中 字舜用，宋仙游太卞之後。永樂中鄉試第二，會試第一。爲人資性簡率，才思豐贍，文章健直。正統初，自南戶部主事就留史館，預修文廟、仁廟實錄，陞員外郎。九載，乞致仕。幽巷貧居，吟咏自樂，年八十三。侄孫珀、璣。從侄鉞。（一五）

珀 弘治進士，爲監察御史，有名班列。嘗疏抑妖僧領占竹，朝論韙之。終甘肅行太僕寺卿。其仕御史時，奉差出京，適同鄉訓導翁瑞卒官，冷宦無依，爲携輓以歸，道路誤傳謂陳御史物故。至莆，乃知翁輓，莆人擊節談其事。

璣 字子珮。成化中鄉薦，爲威縣教諭，改高陽。以身先士，每晨升堂，授書作課，午後講書，夜讀盡二鼓，諸生始苦而終化之。奔父喪，率諸弟一從家禮，服闋，二邑人士爭欲得璣，終其教。太宰王端肅懇特遷國子學正，從學者戶屢常滿。璣立志高古，界域甚嚴，時流輩少有倫比。

鉞 字廷威。天順八年貢士，授麻城教諭。歎輓近吏拘文法，無前輩風韻，勸縣大夫做文潞公在洛故事，建耆英堂，遇節假，延致縣中諸老，以敦薄俗。又考求其邑中前輩，有德行、文章、政事可師法者，人爲之傳，俾後進尚法。遷瑞州府教授。鉞貌古養充，少治古文，爲族祖會元獨賞。陳音爲諸生時，願屬講下，鉞謝，與友柯學士潛爲之延譽，名動詞林。而懷奇不售，僅老學職，其才盡發之詩，興致幽玄，體裁雋

水，詞彩麗密，讀之而有餘情。子汝瀾，見章布。

鄭述 字季述。永樂進士，授刑部主事。正統中，坐公罪，謫判惠州。爲人有精力，名辦治。上司更委他郡決難事。惠人茅茨竹椽，其民好夜作，易招火患，述令陶瓦爲棟宇，身往督勸，賞其先就者，不贍則振給之。邑人吳高曰：「唐宋璟刺廣之政也。」薦改知南雄府，修陵陂，砌嶺路爲庾關，夫役節省均調，招集流亡不下二百餘戶，以循良仁愛著聲。

蕭爲 字尚穎。仕樂昌教諭，嚴肅矩度，表率生徒。子光甫，令安縣，有治才，爲民築城防寇，官至督府經歷。

方熙 字孟明，宋大琮之後。宣德初進士。宣廟御文華殿，以《三農望雪賦》親試諸進士，擢熙第一，授翰林庶吉士。熙才高志大，言論風采，峭直英發，以此取忌。出判潮州，多雪民冤，潮人愛之。致仕後，肆力文詞，詩律益細，選體尤優。年八十二卒。侄臨、鯉。

臨 字子人。天順舉人，仕興化、章丘兩庠教諭，先後歷官十八載。博學敦行，師範端嚴，嘗主山西、江西鄉試，同考應天，得名士邵寶等數百人，與翰林黃仲昭諸公結社吟咏。子璐、在淵。璐，弘治鄉薦，孝友，蚤卒。在淵，見章布。

鯉 字廷訓。永樂進士，授官監察御史，剛果必爲，號材御史。陞彰德知府，改紹興，並用嚴明爲治，吏畏民愛。

林同 字志大。宣德中解元，初任信豐教諭，陞宿州學正。嚴毅方正，接引生徒，問難詳明，一時多所造就。

李廷修 伯父璣，萊州知府，有廉直名。廷修，宣德進士，多通強記，詩文清麗，終太僕少卿。

陳璉 宣德初貢士。正統初，知興國縣事，清勤不懈，寓政以德。內艱去，民懷之。服闋，請再任。居二載，去。

黃諫 字聲叔。宣德中以明經薦授仙游訓導。丁內、外艱，改無錫，復改麗水。時浙寇張甚，衆以諫有才略，推以捍賊。部署既定，乃諭以忠義，衆感激，鼓之而進，賊遂奔潰。天順中，陞廣元教諭。廣元，蜀北鄙，戍卒多而編民少，學政久廢。諫力修學建廟，教之如中州，樓楚壯威，解推示惠，諸生師而父之，致仕歸，卽學宮旁祠像焉。始，諫教仙游時，有令密寄之金二百，令家人不知也。令死，諫召令子還之。其入蜀也，與董僉事先後船，董船覆，呼舟救之，莫前者。諫曰：「是欲得財耳。」出囊金招舟子。舟子前，董遂以免。孫顯。曾侄孫待顯。

顯 字伯望。弘治三年，授戶部主事。沉毅內植，機神開朗，同輩目爲老斷。榷舟臨清，部爲一重災異求言。皇親張鶴齡請爲其母金氏造第，朝旨許之，顯疏言：「金夫人誕生聖后，予以殊恩，固不爲過。第祖宗待外戚自有定制，至於陛下，乃特爲降重，鶴齡兄弟並列侯伯，欽賜莊田動以千計，而鶴齡父壽寧巒，已極葬祭之儀。金夫人給告祭掃，又出內帑之賜，死哀生榮，恩寵無比。今又有修造之舉，夫張家房屋，欽賜未久，縱有一二缺漏，亦當自行修補，何必妄費朝廷之財，抑民之奉上也。事出當然，雖勞不怨。人之自受也，福過其度，雖厚必崩。陛下誠愛鶴齡，宜擇嚴師傅教誨之，示以聖人節用之言，誠以惜福之端，使其以仁積德，以禮行儉，豈不享祿位於無窮？又何必上累聖德，下困民力，使天下勞以怨哉！」知肇慶府，拯孤癯，抑豪右，爲民當怨。肇多盜，或勸顯盡屠之，顯第久繫治之而已。盜群死，因以絕。鎮

守袁仕，久爲顯所忤，誣其酷，以聞劉瑾，爲仕所窘繫。既，御史劉洋論劾仕，顯出繫，補武昌，擢廣東左參政。林貞肅志顯墓：「君治肇，無繼者。治武昌，無前者。治廣，無爲並者。斯名士大夫私論與下屬萬口而同者也。被仕媒孽，如墜湯火，青蛇加點，全璧方寸朽，吾無子之冤，其日其天。」

待顯 字君俊。祖綸，教授順德，以德教士。待顯，正德中爲戶部主事，監臨清庾，痛釐弊蠹，轉員外郎中。世廟更上睿皇帝尊號，待顯與何孟春、豐熙等伏闕諫。奏入，留中，復回。孟春等跪哭左順門，聲徹於內。上怒，命收繫諸爲首，待顯與豐熙、余寬、張紳、余翱、陶滋、相世芳、毋德純等八人並繫獄拷掠，編伍，於是戍廣東碣石衛者十三年。及九廟告成，蒙恩釋歸。年餘，卒。隆慶改元，追贈太常寺少卿。

林典 字汝惇。父憲，秀水訓導，博學能詩。典，成化中舉人，初授冠縣教諭，改西安。提學吳伯通稱爲浙中師儒第一。擢鄖陽府教授。郡治新設，人才尤陋，經典指教，遂有興起。主考廣藩，往謁陳白沙，白沙稱爲遠到之器。擢宣城知縣，治最諸邑。累山東僉事，提督北畿屯田，兼管糧草。蒞職清嚴。事涉權貴，不少徇假。疏乞致仕。故廬甚隘，別葺小堂曰西翠，稽經訂史，罕與人接，年七十卒。從弟文俊，茂竹。

文俊 字汝英。家貧無書，日閱市肆，熟識而還。弱冠發解，舉進士，選翰林庶吉士，授編修。預修《武廟實錄》，充經筵官，擢右春坊右贊善，進經筵講官。兩上會試，一主武試，精心校閱，不敢怠欺。還南國子監祭酒。先是，有旨命校刻二十一史，未就。文俊躬率諸生讎訂竄補，恒至達曙，不數月鏤梓以獻。世宗嘉悅，每御文華殿，指示元臣曰：「此祭酒林文俊所刻書也。」改北祭酒，仍充經筵講官。癸巳歲，世宗再幸國學，文俊從容講說元首股肱之義，天顏忻懌，賜衣二襲。擢南京禮部侍郎，改吏部。卒，贈南京

禮部尚書，賜葬，予謚。文俊玉質矩容，音吐中金石。其爲人也，愷悌和厚，服義循理，毋敢飾誕以釣虛譽。不能仰俯權貴，幾爲所擠，賴受知世廟以免。其卒也，太常議謚曰良，曰恪，御筆特改爲文修。侄孫應鳳，定遠學諭，生平孝友，襟懷洒落。

茂竹 字仲修。令嘉興，清慎公勤。爲僉事，風裁峻整。歷廣西參政。

林繼賢 字啓宗，與文俊同出。祖瑱，授建昌教授，持身端慎。繼賢生而眇一目。通判徽州，父寄書勉以清行，貽之雙履，表裡純青。繼賢曰：「履，履也。青純不雜，履潔蹈清，父教我矣。」判徽七年，徽長老言清官，動曰林三府。遷寧波府同知，視郡篆，決獄得情，民復呼林青天也。始繼賢判徽，部內左都御史汪者，其子弟怙勢干請，一切斷以法。及丞寧波，汪正爲冢宰，以目疾考察繼賢去，民曰：「嗟！嗟！父母眇於目，不眇於眼也。」繼賢家故饒，及其人宦反貧困。卒死倭難，行道憫惜，謂天之報施廉吏何如也！

方灝 字源深，宋仁岳之後。正德四年進士，授行人，年五十餘矣。隳然老儒，猶執經講說不已，扣問紛如，酬告罔倦。尋求致仕。平生邃禮學，動率禮書，嘗歎文公《家禮》雖經諸儒註釋，而去取或晦，朝代遷改，冠服不同，於是作《家禮》旁附書首，列圖而條析於下。莆俗自水南徐資茹家冠婚喪祭依約《家禮》，至灝又篤是書，鄉人多化之者。自號柳東耕老，學者稱柳東先生。卒年八十二。子和叔，石康教諭。孫岳，有文名，以南御史言事左遷泰州判官，陞常州府同知。山，雷州同知；嶠，景州訓導。宜賢，吳川知縣。宜賢子一桂。山曾孫興邦。

一桂 字世芬。嘉靖初進士，授蒲圻知縣，調宣城，徵人爲御史，視居庸關。條上邊務十二事，繼按山東，疏墾荒以增營田，正孔廟從祀以定禮制，俱報可。久之，論冢宰汪鋌奸狀，疏中有「陛下杜天下口已



三年矣」之語，世廟震怒，廷杖六十，削籍。卒於家。隆慶改元，追贈光祿少卿。

興邦 字懋翼。嘉靖舉人，授上海學諭，遷吏、禮二部司務，兵部武庫司郎，終廣西參議。詩詞整麗。其司務吏部，與廣陵宗臣爲同舍郎，嘗作《百花洲歌》贈之，一時李攀龍、徐中行諸公皆異其才。

方玘 字體珩。正統中解元，韶州教授，高才能文。

翁世資 字資甫。父瑛，翰林檢討，掌國子助教事。樂易喜酒，姻黨皆親。資舉進士，授戶部主事，政暇輒翻閱舊案，究其利弊，涉獵廣記，因而明習典故，條例因革，悉所諳練，大爲部堂諸卿佐所重。丁外艱，歸。景泰改元，尚書金濂奏起復之，固辭。終制，服闋，復除舊官，遂委典各司章奏。未幾，陞署郎中。適江南水災，屬世資勘驗，因奏免應天、太平、寧國、安慶、廬州等府及建陽、宣城等衛稅糧五十萬餘石，芻束倍之，且檄所司賑恤。英宗復位之元年，大臣多罷，上識世資可大用，遂擢工部右侍郎。三年，內織染局言，蘇、杭五府織造上供文綺七千疋未就，合別遣督，又賞賜不足，宜加造七千疋。世資謂東南水潦，民苦艱食，朝廷宜樽節之，因與尚書趙榮、左侍郎霍瑄議減其半，榮、瑄皆有難色，世資曰：「倘得罪，某請以父子三人當之。」疏請，上疑其要譽，推主議者，下世資錦衣獄，貶知衡州。至則決疑獄，新廟學，修石鼓書院，立便民倉，百廢具舉。衡衛帥有戾法者，世資稍抑之，遂誣其怨望，逮至京。上不直衛帥，復世資官。成化元年，陞江西布政使。適廣東寇發，主帥南下，有議令江西轉餉，計非用十萬人不可。世資令齎銀就廣中糴之，且爲奏蠲民賦百七十餘石。五年，陞都察院右副都御史，巡撫山東。明年秋，東土大饑，發廩勸分，遣官賑恤。八年，遷戶部侍郎。十三年，奉勅總督京、通等處倉場。明年，進本部尚書。世資久處計司，出入劑量，懸合事宜。以年及請老，加太子少保，給驛歸，有司給月米，歲夫，賜勅曰：「朕聞

義《易》繫終吉之辭，《禮》經明進退之節。卿累疏求去，蓋得節於《禮》經，朕既允，而復陞者，亦欲錫卿終吉之福。君臣上下，不各盡與卿歸，其篤念乎此！優游田里，化導鄉人，俾後賢觀法，風俗淳厚，則足副朕眷遇之懷。」時人榮之。卒，贈太子少傅。世資居官四十餘年，謙約和厚，善兄弟，廣交游，家無餘貲。兄世用，貴州參議，居官廉慎。世用子涇，令太和，御史有事於縣，涇持不從，坐免歸。

鄭立 字克豫。以乙榜授易州學正，改六安州，遷饒州教授。所至與諸生共治經史，情同一家。易人去之既久，爲立追遠碑，祀之名宦。彭韶志立墓，言：「立氣宇峻整，動止矜嚴，取與不苟，交游以類，加以學問之充，群行之富，士大夫無識不識，交歎爲名師儒。」

陳暄 字體日。正統中進士，爲人簡儉。仕韶州知府，釋郡民陳永死罪，永家像祀之。致仕歸。孫克恭，南御史。

周瑩 字次玉。有文名，坦夷不拘世故。正統中進士，歷撫州知府。歸，閑居三十年。蕭之詩學，自瑩振之。年四十時，作《擬放歸》詩云：「二十居官四十歸，急流勇退世應稀。投閑故里蘭紉佩，戲綵高堂錦製衣。林下新開延客館，水邊豫拂釣魚磯。是非不管人間事，長弄扁舟看鶴飛。」從弟瑛。侄轍、軫。轍，戶部主事，爲人持重。軫，見下。傑，樂清訓導，醇和接人，諸生有春風之譽。從弟瑛。

瑛 字梁石。久上春官不第，益泛濫群籍，鈎深探賾，與新會陳公甫、遼左賀克恭上下議論，且相期以退隱爲高。舉成化進士，知廣德州，陞南禮部郎中，出爲撫州知府，調知鎮遠。秩滿，歸省。弘治初，王端毅恕爲吏部，卽家起四川參政，尋轉右布政使。丁母憂，服闋，乞致仕。給事中楊廉、吳世忠交薦其孝行，吏部覆奏起用，堅引年致仕。瑛知廣德時，著《祠山雜辨》以戒民尚鬼，著《教民雜錄》，令民葬祭循《禮

經》，毋或溺殺子女。爲郎時，著《經世管鑰》、《律呂管鑰》，推明蔡氏、邵氏學，著《字書管鑰》以講六書。守撫州，興水利，著《政本》、《第輸納》，著《政均》。自叙居官行己，抑畏天命，凡有事，人不及知，而暗合於天者。楊廉載瑛《理學名臣錄》，爲之贊曰：「公心隆古，人意末叔，越雪蜀日，或以迂目。」子大謨，博學能文，以《詩經》魁禮闈，告歸終養。侄軫。

軫 字公載。直訥鮮文，刑型老格，樸根慳性。成化乙巳元日，京師星隕有聲，軫爲戶部主事，疏言：「誅元惡以快人心，減內臣以清朝政，正朝廷以正百官，罷方書以頤養聖躬，親儒臣以論道經邦，重科道以糾劾官邪，杜僥倖以振作士氣，量進鮮以差撥船隻。」留滯久之，始進郎中。京師大水，南京大風雷，詔詢時政闕失，時侍郎劉璋視篆，收採群言。軫言：「天子藏富於民，皇亦有莊，顧示以小，非稱宜與民，否亦宜革管莊如例，畝限三分，責民人租，有司解部以進。」璋如其言。疏入，留中，久之，出爲山東運使。乞致仕，加職進江西按察使。林貞肅志軫墓，謂：「未剖之璞，未災之木，幸於公見之。」

黃譽 字廷永。正統中登鄉薦第一，第進士，授南御史，遷浙江僉事，參政，改湖廣，卒。剛果高烈，所至摧姦去暴，難中貴人無所避，號劉草黃。三子：穆、秀、秩。穆，翰林編修，有父風。秀、秩皆舉鄉貢。穆孫大經，戶部主事，有詩名譽。從孫漳，岳州通判，能詩，工文翰，善畫。

陳俊 字時英。舉正統鄉試第一，明年登進士，授戶部主事。父珪，仕文昌教諭，歿官舍，俊蹈海迎柩，不挾海南一物，上下嗟異。服闋，除舊職。景泰中，督徵天津等衛舊逋秋青草，奏減增數三十五萬束。尋命督江南蘇、松諸郡負上供銀十七餘萬兩，不數月告完，部長貳奇其才。天順中，遷員外郎，郎中。五年，兩廣合兵討叛蠻，朝命往督餉。時郡邑殘破，公私匱乏，俊弛鹽商越境禁，隨處貿易，每引輸粟

二斗於南雄、梧州，用是兵不乏食，民不出賦。會母喪，乞守制，不許。明年師還，始歸。成化元年，陞南太常少卿。時郎官久無拜卿、少者，俊以賢譽得之。四年，召爲戶部侍郎。是時，邊事蠢動，四方奏災傷文移還集，謚議旁午，俊佐尚書楊鼎隨時裁決，懸合事宜。部屬相謂，文移、奏稿得陳公改筆，如敝金然。七年，京師饑，奉勅發太倉粟百萬斛減價糴民。俊慮權貴乘時射利，請於朝：糴石以下者乃許。八年，虜聚河套，規內侵，憲廟將征之，勅總督軍餉於陝西。俊請出內帑銀助邊，且修西安、韓城、同官徑道，以便飛輓。榆林大捷，偕諸將凱旋，食從二品俸。九年，改吏部右侍郎。十二年，轉左。每勸尚書尹旻抑奔競，獎恬退，宥正直。摧折者陰扶，默救，不使人知。九載，陞南戶尚書。十六年，改兵部參贊機務，剷除宿弊，不動聲色。二十年，改南吏部尚書。二十二年，滿九載，屢乞休，加太子少保，致仕，給歲夫、祿米。弘治元年卒，賜謚康懿，遣官諭祭營葬。俊於思清揚、沉毅、簡重，望之淵澄岳峙，位至六卿，蕭然韋布。儲文懿稱俊自登科筮仕敷通顯，禮樂、銓選、兵戎、錢穀，或副或專，奮才奏功以四十年，然天下之士，不以此頌公，究公之心，亦不以自居也。至論今之大臣，清修慎重，端立廟堂，足以鎮雅俗、表後進、負德望之大體者，必首反焉。弟察，慈谿教諭。係達之、應之。達之，嘉靖貢士，令沈丘，倅淮安，俱有惠政。應之，舉進士，南戶部郎。應之子所有，合浦令。

宋勸 字謹麗。正統中以貢授沐陽訓導。博雅好古，教諸生，條約不煩，而真意懇至。居八年，以母八十餘，乞致仕，諸生乞留不得。勸歸養母，耆年矣，孝謹不衰，甘飴隨具。子汝勤，舉鄉貢，授安州學正，一變弛玩學政，人才遂盛。終國子監助教。汝勤子端儀。

端儀 字孔時。舉進士，歷禮部郎，擢廣東提督學政。身先表率，痛抑浮誕奇險之習，課士所至，燦

鄉海滋莫不涉歷。在廣五年，竟以勞卒。廣人祀之學宮。端儀居家孝友，持身廉介，稽經訂史，泛濫博蓄，而於程、朱微言緒論，無不究極。自其爲諸生時，鄉舊哲否，品藻詳明，私錄以爲訓戒。當官明習典故，凡所行止，具有據依。所著有《考亭淵源錄》、《莆陽人物備志》、《鄉賢考訂》、《莆陽遺事》、《莆陽舊事偶錄》、《立齋閒錄》、《祠部典故》、《高科考備遺錄》。子元翰。侄元岳。

元翰 字良翰。少從父督學嶺南，其母黃，教之嚴，及歸，領鄉薦第一。正德九年，知潮陽。時黃從入潮，猶述端儀事示之，元翰奉教愈謹。潮俗：大姓喜舞斷，持陰罪相搆陷。元翰每戶朔矢神共事，開諭以至誠，解仇修睦，小大感懷。有鄉宦陳洸，故給事中也，方附霍文敏大禮起官，其居鄉橫甚，因請託不行，嶺監司羅繼繫治之，使元翰所除治劇賊曾鉅頭，所懲楚民李連、號連氏爲證。然賊終不忍加汙，李連甘受捕死。元翰久繫獄中，作《訴冤錄》自解。朝中人皆惡洸，有臺臣封《錄》上聞，詔遣官往訊，得實。洸黃緣奏白逮元翰下詔獄廷鞫，無一驗，竟奪職爲民。方元翰自潮赴廣，復自廣赴京，縣民爭致金帛爲贈，盡卻不受。乃合所却金建生祠於北衢，聯巨石爲碑，請故翰林編修王鬼爲記。里巷刻小碑以十數，又刻東山雲石曰：「清慎仁愛，宋公去鬼。」洸惡之，毀碑與祠。洸死，衆復修祠刻碑，時節致水土物厚問，生敬死賻，雖古循吏弗能過。元岳，萬曆中以貢官建安教授，所著有《文廟考》、《四禮節要》。

林慶 字廷珍。正統中縣貢授儋州知州。守儋九年，父老刻石頌政。黎官王賦數不法，慶廉治之，反爲所誣，遭繫詣京，僭民群走乞留。會遇赦，免歸。年八十餘，卒。

洪楷 字學膺。景泰舉人。初爲御史，出知紹興，儉勤廉慎，賦寬刑平。成化辛卯歲饑，瀕海多盜，楷防守要隘，勸富豪出粟以貸貧弱，歲不爲害，盜亦屏息。從子珠。

珠 字玉方。正德進士。嘉靖初守紹興，寬厚文雅，崇尚名教，建忠臣劉幹、先賢尹焞祠，封耆儒羅頌墓，表節孝，聘遺逸，若王埜、王琥輩，皆躬造其廬，一時士氣振起。尋遷本省右參政，人謂：「大洪小洪，先後同風。」

柯潛 字孟時。弱冠，領正統鄉薦，當赴春試，未忍離親，携書入蓮峰僧舍講讀不輟。景泰二年，廷對第一，授翰林修撰。丰神峻整，言動謹飭，翰林諸老咸愛重之。尋用薦入經筵。明年，陞右春坊右中允，兼修撰，預修《歷代君鑒》，書成，賜白金、文綺。甲戌，禮部會試，爲同考試官。命預修《寰宇通志》，既成，陞司經局洗馬，仍兼修撰，加賜白金、文綺。出主應天鄉試，還朝，乞歸省，未行。英廟復辟，授尚寶少卿，兼職如故，仍許歸省。三年，命修玉牒。庚辰春，命偕呂學士原考禮部會試，充東宮講讀官。憲廟嗣位，以隨侍恩陞翰林院學士，奉旨教習庶吉士李東陽等二十八人，纂修《英宗實錄》。成化改元，主考順天鄉試，再奉旨教習庶吉士林瀚等二十四人，命掌翰林院印。三年，《實錄》成，陞詹事府少詹事，兼翰林院學士，賜白金、文綺。四年，命日侍經筵講讀。十二月，賜經筵儒臣七人襲衣冠履，潛已聞父喪，上命卽家賜之。復丁母憂，詔起復爲祭酒，疏乞終制。服闋，卒家。潛峭直耿介，文章妥整有法，詩尤清婉，供職之暇，時偕二三知己覽勝賦詩，襟度豁如。旣掌院事，卽祠林後園結清風亭，決渠引泉，退食其中。至於遇事感發，言論侃侃。在庶僚時，已繫天下之望，位日通顯，名日益重，雖嘗以聖賢之學啓沃聖心，平生蘊蓄未及少施於天下。其歿也，士大夫多傷之。潛院中所構亭旁植二栢，後進慕其風采，謂之柯亭柯栢。玄孫維騏。

維騏 字奇純。父英，徽州太守。維騏幼而靈穎，希慕古哲。林貞肅、陳孝廉雅重之。弱冠領鄉薦，

登嘉靖進士。出黃文裕佐之門，文裕語人曰：「異時無忝鴻儒柯氏子也。」授南戶部曹郎，未領牒，引疾歸。永嘉相張孚敬倡爲新例：京朝官請急，踰三年者，概罷免。維騏在停格，亦波及之。遂鍵關息交，聚徒講學。其所著書凡數種。自慨近世竊禪學以掩孤陋，則作《左右銘》。欲學者實志、實功、實用，終始一誠，則作《講義》。與生徒問辯心學，講釋經傳，上下千餘言，則作《答問》。宋舊史故與遼、金並名爲三，而宋不得列正統，夫是二國也，宜夷狄之。瀛國二王，宋後也，合名曰帝，以定一尊。亡國叛臣若酈瓊、劉整、留夢炎之輩，莫正厥罪，而但列降金之臣，名之爲叛，擊異誅僞，乃合《春秋》，則作《宋史新編》。於《史記》，慨班氏譏評爽實，少孫補綴亂真，則作《史記考要》。鄭司馬岳述《莆陽文獻》一書，維騏復撰次之，則作《續莆陽文獻》。家食五十年，上下古今，莫不窮其意旨，伐其踳謬，弟子負笈至四百餘人，前後部使者論薦無虛歲。昭陵御極，言官疏薦可備著述，當軸竟以引年處之。詔授承德郎，致仕。年七十有八，卒。兄維熊，工部郎中，有才名。維騏，龍游知縣，爲人樸茂。維騏子本，見下。維騏孫茂竹，仕海陽縣，早卒，有文名。茂竹子景。

景 起家鄞縣，累河間知府、山西副使，有清聲。天啓初，朝廷欲舉清節之吏，擢爲京卿，而景當其選。歷都御史，巡撫陝西，以忤魏璫罷。

本 字正之。爲南曹郎，時鳳陽流寇師尚詔窺臨淮，將渡黃河，本率兵捍禦之，賊引騎去，臨淮人爲勒碑立祠。歷浙江按察僉事。

德贊 潛族子也。成化舉人，任山陽教諭。持身峻潔，教誨詳明，早作夜思，九年如一日，陞高州推官。

陳敬 字體清。仕江西僉事。（二六）景泰中以十事進諫，彭惠安詔爲岳文肅稱道：「其人可祀鄉賢祠。」

葉巒 字俊甫。仕監察御史，提督南畿學校。靜廉持重，身後甚貧。

蕭光甫 字光甫。景泰鄉舉，任安縣知縣。內艱，安民奏留，不允。復除寧縣。寬簡得人和。安民給符而至問起居者不絕，皆涕泣去。陞後府經歷。

嚴洙 字宗源。才華風雅，精經學，舉進士，改翰林庶吉士，同修《寰宇志》，擢御史，督學南畿。先德行，而後文詞，嚴考校，絕請託，權門要路，聽其謗且憾。陞浙江按察副使，仍理南畿學政。以不便行事，改湖廣。奉勅撫流民，復改提督學校。秩滿，陞廣東按察使。王黑皮等先後嘯聚，設策擒捕，或戮或釋。陞湖廣右方伯，湖湘人士夾道歡迎。未幾，轉左，命下，而洙卒矣。洙純真清慎，居官毫髮守法律，與不苟合，而於故人情分甚篤。在楚中，得李承芳、承箕之文，卜其所就不爽，楚人頌之。

林漢 字景源。父時望，宣德初解元。兄景淳，天順中貢，任中都留守司經歷。成化乙未，鳳陽饑，奏免稅糧四十萬，軍士德之。漢領景泰鄉薦，爲饒州通判，清介自厲。有勢家占湖田，承檄往勘，奪以予民。爲所中，考察罷。憲使侯某抗言曰：「林漢罷，江西官無一可留者矣。」竟去，朝論大譁。饒民號泣追送之境上。

朱寬 字宏裕，宋古田令璣之後。天順初進士，授南禮科給事中。成化改元，同官王徽與寬五人陳言五事，其一言保全內官，貴近卿之。繼而太監牛玉坐選吳廢后事黜居南京，寬復與徽等上疏，論玉有當死之罪四，并劾李文達賢阿徇不言，亦屬黨欺，未復申前疏保全內官之說，反覆千餘言。用事者惡其切



直，因媒藥之，欲置極地，特貸左遷潼川州判官。至官，興教勸農，舉利剔蠹，尋卒。從侄儼，仕御史。儼子端明。

端明 字應文。知三水縣，端恪誠信，表彰貞節，營修學宮，禮賢士大夫如恐不及。三水設邑以來，端明稱最。所植河堤木，人比棠蔭焉。

〔校記〕

〔一〕「侄孫正梁」，《方徵傳》作「曾侄孫正梁」。

〔二〕「附」字，各本原脫，據《鄭循初傳》及本傳體例補。

〔三〕「弟傑」，各本原闕本傳。

〔四〕「侄言」，本書卷一百八「皇朝科第」及本卷《鄭敬道傳》作「侄芸」。

〔五〕「子孟喬」，《顧文傳》作「族子孟喬」。

〔六〕「玄侄孫琳」，《陳彥回傳》作「曾侄孫琳」。

〔七〕「余耀」，本書卷一百八「皇朝科第」及本傳作「余耀」。

〔八〕「方漸」，桂，曾孫興邦，本書卷一百八「皇朝科第」及本傳謂，一桂爲方漸侄孫宜賢子，興邦爲方漸孫方山之曾孫。

〔九〕「翰」，本書卷一百八「皇朝科第」，本傳及《周登傳》作「軫」。

〔一〇〕「端儀侄元岳附」，各本原作「元翰侄元岳附」，據《宋端儀傳》改。

〔一一〕「維祺曾」三字，各本原脫，據《柯維祺傳》及本書體例補。

〔一二〕「林漢」，本書卷一百八「皇朝科第」及本傳作「林漢」。

〔一三〕「性理大全」，各本原作「清理大全」，據文義改。

〔一四〕「擊登聞鼓訴冤」，各本原作「擊登門鼓訴冤」，據文義改。

〔一五〕「從侄」二字，各本原脫，據傳記目錄及「陳中傳」「侄孫珀、璫」行輩用字補。

〔一六〕「字光甫」，原文如此。

# 閩書卷之一百十一

英舊志 縉紳

興化府 莆田縣七

皇朝

有傳

彭韶族子甫。甫子大治。治子文質。

吳繹思 姚綿 吳清從侄孫音。 陳音 楊琅從子國本。 吳宏密

吳希賢曾孫三畏。

林誠族侄孫華。(一) 曾瑤 林講 陳叔疇 林祥 李元弟文利。 陳純子晦。 林正

黃璉子講。

丘山曾孫秉文，從侄泰。

方守從弟彬。 方珪 廖德徵 陳裕 黃芳 翁端 陳懋源從孫伯

獻。(二)曾侄孫應魁。伯獻曾孫其志。

吳仲珠 朱愷弟悌。 丁襄 梁璋 方維翰 吳球 李德美 黃節甫

從子榮。榮子謙。(三)

張澤 高俊 陳世顯 鄭光與 丘天祐 陳仁 鄭寶 周進隆 余徵 郭紀

陳謙山 林大霖 黃黍

方良永弟良節。良永孫攸績。良節孫攸疇。攸疇子沆。 林鑑 黃瀾 黃相子日敬。

許璣 陳茂烈 林琨 李廷梧 吳希由(四)子紳。

陳深 王鏐 張廷槐 黃體行 吳大田 陳簣弟

篋。 馬思聰子明衡。

彭韶 字鳳儀。天順初進士，授刑部主事。成化初，爲員外郎。疏論僉都御史張岐不稱風紀，請召用王竑、李秉、葉盛。忤旨，下錦衣獄。得釋，尋進郎中。韶司郎中，爲廣東司，司隸錦衣，有所冒犯，前後人多貸之，韶守法一無所撓。京師姦民投獻真定、武強等縣民田於慶雲、長寧二伯，二伯故周太后弟，有司不敢拒，爲之籍羨民田，有田者不服，上使韶往度。韶環視周匝，徑歸，還奏曰：「真定古冀州域，其賦爲第一，或雜出爲二等，說者謂如《周官》田『一易』、『再易』之類。蓋其地，間有歲一收，有兩歲一收者。坐是，賦有不同，明一畝必兼數畝，未嘗逐畝定賦矣。高皇帝初平天下，念山東、河南繁於供給，韶有草田任墾不科。宣、英二廟軫念北京，亦如高皇帝韶令。長寧伯所求，有司不能白，奏籍羨田應之。臣履畝其處，見地有高下，歲有旱潦，早時資下以補高，潦時資高以補下，沿河者流徙不常，鹵薄者積歲無穫，率皆截長補短，取彼益此。是以堯舜錯賦於前，我祖宗絕科於後。即今徵斂繁興，丁無游民，尚賴顧戀地業，力耕粗給。若計畝論畝，餘奪爲羨，臣知非死則徙耳。真定近在畿內，國家根本，戚里功臣患不富貴哉？奚必蹶國之根，不與戚休，爭民艱食利也？臣前到彼，民扶老携幼，遮道哀告。不覺自失，誠不忍履畝奪小民衣食地。望陛下特治臣罪，開生於百姓。」上怒曰：「使韶度田，韶但如韶，乃徑歸。其下錦衣獄。」科道官交章救，得釋。俄有請荒田者，憲宗曰：「不見太后家請不得耶？」六年，陞雲南按察副使。安岳扈氏焚滅劉姓一家二十一人，定遠曾氏殺其兄一家十有二人，皆以疑獄久淹。韶一訊輒得。十一年，陞本司按察使，鎮守雲南。太監錢能遣人進象，沿途索賄，鎖人象足，非法拷刑。韶上言：「自古帝王不患娛心之不足，惟憂德業之未隆，是以恭己勤儉，綏遠賤用。錢能屢貢寶石、象、馬、禽鳥之類，近又進金燈，號爲絕奇。雖曰敬奉朝廷，夫豈堯舜其君以致萬里勞人？承遺之徒，狐假烏攫。伏乞將前物罷去，嚴勅內

外臣下，敦素守法，撫安夷民，則遠人歌舞，聖治無疆。」十四年，陞廣東左布政使。時朝廷屢遣中官採辦上物：蜜煎、果品、藤絲、雕漆、器皿、海味、布疋、藥材、銀鑲酒器等物，詔屢有陳奏。其後論太監梁芳事，忤旨，調貴州。梁芳，廣東人，費用事，爲其弟鎮撫德請得自往來廣中備土貢，所至給予船、車、人、廩。詔言：「進貢土物，祖宗時亦有之，然皆鎮守內臣見珍奇之物，服食四遠，反於禁庭無繇嘗用，以故依時採人。若其弟侄家人等在臣庶，自備進貢，褻尊莫甚。昔唐時諸鎮進奉，其後幕僚亦爾相踵，史書譏之。邇廣東鎮守等官，已各進貢，今近侍家屬又許自行，臣恐法令日異，利害別生。」上不悅，芳從旁言：「詔事事邀名方命，徒以左班相左右，得大官，乃益無忌。」上瞠之，芳伏地叩首。然竟坐調去。吏部尚書尹旻屢薦韶可大用，尋以明年擢右副都御史，巡撫蘇、松、嘉、湖等處。二十一年，以星變求言，韶疏言：「更新曰始，成功曰終。邇者歲暮，正旦星變兩見，歲暮功終，正旦新始，善始如終，天心仁示陛下也。昔魏徵陳十漸之疏，唐宗嘉納。臣愚妄，謂今日治毋他求，惟守成功之初足矣。伏惟成化之初，陛下廢立中官，家禮嚴矣。年來聞鎮守內臣，貢獻萬貴皇妃位下，或加中官，上又褒陞其家，幾與先帝時后家埒。陛下若俯念四海爲家之義，少納臣子家衆之言，以時裁正，俾彝倫攸叙，而陰陽不調，災害不弭，未之有也！此陛下正家之禮有未終者也。成化之初，內侍稀簡，防微深矣。近大小名數漸增，且以萬計，利源、兵柄多付其手，違禁犯科少有加罪求得請從。陛下久御明事，何不及此時斟酌裁省，俾內外之務各還職守，立制傳後，無使異日偏重勢成，更張不得。此陛下慮防之意有未終者也。成化之初，禁止天下貢獻，儉德著矣。數年鎮守公差，爭求珍異充貢，茲又令獻方物悉如天順三年以前例。夫其名充貢奉，實剝民財，水陸勞擾，人馬疲頓，私室被恩，公家歸怨，誠無益也。古人遇災皆欲減膳、撤樂，豈宜轉令爲此？此陛下持儉之德有

未終者也。成化之初，保、傅、六卿未嘗輕授。近年，公卿輔臣無故輒加保、傅，寺監衙門多以高官兼掌，及其致仕恩澤，又予月米、歲夫。陛下爲此，無非所以禮大臣也。然施於忠賢，勞烈則人感人奮，若泛行之，孰不阿順從欲，圖後寵哉？此陛下用人之道有未終者也。臣聞因事爲功，古人所貴。鑒往慎來，所謂謹始，謹而勿失，所謂善終。《書》曰：『終始惟一，時乃日新。』又曰：『德日新，萬邦惟懷。』此真陛下大聖人事也。」時已召爲大理卿，及是疏上，道改右副都御史，巡撫順天等處，兼整飭薊北軍務。詔復累有建白。孝宗卽位，臣僚交薦詔與王恕等人望所屬，召爲刑部右侍郎。元年，嘉興百戶陳輔以私鹽坐罪，因而作亂，劫庫、放囚。兵部議浙江租稅甲天下，有銀礦、鹽場，易以生盜，宜勅京堂官一員至彼緝捕巡視。時以詔風力，遂以命之。詔追敗輔衆，輔自刎死，因劾罷守臣一人，遂定。既，戶部言兩浙鹽法久壞，因命詔兼都御史，留治。其年轉左。詔清鹽課，有宿逋者，酌其年歲久近，量蠲與減。復減處州及泰順縣鹽課歲萬八百有奇，裁革松陽、宣平、雲和三縣管場丞各一員。皆從之。事竣還朝，圖進竈戶窮苦之狀，凡八。復條陳六事，戶部覆議通行爲例，從之。詔復言：「近者災異，求言，臣方在外，還朝見詔，實爲驚惶。臣但言臣所部事：臣部間擬囚犯，多發佐工運灰以備急繕，近聞修浚河隍，將待卽吉游觀，扮飭館宇以俟不時行幸。臣部所追囚犯紙割贓罰諸色，雖非經費，亦皆軍民膏血，近聞取以供佛奉道，臣誠恐行幸游觀，侈心萌而或入於聲色玩好，供佛奉道，怠心起而不究於修齊治平。」上納之。明年轉吏部左侍郎。其冬彗星見，詔問群臣時政得失，軍民利病。詔復疏言四事。其一言：「內臣出入左右，人所畏憚，言語輕重能爲禍福。今兵馬倉儲盡付其手，凡有章奏無不先允，後下所部承行，是名失政；及至犯罪，多從寬免，有毆死人者，竟不詰問，或詰問成獄，旋復宥之，是名失刑。政刑旣失，又復妄費，不惟不禁且助成

焉。死者或給葬資，在者或許蓋祠，廣地、第宅、服食，百凡踰制，聲勢之盛於茲極矣。伏望陛下公正以服其心，勤明以折其氣，上法祖宗，朝綱獨斷，褒獎善良，斥遠佞媚，使事務歸於所司，威福無從旁出。」四年，復言：「今百官日衆，俸支不給，設法補救猶恐無方。而比多有無功之人，夤緣請謁，授以千、百戶等官，甚有乞恩承襲都指揮者。或以修城微勞，而陞匠官，或以傳奉罷革，而遷良醫。又有中書考滿超陞三級者。陛下宜重名器，惜廩祿，勿謂小官爲可與，勿謂雜流爲無害。」上並嘉納之。其年陞刑部尚書。安遠侯柳景鎮守兩廣，都御史秦紘發其贓以萬計。有旨逮問，詔抵景於法。景爲慶雲伯姻家，欲挾援傾紘。韶力救之。景追贓十之一，其母奏乞上下法司宥除。韶奏：「昔唐宣宗元舅鄭光官租不人，京兆尹韋澳械其莊吏，宣宗欲寬之，澳謂法行貧戶致令不平，徵足乃罷。柳景無元舅之親，贓賄非負租之比，十未及一，反見宥除，臣守法媿澳，恐無以革污懲貪。」然景竟以慶雲故免。五年，監察御史彭程坐諫皇壇事，下錦衣獄，久不釋。韶言：「彭程監收光祿寺錢糧，坐論修齋器用得罪。夫程爲御史，諫乃其職。但不能極言本寺錢糧消乏所繇，却遠引李孜省事，致觸聖懷，傷念先帝。然其忠心可諒也。臣聞光祿寺支費泛濫，錢糧缺少，牲物概行賒買，鋪行往往逃竄，及今不節，善後實難。仰惟朝廷清明，臣等於此時忝備卿佐，每歎爲千載難逢。但思四海之大，日引月長，民窮財盡，又未嘗不惕然懼者。乞令本寺籍記日用之數，斷自聖裁，痛加節省，更望聖慈特赦程罪。」上雖不允彭程之請，亦令光祿寺籍數以聞。頃之，亢旱，韶問時政得失，軍民利病。韶條陳本部職掌四事。居頃之，以二子三孫相繼夭亡，連疏乞休。上勉留再三乃允，命乘傳歸，有司給月米、歲夫。居年餘，卒，贈太子少保，謚惠安，遣官諭祭，營葬。始，韶爲郎，論囚常求生之，至元奸宿慙，雖權貴交囑，不少貸。及居臺，治大吏貪縱甚嚴，小官誤犯，多所開釋。巡撫南畿，論者比

於周忱。其律己之嚴，出納之慎，則謂過之。畿內中官典守皇莊，聞韶爲巡撫，皆自禁戢。而督耕戰，嚴守備，虞不敢窺邊。爲大司寇，平反慎刑。平生誠敬，暮年名德益尊，行旅走卒皆知韶名，趨步儀狀，蕭然寒士。郎時，與何喬新同趣，並爲人推。侍郎吏部時，王恕爲尚書，皆以潔己奉公重。後喬新、恕相繼去，韶遂乞休。喬新之沒也，林俊爲江西都御史，爲請謚，因言：「臣聞韶、喬新少隸刑曹，並名時選，積官俱至尚書。韶忠亮懿醇，喬新貞方恭慎，儒術、吏事兩所精究。其學古人之清，同任天下之重。韶沒贈謚備加，仰見聖天子優寵至意；但文、正、忠、節，韶皆足當，不審何取惠安之義？不類韶平生，無人服世信。」後乞下議更謚，事雖不行，士論當焉。韶所著有《國朝名臣贊》及《莆陽、成都志》、《政訓》等書。子濬，舉人。族子甫。莆志載：庶吉士鄭智以危言傷時，同湯鼎等逮韶獄，坐妖言論極刑，公執不判。按智獄成時，公正巡視浙江，後人但見案牘，無公判押，遂以美公。公名節之美，固不借此一事爲重，而世第見公人品，遂因影響以美公，亦見君子之可爲也。

甫 字原岳。和粹朴厚，自律甚嚴。舉成化進士，授南戶部主事，陞員外郎。聚書萬卷，公退據案疾讀，至忘寢食。爲文章典則雋永，士多從學。擢廣西按察僉事，提督學教，不用糊名識士。內艱制滿，補湖廣。以洗冤澤物爲己任，至法所當按，亦無貸誡。劉瑾擅政，賦《壺南招隱》詩見志。尋上疏乞休。瑾惡之，不俟部覆，徑允致仕。瑾誅，以寡援不復起。子大治。

大治 字宜定。舉正德進士，授南戶部主事，進郎中。武廟南巡，大治當會計事，節縮惟宜。以才出知揚州府。閉關固鑄，罷一切無名供費。以法律馭豪右，雖貴勢干請，屹然不撓。坐爲所中，調知叙州。洞蠻叛，督府署大治撫之。大治親入山谷諭犒，相率解甲羅拜，即時散歸。外艱闋，改知韶州，操節矜嚴，功最五嶺。陞長蘆運使，竟卒於韶。子文質。



文質 字在份。嘉靖中進士，授揭陽令。縣方中倭，文質備禦有方。擢戶部主事，歷員外郎，出守桂林。剔積蠹，抑強宗，郡無留獄。治行爲西粵最，連擢西粵副使、參政。時議征八寨猺，幕府以兵事問，文質對曰：「兵者，不得已而用，以弭亂綏民耳，倘藉爲功伐，非所知也。」幕府斂容嘆服，即以督餉紀功委焉。先是，靖藩驕甚，以葬母妃故，縱舍人子搜括竹、木爲民害，文質一切裁之，而又馭下廉廩，以此被謗，罷歸。讀書談道，環堵蕭然，不問也。彭自甫而下三世甲科，並著清譽，人以爲難。

吳繹思 字思周，宋叔告之後。舉天順進士，令德興，同知瑞州，俱有惠政。陞惠州知府。屬邑有巨蠹，怙勢虐民，法繩之。守禦軍政爲上官所更張，卒伍忿其不便，將爲變。繹思諭之禍福，皆羅拜。丁內艱，起復，除潮州。海寇竊發，躬率吏民，激以忠義，遂殲之。陞浙江參政，尋轉右布政使。繹思丰神秀整，孝敬樂易，接鄉鄰子弟，雖困倦未嘗不衣冠。早以經學名，及門多所造就，若戶部尚書周公經、工部侍郎張公憲、都御史汪公奎，皆佩服繹思而有用於世者。

姚綿 字懷遠。教臨清，率履動遵古人。巡撫翁都御史有夙好，竟不爲干謁。臨清人重之。

吳清 字德清。任麗水教諭，改奉新，凡十八年，致仕。忠愍剛介，世味淡然，皓首未嘗釋卷。年八十餘卒。從弟承宗，彭澤教諭。承宗孫音。

音 字師夔。授金壇教諭，擢全椒知縣。廉明慈愛，關節不通。行取風憲官赴京，爲邑中貴人排抑，竟陞寧海知州。隨罷歸，襟懷洒落，絕口言貧。

陳音 字師韶，宋明州觀察使淬之後。舉天順進士，改翰林院庶吉士，仕至南太常卿，卒。音，成化初爲編修時，修撰羅倫、諫官王徽等以言事先後貶斥，中外結舌。音上疏：「近年災異屢見，雨暘愆期，臣

備員論思，敢竭愚慮：竊見陛下春秋二時，雖間御經筵，然勢分尊嚴，上有疑，未嘗問；下有見，不敢陳。願於退朝之暇，擇一二儒臣有學行者，引對便殿，少霽天威，有疑輒問，務使聖心渙然而止。方今人才日降，言路日塞，異端日熾，宜召還致仕吏部尚書李秉、修撰羅倫、編修張元禎、評事章懋、給事中王徽、新會舉人陳憲章置之臺諫，革去法王佛子真人位號，禁止創建寺觀，則正人用，言路開，妖妄息。」不報。其爲侍講時，司禮監黃賜母死，省、寺、監、院無弗吊祭，獨翰林未之詣也。徐侍講瓊言於衆曰：「時且如此，獨得不往？」衆或應、或默。音艷然曰：「堂堂翰林相率拜內臣之門，天下謂何？斯文謂何？」詞氣憤激，聲淚俱下。言者大沮。西廠初建，太監汪直方用事，其爪牙韋瑛夜率邏尉人兵部郎楊仕偉家，收縛拷掠及其妻屬。音與比居，登墉大呵曰：「爾何人，敢擅辱朝官？」其人曰：「爾何人也，而呵西廠？」音曰：「我翰林侍講陳某也，國無章乎？而敢爾？」尉亦稍戢矣。其爲太常少卿，大學士劉吉奪情起復，音移書止之，吉不悅。其後當路有缺，吏部擬音，輒爲吉所沮，曰：「陳某，腐儒也。」遲遲九年乃得進卿。尋卒。音就書覃思，恆忘外務，事無大小不嘗省，輒曰：「也罷。」人稱「也罷先生」。他日欲訪客，與人問所往，輒曰：「去去。」與人周迴道上不知其所，竟昇歸家。人門，見其妻曰：「汝何爲來此？」世人以與北齊劉臻相配。其在翰林時，偕同館攜酒翫月長安道，李文正閣老人朝，過之，音邀文正下車，痛飲乃別，翰林以爲美談。孫須樂，事母孝，以長者稱，終常州教諭。

楊琅 字朝重。舉天順鄉試第一，登進士，授監察御史。憲廟登極，詔書停罷鎮守內臣，中外欣悅。既改元，有貢獻希復者，琅極言內臣不可預政，倖門不可輕啓。復與陳恭愍選論劾兵部尚書馬昂、翰林學士倪謙，請起前兵部尚書王竑，召還給事中王徽，修撰羅倫等。俱不報。時號敢言御史。出按江、浙二

藩，靜重不苟。擢山東按察僉事，提調學教。適歲歉，癘疫大作，巡撫大臣以地廣民饑，命琅與藩臬分道出賑。琅精心受事，行至東阿，染疾既革，自起更衣冠，端坐舟中，乃卒。諸生哀感，醵賻以歸。琅居家孝友，蒞官端介，篤學善文，兼工書法。從子國本。

國本 字在培。教諭博羅，和平接士，貧者周之。督學令疏不律生徒，國本第列其有行誼者以進。人稱長者。遷威州知州。

吳宏密 任處州府學教授，善訓士，士念之。

吳希賢 字汝賢。唐屯田員外郎祭之後。選翰林庶吉士。同年李東陽少有英譽，希賢才思敏瞻，獨與相角。授檢討，預修《英廟實錄》。有貴家子寇姓者，密以賄丐希賢藻飾其父。希賢曰：「吾將見董狐地下。」進修撰，陞左春坊左諭德、南京翰林侍讀學士。卒於官。希賢負奇，少許可，爲所可，恒口不置。爲文意新語壯。每僚友宴集，或聯句或分韻，頃刻累數百言。同官太倉吳鉞贈之詩曰：「汝賢與鉞爲同宗，文采照耀珊瑚叢。鉞也無似真凡蒙，驚駘鈍足甘後從。」其爲時輩推服如此。侄彰德，官御史僉事，有才名。曾孫三畏。

三畏 字曰寅。知嵯縣。嵯故無城，城自三畏始。其始作時，倭寇充斥，倉皇拮据，乘夜作冶。工及半，寇從天台來，望見炬燎焰天，呼噪不絕，以爲屯兵，遂宵遁。既成城，賊復至，登陴守禦，竟以亡害。

林誠 字貴實，宋侍郎彬裔。天順進士，授監察御史。成化四年，因星變，與諸御史、給事中董旻、胡深等論劾大學士商輅、禮部尚書姚夔、兵部尚書程信。上留輅等，輅等不自安，各上章求退。而夔奏詞多詆旻等，旻等復攻夔。上震怒，命錦衣衛、三法司執旻等，廷鞫之。誠復言：「商輅當邸邸廢儲之際，不能

正救，今復起用，不合人心，是以臣等具有論列。臣言不用，臣病甚，不可居職，請罷免。」上曰：「唐太宗用王珪、魏徵，朕用商輅有何不可？而屢屢奏擾。」亦命廷鞠之，遂與旻等並逮杖。復官未幾，奉命按視河道，疏言六事。明年奉勅提學京畿，令所在立豫讓廟，曰：「是爲人臣而不以存亡易心者。」其意尚爲邸邸廢儲、大臣阿意者發。謝病歸養母，家居十年，當道愛其才，屢檄起之。成化十九年，賜原職，命理兩浙鹽政。適初春地震，馳上弭災十事。不報。至浙，鋤奸豪，革宿弊，釐法一清。老吏謂百年來無此御史也。二十年，再陳八事，大概皆疏通鹽政以紓國家之急，咸見採納。以疾告歸。誠蒞官明達，吏事精勤，有所弛張皆切時弊，凡事人所難爲者，一切易之。都御史滕昭屢揚於朝，曰：「以六察官而舉都憲職，林某耳。」子近龍，任監察御史，嘗疏發逆濠營建及大學士靳貴柄文鸞賄二事。陞廣西按察僉事。子鍾榮，孫彥光，俱歲貢。彥光工詞賦。族侄華。

華 字積中，一字廷彬。嘉靖進士，爲刑部員外郎。坐爲主事時，皇親張鶴齡下獄禁繫不嚴，謫六安州同知。巡按及督學檄諸生師華，建岳麓書院，命主之。著《岳麓口義》十卷。量移長沙同知，尋擢鎮江知府。勢豪擅洲田，民群訴，久不決，華斷爲公莊。富民殺人賄獄，時宰夏言亦以獄囑華，立斷成案。言恚華，嗾按史誣奏華激變，逮繫詔獄，發鎮江，哭送幾萬人。逮者愕眙且笑曰：「是真激變矣！」至京，上奏自理。世宗疑之，諸貴人亦多言華枉，於是罷爲編氓。郡人立華生祠。家居十七載，簡靜寡合。巡按御史連薦之。

曾瑤 字一白。成化舉人，仕南國子監學正。起復赴京，會御史彭程言事論死，首論救之。復補學正，陞南國子監丞。與祭酒不合，乞致仕。吏部留之，竟爲祭酒擠歸。

林講 字尚友。知連州，歸無厚貲，以先業讓弟。

陳叔疇 字孟儀。成化初舉人。事母至孝，十年不赴春闈。終周府長史，加四品服。

林祥 字世祥。以乙榜教諭博羅，滿九載，諸生立祠學宮，題其柱曰：「先生真白日，後學仰清風。」吏部試優等，當得令，懇辭，遷饒州教授。復九載，諸生請淮王爲文，碑之學宮，覆碑以亭，顏曰「思服」。遷國子助教，與館下士講解不倦。會淮府缺長史，王重其人，奏乞補之。未幾王薨，世子幼，祥盡心匡輔，以年勞陞四品，告老歸。祥敦慎好禮，在官五鼓必興，盛暑不廢冠裳。饒庠時，嘗召工鍛一銀器，將以奉所尊。工侵盜將半，僕究詰之，祥遺之鷄、米使去，戒僕曰：「若露其惡，誰復任之？彼藝絕矣。」

李元 字乾伯。父瑩，成化初以經明行修應辟。元以鄉薦乙榜授東莞教諭。奧於問學，模範端恪。擢廬江知縣。守人覲，弗忍斂民以賄。守讒之，罷歸。嗣是令屢更，民屢困，父老益思元。元安貧好學，老不改操。汲引後進，後賴其知名。年九十四卒。莆人以與黃僉事榮、廖僉事德徵、李參軍純稱一時清貧先輩。後人衰替，殊可憫惻。

文利 字乾遂。歷桂陽教諭、思南教授。所著有《律呂元聲》，兄元爲序曰：「樂者，古昔聖帝明王所甚重也。至周，情文大備，律呂度數人人盡知。秦去周末遠，猶有存者。六籍既焚，《樂經》淪喪，其制遂亡。漢儒掇拾煨燼，莫知適從。河間獻王與毛生共採《周官》及言樂事者以作《樂記》，亦不言制樂之度。至司馬遷，止因九寸之文，遂以九寸爲黃鐘之管，不知爲黃鐘之變積數之極也。漢解亦以變數之極爲準，非黃鐘之始也。孰悟子月一陽之始，可以九寸之老當之乎？歷晉、魏、周、齊、隋、唐、五季，議者愈多，而法愈亂。宋建隆之後，雖亦致意，而和峴、胡瑗、阮逸、李照、范鎮、魏漢津、劉几、楊傑之議終不能相一。

至蔡季通，雖稱近世所未講，無一字不本於古人已試成法。然以九分爲寸，變律半聲，三分揖益，上生下生，務尋隔八仲呂而窮。往而不返，甚爲未當，大抵踵遷之失。余弟兩山文利雅好古樂，力搜遠取，乃得劉恕《通鑑外紀》、長孫無忌《隋志》、《呂氏春秋》所載：黃帝命伶倫取竹制律，斷兩節間三寸九分而吹之，以爲黃鐘之宮曰含。少因而究之，積以歲月，推原本根，條理通貫，清濁攸序，始終相生，天人之道，脗合無間，遂以三分九寸爲黃鐘一陽之始，積滿九寸，爲蕤賓、老陽之極。二律爲經，十律爲緯，左右對待，俱得數一百二十九分，三分揖益，隔八分相生。案圖可定，非襲儒先之舊業，實得天數之自然。劉恕、無忌能存度於群迷之時，豈心有所見而獨得耶？抑天惜樂之亡，特存其跡以待知者復之歟？顧續史者，反刪而以九寸爲黃鐘之真，棄此而不之究，可嘆也！是書作於桂陽，教授思南，猶未脫稿。病劇，命侄岳清錄之，甫成而逝，乃絕筆也。倘得識樂君子相與議之，究此聲氣之元，太古之樂可復，太和之治可致，而余弟一得之愚不虛矣！」楊廉稱文利所著書，天授獨見。嘉靖御史范永鑾以聞於朝，惜鮮通其解者。

陳純 字則和。任定海教諭，師式先賢，範模後學。署縣數月，衆務畢舉，民不煩擾。卒官，士民祀之賢祠。子晦。

晦 字待徵。累官江西參政，以忤中官劉瑾致仕。與林俊、陳茂烈、張元紳善。文章、政事推重一時。

林正 字克全。成化進士，授監察御史。巡視山東河道，宜罇濬湮。自山東直抵儀真，植柳兩崖，堤岸盡固。減椿蕪價以蘇民，梁支流以通渡。巡按蘇、松、常、鎮四郡，繩違雪枉。有丹陽令善結權要，正嚴按之，權要交口救解，不恤也。繼按廣東，首詢民瘼，輒形於詩，曰：「鳳鸞自古高鷹隼，郡邑於今尚鹵

絲。」豪黠之吏方聞風斂跡，遽卒於官。

黃璉 字汝器。成化進士，授南戶科給事中。木訥簡野，退然若農家。先是，進士偉儀觀，音吐洪亮，無南語，則選給事。璉不合爲給事，以才望擇。汪直擅柄，王越相倚爲姦利，璉率科道極言，憲宗逐二人，連其黨以盡。陞浙江參議，提督溫、處銀冶，礦故竭，率輸自民，以糧爲差，新礦間一出，盜盤據之，民重驚擾。璉曰：「礦，地利也，不輸自地，輸諸民，天下皆治也，獨溫、處哉？且新礦徒餌盜，奚功國與民？」遂擒其魁，散其徒，疏言罷課塞礦。上可之。改雲南，參政貴州，連爲貴州左、右布政。普安土知州死，妻米魯謀自襲，毒殺其庶子。生事者急之，魯遂爲變。及疏自直，官多被誣辱，獨不排璉一句。卒於官。嘗曰：「人須自立，忠信廉謹吾事也。升落毀譽吾寧知之？」居官幾四十年，田不頃增，屋仍舊隘。季子講。

講 字彥通。正德辛巳，以貢授淳安訓導，提學萬潮重其學行，卽會城建萬松書院，擇兩浙雋士百餘人，檄教之。薦陞南國子典簿，不樂其職，乞改外庠。未得命卒。講孝友廉約，父遺之川扇一握，至老如新，遺命曰：「必以殉。」兄詢發地得金，曰：「此或先人所遺，請分之。」講曰：「先人廉，安得有此？且在兄居室之界。」固辭不受。其卒也，門人爲殯殮，祭酒林文修率僚屬賻之，乃得歸喪。

丘山 字安重。知瑞安縣，捕治老猾豪，置之法。嚴禁溺女。教以婚嫁之宜，以革奢風。以旌異擢監察御史。奉勅清理兩廣軍政，遠惡州郡，無不身涉，從容逮踐，根究始卒，親與定奪，軍民交口稱便。巡按應天，被璽書恤刑，並寬嚴得中，獄無冤濫。滿九載，擢雲南按察副使，致仕。山少慕元儒盧齊韓之爲人，諷其遺編甚習，有所吟作，類其格調，而興致尤遠雅。妙書法，刻石崖州大忠祠，一時重之。子茂樸，

教諭德平，嘗上革弊安民疏，仕淳安知縣。孫茂中，正德進士，至河南右布政使，凝重簡默，蒞事詳慎。曾孫秉文，從侄泰。

秉文，字鳴周。嘉靖進士，初除永嘉令，以憂歸。補長興，遷刑部主事。車駕郎楊繼盛論劾分宜相嵩，語連裕、景二王，世宗大怒，繫獄論死。分宜密諭西曹郎，苦繼盛者屢。秉文獨厚遇之。李肅愍默爲太宰，以此奇秉文，奏遷光祿丞。給事中楊允繩劾奏寺丞胡齊贖貨諸不法狀。齊遂奏允繩謗上齷齪妄費，出草示秉文，秉文面折之，曰：「君疏辯誣足矣，何至以謾詞於主上？倘不測，如國體何？」齊啣之。已，允繩竟坐膏劾，論死。而齊大不齒於士論。居亡何，李肅愍默亦坐誣，逮繫。分宜相子世蕃遂指秉文爲李黨，因以天變罷免秉文官。秉文曰：「吾受知李太宰，太宰坐繫，而尚覩然長安道，罷後矣。」歸，結社談詩，語及時事憤憤也。

泰，字守嚴。父諒，山從兄也，景泰舉人，黟縣知縣。泰舉進士，令新寧。剛明而斷，平讞滯獄，境內肅然，盜賊屏跡。

方守，字宜約。年十八舉鄉薦。以進士爲戶部郎，兩奉勅督理薊、永、山海、延、寧等處，邊餉一絲不染。積資當擢京堂，僅出爲雲南參政，其部長不能平，以質冢宰王端毅怒。端毅曰：「豈不知方耶？雲南萬里荒外，官解弛，魚肉其民夷，故用楊巡撫、林憲副，今又用方，將更化於是。」楊者，陽城繼宗。林者，貞肅俊也。守與貞肅同在雲南，修明要束，拊循蠻夷。每自夷中歸，夷屬火伍數千走送，羅拜而別。或問之，曰：「向撫夷至，雞犬不寧，今官兵不敢近吾家，是以遠送。」轉湖廣右布政，致仕。舊業日落，貸里富人，又且不常得，人曰：「二品官如是也耶？」故村居也，時人城，而諸公延款之。一日寒甚，酒數行輒先去，



主人不能強，許之。已乃知其一子偶僕夫舛守以來，深爲驚歎。戶部主事陳仁嘗疏請優恤。其卒也，貞肅聞於當道，助治其喪。子彥，廣東長樂知縣，循良撫字，有父風。弟憲，以進士任新昌、原武二縣，卒官，亦囊橐蕭然。從弟彬。

彬，成化中進士，授工部主事。不屈於內臣汪直，竟被撻拾逮繫。弘治改元，王端毅恕疏舉剛直十餘人，彬與焉。

方珪，字純潔。成化進士，選翰林庶吉士，授御史，巡蘇、松、常、鎮及兩浙鹽課。錢學士溥，其子昂鬻販私鹽，巡撫都御史畢亨檄蘇州府爲之給民，倍收其價。珪置溥子於理，因劾學士貪利蠹法，都御史附勢剥民，知府朋奸不職，乞並處治。巡按真定諸郡，革貪利，剷弊政，輦轂下無敢干以私者。卒於官。珪與林正同時爲御史，並有志操。而正年四十一，珪年三十三，士論惜之。弟璋，進士，珊，鄉薦。侄孫夢龍，鄉薦，才質敏博，意氣豪邁。

廖德徵，名珠，以字行。世澄坂農家，且耕且讀，遂第進士。授大理評事。服內艱，忍貧匿晦，槨葬時斗笠、草衣偕群農荷畚鍤，輦糞壤，星言南畝。村叟、畦丁，迄不知有廖評事。服除，如京，要人問家政，德徵對盡甚，在坐吐出舌。都御史朱英、中貴人交惡成獄，德徵辯雪之。轉寺副，寺正，專慮刑書。蓄勞成疾，醫諷調攝，曰：「近且食肉。」曰：「幾何？」曰：「日市四兩。」醫諭曰：「果盡。」曰：「損惠兒子幾半。」醫嗟嘆涕出。赴湖南按察僉事，道死揚州。妻括簪珥市棺衾，弗辦，揚州守爲之殯。從侄雲龍，任武選郎，却債帥金，忤大司馬。陞潯州知府。

陳裕，字孟寬。令廣信、永豐，爲江右窮邑，民淳可化導。裕開心任真，民曉以愛。裕於鄉之姓名，

物力良窳、賦役重輕、差解遠近、指掌配別、人樂承受、無有紛譁。貧極下戶、措置儲備、稍資給之。強梁賊蠹、鋤其泰甚、他無久繫之獄與慘毒之政。訟牒不出境、水旱不踰時。民間陳穀、棄積數年不以動、餘物稱是。上司行部至邑、無一事可問。貴溪都御史高明每歎曰：「陳令，一府六邑之長也。」亡何卒。

黃芳 字體芬。弘治初令雲和。才識通敏，決獄如流。疏堰河以溉田，修學校以養士。遷知遂昌。

學舍、城門皆其創建。督急葬，禁佛事，搜隱田糧，罷征商稅。擢太僕寺丞。

翁端 字正甫，一字端伯。掌教新建，勤其官，鄰郡來學以百計，縉紳諸公並嚴之。三典文衡，陞國子助教。卒，有千里致奠，捐俸爲置墓田者。

陳懋源 成化進士。謹慎沉默。知武義縣，革健訟，禁淹女，築長堤以捍水患。陞刑部郎中。從侄伯獻。曾侄孫應魁。伯獻曾孫其志。

伯獻 字惇賢。弘治中進士。爲南京吏科給事中，疏逆璫罪狀。出爲提學副使，未幾，以母老乞歸。伯獻韵致、才華翩翩絕俗，文迫南豐，畫宗摩詰。所著有《峰湖集》若干卷。曾孫其志。

應魁 字孚元。嘉靖中卅角登第。歷工部郎，在部十餘年，嘉譽流聞。爲禮闈同考官，所得皆名士。出爲浙江副使，有督兵勦倭功。

其志 字公衡。萬曆中進士。始令永嘉，愷悌愛人。衛承芳爲溫州守，特器重之。丁外艱，補奉化，調長洲。長洲故衝煩縣，其志治辦無休歇。又以其間延接吳士之能文者，海內騷人、墨客皆與倒屣爲盡。以治行徵，有擠之者，竟授南戶部主事。已，改南兵部，旋改南吏部。丁內艱，起補禮部精膳郎中，疏言副院萬世德才，第可治邊，不宜內臺。坐謫河池州同知。歸而講孔、孟之學，亡何卒。

吳仲珠 字淳夫。少精學業，疏於世故。知義烏縣，以公錢助喪，爲御史所按。嘆曰：「士何往不自得哉？」家居授徒自給。經傳奧語，一經剖發，士暢指歸。海內多知其名。

朱愷 字舜徵。父煜，見韋布。愷，成化進士，任馬湖知府，樂易誠篤。馬湖夷俗多跳梁，愷靜鎮之，民夷咸德。弟悌。

悌 字舜敬。成化進士，授行人，遷南御史。時有真武、土木、銅鼓、畫工諸命，率同官疏罷之。京尹有同僚不協而鬩，選曹有簠簋不飾者，並疏出之，士論稱快。陞浙江按察僉事，廉直稜厲。觸暑行，按事無日夜，竟卒。妻子不能自存。

丁襄 字叔贊。授平樂同知。文學知名，興起士類。尤通達治體，有釐汰舉行，皆因俗潤澤之。劉忠宣大夏爲督撫，薦其才，擢程番知府。

梁璋 字允培。國子助教，講義甚精。居官清貧，爲當時推重。

方維翰 字邦哲。池州教授。棄官養母，事兄甚恭，人無閒言。

吳球 字玉甫。自博羅知縣徵入爲御史，陞雲南僉事，以禮教革夷習。薦擢兵備副使，撫禦有恩威。三年報政，民爭留不得，爲立生祠祀之。時逆瑾亂政，乞致仕，歸。

李德美 舉進士，知冀州。多才謹守，修廢補墜，省災恤衆，勸善興學。州故築土爲城，環城東北有渠，以洩潯沱、衡諸水。每雨急水溢渠，不時洩則城爲所浸，久，益圯。壬寅夏六月，雨水大至，城自北門迤東，至於南門，壞者二千二百餘丈。州人恟懼哀泣。德美出諭民曰：「吾在，毋恐。」乃柵水、畚土、囊瓦石以蔽水。衝水小却，迴薄於西門，門且壞，德美露頂跣足，籲天而號。忽有棲苴數百，乘流下，比及門，

覆上下墜，若與會者，於是木石可藉而施，水不得人，乃徐決渠澮以殺其勢。越三日而水去，民相賀曰：「活我者，李侯也。」癸卯之春，沮溺未平，德美議修復，會物計費，經略既定，告於部使府長，下合州中，帥丁男五千餘人，俾就役事。斷杙榆諸木，坎而概之，薊、土、瓦、甃，以次而下。下廣上綱，屬於故垣，樓櫓睥睨俱崇並峙，遂巖然爲完城。李文正東陽爲之撰《全城記》。冀人至今稱「福建李」云。官至兩廣僉事。

黃節甫 字大節，唐桂州刺史彥之裔。醇謹精經術。舉進士，授行人。疏乞終養，授徒養母。母終，復除司正。從子榮。

榮 字儼仁。以南京刑部郎出爲浙江按察僉事，司典水利，濬杭州運河，自江干抵北關九十餘里，以便轉餉。其濬河時，多削豪右侵地，豪右陰齎訖之，遂罷歸。日與吳方伯繹思、魏道州時敏開東井詩社，濁醪春韭，陶然自適。卒之日，殯事不給，弟華爲治之。華仕廣東按察僉事。

謙 字亨夫。華曾孫也。父必大，臨高知縣，質行醇謹。謙，嘉靖進士，刑部右給事中。爲人慷慨多奇節，詩文典贍。王奉常世懋督閩學，與定交焉。有《萬玉山房稿》。

張澤 字朝雨。仕潮陽教諭，祀名宦祠。天性孝友，安貧守道。

高俊 字士偉，一字世甫。授肇慶府教授。在事清勤，日與諸生講解經義，勉以爲己之學。諸生饋，固卻之，曰：「吾職未稱，何以此爲？」陞衡州府推官，卒。孫昭，孝友行誼，族戚推重。授德慶知州，俄卒。

陳世顯 弘治間知青田縣。巡按御史入境，案覈錢糧數缺，問世顯，世顯曰：「催科政拙，請自坐

罪。」巡按以爲抗己，誣世顯別罪，繫之獄。世顯從容就繫。巡按出境，合邑老稚夾溪呼叫，白其撫字狀。巡按曰：「令乃爾。」出之在任五年，致政歸，單舟老僕，宦篋蕭然。

鄭光與 字以祿。歷天台知縣。公廉勤慎，聽訟明決，賦役均平，導民先孝弟，教士本德行。盡職當爲，不顧上喜怒，求心無愧，不恤身安危。請託不遂者，造謗揭之。乞致仕，邑民齋咨涕洟，如失慈母。

丘天祐 字恒吉。祖添德，見閭巷。天祐登成化進士，授瑞安令，改饒平，廉能茂著，官輿有芝產之瑞。秩滿，授監察御史，彈劾不避權貴。威寧伯王越附事中貴人汪直，啓霽榆林，已褫爵矣，復附中貴人李廣，引復都御史，總制三邊，仍縮院篆。天祐率同列抗疏極言，其略曰：「爵賞予奪，人主操柄也，出於公則治，出於私則亂。出於臺閣則爲公，出於近倖則爲私。」忤旨，廷杖六十，下錦衣獄。尋得釋，又連劾廣恃權縱恣，贓賄狼藉。未報。而清寧宮災，廣飲鴆死，天祐與給事中華杲共檢廣貲數十百萬，疏籍沒之。巡按廣西，復按南北畿郡。故事：江南葦場歲遣巨鎗，人往覈，實多賈怨於民。天祐疏止之。繇是葦場事權盡歸工部。居臺凡十三年，以疾乞歸。曾孫憲周，萬曆乙酉鄉薦，有文行，未官卒。侄孫其仁，正德進士，郎戶部。議禮，廷杖。守潮有聲。

陳仁 字子居。中成化解首，登第，授戶部主事，歷郎中。畢力學問，明習國計。闕里災，疏重修省，闕異端，抑奔競，禁奢侈，振士風，收人心，端教化，正風俗。禮部災，疏早朝勤政，宣決章奏，訓養東宮，進君子，退小人，節齋醮，嚴備邊。又疏：「雪冤獄，舒忠憤，罷江南織造，復御史彭程官，給事林廷玉補外，勿遣。」又疏：「致仕布政林同、蔣雲漢、方守，知府潘琴宜優異，妖僧領占竹緣內降，宜勿取。」陝西守臣進古璽，又疏其偽，且謂：「果秦璽，亦亡國廢物，宜毀勿留。」孝廟多所嘉納。正德初，部尚書韓文倡伏闕

請誅嬖閹，逆瑾怒中之，力文致仁誤，落三官，并落韓以去。同知禹州，轉知汝州，遷南兵部員外。方是時，政如束濕，諸司易守，爲全身遠害之計，仁委而任之，以故無失常。比瑾誅，擢浙江提學副使，轉本省參政。以疾乞休。進秩本司右布政使，命未下，卒。李夢陽稱仁「人品道德足爲天下喜，幸非與世浮沉者」。

鄭寶 字時珍。教諭博羅，遷鬱林州同知，檄署北流縣。賊徒李通寶等，聚黨千餘，攻劫縣治，列柵五里許，更月餘不去。寶經略庫藏、案牘，選勁卒百餘，從間道護至州，遂督兵出戰，數陷堅，身被十餘創，死。子圭，遙見父戰不利，輒躍馬與從奴十餘人馳救，亦被創。父子同日死，而從奴皆亡。事聞，贈本州知州，蔭一子。

周進隆 字紹立。父坦，鄞縣教諭，淳樸績學。進隆舉進士，授紹興府推官，解諸暨邊家之冤。餘姚人爭草場，築界之，民號周塘。人爲御史，蹇諤有威稜。終廣西左布政使。子大柱，武城教諭，文行推重，終德慶州知州。

余徵 字宏貴。官戶部主事，中年解紱，屏跡授徒自給。尚書彭韶以女妻其子。

郭紀 字思修。海陽教諭，志尚貞雅，造就後進，潮土稱重。

陳謙山 字景重。程鄉知縣。事母至孝。宦俸公諸弟，不私一錢，鄉人稱之。

林大霖 字時雨。弘治舉人，訓導餘姚，教諭長沙、南昌。謹勅儼恪，敦本明經，誨誘不倦，士各自得。令仁化，弭盜安民。擢守信陽州，州人御史馬錄稱曰：「古循吏。」年八十四終。侄培，國子博士。培子建邦，萬年知縣，抗禮宗藩，終承天通判，莆人稱其孝友。

黃泰 字有成。任餘干訓導，陞宣平教諭。《餘干志》載其端矩勤訓。《括蒼志》載其學優教篤。既滿，宣平士子請留，復任三年。

方良永 字壽卿。授刑部主事，轉員外郎，擢廣東按察僉事。瓊賊符南蛇作亂，衆至四萬。守吏多棄城走，良永慨然請行。時劉大夏總督兩廣，遂委攝海南兵備。良永統所部兵，紀律嚴明，他軍莫及。比及三載，縛其元兇，前後擒斬二千百有奇，所獲生口、牛、馬、器械稱是。尋推補爲真。丁父憂，服除，赴補。時武廟不朝，逆瑾用事，外官朝見畢，必謁瑾，又候謁其私第，至匍匐拜跪。良永入朝，鴻臚導詣左順門，叩頭畢，卽令東向揖瑾。良永徑趨出，瑾固啣之。至旅寓，或勸循例謁瑾者，良永曰：「身可死，官可棄，禮不可屈也。」瑾益怒。及吏部除補河南信陽等處兵備撫民僉事，瑾從中下旨，曰：「是官非額設者，良永敢營求謀補，著令致仕去。」良永去，瑾怒未已，會海南有愬人命事，欲用此中良永，遂奏遣錦衣千戶、刑部郎中各一員往勘之。郎中周敏力明良永無罪，乃免。瑾誅，起爲湖廣按察副使。藍鄆諸賊寇蜀，兩省動兵，時洪鍾爲總制，林俊爲巡撫，促赴軍門詳議。藍鄆平，良永贊畫爲多。河南劇賊趙瑾敗走湖湘間，削髮自匿，良永計擒之。擢廣西按察使。巡按御史某挾勢多爲不法，良永率二司暴其奸，御史遽去。進山東右布政，轉浙江左布政。倖臣錢寧遣僕鬻鈔於浙，索銀三萬餘，同官與鎮守太監謀欲抑取於民，良永諍不得，疏乞致仕，不允。而寧趣價益急，良永疏言：「臣待罪承宣，自慚無補，偶有所激，不忍緘默。固知事涉權貴，言出禍隨，然竊計脂韋之罪，重於強聒；一身患害，輕於萬姓荼毒，敢昧死言之。臣惟民者邦本，財者民心。國家賦盡出東南，浙居其半。故愛國必愛民，愛民必愛財，而浙之民之財，則尤當愛以惜也。謹按錢寧出身廝賤，甘爲民養，陛下假以義子之寵，躋諸公侯之列，勢傾中外，富擬封君，其尊之

也至矣。計寧粉身碎骨以圖補稱，尚不能萬分一，乃敢攫取民財，戕賊邦本。有司追價，急於星火，責緣爲奸，倍而又倍，推膚剥髓，大不堪命。天門萬里，相與赴愬監司，監司欲言未果。今四方群盜甫息，瘡痍未濯，邊塞多虞，餽餉不繼。浙東、西諸郡自冬徂春，雨雹爲災，蠶麥不和，待哺之民嗷嗷千里，何等時也！臣此時隱忍，不爲陛下一言，則已斂之財必入寧手，民心傷矣！心傷則本傷，本傷則枝幹凋瘁，根柢蹶拔，陛下其能晏然於上乎？既曰「義子」，必爲親臣，獨怪寧之忍於負陛下也！今人有一飯之恩，亦思報答，陛下待寧豈特一飯？不能圖報則亦已矣，反取邦本而動搖之，此臣所未諭也。跡其所爲，不孝不忠，必誅無赦，臣望陛下下之詔獄，明示典刑。仍乞急勅巡按、御史會同鎮守三司等官，將已斂之價，盡給還民，未斂之數，即行停止，并按核奸吏影射多科侵剋之弊，悉置諸法。則民怨未甚，猶可慰解，邦本未搖，猶可培植。如以臣言不然，置之不問，日復一日，尾大不掉，將必蠶食四方，肆無厭之求，出於尋常所不料。」疏至，通政司私以示寧，寧懼，留良永疏不下，謀遣校尉三人來浙緝捕假勢鬻鈔者，而自飾上前，乞下令散還前價。良永知寧怨恨必中以禍，又念母春秋高，遂決意求去。連上二疏，寧從中徑批不允，仍私授意，以示無憾。良永曰：「是欲牢籠我耳！」復乞致仕，吏部覆允。始良永草疏，妻子無知者，既行旬日，乃露意於鎮守輩，咸失色驚愕。既，反愧謝，因緩徵價，僚友及浙中士大夫走賀，曰：「近五六十無此疏也。」世廟登極，用言官薦，擢都御史，撫治鄖陽等處。尋廷推提督操江，又推兵部侍郎，而良永復以母老乞終養，疏請者再。上重違其意，乃許侍養。家居，言官、部使者奏薦無虛歲。最後，都御史姚鏌請於常格之外，顯示褒獎。吏部尚書喬宇、戶部尚書孫交言：「良永居官素謹，家無贏餘，宜依廉官侍郎潘禮孝養，御史陳茂烈例，月賜食米。」詔有司月給米三石。辭免，不允。久之，母卒，上聞，遣官諭祭，命有



司營葬。大臣未任授恩，又以廉孝賜月米，皆一時異數也。服除，命總理糧儲，兼巡撫應天等府地方。行抵衢，疾作，連疏乞休，溫旨勉留。再推南刑部尚書，而良永卒矣。訃聞，賜祭葬，謚簡肅。弟良節。子重杰、重恩。重杰，見韋布。重恩子攸績。

良節 字介卿。正德初知歸善縣，爲縣人蠲減徭役。有巨璫擅威索賄，所至奉之，良節屹然不動。會省討賊之役，良節備餉，一意安民，民遂協力平賊。嘗築拱北、南隱、榕了三堤，捍西湖水，浚池甃石，鎮湖之流，闢城西關，引湖環而東注。又大修學舍，飭會英諸祠，人士嚮風。累遷廣東左布政使。與兄及從孫璘同時領方岳，時人榮焉。子重熙、重耿。重熙，有雅量。重耿，有俊才，先後領鄉薦，卒。孫叔猷、攸躋、攸賓。叔猷，饒州通判，恬靜守禮。攸躋，見下。攸賓，工部司務。

攸績 歷四川左布政。蒞官崇大體，不爲巉刻嬖倖。家居持身簡素，飲人以和。

攸躋 字君敬。令順德，清慎愛民，歲饑勸賑有法。欖江盜起，計獲之。遷南戶部主事。振武營兵變，殺黃侍郎懋官，攸躋亦坐免。歸，闔戶著書，不預外事。子沆。

沆 字子及。授全州知州，歷南戶、刑二部郎中，督學雲南。中讒，家食者久之。復起寧州知州，久之，累疏乞歸，以湖廣僉事致仕。沆仕宦沉淪，嘗作《海上天隨生夢覺說》以自解。自言通籍三十餘年，坦衷獨立，無罪見放者再，綰符方州者三。所至以全安教化爲名高，不習曲踞擎拳態。當路大夫察舉廉平，薦書相屬而生猥浮，慕行古之道。時心語曰：「舉人公朝，拜恩私室，諸大夫不其然？」是以謝。一切竿牘苞苴毋敢屑越，爲知己羞。」所著《倚蘭堂集》二十卷，豫章喻均序之曰：「子及天才秀逸，所爲文，下筆娓娓若江波淪漣，春卉蒼蔚，第就詩文並論，詩似勝。其所爲詩，上沿六朝，中摭三唐，若秋山吐色，靜女揚

蛾，第就諸體並論，五言似勝。其所爲五言，意超象外，情寄景中，若冰瑩玉壺，月映寒潭，第就五言並論，卽白下時似勝。白下之詩，不佞謂其追蹤王、孟，卻視錢、劉，而殘墨敗毫亦足孕育近代高子業，餘子鹿鹿不足道也。」

林鎡 字朝資。弘治舉人，任樂清教諭，謹厚方嚴，教先禮義。諸生皆敦行力學，遵其程課，多著名當世。終廬州教授。

黃瀾 字源續。少治經業，工力倍人。讀書太學，爲祭酒丘文莊所器。從游者常數百人。第弘治進士，選庶吉士，授翰林編修，以母老告歸。十餘年，母終，復起。充經筵講官，講《論語》、《尚書》，進戒佚游、遠佞人等語，武廟改容嘉納。轉國子司業，遷南京翰林侍讀學士，乞致仕。瀾學問淵永，儀度閑雅，寡嗜慾，恬仕進。子肯堂，鄉薦，有敏名，早卒。係洪毗，擅才藻，歷官南提學御史、江西按察副使。

黃相 字弼甫。弘治進士，任南戶部郎中。起復至京，以不謁劉瑾，瑾矯旨罰俸。隨謫浙江市舶提舉。時瑾黨方熾，有僞官校訪事兩浙者，相獨按其僞。瑾誅，始拜九江守，自免歸。子日敬。

日敬 正德舉人。爲人峻整，古道自持。令崇仁，值旱甚，步禱山川，斥輿蓋不御，尋大雨如澍。革坊里直費，廉豪譎置之法。值內艱歸，鬻婢女爲資斧。邑人士見德，若庚桑之在畏壘也。終兩浙運使。

許璣 任星子訓導，正大端方，接人待士，內外一致。博學，善屬文，惓惓以成就後學爲念。上下皆重其爲君子。

陳茂烈 字時周。先世故浙人，爲興化衛總旗。茂烈早喪父，晝從總旗之役，夜則讀書。祖母憐其孤弱，止之，乃韜燈默誦，潛心學問。上希曾、顏，作《省克錄》自勉。祖母沒，賣屋以葬，并葬其父，負土成

墳，間日行視，哭盡哀，乃返。舉進士，授吉安推官，擢監察御史，以母老乞終養。爲人狷介，務實行。其爲推官時，考績京師，冬月僵凍，忍苦自支。爲御史，衣布，乘牝而已，而彈劾一無所避。家居，養母甘旨，外與宗衆共蔬食，身畜一蒼頭採薪給爨。出則挾一傘自隨，卧榻布帷不備，手自灌園。盡日危坐斗室，體驗身心。偶有所契，輒筆之《靜思錄》。莆人稱茂烈孝廉先生，推舉耆舊，必首及之。正德中，吏部奏茂烈清苦絕俗，請改晉江教諭，使資祿近地。疏辭不赴。後二年，有司復請給之廩粟，特詔月與米三石，復疏辭，不允。其後母歿，枕苫居喪，近枕處頭髮盡禿，亡何亦卒。而竟亡子。其日，天氣黯黑，道路流歎。林貞肅俊爲治殮，立其族子遠揚爲後。巡按御史王應鵬疏言：「茂烈廉約如石守道，而所養獨純，孝行如徐仲車，而所處尤困。身死無後，乞加恤典，用勵士風。」詔蓋坊里門，祀之鄉賢，月再給米其家。陳獻章曰：「韓退之稱孟東野無田而衣食事親，左右無違，混混與世相濁，獨其心追古人而從之，時周有焉。」林貞肅曰：「陳公領悟既深，輯養尤粹，每一晤言，躁慮消息，宿疾頓瘳。其物品當是黃憲、管寧之右，得在聖門，可幾虧損。」遠揚，嘉靖中貢士，崇府紀善。敦朴謹慎，無忝家訓。天啓辛酉，賜茂烈謚恭清。

林琨 字宜珍。弘治舉人，教授德安。端重有文，自奉清苦。訓諸生以義，講習無間，有越禮者必撻之，卽所愛厚亦不寬假。任六年，諸士凜凜尊奉，謹於大吏。遷國子博士，終周府長史。

李廷梧 字仲陽。弘治進士，授桐鄉令。精敏仁愛，加意農桑。人爲監察御史，出按蘇、松諸郡。逆瑾亂政，以蘇、松貨府望賄不從，下詔獄。後徵無蹤跡，得出。以劾按風采，歷轉大理寺丞，滿考，罷歸。廷梧涉宦多年，案牘稍暇，肆力古文詞。旣閒居，籃輿烏榜，徜徉山水間。與鄭司馬岳結社賦詩，人稱其翰藻相亞。

吳希由 宋世延之裔。弘治進士。清修樸澹，私淑胡文敬之學。繇比部郎擢浙江僉事。築海鹽長堤。扼劉賊長江，擒之。擢四川憲副，兵備威茂，有斬獲奇功。久之，乞歸，結社賦詩，洒然世外。子綾、紳。綾，領鄉薦。

紳 字克服。弱冠得胡文敬《居業錄》，厲志捧誦，輒有悟。人舉嘉靖鄉薦。教諭德興，日與諸生談心性之學。擢令桐廬，歷倅常州。有權相客，以兵部侍郎視師海上，擅恣不飭，紳不能俯徇，遂投牒歸，講學於鳳山寺。所著有《易通》、《鳳山初言》、《志學錄》等書。

陳深 字文通。弘治舉人，授九江推官。寧庶人宸濠破九江時，深署篆瑞昌，領兵復城，分功於僚屬，僅量移南豐知縣。

王鏐 字崇用，故司寇鄭岳同學友也。岳方伯江西，爲寧庶人所崎斲。鏐時爲南昌教諭，岳被庶人誣奏，併繫鏐。謂岳有橐金寄鏐，鏐坐拷掠幾死，卒不一語點岳。與岳同歸。濠誅，岳復起，力薦鏐。不報。

張廷槐 弘治進士，任潮陽知縣。警敏有才，剖決無滯，勢豪斂手。

黃體行 字子道。釋褐試政，疏歸養母，不允。致仕，遺馬太宰書，辭甚激切，亦不見聽。常悒悒不懌。久之，授工部主事，改戶部，轉員外郎，而母亡矣。正德甲戌，乾清官災，應詔陳言：「頃者上天示戒，災及寢宮，陛下憂皇，祇慎勅群臣，詔告天下，承天之心蔑以加矣。大小臣工恭承德意，誓竭忠誠，捨民隱不陳，而指切陛下之身，不謀同辭。蓋陛下一身，天下仰望，身正與否，治忽實關。群臣之言不歸陛下之身，又誰歸哉？陛下御極九年於茲，五年以前，逆瑾竊柄，敢作亂階，百姓惶惶，懼無生路。幸而國祚猶

篤，元惡成擒，然亦危矣。危而有持，此可爲一幾也。陛下能爲之乎？六年以後，逆瑾餘烈滋熾未已；劉六、劉七之徒一旦挺身而出，而亡命之人爭應之，北闕一呼，聚盜成丘，鼓星星之焰，以燎南北之原者，幾不可載。蓋瑾之取民者既窮，民不聊生，自相率而人之盜。幸而國祚猶篤，天兵壓境，江神助順，賊舸風飄，然亦危矣。危不終危，此又可爲一幾也。陛下能爲之乎？方今川江餘黨猶未悉平，處寇受招，間或復叛，正陛下勵精兢業時也。捨此不圖，聽番僧、義子、邊軍之屬遞相兒戲，而皇店內市、打毯錢、無名之征，胥此焉出？而又信童豎數十人，扈從聖駕潛出外市，移時始入，視天地祖宗臣民倚賴之身，不如一千金之子。卽今幸免，所損已多，臣深爲陛下惜也！此心既縱，百凡就荒，朝禮廢而不修，宮寢疏而不行，威重損而不知，儲位虛而不慮。上天監臨，特示切身之戒。陛下始雖警悟，畢竟受蔽，大小臣工前有言者，報而不行；後有繼者，留而不報，豈不以群臣皆外人也？勢隔情離，任意投擲。夫人情莫親母子，莫密夫婦，仁壽坤、寧兩宮，非陛下親且密者乎？群臣言不足聽，兩宮之言亦不足聽乎？臣一芥儒生，謬登甲第，竊祿孝廟之末年，錄官陛下之初歲，始欲少効愚衷，顧八十老母賴以送終，理難許國，今臣母亡祿，而猶顧戀蒙恥，不爲陛下盡言，臣身雖存，猶行尸也。伏望特清聖慮，大回宸斷：出番僧，屏義子，遣邊軍，罷去皇店內市、打毯錢，撤行殿而深居，以爲誕育皇儲之地；息游幸而早朝，以杜潛移政柄之門；召親王而人輔，以絕姦邪窺伺之路。如是而陛下之身正矣。陛下之身既正，生民有恃以爲安，叛亂聞風而自息。不然，天下事未可知也。」疏入，削職爲民。嘉靖初，擢處州知府。尋乞致仕。體行家居，授徒自給，居喪不與燕飲。老雖目眇，敬恭先祀不廢。

吳大田 字紹曾。舉人也，縣扶溝學諭爲興府長史。侍世宗潛邸，講讀有勞，世宗登極，以從龍恩歷

工部侍郎。始，大田爲諸生時，祈夢鯉湖仙人，語之曰：「有教無類。」其後世宗贈之聯曰：「不向春官尋座主，獨求天子作門生。」大田雖用從龍恩至列卿乎，奉命督理九廟、慈寧宮、奉先殿諸役，裁冗費，惜民力，以勤慎見稱。致仕，卒。子元玉，南戶部員外。從侄選，梧州知州，醇朴有古風。

陳簠 字鳴韶，宋大卞之裔。父宜泰，見韋布。簠，弘治進士，山東參議，移守遼海，清屯鹽，募墾種，邊人賴之。致仕歸家，清白特甚。弟簠。

簠 字和韶。嘉靖初進士。少負雋才，遇事敢任。司李杭州，平疑獄，抑奄豎。擢刑部郎，會大同兵變，疏解撫臣劉源清罪，得薄譴。歷禮部郎，時代藩以代近邊，持萬金賂權貴，請徙封內地。簠抗言：「此高皇帝設屏翰，爲備胡至計，安可徙也？」仕終尚寶卿。子文信，令寧都，有保障功，終柳州通判。

馬思聰 字懋聞。弘治進士。初爲象山令，復二十六渠，溉民田邑，民德之。以憂去。服闋，補萍鄉。流寇劉六爲變，調畫戰守甚備。擢南戶部主事，督糧江西。正德己卯六月，與宸濠生辰之燕，翼旦人謝，度必有變，語廚人曰：「我倘不出，皮勅高處。」廚人不解，姑如所示。及人，宸濠出反言，都御史孫燧、副使許逵皆遇害，謂思聰部郎耳，不能有所指麾，第下獄。思聰與參議黃宏並發憤不食，去之六日死。宸濠敗，與燧、逵並賜廟祀，予額曰旌忠。始思聰署在安仁，去宸濠邸可三百里，宸濠生辰將至時，或勸第裁書爲賀，可無行。思聰曰：「宸濠反有狀矣，吾往非爲賀也，至彼伺其動靜，亟以奏聞，亦一羽翼耳。」至是遂不免。子明衡。

明衡 字子莘。正德進士。從王文成學。嘉靖初，繇太常博士選爲監察御史。時方議大禮，尊崇睿皇帝，而孝宗皇后聖節，詔免命婦賀。明衡上言：「前者興國太后令旦節，命婦已行朝賀。今昭聖皇太后

聖旦之節，相去未越月耳，乃輟而不行。當議禮紛更之日，正人心搖動之際，忽傳此報，廷臣兆庶莫不疑貳。伏惟孝宗皇帝臨御天下十有八年，深仁厚澤，貫匝人心，父老至今道及，時或流涕。天下之人思慕如此，則其懷戀昭聖皇太后當何如哉？陛下仁孝夙成，恩禮之隆，宜無不至。然萬一因禮文末節，稍成嫌隙，關係匪細。孝敬難篤而易疏，讒言易簡而難合，微之往事，自古爲然。其在今日，尤不可不委曲鄭重。」疏入時，世宗怒，下之獄，曰：「此曹以不孝誣朕，法當反坐論死。」賴內閣蔣公冕救免，削籍爲民。明衡上疏時，去其人臺十日耳。人稱世節。

〔校記〕

〔一〕「族侄孫華」，《林誠傳》作「族侄華」。

〔二〕「從孫伯獻」，《陳懋源傳》作「從侄伯獻」。

〔三〕「榮子謙」，本書卷一百八「皇朝科第」及本卷《黃節甫傳》、《黃榮傳》、《黃謙傳》均謂黃謙爲黃榮弟黃華曾孫。

〔四〕「吳希由」，各本原脫，據本傳補。

閩書卷之一百十二

英舊志 縉紳

興化府 莆田縣八

皇朝

有傳

黃鞏 周宣 劉閔係孫自省、自侄孫儉附。(一) 戴大賓 王大用 鄭瓚子綱、侄大同。 周讚 陳傑

李純 朱守爲 高通 朱鳴陽 沈健 余瓚 鄭懋德 陳文講 黃廷宣 劉勳 鄭公奇 藍渠 林

仕鳳 廖梯 王鳳靈 卓居傳 朱可宗 張曰韜 姚鳴鳳侄虞。 鄭豸 陳大奇 周鳴鸞 郭日休

陳騰鸞 宋秩 吳裡 蔡于穀 朱瀚 陳大珊 姚文炤 朱道瀾 歐志學 沈良 陳繼芳 鄒守愚

陳祥麟 鄭道夫 陳富春 楊汝惠 謝炯 魏一恭 陳光華 林允宗 林渙 唐時雍子維城、師錫附。

鄭汝舟 黃大廉 陳烜 楊萬程 康太和 陳策 林應節 鄭鑿 黃繼宗 鄭應旂 許効賢 張秉

壺 林學道 彭希賢 林芸 李德用 昌應會 阮琳 方大樂 廖賓 翁夢鯉 蕭桂 郭應聘 方

亮采 林澄源 游日章 宋効周 吳一奇 王宜 林大經 程拱宸 陳瑛 宋萬葉 林東興 吳獻



台 林道楠 沈夢熊 陳泰交 盧廷選 周如磐 黃起龍

黃鞏 字伯固。授德安推官，陞刑部主事員外，改兵部，歷武選郎。武宗有南巡之命，鞏疏言：「陛下臨御以來，祖宗紀綱法度一壞於逆瑾，再壞於佞倖，又再壞於邊將，至是蕩然已！天下知有權臣，不知有陛下。陛下弗知也。恐後知之晚已！先儒周敦頤曰：『聖人定以中正、仁義，主靜，立人極焉。』又曰：『吉凶悔吝生乎動。』吉一而已，動可不慎乎？故聖人主靜，君子慎動，陛下盤游無度，流連忘反，過動矣！古之明王用言而顯其身，後世不用言，又加罪焉。今也又不然，臣僚有言時政者，左右權臣往往匿不聞，至言權臣則留中不出，而以他事中之，使其不以言獲罪，而以他事獲罪。臣故恐陛下知之晚也。孔子曰：『名不正則言不順，言不順則事不成，禮樂不興，民無措手足。』陛下無故自稱威武大將軍鎮國公，自輕如此，則誰爲陛下者？天下不以陛下事陛下，而以將軍、公事陛下，天下皆將軍、公之臣矣。古天子有號爲獨夫，有欲爲匹夫而不得者。臣切爲陛下懼也！陛下始時，遊戲不出大庭，馳逐止南內而已。亡何幸宣府矣，幸大同矣，幸太原矣，幸陝西榆林諸處矣。所至費財動衆，州縣騷然，至使民間夫婦不能相保。陛下爲民父母，何忍至此極也？近者，復有南巡之命，南方之民流離奔踣，爭先挈妻子避去。卽今江淮饑，父子兄弟相食。天時人事如此，重以蹙之，幾何不爲盜賊速之死亡也！姦雄窺伺待時而發，變生在內，則欲歸無路；變生在外，則望救無及。陛下斯時悔且後矣！居位大臣、用事中官、親暱群小，豈有毫髮愛陛下之心哉？皆欲陛下遠出而後得擅權自恣，乘機爲利也；其不然則袖手秦越，不涉休戚者也。陛下宜翻然悔悟，下哀痛之詔，罷南巡，撤宣府行宮，示不復出。發內帑以賑江淮之饑，散邊軍以歸卒伍，斥不御之女使還其家。夫自古未有小人用事不亡國喪身者也！今之小人簸弄威權，貪圖富貴，實繁有徒。」

至於首開邊事，以兵爲戲，使陛下勞天下之力，竭四海之財，傷百姓之心紛紛未已者，則江彬也。彬行伍庸流，兇狠傲誕，但見可誅之罪，不聞可賞之功，乃賜姓封伯，託以心腹，付以總督京營，使其外挾內擁，此騎虎之勢，亂之道也。天下切齒唾罵，皆欲食彬之肉，陛下何惜不以謝天下哉！陛下春秋漸高，前星未耀，祖宗社稷之託，懸懸乎無所寄，方且遠事觀游，屢犯不測，收置義子布滿左右，獨不豫建親賢毗承大業，臣謂陛下倒置也。伏望豫選宗室親賢養於宮中，待他日誕生皇子之後，俾就外藩，此宗社無疆之休，四海之望。」鞏疏方上，同舍郎陸震讀之嘉歎，遂附名同人。是時吏部員外郎夏良勝、禮部郎中萬潮、太常博士陳九川與醫士王鑒皆有疏諫，嗣後群臣伏闕者二百餘人，武宗怒甚，皆杖之。以鞏、震與良勝等倡首，下鎮撫司嚴治。已，鎖項、械手足，廷跪之五日。正跪時，衆曰：「天子且出。」鞏曰：「天子出，吾牽裾死之。」既與震等三加訊杖，坐繫一月，除名爲民。彬使人途刺鞏，有管洪主事匿而給之，乃免。始，鞏以職方艱居，其弟謂鞏：「此時縣官北狩，人心危疑，兄且無仕。」鞏題其書室曰：「茅屋石田爲生，太拙；鷗夷馬革自許，何愚？」至是遣弟詩曰：「不用汝謀方至此，須知我道固當然。」歸，杜門著書，貸米留客，日中未爨，晏如也。嘉靖改元，起大理寺丞，疏辯大禮反覆千餘言。尋病卒。無子。而震先卒於出獄時矣。時張襄惠公岳方爲行人，疏言：「正德末年，逆彬弄柄，導引巡幸，焰氣薰天，犯者糜碎。陸震、黃鞏，慨然首發其奸，震死杖箠，鞏得殘命。聖明御極，蒙贈官祭蔭，鞏亦亟起班行，不意數奇身亡，中外相弔。臣知鞏最深：趨向至高，學行甚正，有定心養性之功，故氣節剛勁而不激；有格物窮理之學，故議論持正而不詭；加以清修之苦，才具之優，使天假年，効忠未量。國家贈謚祭葬之典，皆視臣子品秩高下，至德學氣節爲衆所推者，官資未及，褒恤不廢。伏望博采公論，量贈一官，或祭一壇，令有司造墳安葬，士氣

風俗必有所補。」世宗贈鞏大理少卿，并與祭。鞏體質修羸，沉敏好學，疾病支離，手不釋卷，歎曰：「人生仕宦至公卿大都三四十一年，惟立身行道可以千載。」林俊比鞏美玉精金。袁袞曰：「武廟南巡，黃公奮忠極論，兩都傳草幾於紙貴。」

周宣 字彥通。授常德推官，明慎清簡，爲楚屬冠。中官劉瑾遣卒偵事，獨常德免譴。擢御史，巡按山西，將行，會武宗南巡，與臺官疏諫。武宗怒，罰跪端門外烈日中三日。及蒞山西，去驢吏，固邊圉。竣事，改提督畿內學政。世宗卽位，首疏治安之策在培元氣，伸士氣，其要又在聖學。大禮議起，疏引濮議，折衷程子，以反張孚敬之說。擢山西按察副使，仍督學政。歷廣東按察使、左布政使。潮人給事中陳洸不法，宣按察時，絕不之貸。洸恚甚。寵臣郭勳庇山西妖人李福達，行囑不遂，兩京科道因之劾勳。勳譖於上，遂興大獄，命孚敬判法司事。孚敬本嫉宣曩疏，適洸赴京陳辯，宣遂坐在山西時棄福達訴詞不理，同法司科道百餘人罷免。歸至家，解其橐巾，裝金三百而已。徬徨終歲之計，出以買田，狙僧見其書券若不足，日來言田於宣，宣曰：「金盡矣。」莆僧至今以爲笑談。爲人好讀書，精染翰，喜賓客，論文談弈，日高春笑語融融，不知室之宴也。從弟寧。子鯤。寧，宰丹陽，列名宦。鯤，歷江西按察副使，工文翰，精書法。

劉閔 字子賢。絕意科舉，求古聖賢提躬訓家法，率而行之。念父母亡，與祖母二喪不克葬，遂斷酒肉，遠房室，訓徒鄰邑。朔望歸，則號哭於殯所，如是者三年。鄰族憐之，爲助其葬。婦失愛於母，逐之，獨居奉母，定省溫清，疾不解帶。母或恚怒，則衣冠竟夕跪床下。他諸祭祀奠獻，一循《禮經》。鄉人盡加敬慕。副使羅環立社學，構養親堂，延閔爲師。提學僉事周孟中捐金助養。知府王弼素重閔，每當祭，齋

宿必延致齋所，曰：「此人消鄙豈滅？」黃憲亦置田五十石資之，並受不辭。及母卒，閔卽送田還官，廬墓三年。歲凶，弟婦求分異，閔戶自撾。弟婦感悟，復合如故。弘治中，林貞肅俊上言：「皇太子年踰幼學，趨向所決，而多處宮中，少就外傳，古人之教恐未宜然。今東宮講讀侍從諸臣，固皆陛下之所登簡，廷臣之所論薦，然百司、衆府、山林隱逸不謂無人，以臣所知，則禮部右侍郎謝鐸、太僕少卿儲璫、南京光祿少卿楊廉，行幾殆庶。其資序不合，實德可取有二人焉：致仕按察副使曹時中，渾厚澄瑩，粹然春風，無賢不肖皆服其行。時中，華亭人也。處士劉閔，則臣縣人，恭慎醇粹，孝行高古，日無二粥，身無完布，處之晏如。臣每見，愧畏不暇。上官劉大夏、徐貫，知府王弼等恒延拜之。閔詞藻雖稍不逮，德宇道風自見難比，臣謂可禮致。時中爲官僚，閔仍布衣，人侍更以純德雅望之人常同起居，必能涵煦陶薰，有所裨益。」其後，巡按御史宗彝、饒塘欲援詔例薦閔經明行修，<sup>(二)</sup>閔力辭。知府陳効請遂其志，榮之以學職。正德元年，遙授儒學訓導。所著有《家禮考註》、《昭穆圖》、《家子說》、《五倫啓蒙》、《孝經刊誤》等書。侄孫自省，長沙同知。自省侄孫儉，<sup>(三)</sup>孝豐教諭，並有閔之意。

戴大賓 字寅仲。三歲學語，屬辭若神授，兼通《五經》。舉鄉薦、會試皆第二，廷對第三。鄉薦時年十二，廷對二十矣。除翰林院編修，雋韶名一世。逆璫劉瑾兄女有才姿，瑾養爲己女，爲求快婿，力欲致之，爲飭邸舍，具騶粟廝隸。大賓自遠也，時時佯狂縱酒，倚醉譏詈，瑾所具廝隸，復時笞辱之。廝隸譖瑾：「戴探花，輕薄人也，何有於乃公？」瑾意衰。會奔母訃，卒於途。瑾女後以嫁關中士人。關中士人者，年二十發解，及瑾誅，解元坐瑾黨削籍，乃知大賓慧識矣。

王大用 字時行。其先儀真人，國初隸軍興化衛，遂爲興化人。生而母感異夢，故名以大用。晬而

孤，母力存之。自其少舉不第，則翺游雲、代間，觀壁壘，探扼塞，慨然有用世之志。舉正德二年進士，授工部主事，督造漕船，兼理臨清閘座。流賊劉六突犯臨清，捕賊非大用職也，且其分署在城外，大用留拏邸舍弗動，自拔壯勇據險迎敵，會兵備使者出應援，賊解去，而大用名爲知兵郎署間。改刑部主事，轉員外郎，擢廣東僉事，備兵清遠。一討樂昌高快馬賊，獲功千四百有奇；一討清遠猺盜，拔旗坑、菜塘、西坑、癩利諸寨，戮賊首梁永寬等千有奇；一攻黃簾坑、黃華洞、後山、千八山諸處，戮賊首唐鎮山，偽都督楊旺等二千有奇；一獲新會、白水、新興、梅州等洞賊二千四百有奇；一獲順德、增城、香山沿海諸村賊三千二百有奇。陞本司副使，兵備如故。一征白水黎蠻，一征嶺西高涼洞夷，獠具有功。先後賜金加俸。大用臨征勦，善出奇，用俘健，所以捕獲境內賊。令黨正別民所業，互相覺舉，游手暴橫者，繩以法，里胥、父老各得捕所知。粵嶠名多盜，大用蒞之五載，屬界肅然。嘉靖初，陞江西左參政，分守湖東道。當大計，言官風論大用酷治盜，坐調貴州右參政。值軍旅繁興，採木使命旁午，擘畫供億，復以晏如。未幾，擢廣東右布政，轉廣西左布政，尋晉應天府尹，繼陞都察院右副都御史，巡撫順天道，改巡撫大同，贊理軍務。大同卒悍難治，戕主帥者屢矣。大用至，禁淫酗，課墾耕，嚴開中以通商鹽，營堡落以備哨望，勦平強寇劉善果，欽賞白金紵絲。巡按御史張祿者，與大用持禮節，嗾給事中秦鰲論劾之。再疏乞休，改撫順天，至則歲大饑，百方調度，奏給糧米數萬，躬循賑濟。復疏陳防勦三事，世宗皆嘉納之。陞右都御史，入掌院事。張御史懷前憾，復摭詆之。有旨切責張御史。大用疏懇辭，得允。會朵顏三衛擁達虜千餘，假名人貢，大用率參將周璿、蕭陞詣關撫諭，乃知其欲入犯，即令璿、陞拒敵，自單騎入城，誠兵策應。虜覺，宵遁。大用時又欲以金帛與虜易馬，又嘗諭其頭目幹維者，令獻黑谷關外地至太平寨長亘五百餘

里，可徑爲邊牆，以省關營大半。二議已定，俱未及請行。張御史復以此再詆人用，大用遂奉旨致仕。（四）僞  
 寓儀真者久之，復用薦起，巡撫四川。出墨吏，革鋪官舫，禁淨身，抑橫債，釐茶法，定賦役。諸所興革，務  
 存節愛。陞南京刑部右侍郎，方候代，會白草番率衆攻破平番堡，即奏勦之，使游擊曹克新督兵救應，斬  
 首七十餘級。兵科給事中扈永通論劾大用失事基禍，有旨回籍聽勘。代者張時徹隨疏上捷，引人用前  
 功，奉旨賞銀二十兩，紵、絲、表裏，待勘明錄用。大用歸，復居儀真，卒。遺命返葬於莆。大用有時僞寓  
 儀真，有時返莆，率僦居市糶，明農授徒，出人徒步而已。甲辰歲，莆中荒旱，至不能具晨炊。在官時，以  
 事人都門，至不持一屨也。歿而貧甚，其子邦圻空手入都，假貸得百金，爲大用求恤典，時嚴分宜當國，子  
 世蕃貨賄濁亂，凡大臣求恤典者，人重賄乃得。邦圻徒以百金餽世蕃，爲世蕃所卻，咄咄無計治歸裝矣。  
 一夕，世蕃召邦圻便室，與邦圻飲。邦圻者，故嗜酒敢狂言，世蕃心折之，已悉如所請。疏下，人咄咄稱  
 怪事也。後知相在西直嘗語世蕃曰：「王時行，一世偉人，素著戰功，家甚饒爾，毋恒調困其子。」乃知分  
 宜知大用矣。

鄭瓚 字宗獻，宋忠惠僑之後。弱冠攻古文詞。舉進士，授戶部郎，督餉宣府，以贏金輸還公帑。操  
 行清修，至性孝友，惜其無年。後以子綱貴，贈兵部侍郎。侄大同。

綱 字子尚。繇郎署歷都御史，總制兩廣，數歷中外，具有才猷。

大同 字皆吾。初授行人，轉兵科給事中，累陞都給事。論事持大體。分宜相嵩當國，大同邸舍與  
 相近，弗通也，坐是歷政太僕、太常、大理，皆在南都，留滯有年。太宰李默柄用，乃引之北，以大理卿轉刑  
 部右侍郎。後李爲相嵩門客誣陷，言其試目有謗訕語，坐下詔獄，屬刑部當案罪。大同謂李吏部試人發

策引故事，註誤則有之，坐以謗訕枉矣，此境當除籍耳。坐李黨歸。大同少受經於儒先吳祿，貴而執門生禮甚恭。倭破莆陽，祿死郊外，大同購其屍，斂葬之，爲位哭者累日。其卒也，值文廟更新，工匠尚宿廟中，味爽見人同緋而入拜。頃之，一匠過其舍，聞哭聲，驚相語，莆人問之，皆歎曰：「侍郎之卒也，修禮而後行。」

周讚 知高明縣，政尚公平，未幾乞歸，高人祠之。

陳傑 字國英。曾祖瓊，廣信府推官。祖讚，教諭。父曰漸，貴池教諭，棄官養母。傑，舉進士，授景陵知縣。有巨猾陳盪，怙富武斷，召置之法。盪行賄上官，誣傑於理，闔縣呼號，願爲傑死。〔五〕郡守劉斐率僚屬出矢言，欲與傑同掛冠。事得白，擢南御史。從王文成游，文成稱其篤信好學，高潔自守。後奉差遣，不肖吏雖善結援營護，無倖免者。其訓諸生曰：「科舉，筌蹄耳。辯義利，審真偽，聖賢實學也。」所奏若干疏，皆切時務。滿考，乞歸養父，卒。傑服食粗淡，行里中不假輿，無書抵公府，體規道矩，終身持踐。其卒也，督學潘璜題其墓曰孝廉先生。巡按聶豹、施山先後疏請依御史陳茂烈例旌表，弗果行。〔興化志〕曰：郡中士大夫好混跡齊民，往御史陳傑、方伯葉珩、知府廖梯疏歸後，輒遺跡公府，布衣素冠，徒步里中。而修飭邊幅者云：「暨兒販夫行不讓路，徒爲褻耳！」昔蘇長公以文章氣節伏一時，最後歸陽羨，行爲醉人所推，同行者有憤色，公笑曰：「某今漸喜不爲人所識矣。」此蓋有味乎南華爭席旨也。要之，尚不免輕世，而吾里諸公稟之雅素，更爲可尚。

李純 字在誠。初知懷寧縣，陞知蘄州，再知欽州，終韶州府同知。《懷寧志》稱純興學育才，修城鑿井，毀淫祠，創社學。《湖廣志》稱純清慎愷悌，警敏剖決，豪猾莫敢肆逞。《欽州志》稱純性方履潔，杜絕私門，興學教治，豪猾擒治。蛋民之亂，北障江水，環護州城，爲功甚大。而莆志則稱其與李元、廖德徵同

一清貧，子孫哀替，可憫念也。

朱守爲 字良裕。陳州學正，知太平、麗水二縣。剛毅有爲，政務舉飭。

高通 字于亨。教諭德安，善經術，勤講解，教及旁邑上。部使交薦，轉灤山知縣。縣兵興甫定，通持政寬平，殫心綏集。卒官次，郡守胡繼宗念通貧，厚賻佐其歸。

朱鳴陽 字應周。正德進士，授戶科給事中，歷禮科都給事中。魁梧倜儻，慷慨建白。康陵數出行幸，鳴陽言：「駕出不時，白龍魚服爲戒不小。江彬、錢寧怙嬖慝，合正典刑。藩服親王可承天序者，當選居京師，以防意外。」殿庭災，鳴陽請罷鎮守大璫，任正人，黜奸回。繫之。辭曰：「變故之興，猶火也，始焰星星，救易爲力，及燎方揚，滅難爲功。且夫室之燬矣，猶可建也，禍延天下，尚可爲乎？」言備剴切。永陵卽位，大禮議起，伏闕諫。張孚敬方以議禮稱上意，鳴陽疏攻其短，出爲浙江參政。已，坐他事貶雲南參議。孚敬罷，銓部廉鳴陽枉，復故官，徙廣西。未幾，轉浙江右布政使。汪鋐起爲左都御史，仍謫鳴陽，勒致仕。鋐，孚敬黨也。

沈健 字若乾。歷刑、戶二曹郎，剛方守法。出爲桂林太守，祛弊立政，廉介自守。未期卒，官民爲立祠。

余瓚 字君錫。初官濟寧學正，上敦本正俗、勘流移、定版籍十事。既登第，擢兵科給事中。武廟南巡，諫不可者五。陞都給事中，獨持國是，時有抗疏。陟太僕卿，歸。

鄭懋德 字成昭。正德進士。初爲鉛山令，鋤豪強，有能聲。擢刑部主事、論劾錢寧，坐繫詔獄，謫清源判。歷臨江郡守，治行以嚴正聞。



陳文講 字國賢。嘉靖初任象山教諭，質直不能容惡，知縣史簾敬憚之。時役民修大成殿，賄文講二十金，文講拜聖像前，麾卻之。陞崇陽令。

黃廷宣 正德中舉解元，進士，守太倉，貳建昌，有惠政，終廣東僉事。廷宣心務希古，性不比俗，輒軻仕路，優游家食，而太倉、建昌舊民久猶致起居。

劉勳 字紹功。授刑部主事，改吏部。嘉靖初，伏闕抗疏議大禮，忤旨受杖。已，歷考功郎，爲桂萼、方獻夫所不喜，調爲南禮部郎，空橐趣裝。累四川參政，平巨寇李和尚之亂。後陟副都御史，巡撫寧夏，引疾歸。

鄭公奇 字上望。知太平府，立心公恕，民夷悅服。

藍渠 字志張。知隨州，清刑獄，裁冗費，剪強豪，植孤弱。居七年，調欽州，民像祀之，立善政碑，請州人顏木爲記云：「藍子爲州，敏而弗蔽，察而弗煩，廉而弗隘，惠而弗徇，寬而弗恣，儉而弗棘，嚴而弗苛，正而弗局。」

林仕鳳 字鳴盛。官雲南僉事。滇志稱其慈祥樂易，秋毫不擾。祀名宦祠。

廖梯 字雲卿。起家南戶部郎，調禮部。擢山東參議，未任，坐戶部誣誤，謫安吉州知州。轉寧國同知，雲南鎮遠知府，致仕。梯優於經術，推以飭吏，損己惠下，片楮不罰。出郊必自裹糧，賓客之費咸出俸金，爲郡三年不携家累。嘗採古賢守令化民者，刻爲《諭俗編》，頒行部內。旋乞休養母，家食三十年，年八十餘。甘貧守約，容膝之廬，沮鹵之田，一僕給薪，步不假輿，婦女布裳而已，縫紉皆出室人。巡按御史先後連薦，悉不報。安吉人陳良謨爲閩臬，至其家，出菜四器，桃四枚，白酒一壺飲之。良謨遍語諸公。

問一日，詣良謨，變色曰：「公何憐我？」曰：「非敢憐也，揚清德耳！」

王鳳靈 字應時。舉進士，授刑部主事，年甫弱冠，乃明習法理如老吏。宦官張銳、都督錢安等罪當死，詔減戍，且許贖金，鳳靈言：「此輩必誅之賊也，非爪牙逆瑾，則羽翼錢寧，非交通宸濠，則結好江彬。今以賄囑轉移聖慮，臣恐姦雄伺覷，謂私交可無誅，亂政可不殺。法紀謂何？」疏奏，竟如法司議。

給事中陳洸者，罪有顯狀，世廟以與議禮，故庇之。鳳靈疏言：「先朝開國，靖難及諸迎立元勳，豈無寵利動觸刑憲？議禮者自議禮，犯罪者自犯罪，何得援此掩彼？抑發議諸臣深係聖心，倘或處極盈之會，犯不韙之科，陛下尚當與衆棄之，況如洸罪？」采諸曹，自是無敢復庇洸者。年未三十出爲襄陽太守，以母喪歸。服闋，補淮安。淮故患水，鳳靈首疏五事，以疏滯、重農爲先。又連上秋災、夏蝗等四疏，請蠲秋糧、雜賦，出餘銀數千以賑民。復疏停馬價，懇側數千言，俱得請。其他興學政、清徭賦、辯疑獄、擊豪猾、緝治巨盜，淮人稱之。擢陝西提學副使，未抵任，遭謫歸。起補霸州兵備，佐翟相鑾行九邊，又督城沙河。議省貲，忤柄事者，故疏留五載，始遷廣西參政。未赴，忌者竟以考察罷之。家居，死於倭難。鳳靈生有異質，日誦書數萬言，伉直好論天下事，爲文章以氣勝，善作大書。所著有《淮陽急稿》及諸奏疏。

卓居傳 字起巖，宋得慶裔孫。蚤著錄郡庠，以經學稱，執經問難，前後數百人。領鄉薦，授金華訓導。以制歸，開館鳳山，四方來學甚衆。服闋，改淮安，育賢恤乏，青衿感奮。既登進士，賜歸省，一時士類競趨其門。竟以刑部主事終。

朱可宗 字端夫。仕戶部郎中，以諫南巡廷杖。

張口韜 字席珍。正德進士，授常州府推官。歲己卯，守令以覲行，曰韜兼綰郡邑事。會武廟南巡，

止留京，倖臣江彬縱其黨數十輩，下潤州橫索，民間莫敢誰何，常人聞狀輒亡匿。曰輅召父老並二三豪傑，約曰：「彬黨卽至，若等併力與格。」又釋囚徒，呼乞兒輩各具瓦石投之。部署已定，而彬黨各累騎至，父老豪傑直逆彬黨境上，遮叱之曰：「客何來者？常州連歲災沴，物力大絀，無可啗爾曹。郡中惟一張司李，一錢不入，卽欲具芻草秣若馬，亦卒卒莫辦。」言已，囚徒、乞兒奮呼還至。彬黨見耳目非是，又怪出語不遜，勒馬稍稍卻，尋復揮策徑入，而囚徒、乞兒擲石飛瓦，爭中其額項，皆走還。旣退里許，令人馳告彬。而曰輅亦卽奏記御史臺言狀。御史省記，便行部抵常。曰輅拏舟來迓，御史曰：「君治彬黨，彬黨奈何君矣。可登我舟先去，我乘君舟也。」頃之彬黨至，索曰輅於推官舟中，則御史在。御史陽叱捕之，皆卽散走。後御史置捕者勿詰，而彬亦戒其黨毋得再下郡國。於是南中士大夫咸云：「微張君力扼奸黨於常郡也，勢必以次下姑蘇，何地不漁獵哉？」嘉靖初，以風裁異等，擢監察御史。入臺四月，七疏言時事，最後抗論大禮，廷杖，強出朝門，裹瘡步歸，卧地床，口占疏草，欲再上，越三日卒。隆慶初，追贈光祿寺少卿。從侄英，貴州左參政。母老，疏致仕。英其始居臺中，亦號敢言。

姚鳴鳳 字景陽。正德中授南太常寺博士，擢南御史。嘉靖初，武定侯郭勳受山西妖人李福達賂，冒陞帥閫，事覺，兩京臺諫論奏勳。勳反奏陷臺諫及按事官。有詔張孚敬等覆訊福達獄，公卿臺諫多謫戍、削籍，福達竟脫死。鳴鳳時同御史高世魁連疏論之，世宗怒，繫逮詔獄，與世魁並削籍。侄虞。

虞 字師舜。嘉靖初以御史清軍湖廣。顯陵大工興，鄖陽、河南流民赴募萬人，無所得役，流離死亡。虞疏言：「今承天府修建陵宮及陽春等門，工作匠役俱官召募鄖陽、襄陽及河南饑民就募而來，携妻襁子，不下萬計。匠作不能容收，屯聚饑餓，積屍載道，雖有司次第掩埋，而死者相繼。其尚存者或鬻子

捐妻，或剥木掘草，或相向對泣，或矯首籲天。及其父不顧子，夫不及妻，飄零陰風積雪之中，匍匐墮垣荒隴之下，臣實掩鼻酸心，撫胸流涕，有不忍視者。夫承天陵寢之地，二聖妥靈之所，而流民死亡，淒號萬狀，在天之靈有弗安矣！臣不能盡其狀，命工爲圖一十有二，不避鈇鉞之誅，謹効鄭俠之義，伏望聖慈垂覽，便宜賑恤。」疏上，人給預備倉糧三斗，諭令回籍。飢民德之。歷淮安知府。

鄭彥 字秉憲。初爲茂名令，編徭均核，載之邑乘。擢泰安知州，卻泰山香錢。爲人質行寡營，介澹自勵。授徒傳經，成名者衆。

陳大奇 字偉先。授平度州學正，歷國子助教，通判饒州、淮安，同知常德，致仕。大奇始居約時，以操尚稱，及仕宦數十年，歲入田產僅足粗糲。在饒、在淮並處脂膏，嚼然不滓。晚丞常德，猶以既衰在得自署。年八十餘卒。廖知府梯以「篤行君子」稱之。

周鳴鸞 字士和。仕終武寧令。刲股愈母，母卒，廬墓終喪，有甘露之祥。父歿亦如之。當道先後爲立孝子坊。

郭日休 字德夫。授戶部主事。嘉靖初，以爭大禮廷杖落職，久始復官，歷湖廣參議，浙江、雲南參政，貴州按察使。以事與按史相持，卽日投綬歸，振輿奉母。母年百歲終，日休亦八十矣，猶作孺子哭。

陳騰鸞 字士遠。酷嗜經史，爲文奇澀，不可句，其後變爲古雅。林尚書俊、鄭司馬岳咸重之。官戶部郎中，無年以卒。丘秉文曰：「士遠固能文，非林尚書誰解士遠文。昔謝安讀阮光祿《白馬論》，不卽解，阮歎非惟能言人不得正，索解人亦不得耳。」

宋秩 正德間以貢仕海豐訓導，清苦自厲，時揭行誼踐履，爲諸生訓迪。

吳裡 字國誠。篤志厲行。教崇德，遷壽州，皆有去思碑。壽人以與許珀並稱。再遷寧鄉令，以不阿自免。

蔡于穀 字虞璧。嘉靖元年歲貢，官湖廣行都司經歷，卒。于穀修行博學。在胄監時，禮曹鄭善夫疏薦其明習理數，請召擢，以正司天之謬，不果。用嘗輯《開國事略》十卷。

朱澍 字必東。嘉靖初選授監察御史，甫閱月，昭聖皇太后聖節，有旨免朝及命婦入賀。馬明衡上疏，澍繼之，與明衡並下詔獄，削爲民。澍家居奉親爲娛，與人交不欺，或受欺亦不較。於公府，歲時致敬而已，至民間利害，則牋記括屬其出處。雖與明衡同，而貧視明衡尤甚，乃所著文詞無窮愁語。卒年六十七。一孫天，無嗣。隆慶元年，贈光祿少卿。

陳大珊 字若寶。自兵部郎爲廣東僉事，治鹽筴有廉聲，擢廣西參議。田州土官盧蘇弑其主岑邦相，督府陶諧誤以邦相病死，欲右盧蘇，大珊曰：「盧蘇敗略，稱亂弑主戕民，安可蓋也？第當直叙以聞，使立功自贖，不及征討足矣。」督府置不問，兩江土官咸出怨言。藤峽之役，蘇逗留不進，縱賊逸去，當事乃歎督府失刑而服大珊之議。擢海南兵備副使，罷歸。晚遭寇警，家赤貧，服御單陋，于于安之。

姚文炤 父永，宰邑，考牧有聲，歷太僕寺丞，年五十而致仕，進光祿少卿，世人美其止足。文炤仕比部，出守金華，歷陟藩臬，至左方伯。所至務爲寬厚。方其郎比部時，永正爲太僕寺丞，父子同朝，鄉人榮羨，而皆澹樸抑畏，視其色如在野。

朱道瀾 字叔觀。嘉靖初知增城縣，忠信明潔，曉暢吏書，均編徭役。立月會法，令鄉舉高年有行義者，人爲長，月一會鄉衆，使社師誦「爲善陰騭」一通，訓之，立善惡二簿書，其尤者示勸懲。學宮頽壞，士

鮮科第，道瀾朔望訓課，於是歲薦有人。遷太僕丞，尋出憲嶺南，行部至增城，民若復見慈母焉。

歐志學 字須靜。嘉靖初知潮陽縣，治先興學育才，潮之人文遂盛疇曩。在事歲餘，乞歸，當道檄留之。再歲，復請，乃聽。志學淹貫經傳，讀書南太學時，海內名士交重之，吳中諸文學爭延爲師。既歸開《五經》講席，以應四方問奇之士。

沈良 字貞夫。授全椒諭，有教澤。徵入爲工部主事，擢員外郎。以執法忤時，出判兗州。寬稅賑饑，民心懽悅。卒於官，民爲罷市。子夢熊，仕終德清令，寬厚恭謹，見重鄉評。

陳繼芳 字立夫。知金華縣，廉介自持，奸徒屏跡。甫七月，疏歸養。設帳以供甘旨，士負笈從者甚衆。

鄒守愚 字君哲，宋威武軍節度使琪之裔。父師魯，鄉貢士，爲郴州學正，郴人祀焉。守愚，嘉靖丙戌進士，授戶部主事，歷員外郎中。議行平糴法，奏發帑金賑全陝饑，劾諸中貴冒芻茭與爲逋逃主者。出守廣州，訟劇政勢，處以至誠。嘗辨誣獄，釋累歲繫不決者至數百人。歲饑，設策賑濟，民賴以甦。新會民激於徵逋，聚海船爲變，監司招之不應，曰：「必鄒使君來。」守愚單騎往，民望見涕泣解散。未幾，屬猖迫於閩帥，將大訐，亦得守愚一言解。安南不庭，命將出征，擢廣東按察副使，協理兵務。疏陳五事，多見採納，遂督兵繇潯、貴入廉州。丁艱歸。服闋，補江西兼攝學政，所甄拔士，先後顯聞。參政湖藩，授方略禦苗、苗遁。常德饑，便宜發長沙備兵米賑之，被誣。調山東，又改河南，歷左布政使。師尚詔陷歸德，諸州郡率兵討平之。繼汴河溢，歲且旱，盜起梁、宋間，詔以守愚巡撫其地。晉戶部右侍郎。乙卯，山、陝、河南大震，命大臣往秩祀河嶽百神，行賑恤。守愚當往山、陝，驅馳七十餘日，祭告、賑給，掩骼埋胔，一時

勛辦，以積勞卒，贈右都御史，謚襄惠，賜葬祭，錄蔭。守愚宏豁爽聞，平居不見喜愠，臨大事如飄發激立。居家孝友，與人交，肝膽相照。數歷中外，獨著廉聲，最寡嗜慾，耽書如饑渴。

陳祥麟 字士仁。裔出義門。嘉靖初授東安令。初至，朝命征討田州，土兵過縣，祥麟措畫得宜，犒餉具而民不擾。省徭役，革浮費，均田增里，拓城興學，毀淫祠，禁巫覡，改諸佛刹爲書院。以廉能調麻城，父老乞留，不許。尋以足疾，疏改湖州教授，嚴約束，勤課藝。主江西文衡，所得多名士。遷南刑部郎，當提獄，令人洒濯囹圄，不深錮之。諸囚相語曰：「安得長遇陳使君？」歷員外郎、郎中，在部五年，司寇聞莊簡淵深重之。擢守姚安，以母喪歸。服闋，補南安。治尚清簡，政暇招賓僚登臨賦咏。擢山東督學憲副，不第評文，兼有改定，以積勞卒。祥麟樸訥醇確，不務立道學名，而行履端莊。居官仁愛，自言筮仕以來，未嘗置一人重辟，亦未嘗謫一人戍。

鄭道夫 字立之。授林縣學諭，有教澤，厲操守。陞淮安教授。致仕歸，林之士子追祀於名宦。

陳富春 嘉靖中知高明縣，愛民興學，自奉儉約。宦游數歲，不隨家累官，暇輒學，尋討至夜分。遷阿彌知州，行李蕭然，高明人稱重之。

楊汝惠 字吉夫。以貢爲歙司訓，陞永福學諭，規矩嚴肅，選民間俊秀及生徒年約者教之，朝夕講解，多所造就。嘉靖七年，中廣西鄉試。卒於官。

謝炯 字光宇。慕古循矩，護事父母，貧而盡孝，人稱謝夫子。舉鄉薦，銓貴溪學諭，爲士子講明心性之學，督課有條。擢令桐城，力抑豪右，悉心撫字，寬賦稅，明折獄。立書院，擇雋士爲講究。既二年，乞終養，不允。擢南戶部主事，司權揚州，國課外，絲不入，商民頌焉。及瓜，懇伸前志，抵家，持父喪，哀

戚不勝。奉八旬老母，白首子舍如年少時。葬二嫂，撫孤侄不異己子。蓋孝友篤行，至老不易。

魏一恭 字道宗。其舉進士，出永嘉張相孚敬之門。授温州府推官，相有侄在郡獄，意一恭出之。至，則論如律，或謂：「張氏子，非公座師猶子耶？」一恭曰：「執之而已矣，以此報座師也。」轉撫州同知，擢刑部員外郎。有巨鎗殺人，下刑部獄，大司寇周雍欲曲庇之，一恭以「法行自近」對。大司寇恨甚，註考不及，謫潮州判，轉揚州同知。尋擢廣西按察僉事，督學政。以黜浮抑競，揭之公門，對臨諸生，儼然莊肅。轉浙江按察副使，分鎮寧波。有倡議於定海邑海島中築城列戍者，巡視浙江都御史朱紘可其語，一恭奏記止之，曰：「是役也，非費巨萬，更再歲不能卒業，且旦夕撼激，不出數年，舉而棄之矣。」紘拉守，巡二大夫偕一恭往視，既至，紘指畫上下，抵掌言便。二守、巡復從旁慫恿，一恭故望洋不顧。已，紘以粥販滿伽番人，交通海上亡賴人爲賈，不請朝旨，逮捕誅之，遂以師捷舉宴。一恭語諸佐吏曰：「海上幸無事，吾曹未嘗効尺寸，奈何言捷也？」已，強從宴。宴之日，定海令具金花文綺，自開府下至材官各有差，一恭麾卻之。紘曰：「攝一恭，一恭則自如。」亡何，以他事論劾之，疏已發，御史裴紳力言一恭有盛名，劾之且不利，乃疾騎追還。久之，紘竟坐罪，仰藥死。人服其先見。進江西參政、廣東按察使、山東右布政使、廣西左布政使，俱有勞績。其未擢左使也，山東、廣西士大夫群赴吏部爭乞一恭再任。未幾卒，年六十五。一子天。一恭起自單族，刻意爲廉，嘗言：「不要官，不要錢，不要命，則何事不可爲？」時人目爲「三不要」。同官有詆一恭於御史，謂其詐者，及卒，御史弔畢，突入簡視，裝篋如罄，問其家僮俸錢安在，對曰：「在庫。」隨呼問主藏吏，具對如僮言。御史嗟嘆去，書其治行，檄祠名宦。

陳光華 字道蘊。令祁門，有惠政。以內艱歸。復補溧水，學舍卑圯於水，縣有玄妙觀，地爽闊，擬



遷之。觀中玄帝像，百人輦之不得前，光華爲文告以尊師養士之意，輦遂舉，溧人稱爲神君。轉南戶部，擢雲南知府。黔國公沐朝輔薨，其妻陰取他人子承繼，弟朝弼請於朝，旨下撫臣勘問，撫臣才光華，以委之。黔國賂光華萬金，峻却之，竟以實聞。遷山東都轉運使，擢雲南參政，適詔下雲南鑄「嘉靖通寶」錢，光華謂鑄錢雲南，必開九隆之銅，汰瀾滄之金也，此穴蠹啓釁，當別構銅成之。人稱遠識。李肅愍默得罪，憾者指光華爲肅愍黨，落職。家貧，僦屋而居。祁門人以從祀朱文公祠。

林允宗 字希曾。令樂清，以德化民。有同氣相訐者，故不爲理，第令其累日思過，卒致如初。臺使者檄游鴈宕，以邑疲不能具供帳，力止之。擢刑部主事，戚畹建昌侯被劾，繫詔獄，奉昭聖太后旨，稍爲持平。上怒，杖謫諸郎，因出允宗貳太倉，尋轉丞肇慶。久之，復以刑部郎出守衡州，至則正風俗，清弊蠹。民有坐鬪殺者，獄成，察其冤，抗言釋之。征苗，調郡兵，故事以罷民嘗賊，允宗部良家子三千人往，芻糧、器械悉備，苗平，得全軍歸。亡何，以內艱解職，遂不復仕。卒年九十三。子民止、民悅。民止，寧國知府，工詩文，有《玄冥子集》。民悅，雲南副使。

林渙 字信朝。教諭泰順，剛介，邃理學，文章、德義，上類式之。仕至濟寧州判。

唐時雍 字子協。父懋，通《五經》，有士行，士多從之。時雍領嘉靖鄉試，教諭泗上，士範甚端。遷望江知縣，歲大祲，覈庾粟，出官俸以餉饑民。轉寧波通判，魏一恭時爲分臬，甚重之。以與開府相左，移倅彰德。內艱服闋，補淮安，峻防嚴馭，不能仰俯上官，中萎非罷。時雍仕雖不顯，所至持風軌，繫去思，孝友、謙退，名推鄉族。弟時雨，鄖陽通判，有清譽。子維城、師錫。

維城 字邦翰。授南工部主事，主真州廠。榷蕪湖，視度定稅以徵解屬邑令。遷員外郎中，出守青

州，拊循百姓，平反冤獄，見罪人被三木，爲泣涕，不得已始行法。會有詔開膠萊河，維城以爲工大難遽就，徒令民棄農趨工，勞費亡益，力陳其不可。青郡故不養馬，有議當養馬如濟南，維城言：「青，邊海斥鹵，牧畜無所，故夫濟以西，賦輕也，以養馬也；青以東，賦稍重也，以不養馬也。」爭之至欲投劾去，二事並得寢。郡租稅三十餘萬，維城置權衡庭中，令民自兌輸，徵收吏毋輒近，得舉手爲低昂。方岳下其法於諸州郡。時議急催科，維城以賦不中程，停勒常轉，歎曰：「杼軸空矣，守一人坐之耳！」亡何病，郡人走望如急父母。一夕星隕郡治中櫪，馬皆驚，維城遂卒。士民爲治喪。歸葬，夾道焚楮、帛，哭聲相屬不絕。而維城妻先維城卒數月，青人德維城，作二主郡堂後祀之。維城歿之二年，青人馮子履爲觀察使，夢維城授之玉環曰：「以爲公子。」寤而舉子，名之曰環。明日復夢維城來，曰：「吾爲郡神且滿，舉公自代，期以某日，故以環聘君。」子履謾應曰：「諾。」頃之病忽忽，與維城對語，輒趣之急，子履曰：「某有老母，身未敢許公也。」維城曰：「則與我環。」子履從几上取授之。子環暴瘍，而子履霍然已。其異如此。師錫，字邦魯，知象田縣，宦歸甚貧，授徒自給。

鄭汝舟 字宜濟。令南海，立均平法，核豪右影射弊。邑有馬參政者，家僮拷殺園丁，汝舟置之法。馬憾汝舟，毀之，坐失職。霍文敏韜方侍郎吏部，知其縣政，爲之洗白。改應天府教授，稍遷國子博士，轉南工部郎，出爲湖廣僉事。建節荆西，按墨吏贓，築長堤以捍漢水。守顯陵貴人廖斌者，主皇莊人戶，侵奪齊民。與御史包節，索莊戶治之。斌誣奏節，汝舟枉死莊家，震驚陵寢，詔且下錦衣繫逮。錦衣使陸炳，楚人也，雅重汝舟，力爲解。已，轉江西參議，以風力聞。轉湖廣副使，卒於官，荆湖人哀之。

黃大廉 字潔甫。知長洲縣，定征徭，立三品格，輕重惟均。豪猾積逋乾沒者，一切置法。諸豪行金

諸要津，浸潤大廉。采風使者見大廉，不善蒞之，大廉即日棄印綬歸。後數年，他御史察大廉枉，疏起吉安府教授，稍遷國子助教，轉大理副，出僉二廣臬司。丁內艱，復，僉四川。久之轉貴州參議，攝藩臬兩司事。官暇，進諸生講義校文，羅施之人遂知學問。三殿大上起，詔採大木，大廉深入督採，縮費輯民，部使者前後論薦。人賀萬壽節，諸人賀藩臬皆赴分宜相修私謁，大廉朝房一見而已。坐久不調，上疏乞休，戒行之日，都御史高拱、御史鍾沂率官屬郊餞，各賦詩爲別。夷、漢父老出谷中，百里壺漿來送也。先時，武選郎馬平、張紳以論劾分宜相編戍貴陽，寓汨渤渤鄉。大廉臨發，馳往勞苦竟日，與泣別，而贈之金。其後，紳起爲都御史，鎮虔州，遣人訪大廉，則大廉歿久矣。紳臨章水投書而弔之，而恤其孤。

陳烜 字朝譽。令臨安。與晉江陳琛相善，琛贈文曰：「吾同年陳君朝譽之爲人也，見者皆悅，無忌毀者。蓋其接人禮謙，雖役使卑幼，亦與以和；或大拂其意，稍怒而已，終不峻責。以故，人皆喜其恭順，而予亦甚愛之，顧不知其介也。一日過予，論古今人物，凡在位有守者，概在許可之列，否則以爲不足數。予曰：『某也明，某也斷，某也勤事事，惜其酣於利耳，不爾，有用之才也。』朝譽艷然嘆曰：『廉吏，國之元氣也。斯人之耗元氣也已甚，吾恨不得借道輔擊蛇之笏，當衆摧之，以爲世戒。吾子何猶及其才？』予於是始知朝譽之介過人遠甚，不特恭順足悅而已。」

楊萬程 任潮州府學教授，溫和近人，容止慎重，課試諸生必而可否，潮人稱之。仕終台州知府。

康太和 字原中，一字順卿。選翰林庶吉士，歷南工部尚書。拙於官序，有長者稱。與閩縣林廷機同時，喜其爲人，齋書學林，以志慕焉。

陳策 字時偕。初爲九江推官，質誠曉暢，九江人愛之。人爲御史，與同邑鄭芸、吳人伊敏生並疏劾

嚴分宜。出按廣東，恪執憲度，嶺徼肅清。未代，嵩授意銓司，出守台州，尋視職。

林應節。任松江知府，裁革常例，清節著聞。仕兵備副使，軍糧皆手自給散，軍人德之。終參政。第以其不教不肖子，不滿於鄉論。

鄭鑒。字亦鼎。令青田，事人瞬息，物無遁情，臨治未幾，百贖遺裕。青田前令譚孔言有清節，父老相謂曰：「惟譚之貞，與鄭之能。」官終南戶部員外郎。能詩。

黃繼宗。字允肖。教諭樂安，擢令安仁。撫民捕盜，剛果有爲。居家孝友，兄弟五人更衣共被。捐俸葬族屬十余喪。起復來陽縣，未赴卒。

鄭應旂。嘉靖間貢士。博極群書，過目不遺，尤長賦頌。

許効賢。字子官。嘉靖中訓新昌。喜誦說仁義，論難經旨，辯註疏異同。諸生歲節餽遺，皆無所受。有終喪而以幣見者，歎曰：「吾聞禮尚賄賂，吾未之能行，而反有受於子乎？」署縣事，以贖金置學田若干畝。

張秉壺。字國鎮。嘉靖中以上海令高第，入爲戶科給事中。戊申，北虜人懷來，御史以失事聞，秉壺奉璽書往視，徧歷塞上，歸而圖上方略，世宗嘉納，下本兵，一如秉壺議。尋進吏科都給事中。庚戌，虜犯京師，時世宗齋居西內久，秉壺率同官上疏請還乾清視朝聽政，以風勵百官。世宗怒甚，然竟不責也。已，真人陶仲文以禱雨有應，<sup>(六)</sup>進封伯爵。秉壺復疏：「祖宗故事：非軍功不封。仲文勤無汗馬，<sup>(七)</sup>寵荷苴茅，勞臣曷勸，願收成命。」不報。歷太僕寺少卿，以忤分宜相罷。

林學道。字致之。從蔡文莊清、王文成守仁學，爲高第。嘉靖間授都昌訓導。丁祖母憂，服闋，補定

陶，陞無爲州學正。以疾乞致仕，年七十卒。三庠俱祀之學官。學道體不勝衣，言不出口，而向道甚勇，義利禮法甚嚴。家居正容危坐，非寢不脫巾履。爲諸生時，嘗游學吳中，有薦於僉事某者，抵門，聞其居憂宴會，曰：「非吾徒也。」遂去之。徐文貞階謫延平推官時，願見學道，學道不往。及其訓都昌，會文貞亦督學江西，喜曰：「吾今得見林致之矣。」文貞題學道像曰：「顏勤、閔孝、柴愚、參魯，若在聖門，依希參伍。」所著有《原教錄》。學者私謚曰貞修先生。

彭希賢 仕兵部郎中。奉親友諸弟，無私財，人稱篤行。

林芸 字吾重。少孤貧，父歿嶺南。芸稍長，奔奉父櫬以歸。而奉母至篤，以孝廉蒙獎者屢。嘉靖中登鄉薦，授歸安學諭，得安定遺矩。歿於官，諸生爲之服喪助殯。

李德用 字于乂。授廣東長樂縣，介不能養交，六年弗遷。乞致仕，不俟報，徑歸。殷分巡知德用清苦，檄縣贖百金爲贖，堅辭不受。卒於途。子多見，以吏部郎出爲浙江大參，尋以吏部謫。久之，擢守松江，復以南計部謫。臨行之日，松江人壘城門留之。終瓊州知府。

昌應會 令漢川，縣當漢江下流，土田歲被淹沒，應會極意拊循，輕緩徭賦。嘗有盜夜劫民舍，應會聞之，卽馳而逐盜，盜截其兩耳去。已，得盜，盡殺之。景王出封安陸，奏討莊田，闡及漢川。中璫暴橫倍索，應會故持之。中璫怒其強項，奏逮繫按察司獄者累月，漢川民千餘人遣護，哭白其罪，竟得直。改會宗縣，陞廉州同知，官終長史。

阮琳 字廷佩，宋阮駿裔。教諭金谿，爲諸生講明正學。擢令恩平，勤撫字，興學校，文學吏治，一時推獎。歸田，結景真會，誨誘後生。所著有《經書講義》、《性理儀禮律曆註解》、《圖書紀愚》諸集。

方大樂 字憲夔。初授順德縣，以戶部郎出爲潯州知府，愛民惜費，簡靜自持，潯人德之，祀名宦。

廖賓 字君用。令德興，居官持重，政多長者。

翁夢鯉 字希登。知金華縣，擢戶部主事，權濬墅關。倭夷蹂躪吳會，商旅少至，請蠲歲額，不從，時論譴之。事竣，轉餉之邊，以過家踰限，謫倅潮州。潮守缺，夢鯉攝守事。潮方中倭，率先士卒與戰鮑浦、南灣、三河，前後斬馘七百有奇，踉蹌沒溺者以千計，倭旋遁。而廣寇張璉、吳商、王學舉、陳器之等復乘間發，至有執其縣令而欲甘心焉者。夢鯉指授方略，或擒或散，竟以令歸。久之，移守開州，比行，復解程鄉之圍。人聞未幾，惠潮倭踵至，乃移夢鯉丞惠州，又攝潮州，與總兵俞大猷會勦於可塘，與參將湯克寬、王詔夾擊於九龍山，多所擒斬。會興寧、柘林間嘯聚甚衆，吳平、林道乾兩巨盜出沒海島中，南贛撫臣疏請自嶺以東特設海防僉事，以夢鯉爲之，於是平河源，服五峒，大星港、擔竿洲，所在奏捷，威名大震。勞悴殞官，粵人惜焉。

蕭桂 字懋建。祖儼，見韋布。桂，嘉靖間貢士，三仕爲博士。孝謹馴確，卓然儒宗。子奇勳，南戶部員外；奇熊，永昌同知；奇傑，湘潭知縣。

郭應聘 字君賓，宋孝子義重之後。父湍，教諭靈山，教授太平府，以古行自期，教士先倫本，終太平通判。應聘舉嘉靖進士，授戶部主事，典積、司庾、權稅、驗糧，皆以廉勁著稱。遷員外郎中，出守南寧，罷諸不便，與民更始。東粵寇起，發兵佐制府平之。兩人計，治行皆第一。擢四川按察副使，備兵威茂，兼攝松藩。西戎故索賞驕甚，諭以禍福，爲立賞格，却無名之求。諸蕃咸感激謝去。轉廣東布政參政，守嶺南。流賊犯增城，執辱前守吏，發兵擊破之，并破從化、龍門二原諸寇。轉廣西按察使，尋晉右布政使。

忠州酋黃賢相與思明酋爭地，應聘密授略兵憲，夜擒之。轉左使。巡撫都御史殷正茂獮古田寇，綜餉參畫，率仗應聘。以首功授上賞。亡何代殷任。奏以忠州四都地去土設流，詔建州，曰新寧。羅陽酋韋金彪大剽近邑，應聘復授略兵憲，問其父若弟購之，獲之萬菁中。府江峒獠數出寇江上，應聘集土、漢兵分水陸進討，悉殲之，設土司，并賦其地。復平懷遠諸叛獠，巢壘皆除。乘勝勦永福寇，獲首虜千級。加兵部侍郎，鎮撫如故。旋召人爲戶部侍郎，以憂歸。久之，十寨諸獠復熾，上念應聘熟粵事，以兵部侍郎起家，再撫西粵。諸獠聞之，各鳥獸散。因請留宿將假土酋韋應鰲世守之。三年晉右都御史，兼兵部侍郎，總制兩廣。會安南侵下雷歸順土酋界，諭以利害，安南上表謝罪，悉還所侵。先是，東山營卒亂，至是乞降。應聘戮其元兇，他釋不問。有二夷舶以通販至澳，守者將掩爲功，獻所俘三百人，鞠驗，無他，悉縱之。召爲南京副都御史，尋晉南兵部尚書。始應聘總督兩廣時，作旌廉、杜餽二功令頒諸將吏，將吏無敢操一幣詣轅門者。汰冗役，悉蠲津澳諸稅以利粵民，省其供億。迨還南京，籍餘餉萬五千有奇，上之。時丘太宰櫛問海中丞瑞曰：「郭中丞鎮而粵地，增毛幾尺矣！」中丞曰：「然哉！然哉！」以病乞骸，奉溫旨馳驛歸，抵家卒，年六十七。贈太子少保，謚襄靖。應聘平生謙抑不伐，踈踈若儒生，至於握機制勝，似有神授。所至，以清慎稱，而絕無躁進邀功之意。

方亮采 字廷贊。知宣平縣，約日課士，寒暑不輟。乘量田後，行扒平新法，歸額定里，手自編裁。每折獄，諭以人倫大義，聞者感悅。萬曆二年入覲，麾筦庫，羨餘弗納。至京卒。

林澄源 字仲清。以戶部郎出爲貴州參議。水西安酋亂，當事者議用兵，而澄源議撫。逾年，晉按察副使，備兵威清，卽用前所撫酋，授以方略，寇發輒誘擒之，滇黔間晏然。轉參政，鎮威清如故。鄒進士

元標以論劾江陵相戊羅施，道境上，澄源與盤桓彌日，人咸危之，澄源曰：「昔徐晦越鄉而別臨賀，后山出境而見子瞻，彼何人哉？」後以廣西按察使轉四川右布政，乞終養歸。

游日章 字學綱。令臨川，政尚寬厚，獨嚴豪右。流寇入境，畫策守禦，賊遁去。在臨五載，潔己惠民。擢刑部郎，出爲廉州知府。廉俗：婚姻以檳榔爲定，中有悔者。乃教之作聘書，依古禮。蒞任歲餘，卒。日章平生嗜學，所至，挾書自隨，下至稗官小說，靡不總貫條析。所著書百餘卷，藏於家。

宋効周 字肇斯。授海陽學諭，遵行憲綱，自持方謹。擢知容縣，復乞教職以便養，不允。旋丁內艱。服闋，補和平。和平，盜鄉，至則以德化之，皆感激，無復出剽掠。會制府徵需煩苛，効周移書規調，遂効論致仕。居家絕跡公門，教人以經書、小學爲常課，謂：「嚮往須擇中守正，造詣須積漸致精，工夫須循常務實。」所著有《控控子踴踴言》、《日格子正俗編》等書。學者稱斯齋先生。

吳一奇 字偉卿。嘉靖間知河源縣，時五峒初平，藍能之寇猶肆劫掠，一奇撫瘡痍，防寇警，政尚簡靜，多方節縮。以不能粉飾阿奉坐論劾，改教，父老子弟三百餘人詣巡按哭留。巡按悔曰：「吾據監司署考耳。令得民如是耶！是吾過也。」詣監司，監司曰：「不獲乎上，民不可得而治，若等未聞耶？歸善縣門外一堆土，何足有無，吳令此類也。」時歸善彭令亦以失上官意，獲罪，百姓爲立生祠於縣門之右，故監司云云。

王宜 字廷義。仕禮部員外。居鄉安靜，足跡不及公門。

林大經 字世典。隆慶初舉人，授揭陽教諭。視邑篆，多善政。未幾擢令彭縣，會揭令以艱去，戎事方殷，揭父老請大經留治揭，當道疏請，遂以揭易彭。時海賊林道乾、林鳳勢甚猖獗，大經繕甲、增堡，賊



不敢跡其境。藍田山寇劉興策負險肆掠，復推誠招諭，皆束身歸，遂并賦其地。制府上功，有金帛之賚。擢南廷評，轉左寺正。出守石阡，單車赴任，罷諸民所不便，剖決無留。歷宦十七載，先廬故田悉讓諸弟，自處徒四壁，短袍蔬食，怡如也。

程拱宸 字仲星。隆慶初授鎮江府推官，擢戶部主事，稍遷員外郎中。萬曆八年，出爲江西副使，備兵徽、寧六郡地江、礦二防，嚴爲約束。又城所屬之未城者，凡數邑。擢參政，已，按察雲南，布政廣西。秩滿，晉應天府尹、南通政使。南都訟牒繇通政達法司，拱宸如例具訊，事大者始移法司，餘悉罷遣之，於是訟以日簡。法司以贖緩公費無所出，譴不能平，南臺因疏列其事，方得旨量移，而拱宸歸矣。

陳瑛 字廷玉，宋忠肅文龍之裔。初授南戶部主事，權舟淮陽，多所釐革。當事者以諳河渠薦改工部虞衡主事，督造清江漕艘，悉以舊版佐築河，又哀新版之羨佐成高家堰河漕，諸大臣才之。以塞鄭口功，遷員外郎，旋詔以都水郎中董中河事，因開梁山新河，經羊山至古洪十有二里。又開景山故河，以助梁流，所費水衡金錢甚省。陞俸一級。滿九載，復以資應月河成，擢山東左參政，督漕儲。尋擢廣東按察使，河復決睢、邳間，召還爲徐、淮兵河道，與潘司空季馴按行河。凡築新舊大堤及橫圍月堤爲丈十有三萬六千有奇，濬故所開境山之河，南北爲丈二百二十有六，塞決口三，砌滾水壩四，丈壩二十有二。擢右使。以外艱歸，卒。瑛孝友坦易，仕績皆在河上，河壩之民祀之。

宋萬葉 字啓紹。父正，見韋布。萬葉嗣爲伯父後，事嗣母盡孝。壬戌之變，嗣母陷倭，將刃之，萬葉傍徨乞以身代，倭釋焉。舉進士，爲楚黃司理。父歿奔歸，或謂非例，泣曰：「天下有無父之國哉？」楚撫按特爲具題。今爲人後者，得給假治所生喪，自萬葉始也。服闋，補漢陽。江陵相賜假歸楚，道出漢

江，獨以他故不往迎謁，失江陵意。滿六載，始遷廷尉評。復五載，出守南安，寸絲、尺帛不取之民。擢雲南按察副使，值藩臬乏人，兼攝數道，夷民安堵。子光台，見韋布。

林東興 萬曆初以貢任潯陽訓導，博學醇行。有《荔庭詩稿》十二卷。

吳獻台 仕紹興府推官，人爲吏部，陞藩臬諸使，而皆在浙江。最後以江西右布政陞順天府尹終官。爲人恂篤，臨事愷慎，以厚德名鄉。

林道楠 字廷任。起家進賢令。強直端謹，蒿目爲民，歲饑發粟，乘小艇徧歷窮鄉，計口賑給，夜則以舟就茭，不人民舍。會丈田，躬自履畝，分則定賦，雖貴勢不少徇。召爲御史，巡按陝西。陝故行邊，食皿器物皆用銀，道楠詰之，從人曰：「例也，兼防醜。」道楠命撤之，曰：「吾以恩信投人，何防之有？」侍郎某以其所親郡守爲囑，守墨甚，彈罷之。在臺十八年，漠然不徙居，恒恭謹罄折，揖賤暨額地，至遇事無避就，忼慨論列，然大歸會情傳事當可否而止。持斧所至，風裁凜然，未嘗受屬吏一金。遷太僕寺少卿，卒。卒未一年，家貧甚，二子單步走食。進賢人特祀之。

沈夢熊 字仲武。萬曆戊戌侯官教諭，惇惇以躬行訓士，捐貲修祭器，修學舍，毋令屠沽寢處其中以雜馬隊。遷德清令。

陳泰交 萬曆中知靈璧，沉毅明敏，執法不飢。始至，革包收催頭，令花戶親自投櫃，不及一錢者許納錢。革伏水河夫、馬戶、外幫與里甲各色科擾，歲省民費無算。行條鞭平一賦，窮民盡蘇，復業者數千戶。力剪巨蠹，一境肅清。

盧廷選 好讀書。仕南昌知府，大修郡志，而留心本朝先輩之文章，收錄存之。仕至江西參議。

周如磐 字□□。(八)舉進士，選翰林庶吉士。天啓末拜相，卒。如磐一片忠誠，坦夷無物，士大夫皆稱之。不久卒官，鄉邦無色。

黃起龍 好讀書，家中藏書以萬軸。仕南吏科給事中，薦進知名之士不啻口出，坐累謫官，竟不起。

〔校記〕

〔一〕〔三〕「自」字，各本原脫，據本書體例補。

〔二〕「饒塘」，《明史》本傳作「饒塘」。

〔四〕「大」字，各本原脫，據本書體例補。

〔五〕「願爲僕死」，各本原作「願爲侯死」，據文義改。

〔六〕〔七〕「陶仲文」，各本原作「陶文仲」，據《明史·陶仲文傳》改。

〔八〕「字」下，各本原闕二字。

閩書卷之一百十三

英舊志 縉紳

興化府 仙游縣「」

唐進士

乾寧元年甲寅 陳乘

天祐二年乙丑 楊在堯

三年丙寅 陳光義

薦辟、人材賢者雜見列傳中。

有傳

陳乘 鄭良士 楊在堯 陳郁

陳乘 仕秘書郎。退居里中，與王延彬、鄭良士、徐寅以詩唱和。

鄭良士 舊名昌士，字君夢。博學善屬文。唐昭宗景福二年，獻詩五百篇，授國子四門博士。累遷康、恩二州刺史兼御史中丞。天復元年，棄官歸隱。乾化五年，赴王審知辟命，轉左散騎常侍。沉厚寡

言，審知稱其長者。有《白巖文集》、詩集《中壘集》。子元弼，仕閩，爲禮部尚書，元恭，秘書省校書郎，元素，別駕，元龜，第宋進士，官至司馬，元禮，推官，元振，員外郎，元瑜，秘書郎，元忠，正字。兄弟俱博學能文，時號鄭家八虎。元弼，行事見《君長志》。

楊在堯 官右補闕。有文集。

陳郁 篤學博覽。仕閩主職，爲諫議大夫。每休沐，鎖門焚香誦經，故得免於禍。

### 宋科第

太平興國二年丁丑 鄭元龜唐良士子也。

景德二年乙巳 葉賓

大中祥符元年戊申 蔣俞 陳拱

大聖二年甲子 廖鈞

五年丁卯 蔡袞 張式

八年庚午 蔡襄

景祐元年甲戌 劉拯 張平叔 楊暈 蔡準 陳誥一作浩。 葉傳寶子。 蔡高襄弟。

諸科 葉芳

寶元元年戊寅 許積

諸科 留萬

慶曆二年壬午 吳乘 吳秉乘弟。 郭琪 阮遵 丘子雲 許章積侄。 許程積兄。

六年丁未 許穎叔。許懋顯侄。 余象

諸科 陳輯

皇祐元年己丑 丘子諒 吳演 鄭昇 陳公言 陳淳 蔡立 陳闡一名方。

五年癸巳 蔡頊 李昂

諸科 郭尹琪父。丘從

嘉祐二年丁酉諸科 鄭少連

六年辛丑 許噩懋弟。

八年癸卯 章啓宗 鄭前少連從弟。

治平二年乙巳 黃宁

四年丁未 朱紱 陳瑄一名無逸。諱子。 陳大卞公言子。 傅楫 葉牧實從孫。

熙寧三年庚戌 蔡京準子。 蔡卞京子。 葉阜實從孫。 鄭汝賢少連從侄。

六年癸丑 陳次升 鄭習 許異積子。 王回 陳開 余授象侄。

九年丙辰 陳覺民 林豫 許異積子。

諸科 鄭君陳前從弟。 陳詔

元豐二年己未 朱真紱從子。 蔡觀

諸科 蔡昇

五年壬戌 許堯夫異子。 許安雅懋侄孫。

特奏名 蔡雍

八年乙丑 許敦仁 葉確賓從子。

特奏名 阮之才遵子。 朱縉實父。 葉銳芳子。

元祐三年戊辰特奏名 洪延

六年辛未 陳安仁大子。 洪中 傅權楫從侄。 許賁異兄。 陳與 傅希龍權從弟。 傅求楫從子。

特奏名 陳諮

紹聖元年甲戌 陳顯仁大子。 許堯輔穎曾孫。 傅友諒楫子。 黃顯 傅巖楫從子。

特奏名 葉伯元確父。 張弼

四年丁丑 林顏 陳魯詹

特奏名 葉愍

元符三年庚辰 陳曄開子。 鄭與權汝賢侄。 傅義夫楫子。 郭安行 陳驥 黃沔顯侄。 陳高聞

子。 王庠初名履。 余復

特奏名 葉寶臣傅子。 丘向

崇寧二年癸未 蔡佃襄孫。

三年甲申恩賜出身 蔡攸京子。

五年丙戌 林煥 林宋卿

特奏名 王震

大觀元年丁亥賜上舍及第 陳璘覺民子。 葉觀芳子。

三年己丑 陳性仁大卞子。 蔡仲襄孫。 蔡楠襄曾孫。 蔡偲京子。 陳大和輯孫。 洪範延侄。

特奏名 鄭範汝賢孫。 傅耘

政和二年壬辰 許升安雅子。 張杞 陳宋輔覺民子。 陳可大

特奏名 陳寵初名次龍。 陳次顏龍弟。 陳次宗

五年乙未 蔡樞襄孫。 蔡仙襄孫。 蔡仍卞子。 陳時彥 蔡衍

特奏名 許宗成穎曾孫。

重和元年戊戌 陳駢驥弟。 傅佇梅族孫。

特奏名 陳子臨

宣和三年辛丑 許彥正穎曾孫。 傅知柔希龍從子。 許振異子。

六年甲辰 蔡榕 蘇欽

特奏名 鄭紀 傅行己巖子。 許堯臣巽子。 陳子碩方子。 陳子翼子碩弟。

建炎二年戊申 陳辛 吳自得

特奏名 丘山

准赦文推恩 葉繼顏寶臣孫。 陳南夫 陳昂

紹興二年壬子 葉頤寶孫。 林宋臣宋卿弟。 林宋攷宋臣弟。

特奏名 傅共權子。



准赦文推恩 郭延年

五年乙卯特奏名 葉專

八年戊午特奏名 余璫

十二年壬戌 郭曉琪孫 陳騶驥弟

特奏名 傅若 廖鵬飛 陳君翼 陳大安 陳明卓

十五年乙丑特奏名 葉維益維顏弟

十八年戊辰 陳豐驥子 蔡琨

特奏名 陳景 傅知新知柔弟

二十一年辛未 蔣離 林一鶚正侄 葉叔僑傳玄孫

特奏名 戴廷珪 陳邦光大卞侄孫 許可久彦正孫

二十四年甲戌 傅牧慶孫 許知新堯夫孫

特奏名 丘侶 許士謙 陳策

二十七年丁丑 陳施明 蔡頤樞子

三十年庚辰 傅淇佇子 陳大亨禧子 留洪

特奏名 陳震 陳宗伯 傅從 林緯 傅靖 陳大知大和弟 韓任 吳自牧 吳高 鄭齊夷

陳利寶 陳車

隆興元年癸未 陳謙豐子 蔡珏理兄 許亞環振子 鄭文炳汝賈曾孫 留澄洪弟

特奏名 許惟高彥正侄孫。 劉嘉謀 黃宸 傅樞 陳柳 郭邦光

乾道二年丙戌 蔡戡仲孫。 丘商隱向孫。 丘微之山侄。

特奏名 陳筠

四年戊子特賜出身 林彖顏子。

五年己丑 許巽

八年壬辰 朱泳 林璘緯侄。

特奏名 廖裕

准赦文推恩 余鄒樂子。 吳昭忠 林榕 嚴徽

淳熙二年乙未 葉立功確曾孫。 林肅

特奏名 洪居寔範子。 丘綱微之從兄。

五年戊戌 余崇龜復從子。 余元一崇龜兄。

特奏名 蔡棠

八年辛丑 傅誠牧子。 傅丙楫曾孫。

特奏名 傅藻

十一年甲辰 蔡師言順子。 蔡諒樞孫。 傅誠誠弟。 傅公稜楫曾孫，丙弟。 蘇權欽子。 葉立志立功弟。

特奏名 蔡諶樞孫。 陳元熾 陳奎 留俊求 陳度 許驥可久弟。

十四年丁未 傅益 鄭千之 傅大聲誠從子。

恩賜出身 葉翥

紹熙元年庚戌 蔡點格從子。 陳夢烈夢卿從弟。 許興裔知新子。 黃南一沔孫。 王鑑震曾孫。

特奏名 陳廣度子。 鄭衍文炳子。 蔡頤點兄。 葉樞維益子。 林文寶緯從子。

四年癸丑 傅熈

特奏名 葉季友頤侄。 蔡碩襄從侄孫。

慶元二年丙辰 蔡詵襄五世孫。 蔡敷言頤子。 陳千齡

特奏名 李夢庚昂侄孫。 洪叔度中侄孫。 黃民望 陳如晦利賓侄。 陳公翔 廖復鈞來孫。

五年己未特奏名 郭淵曉從子。 李戊 林如璧豫孫。 留文瑞洪從弟。

嘉泰二年壬戌 鄭勳文炳從孫。 余日華崇龜子。

應童子科 蘇方子 郭懿尹叔。 傅做翁 傅廣

開禧元年乙丑 陳拱之龍曾孫。 郭子力延年曾孫。 林復之繹侄孫。 蔡裔誠從弟。 郭連子力叔。 林

宜可復之從弟。 陳薦筠侄。

特奏名 傅汝霖知新子。 陳林明卓孫。 陳暹

嘉定元年戊辰 紀用 許彥爲巽子。 陳珙林侄。

特奏名 林仲梁復之兄。 林洙一鶚侄。 傅大任大聲弟。

四年辛未 許宗旦穎玄孫。 留三益澄孫。 林嶸復之弟。

特奏名 林鴻洙弟。 余孝伯洪從弟。 留均洪孫。

七年甲戌 葉槃顯侄孫。 李夢龍戊子。 鄭可復昇侄孫。 林日選如璧侄。

特奏名 陳立中 吳必聞昭忠侄孫。 王斯觀。

十年丁丑 陳作謀大卞玄孫。 王邁鑑子。 蔣有秋離孫。 林有之宋卿孫。 蔡廉襄孫。

射中推恩 鄭豈卿 黃一之 林大有肅叔。

十三年庚辰 蔡淳甫謙子。 林礪 趙慙夫 傅燁公稜子。

特奏名 鄭夢賢少連孫。 丘惟清 林周 葉煥樞子。 傅矩大聲弟。

十六年癸未 許夢庚宗旦子。 鄭鼎新 陳獬。

特奏名 鄭璟夢賢弟。 朱首諒泳侄。 鄭康時勳弟。

推恩 陳天叙公言玄孫。 林日嚴日選兄。 陳蒙徹 林鼎。

寶慶二年丙戌 丘獻 李夢能戊侄。 鄭列少連孫。 洪天賦 蘇國蘭欽曾孫。 林從周礪從孫。 陳

立伯龍曾孫。

特奏名 陳作又顯仁曾孫。 張必強 吳良弼自得侄孫。

紹定二年己丑 陳夢凱大卞玄孫。 洪葉居寔孫。 林志之蟠弟。

特奏名 蔡宗傳仁輔子。 陳冲飛可大曾侄孫。 朱穎之泳侄。 鄭谷少連孫。 林立軫蟠從兄。 傅棻楫

孫。

五年壬辰 蔡儀甫佃四世孫。 葉大有顯侄孫。 林灝從周弟。

特奏名 朱起發穎之弟。 李夢疆戊子。 喻峙 詹全 陳中實顯仁曾孫。

端平二年乙未 謝汝翊 陳堯道冲飛侄。 陳湯 黃君任 謝升賢

特奏名 尤彬 傅亮之仔孫。

嘉熙二年戊戌 鄭珪 林龜符

淳祐元年辛丑 林汝沆豫玄孫。

特奏名 黃師錫沔孫。

四年甲辰 余君節崇龜從子。

七年丁未 蔡儀國襄來孫。 章夢旂

特奏名 陳之亮

十年庚戌 陳塤伯次升五世孫。

特奏名 林士元灝弟。 蔡德言襄六世孫。 傅奕之大舜侄。

寶祐元年癸丑特奏名 黃龍翊

四年丙辰 傅一新求侄孫。 王里邁從侄。

特奏名 陳泰之 留夢森

推恩 林邁 陳鼎新

開慶元年己未 陳登鳳人下來孫。

景定三年壬戌 傅炎發大升侄。

咸淳元年乙丑 傅夢澄

十年甲戌 傅登炳 傅虎臣 傅雷龍

特奏名 傅桂發 炎發弟 傅巖起

景炎中推恩 傅翹叔 傅騰輝

薦辟、恩蔭賢者雜見列傳中。

有傳

葉賓 孫顯。顯子元泳，顯孫棠。賓從子確。

確曾孫立志。顯從曾孫大有。

蔡襄弟高，孫傳、佃、伸。傳子櫟、樞、懋。高

孫洗。茅知至 許稹子巽，侄章，從弟懋。

郭琪 侄孫曉，從玄孫子力。

余象 侄授。鄭昇 孫可復。陳闡 從子

高。鄭少連 朱紱子宗，孫元飛，侄真，從孫泳。泳侄首諒。陳大卞子顯仁。

傅楫 子諒友，謙受，從侄樞，楫諸孫忞。

忞子汶、淇。淇從子誠。誠從弟誠，從子大聲。樞從弟希龍。龍從子知柔。

陳次升 王回 陳開 陳覺民 林豫子師

說、師舜。黃顯 從子沔。

張弼 陳驥子豐。豐子謙、諒。林宋卿 孫有之。陳太和 林正子一鳴。一鳴子澧。

正侄一鸞。鸞曾孫雷龍。

蘇洗子權。陳可大 侄冲飛。飛子堯道。陳吉老 子希造、希與。造子光祖。光祖子沂。鄭

知微 陳大亨 蔣雛子沂，(二)從子有秋。

留洪 丘免 孫微之，(三)從孫杞。林彖 林肅 余元一 弟崇龜。

龜子日華。

陳夢烈 鄭勳 陳琪 王邁 林礪 鄭鼎新 丘獻 洪天賦 從弟處厚。謝升賢 尤彬

陳之亮

葉賓 字虞卿。歷海陽簿、桂陽令、廣州節度推官、建州節度掌書記。以屯田都官二曹郎出知泉州，

通判南劍州事。劍當閩衝，水行持販茶、鹽禁物，上下山出銅、銀，冶場凡三十餘所。聚四方游黠，輕剽劫

擊殺，黨與牽連事日下，吏懼滯繫被罪，率不暇精覈。賓專意詰決，民盡得情，獄無留焉。子傳，泉州司戶參軍，所至修職，既去，人輒思之。孫顥、顥。顥，見弁翰。從子確。

顥 字子昂。簿南海，徙知貴溪、上虞二縣。定租稅、徭役，具便民有法則。遷司農寺丞。賀正中薦顥端方靜退，遂得召見。顥入對剴切，高宗嘉納。除將作監簿，出知處州。青田令獻羨錢百萬，顥詰令何得羨耶？命以代本縣民戶輸納夏租。湯思退之兄家奴犯禁，一切繩以法。移守常州。金人犯邊，高宗視師建康，道常，賜對舟次，言：「金主亮已死，其部將統人馬二三十萬北歸，帖無異變，是虜將亦未可輕。今日爭言進取，在陛下審之。」上曰：「卿言極是。」始，常之逋緡錢四十萬，前守坐免。顥至郡，無旬月儲，不歲，餘羨緡錢二十萬。召爲尚書郎，除右司。孝宗卽位，詔求直言，時秀王伯圭爲台州，顥疏言：「陛下以州郡重寄付手足至親，得無見利一人，害一方人？」稱其直。除吏部侍郎，復權尚書，言：「典選一塗，衣冠清濁之所從出，而吏胥得操其柄，是使之人銓曹與吏爲市，出銓曹與民爲市，不可思所以革之？」乃與郎官編七司條例爲一書。孝宗嘉之，令鐫木頒示。乾道初，召對便殿，因問：「卿當官何先？」對曰：「真宗皇帝所製文臣七條盡之矣。清廉，臣分。公忠，實要。」孝宗曰：「卿無忘此。」除端明殿學士，拜參知政事兼同知樞密院事。武臣梁俊彥請稅沙田、蘆場，孝宗問顥，顥對曰：「沙田，江濱地也，生沒無恒。蘆場，則臣未之詳。但辛巳軍興，蘆場田租並復。今沙田不勝其擾。」孝宗曰：「誠如卿言。」顥至中書召俊彥，責之曰：「汝言利求進，萬一爲國生事，死不足贖。」是日詔沙田、蘆場並罷。戶部侍郎林安宅，請兩淮行鐵錢，顥力持不可。安宅不能平，及擢諫議，論顥子受宣州富人周良臣錢百萬，得監鎮江大軍倉。御史王伯庠亦論之。顥乞下吏辯明，乃以資政殿學士提舉洞霄宮，下臨安府置對，無實獄。孝宗免安宅、伯

庠所居官，安宅仍貶筠州。召頤人，勞曰：「卿清益明。」除知樞密院事，未拜，進尚書左僕射兼樞密使。引薦汪應辰、王十朋、陳良翰、周操、陳之茂、芮晔、林光朝等，可備執政、侍從、臺諫、給舍之選。時方召見鄭聞啓，擬除右史，而外已傳播，命未下，陳俊卿以語頤。頤問所從來，俊卿云：「聞之洪邁，邁聞之龍大淵。」頤乃於上前極論大淵、曾覲竊弄威福。孝宗曰：「朕不憚去此輩。後有事人此者，卿極言之。」是日大淵、覲俱被斥。孝宗以國用未裕，詔宰相兼國用使參政同知國用事。頤言：「今日費財，養兵爲甚，雖曰汰之，而旋招之。欲足國用，當嚴於汰而緩於招。若欲生財，祇費民爾。」孝宗嘆爲至言。三年，冬至郊，雷雨作，頤引漢故事，上印綬，除左正奉大夫，提舉江州太平興國宮，卽日出關。抵莆，無疾卒，年六十八。以觀文殿學士致仕。遺表聞，孝宗追悼，贈特進，累贈少師，謚正簡。頤簡易清介，與物若無忤，至處大事，毅不可奪。友人高登上書譏切時相，召捕甚急，頤與同邸，撻令逸去，登曰：「不累君乎？」頤曰：「以獲罪所願也。」卽爲具舟，舟移乃去。自初任至宰相，服食、僮妾、田宅不改其舊。子元泳。孫棠。從曾孫大有。

元泳 繼頤復令上虞。助田養士，人稱濟美。

棠 字次魏。以頤澤授承務郎。光宗中累遷知邵武軍。陛辭，首奏乞法孝宗。光宗問法孝宗何先，棠奏：「孝宗二十八年之治，不出仁、孝、勤、儉四字。」光宗和顏納之。遷太府丞，丐外，知台州。紹定元年，大風雨，城幾圯水，極力防禦。尋擢浙東提舉。明年台城竟爲水所陷，朝廷以棠得台民心，亟發常平錢、米，遣措置賑恤。棠請於朝，乞撥紹興府官會五萬貫、米二萬石給濟，仍乞放免本州茶、鹽、酒、醋雜稅一年。續有旨，令棠兼攝州事，仍撥降安邊所官會二十萬貫，儲倉米七萬石以助不給。棠分遣僚屬，選委



寓公，隨鄉煮粥以活饑，優用資遺，撫及流移。於是重築城堤，堅牢高厚，越歲再水莫能衝突。朝廷嘉之，增崇二秩。會山陰謀帥，廟堂將有啓擬，上曰：「葉棠鎮靜，誰可易之？」晉直徽猷閣，知紹興府，充浙東安撫使。屢上祠請，改知太平州寧國府，再予祠。召爲將作監，命下而沒。子彥炳，歷司農寺丞，知邵武軍。

確 元豐進士。蔡京當國，確與朱宗皆京內姻，未嘗一詣其門。後欲除確蘇州守，令人約一見，然後上請。確愀然掛冠去。任終河北提舉。曾孫立志。

立志 調南安尉。縣有死獄，檄往驗視，其屍無首，立志焚香告天，夜榻屍側，夢神人語之首處，殺者某人，遁於某所。果皆得之。改知上饒，有廉聲。官至惠州通判。子衮，泉州通判，傳，晉江尉，贈少師。

大有 字謙夫。授英德府教授，秩滿，除國子錄。輪對，理宗首以國計諸務爲問。大有歷歷指陳，爲理宗所知。累遷秘書郎，出通判徽州。召赴闕，除正言兼侍讀，力辭。理宗諭：「朕自知卿。擢卿，朕意也。」既拜命，疏論儲嗣、紀綱、人材爲國家命脉，反覆數百言。又乞救民饑，寬民力。遷左司諫，奏抑內降，保直臣，罷外戚授官。遷殿中侍御史，奏惜名器、惜民命、惜財力、惜天時四事。尋監省試兼知舉，遷侍御史。獻備邊三策。薦浙東憲臣蔡抗可大任。遷右諫議大夫，辭。除刑部尚書，力以母病辭。以寶章閣知温州，辭。理宗固留之，賜之累劄，有「性質醇雅，議論和平，待卿有加，念舊難釋」之諭。大有不獲已，奉母之官。未幾，母死，大有亦沒。遺表聞，理宗惜之。大有出入館閣言路凡十餘年，前後敷聞百餘奏，皆上論所歸。但其排擊程公、許黃、師雍、牟子才諸人，議者不以爲然。

蔡襄 字君謨。年十八以農家子舉進士，爲開封第一，名動京師。授漳州軍事判官、西京留守推官，改著作佐郎、館閣校勘。范仲淹以言事忤丞相呂夷簡，落職，知饒州。集賢校理余靖人諫，落職，知筠州。酒稅館閣校理尹洙請與仲淹同貶，斥監處州酒稅。而司諫高若訥知上貴幸丞相，不敢言，校理歐陽修移書責之，若訥怒，上歐陽修所移書，修亦坐貶，令夷陵。襄於此時作《四賢一不肖詩》，以識其事。詩成，都人士爭相傳寫。契丹使者至，買以張於幽州之館，一時稱重。慶曆初，天下無事，士大夫寬弛久安，仁宗慨然思正百度以修太平，排群議，進退二三大臣，親擢靖、修及王素三人爲諫官，使拾遺補闕。襄又以詩賀，三人亦競薦襄於仁宗。仁宗亦命襄知諫院兼修起居注，遇之甚寵。襄值事，感激無所迴避，權倖畏斂不敢撓干。而仁宗益與大臣圖議，屢下詔書勸農桑，興學校，革弊修廢，天下悚然，知其銳於求治。於此之時，言事之臣無日不進，襄補益尤多。四年，以右正言直史館，出知福州，便親。遂爲福建路轉運使，復古五塘以溉民田，奏減五代時丁口稅之半。丁父憂，服除，判三司鹽鐵勾院，復修起居注。御史唐介直言忤旨，襄獨明其忠。既，改春州別駕，襄又上疏：「此死謫也。」介得改英州，亦遂復召用矣。皇祐四年，遷起居舍人，知制誥兼判注內銓。御史呂景初、吳中復、馬遵坐論梁丞相適罷臺職，除他官，襄封還辭頭，不草制。其後屢有除授非當者，必皆封還，而仁宗遇襄益厚。至和元年，遷龍圖閣直學士知開封府。三年，以樞密直學士知福州。未幾，復知泉州。襄在福州，禮士之賢者，以勸學興善而變民之故俗，除所甚害。往時閩人專用賦應科舉，襄得鄉先生周希孟，以經術傳授學者，爲親至學舍執經講問。延見處士陳烈，尊以師禮。而陳襄、鄭穆其德行著稱，襄皆折節下之，以風教生徒。閩俗重凶事，奉浮屠，會賓客用盡力豐侈爲孝，否則深自愧恨，爲鄉里羞，姦民、游手、無賴子幸而貪飲食、利錢財，來者無限極，往

往至有數千百人。蓋有親亡，秘不舉哭，必破產辦具而後敢發喪。有力之家，乘其急而賤買其田；貧者立券舉債，終身困不能償。襄曰：「弊有大此者邪？」卽下令禁止。至於巫覡主病，蠱毒殺人之類，皆漸斷絕之。然後擇民之聰明者，教以醫藥，使治疾病；子弟有不率者，條其事作五戒諭教之。其在泉州，距州二十里萬安渡，絕海而濟，立石梁之長三百六十丈，種蠟於礎，以固梁基。又植松七百里，蔭庇涂行，閩人大便。既去，相率詣州，請爲立德政碑。吏以法不許，卽退而疏襄善政，私刻於石。嘉祐五年，召拜翰林院學士，權三司使。三司、開封、世稱省府，爲難治，襄居之，皆有能名，談笑無留事。破姦發隱，吏不能欺。至商榷財利，則較天下盈虛出人，量力制用，必使下完而上給。簿書纖悉，紀綱條目，久之皆有法程。仁宗崩，英宗卽位，數大賞賚，及作永昭陵，皆猝辦於縣官經費之外。襄應煩愈閒暇，遂拜三司使。居二歲，以母老求知杭州，卽拜端明殿學士。卒年五十有六。襄文章清道粹美。工於書畫，頗自惜，不妄爲人書，而仁宗尤愛稱之，詔書御製元舅隴西王碑。其後命學士撰溫成皇后碑文，又勅襄書，則辭不肯，曰：「待詔職也。」重於朋友，聞其喪，不御酒肉，爲位哭，盡哀乃止。累官禮部侍郎。既卒，翰林學士王珪等十餘人列言襄賢，其亡可惜，特贈吏部侍郎。襄三子，勻、旬皆早世。朝廷錄季子旻及旬子傳，弟子均。優賻而厚葬之。乾道中，孫伸，請於朝，賜謚忠惠。弟高。

高 字君山。第進士，調長溪尉。有媼二子漁海而亡，媼指某氏爲仇，告縣捕之，縣吏殊難。高察媼有冤色，陰跡其仇家，與媼期曰：「吾爲媼宿海上十日，當得之。」既七日，二屍浮出，驗之皆殺也，遂坐仇家。民有夫婦偕出而盜殺其守舍子者，高環石里民熟視之，指一人曰：「汝矣。」亦伏法。遷太康縣主簿，府尹吳遵路素剛嚴，高年少位卑，能不懾屈，遵路獨喜之。以疾卒官。高嘗語歐陽修曰：「天子以六科策

天下士，而學者以記問應對爲事，非古取士意。」乃晝夜苦學，及其卒也，襄發高遺稿，得十數萬言，皆當世之務。踰年，天子與大臣講天下利害爲條目，有所改更，於高稿得五六焉。

傳 字永翁。守將作監簿。學古務實，不游場屋。歷通判南京留守司。年四十三卽上章乞致仕。子櫛、樞、懋。

佃 襄季子旻之子。蔡京與襄同族而晚出，佃素不附之。政和初，佃廷試唱名居首，京侍殿上，以族孫引嫌，遂降第二。會星異，上疏論宰相非人，宜舉漢汲黯故事以應天變。責監温州稅，官至朝奉郎。

伸 佃弟也。政和進士，通判徐、楚、饒、真四州。在徐州時，禁卒謀亂，約夜半舉火，伸聞，部分密備，仍戒，故緩更籌以誤之。及火舉，則黎明矣，悉捕擒卒。在真州日，火延燒千餘家，民露處雪中，老幼呼號盈道，伸闢寺宇，官廨分處火民，且發常平廩賑給，先賑後聞。未幾，改知徐、德、安、和、四州。初，伸與秦檜同舍又同年，伸以趙鼎黨丐祠者累。檜一日訪伸，有念舊語，伸不應。出爲浙東帥司參謀官。建炎、紹興間，盜賊蜂起，賊方旣降復叛，伸單騎至其麾下，說以禍福。方素聞伸威望，卽出就招。官至左中大夫，卒，贈特進。子洸。

櫛 字子強。歷官直秘閣、知泉州。泉人稱其有乃祖風烈。官至朝奉大夫。

樞 字子應。歷官西京提舉學司，主管文字。御史常安民在黨籍，人多疏之，樞獨事以師禮。提舉湖南學事，潭州教授張所白事，樞問所時事如此，度今誰可任者。所舉劉安世。樞瞿然曰：「自崇觀以來，禁錮元祐之學，子乃敢伸公論若此耶？」卽薦所，所繇此知名。爲殿中侍御史，年四十五，慨然嘆曰：「先公掛冠之年，吾已過之。」遂乞致仕。

懋 字子堅。靖康中以父任會昌尉。視事數月，贛賊犯境，奮然曰：「吾職也。」領所部及士兵禦之，力戰遇害。贈承事郎，官其子籲。後贈朝散大夫。懋少好學問，時出秀句，若「竹靜深留月，花多不辨香」；「曙分林影外，春盡雨聲中」，皆世所膾炙。又工字畫，論者謂其得君謨用筆之妙。

洸 字子平。徙晉州。仕至戶部尚書，孝宗謂侍臣曰：「朕以版曹得人爲喜。」除徽猷閣學士，知寧國府。奉祠卒。洸事親至孝，所得俸以賑貧乏親戚。去朝之日，囊無餘貲，至售所賜銀鞍轡治行。

茅知至 操尚介潔，不求聞達，墳典博通，倡道淑人。景祐中，漕使龐籍疏薦於朝，補州學教授。一作補國子助教。有《周詩義》二十卷、《至性書》三卷。

許稹 歷通判德州。仁宗朝，舉天下廉吏凡四十九人，稹與焉。除監察御史，未造朝而卒。子巽。侄章。從弟懋。

巽 字少陽。知歸善縣。尉有捕民爲盜者，驗問非實，不爲理。尉囊橐上下，必欲成賞，太守人其說，廷詰巽，巽曰：「行法在太守，執法屬有司。」卒不能強。調提點坑冶司，主管文字。泉使宋之端欲薦巽，以書令條上泉幕利害，巽曰：「某書生，安敢言利之？」端敬嘆服。累遷秘書郎、知滁州。有以金餽吏者，吏不敢受，曰：「秘書知之，措身何所？」改知漳州，召赴行在，道卒。巽嘗謂居官之要：「『清』字作根。鶉衣穀食，其生自尊。」人號耐貧翁。

章 字潛道。歷知建州，除屯田郎中。政不苟細，所在有聲。官終朝奉郎。

懋 字敏修。元豐中爲兩浙轉運副使。衢民坐私釀繫獄，久不決，懋至，爲明其冤，民競詣佛寺飯僧，爲懋祝壽。遷左司郎中，除直秘閣，知福州。

郭琪 歷秘書省校書郎、兵部郎中。有貴戚曾性者，奪民田，累政不敢決。琪判歸民，竟被陷死。蔡襄以詩哭之，有「如山判筆心常壯，爲國忠魂勢莫驚」之語。侄孫嶢。從玄孫子力。

嶢 初調廣州司戶，禦賊馬上，轉戰死之。帥奏於朝，官其一子。

子力 字景行。授肇慶府教授，時郡守事掎斂，子力以言箴之。守感悟，且薦於朝，調惠州教授。校文程江，監試欲私所親，以賄囑之。子力正色却拒。其人忿恨，置毒於酒，子力夜夢神人爲滌其腸，毒卒不行。官至漳州通判。

余象 慶曆進士，歷官光祿寺丞。首奏：「王安石議論詭辨，名實眩耀，雖一時文人，終爲異日之蠹。」出通判宣州。又奏：「安石小人也，若果亟用，必至紛更一時。」出安石之門者，皆惡之，得蔡襄、余靖力辯免。仁宗亦知其直，就加秘書丞，尋除太常博士。英宗卽位，召見，特授屯田員外郎，謂近臣曰：「余象敢言，朕常畏之。卿等宜自謹也。」出通判宣州。州民至登聞鼓院，乞象領州事。英宗以問司馬光、呂公著，對曰：「余象，陛下汲黯也。」卽授都官員外郎，尋除屯田郎中，通判南劍州。遷禮部郎中，薦錢藻、孫覺、錢公輔、范純仁，遂力求致仕。嘗著《論語集解》、《中庸大義》。呂公著薦其書於朝，神宗方欲大用之，而象卒矣。侄授。

授 初調侯官尉，捕盜改秩，遷校書郎。博學能文，多所著作。官至京西提舉。

鄭昇 字元舉，梁、陳常州別駕淑之後。刻苦問學，尤深《易》、《春秋》，皆有著述，發其疑義。舉進士，終循陽理掾。蒞政有能聲。孫可復。

可復 字彥修。舉進士，調東陽尉。縣人喬行簡方處要路，族黨恃勢撓法，可復屹然守正，行簡深器

之。官至朝奉郎。性儉朴，無他嗜好，俸餘悉市書籍，手自編校，晚年積至數千卷。嘗修《爾雅》及刊《戴氏禮》。

陳闡 字伯通。舉進士，令武平。洞獠販鹽挾刃，久爲民患。闡立斥堠，訓丁壯，境內晏然。移知廣德，縣多滯訟，與民面議可否，立決。辟監建州豐國監。時廖恩嘯聚閩嶺，一路騷然，安撫司檄闡經畫。置水口倉，立鎖港，均定八州鹽估。在任六年，歲課增三十六萬緡。後知建州，歲饑，境內有競糶者，令疑爲盜，以狀白闡，曰：「民饑爭食耳。」檄令杖遣之，促出賑。移知萊州，乞致仕。從子高。

高 字可中。舉進士，召試，除太學錄。祭酒龔原、司業傅楫薦其潛心經術，尤深於《易》，遷博士。政和中始建太醫學，遷太醫學司業。累上封事，以切直忤蔡京，力請休致。官至朝奉郎。

鄭少連 字儀魯。力學能文，累舉不第。以特奏名調劍浦簿，歷攝五縣，民畏服之。改判許州，以老致仕。

朱紱 字君貺。治平進士。以薦除王官大小學教授，尋外除。紹聖初，章惇當國，首唱異議。紱被旨召對，首陳「正心誠意，知人安民」之說。除諸王官侍講，再遷翊善。元符初，除都官員外郎。鄒浩以論元符后不當立，竄新州，紱出金贖行，視諸公獨厚，坐追一官勒停。徽宗登極，用藩邸舊臣。召赴闕，累遷右諫議大夫、給事中。時范純禮、劉安世等屏黜於外，悉爲論列。蔡王府獄興，有司捕逮株連甚衆，江公望言之頗切，黜守外郡，紱封還制書，言：「公望杜塞間隙，以全陛下兄弟之義，以言罪之，雖篤信不惑之士，亦不敢直道自任，況非其人邪？」論駁再三。出知壽州。崇寧元年，進寶文閣待制、真定府路安撫使。二年，中丞石豫力詆落職，提舉杭州洞霄宮，入元祐黨籍。五年，起知福州。蔡京復相，紱遂罷。大

觀元年，依舊落職，提舉洞霄宮，卒。初，紱在後省凡四月，論駁無虛日，政府遣人諭意曰：「上眷待如此，不日當在此地。」紱不爲動。紹述說興，紱以書責京。京得書大怒，始力謀所以去紱者，臺官論意挾其細故，并以合黨王回、締交鄒浩罪之。建炎間，復舊職，贈少保。子宗。孫元飛。侄真。從孫泳。

宗字成德。以父任授長社尉，累遷吏部員外郎，除太府卿。徽宗尊寵潛藩之舊，併錄其子，多超進大官。宗父紱，亦舊學之臣，乃不自言，亦無爲言者。蔡京、蔡確與宗同里，宗又未嘗一造其門，坐久不遷。靖康初，近臣薦，召見欲用之，而宗奏事觸宰相，遂止。紹興元年，召爲大理少卿。建安盜起，高宗勅制置使捕誅，無功。除宗直秘閣、福建路轉運使，且趣人對。宗曰：「愚民窮困，弄陛下兵，將吏養寇，誅斂益急，勢將驅齊民爲盜。陛下第追還制置使，付臣綏集，臣可毋戰。」陳便宜十事，高宗嘉納之。制置司方奏兵寡，檄取錢數十萬，宗遺書責焉。盜平，卒如宗策。官至右朝散大夫，累贈中散大夫。

元飛字彥實。少有美材，學問慷慨。入官三十年，以強直自遂，獨行所志，不爲勢屈。浮湛選調，行年五十，乃登王官簿書。期會之餘，命賓友，從子侄登山臨水，絃歌賦詩，放浪塵埃之外。官至福州通判。朱文公爲記其歸樂之堂。子滾、涓、漑，俱游文公門。滾，廣東帳幹。

寅元符三年爲秘書省秘書丞，以紱人元祐姦黨，併罷免。政和元年，起知南雄州，辭不赴。尋卒。

泳字子游。乾道進士，調連江尉，以捕盜改秩，知海陽縣。爲政優撫，字拙催科。民感其德，賦以時輸，不勞而辦。尋除福建運管。董試漕闡，當路囑私其子，正色拒之。卒於官。侄首諒。

首諒字穎之。調龍巖簿。汀寇衝突，長官、巡尉皆棄縣去，首諒獨守職。招捕使陳韓嘉之，悉委以縣事。身率士卒督戰，盡擒賊黨。韓上首諒績。力丐祠，歸。歷知香山縣，以通直郎賜緋致仕。



陳大卞 字仲循。治平進士，歷知江寧縣，用廉潔稱。嘗與章惇有舊，及惇當國，屢招不往。以明堂恩得封二親，拜且泣曰：「吾不能與時俛仰，耻勉仕宦，爲吾親耳！恩封既及，可以休矣。」遂致仕。嘗著萬言書，未上卒。子安仁、性仁、顯仁。安仁，江寧府法曹。性仁，知南城縣。

顯仁 字藏用。登第，調古田尉。大臣有薦其文行可領袖諸儒，遂除教授嘉禾，士多成就。累官知潭州。

傅楫 字元通。少從孫覺、陳襄學，襄女妻之。登進士，調揚州司戶參軍。揚守遇僚屬甚，楫遇事未嘗希守意，至捕其從者置法，守內不能平，欲以煩劇困之。檄攝天長令，發摘隱伏，姦猾屏跡。轉福清丞，帥曾鞏知其人，與鈞禮。歷大谷令，則鞏弟布爲帥，曰：「是吾兄所重者。」率部使交薦。改知龍泉。

孫覺爲御史中丞，語之曰：「君盍少留，朝廷且用君。」楫曰：「外官所當得也。且仕宦所樂居中者，免外臺督責耳。今俯首權門，與外臺奚擇？」遂去不顧。道除太學博士。居四年，未嘗一跡大臣門。既滿，徑赴銓曹，曾布方執政，薦爲太常博士。徽宗爲端王，就學資善堂，升楫記室參軍，進侍講翊善。中人蒞事於府者多與官僚狎，楫獨漠然不可親，府嚴憚之。五年不遷。鄒浩得罪貶，楫以驢行，免官。徽宗卽位，召爲司封員外郎，歷監察御史、國子監司業，起居郎，拜中書舍人。曾布自以於楫有汲引恩，冀爲之用，楫略無所傾下，布人失望。徽宗以舊學故，多所延訪，楫每以遵祖宗法度，安靜自然爲言。他日李清臣勸徽宗清心省事，徽宗曰：「近臣中惟傅楫爲朕言甚詳。」楫在朝歲餘，見時事寢異，竊歎曰：「禍始此乎！」遂上疏丐去。以龍圖待制知亳州，卒。徽宗念其藩邸舊臣，賜絹二百匹。子諒友、謙受、義夫。諒友、謙受，見下。義夫，仕兵部侍郎。

諒友 字冲益。天資恬淡，博學善詩文。第進士，調吳縣主簿，歷膳部員外郎，知和州。有《冰廳文集》。內翰孫觀銘諒墓，稱其文魁奇瑋麗，九鼎十鼓，詩隱隱大呂，震越洋鐙，可比諸頌《魯》而歌《周》。

謙受 字冲亨。以父蔭補承務郎。刻苦涉獵，尤長於詩。天性友愛，雅量寬厚。倅新安，鎮靜不擾。除夔州路轉運判官，卒。

權 楫從侄。先任大學錄。時太皇太后爲高氏外家求師，有旨令太學選德行文藝兼著者，祭酒、司業以權應命。權登第唱名之日，傳宣許特謝恩，太皇太后賜御廚食十合、錢十萬、金錢一千、絹百匹及香茶等物。高大龍圖贈行詩有「上林供玉宴，聖母賜金錢」之句。子共，三薦奏名，亦以文辭稱。

佇 字凝遠，楫諸孫。舉進士，授無棣簿。金虜陷全燕，乘虛南下，兩河皆震。郡檄佇餉軍，人謂佇書生耳。佇得檄，即行飛芻挽粟不乏絕。調南安丞，歲大饑，民棄妻子相屬，佇請出常平錢米，設安養院，糜粥之。遷知晉江。會詔造戰艦，躬督其役，勞費半他邑，事獨先辦。轉南劍州通判，卒。疾革，戒諸子曰：「吾平生無愧俯仰，歿後汝曹居官主清，治家主嚴，奉先主敬，叙族主恩，造次顛沛必主忠信。能用吾言，雖貧賤猶爲有德君子。」官至朝奉大夫，累贈金紫光祿大夫。子二：汶、淇。

汶 字元魯。以父佇蔭補官。初調清流尉，捕盜，改秩知將樂縣。劍、建俗生子多不舉，汶令里正籍記，家給錢米，活者萬數，多有以傳名子者。尋倅廣州，帥司馬伋以捕盜贓滿三獄，申審覆奏，動淹數月爲慮。汶答曰：「容某辨之，請以三日。」伋喜，顧未敢爲信。然汶退召獄吏分囚盜爲三：一傷被主贓滿，一不傷被主贓滿，一無被主贓滿。次日引鞠，具得其情。遂白伋，惟以傷被主贓滿者申憲臺，餘皆減等，分遠近決配。伋大喜曰：「公果辦此。」尋知貴州，郡僚月俸積壓，汶至，悉撥錢還之。張栻爲帥，聞而賢之。

曰：「祇此一節，便見施爲。」率部使者交薦，而司馬倣召還，薦汶亦力。除提舉江西茶鹽事，繼知德慶府，所至以仁政稱。

淇 字元瞻。舉進士，調潮陽尉，改秩知平陽。秩滿，奏除幹辦諸司糧料院，未嘗一跡權要門。適臺諫空無人，孝宗閱班簿，獨指淇名，命奏事及人對。數奏稱旨，卽除監察御史，糾察庶務，風采凜然。孝宗喜曰：「此朕自擢也。」於時孝宗有汎掃河洛之志，常患儒臣謹畏，特崇獎武臣，以振起之。乘間倖進者多以文階易武爵。淇疏論其事，孝宗悟，卽日出其疏於外。未幾遷太府少卿。每因輪對勸上擇端願誠懇之士，以備官僚。又言川、廣去朝廷遠，守臣不可輕畀，皆見嘉納。除中書門下檢正諸房公事。時方擇專對使虜，中批命淇。未行，除宗正少卿。樞使王淮謂淇曰：「此行盡出淵衷。」及還，孝宗詢此事甚悉，淇具言河北、河南之所以然，稱是。久之乞外，除浙東提刑，移節浙西，除直龍圖閣，改知寧國府。以母老力請便郡歸養，遂易知泉州，奉其母九十之年以來臨郡。郡人思其父佇，卽縣廳西爲堂，繪佇像祀之。光宗卽位，起爲廣西提刑，除知温州。卒，贈中奉大夫、直龍圖閣、莆田開國縣男。

誠 字至叔，汶、淇從子。少從朱文公學，所與交游率讀書清介之士。初調永春尉，力辨陳介珪之冤，與上官忤，因納誥勅於憲臺，求去。介珪卒，得直，遷太常博士。真德秀時爲正字，每數日輒相過，談論古今事移晷刻。寧宗朝，輪對，言甚鯁切。誠有子彥卿，博學天死，哭之傷性。一日輪對間，忽隕殿下，縉紳咸悼惜之。從弟誠。從子大聲。

誠 字友叔。少孤，母與兄督之讀書。旣長，事兄甚謹。初倅無爲軍，召監六部門。寧宗以丙寅伐金之後，淮西民多流徙，知誠有材略，改除宗正寺簿，將命往安集之。還朝，又以誠熟於淮事，擢淮西漕。

召爲司封郎中，遷尚左郎中。尋被旨使北，歸，以疾卒。

大聲 字仲廣。簿福清，帥辛棄疾檄大聲往鞠問長溪盜囚。囚六十餘人，大聲盡釋其株連者，僅留十數人於獄。邑令不樂其反異，斷諸胥券食，囚糧皆不給，大聲自質衣食之。及棄疾親按，皆如大聲言。調貴州教，帥胡紘每稱之曰：「古君子也。」禮部尚書黃繇舉天下教官，以大聲爲第一。改秩知武平縣，催科不迫。遷通判循州，適寇發，守稱疾，大聲調發諸軍，悉力鏖戰，皆潰去。未幾，餘黨猖獗，諸司專委大聲督捕。乃上禦賊數策，漕使劉強學以頒行廣東十四州，遂薦攝州事。尋奏爲真，闔城驩呼曰：「傅父再留矣。」在循四年，民樂其政。官滿，力乞官觀，官至朝奉大夫。子瑜，通判靜江府。

希龍 字廷允。與從兄權、求同登第，時號傅氏三龍。知漳浦縣，作興文教。病學宮山勢環繞水，立鑿河，引潮水自鹿溪入達儒學前，人呼傅公河。時二蔡當國，不肯附麗。崇寧間，詔具元符上書姓名、黨籍，希龍預焉。（四）從子知柔。

知柔 推官循州。賊曾少龍入境，教民造兵具，傷、死者百餘人，賊大潰去。擢知龍巖縣。處寇竊發，聞其威名，獨不敢犯。調泉州僉判。海寇林元仲猖獗，帥臣葉夢得檄往招，知柔出幟示賊，賊盡降。終朝請郎、福州僉判。

陳次升 字當時。人太學時，學官始得王安石《字說》，招諸生訓之，次升作而曰：「丞相秦學邪？美商鞅能政，而爲李斯解事。」坐屏斥。既第進士，知安丘縣。轉運使吳居厚以聚斂進，檄尉罔征。尉於農家得敗絮，捕送縣，次升縱遣之。居厚怒，將被以文法，會御史中丞黃履薦爲監察御史。哲宗立，使訪察江湖，舉劾蹇周輔父子經畫江右鹽法害民，還言：「額外上供之數未除，異日必有非法之斂，願從熙寧以

來創行封樁名錢，悉賜豁免。又役法未定，人情熒惑，乞速定差催及均數之等，先爲之節，而審行之。」提點淮南、河東刑獄。紹聖中，復爲御史，轉殿中。時方編排元祐臣僚章疏，次升乞宣諭大臣遵守勅榜，其餘一切不問。不聽。更懸厚賞以告藏匿，次升再上言：「臣嘗觀漢光武誅王郎，收文書，得吏人與郎交關毀謗數千章，會諸將軍燒之，曰：『令反側子自安。』」後世以爲美談。陛下初卽位，揭榜許其自新，是亦光武之意。今又張官置局，吹毛求疵，是前之詔令乃所以誤天下，後之勅榜又所以誑天下也。昔周成王納史佚之言，不食削桐之戲。今御史臺榜示朝堂，進奏院遍牒天下，非特戲而已。戲言尚踐，豈有明旨可尚反乎？」初，章惇、蔡卞以次升在元祐間外遷，意其不能無怨望，卞又與同鄉，故延置憲府，欲使出力助排衆賢，而次升一無所附，且上章論之，又及卞客周撞、鄭居中，繇是惇、卞交惡。次升乘間白出爲河北轉運使。帝曰：「次升敢言，故不當去。」更進左司諫。時當國者多誣謗英宗宣仁皇后，次升一日奏事畢，前言曰：「宣仁保佑聖躬，功德巍巍。若以姦人疵毀，輒有議論，不惟有虧聖德，亦恐大失人心。」帝曰：「無之。」次升曰：「臣敢爲陛下賀。」及帝遣呂升卿往察廣南，次升又言：「陛下保全元祐臣僚，今乃欲殺之，何耶？」帝曰：「初無此意。」次升曰：「升卿乃惠卿弟，元祐中負罪致仕，其人資性慘刻，善求人過，今將使按於元祐臣僚遷謫之地，理無全宥。」於是升卿罷行。劉元城曰：「陳當時有德於元祐人多矣。」次升累章劾章惇，皆留中。尋爲蔡卞所誣，擬謫監全州酒稅。帝以爲遠，改南安軍。徽宗立，召爲侍御史。極論惇、卞、曾布、蔡京之惡，皆坐竄逐。建中靖國元年，擢左諫議，獻言六事，多所規切。尋出使契丹。曾布進紹述之說，於是徽宗決意用京。使還，降充集賢殿修撰，繼又除名，徙建昌，編管循州，皆以論京、卞故。京罷相，復寶文閣待制，累官朝散大夫，終真州私第，年七十六。

王回 字景深。第進士，調松滋令。荆沔俗用人祭鬼，回捕治甚嚴，其風遂革。知鹿邑，縣邑人狀其治行，乞留者萬餘人，召爲宗正寺簿。元符中，葉祖洽薦爲睦親宅講書。與鄒浩友善，哲宗立劉賢妃爲后，浩將論之，密告回，回曰：「事有大此者乎？」浩南遷，人莫敢顧，回斂交游錢與治裝，往來經理且慰安其母。遷者以聞，逮詣詔獄。御史詰之，對曰：「實嘗預議，不敢欺也。」因誦浩所上章幾二千言。獄上，除名，停廢。徒步出都門，行數十里，其子追及，問以家事，不答。祖洽亦坐黜。徽宗立，召還舊官。擢監察御史，數日卒。岑象求、王覲、賈易上章乞錄回子，恤其家。詔除子渙老郊社齋郎。蔡京爲相，奪之，仍列名黨籍。

陳開 字發明。熙寧進士，調密州教授。時蘇軾爲太守，深器重之，諸生力留，更七年乃代。密州儒風之盛自開始。後人爲太學博士。召對，進兩劄，其一排新法，其一去小人，進君子，言議激切。出爲雄州通判，尋除宗正寺丞。官至朝奉大夫。子曄，元符三年登第。

陳覺民 字達野。熙寧進士。元祐間，詔舉賢良方正，林希、錢勰以其名聞。時方紛更神宗法度，人莫敢言。覺民力陳役法，則乞復雇役；邊事，則乞勿棄地。其言剴切。知建陽縣，荒政得民，家畫像生祠之。累遷宗正丞，以母老乞補外，歷知漳、建二州，擢福建路轉運判官，移知福州。故樞密安惇與覺民先密後疏，及居政府，言者承惇意，劾罷。監東嶽廟，尋起知泉州。時有司建言欲權六郡酷，覺民陳五不可，且移書約他郡同論，其事遂寢。尋遷本路提刑兼三路都轉運使并提舉河渠。以母年九十餘，蒞政於家，以便侍養，鄉人榮之。復知泉州。以右文殿修撰知廣州。官至中奉大夫。覺民風采嚴峻，所至有治行。兩爲鄉部使者，凡過郡邑，未嘗與僚屬妄交一談。子磷，吏部郎中，宋輔，(五)因論二蔡，貶餘杭簿，一曰餘

姚尉。

林豫，字順之。舉進士，授惠安尉。改集慶軍判官，淮南賊嘯聚，豫被推擢爲漣水軍使，多設耳目，賊遂就擒，餘黨入海州，尋亦殄滅。紹聖初，時相以豫善謀，議奏授內藏副使。先是，朝廷既棄地和戎，至是復寇麟州，豫建議謂：「宜先修葭蘆、米脂、安羌、浮屠諸寨，通鄜延路，以爲麟州應援。」後卒行其議。歷知保德軍、邵州。四年，虜人撤霸橋深入，除豫河北沿邊安撫使，豫乘間興策，虜人無能爲。召人陸對，哲宗褒獎再三。元符三年，除鄜延路兵馬，知鄜州。黃河北決，移守冀州，盡收老弱幼稚，廩以官粟，募少壯者築堤，厚與之傭。崇寧二年，以六宅使除真定府兵馬，知邢州，力議鈔面錢、陝西銅錢之弊。及朝廷下東路折羅，豫格不行。數忤時宰，期年罷去。徽宗終思之，大觀四年，知邵武軍。凡歷七郡，悉有遺愛。初，豫受知於二蘇最深，二蘇皆嘗薦之。及軾以作詩譏切，下御史獄，豫適賜對，神宗問：「所薦出誰？」豫曰：「蘇軾。」問：「何從識之？」曰：「臣道杭州，識之客座。」曰：「是日有何談說？」曰：「臣子對語，無非忠孝。」詞氣從容，略不避忌。軾貶惠州，軾雷州，豫餞軾詞，有「怒髮衝冠，壯心比石」之句。爲章惇所恨，左遷雲騎尉。後竟坐二蘇所薦，入元祐黨籍。子師說、師舜、師阜、師益。

師說，字箕仲。以父蔭，屢當補官，遜於從兄師文及弟師龍。晚試銓曹第一，調嚴州司士。時青溪盜初平，作新寨聚兵，驕甚。郡請師說攝理官經畫之，悍卒帖服。遷知德化縣。還道桐廬，會賊發支邑，民遮道乞留，郡白之朝，因改建德縣。賊平，倅新定。虜犯二浙，新定民大恐，師說白郡將靜待之，乃自擁十餘騎出城，遇虜騎諜，口：「吾受命主帥，以城降者賞。」師說叱折之，口：「吾不知賊乃有命。」與新定民嬰城死守。累遷兵部員外郎，知建昌軍。丞相趙鼎力薦之，拜廣東運判。韓京以武將立功知循州，頗驕

慢，師說論劾之。後京謂人口：「監司直須還此老，第於我少恩爾！」除浙東提點刑獄，以忤權貴，力請祠。林光朝嘗言：「林郎中出語大率如富鄭公，徑截無衣裡。」

師舜 官至中大夫。靖康中，以守職不避虜，盡室死難。師益、師臯，見弁翰志。

黃顯 少舉進士，不求榮進，以薦改秩，歷提舉廣南西路學，知儋州，凡四考。從子沔。

沔 字朝宗。元符中第進士。徽宗奇其才，嘗以「江南豪士」稱之，御筆擢編修。歷江、淮、荆、浙、福建、廣南等路提點坑冶使。官至朝請大夫、秘閣修撰。

張弼 字舜元。恬淡好學，尤刻意於《易》，以爲《繫辭》者，聖人所以翼《易》，其大例當在於此。乃置諸家傳註，獨執經誦之凡三十年，釋然領悟，不覺引鼓自過，窮日不已，久而益信，推明爲書，根象數，原義理，雖與前此談《易》者異同，而用於爻象之辭，字皆有所本，有漢、晉《易》家所不到者。紹聖初，大臣以其名聞，并上所著《易解》九卷。勅賜號葆光處士。三年，朝奉郎林伸等五百十三人列薦於守帥、部使者，轉以上奏。勅授福州司戶參軍，充泉州學教授，未赴卒。

陳驥 字德純。歷宗學博士。蔡京用事，不肯見。注温州通判，以清白聞。秩滿掛冠，自號安處居士。子豐。

豐 字宜仲。以父蔭補官，調建州戶曹、長樂戶掾，尋差泉州教授。丞相陳康伯薦除刪定勅令官。會勅局方有所纂修，或勸其供職，即得改秩，豐以疾辭，廟堂高之。次冬，書成奏上，改宣教郎。累遷國子博士。時宰執皆知已，豐每進見，必推引寒賤，未嘗及私。適言路有不相樂者，與司業張洙、國子李石、國錄田真宗皆論罷。後起知惠州。孝宗登極，令諸路監司各舉循吏二人，豐居其首。朝廷處以湖北提舉，



豐不欲遠去，偶南恩缺守，僭就之。政清康靜，接物以誠。適歲旱，禱詞有云：「願俾微臣特損數年之壽，乞令闔境普沾三日之霖。」果雨。是歲卒，官民爲巷哭，立祠。子二：謙、諒。

謙字正仲。年十一，爲山寇掠去，露刃脅之不爲動。官軍至，賊驅迫以前，謙伺間投峻崖下，出。弱冠入太學，力辭父恩以予弟諒。隆興初，登進士，簿鳳寧，教授泉州，累遷右司郎中，除殿中侍御史。因事論事，不計人過，卽有排擊，無所傍及。竟以忤時相意，徙太常少卿。俄遷起居舍人，力引退，直寶謨閣，奉祠歸。居半載，起江西提刑，召爲太常卿。尋除兵部侍郎。與韓侂冑書，極陳用兵利害，略不見聽，遂乞外，以集英殿修撰知寧國府。未幾，除敷文閣待制，提舉江州太平興國宮。嘉定初元，再乞致仕，封清源郡侯。年八十一卒。贈通議大夫。謙該貫群集，賦詩屬文，雅有典則。尤工書法，大書道勁處不減蔡君謨。自少至老，士林推重，惟嘗攻偽學，爲世所少。

諒字友仲。以父蔭補官，調永春尉，改簽書清海軍判官，遷知古田縣。意撫字，民號佛子。及解歸，以帑藏無贏，幾爲司賦所沮。朱文公爲言於帥曰：「陳宰，廉吏也。」通判循州。慶元初，改知潯州。郡舊無貢院，士冒江灘附試於藤，諒至，始爲立院，得士德之。辟知象州，卒於官。

林宋卿字朝彥。嘗從陳瓘、楊時學。登進士，召試秘書省正字，出知恭州。時邊臣多以開拓蒙賞，瀘南帥司因奏開溪費州，南通辰沅，西抵瀘戎，置一州一縣，變梓二路聽其節制。宋卿言：「得溪費地不足耕，得溪費民不足治，切恐生夷疑惑，別致釁端。若不杜室，則接武邊功者衆，寧不斲喪六十州生民命脉？」徽宗覽奏，詔罷役，褫帥臣官，以宋卿兼提舉夔州、潼川府路兵馬都監，仍知恭州。爲恭民蠲宿逋二十萬八千四百五十餘緡，米十五萬四千八百石，恭人家繪像祠之。官滿，部使者薦宋卿，乞畀再任。徽宗

曰：「是嘗奏罷溪費州役者，與之，以寬朕西顧。」靖康中，以煩言得旨衝替，僑寓涪陵之韓亭，日與其士大夫唱酬。自適涪，人以宋卿才學出處與黃太史相先後，因號爲小涪。尹和靖見之曰：「溪費一奏，皆自養氣中得之。」薦於張浚，浚辟參謀軍事，力辭。建炎三年，詔四川監司舉流寓之才能者以聞，涪守王擇仁首薦宋卿，遂召赴闕。河北帥臣復奏薦宋卿，得旨差充湖南帥司參議。浚視師江上，欲以宣撫判官辟宋卿，復辭。浚還朝，首薦之。蒙召，力乞祠，終朝請大夫。子蒙亨，見韋布。蒙亨子有之。

有之 字公侶。授賀州司法，教民作棟宇以代茅竹屋，賀人有棟宇以居，自有之始。調肇慶司理，獄訟平允，郡守賢之，命攝教官。條利病六事以獻守，轉聞於上，允之，劄示二廣，民蒙其惠。改知古田縣，通判建昌軍，攝郡。總所綱運不辦，有之積俸錢補發。秩滿，知南雄州，卒官。終朝散郎。

陳太和 字德容。知象州，虛心聽訟，以盡民情。二年，績最。終瓊州經略安撫使。

林正 字明輔，宋九牧藻七世孫。高祖父煥，太子校書。曾祖儻，協律郎。正釋褐及第，歷嚴州、福州、濟南府，尋除廣西提刑。陳感者，海上劇賊也，正親至招諭，感遂出迎，因盡散其脅從數千，親押首領數十人歸於桂林。及奏功，自屬官，使臣以下各遷官，正獨不受。遂除兩浙運判，累遷左司郎中，卒。子鳴。侄一鶚。

鳴 字聞卿。累遷戶部左曹郎官，尋以煩言去國。與林彖爲忘年交，講論倡酬，略無下進意。起知南雄州，以母老丐祠。未幾，丁母憂。服闋，知惠州，請發常平倉賑饑，奏罷病民者十數事。爲文論民力學、種麥、墾荒田、修陂塘、去喪樂、禁屠牛。秩滿，圖書數篋而已。改知常德府，官至朝請大夫。子澧。

澧 字同叔。爲建州幕。廉勤自持，朱文公嘉其操行，書問往復，相期甚厚。知崇安縣，清靜不擾。縣圃產芝，池蓮雙花並蒂，歲以大稔，縣丞楊寬爲記其事。民立祠，曰林長官。

一鶚 字雲卿。父歿，廬墓。知南豐縣，頌聲載道。擢審計院，出通判江州。官至奉郎。子渙，知都昌縣。孫大有，見韋布。曾孫雷龍。

雷龍 字伯雨。咸淳初預鄉薦。仙游寇起，逃難郡城北山，方應發檄爲錄事參軍，遷莆令，尋以宣教郎通判興化軍。至元改物，以治中署郡事，年餘棄去，自號清逸處士。雷龍博通經史、天文、地理，貫穿融液。工詩及字書。有《耕吟前稿》、《醉吟漫吟後稿》。

蘇洸 字澄老。父欽，德化人，見德化。後欽自德化徙仙游，遂爲仙游人。洸以父蔭補官，調餘干尉。丞相趙汝愚，其邑人也，喜洸廉介有守，折節與交。改知臨川縣。秩滿，質錢治裝。擢倅賓州。張栻帥桂林，檄攝倅帥府，又攝高州，極薦其廉。經略劉淳繼至，檄攝桂府。武弁陳姓者，以鸞爵爲邊吏，交通諸蠻，納賄巨萬，事覺逮獄，當路有爲地者屬洸治之，卒正典刑，一府肅然。除知雷州，秩滿赴闕，面陳三劄，孝宗嘉納。除知新州，陛辭，賜對便殿，又陳二劄，孝宗稱善。久之，趣之郡。比至，百姓歡迎，歌曰：「蘇使君，來何晚，使我夜不寐，朝不飯。」州賦額儉，帑無羨餘，月給廩俸皆先屬吏。去日，持空券出嶺而已。移封州，首請減放丁米及經制無額之數。丁內艱，服除，知辰州。尋退休，年七十八卒。洸胸次坦夷，表裏洞徹。爲政惟務興利除害，故所至民安，所去民思。子權。

權 字元中。少侍父倅賓州，從張南軒學。登淳熙第，調梧州推官。帥蔡戡聞權世有廉名，檄攝帥屬。調三山教官，訓迪不倦。改秩知餘干，洸舊治也。終辰州守。有《春秋解》三卷。子國台，從瓜山潘

柄講學。從孫三英，早登洪天錫、徐明叔之門，克世其家。

陳可大 字齊賢。父汝器，家居積善，貲產遂兄，一夕飛錢滿戶。可大登政和進士，再調泉州工曹，開釋強盜七人，明其非辜。知長樂縣，大修陂塘，縣人紀之。後知肇慶府，去日，衣衾書籍而已。侄子冲飛。

冲飛 字季翼。調寧德尉。經學該貫，尤精於《易》。曹幽器其才名，不敢目以屬吏。子堯道。

堯道 初以忤權相去國，後繇太府丞擢秘書郎，除監察御史。累遷侍御史，拜右諫議大夫奉祠。有《大學中庸說》及《平湖文集》。

陳吉老 字子州。祖浩，父無逸，相繼登第。吉老以父任補官。少通《春秋三傳》，學孫吳兵法，慨然志事功。紹興初，虜騎寇淮，汀、贛辟盜竊發，辟吉老清流丞。贛寇萬餘，侵掠郡境，吉老整衆而誓，皆感奮，大破之。後與胡保、鍾花寇戰武平，長子希造先登，死焉。吉老悉衆長驅，竟殲其黨。比還郡，將以下迎勞，爲吉老惻然。吉老笑曰：「馬革裹屍，南八男兒，吾兒得死所矣。又奚足悲？」自是賊徒戢遁，不敢犯汀界。六邑爭像祀其父子。陞本州別駕，召除京東提刑，收復宿、亳、徐、海四州。人對，條陳五事，高宗曰：「且爲朕緩懷京、淮民。」尋除揚州安撫使，賜鞍馬金帶御前，大力以寵其行。吉老始至，嚴關渡之禁，創策應之法，樽節郡計，大修州城，捐俸助費。又遣仲子希錫取延陵私租，市汀布爲軍裝。時韓世忠守楚州，與吉老厚善。吉老奏乞命世忠來相其役，從之。不數月事集。嘗書白其母尹氏曰：「渾家飽煖盡是國恩，萬一總師恢復，自當効節。」又書付希錫：「於吾儻死邊，汝他日出官，不得取俸外錢謂之有例，上負君父，下辱祖先。」秦檜當國，力主和議，吉老累疏爭辯，請乞罷斥之。自任恢復之期，乞行專責，御筆

褒答。未幾卒，高宗聞之，嘆息。累贈中散大夫。子希造、希與。

希造 字賢御。以父蔭補官。吉老教子，詩書之暇必令讀百將傳，習騎射。每曰：「中原擾擾，正臣子捐軀報國之秋。非文武兼資，未易了此。」虜陷京口，希造年十六，被虜至北庭，命其牧馬。一日，北師南向，希造擇平時所調御最良之馬，疾馳而歸。父益奇之，每目爲定亂器。調揚州錄參。紹興初，侍父臨汀，每戰必前，屢奏凱捷。明年，賊復入寇，乘勝深入，應接不至，遂沒於义竿口。朝廷褒其忠節，特贈承事郎，累贈奉直大夫。子光祖。

希與 字賢可。以父任補官，爲兩浙運司幹官，應得朝賞，皆不陳乞。葉頤、陳俊卿相繼當國，皆希與親友，未嘗造其門。終梅陽太守。

光祖 字世德。以父死事，補官。德行政事，皆有尺律。知英德府，奏蠲上供泛輸以寬民力。改知邕州。州歲市峒蠻馬給邊，有奉議坊峒蠻，預爲措置，而官擅移其利於他峒，遂開釁端，互市不通。光祖以恩信招徠，給至溢數。峒酋李萬久爲邊患，密遣思明州誘而擒之，皆帖息。事聞，除廣東提刑。作《欽恤編》以戒僚屬，新濂溪祠，以崇教道，捐故錢三千緡，以代給邕兵之廩。凡一切無名之征，奏悉蠲除。積官朝奉郎。子沂。

沂 字伯澡。以父官新州推官，與太守爭死獄，竟獲譴，罷去。少篤志文公之學，徧參劉燾、廖德明、李方子、楊至、蔡淵、蔡沈諸先，而卒業陳淳之門。陳門推沂爲嫡嗣，以貫名齋，淳爲之記：「曾氏父子之學，參也。由貫以達一，點也。游心於一，而不必實以貫。伯澡始慕點名，沂今復以貫名齋，以上達爲高，覺點之病，而欲參之下學以實之。予嘉其立志之審，而用功之有序也。」

鄭知微 祖振，見閩巷。以朝請大夫通判舒州。紹興元年，賊劉忠入其境，執知微。知微不屈，忠怒而食之。

陳大亨 字文通。爲人清勁。歷五任，貧無居屋，惟寓僧舍。官至泉州通判。

蔣離 字元肅。少博學強記，下筆輒數千言，曲盡其妙。鄉先輩宋藻舉經傳扣離，隨問隨答，每以「南方夫子」稱之。設席郡庠，戶履常滿，與林光朝同時十人俱知名，號莆陽十先生。登進士，教授泉州。

守王十朋見其文，大嘉賞識，離因作《夢仙賦》以獻。十朋曰：「長卿《大人》，太白《大鵬》之比也。」又撰《時政十議》，十朋嘆曰：「此經世之文矣。」後知江陰軍，再知通州。以郡人張次山坐與程明道、邵康節同好惡得罪，及陳瑩中、任德翁嘗遷謫於此，合爲堂祀之，扁曰三賢，以厲風俗。秩滿入覲，首言江東鹽課較之淳熙七年出人之數虧二萬緡，主策者方以衍課增秩，上矍然曰：「某人欺朕。」因訪本末，離口誦指畫，應對如響。上曰：「卿材通練，合以藩郡處卿。」離拜謝，上目其背，方面材也。將除贛州，爲宰執所沮，退居樸鄉十餘年。凡四請祠，以壽終。子祈。從子有秋。

祈 字子舉。以父任補官。倜儻博洽。與方信、王居安爲密友。嘉定元年，借朝奉郎充持書金國軍前副使，三至虜帳議和，請還淮、陝侵地。和議成，朝廷方推賞與改合人官，循十一資，而祈卽世矣。有《蚍蜉集》十卷。

有秋 字力父。與王邁同年，最相友善。居官所至有廉名。終朝奉郎，知永春縣。

留洪 字叔厚，從効裔孫。歷知德慶府。有《晉康文集》三十卷。

丘奐 字明遠。紹興初，詔舉山林遺逸有謀議可裨國事者，郡以免充選，進書數十萬言，皆恢復之

策。得旨堂察。見丞相呂頤浩，上劄二十餘，頤浩大奇之。屬淮甸有警，頤浩都督八路，免以布衣入幕，有功，奏授迪功郎，除湖北安撫使司幹辦公事。丞相張浚辟充都督府營田幹官。改秩，除三京宣諭司幹官。時逆賊王威寇略郡縣，免請於宣諭方庭實，單騎造威寨。賊露刃以俟，免撫諭有方，皆羅拜歸順。後劉錡帥荆南，奏辟幕下，嘗與論兵，錡喜曰：「吾生長兵間，知兵惟子，子天授也。」一日，沅州解降囚四十餘人，闔府咸謂宜殺，免曰：「溪洞嘯聚，間或有之，既降而殺，永絕招懷。信者，萬世乾坤也。」錡曰：「參議當於古人求之。」奏貸其死，分隸諸軍，後多立功至顯官者。除登聞鼓院。（七）因言事忤權臣，出守真州。累贈中大夫。子微之。從孫杞。

微之 字夢錫。授番禺尉。嘗有監扶胥鎮者，以權稅苛取，爲豪民訴於漕使，命微之廉其事。微之謂武人舉事，動觸憲典，理在可恕，委曲具上。漕使曰：「丘尉，長者也。」官至循陽通判。

杞 知真州。紹興間，與鄉人爲忠義社以自固。與山寇力戰，死於陣。

林彖 字商卿。幼孤，隨母鞠於外祖陳次升家，以故得盡讀《六經》、百氏之書，多聞元祐名臣出處大節與宋累朝典故。後僑居真州，又得事劉安世、任伯雨、陳瓘諸公，而與任申先、彖先兄弟爲忘年友。紹興初，嘗爲簽樞徐俯禮致，而終不受其薦。奉母歸閩，菽水盡歡。母沒，終喪，寓居僧舍，不謀婚娶，不問家事，不接俗人，不談世務。隆興元年春，監司、帥臣列薦，召赴行在，力以疾辭。其秋，丞相陳康伯、樞密黃祖舜令監司、郡守敦促之，復引疾不就。於是陳孝則、林孝澤等相繼率數百人以彖名聞參政周葵爲轉上之。詔再促召，亦不赴。乾道四年，特與進士出身，添差興化軍教授，未考，卒。年七十。

林肅 字恭之。少有文名，從游林光朝之門。試教官科，中首選。調臨安府學教授，卒。

余元一 字景思。娶黃勉齋女弟，因得親炙朱文公。知同安縣，政號清嚴。終池州通判。弟崇龜。

崇龜 字景望。與兄元一同登進士。歷官司農丞，賜對便殿，除秘書丞兼權工部郎官。時韓侂胄專權，蘇師旦寄聲邀崇龜一見，崇龜曰：「歸潔吾身可也。」丐補外，知江州。歲旱，舉家蔬食，爲民祈禱。

已，果應。累遷樞密院檢詳文字。侂胄敗，丞相史彌遠奏曰：「自權臣專政，士夫趨附。中立不倚朝士獨崇龜一人。」即日除監察御史，入奏，言名器冗濫之弊，士大夫卑陋之習，其言切至。嘉定改元，令侍從、臺諫議北虜議和，要求韓侂胄函首事，廷臣盡主其議，崇龜謂：「侂胄誠罪，函首送虜，辱國矣。」遂不預議。

尋除兵部侍郎兼權給事中，卒。子日華。

日華 字君實。歷知潮陽縣，以除強宗不勝，爲所陷。潮人惜之。嗜詩、史、工文翰。所居有擷英閣，藏書萬卷，法書、名畫參錯其間。

陳夢烈 舉進士，調連江尉。海寇犯境，親登賊舟捕之。擢知尤溪。縣之財計，取辦鬻鹽，乃家給一牌，寬立限期，俾自輸納，民以爲便。授兩浙運管。除知建昌軍。陛辭，言州郡兵財利害，奏對如響。卒於官。

鄭勳 字景固。端平二年知博羅縣。先是，廣州摧鋒軍遠戍，建康四年北歸留戍江西。又四年，轉戰皆捷，而上功幕府不報，求撤戍，又不報，統領熊喬部下卒曾忠遂倡亂，焚掠州境，長驅西下。或勸勳避其鋒，勳曰：「見賊而去，如吾民何？須待熊統軍至，諭遣之。」賊至，喬已逸。勳諭之，不從，正色叱之，遂遇害。事聞，贈朝奉郎，官一子。邑人祠之，靈跡甚著。漕使以聞，勅賜額曰惠澤。

陳珙 字子重。歷復州教授。除永春丞，時秤提楮幣，郡守真德秀檄珙行之，區處有方，人賴無擾。



德秀愛之，俾入郡幕，授西外睦宗院教授。尋知永春，屬庚寅汀寇焚蕩之後，朝旨蠲租，州縣以支吾窘逼，不克奉行。珙樽節月會，杜苞苴之費，爲錢八千緡以補之。遷兩浙路運管，卒。

王邁 字實之。爲潭州觀察推官。丁內艱，調浙西安撫司幹官。考廷試，詳定官王元春欲私所親置高第，邁顯擿其繆。元春怒，劾諫官李知孝誣邁語殿廡聲高，免官，調南外睦宗院教授。真德秀方守福州，邁竭忠裨郡政。赴都堂審察，丞相鄭清之曰：「學官掌故，不足挽君。」俄召試學子院，策以「楮幣」，邁援據古今，考究本末，謂：「國貧楮多，弊始於兵。議者徒患楮窮，弗懲兵禍。今當以核軍實、窒邊釁爲救楮幣第一義。」又言：「修內司，廣營繕，內帑宣索，多厚施緇黃，濫予嬪御，未見裁樽，徒聞有括田、權鹽之議。向使二事可行，故相行之久矣。」又因楮以及時事，言：「君子之類雖進而道未行，小人之跡雖屏而心未服。」真德秀病危，聞邁對，善之。帝再相喬行簡，或傳史嵩之復用，邁言：「舊相姦險刻薄，天下所知，復用則君子空於一網矣。天下之相，宜與天下共謀之。」又言吳知古、陳洵益撓政。輪對，言：「君不可欺天，臣不可欺君，厚權臣而薄同氣，爲欺天之著。」邁由疏遠，見理宗空臆無隱，理宗爲之改容。言者劾邁論邊事過實。魏了翁侍經筵，爲理宗言惜邁去。改通判漳州。裡祀雷雨，應詔言：「天與寧考之怒久矣：麤糲致疾，妖治伐性，初秋踰旬，曠不視事，道路憂疑，天與寧考所以怒也；隱刺覆絕，攸燔尊寵，綱淪法斃，上行下効，京率外兵，狂悖迭起，天與寧考所以怒也。陛下不是之思，方用漢災異免三公故事，環顧在廷，莫知所付，遙相崔與之，臣恐與之不至，政柄他有所屬。此世道否泰，君子小人進退之機。」於是臺官李大同言邁交結德秀、了翁及洪咨夔以收虛譽，削一秩免。蔣峴劾邁前疏妄論倫紀，請坐以非所宜言之罪，削二秩。久之，復通判贛州，改福州、建康府、信州，皆不行。淳祐改元，通判吉州。右正言江萬

里袖疏榻前曰：「邁才可惜，不即召之，將有老不及用之歎。」理宗方然，忽有尼者，遂止。知邵武軍。亢旱求言，驛奏七事，而以撤龍翔宮、立濟王後爲先。歲饑，作勸糶歌，勸富家出廩。制置杜泉自江右載米數千斛歸，聞歌即減直鬻之，民賴以濟。鄭清之再相，以左司郎官召，力辭。以直秘閣提點廣東刑獄，亦辭。改侍右郎官，諫官焦炳炎論罷，予祠，卒。贈司農少卿。邁，嘉定丁丑第四人及第，劉後村贈之辭云：「天壤王郎，數人物方今第一。談笑裡，風霆驚坐，雲煙生筆。落落元龍湖海氣，琅琅董相《天人策》。」又嘗貽邁啓：「朱雲折檻，諸公慚請劍之言；陽子哭庭，千載壯裂麻之語。一葉身輕，何去之勇！六丁力盡，而挽不回。有謫仙人駿馬、名姬之風，無杜少陵冷炙、殘盃之態。麗人歌陶秀實郵亭之曲，好事繪韓熙載夜宴之圖。擁通德而著書，命便了以沽酒。」蓋邁進則忠鯁，退則豪俠，元龍、太白一流人也。

林礪 字豈獻。通《五經》，從游者衆，王邁嘗師事之。官止海陽尉。

鄭鼎新 字中實。知晉江縣，建問政堂，輯《論語》、《書》言繫政治者，書之堂壁。建縣學文宣王廟，闢尊道堂。真德秀守泉，殊敬重之。尋通判處州，監右藏東庫，遷國子書庫，授都大提管，卒。鼎新少受業黃榦之門，而與楊復游。嘗考究禮書，成編，名曰《禮學舉要》，又撰《禮學從宜集》。其卒也，遺命治喪，以《儀禮》從事。

丘敷 字渭夫。少嗜讀書，尤明《周禮》。官終大理寺司直。爲人長厚，處僚友無間。

洪天賦 字無從。祖中，國子司業，勇退不仕。天賦幼敏悟，通《六經》，應童子科，登寶慶進士。歷知陽江、古田、連江三縣，通判循州。聽訟不施鞭朴，諄論理道，民胥向化。從弟處厚。

處厚 祖忠，見章布志。父範，大觀進士。處厚以範蔭調鬱林州推官。欽州守、倖互相詆訐，置獄禁

千連百餘人，連歲不決。處厚審讞，悉得其情，盡釋之。憲使大喜。再任漳浦縣尉。

謝升賢 字景芳。少篤義理之學。舉進士，官至興寧令。所著有《太極西銘說》、《易通》、《庸學》、《語孟解》，大意皆推本朱文公之書。嘗曰：「欲溯道之所出以究其終，則必先三書，而後《四書》；欲窮道之所入而反其始，則必先《四書》而後三書。」

尤彬 字叔文。家貧苦學。攻詞賦有聲，一時名士如林澧、葉堂、王邁、陳立伯、損伯、傅澄皆與爲師友。終真陽主簿。

陳之亮 字漢傑。工詞賦，與王臞軒友。後學多宗師之。官調歸善簿。

#### 〔校記〕

〔一〕「一」字，各本原脫，據本書體例補。

〔二〕「沂」，本傳及《蔣離傳》作「析」。

〔三〕「係微之」，《丘免傳》作「子微之」。

〔四〕「希龍預焉」，各本原作「希龍預爲」，據文義改。

〔五〕「末輔」，疑誤。

〔六〕「教」字，各本原脫，據《宋史·職官志》補。

〔七〕「登聞鼓院」，各本原作「登門鼓院」，據《宋史·職官志》改。

閩書卷之一百十四

英舊志 縉紳

興化府 仙游縣二 興化故縣(二)

仙游縣二(二)

皇朝科第

舉人 進七子、午、卯、酉屬舉人，辰、戌、丑、未屬進士。

洪武十七年甲子 吳懋監生。

十八年乙丑 吳懋

二十年丁卯 郭寅

二十三年庚午 白至善

二十九年丙子 陳偉 林榮 蔡陽

三十年丁丑 林榮

永樂三年乙酉 黃顯

六年戊子 張端

十五年丁酉 吳義 李安

十八年庚子 唐智 陳關

宣德四年己酉 王毅

正統三年戊午 陳升

四年己未 陳升

六年辛酉 李梁 周瑩有傳、見莆田。

九年甲子 陳鼎升弟。

十年乙丑 周瑩 李梁

十二年丁卯 陳禮

景泰元年庚午 楊瓚 茅昌 陳燮

四年癸酉 林越 鄭紀 陳遷

天順元年丁丑 楊瓚

三年己卯 鄭珪 鄭純

四年庚辰 鄭紀

六年壬午 鄭寬紀從弟。

八年甲申七年癸未二月，會試場屋災，詔移秋八月，至是春三月始廷對。

陳遷

成化四年戊子 曾琛 高昂儒士。

八年壬辰 高昂

十年甲午 陳衍 楊黻貢士。

十三年丁酉 阮韜

二十三年丙午 張炫端侄孫。

弘治五年壬子 高江昂子。 林照府學。

六年癸丑 高江

十一年戊午 李鼎安曾孫。 阮鑑

十二年己未 李鼎

十四年辛酉 鄭三德

十七年甲子 曾大用孫子。

正德二年丁卯 林文幹 鄭主敬

三年戊辰 鄭主敬

八年癸酉 林檣照子。

九年甲戌 林檣

十四年己卯 張文鎬炫侄孫。

嘉靖四年乙酉 許曰從

五年丙戌 張文鎬

十六年丁酉 楊皆璜孫。府學。

十七年戊戌 楊皆

十九年庚子 陳維孝

二十五年丙午 劉大化

二十八年己酉 林程

四十年辛酉 吳執御綾孫。

四十三年甲子 姚文煒文紹弟。

隆慶元年丁卯 陳紳

四年庚午 陳承芳深孫。

萬曆元年癸酉 陳傑 鄭瑞星

二年甲戌 陳紳

十四年丙戌 鄭瑞星

二十五年丁酉 俞誨 朱顯文

二十九年辛丑 俞誨

三十四年丙午 陳金陵

三十五年丁未 朱顯文

三十七年己酉 林鳴皋 茅序

四十三年乙卯 李燦箕 薛大鄭 吳顯弼

四十六年戊午 唐顯悅 林鍾英

薦辟、貢監賢者雜見列傳中。

有傳

陳潛中 李義甫 鄭照 陳升 李梁 柯添 顧元 薛益 陳燮 楊瓚 傅啓 鄭紀子主敬。

陳遷 徐經 林洋 張炫 茅陽 高江 李鼎 曾大有 曾綸 顧公陞 林鴻猷 龔士鏢

陳潛中 以字行，可大之後，初名元亮。洪武中，以聰明正直舉知開建縣，滿三年赴京，百姓哀號挽留。至京，計歷俸少十五日，例當罰作，尋遇赦回。縣人莫士忠丞上饒，薦潛中忠孝清廉，奉旨准就政，以疾不起。建文元年，聞燕邸將舉義，上書陳諫，疏言忠信四事，又疏便民十二事。蒙召問，諫燕事，請紙筆以對。尋放歸。已，赴燕邸上書。永樂八年，命取閑官不願仕者起送選用，尋有例：延久不到者，七十以上在家，未及七十者充軍。潛中至，以年七十餘，放歸。

李義甫 洪武中以孝廉薦，一再任爲副理問。兒時知孝，父病十年，侍養不離側。道拾金以還人，人取金謝，卻之。

鄭照 字孔昭。正統間由國子生授安遠令，以憂還。起，改德安，政無妄費，慎重民力，有大事必屬耆老商榷，議定乃行。一時邑無失政，民無冤訟。都御史韓雍巡撫江西，沙汰屬僚十去八九，獨稱照爲廉官第一。棄官歸，柯學士潛遺之詩曰：「閑因投笏早，貧爲守官廉。一瓢顏子樂，三韭臯之賢。」其卒也，



鄉士大夫私謚之曰清介。

陳升 字景順，僕射靖之後。授行人司正，嘗疏流弊外法者三，朝論譴之。爲同官所誣，免歸，葛巾野服，山水自娛。岳正守興化，時時禮升之廬，以厲高節。

李梁 字廷玉。任監察御史，慷慨敢言。英廟北征，梁極言不可。竟卒官。

柯添 字長益。嚴靜力學。正統間貢授台州學訓導，歷雷州所河，所至有聲。年五十乞休，自號歸樂翁。子守仁，以歲貢歷官合浦教諭，不愧父風。

顧元 字體仁。正統間貢士，授長沙通判，被旨旌異。滿九載，陞高州同知。賊環高州，鎮藩用兵，檄元掌飛輓於外。已，城陷，家殲焉。元遂無意世事，請老歸，行李蕭然。

薛益 字謙仲。正統中歲貢，任潮州通判。剛果敢爲，請老而歸，年八十餘。

陳燮 字延輔。以舉人讀書太學，執經從游甚衆，若冢宰倪岳其尤著者。以優等授南御史，巡視諸倉，剔蠹剗弊，勦獲江盜，豪奸斂屏。遷廣東僉事，卻番舶互市例錢。未三載卒官。

楊瓚 字宗器。初授考功主事。王忠肅翱爲冢宰，方嚴待屬，瓚持正自如。初，殊不見知。旣，厚遇之。進員外郎中。作歲寒亭，以寓晚節。嘗語人曰：「楊震以卻金名世，吾竊憾焉。夫舉茂才而得懷金之人，智或未盡也。卻金而存四知之畏，廉或未誠也。」遷湖廣參政，改河南。時旱澇相仍，通縣八十萬石，瓚處置二年，餘足而民不擾。以不能徇時歸。瓚居官幾三十年，皆居要地，田廬如故。係皆，四川按察僉事，治行有聲。從侄汝惠，徙莆，有傳。

傅啓 字思明，楫之後。成化間貢入國子，授寶鈔提舉。鄉有宦於京者，家病疫，人避不敢至門。啓

日夜拊視，爲煎藥煮粥，旋亦被染，夫婦俱沒。同郡吳方伯繹思護其柩以歸。一子未婚夭，人嘆天道焉。

鄭紀 字廷綱，南湖淑之後。舉進士，爲翰林庶吉士，授檢討，與謝一夔、劉健、周經、張元楨諸公講性理之學，以經濟相許。其爲文章披奇剔怪，瀾立星回，深博蘊藉，益探以有。憲宗登極，上太平十策。

以親老引病歸養。父沒，哀毀骨立。知府以金助葬，謝不受。喪畢，廬墓讀書，與孝子劉閔、泉南陳剩夫相往來。修撰羅倫謫官泉州，亦時會聚講論。做義門家規、藍田鄉約、朱子義倉以齊族睦鄉。家居二十餘年，再起供職，遷浙江提學副使，令諸生兼讀《五經》，正樂舞，行鄉射，革浮屠，毀淫祠。孝宗登極，上疏勸御經筵、近儒臣，論聖學以正心爲要。言甚切至，有旨嘉納。召爲國子祭酒，監規嚴正，師生凜然。再侍經筵，啓迪尤多。萬壽節故事：設醺禮部，取監生執事。紀曰：「監生讀聖賢書，豈識此禮？」卽上疏言：「焚修之事，乃李孜省、鄧常恩之徒欺罔先朝，以竊富貴者。陛下誅其人未久，遽襲其事，非所以帥天下也。陛下誠日御經筵，暮還宮壺，安宅廣居，終日不違，不窮奢侈以耗元氣，不耽宴樂以損精神，則心平氣和，晬面盎背，川至日升，壽於何有？」國學有膳餘銀千兩，典簿以常例奉紀，曰：「膳爲監生，何與祭酒？」悉歸官。同官謂紀形其短，啣之，紀故以前輩自處，遇科道官不能折節爲禮，因相與撻撻其事，論劾之。孝廟爲紀任未久，何遽有此，令條析以聞。改南京通政司左通政。七年，陞南京太常少卿。武宗在東宮行冠禮，紀採古今帝王嘉言善行凡百條，各繪圖作贊，名曰《聖功圖表》，啓以進。且言皇太子當近正人，聞正言，不可與儼薄內侍游。上優答之。又論古祭禮，天子九獻，公卿降殺以兩，今郊廟止三獻，學校所以明人倫，面顏、曾、子思皆坐父上，孔子封於唐，非天王面用八佾，宜加帝號以稱尊崇，或仍王祭以正名分，周公制禮作樂之大聖，不宜混於忠臣烈士，而擬其文憲王之封。并言道家絕夫婦之禮，優人亂

男女之倫，今乃以之掌郊廟禮樂，各寺院及通衢多有異服之人，淫靡說法，城隍廟、靈濟宮，男婦無貴賤少長，雜進焚謁，皆非所以興禮樂、端風化。乃採古禮可行於今者，爲申明禮制，疏上之。陞南京戶部侍郎，適南畿災，紀以漕米權宜水兌，積出餘米二十餘萬石賑濟。又將月糧放支本色，以平米價。奏革京儲冗食鹽鈔攬納之弊，皆有惠利及人。然竟以前論踵襲，言者不已，紀亦屢疏乞休。十七年，進南戶部尚書，致仕。卒年七十六。遺命請劉閔治喪，勿乞葬祭。訃聞，賜葬如故事。有奏議四卷，《聖功圖》十卷，《歸田錄》八卷，文集前、後、續，別五十卷。子主敬、主忠。主忠，蔭補壽州同知，守官飭簠簋，而歸田好施，祀鄉賢。

主敬 字直夫。授戶部主事，監收草場，以廉能見獎。奉檄監督臨清糧廠。同事內臣例取糧頭銀，斛面米，主敬悉禁革之。內臣欲行中傷，主敬不激不隨，卒致信服。亡何卒。

陳瓚 初名僊，字漢崇。授南戶部主事，累陞江西參議。以父憂去官。時江藩有獄濫及寮寮，瓚曰：「地寒蟲蟄，江寒魚逝。」遂不復起。爲人慕古善，持論謙虛，能忍犯而不較。年八十二卒。

徐經 字宏常。天順中貢士。爲餘杭簿，正己蒞民，多有惠政。五載歸田，宦囊如洗。年八十餘。鄉士夫重之。

林洋 字德昭。天順中貢士。性清修，不屑榮進。以盛年奉詔授迪功郎，優游林下。八十餘卒。

張炫 字叔昭。與羅玘、張詡相友善。知博羅縣，廉介自將，政存長厚。歲旱甚，縞衣草履，露禱赤日中。大雨如注。先是，創立龍門縣，割邑之寧、集兩圖隸焉，越七載，民以不便言朝，下監司檄廣、惠二郡，久莫決，炫出爭之，遂得復舊。以重聽告歸，結茅金石山，號金石翁。年八十。所著《金石遺音集》十

卷。

茅陽 字常清。成化中，以貢入京。聞河東閻禹錫得薛文清之傳，遂往師之。授新城訓導，陞河源教諭。嘗疏時弊十條，詞旨剴切，多見施行。

高江 字一龍。該洽優裕，每有撰著，葩藻橫發。舉進士，初授行人。與江浦莊景、同里員外郎林夔相善。出爲浙江僉事，預知崇明設伏之寇，捕斬無遺。遷四川副使，掩襲松藩內應諸番，力戰保孤城。遷湖廣按察使。《湖廣志》稱其嚴毅自守，端亮待物。

李肅 字大用。以南太常博士擢南御史。清成浙江三，三疏乞恩歸田養母。出處大節有足稱者。

曾大有 字子遜。從蔡文莊學。以乙榜授德州學正，累廣東市舶提舉，克著廉聲。乞歸，田里產業多歸之兄弟貧族。嘗著《勸學錄》以訓士，又有《資仕蛙見》二錄。

曾綸 正德中貢士。融縣教諭。端己淑人，居家純孝，鄉邦重之。

顧公陞 嘉靖元年清潮縣學訓導。〔四〕清苦自勵，生辰閉門思慕。與生徒接，多隆禮貌。潮士高之。陞教諭。

林鴻猷 信宜訓導。古學古行，家教和肅，諸子孫守其門風，斷斷如也。

龔士鏢 仕南安教諭。清謹如甲科一切，待諸生如子。歸而無家，賃居於學宮。

## 興化故縣

### 宋科第

太平興國五年庚辰 薛巒

大中祥符五年壬子 方偕

天聖五年丁卯 陳鑄

八年庚午 鄭子莊 方任偕弟。

景祐元年甲戌 陳昭素

寶元元年戊寅 薛利如

皇祐元年己丑 方次彭偕族孫。

五年癸巳 黃中庸

嘉祐二年丁酉諸科 方洞次彭子。

治平四年丁未 方晞道次彭子。

熙寧三年庚辰 方次夔次彭弟。

元豐二年己未 方公衮洞從子。

諸科 方次阜次彭弟。

五年壬戌 林髦

恩賜釋褐 林自髦叔。

元祐六年辛未 方叔震次夔子。

紹聖元年甲戌 林迪

林成材國輔子。

方安道次彭子。

方原道安道弟。

四年丁丑 陳冕

崇寧二年癸未 方符偕從子。 陳維剛

四年乙酉恩賜出身 方車次彭孫。

五年丙戌 陳師立維剛弟。 方翼次彭孫。

大觀三年己丑 方亞夫公袞從子。 鄭廷芬子莊族。 方彥回亞夫從祖。

董公偃 陳易

政和二年壬辰 林閱壻孫。 林子立 盧熙載

特奏名 郭康時 陳彥達

五年乙未 陳起宗鑄孫。

特奏名 盧點熙載子。

重和元年戊戌 方宋寶亞夫子。

特奏名 林兌自子。

宣和六年甲辰 董愈 陳自仁 方深道次彭子。

黃徹申庸孫。

特奏名 薛蕃 林汝明

建炎二年戊申 薛倬利和曾孫。〔五〕 方牧次變孫。

特奏名 林問闕兄。

紹興二年壬子准推恩 陳宋寶

五年乙卯 鄭厚 陳昭度師立子。

十二年壬戌 薛珩利和從曾孫。 林玠

特奏名 方曄次彭孫。 陳維時維剛弟。

十五年乙丑特奏名 方庠自猶子。 方立庠從子。

陳大年

十八年戊辰 方綰深道子。 薛璨利和從曾孫。

特奏名 陳斌

二十一年辛未 方渙醇道子。

特奏名 陳久

二十四年甲戌 方確次彭孫。

二十七年丁丑 方士舉晦道孫。 姚宗之

三十年庚辰 薛元鼎蕃孫。 謝洪

隆興元年癸未 崔世舉 黃府徽子。 陳必大

特奏名 方詠立子。 黃豐府兄。 張棐

乾道二年丙戌特奏名 薛璆珩弟。

五年己丑 鄭僑第一人。

特奏名 方緯

八年壬辰 方庇士舉兄。

淳熙二年乙未 方銓深道孫。

特奏名 鄭周叟廷芬子。 高誓明

五年戊戌 伊樅

十一年甲辰 黃勳徽孫。 鄭其卿 薛夢龍

特奏名 薛元龜元鼎弟。

十四年丁未 黃燾徽孫。 崔志世畢從子。

特奏名 吳珏 陳師正箴從子。

紹熙元年庚戌特奏名 鄭必豫 陳樂天 鄭丙 方鷹原道孫。

四年癸丑 黃安石府子。

慶元五年己未特奏名 鄭周 伊鼎

嘉泰二年壬戌 陳褒師立孫。 方淙銓子。

特奏名 薛元弼珩侄。

應童子科 陳詔翁 陳壽翁 陳巖翁

開禧元年乙丑 陳國高必大侄。

嘉定元年特奏名 鮑龜齡

四年辛未 陳起夏子。 陳鼎王國高弟。

特奏名 謝懿洪侄。 章京

七年甲戌 謝澤可洪侄。 方雷震次彰六世孫。 方發 陳觀國起兄。



十年丁丑特奏名 方起學雷震叔。

三年進士 方譽

十六年癸未 鄭申之子莊曾孫。

特奏名 薛履利和曾孫。

應童子科 陳槐公

寶慶二年丙戌 方雷作雷震弟。

推恩 鄭安之喬侄孫。

紹定二年己丑 方雷渙雷作兄。

四年辛卯釋褐 鄭渙廷芳五世孫。

五年壬辰 陳夢斌國高從弟。

特奏名 鄭鈞渙弟。

咸淳元年乙丑 鄭獻翁渙孫。

薦辟、恩蔭賢者雜見列傳中。

有傳

方偕族孫次彭。次彭子醇道。孫晔、綰。次彭從弟公衮。衮從子亞夫。 陳鑄薛利和孫倬。倬從孫璆、珩、璵。〔六〕珩

曾孫季良。 林成材 林迪 陳維剛弟師立。師立子昭度。 鄭廷芬 林子立 陳自仁 鄭厚從弟樵。 陳

大年 楊興宗 姚宗之 薛元鼎 謝洪 黃鐘 吳珏

方偕 字齊古，隋泉州長史叔達之後也。父鼎，太平與國初從陳洪進人朝，累贈工部侍郎。偕年二十登第，授温州軍事推官。歲饑，民欲自隸軍就廩食，州不敢擅募，偕詣提點刑獄呂夷簡，曰：「民迫流亡，不隸軍，盜矣！」夷簡從之。遷汀州判官。觀察使唐肅以建安多訟，使權知縣。積牒數千，頓清旬日。縣產茶，歲以社前調民數千，鼓譟山旁，以達陽氣。偕謂害農，奏罷之。遷秘書著作佐郎，歷知福清、資陽縣，累遷尚書屯田員外郎，爲御史臺推直官。澧州逃卒傭民家，誣告民事魔駝神，歲殺十二人以祭。州逮其族三百人繫獄，久不決。偕被詔就劾，令卒疏所殺主名，按驗皆亡狀，事遂辨。以廩籍薦爲御史裏行，再遷侍御史。元昊寇塞門，鄜延副總管趙振逗撓不出救，詔偕往按。偕奏兵寡不敵，輕出徒餌賊耳。振得不罪。爲開封府判官、江南安撫三司，奏罷乳香錦綺之配民間者。更鹽鐵判官，遷兵部員外郎兼御史知雜事，累天章閣待制、江淮制置發運使、知杭州。縱舍有度，庭無滯牒。遷刑部郎中、太常少卿，分司西京光祿卿。使契丹，其主酌以大金瓢，偕一醵而盡。契丹大驚喜，遣以名馬，號其瓢曰方家瓢。後宴中國使，必出以置諸器之右。

次彭 字公述，偕族孫。父泳，叔父洞，俱以詩賦名。泳，領鄉書。洞，三魁鄉貢。次彭年十二喪父，哀毀如成人，悉以先疇付兄，率二弟次卓、次夔刻苦力學。皇祐初元，兄弟三人同領鄉薦。次彭登進士，調劍浦、福清二縣簿，遷洽州參軍，每與州將棘棘辨疑獄。知長樂縣，演江有渡舟人，嗜利重載，多覆溺者。次彭置官，再限人數，自是無患。知望江縣時，有爲盜所殺者，尉坐罪其鄰人，次彭疑而釋之，果獲真盜。改著作郎。知海寧縣，歲大饑，悉心賑貸。移知梅州，首興學校，躬教導之，梅人始有登第者。秩滿，士民乞留，再任六年，兩被褒詔。元祐初，上章告老，大臣論薦，賜五品服，以朝請致仕。次彭子六人，孫

子四人，曾孫二十九人，玄孫六十七人，多有官職。其知名者，子曰醇道，孫曰曄、曰綰。

醇道 字溫叟。知南劍州。清儉自持。有《筆峰集》五卷、《杜陵詩評》十卷、《類集詩史》三十卷。

曄 爲潛江簿。有詩集曰《荆南叢錄》，鄭樵爲序，稱其文高於天下，行高於鄉閭。

綰 字耀卿。官至海豐令。俸人以贖族黨之貧及女之不能遣者。少從里儒陳氏學，後因買婢，訊知陳女，遂如己女，育而嫁之。

公衮 字汝補，次彭從弟。元豐元年，用薦以布衣上殿條奏十事，神宗嘉納，命爲潮州教授。明年登進士，擢諸王宮教授。與韓魏公相從最密，魏公語曾公亮曰：「方公衮論事剴切，正而不阿，立己公忠，清而不撓。」年未五十卒。

亞父 字幾仲，公衮從子。三舉禮部，再擢第一。大觀三年，以八行舉，遂以甲科賜第，與從祖彥回同榜。博士林自稱亞父文章警拔，源流賈、馬，所著述隱然有諷諫意。官終平江府教授。彥回孫監，嘉定十三年進士，潯州教授，有集五卷，王邁、劉克莊每稱敬之。林自黨附蔡京，與薛昂推尊王安石而排擠元祐，終太常博士。有《周易解》、《莊子解》、詩文集。

陳鑄 字師回。康定初，守南雄，念母老，不復請郡，求通判福州以便養。一時諸公高之，如宋景文、曾宣靖、富韓公、文潞公，咸以詩送行。至州，贛州守延師，增田，教育後進。母沒，通判陳州，力拯水患，全活甚衆。歷知潮、登二州，以恤刑被勅獎諭。官至朝散大夫。守光祿卿開國伯卒。葬宣州。

薛利和 字天益。祖繼，太平興國進士，官至殿中丞。時軍治在興化縣，而郡人登第實自繼始。利和歷知春、潮、韶三州。累遷屯田員外郎。王安石議權茶，欲擢利和提舉廣東茶事，利和作詩謝之，有「請

把茶租乞與民」之句。遂就常調，通判廣州茶法，卒不行。孫倬。子奕，見弁翰。

倬 字廣孝。爲太學生，獨心非王氏《新經》，困踈二十年餘，不肯作進士語。金虜犯闕，生徒解散，倬正色曰：「諸君平時蒙被教育，舍此安之？」從倬留者僅三人。建炎二年，從高宗幸維揚，自大理司直遷爲丞，以獄空被璽書褒諭。出知興國軍，終朝奉郎。從曾孫璨、珩、璆。

璨 字卓然。該貫群書，文章雄偉，人以比之鄭厚、鄭樵。終永福簿。嘗著《邊防十論》及《考古集》。

珩 字景行。歷廣東、湖北路檢法官。鼎州所上盜當死，珩心疑之，與憲臺力辨，至欲投劾去。未幾，果獲真盜，憲臺交薦之。前後四爲法官，平反全活百餘人。官至梅州守。孫元肅，廣東運判。曾孫季良。

璆 字景徐。監廣州西南道，場有鬻私鹽至六萬斤者，吏捕以告，法當得賞，璆嘆曰：「刑數十人博一官，吾不爲也。」以十之一聞，餘鹽投水中。終南恩推官。

季良 字傳叟。以元肅澤補官，調廣東左司理。番禺民戀女爲人害，獄具，府檄季良審鞠，季良密廉得女所在。摧鋒軍叛，叩城，崔與之委季良招諭，事平，以勞績免磨勘。歷知閩、南安二縣，通判漳州。帥漕交薦，召赴都堂審察輪對。乞修實德、實政以回天意，永天命。除登聞檢鼓院。〔七〕奏言：「檢院乃肺石，路鼓遺意，今民庶以爲嘗試，州縣視爲具文。臣謂凡進狀，宜索按予決，虛者反坐。」遷司農寺丞，丐外。知潮州，慨郡計窘乏，專以廉儉節縮爲尚。鹽使疑潮鹽有遺利，欲增筭，季良抗論，寢其議。

林成材 字擇之。蚤入太學，文行有名。第進士，擢國子博士，歷祠部、吏部員外。轉國子司業，學

校之法多所建明。歷知明、濟、汝三州卒。

林迪 字吉夫。少讀書於香山，陳聘君易與爲忘年交。稍長，兼通《六經》，工辭賦。第進士，授福州左司理。古田縣上劫盜五人，迪曰：「此以年荒竊食，法不當死。縣吏文致其罪耳。」獄具，帥疑焉，再上再卻，迪持愈堅，帥竟從之。差知龍溪縣，平易近民，縣人詣臺府願留，因任九年。丞相蔡京，林出也，嘗因是欲內交於迪，迪以非同族拒之。歸自龍溪，請祠。建炎中舉遺才，迪與秘監李朴列在文學之科。年七十六卒。迪操履端方，鄉人推重。鄭夾漈《與魏丞書》曰：「向見宇文樞密言，吉夫耆老碩德在崇觀間，仕不躡進，所在以治効稱，達夜窮年卷不釋手，與人言終日不及世事，居此邑者累年，曾不請託，門寒官冷，晏如也。」又《與詹令書》稱其風流灑落，器識過人。令亦言：「吉夫乃吾師事者也。」著詩文百餘卷。又《詠唐史》一編，寓意褒貶爲叙，以示子孫。

陳維剛<sup>(八)</sup> 字公執，一字毅老。知須城縣。燕薊之役，與有勞績。後提舉鼎澧路弓弩手。逆賊鍾相來攻辰州，率衆鏖戰，掩捕無遺。官終朝散大夫。弟師立。

師立 字可權。少爲鄭俠所器。長游京師。章貢李林文行高峻，非人不及其門，師立師事之。舉進士，令連江。有妖僧惑衆，師立曰：「我爲邑長，奈何縱左道耶？」僧聞亟遁。遷順昌縣，在官四考，民甚愛之。人仕十五年，猶在遷調。嘗獲劫盜十有七人，愀然曰：「忍速民死而優吾秩？緩之。」會赦，得減。建炎中，遷知官。告院未幾，請老。有集藏家，諸體皆擅。五子並仕，其一昭度。

昭度 字元矩。爲尤溪主簿，部使者檄令拮据屬吏細過，昭度慨然拂衣去。閒居讀書著文，十餘年不調。與鄉大夫林迪爲忘年友。林光朝、方翥、劉夙二昆爲兄弟交。既教授藤州，藤地鄙遠，昭度勵士以

致知、謹獨之學。改知長樂縣，未上，卒。昭度淵源濂、洛，文章簡淡。光朝志昭度墓謂：「不緣師授，視橫渠爲同時獨曉者。」

鄭廷芬 字國華。累太學博士、提舉漳州路常平、成都路轉運使。爲文華贍雅正，自成一家。有《易索隱》等書。

林子立 字伯與。知茶陵縣。靖康元年，詔諸道勤王，子立募兵二千餘赴荆門，遇胡騎接戰，中流矢卒。

陳自仁 字克廣。舉進士，調永豐尉，以廉節聞。建炎三年，金虜犯洪、吉二州，隆祐太后護衛兵叛，所過殺掠，楊世雄、梁世美等遂犯縣境，自仁調集兵卒，誘伏夾擊，賊披靡潰。會其別將繼至，兵疲援絕，與知縣趙訓之皆死。贈通直郎，官其子褐孫。

鄭厚 字景章，唐右散騎常侍積之裔。少而通穎，下筆成章，不顧一經。自太學歸，與從弟樵倡物理之學，字文虛中一見異之，貽之書曰：「士弊科舉久矣，安知淵源深渺？不漬俗學，有如二公！」紹興五年，再舉禮部，奏賦第一。廷對六千言，指陳無隱。高宗聞厚姓名，詔特循兩資與陞，擢差遣受左從事郎、泉州觀察推官。嘗上奏三事，曰國勢、治體、兵略。紹興八年，以趙鼎薦召對，因言御將、固本、攬權三方。高宗嘉納。會鼎去國，詔任滿改合人官。明年至泉，適鼎守泉，盡委厚政。尋以郡吏決死獄，誤以甲爲乙，與守佐皆連坐解去。踰年除廣東路茶鹽司幹辦公事。嘗著《存古易》，削去《彖》、《象》、《文言》、《大傳》，以爲皆後之學《易》者所作。又嘗著書號《藝圃折衷》，指湯、武爲亂賊首，伊尹、周公實啓逆篡，孟氏誦仁義而賣仁義，儀、秦之雄者也。他諸立論，背馳尤多，坐爲臺官所劾，十年不調。遷昭信節度推官，

與守將討平齊述之亂，掩骼埋胔，賑給流離，郡賴以安。知相鄉縣，未代，卒。

樵 字漁仲。父國器，太學生，嘗鬻己田築蘇洋陂，人食其德，歿於姑蘇。樵年十六，徒步護喪歸葬，結廬越王山下，閉戶誦習。既，築草堂夾溲居之。久之，出游名山大川，搜奇訪古，遇藏書家，必留借讀，讀竟乃返。晝理簡編，夜觀星象，飲食寒暑爲之都亡。自負不下劉向、揚雄，一時名人皆器重之。紹興十九年，上皇帝書曰：「興化軍草萊臣鄭樵昧死百拜，獻書皇帝陛下。臣本山林之人，入山之初，結茅之日，心苦志遠，欲讀古今之書，通百家之學，討六藝之文而爲羽翼。如此一生，則無遺恨。忽忽三十年，不與人間流通事，所以古今之書稍經耳目，百家之學粗識門庭。惟著述之功，百不償一，不圖晚景獲見太平，松筠之節不改歲寒，葵藿之心難忘日下。恭惟皇帝陛下誠格天地，孝通神明，天縱之聖，日新之德，君臣合道，一言而致中興。切見兵火之餘，文物無幾，陛下留心聖學，篤志斯文，擢用儒臣，典司東觀，內外之藏始有條理，百代之典燦然可觀。臣伏觀秘書省歲歲求書之勤，臣雖身在草萊，亦欲及茲時効尺寸。顧臣究心於此殆有年矣，今天下圖書若有若無，臣雖不一見之，而皆知其名數所在，獨恨無力抄致，姑能紀之耳！謹搜盡東南遺書，古今圖譜，又盡上代之鼎彝與四海之銘碣，遺編闕簡各有倫次，天篆梵書亦爲釐正。於是提數百卷自作之書，徒步二千里來趨闕下，欲以纖塵而裨嵩華，涓流而益滄海也。念臣困窮之極，而寸陰未嘗虛度，風晨雪夜，執筆不休，廚無煙火，頌聲不絕。積日積月，一簣不虧。十年爲經旨之學，以其所得者作《書考》、《辨訛》，（九）作《詩傳》，作《詩辨妄》，作《春秋傳》，作《春秋考》，作《諸經序略》，作《刊謬正俗跋》。三年爲禮樂之學，以其所得者作《謚法》，作《運祀儀》，作《鄉飲禮》，作《鄉飲駁議》，作《系聲樂府》。三年爲文字之學，以其所得者作《象類書》，作《字始連環》，作《續汗簡》，作《石鼓文

考》，作《梵書論》，作《分陰之類》。五、六年爲天文地理之學，爲蟲、魚、草、木之學，爲方書之學，以天文、地理之所得者，作《春秋地名》，作《百川源委圖》，作《春秋列國圖》，作《分野記》，作《大象略》。以蟲、魚、草、木之所得者，作《爾雅註志》，（二〇）作《詩名物志》，作《本草成書》，作《本草外類》。以方書之所得者，作《鶴頂方》，作《食鑑》，作《採治錄》，作《畏惡錄》。八、九年爲討論之學，爲圖譜之學，爲亡書之學，以討論之所得者，作《群書會紀》，作《校讎備論》，作《書目正訛》。以圖籍之所得者，（二一）作《圖書志》，作《圖譜有無記》，作《氏族》。（二二）以亡書之所得者，作《求書闕記》，作《求書外記》，作《集古系時錄》，作《集古系地錄》。此皆已成之書也。其未成之書，在禮樂則有《器服圖》，在文字則有《字書》，有《音讀》之書，在天文、地理則有《天文志》，有《郡縣遷革志》，在魚、蟲、草、木則有《動植志》，在圖譜則有《氏族志》，在亡書則有《亡書備載》，三、二年間可以就緒。如辭章之文，論說之集雖多，不得而與焉。奈秋先蒲柳，景迫桑榆，兄弟淪亡，子姓亦殤，惟餘老身，形影相吊。若一旦倏先朝露，則此書與此身併填溝壑，不惟有負平生，亦有負於聖時。謹繕寫十八部百四十卷恭詣檢院投進，其餘卷帙稍多，恐煩聖覽，萬一臣書可採，望賜睿旨，許臣料理餘續，當上進，得展盡底蘊，然後鵬歸蕙帳，狐正首丘，庶幾履陛下之地，食陛下之粟，不辜爲陛下之一民也。」詔以其書藏秘府。二十七年，以薦應召，上殿奏言：「臣處山林三十餘年，修書五十種，書皆已就，尚欲取歷代之籍，始三皇，卒五季，彙輯爲一，名曰《通志》，體參馬遷，法則稍異。謹披上要覽十二篇，名曰《修史大例》。」帝曰：「聞卿久矣，何相見晚！」授右迪功郎，禮、兵部架閣。爲御史葉義問所劾，力乞還山，改監南嶽。還家論著閱四年，《通志》就，詣闕請上。會高宗幸建康，命爲樞密院編修官。尋兼攝檢詳諸房文字，修金正隆官制比附中國秩序。因求人秘書省緝書，又坐言者，寢。高宗至自



建康，命以《通志》繳進。會病卒，年五十有九。樵平生枯淡好施，居鄉累歲不一詣守令。筆札雖詔從官給，未嘗取也。金人犯邊，樵言歲星分在宋，金主將自斃。後果然。學者稱夾漈先生。從子僑，見永福。陳大年，字彥永。同舍生陳仲防患疫，人皆避之，大年獨周旋，曰：「疾病相棄，豈人耶？」仲防愈，拜謝君德人也，以特奏名累知柘州。所至有德於民。

楊興宗，字似之。授鉛山簿。孝宗卽位，上封事，召人審察，言和議非便，忤湯思退。除武學博士。丞相陳俊卿舉充館職，除秘書省正字，遷校書郎。與師林光朝同省修四朝會要，成，轉宣教郎，權尚書司勳。論張說不當與趙汝愚同拜，不報。又以封爵太擾，不書勳，忤時相，出知溫州，以嫌改嚴州。終湖廣提舉。

姚宗之，字元仲。第進士，授吉州司戶參軍，以薦擢吏部郎中。請禁援例陳乞之弊。進將作少監，輪對，言三事：一論今日法令貴嚴不貴寬，制度貴質不貴文，任相責遠久業不貴細謹，用將貴成功不貴無過，試人貴職事不貴空言，謀事貴十全不貴欲速。二論節度之官祖宗未嘗輕授，今之將帥爵極欲滿，一旦有事，閫外難任勞苦。願陛下以奔走豪傑爲用將之術，無極其爵而滿其欲。三論國家方經略中原，泛使必時遣，用非其人，徒見辱命，乞特置奉使一司，儲堪任者以備緩急。高宗稱善再三。以親老求外，遂提舉福建路常平茶事，復改浙東。嘗承詔覆實常平米，因言平糴廣儲，所以賑貧乏，救水旱，而追呼筆楚嗟怨之聲上下和氣，願以新易陳，每歲兌易支遣，庶幾實數常存，可爲荒政之備。高宗可其奏。移江南西路提點刑獄，復請祠便養，尋卒。宗之剛方廉直，事親孝，與人忠。嘗與時宰書，以爲鱗次沓番，蠅頭細字，繆爲恭敬，去忠信遠矣。有戚里進位樞筦慶者盈門，而宗之獨未嘗至。每語人云：「事惟公，故明；惟

勤，故敏。」方崧卿稱其言可以爲蒞官之範。子渠，建州錄事參軍，寮潮陽縣。

薛元鼎 字叔雲。歷權戶部左曹郎。輪對，進陳民事利害，劄子五上。孝宗曰：「卿不惟留意職事，議論亦自疏通。」遷秘書丞兼太子侍講。淳熙三年，除提舉浙西路。以勸講東宮特畀道山寓直之寵，被旨相視太湖。奏開運河五十四里，公私便之。除戶部左曹郎官。時有長戶部者獻貢籍之說，元鼎被旨往秀州，欲以一州歲計綜覈贏縮，爲天下準平。還，以所詳究本末源流敷奏，孝宗可其請。頃之，除吏部尚書兼太子論德。復以母老求補外，孝宗曰：「朕方欲用卿。」五年，暫兼權給事中。一日直前奏事，孝宗曰：「卿直諒多聞。」甫旬，母訃至，孝宗嘆惜，遣中使傳宣，令其節哀自衛以俟異眷。歸，將及境，卒。子鸞，見關柝。

謝洪 字範卿。父穆，見韋布。洪第紹興進士，主海豐縣簿，調永豐丞。時林枏爲守，以莊厲臨僚屬，獨引洪諮論。偶有不樂，浩然引歸，廣正字。徐寅《人生幾何賦》以見志。

黃鐘 字器之，唐忠義司徒碣之後。祖寵，評事。父修，知翁源縣。鐘從舅氏陳昭度學，議論粹然，一出於正。既登第，調德化尉。待次閒居，稽經訂史，筆硯典籍，出入自隨。繇三皇五代，皆作紀傳，曰《史要》。又有《周禮集解》、《荀楊續註》、《杜諸註釋》。《史要》諸書、詩文，神閒思遠。晚究心內典，作《傳燈節錄》。德化秩滿，調漳州錄事參軍以歸。

吳珏 字仲玉。天性孝友，勇於爲善。尉南海，以捕盜應格，改知龍巖。節浮費以益學廩。郡僚有建議增諸邑轉輸者，珏爭罷之。會有詔造戰艦，州下取材，珏拒以非故例，不獲免則高其市直，勿以擾民。簽書寧國軍節度判官。有嫠婦無子，或以戶絕告，將人其質，珏曰：「利毫末而絕人將墮之緒，仁者

不爲也。宜聽立嗣。」通判漳州，未上卒。

### 皇朝科第

舉人 進士子、午、卯、酉屬舉人，辰、戌、丑、未屬進士。

洪武三十二年己卯 魏仙

永樂元年癸未舉人 莊觀生按舊志有洪武三十五年一榜，（一三）考是歲革除，故元年開科，而明年甲申會試。

二年甲申進士 莊觀生

三年乙酉 陳恭 黃隆生

十五年丁酉 翁文昶 鄭球

宣德元年丙午 翁福 鄭師陳

正統十二年丁卯 吳智 周琰 鄭重光 陳延

十三年戊辰 周琰

景泰元年庚午 宋泰

二年辛未 吳智

薦辟、貢監賢者雜見列傳中。

有傳

何誠 鄭師陳 陳延 周琰 吳智

何誠 字則明。正統初以庠生貢入太學，出知虹縣，下車問民疾苦，革弊除奸，自學宮以至橋梁、陂

塘、道路，百廢具舉。訓誨生徒，至吏胥子弟亦教之讀書、寫字、習律令、《大誥》。春夏遍歷村邑，勸課農桑。劇賊至，以死誓神，即擒獲之。蝗將害稼，誠祝禱，即不入境。治虹九年，卒官，虹人共買棺殮之。誠妻南京人，昇誠柩即葬於南京。虹人思誠，遷還葬虹，建祠祀焉，百餘年後，仍重修以識不忘。

鄭師陳 授長樂教諭，明教條，嚴考課，講明經義，士風丕變。子熊，石城訓導。從弟夏，襄府伴讀，端雅質實，襄府推重。

陳延 字崇德。國子助教。寬大勤慎，教上有功。

周琰 字廷燦。正統中進士。己巳之變，琰提千卒，分主給餉，犯難冒險，能以智自全。虜去，監收京儲。景泰初，遣勞軍西蜀。歸，復差通州等處，償收芻茭，出內嚴明，宿蠹室穴。英宗復位，命吏部推擇郎官，御史爲牧守，得琰等十四人，宣入面諭，賞寶鈔，賜宴遣之。琰得温州，郡以大治。丁艱，改饒州，爬搔糾剔，將以抑強扶弱，巡視九卿簠簋不飭，琰耻之，遂致官歸。彭韶銘琰墓曰：「於共英皇！東濕御宇。更賢牧民，申以天語。公拜稽首，往蒞於溫。既敏而公，吏蹟攸聞。豪奢踰制，流風斯美。峻其隄防，務俾率禮。薄徵簡繁，視市如野。片言裁決，事無留者。載關儒官，科目相繼。田餘粳稻，水無竭厲。滙澤劇郡，公起治之。剔蠹櫛垢，公優爲之。乾沒可畏，公致而還。千里弗售，方阜所歎。」

吳智 字宏哲。歷南北戶、工二部主事。陞四川提學僉事。敦行檢，嚴條約，公去取，即鄉宦居政地者，亦無所私。陞湖廣副使，仍董學事，楚人稱其清風勁節。尋致仕歸。有來爲御史者，其四川時所取士也，人拜床下，見其服處敝陋，叩欲所言，不答。御史歎息去。

〔校記〕

- 〔一〕「興化故縣」四字，各本原脫，據本書體例補。
- 〔二〕「仙游縣二」四字，各本原脫，據本書體例補。
- 〔三〕「清戎浙江」，原文如此。
- 〔四〕「清朝縣學訓導」，原文如此。
- 〔五〕「曾孫」，〈薛利和傳〉作「孫」。
- 〔六〕「從孫」，〈薛倬傳〉作「從曾孫」。
- 〔七〕「登聞檢鼓院」，據下句「檢院」及〈宋史·職官志〉，當作「登聞檢院」。
- 〔八〕「陳維剛」，各本原作「陳惟剛」，據本卷「宋科第」及傳記目錄改。
- 〔九〕「辨訛」，據鄭樵《夾漈遺稿·上皇帝書》，當作「書辨訛」。
- 〔一〇〕「爾雅註志」，據鄭樵《夾漈遺稿·上皇帝書》，當作「爾雅註」。
- 〔一一〕「以圖籍之所得者」，據鄭樵《夾漈遺稿·上皇帝書》與《通志總序》，當作「以圖譜之所得者」。
- 〔一二〕「氏族」，據鄭樵《夾漈遺稿·上皇帝書》，當作「氏族源」。
- 〔一三〕「年」字，各本原脫，據文義補。

閩書卷之一百十五

英舊志 縉紳

邵武府 邵武縣一

宋科第

端拱元年戊子 龔識

淳化三年壬辰 龔緯

咸平三年庚子 黃奭 龔紀

大中祥符二年己酉 上官昇

五年壬子 上官師旦

天聖五年丁卯 龔宗元

八年庚午 龔會元 黃埕

寶元元年戊寅 危序

慶曆二年壬午 上官凝 黃汝奇 虞肇

六年丙戌 高照

皇祐元年己丑 游烈 吳公達

五年癸巳 吳處厚 上官汲 黃僅 危雍

嘉祐元年丙申釋褐 黃履第一人。 黃仲

二年丁酉 黃通 上官塏凝子。 孫迪

六年辛丑 吳默 黃侑

八年癸卯 龔程

治平四年丁未 吳黯

熙寧三年庚戌 上官均凝子。 上官濟 何與京 何與狷 蕭維申

六年癸丑 孫諤迪子。

九年丙辰 上官彝

元豐二年己未 謝濬 吳表深 李夔 黃德裕裕一作祐。 吳思。

五年壬戌 上官合 吳點 危建侯

八年乙丑 上官恢均再從子。 上官愷均從子。 朱蒙正

元祐三年戊辰 朱朝倚 黃邦彥 危詠 龔貺

六年辛未 上官怡

紹聖元年甲戌 上官恂 黃中美

元符三年庚辰 黃潛善 黃伯思履孫。

五年丙戌 吳偉明 謝錫明一作朋。 謝祖仁

大觀三年己丑 朱缶

四年釋褐 上官公陟

政和二年壬辰 上官儋均子。 李綱夔子。 季陵 盧奎 謝如意 上官公綽 上官惕

五年乙未 鄧邦寧 上官維祺 謝尋 上官致孝 謝喆 朱震

六年丙申釋褐 上官閔

七年丁酉特奏名 上官愉

重和元年戊戌 何兌 鄧根 上官祝 上官公舉 上官閔 上官問 謝詩

宣和六年甲辰 上官全節 謝祖信

建炎二年戊申 上官汝明

紹興二年壬子 黃章 朱岳 上官燁

五年乙卯 黃中 謝如圭 孫續

十二年壬戌 馮諤

十五年乙丑 黃徹

十七年丁卯 上官歸 上官端義

十八年戊辰 謝鴻 謝份



二十一年辛未 朱致恭一作致虔。

二十四年甲戌 黃存永

二十七年丁丑 趙善俊

三十年庚辰 謝源明 吳英 趙善佐 丘翔

隆興元年癸未 趙善滂 黃遷

特奏名 上官粹中均再從曾孫。

乾道二年丙戌 上官駿

特奏名 上官瑩中

五年己丑特奏名 上官泰亨

八年壬辰 趙善儀 趙善侃 趙善恭 趙善膺

淳熙二年乙未 任希夷 饒幹

五年戊戌特奏名 上官賁 上官伯忠

八年辛丑 俞聞中

紹熙元年庚戌 吳炎 黃靜夫 李東

四年癸丑 黃大全

慶元二年丙辰 黃樞 上官簡

四年戊午 上官瀧

五年己未特奏名 上官損 上官必克借曾孫

嘉泰元年辛酉 上官銘

二年壬戌 黃榮

開禧元年乙丑 黃順之 龔宗顯

三年丁卯 上官衡孫

嘉定元年戊辰 上官渙西 黃範 鄒恕

三年庚午 上官濂 上官渙申

四年辛未特奏名 上官發

七年甲戌 杜東 杜采 葉武子

九年丙子 上官益明

十年丁丑特奏名 上官琦 上官昂 上官知方

十二年己卯 上官彥華淳祐十年特奏名

十五年壬午 上官文正

十六年癸未特奏名 上官肇宗

紹定二年己丑 丁朝佐

四年辛卯 上官渙元

五年壬辰 危夢亨

淳祐元年辛丑 上官渙然 任尚

四年甲辰 上官子進

特奏名 上官應琪 上官庸

七年丁未 上官天錫

寶祐元年癸丑 危昭德

四年丙辰 吳季子

咸淳元年乙丑 黃公紹 危徹孫

七年辛未 林順豫

薦辟、恩蔭人才賢者雜見列傳中。(二)

有傳

龔慎儀子識附，侄穎。

上官凝子增、均。均子愔、梧。愔曾孫必克。梧孫謙。均再從子恢。恢子模，曾孫渙西、渙然、基，

從曾孫損。均從曾孫粹中。(二)

虞肇 高照 游烈 危雍 黃仲 族子中美。中美子永存。黃通 孫諤 謝潛

子師稷。李夔子綱，侄平西，族孫東。

龔慎儀 字世則。父愈，仕南唐爲太傅。慎儀仕禮部侍郎，後隨李煜歸太祖，以駕部郎中爲歙州刺

史。宜春盧絳欲據福建，領衆數千繇新安入歙，約慎儀開城降，慎儀不聽。已，城陷，絳衆人，慎儀朝服坐堂皇，神色自若。絳曰：「聞公素有籌略，今下歙，特請公爲謀主。」慎儀厲聲曰：「吾已受宋命，雖一日失援，肯從賊耶？」絳怒殺之，舉家被害，二女被虜，縊死於邑之香嚴寺門下。子識，侄穎。識以監察御史從

真宗東封，還拜殿中侍御史兼左巡使，後除司封郎中、平江軍節度副使。

穎 字同秀。父最，守秘書監。穎初仕南唐爲內史學士，隨李煜歸宋，擢爲御史。時盧絳亦來歸宋，穎當其陛見，袖鐵簡，直前擊絳首。太祖驚問，穎俯伏言故。太祖嘆曰：「江南小國有義士若此耶？」遂誅絳，義穎而釋之，謫知舒州，又知鼎州。太宗立，轉殿中侍御史。進《歷年圖》，降勅獎諭。大中祥符二年，致仕。官至銀青光祿大夫檢校司徒、持節營州諸軍事兼御史大夫、上柱國、瑯琊郡開國侯。卒年八十有三。穎慷慨英特，諫諍論議卓犖奇偉，世人號曰端公。所作有《正己箴》，李忠定公爲跋。孫原寓，居龍巖縣，見《龍巖志》。

上官凝 字成叔。初調銅尉，官滿，有老叟十數人送至境上，餽藥數器，行數里發之，皆金，追而反之，曰：「吾不私汝，汝忍私吾？」調潭州司理參軍，時郡繫滿獄，凝辨察當罪，郡無冤人。守常以喜怒輕重，凝數爭之，守怒，爭益力。用薦爲陽朔令，改著作佐郎，歷知攸、湖口、分寧、安丘縣。凝在分寧，治豪右，決淹獄。在安丘，邑有成向者，以殿中丞廢歸，干請侵漁，致貲鉅萬，凝責數堂下，使伍纍囚且窮治之。會其族人奕爲守，向巧語譖凝。守聽之，上奏追逮，驗治無狀。山東大蝗，凝境上有烏萬數，群食之，歲獨大熟。熙寧三年，遷尚書職方員外郎、通判處州，賜五品服。凝始至州，守持法峭深，凝輒格之，不下。其後，守有置舍，無不先眠凝意。未幾卒，民悲嘆出涕。子塏、均。

塏 字彥明。官至太守、中允、廣東轉運判官。才行過人，治有異績。子愷、恂、怡。愷，字正平，初調溧陽尉，改新息，遷濠州錄參，改永城丞，從事十餘年，廉正明決，雖不見知而自信不改。恂，教授興化軍。怡，見韋布。

均字彥衡。熙寧三年，神宗初革聲律，以策試士，均人對數千言，援引古今無所顧忌。知制誥呂大臨、直史館蘇軾擬均第一，以策中論新法，忤王安石意，遂置第二，授承奉郎、大理評事、北京留守推官。大臣薦均經學通明，授國子監直講，轉光祿寺丞。元豐間，賜對垂拱殿，神宗問：「治天下何先？」均言：「以道爲主，故以察理則是非明，以審官則邪正辨。」尋拜監察御史裏行，加宣德郎。相州富人子殺人，獄疑，讞於審刑大理，詔貸死。京師流言法官竇莘等受賕逮繫，御史府知制誥蔡確引猜險吏推勘慘酷，無敢明其冤者。均是時方以確薦爲御史，奏乞移司根治。未報。明日又言：「確持刑刻深，所辟官皆險薄，侍勢凌轢。請以獄事詔臣等參治。」疏入，責均光祿寺丞、知光澤縣。逐妖巫，立義社，政績甚著。秩滿代還，監都進奏院。哲宗卽位，復宣德郎，尋轉奏議郎，擢開封府推官。元祐元年，再除監察御史。時言者請兼用詩賦試士，宰相遂欲盡黜經義，太學生改業者十四五。均言：「經術以理爲主，詩、賦以文爲工。主理者，於言爲實，而所根者本。工文者，於言爲華，而所逐者末。先帝去數百年之弊，不爲不難。陛下臨馭之初，正宜獎經術以堅學者之志。請令學者各占三經，雜以《論語》、《孟子》，不必專用新義，試策以二，一問歷代，一問時務。」章三上，經術不廢，亦均力也。自熙寧以來，京師百司有謁禁，均言：「以誠待人，則人思竭忠；以疑遇物，則人思苟免。願除開封大理外，餘皆釋禁，以明洞達不疑之意。」時詔侍從舉堪爲諫官各二人，又詔薦中外官以充監司之選。均言：「愛憎好惡，天下常情。立法之始，人固未敢營私謬薦，竊恐久而弊生，背公徇己，薦舉之人惟權與舊。願以所舉盡報御史臺臣等，得以盡知得失，所薦非才，顯加譴罰，則真才實行可坐而得。」又請罷青苗法，以復常平。章再上，青苗遂罷。故事：左右僕射人省閱訴牒多至數百，又常程細務無不關白。均奏：「宰相位尊任重，天下之事無所不總，今分視聽於訴

牒，勞治慮於細瑣，竊恐政教之大、安攘之謀，有不暇深思而詳講。請以省中事務類分輕重，尚書可以覽決者，不必關二丞，二丞可以覽決者，不必關僕射。」又言：「福建一路槍杖手，上有費財之患，下有妨農之弊，於實無補，不若罷集，公私兩便。」時詔書慰安中外，宿姦舊惡一切置不問，臺諫仍不得彈治。均言：「賞罰者，天下公義，要在處之至當，斷以必行。君用姑息之政，則諫官、御史上觀朝廷之旨，次窺大臣之意，天下事不得上達，恐非朝廷之福，乞追寢詔書。」加武騎尉。言：「治天下二道，寬與猛而已。熙寧以來，諸路監司不能深明朝廷之意，務爲慘核刻深之法，此傷猛之弊也。陛下臨御，務從寬大。比聞諸道監司又不能明陛下之美意，一切以苟簡縱弛爲事。願明詔四方，以寬不縱惡、恩不傷惠之意。」詔具，均童布告諸路。（三）轉承議郎。左僕射蔡確弟軍器少監碩，盜貸官錢以萬計，獄具，均請并正確罪以勵百官。又論尚書右丞李清臣附會王珪、蔡確，乞退清臣出就便藩。清臣遂出知河陽。監察御史張舜民論邊事，因及宰相文彥博，左遷判登聞鼓院。均請還之，不報。中丞王巖叟、御史孫升、呂陶約均再論，均曰：「論事有可一再而止者，有當以身決去就者。舜民事小，不當再論。」巖叟等遂奏疏論列。詔召巖叟等三人戒諭之。巖叟意均賣己，遂劾均未嘗奏論而罔同列。詔均分析。均繳疏草以聞，禁中亦出均先所上疏。巖叟徙吏部侍郎，出升、陶等補郡。遷均殿中侍御史。久之，力乞罷臺職，除尚書禮部員外郎，遷吏部以避嫌。復除禮部，加雲騎尉。元祐五年，再授殿中侍御史。傅堯俞爲中書侍郎，許將右丞，韓忠彥同知樞密院，三人論事多同異，俱求罷。均言堯俞等雖有辯論之失，事皆緣公，望令就職。御史中丞蘇轍等尚以爲言，均言：「天下之事，以是非爲主。所論若當，雖異，無害爲同；所論若非，雖同，未免爲異。若陛下罷去堯俞等，則執政數人自此曲相隨順，誰肯爲朝廷以身當責？」詔罷許將尚書右丞，知定州。均疏言：

「曰：大防堅強自任，每有差除，同列不敢爲異，惟許將時有異同。與大防相善者希其意，率係升盡力擠排，升等畏轍之勢，不敢違戾。許將既以異論罷，諫官、御史不敢復有異言，執政、臺諫皆務隨宰相，朝廷威福皆歸大防，綱紀法令自此壞矣。」又言：「御史耳目之任，中丞風憲之長，當公是非，別白善惡以補助聖朝，乃愛憎任情，毀譽違衆。願出轍等章疏付外，如許將有罪，乞加譴命，無罪，願行蘇轍妄言之咎。」章四上，不報，遂居第待罪。詔以均補外。大臣指均爲朋黨，當黜。宣仁太后曰：「上官均無罪。」遂出知廣德軍，轉朝奉郎提點河北東路刑獄，加飛騎尉。紹聖元年，召拜左正言，論治天下六術，曰：審好惡，曰辨邪正，曰察衆言，曰謹政令，曰操要術，曰明賞罰。是時，大防已罷政，均疏大防六罪，章再上，大防遂斥。宰相章惇欲專政柄，陰去異己，出吏部尚書彭汝礪知成都府，而召朱服爲中書舍人。均言：「汝礪行義高潔，風節素著，雖除美職典藩郡，實則疎之。朱服柔佞傾邪，典司誥命，非所以遠佞人也。」忤惇意，汝礪降職，知江州，均提點京東西路刑獄，徙淮南東路刑獄，遷梓州路轉運副使，知越州。徽宗卽位，出均姓名，將召爲臺諫，會執政以親嫌辭，除秘書少監。道拜起居郎。人對，陳治道四要。建中靖國元年，累遷給事中，言：「人主之學在於知要、適用，願退朝宴閒觀，閱經史以明義理之大致，達治亂之大體。因進對之臣，虚心下問，以考政事之得失，觀群臣之志趣，則天下之義理、臣下之邪正，判然如白黑之辨。」疏入，忤旨，充弔慰大遼國信使。使還，言者論均奉使衣服不如例，降授朝散郎。徽宗初政，天下翕然望太平，已而當軸者復欲盡循熙寧法度，爲紹述以風均。均曰：「法度惟是之從，何有彼此？」忤執政意，以龍圖閣待制知永興軍，徙知襄州。崇寧元年，與元祐姦黨籍，奪職，主管江寧府崇禧觀。大觀二年，轉朝請郎，叙復朝奉大夫，主管杭州洞霄宮。四年，復集賢殿修撰，提舉洞霄宮，轉朝散大夫。政和五年，復龍圖閣待制，抗

章告老，遷朝請大夫，以待制致仕。郊恩封文安縣開國男，食邑三百戶，加開國子，益封爲五百戶。卒，贈通議大夫，詔揚州給葬事，累贈特進。所著有《曲禮講義》二卷、《奏議》十卷、《廣陵文集》五十卷。子四人：惇、儉、惇、悟。

惇 字仲雍。踰冠登進士。主膠水簿，改監海鹽鎮，授泗州戶曹，轉封丘簿。宣和六年，除太學正。高宗卽位，改宣教郎，召至行都，差充提舉巡行事務所幹辦公事。二帝北狩，惇上書相府，請勸車駕入京，款謁廟社，慰安士民，遴選統帥，蒐簡士卒，以圖興復。又上相府書，論朝政之宜。建炎中，累除吏部員外郎，以親老丐祠。紹興五年，除知南劍州。九年，召赴行在，以親老力上祠。轉朝請，賜五品服，尋卒。惇剛介有聲，其守延平，去鄉不遠，親故莫或敢詣。代還抵家，俸用已罄矣。爲文清簡，援筆立就，尤工於詩，典雅適逸。有《尚書小傳》、《論語孟子略解》及《史統》、《史旨》。

悟 字仲達。以父蔭，累官轉運使。建炎三年，留守東京。劉豫叛降，金虜命節制京東兵馬，遣人說悟使降，悟斬其使。豫復賂悟左右，使同說，復斬之。金兵攻東京，勢益急，力不能支，城陷死焉。贈朝散大夫、右文殿修撰官。其後五人。

必克 字復之，惇曾孫，幼孤，事母孝謹，篤學好修。慶元五年，以積舉推恩監成都府都稅務，鈎察精明，吏不容奸，以是課額增羨。諸司薦其才行，調泉州錄參，卒。

謐 字安國。悟孫，從朱文公游。以祖蔭授會昌東尉，調永州推官，簡易不刻深。遷四會令，卒。

恢 字閔中，均再從子也。累知南劍州，移徽州。仁愛爲治，多所寬貸，有甚不可者，乃峻臨之。晚丐祠里居，有過其里者，指以相示：「此熙、豐名儒也。」胡安國上書宰相，言恢諳歷世務，端重有守，遂以



與楊時同薦。積官中大夫，封歷陽縣開國男，食邑三百戶。子模、祝，曾孫渙酉、渙然、基，從曾孫損。

模，字規仲。以蔭補官，通判撫州、崇仁。宜黃盜起，勢張甚，帥、憲二司以討賊付模。模密授方略，率將士據險，阨其衝，縱兵擒賊酋，餘皆就縛，衆以爲神。祝，爲勅令所刪定官。

渙酉，字元之。累官通判鎮江府，委修丹陽塘岸，訪求本末，旦暮視役。除知真州兼淮南運判，創忠武軍，五百人，別爲營壘以壯守衛，預辦一年錢米，以遺來者。又以羨財糴米萬五千石備荒。淮陰、盱眙道梗，渙酉造舟通海運，軍餉賴不乏。除淮南運判，力請祠。端平三年，除知池州，緝舟楫，爲江防。浮光失守，虜哨騎直抵江岸，知有備引去。除提舉浙東常平茶鹽公事，予祠。淳祐更化，除右曹郎官，辭免，弗允，仍兼國用所參詳官。力辭兼職。上殿首疏邪正是非之辨，次論屯田軍政之弊。改尚書佐郎，遷將作監、大理少卿，尋陞卿。復論國勢、人材、運餉、流民數事，言尤忠切。又乞令荆襄、湖南、兩淮土著上子不分沿邊，次邊並許赴武舉試，量增解額四名、省額二名，以惠邊郡。遷起居舍人。尋與祠。十二年，除右文殿修撰、提舉亳州明道宮。寶祐二年，復兩上章請老，陞集英殿修撰，致仕，積階朝議大夫，爵歷陽縣開國男。渙酉子立獨行，無所附麗。紹定、淳祐兩忤時相，閒居十年。晚立螭坳，又罹讒口。尋以麾節起家，秩滿，卜居吳門，宇棟蔽風雨，田園粗供伏臘而已。弟渙然。

渙然，字文之。早有文名，尤留意性學，首悟太極之旨，分解圖畫，以授同志。紹定六年，以渙酉裡需，補將仕郎，就授迪功郎，調鄞縣尉。不畏強禦，務直民枉，爲權門所擠。後爲無爲軍錄參。淳祐元年，擢進士，就辟準備差遣。虜圍安豐，制閫委渙然巡視江面，稿師上流。虜退，圍解，薦陞一階。尋調安豐教職。淮東制使李曾伯鎮維揚，辟致幕下。適虜寇深入，曾伯遣詣采石，是日虜騎已至城下，乃詭計宵

渡。上功，循一資。明年，復委渙然督運吳門，僅閱月，運米六十萬石，特轉奉議郎，知全椒縣。右丞相趙葵董師江上，檄渙然入幕，氣概相與。會制使吳淵一見偉之，不聽還邑，府中有難決事悉來折衷。擢幹辦行在諸軍糧料院，繼遷戎簿。當陞對，首言正君心，明公道，愛善類以壯君子之脉，容直言以申公論之氣。次言邊事，深以玩敵爲戒，條陳守邊三策以獻。改胄監簿，尋行轉朝奉大夫，未幾與祠。歲餘，差知邵武軍，以鄉井乞迴避，除司農丞，遷右司郎，旋主管建康府崇禧觀，卒。渙然孝友剛方，入仕三十餘年，家無餘財。

基 字仲立。少誠實警悟。九歲而孤，奉母孝謹。以恢遺澤授迪功郎，尉安化，不赴。調監建康倉，以母憂去。調興國丞，適歲歉，穀價翔踊，基邑當賑糶，令欲更候臺府之報，基曰：「何可久待？有譴，身當之。」卽計口給曆，遠近皆得就糶。秩滿，調衡州軍事推官。趙丞相汝愚謫零陵，道衡陽，卒，時韓侂胄用事，沿途州郡送者皆獲譴，及是，兩臺州司略不敢爲汝愚營辦。基無雅素，獨經紀之。守錢鑒上其治行，除四川茶馬，調都大提點鑄錢司檢討官，卒。汝愚子崇度，適守邵武，臨穴哭奠。子銓，好學能文，補登仕郎。

損 字益之。少孤，事祖母以孝聞。博學工文。慶元五年，特赴廷試，授武平簿。創養濟院以處貧病及行旅之無依者。有盜劫人，乃扳鄰人分受其物，已，誣服。會令以疾在告，被誣者泣訴，損呼盜訊之，設方略與辯白，誣者得釋。調道州寧遠丞，未赴，卒。

粹中 字德厚，均再從曾孫。喜義嗜學。隆興初，以累舉試策人第，調武岡軍僉判。在官，以長者稱。零陵有重囚，獄久不決，粹中推詰片言而定。秩滿，知增城縣。勤恤民隱，獎進士類，勸農桑，緩催

科。漕使上其治行於朝。

虞肇 字公充。爲御史臺推直，用法明審。出知南安縣，未七十，謝歸。

高照 任處州理。邑多盜，捕者利賞，誣及良民。照察其枉百餘人，出之。

游烈 字晉老。素以孝節稱。從胡安定瑗學。官至職方員外郎。郡人知經學，自烈始。

危雍 任晉江令。築煙浦埭，清洋陂爲民灌田，民至今受賜。

黃伸 字彥發，黃五經裔孫也。五經，名惟淡，教子皆登科，世號黃五經。伸與兄僅、弟侑齊名，時比河東三鳳。初知河南縣，文忠烈薦之，有束帛之賜。繼知泉州，建學校，芝生於梁。改建州，境內復生瑞粟，以治最聞。終司農卿。子滂、沔、沂，皆克舉其官。

中美 字文昭，黃五經十一世孫也。父蒙，舉進士。中美初調真定府左司理參軍、知平鄉縣。以守正不阿，忤上官，罷退。久之，更調鎮西軍節度推官。地鄰極邊，守，武將也，視法令僚屬蔑如。中美獨不爲撓，事有不可，必庭辯。改宣德郎、知衛縣。以治河功轉奉議郎，除河北都轉運司屬官，北京留守辟以爲真定府錄事。是時河北連歲不登，民相聚爲盜，守懼燕散逸如平時，中美每當集，輒辭不與。守問故，對以實。守不悅，乃移信德府司錄事。當宣和之末，承平百有餘年，二三弄臣竊國大柄，建取燕、雲以召非常之變，捷書日聞，官吏相慶，中美獨有憂色，人問故，蹙然口：「太平日久，軍旅遽興，廩無兼歲之儲，歲薦饑，民死無數。河北，天下根本也，可重困之邪？」俄河北盜蜂起，信德城守屢危，金虜乘之，遂不能支，官吏相與匍匐拜降恐後，中美奮然誓死。虜旣入城，放兵四出，有挺刃脅中美降者，中美顧左右，踣之而逸，變姓名匿里巷中，虜退乃出。宣撫使奇其節，俾行府事，中美亦撫摩瘡痍，期復按堵。未幾，以內禪

轉朝議大夫，則以資高不當，復州佐郡，而省罷以歸。靖康元年，還次京師，遭圍城之變。明年欽宗北轅，虜擁立張邦昌，一時公卿俛首唯唯，中美即日移檄致仕。當是時也，不約而去者僅四十人，而中美與焉。不數日，以病卒，累贈光祿大夫。子永存。

永存 字堅叟。紹興中登第，以才能聞。召尚書郎，官軍器監。淳熙中，出爲淮南轉運副使，俾修農戰之業，以爲北向之漸。官至正議大夫。孫大昌，隱德不仕，有《兼出語解》。大昌子公紹，字直翁，號在軒，著《韻會》。

黃通 字介夫。既登第，以韓琦、范仲淹論薦，除大理寺丞。通身長八尺餘，風韻蕭洒，嘗騎牛吹鐵笛，浩歌長嘯，衆目爲異人。有《賦元宵燈詩》，世稱其雄俊。

孫諤 字正臣。父迪，太常博士，同提舉兩浙市易司。諤登進士方弱冠，授池州司法參軍。迪恐不更事，令就學律。明年，試大法，中第一。時舒、王用事，中書置五房，遴揀天下賢才，諤以才名在選中，除監制勅庫。制勅庫用士，自諤始。未幾，除吏房習學公事，同編修。中書條例，一考卽真。丁父憂。再監制勅庫，仍多攝五房職事。因議司農法，駁其不當者，大臣力主之，諤反覆不已，忤大臣意。又嘗叱堂吏，語有侵大臣，因造爲訕上語以聞。神宗察其無根，得不坐。出爲睦州司理參軍，睦人畫像祠之。紹聖中，累官尚書刑部員外郎，以事免。改吏部員外郎。賜對，從容請儒臣討論官制而補完之，成一代之典，追配《周官》。有旨條具以聞。會言者謫諤爲元祐辯訴，罷職，出知南劍州。未赴，遇上皇登極，恩遷朝奉郎，賜緋魚袋，召爲司勳員外郎。崇寧初，以國子祭酒兼權秘書監，抗章請外，除直龍圖閣，權發遣江、淮、荆、浙等路制置發運副使。初，蔡京一見諤，奇之，爲戶部尚書薦以自代，及與政，欲以爲刑部侍郎，諤辭。又

欲以爲他曹，又辭，曰：「異時聞從官闕，大臣有以某名進者，上未以爲然。公秉政宜慎，所引毋以不肖累君也。」京意未已，會有傳譔趣與新政異者，遂罷，發運知潤州。未幾，得管勾杭州洞霄宮，曰：「吾志也。」大觀元年，遷朝請郎。二年，以八寶恩遷朝奉大夫，洞霄再任恩，復請差提舉舒州靈仙觀。後入元祐黨籍。譔善刑書，不樂爲刑官。精陰陽、星曆學，未嘗一言及之。異時天官曆火、木二星及蝕時刻多不合，與姚舜輔所撰曆互有疏密，委官考詳，前後有異，命譔校之，其說遂定。九宮貴神壇位失次，悉譔釐正。蓋譔以儒學自將，其於法家、術數皆因事而見，不樂以此名世。精通內典，其篤信之至於屏聲色，黜滋味。嘗有疾，得異方，須鸚鵡，素不喜殺，不忍爲也，藥久不就，忽有鸞禽擊死者墮庭中，得而餌之，疾隨愈。有奏議、解經、雜著、文集四十卷。子縝，登第爲郡，有政績。

謝濬 紹聖中知沙縣，多善政，吏民悅服。子師稷。

師稷 字務本。初歷福安、懷安丞，陞判興化軍，辨明冤獄。遷湖北路提舉常平事，再遷本路轉運判官，改知襄陽兼京西安撫司公事。淳熙中，爲福建提刑。建、劍、汀、邵民苦敷鹽之弊，按法除之，奏免輸鐵葉錢。秩滿，再領漕事，罷行鹽法利害。改知明州兼沿海制置使，召爲右司郎中。以集英殿修撰知平江府，樽節浮費，未滿歲，積四十萬緡。城壞，遂請以所積繕完之。師稷生而端重廉介，天性孝友。歷諸道建臺作牧，所去見思，鄉人爲立壽祠於大乾惠應廟之右廡，將樂、順昌亦皆有祠。以老丐祠，轉中大夫，致仕。卒八十三。子如圭，太常卿。孫源明，成都路安撫。

李夔 字師和。幼聰敏，經書一覽成誦，文不停綴。與楊時友善。初尉華亭，有政聲，遷縣令。累官右文殿修撰，終龍圖閣待制。子綱。

綱字伯紀。積官監察御史兼權殿中侍御史。以言事忤權貴，改比部員外郎，遷起居郎。宣和元年，京師大水，疏言陰氣太盛，當以盜賊外患爲憂。謫監沙縣稅務。七年，爲太常寺少卿。金人渝盟，邊報狎至，詔起師勤王，命皇太子爲開封牧，令侍從各陳所見，綱上禦戎五策，且語所善給事中吳敏曰：「建牧之議，豈非委以留守乎？東宮恭儉聞於天下，巨敵猖獗如此，非傳以位號，不足招徠天下之豪傑。公職論思，曷不極奏？」敏曰：「監國可乎？」綱曰：「肅宗靈武之事，不建號不足以復邦，第建號之議不出明皇，後世惜之。主上聰明仁恕，公言萬一行。」翌日，敏請對，具道所以，因言：「李綱論與臣同。」有旨召綱，綱刺鼻血上疏，內禪之議遂決。欽宗卽位，召對延和殿，迎謂曰：「朕在東宮見卿《水災疏》，尚能誦之。」李鄴使金議割地，綱奏：「祖宗疆土當以死守，何可尺寸與人？」欽宗嘉納。除兵部侍郎。靖康元年以吳敏爲行營副使，綱爲參謀。金將幹離不兵渡河，徽宗東幸，宰執議請上暫避敵鋒，綱曰：「道君皇帝挈宗社授陛下，可委去乎？」欽宗默然。太宰白時中謂都城不可守，綱曰：「天下城池，豈有如都城者？宗廟、社稷、百官、萬民所在，捨此何之？但當整飭軍馬，固結民心，相與壁守，以待勤王之至。」欽宗問：「誰可將者？」綱曰：「朝廷崇養大臣，蓋將用之有事之日。白時中、李邦彥等雖未必知兵，藉其位號撫將士以抗敵鋒，乃其職也。」時中忿曰：「李綱莫能出戰否？」綱曰：「陛下若不以臣庸懦，使治兵，願死報。」乃以綱爲尚書右丞。宰執猶守避敵之議。有旨以綱爲東京留守，綱爲欽宗力陳所以不可去之意，欽宗意頗悟。會內侍奏中官已行，欽宗變色，倉卒降御榻曰：「朕不能留矣。」綱泣拜以死邀之。欽宗顧綱曰：「朕今爲卿留。治兵、禦敵，專以責卿。」綱皇恐受命。未幾，復決意南狩。綱趨朝，則禁衛環甲，乘輿已駕矣，綱急呼曰：「爾等願守宗社乎？願從幸乎？」皆曰：「願死守。」綱入見曰：「陛下已許臣留，何復戒行

也？今六軍父母妻子皆在都城，願以死守。中道散歸，陛下孰與爲衛？敵兵已逼，知乘輿未遠，健馬疾追，何以禦之？」欽宗感悟，遂命輟行。綱傳旨語左右曰：「敢復有言去者斬！」禁衛皆拜伏呼萬歲。六軍聞之，無不感泣。命綱爲親征行營使，以便宜從事。綱治守戰具，不數日畢。敵兵攻城，綱身督戰，募壯士縋城下，斬酋長十餘人，殺其衆數千。金人知有備，又聞欽宗已內禪，乃退，求遣大臣至軍中議和。綱請行，欽宗遣李悅，綱曰：「臣恐悅怯懦誤國，安危在此一舉也。」欽宗不聽，竟使悅。金人須金幣以千萬計，求割太原、中山、河間，以親王宰相爲質，悅不能措一辭。還報，綱謂：「所需金幣，竭天下且不足，況都城乎？三鎮，國之屏蔽，割之何以立國？至於遣質，卽宰相當往。若遣辯士，姑與之議所以可不可者，宿留數日，大兵四集，彼孤軍深入，不得所欲，亦將束歸。此時與盟，則彼不敢輕中國，而和可久也。」宰執議不合，綱不能奪，求去。欽宗慰諭曰：「卿第出治兵，當徐議之。」綱退則誓書已行，所求皆與之，質以皇弟康王及少保張邦昌。時朝廷日輸金幣，而金人需求不已，且肆屠掠。四方勤王之師漸有至者，种師道、姚平仲亦以涇原、秦鳳兵來。綱奏言：「金人兇悖已甚，勢非用師不可。敵兵號六萬，而吾勤王之師集城下者已二十餘萬。彼以孤軍人重地，猶虎豹自投檻穽。今若扼河津，絕饒道，分兵復畿北諸邑，而以重兵臨敵營，堅壁勿戰，俟其食盡力疲，然後以一檄取誓書，復三鎮，縱其北歸，半渡擊之，此勝計也。」欽宗深以爲然，約日舉事。姚平仲急於要功，先期率步騎萬人夜斫敵營。夜半，中使傳旨諭綱速援，綱率諸將旦出封丘門，與金人戰幕天坡，以神臂弓射，金人却之。平仲竟以襲敵營不克，懼誅亡去。金使來，宰相李邦彥語之曰：「用兵乃李綱、姚平仲，非朝廷意。」遂罷綱以謝金人。太學生陳東等詣闕上書，明綱無罪，軍民不期而集者數十萬，呼聲動地，恚不得報，至殺內侍。欽宗亟召綱，綱入見泣拜，請死。欽宗亦

泣，命綱復爲尚書右丞，充京城四壁守禦使。綱下令能殺敵者厚賞，衆無不奮躍。金人懼，稍稍引却，且得割三鎮詔及親王爲質乃退師。除知樞密院事。綱奏請如瀋淵故事，遣兵護送，且戒諸將可擊則擊之。乃以兵十萬分道並進，將士受命，踴躍以行。先是，金帥粘罕圍太原，守將折可求、劉光世軍皆敗，平陽府義兵亦叛，導金人入南北關，取隆德府。至是，遂攻高平。宰相咎綱盡遣城下兵追敵，恐倉卒無措，急徵諸將還。諸將已迫及金人邢、趙間，遽得還師之命，無不扼腕。比綱力爭復追，而將士解體矣。詔議迎太上皇還京。初，徽宗南幸，童貫、高俅等以兵扈從。既行，聞都城受圍，乃止東南郵傳。及勤王之師首路籍籍，言貫等爲變，陳東上書乞誅蔡京、蔡攸、童貫、朱勔、高俅、盧宗等，廷議遣聶山爲發運使，往圖之。綱曰：「使山所圖果成，震驚太上，此憂在陛下。萬一不果，是數人者挾太上於東南，求劍南一道，陛下將何以處之？莫若罷山之行，請於太上，去此數人，自可不勞而定。」欽宗從其言。徽宗還次南都，以書問改革政事之故，且召吳敏及綱。或慮太上意有不測，綱請行，曰：「此無他，不過欲知朝廷事爾。」綱至，具道：「皇帝聖孝思慕，欲以天下養之意。請陛下早還京師。」徽宗泣數行下，詢近日都城攻圍守禦，次第語漸浹洽，因及行宮正遞角等事，曰：「當時恐金人知行宮所在，非有他也。」綱奏：「方艱危時，兩宮隔絕，朝廷應副行宮，亦豈能無不至者？在聖度燭之耳。」且言：「皇帝仁孝，惟恐有一不當太上皇帝。每得詰問之詔，輒憂懼不食。臣竊譬之家長出而強寇至，子弟之任家事者，不得不從宜措置。長者但當以其能保固園大計而慰勞之。苟誅及細故，則爲子弟者何所逃其責哉？」徽宗感悟，出玉帶金魚象簡賜綱，且曰：「善輔助皇帝，扞守宗社，調和我父子間。」綱感泣拜還，具道徽宗意。宰執進迎奉太上儀注，耿南仲議屏太上左右，車駕乃進，綱言：「如此，是示之以疑也。天下之理，誠與疑、明與闇而已，自誠明而推之，可至



於堯舜，自疑閭而推之，其患有不可勝言者。耿南仲不以堯舜之道輔陛下，乃閭而多疑。」南仲佛然曰：「臣適見左司諫陳公輔，乃爲李綱結士民伏闕者。乞下御史置對。」上愕然。綱曰：「臣與南仲所論國事也，南仲乃爲此言，願以公輔事下吏。」臣得乞身待罪。」章十餘上，不允。時北兵已去，太上還宮，上下恬然，置邊事不問。綱獨以爲憂，與同知樞密院事許翰議調防秋兵。吳敏乞置詳議司，檢詳法制，以革弊政，詔以綱爲提舉官，南仲沮止之。時太原圍未解，种師中戰沒，師道病歸，南仲曰：「欲援太原，非綱不可。」乃以綱爲河東北宣撫使。綱辭，章十餘上。許翰書「杜郵」二字遺綱，綱惶恐受命。行次懷州，有詔罷滅諸路所起兵。綱奏：「太原之圍未解，河東之勢甚危，臣出使未幾，朝廷盡改前詔，臣誠不足任此。且以軍法勒諸路起兵，而以寸紙罷之，臣恐後時有所號召，無復應者矣。」疏上，不報。御批曰：「促解太原圍，而諸將承受御書事，皆專達，宣撫徒有節制名，綱上疏極陳節制不專之弊。時方議和，詔止綱進兵。未幾，徐處仁、吳敏罷相，而相唐恪，許翰罷同知樞密院，而進聶山、陳過庭、李回等。吳敏復謫置涪州，綱聞之，歎曰：「事無可爲矣！」即上疏丐罷。乃命种師道代綱，而召綱赴闕。尋除觀文殿學士，知揚州。未幾，以綱專主戰議，喪師費財，落職提舉亳州明道宮，責授保靜軍節度副使，建昌軍安置。再謫寧江。金兵再至，徽宗悟和議之非，除綱資政殿大學士，領開封府事。綱行次長沙被命，即率湖南勤王之師入援。未至，而都城失守。先是，康王至北軍，爲金人所憚，求遣肅王代之。至是，康王開大元帥府承制，復綱故官。及即位爲高宗，拜尚書右僕射兼中書侍郎，趣赴闕。力辭不許，因上十事，以比姚崇：一議國是，二議巡幸，三議赦令，四議僭逆，五議偽命，六議戰，七議守，八議政本，九議久任，十議修德。翌日班綱議於朝，惟僭逆、偽命二事留中不出。綱所議僭逆，謂張邦昌爲國大臣，不能見危授命，而挾金人之勢，

易姓改號，宜正典刑以戒無將；其議偽命，謂受邦昌偽官者，無仗節死義之忠，俛首順從，所當差等其罪。於是綱再言：「留中二事，乃今日政刑之大者，陛下欲建中興之業，而尊崇僭逆之臣，何以示四方？不問偽命之污，何以厲士節？」時執政中有論不同者，而黃潛善主邦昌甚力，綱因泣拜曰：「臣不可與同列，當笏擊之。」陛下必欲用邦昌，第請罷臣。」高宗頗感動，乃貶邦昌潭州，吳玠、莫儔而下皆遷謫有差，謂綱曰：「今可受命矣。」綱拜謝。有旨兼充御營使。人對奏曰：「今國勢不逮靖康間遠甚，然而陛下英斷於上，群臣輯睦於下，中興之功庶幾可圖。顧非有規模，而知先後緩急之序，則不能以成功。夫所謂規模者，外禦強敵，內消盜賊，修軍政，變士風，裕邦財，寬民力，改弊法，省冗官，誠號令以感人心，信賞罰以作士氣，擇帥臣以任方面，選監司、郡守以奉行新政。俟吾所以自治者，政事已修，然後可以問罪金人，迎還二聖，此所謂規模也。至於所當急而先者，則在料理河北、河東。蓋河北，河國之屏蔽，料理稍就，然後中原可保，而東南可安。今河東所失者，恒、代、太原、澤、潞、汾、晉，餘郡猶存也。河北所失者，不過真定、懷、衛、瀋四州而已，其餘三十餘郡，皆爲朝廷守。兩路士民兵將，皆推豪傑以爲首領，多者數萬，少亦不下萬人，所以戴宋之心甚堅。朝廷不因此時置司，遣使大慰撫之，分兵以援其危急，臣恐糧盡力疲，坐受敵困，雖心懷忠義，見援兵不至，危遁無告，金人且得撫而用之。莫若於河北置招撫司，河東置經制司，擇有才略者爲之，使宣諭天子恩德，所以不忍棄兩河與敵之意，有能全一州、復一郡者，以爲節度防禦團練使，如唐方鎮之制，使自爲守。非惟絕其從敵之心，又可資其禦敵之力，最今日先務也。」高宗善其言，問誰可任？綱薦張所、傅亮，遂以所爲河北招撫使，亮爲河東經制副使。開封守關，綱申明軍政更改者數十條，請造戰車、戰艦，募水軍，詢訪諸路武臣材略可任者，以備用。復進三疏：一曰募兵，二曰買馬，三曰

募民出財以助兵費。是時，四方潰兵爲盜者十萬餘人，攻劫山東、淮南、襄、漢間，綱命將悉討平之。又奏：「臣嘗言車駕巡幸之所，關中爲上，襄陽次之，建康爲下。陛下縱未能行上策，猶當且適襄、鄧，示不忘故都，以係天下之心。不然，中原非復我有，車駕還闕無期矣。」高宗爲詔諭兩京以還都之意，讀者皆感泣。未幾，有詔欲幸東南避敵，黃潛善、汪伯彥實陰主之，綱言：「自古中興之主，起於西北則足以據中原而有東南，起於東南則不能以復中原而有西北。」因極論其不可。已，遷綱爲尚書左僕射兼門下侍郎，黃潛善除右僕射兼中書侍郎。張所乞且置司北京，俟措置有緒，乃渡河。北京留守張益謙，潛善黨也，奏招撫司之擾，又言自置司河北，盜賊益熾。綱言：「所尚留京師，益謙何以知其擾河北？民無所歸，聚而爲盜，豈由置司乃有乎？」有旨令留守宗澤節度，傅亮卽日渡河。亮言：「措置未就，而渡河恐誤國事。」綱言：「招撫、經制，臣所建明，而張所、傅亮，臣所薦用。今潛善、伯彥沮所及亮，所以沮臣。願陛下虛心觀之。」既而，詔罷經制司，召亮赴行在。綱再疏求去，上曰：「卿所爭細事。胡乃爾？」綱言：「方今人材、將帥爲急事，恐非細。臣昨議遷幸，與潛善、伯彥異，宜爲所嫉。然臣東南人，豈不願陛下東下爲安便哉？願一去，中原後患有不可勝言者。」而先是，綱所上募兵、買馬、募民出財三疏，諫議大夫宋齊愈聞而笑其非策。至是，疏論不報。時方論僭逆附偽之罪，齊愈坐誅。張浚爲御史，劾綱以私意殺侍從，且論其買馬、招軍之罪。詔罷爲觀文殿大學士、提舉洞霄宮。尚書右丞許翰言：「綱忠義，捨之無以佐中興。」會高宗召見陳東，東言：「潛善、伯彥不可任。綱不可去。」東坐誅，翰遂求退。後有旨：綱落職居鄂州。自綱罷，張所以罪去，傅亮以母病辭歸，招撫、經制二司皆廢。車駕遂東幸，兩河相繼淪沒，金人攻京東、西，殘毀闕輔，而中原盜賊蜂起矣。紹興二年，除觀文殿學士、湖廣宣撫使兼知潭州。是年，荆、湖、江、湘盜

以萬數，方議屯宿重兵鼎、鄧、嶽、鄂、荆南一帶，以圖恢復中原之漸，議未及行，而諫官徐俯、劉裴劾罷，爲提舉兩京崇福宮。四年冬，金人及偽齊來攻，綱具防禦三策。時韓世忠屢敗金人淮、楚間，有旨督劉光世、張浚統兵渡河，車駕進發江上勞軍。五年，詔問攻戰守備措置緩懷之方，綱奏：「祖宗境土，坐視淪陷，今歲不征，明年不戰，坐使精銳士馬日就損耗，何以圖敵？至於將士暴露之久，財用調度之煩，民力科取之困，尤宜大修守備，先爲自固之計。其守備之宜，則當料理淮南、荆、襄，以爲東南屏蔽；於淮東、西及荆襄置三大帥，屯重兵以臨之；分遣偏師進守支郡，加以戰艦、水軍上連下接，使敵馬雖多不敢輕犯；分責諸路因利乘便收復京畿以及故都。斷以必爲之志，勿失機會，則以弱爲強，取威定亂於一勝之間，逆臣可誅，強賊可滅矣。若夫萬乘所居，必擇形勝，建康江山雄壯，地勢寬博，六朝更都，今者鑾輿未復，宜權駐蹕。至於西北之民，皆陛下赤子，荷祖宗涵養之深，其心未嘗一日忘宋，特制強敵，不能自歸，天威震驚，必有結納，願爲內應者，宜給之土田，予以爵賞，優加循撫，使益堅戴宋之心。臣竊觀陛下有聰明睿智之姿，有英武敢爲之志，然自臨御，逮今九年，國不闢而日蹙，事不立而日壞，將日驕而難御，卒日惰而未練，國用日匱，民力日困，則群臣誤陛下之故也。陛下觀近年所用之臣，慨然敢任天下之重者幾何人？小廉、曲謹，平居似可無過，忽有擾攘，不過奉身而退，以天下憂危之重，委之陛下而已。大概閑暇則以和謹爲得計，治兵爲失策，倉卒則以退避爲愛君，進禦爲誤國。天步艱難，國勢益弱，職此之繇。今天啓宸衷，親臨大敵，使北軍數十萬之衆，震怖宵奔，則和議之與治兵，退避之與進禦，効可覩已。退一步則失一步，退一尺則失一尺，萬一敵騎南牧，將復何退而可？臣願自今以往，勿爲退避之謀，勿復遣和議之使。俟吾政事修，倉廩實，府庫充，器用備，士氣振，力可有爲，乃議大舉。」因條上六事，上賜褒諭。除江西安

撫制置大使，兼知洪州，有旨：「赴行在奏事畢，之官。」六年，綱至，引對內殿。朝廷方銳意大舉，綱陛辭言，今日用兵之失者四，措置未盡善者五，宜預備者三，當善後者二。時師與金人、偽齊相持淮、泗者半年，綱奏兩兵相持，非出奇不足取勝，願速遣驍將，自淮南約岳飛爲犄角，夾擊之。已而，宋師屢捷，劉光世、張俊、楊沂中大破偽齊兵於淮、淝之上，車駕進發幸建康，綱奏：「乞益勵戰守之具，修築沿淮城壘，勿以去冬驟勝而自怠，勿以目前粗定而自安。」亡何，淮西鄭瓊以全軍叛歸劉豫，綱復陳朝廷有措置失當者，深可痛惜者及當監前失以圖方來者，凡十有五事奏之。車駕將幸平江，綱以爲平江去建康不遠，徒有退避之名，不宜輕動，又復具奏。八年，朝廷遣王倫使金國，奉迎梓宮。倫與金使偕來，以詔諭江南爲名，綱上疏：「我與金人今日豈復有可和之理？然尚遣使通問，冠蓋結軼，卑辭厚幣，無所愛惜，以二聖在其域中也。今兩宮凶問既至，遣使以迎梓宮，亟往邁返。金使之來，不著國號，而云『江南』；不曰『通問』，而云『詔諭』，則其罔朝廷、生後患者，不待詰而可知。土宇之廣，猶半天下；臣民之心，戴宋不忘。豈可廢祖宗之業，失生靈之望，冀延旦暮，遽自屈服？臣願陛下特留聖意，且勿輕許，深詔群臣，講明長久之策，擇善而從之。」疏奏，雖與衆論不合，高宗曰：「大臣當如此矣。」九年，除知潭州、荆湖南路安撫大使，具奏力辭，遂允其請。次年，薨，年五十八。訃聞，朝廷輟悼，遣使賻贈撫問，給喪葬費，贈少師，官親族十人。綱負天下之望，以一身用捨爲社稷安危，雖身或不用，用有不及，其忠誠義氣，凜然動遠邇。每宋使至燕山，必問李綱、趙鼎安否。其爲遠人所畏服如此！有著《易傳內篇》十卷、《外篇》十二卷、《論語詳說》十卷、文章、歌詩、奏議百餘卷，又有《靖康傳信錄》、《奉迎錄》、《建炎時政記》、《建炎進退志》、《建炎制誥表劄集》、《宣撫荆廣記》、《制置江右錄》。

平西 父純，綱弟也，登進士，有賢名。平西知澧州，專務德化，訓孝弟，勸農桑。累遷樞密院承旨。金人寇汴，與伯父綱奏守禦策。金再人寇，乞詔諸道勤王兵決策一戰，宰相不能用。

東 字子賢，綱族孫也。受學朱文公。既登第，簿廬陵。秩滿，周必大餞以詩云：「地跨江南秀氣兼，玉成界尺直方廉。西曹久處習鑿齒，高士惟知孫子嚴。」遷知萬安縣。黃幹薦於漕使，稱其精敏。

〔校記〕

〔一〕「恩」字，各本原脫，據文義補。

〔二〕「均從曾孫」，本卷「宋科第」及本傳作「均再從曾孫」。

〔三〕「均童布告諸路」，疑誤。

# 閩書卷之一百十六

英舊志 縉紳

邵武府 邵武縣二 光澤縣 泰寧縣 建寧縣(二)

邵武縣二(二)

宋

有傳

黃伯思從子中、章。中孫榮。 吳偉明 朱缶 季陵 盧奎 謝如意 鄧邦寧從弟根附。 朱震 何

兌子錫。 吳英 黃通 任希夷 饒幹 上官賁 上官端義 俞聞中 呂勝己 吳炎 謝達 葉武

子 葉采 杜杲子庶。 危昭德 吳季子 朱汝賢 黃去疾

黃伯思 字長齋。祖履，尚書右丞。伯思弱不勝衣，而風韻洒落。自幼誦書千餘言，每聽履講經史，退與他兒言，無遺誤者。以進士高等，調磁州司法參軍，久不任。改通州司戶。丁內艱，服除，河南府戶曹參軍，(三)治劇辦理。秩滿，留守鄧洵武辟知右軍巡院。伯思好古文奇字，洛下公卿家，商、周、秦、漢彝器款識，字畫體製，悉能辯正是非，道其本末。初，淳化中博求古法書，命待詔王著續正法帖，伯思病其乖

偽龐雜，考引載籍，咸有依擬，作刊誤二卷，繇是篆、隸、正、行、草、章、草、飛白，皆至妙絕。又二年，除詳定九域圖志所編修官，兼六典檢閱文字。久之，遷秘書，縱觀冊府藏書，至忘寢食。自《六經》及六代史書、四諸子百家、天官地理、律曆卜筮之說，無不精詣。凡詔講，明前世典章，文物古器，考定真偽，以素學興聞議論，發明居多，館閣諸公自謂不及也。踰再考，丁外艱，宿抱羸瘵，因喪尤甚。服除，復舊職。卒年四十。有《文集》五十卷、《翼騷》一卷、《東觀餘論》三卷。二子：詔，右宣教郎、荆湖南路安撫司書寫機宜文字；訥，右從事郎、福州懷安尉。從子中、章。

中字通老。幼穎悟端重，踰冠入太學。汴城失守，張邦昌受虜偽命，中卽日出居於外。既，邦昌果遣學官致偽詔、藥物勞問諸生。中以前出，故獨無所污。建炎再造，補修職郎、御營使司幹辦公事。紹興五年，舉進士，對策極論孝弟之意，冀以感動上心。高宗異其言，擢第二，授保寧軍節度推官，改宣義郎，主管南外敦宗院。代還，秦檜用事，察其不附己，遣通判建州。罹外艱，服除，復差通判紹興。時，中登第二十餘年矣，轉徙外服，泊如也。檜死，高宗記中姓名，爲秘書省校書郎，兼實錄院檢討官，累遷司封員外郎兼權國子司業。歲滿，爲真芝生武城廟，武學官吏請以聞，中不答。博士朱熹載陰圖以獻，宰相召長貳赴都堂，責之曰：「治世之瑞，曷不奏聞？」祭酒周綰未及對，中曰：「治世何用此爲？」綰退語人：「黃公之言，精切簡當，惜不使爲諫官。」紹興二十八年，充賀金國生辰使，與賀正使秘書少監沈介相先後。明年還，獨言虜作治汴宮，役夫萬計，此必欲徙居見迫，不可不早爲計。時約和既久，中外解弛，高宗聞中言，矍然。而宰相皆不悅，顧詰中曰：「沈監之歸，屬耳不聞此言，中安得獨爲此？」踰月，中復往扣之，且曰：「卽不信鄙言，請治罪！」又皆憮然莫應。而右相湯思退怒甚，至以語侵中，中不爲動。已，乃除沈吏



部侍郎，而徙中秘書少監以抑之。中猶以邊備爲言，不聽，則請補外。高宗不許，除起居郎，踰月，兼權中書舍人。尋差同知三十年貢舉，權工部侍郎。金人來賀天申節，充接伴使。故事：錫宴使者，謝於庭中。至是，辭以方暑，請拜宇下。中持不可，乃如故事。遂爲送伴使。還，虜使復以天申來賀，方引見，遽以欽宗訃聞，且多出不遜語。諸公怪駭，不知所爲，至謂上不可以凶服見使者，欲俟其去乃發喪。中聞，馳白宰相：「此國家大事，臣子至痛之節，一有失禮，謂天下後世何？且使人或問故，將何以對？」於是始議行禮。中又率諸同列請對，論決策用兵事，莫有同者，乃獨陳備禦方略。蓋中自使還三年，每進對，未嘗不以虜事爲言。至是，高宗始入其說，然不數月，而虜亮已擁衆渡淮矣。遷權禮部侍郎。虜騎至江甯，朝臣震怖，爭遣孥逃匿，中與左相陳康伯獨自如。比虜退，衆慚服。明年，虜復遣使通好，議者皆曰：「土地，實也。君臣，名也。先實後名，我之利也。」中奏：「君臣之名既定，則實將從之。」高宗深然其說，詔去權號。會有詔問足兵之計，中以量人爲出對，且曰：「今天下財賦，半入內帑，有司莫能計盈虛，請悉以歸左藏。」高宗亦善之。未幾，孝宗受禪，給筆札侍臣，各論天下事。中既條上，且申前奏，極論內帑之弊。於是，有詔更以內藏激賞爲左藏南庫。明年兼國子祭酒，俄兼給事中。在東臺不半歲，以執法不苟，群小相與媒孽，遂以特旨罷中書舍人。乾道改元，引年告老，除集英殿修撰，致仕，進敷文閣待制。久之，孝宗御講筵，顧問侍臣：「黃某安在？年幾何矣？筋力彊否？」遂赴闕人對內殿，問勞甚寵，復以爲兵部尚書，兼侍讀。每當人直，孝宗常遣人候視，至則又召人坐，語從容。如是數月，月必一再見，中知無不言，其大者，則迎請欽廟梓宮，罷天申錫宴。中書舍人范成大被詔使虜，以山陵爲請。中奏：「陛下聖孝及此，天下幸甚！然置欽廟梓宮不問，則有所未盡於人心，且雖夷狄之無君，其或以是窺我矣。」孝宗善其言，而不

及用，虞果肆謾言，人乃服中論之正而識之卓也。久之，又以言不盡用乞歸，除顯謨閣學士，提舉江州太平興國宮，〔五〕遂以龍圖閣學士致仕。淳熙元年，孝宗手書遣使詣中，訪以天下利害，朝政闕失，進職端明殿學士，追屬疾，手草遺表，猶以山陵境土、欽廟梓宮爲言。年八十有五。累封江夏郡開國侯，食邑千五百戶，贈少師，謚簡肅。中莊重恭信，坐立語默有常，節仕州縣，奉法循理，立朝據經守正。孝宗卽位，首以正心誠意，致知格物爲說。再召赴闕，復以前說精言之。朱熹裁書請見，曰：「今日之來，將拜堂下，惟公坐而受之，俾進於門人弟子之列，則某志也。」其見推如此。有《奏議》十卷。子瀚，司農卿。孫榮。

章 歷宰劇縣，有能稱。不肯媚事權豪。用薦爲御史臺主簿。以持論不阿，出爲福建提舉常平茶事，知台州，所至有聲績。

榮 字肅甫。倅靖州，卽州學傍建作新院，政暇受徒講學其中。官至工部員外郎。子熙，知高州。

吳偉明 字元昭。紹興中知興化軍，政尚簡嚴。後奉祠歸，縉紳高之。

朱缶 秦檜用知柳州，恥出其門，以母老辭歸，屢召不起。號悠然居士。弟岳，太守。

季陵 字延仲。博學善詩。建炎中除太常少卿。金南侵，高宗倉卒趨杭，陵獨奉九廟神主，負以行。遷中書舍人。時久雨，下詔求言，陵言：「金人累歲侵軼，生靈塗炭，城邑丘墟，怨氣所積，災異之來，固不足怪。夫惟先格正厥事，毋忽在我。臣觀陽爲德，陰爲刑，常雨常寒，陰道太盛。今廟堂之上，無擅命之臣，惟將帥之權太重。宮門之內，無女謁之私，惟宦寺之習未革。陛下修德應天，能制將帥，乃德之剛，能抑宦寺，乃德之正。」又言：「建康，陛下所當守，亦敵人所必攻。九江上流有建瓴之勢，淮南諸郡有唇亡之憂，願陛下爲馬上計。」時張浚帥川陝，陵論其太專，罷知太平州、温州。召除臨安府。復爲中書

舍人，除戶部侍郎。紹興中，以徽猷閣待制知廣州惠陽，狂寇聚衆，擒之。卒官。子璧、圭，皆顯。

盧奎 字公圭。居太學，作《毋我論》，爲衆所推，號盧毋我。講學於楊龜山，所論仁及忠恕一貫，皆的確有味。仕至江西運判。有《筆錄》十卷。

謝如意 宣和中爲南劍州司錄。嘗縛福州叛兵渠魁二十餘人赴郡斬之，叛衆隨弭。

鄧邦寧 字康國。守漳州，有惠政。從弟根，知靜江府，兼廣西經略，以清直稱。

朱震 字子發。學有源委，嘗參謁謝顯道，而友胡安國。歷仕州縣，以廉稱。安國薦於高宗，召爲司勳員外郎，稱疾不赴。趙鼎爲相，復薦震學術深博，廉正守道。高宗召至，問《易》、《春秋》之旨，具以所學對，擢司部員外郎，兼川陝荆襄都督府詳議官，遷秘書少監，兼侍經筵，轉起居。建國公出就傅，以震爲贊讀。遷中書舍人，兼翊善。高宗曰：「天生朱震、范冲，爲今日資善得人。」轉給事中，兼直學士院。遷翰林學。會處州民爲盜，震曰：「使居官者廉而不擾，則百姓自安，雖誘之亦不盜矣。」願詔新太守到官之日，條具本郡及屬郡官吏有貪墨無狀者，一切罷去，聽其自擇慈祥仁惠之人，有治効者，優加獎勵。」七年，謝病丐祠，旋知禮部貢舉。尋卒，贈中大夫。有《易集傳》、《易總說》行世。

何兌 字太和。東平馬伸者，程門高弟也。兌爲廣西提刑檢法官，伸撫諭廣南，見而賢之，奏爲屬。兌遂受伸學。靖康初，秦檜爲中丞，伸爲殿中侍御史，厲令推立異姓，伸曰：「此天位也，逆虜安得易？」檜始人議狀，連名書之。已，秦亦陷虜，獨伸主臺事，排日申張邦昌云：「伏覩大金太宰相公權主國事，未審何日復辟？」至康王卽位日乃止。其後，檜南歸，擅掠靖康反正之功。兌常太息其事，欲辯伸忠，輒爲其子所諫，然私自爲伸行狀，固在也。通判辰州，將受代，忽夢伸衣冠與語如平生，喻其子曰：「馬先生英

靈不歿，有意屬我乎！」掛其遺像哭之，子鎬哀勸曰：「俟檜死，上之未晚。」兌曰：「不然，萬一我先死，瞑目有餘恨。」卽手書一狀，聞於朝云：「自太師公相陷虜之後，獨侍御史馬伸排日以復辟事申邦昌，且以所作行狀繳納。檜怒，下廷尉追捕甚急，令臺吏勒軍令狀，棘寺以上書不實，特追兩官，羈置英州。檜死，復原官，歸至里門，遇親戚相見，喜馬公事得白，一笑病廢，僅能食祠祿一年而已。兌從仲師淑程學，得伸《中庸》之說，踐習不懈，以終其身，鄉人愛敬，以「中庸何公」目之。」

鎬 字叔京。承家庭源委，又與朱文公友善，講辯精密，一意操存。以父任補安溪簿，未赴，江西帥辟機宜，再調上杭丞。治尚寬簡，白罷無名征賦。部使者鄭伯熊病郡事不理，繫者或至累月，乃檄鎬佐其守。鎬悉取文書閱視，白守決遣，旬日都盡。又以田稅不均，貧弱受病，條說甚詳。他所補助，亦盡其力，而守顧不悅，鎬卽謝去。循資調善化令，將行，卒。鎬清夷恬曠，廉直惠和，論經史時事，簡易條暢，一時高其學行，多師尊之。有《易論語說》，文公稱其可傳，又有《臺溪集》數十卷。

吳英 字茂實。從學文公，有《論語問答略》。

黃通 字景聲。仕江西提刑，以不附韓侂胄，歸。自號熙堂野老。

任希夷 字伯起。刻意問學，爲文精苦。弱冠登第，調浦城簿。少從朱文公學，文公曰：「開濟士也。」再調蕭山丞。開禧初，主太常寺簿，奏修紹熙以來禮書。累遷禮部尚書兼給事中，爲周濂溪、程明道、伊川、張橫渠請謚。進端明殿學士，簽書樞密院事兼權參知政事。尋提舉臨安洞霄宮。卒，贈少師，謚宣獻。

饒幹 字廷老。自幼孝謹篤學。登進士，調吉水尉，轉知長沙，適朱文公爲守，遂授業焉。夙興治

事，暇人聽講，後知懷安軍。卒，有爲之銘曰：「能琢磨而器吾之玉乎，則心皇皇如不足。能烜赫而丹吾之穀乎，則足縮縮如不欲。故樂也不加若性，而污也不懼其辱，是謂善學朱氏者，蓋不惟其名，而實之篤。」

上官賁 字濟叔。爲浮梁丞，郡以事送委，平決得情。陂塘渠堰，多所修築。遷貴州推官，致仕。手不釋卷，歲散困禾以濟貧族。

上官端義 字方叔。以蔭爲惠安簿，催科示信，民自樂輸。調袁州司法，歲饑，被委發糶，直或不足，補以己資。遷建安丞，攝浦城、甌寧二邑，皆有惠政。

俞聞中 字夢達。從學朱文公。累知黎州，悉意撫字，民夷感德。

呂勝己 字季克。其先建陽人。父祉，旣死，義，勅葬邵武之樵嵐，因家焉。勝己從張南軒、朱文公講學，文公爲和《東堂九詠》詩。工隸書，得漢法。仕湖南幹官，歷倅江州，知杭州，官至朝請大夫。自號「渭川居士」。

吳炎 字濟之。清介恬靜，色粹而莊，言簡而遠，若甚和易，而有毅然不可奪者。開禧初，自武學諭遷太學博士，時韓侂胄擅朝，炎乞外判建寧。嘉定中，知江陰軍，陛辭，乞復祖宗治賊吏舊法。至郡，寬征賄用，以其餘力葺郡學、貢闈，繕黃田閘，溉民田。改興化軍，先教化，崇禮遜，賓興賢，命樂工按古音譜歌《鹿鳴》之詩以饗之。創立郡學、曝書會，士隸上舍者，視與己如同舍。終更奉祠，卒。劉克莊誌炎墓，謂其出處與葉武子略同。

謝達 字叔達。嘉定中南豐令，臨政嚴密，姦猾束手，邦人懷之。

葉武子 字成之。初游鄉學，學《周禮》於永嘉徐元德。既與李方子友，同受學朱門。後補太學生，時議函韓侂冑首和虜，武子曰：「奸臣首不足惜，如國體何？」率同舍力爭。嘉定中，擢甲科，注岳州教授。有貧而母老者，名在其下，亟遜之。久之，授郴州，累陞知處州，拊循民瘼，奏除苛取之弊。麗水賊袁千六輩鋌起，郡發兵討捕，而里正執讎民以歸。武子問實，得三人斬以殉，餘釋之，民大服，盜亦息。處常賦外，斂大家財充浮費，吏胥推排，視賂多少爲高下，武子奏蠲之。因節公帑雜費，市田待需。入爲宗學博士，以福建保長催科害民，陛對論罷之。請老歸，屬召不起。尋落致仕籍，除直秘閣。嘉熙間，進直寶謨閣奉祠，仍乞致仕。淳祐三年，以其雅志恬退，掛冠日久，賜詔褒美，特陞直龍圖閣。五年，進秘閣修撰，六年卒。武子之學，所得於《易》爲多，其言曰：「《易》道莫大於時，時有二義：有在外之時，有在我之時。上君子出處，須先論在我之時，然後論在外之時。」嘗戒子弟，謂身後毋作《行狀》，坐無銘誌。惟劉克莊誌吳炎墓，稱炎與武子爲古君子。

葉采 字仲圭。初從蔡淵受《易》學，已而往見陳淳。淳以其好高妙，少循序，屢折而痛砭之，自是屏斂鋒鏑，履趨着實，淳深喜焉。寶慶初，爲秘書監，嘗論郡守貪刻之害，理宗嘉納之。

杜杲 字子昕。父穎，仕至江西提點刑獄。杲以蔭授官江淮制置使，李珣羅致幕下，滁州受兵，檄杲提偏師往援。金人圍城數重，杲登陴中矢，勇氣益勵，卒全其城。調江山丞，兩浙轉運使朱在辟監崇明鎮。崇明改隸淮東，與總領岳珂議不合，慨然引去。珂出文書一卷曰：「舉狀也。」杲曰：「比而得禽獸，雖若丘陵弗爲。」珂怒，杲曰：「可劾者官，不可強者杲。」珂竟以負蘆錢劾，朝廷察蘆無虧，三劾皆寢。淮西制置曾式中辟廬州節度推官。浮光兵變，杲單騎往誅其渠魁。安豐守告戍將扇搖軍情，且爲變，帥欲

討之，杲曰：「是激使叛也！」請與兩卒，遣將諭之，曰：「可持吾書詣制府。」將即日行，一軍帖然。知六安縣。徙知定遠，會李全犯邊，朝廷以杲久習邊事，推知濠州。金衆數萬駐榆林阜，請降，輜重甚富，或請誘而圖之，杲曰：「殺降不仁，奪貨不義，納之則有後患，諭而遣之。」又陳守境之利，出師之害。及兵敗洛陽，邊釁遂開，人服先見。奉崇道祠，再知高州，尋改安豐。時元兵來侵，杲已有備，比兵退，淮西以安，進三秩，受將作監。參知政事徐榮叟謂丞相李宗勉曰：「帥淮西，無逾杜杲。」詔以安撫兼廬州。進大府卿、淮西制置副使，兼轉運使。元將察罕擁圍廬州，杲敗走之，又陳舟師，扼淮河。遣其子庶監呂文德等軍，伏精銳於要害。元兵不能進，遂北歸。累疏請老，不許。陞兵部侍郎、淮西制置使，又除權刑部尚書。淳祐元年，乞去愈力，擢工部尚書，遂以直學士奉祠。又起知太平州，尋擢華文閣學士、沿江制置使、知建康府行宮留守、節制安慶、和、無爲三郡。復與元兵戰真州，敗之。進敷文閣學士，遷刑部尚書，引見，理宗獎勞，乞歸，不許，親書「安淮」二字以褒之。兼吏部尚書，進徽猷閣奉祠，請老，升寶文閣致仕。理宗思前功，進龍圖閣，而杲卒。遣表上，贈開府。杲淹貫多能，爲文麗密清嚴，善行草，急就章。晚歲專意理學，嘗言：「吾兵間無悖謀左畫，得於《四書》。」子庶。

庶，字康侯。倜儻剛勁，通典故，善爲文。從父兵間，習邊事，未入仕，已立戰功，明堂恩補官。元兵圍安豐，兵將不相下，庶調護得其歡心，卒協力捍禦。杲帥淮西，辟書寫機宜文字，遷籍田令兼制機、督幹，監呂文德、聶斌軍，與元戰於朱阜白冢。遷將作監簿、通判和州、權知真州，大修守禦具。差知興化軍，奉祀鴻禧觀。起知邕州，改知潮州。累遷知真州兼淮東提點刑獄。踰年，進直秘閣，移淮西兼廬州安撫副使，民歡迎如見慈父，治蹟甚多。就加刑部郎中，升寶文閣。與元兵戰於望仙白沙城，升文華閣。開

慶元年冬，進大理少卿、淮東轉運副使、兩淮制置司參謀官，特授兩淮制置使、知揚州。射陽湖饑民嘯聚，庶曰：「吾赤子也。」遣將招刺，得丁壯萬餘，戮止首惡數人。理宗諭曰：「前守合肥，淮右賴奠。今界全淮，尤藉聲譽。父子家傳，可謂無忝。」庶益感奮，以靖難保障爲己任。明年四月，火，抗章自劾，召赴行在。尋直寶文閣，知隆興府、江西轉運副使。時賈似道嫉庶剛正，且忌其功能，兵退，行打算法，與向士璧、趙葵、謝枋得諸閩臣皆累及妻子，逮繫獄，庶竟坐死，聞者冤之。

危昭德 舉進士，歷官宗正寺簿兼崇政殿說書。遷秘書郎。疏言：「國命在民，民命在士大夫，士大夫浚民膏血爲己甘腴，民不堪矣。」進兼侍講，條上厲民四弊，乞爲萬世根本之慮，一時倉卒之防。又乞察欣瘁休戚之故，酌利害損益之宜，折衷泉貨，使遠近便，開通關梁，使商賈行。下修身奉法之詔，使吏得自新，出輪倉助貸之令，使民免貴糴，窒墨勅之門，使官府無黜陟之典，止輪臺之議，使疆界無彼此之分。累遷殿中侍御史，諫作宗陽宮。權工部侍郎，兼同修國史實錄院，乞致仕，特轉一官。昭德在經筵時，以《易》、《春秋》、《大學衍義》進講，規正甚多。

吳季子 字節卿。篤學工文，官至國子監丞。所著有《大學講義》。

朱汝賢 咸淳中令廣昌，爲政有方，愛民如子。扁堂「平心」，謂：「心平不平，而政之平不平隨之。」

黃去疾 咸淳間宰將樂，創龜山精廬，爲作年譜，聚輯簡冊，政暇與學生講習其間。

### 元進士

泰定四年 黃清老

薦辟、人才賢者雜見列傳中。



有傳

黃清老 黃周

黃清老 字子肅，黃五經之後也。通經博文，累應奉翰林文字、同知制誥、國史院編修官，出爲湖廣行省儒學提舉，學者自遠從之，率多成就，號樵水先生。著《春秋經旨》、《四書一貫》數十卷，詩存者數千篇，有盛唐之風。

黃周 字仲文。父儀，以軍功受建寧萬戶府鎮撫，僑寓建陽。周英穎異常，善書法，工墨竹，於書無所不覽。元季，擢本邑令，尋判邵武，卒於家。

### 皇朝科第

舉人 進士子、午、卯、酉屬舉人，辰、戌、丑、未屬進士。

洪武十七年甲子 周文通

十八年乙丑 周文通

二十三年庚午 吳言信

二十四年辛未 吳言信第三人。

三十二年己卯 陳顥

永樂元年癸未 花潤生 劉永賢 黃埜 王定 吳提 陳子良 黃成宗 高誠舊志有洪武三十五年一

榜，考是歲革除，故元年開科而明年甲申會試。

二年甲申 花潤生 劉永賢 黃埜 王定 吳提

三年乙酉 鄧希寧 黃惠 張安

六年戊子 吳璽 詹柅 許銘生 周賢生

九年辛卯 魏達 朱滿 朱維禎 曾真保

十二年甲午 黃克昕 官本 楊孟 官琚 李得全

十三年乙未 官琚 李得全

十五年丁酉 上官祐 李居正 王靖 張先 朱莆 危繼 吳環 丘繼

十八年庚子 黃子祿 譔敬 曾昶 黃瑛

十九年辛丑 曾真保

二十一年癸卯 曹泰復姓陳 王勉 李文禎 王廣

宣德元年丙午 李惟恭

四年己酉 丘九思

十年乙卯 龔敷

正統元年丙辰 龔敷

十二年丁卯 謝濂 徐溥

十三年戊辰 徐溥

景泰元年庚午 朱濬 上官肇和祐子 聞永 楊靖 虞孟

二年辛未 謝熾台州人，寓居邵武。

四年癸酉 周灝 謝頌

七年丙子 李富

成化四年戊子 朱欽

七年辛卯 甯堅

八年壬辰 朱欽

十年甲午 崔中

十三年丁酉 孔經

十七年辛丑 孔經

十九年癸卯 羅紳

弘治五年壬子 朱浩

十一年戊午 危行

十五年壬戌 危行

十七年甲子 謝璠

正德二年丁卯 朱瀚 堯瑄

五年庚午 陳懷

十四年己卯 黃銑

嘉靖七年戊子 米榮

十一年壬辰 米榮

十三年甲午 王錫

十六年丁酉 王塤

十九年庚子 何廷鉅

二十二年癸卯 陳謨

二十五年丙午 堯世美 朱栴

二十九年庚戌 何廷鉅

三十一年壬子 朱煥 徐美

三十五年丙辰 何廷錦順天中式。

隆慶元年丁卯 謝邦泰

四年庚午 杜鍾秀

萬曆十六年戊子 陳一鯤

十九年辛卯 徐大紳

二十年壬辰 徐大紳

二十五年丁酉 袁繼愈 陳之美

二十八年庚子 王洵 方遇熙 危純中

三十四年丙午 吳嘉泰

四十年壬子 高崇穀解元。

四十六年戊午 高佐 米嘉穗 王拱昌府學。

四十七年己未 陳之美

薦辟、人材、貢士、監生賢者雜見列傳中。

有傳

吳言信 譙賤生 王定 花潤生 吳璽 朱祐 上官祐 曾真保 陳泰 陳子良 龔敷 謝

嫌 徐溥 朱濬 周灝 黃琮 朱欽 甯堅 危行 黃銑 陳俊 鄭鳳孫可大 徐樞 袁泰 吳

從周 徐美 杜鍾秀 時瑞

吳言信 以殿試第三人除翰林院編修。太祖一日視朝罷，與皇長孫議，口占詔勅，訓將練兵，驗視封疆險易，造軍器務要精堅適用。因謂奸邪難以口舌論，召言信執筆聽命從事。言信書畢，太祖顧皇長孫曰：「諦聞之，當使邊塵不起，貽汝安也。」後靖難兵起，竟不知信所終，說者以爲舉家死難也。

譙賤生 洪武中以國子生拜岳池縣典史，與令王佐述職至京，坐事下獄。岳之耆民二十餘輩，赴訴於朝，且言二人廉介有守，愛民均役。太祖命理官勘問，果如所訴，遂特賜衣靴筵宴以旌之，復官。尋用薦擢四川按察司僉事，列名《彰善錄》。

王定 字彥文。除行人，以賢能加御史。遣往遼東巡點軍務，獨持風裁，聲振邊域，人稱廉御史。未復命，卒。子孟榮，給文奔喪，□其囊中，（六）文卷之外，蕭然無長物。

花潤生 字蘊玉。幼穎敏，書史過目不忘。知古田縣，創公署，興學政，教民種藝，爲子弟置書籍，親

課其業。轉知鳳陽、太和二縣，歷浙江僉事。吏部尚書王直薦其經學通明，轉提督江浙學政。年七十，引年歸，行李蕭然。家居二十餘年，風節愈勵。自號介軒。有《介軒集》。

吳璽 字信玉。端敏謙厚。永樂中，自鄉薦歷試兵部，擢武選主事，以才能爲尚書方賓所重。既以外艱去，賓特薦於朝，乞起復治事，制可之。未幾，陞郎中。宣宗朝，擢戶部右侍郎，於四方萬國之版圖，人民錢穀之多寡，庾帑藏之虛實，及國家經費出人盈縮，莫不窮究營度。正統己未，徙內庫，勅太監洪保、魏國、徐顯宗與璽董其事，璽經理調度，秩有條紀。壬戌秋，外夷來獻馬，邊將請增騎十，示國威。英宗問戶部馬之來幾何，邊兵所乘幾何，日用芻豆當幾何，今邊郡所積當幾何，果能足用否？璽時以病在告，同寅倉猝未能對，上以爲大臣不事事，下之獄，連及璽，謫戍威遠。或謂曰：「公不可上疏求理耶？」璽曰：「本同事，復何言？若言，是見己所長，我不爲也。」先是，有柄臣以開中事來于者，爲璽所拒，至是因以危法中之。在威遠二年，以疾卒。吏部尚書王直爲撰墓銘，國子祭酒李時勉爲撰墓表。

朱祐 字逢吉。永樂間，繇國子生授兵部職方主事，廉能著稱。出判紹興，政有便民，殫竭爲之。宣德癸丑，大饑，開倉發賑，乃以上聞。秩滿，士民力章請留，復任七年，迨去，老稚拜送塞途，至有泣下者。太宰郭資薦知漢陽府，漢陽舊無官庾，軍民渡江赴武昌支納，時有覆溺，祐奏請立倉漢陽以便之。引疾致仕，紹人聞之，耆老十數，相率赴闕請乞守郡，比至京，已得請矣。

上官祐 字用孚。博問學，工詩文。論新城，擢弋陽令，卒。

曾真保 字文鼎。知浮梁縣，介直清慎。宣德末，中貴張善監造窑器，怙勢剝民，真保疏其罪，上命誅善示衆。九載，將考績，里耆二十餘人詣闕乞留，詔陞六品祿秩，仍知縣事。正統四年，致仕，自號樵溪。

漁叟。

陳泰 字吉亨。以乙榜除安慶府學訓導，薦擢監察御史，累巡按貴州、山西、山東。在貴州，大軍征麓川，歲取土兵二千爲鄉導，將士或失利，輒取土兵首級冒功賞，泰奏罷之。在山西，會南北圯旱，撈相仍，下詔求言，泰劾罷都御史陳智、侍郎李庸、祭酒貝泰、御史□成等，(七)又劾奏藩憲及州縣官之貪殘者，悉置法。在山東，陳疏數千言，大要以選賢去奸爲本。擢四川按察使，不踰年，蜀中大治，鎮守都御史寇深忌其才名，陰譏所私參議陳，誣奏泰杖殺人，下刑部獄。其人實自溺水死，久始白，復官。己巳，虜寇內侵，命協守紫荆關及巡視沿邊諸寨。景泰改元，陞大理寺右少卿，守備白羊口，轉都察院右僉都御史，鎮守易州，節制紫荆、倒馬等關及沿河關口，究心畫計，虜不能犯。甲戌，陞左僉都御史，疏理徐州、呂梁二洪及臨清、濟寧諸處河道。丙子，巡按蘇、松、常、鎮及嘉、湖諸大郡。免租詔下，泰知恩未得均，有富室田多額輕，其重者多在貧下，因推廣周文襄法，令以五升之田倍其賦，而官田之重，止取正額，於是賦額不損，貧富適均。英廟復辟，被譖，左遷廣東按察副使。連丁內、外艱。會四川寇亂，復起爲左僉都御史，巡撫撫其處，蜀中老稚聞泰至，奔走相告曰：「陳憲使復來矣。」州郡望風解組者數百人。陞右副都御史，巡淮揚等處兼督漕運。成化元年，乞歸甚切，許之。泰儀度修整，天性孝友，常慕鄉先哲李忠定之爲人，平居謹默似不能言，立朝論事，纚纚如倒囊出珠。爲御史時，以搏擊得名，風稜甚峻，累保障重地，積有勳勞，未嘗矜色。於官無行誼者，怒目切齒，必除之乃已，以此被讒貶斥，其志不少回。致仕歸，囊無長物，閉戶理舊書，間出游山水，哦詩酌酒，翫然有餘。安成彭文憲，時嘗與莆田柯詹事論人物，柯曰：「清操如吉亨，吾閩少有。」文憲曰：「天下士也，何止閩中！」晉王亦稱陳御史剛風勁節，須於古人中求之。

陳子良 永樂間以貢任光澤教諭，學規嚴整，訓迪有方，邑士以經術顯者多其造就。

龔敷 字時敏，慎儀十九世孫。縣主事歷官都轉運使，常額羨餘，月計可二千兩，一切不取。其友語之曰：「何自苦乃爾？」敷曰：「我常恥居官者動曰『好官不過多得錢』，毫無爲民之意，朝廷何賴有此臣？」以清正爲時所忌，解組歸，悉以常額羨餘封貯於庫。其父不容人門，執耒柄杖之，跪而受焉。

謝嫌 字世彰。其先浙臨海人，宋丞相深甫後也。嫌拜監察御史，時同官朱驥奏留湖廣巡撫李實德堪內輔，掌臺綱總憲謂爲間已，參以上言大臣德政，罪當斬。嫌鞫其獄，止以奏事不實坐之，掌臺綱者盛怒，欲併罪嫌。嫌曰：「上言德政，他官可擬，若御史職在進賢退不肖，惡可緣此杜言路耶？」巡按遼東，值都御史寇純誣奏開元胡參軍以軍情事，連所部將士五百餘人，勅嫌按之。嫌見衆心洶洶，倡言欲殺純投北去，嫌慮起邊患，遂號於衆曰：「寇都欲爲汝害，我獨不能爲汝辯雪乎？」衆皆懽呼羅拜，嫌權宜發遣，人心遂定，乃上章自劾專擅之罪。時少保于公謙，暨諸名卿，大奇之。北虜老稚百餘過遼陽，爲哨兵遮獲，總兵焦曦等欲希功，繪圖馳約於嫌曰：「縑衣同奏，僉都可得。」嫌報曰：「欺罔要功，吾不忍爲。」既改南京御史，勅清戎淮甸。鳳陽同知王姓者以贓污事覺，懼訊，夜遺數百金以求免。嫌正色叱出，竟置法。爲御史九載，論列百餘疏，皆切中機務。成化中，陞兩淮都運使，一時名輔李炳、王宏輩，深惜其去。淮鹽利重，販鬻率皆國戚中貴人所占，嫌至，一裁以法，貴戚斂跡。各場豪民有「坐山虎」、「截港虎」等號者，素爲商民患，嫌皆設法擒戮。又創獄所，設紙鋪，立義倉，公私便之。轉廣東左參政，有流寇擁衆犯潮、惠，嫌選將授略，獲魁醜三百餘。同事僉憲追逮二郡民嘗從賊者，將盡殺之，嫌悉存活焉。其奉公執法，存心濟人，率多類此。



徐溥 字仕宏。任御史，卒官。陳都憲泰爲文祭之，謂其氣質剛方，才華卓犖，持節按郡，揚清激濁，風紀振而吏畏其威，理道公而人遂其樂，其人可想見也。

朱濬 字泗源。以鄉薦卒業太學。歷事內府承運庫，所與同事，皆中貴人，濬處之以正，雖不見親厚，亦不爲忤。既卒事，授鴻臚寺序班，仍掌內帑事。以勤慎受知英廟，優被賞賚。滿九載，陞光祿寺錄事。謹出納，杜姦欺，百凡供應，比舊加省。秩滿，引疾乞休，三上乃允。還家，杜門不預外事。

周灝 字秉純。除海鹽令，善摘奸發伏，民有因貧背婚，轉屬豪族者，訴於灝，灝助之金，必令成婚，豪不敢爭。邑苦徭稅，灝議均賦法，遂減其半入上計。有署邑者，失其庫藏，倉皇不能白，獨懲監守者。灝善觀數，有犬母子交口而觸其席，灝閱宿單，有直獄黃廣者，召鞠之，立招，遂坐之。署者問故，灝曰：「余詢問有二犬交口者，獄也。子凌母者，獄卒也。犬觸席者，廣也，故閱單得黃廣。」人服其神。灝存心平恕，清獄冤者輒釋之，有不可釋者，縱使歸家，與之約，無不應期自至。守有不便於民，諍而忤之勿顧。蒞海鹽三年，清介如一日，都給張寧讚其一介不取。擢松江府同知，未赴任卒。

黃琮 字廷獻。以太學生知安遠縣，廉謹靖恭，以愛人爲主。被搆逮繫，未白而卒，民哀慕之。琮自少卽志爲己之學，繩趨尺步，不苟徇時，事親盡孝，居喪謹禮。與人交，誠信不欺，教人先德後文，一時造就爲多。

朱欽 字懋恭。少與甯堅友，共志考亭學。聞吳康齋倡道西南，不遠師之。舉進士，授寧波推官，潔白自持，讞獄惟允。寧波田數患潮湧，欽力築它山堰，以殺潮勢。召人爲御史，論列侃侃。卿命視河，遇澇災，輒發陳賑乏，見尸橫野，掘廣塚掩葬之。旋勅巡按貪。吏望風解綬。出爲浙江按察副使，進按察

使，陞左布政使，儼恪端莊，官常整肅，節濫觴之費，謹啓簿正之司，秩祿外秋毫無苟取。積羨財倍宿昔，勒石以示後來。擢都御史，巡撫山東，首劾方面官不職若而人。正德初，逆瑾氣焰，遣使詣治索綵繒五百疋，有司具以請，欽呵斥使者，輒趣歸，遂與瑾隙。會瑾嫉同監王岳，譖謫守陵南京，抵臨清，賜死。欽疏言：「陛下首政，朝野仰望，威福之權不宜下移，刑賞惟公，方能卽叙。太監王岳謫守皇陵，既不自白其罪狀，賜死中道，尤未厭乎人心。臣諗岳爲劉瑾所忌，必瑾譏毀以惑陛下，雖岳死弗足惜，而瑾漸甚可畏，伏望察岳非辜，誅瑾讒賊，庶天下臣子頌陛下之仁恩睿斷。」草就，遣人齎進，有止之者，欽曰：「此瑾矯制擅柄之漸，吾守土大臣，安得無言！」瑾奪欽疏不奏，乃媒藥其短，欲擠之。先是，欽以東人酗酒，遂嚴鬻酒之禁，至行連坐法，使濟南推官陳元魁覺之，犯者枷其項。有民汝林之鄰人，爲酒，林懼，自縊死。林母欲奏聞，元魁與之十金，知府趙璜亦與穀二石，至是爲東廠所誦，瑾勅錦衣衛百戶陳俊束欽逮獄，欽卽去冠裳，跣步就束，立就道，不內顧。旣入京師，結竟其罪，與璜同坐免官，而元魁爲謫戍，吏以失解弓張事，罰粟三百石，輸大同府。欽躬詣互納，家人請代，不許，曰：「天威咫尺，萬里敢罔耶？」尋又文致其罪，罰粟輸甘肅，未行而瑾伏誅，赦復原秩，致仕，卒，賜祭葬。欽家居，衣冠儼坐，竟夕無惰。與鄉人語，必依孝弟禮義。每歲孟春，舉行冠射古禮示人，與新會陳文敬獻章、晉江蔡文莊清相友善。作文典實詳贍。善書，有晦翁風骨。所著有《畏庵集》。

甯堅 字永真。九歲補弟子員，師事黃琮。弱冠游吳聘君之門。比壯，領鄉薦，屢試禮部不偶。卒業太學，大司成丘文莊器重之。年五十，授鳳陽府同知，未及再期，卒。堅早失怙，事母至孝，母有疾，視起居，奉湯藥，夜則假寐母側，衣不解帶。家居講授，善開發人志意，從游之士多所成就。所得脩脯，悉以

歸母，與弟共之。尤致力喪祭、鄉射諸禮，一時風俗爲變。其蒞官，寬而不縱，正而不激，嘗以巡撫大臣檄督開高郵湖畔新河，區畫有方，功成不擾，鳳陽民思之。

危行 字世隆。舉進士，授樂安令。樂安民健訟，多逋負，前令以誣坐貶。行至，堅持清苦，民有訟，曲爲講析，徵輸贏餘，一介不取。會直港賊至，以計收捕。三年，擢監察御史，兩折權貴獄。奉命巡江，時劇賊蘇黃之屯峰逸於江，剽掠殺戮。行力疾，強起視軍事，卒於官。平生孝友，俸人悉以供先世營葬，兄弟同居垂四十餘載。爲御史時，逆瑾羅織縉紳，遭罰贖甚酷，貸而後能輸。死之日，囊餘七金，棺斂之費皆同官營助。子麒，郡庠生，有士行。

黃銑 授中牟令，剛介不諂，歸家，環堵蕭然，惟以琴韻自適。郡守吳國倫重其人，數造廬請焉。

陳俊 嘉靖中以選貢入太學，知崇義縣，有清操，境內盜賊屏息。又捐俸闢兩嶺路，民爲謠曰：「高不戲，曲不危。陳侯功，與山齊。」歷判饒、瑞、惠三州，在惠州，出奇擒巨寇熊轉二，散其餘黨，以功陞雲南府同知，攝曲靖篆，有聲。尋乞致仕林下，焚香燕坐，杜門不出。

鄭鳳 嘉靖中以貢爲萬州判，民素苦牛嶺黎，鳳爲建六議行之，海境獲安。陞南京東城兵馬。孫可大。

可大 字居業。性至孝，蚤失母，事父不離寢食。父卒，事祖亦如之。萬曆中，以選貢授惠來令，力行教化，政多異蹟。建議清鹽，商人祀之。會歲侵，禁販糴，發賑貸存活饑民，邑多逋寇，一時屏息。

徐樞 嘉靖間授鳳陽府通判，以憂去。服闋，補雷州。所至有聲。工書法，喜吟咏，年八十餘。

袁泰 嘉靖中以貢爲翁源令，時賊首盧老叔倡亂，泰以計招撫。老叔素知泰長者，遂聽命，及來謁，

壯其狀貌，更任用之，群盜悉平。

吳從周 字宗文。賦性剛直，有雄才，喜讀古書，凡三教九流，六韜三略，無不攻習，於兵法尤精。以貢授慶元訓導。嘉靖四十一年，署邑篆，賊首劉人眼攻城甚急，從周與把總桂汝攀合力制敵，連七日夜不懈，敵遁去。以城西北當山之下，敵易窺淺深，改築新城六十餘丈於山上，慶人命曰吳公城。擢國子學正，乞致仕。所著有《備倭議》、《左傳兵法》、《綱目武覽》、《居官仰鑑》若干卷。

徐美 字忠甫。隆慶初以舉人知連州，廉俸外，纖介不私。一夕微行，有二婦張燈相謂曰：「清哉燈油，有若邑令。」旦召詰之曰：「爾言令清，果何徵耶？」婦曰：「闔郡皆云，不獨二婦。」山寇陳龍洲掠連、陽二邑，戒其下毋犯賢太守境。美曰：「皆吾赤子也。」躬往招之，遂降其衆數千。擢承天府同知，未赴卒。連人無大小咸哀之。

杜鍾秀 字德毓。授黃巖令，慈祥豈弟，潔己愛民。縣東官河，宋築有永豐二閘，時啓閉，備旱潦，民甚利之。嘉靖間，海寇猖獗，跨河成城，堙塞未復，秀捐俸數百，僦工濬淤，鬪石爲門，不憚寒暑，竟成厥事。時三大旱，（八）虔誠三禱，而甘雨沛然隨應。以丁艱，補岳州判，陞知儋州，所至有惠聲。蒞任未幾，解綬南歸，清介自守，絕跡公門。

時瑞 爲人高穎有操，氣概超絕，以明經恩選長沙府通判。有大盜何震東者，肆行劫掠，累家巨萬，資緣當道，人莫誰何。瑞廉得其情，捕之。當道授以意，令釋之，弗聽。盜陰以千金賄瑞，瑞佯許，誘其來見，卽擒而杖殺之，乃諸貴人書至，則無及矣。以此忤當道意，遂棄官歸。瑞居官三載，清正果斷，執法不撓，一文不取。人或嘲之，嘗解以：「吾自有寶，要錢何爲？」歸之日，行橐蕭然，不改寒素，未幾疾卒。

光澤縣〔九〕

宋科第

太平興國八年癸未 李巽

慶曆二年壬午 李誥

六年丙戌 上官拯

嘉祐二年丁酉 上官基

八年癸卯 李詳巽弟。〔二〇〕

治平四年丁未 上官裕基子。

熙寧九年丙辰 李深誥子。

元豐二年己未 上官敦復 上官行拯孫。 上官公穎基子。

紹聖元年甲戌 李勉深弟。

四年丁丑 吳璋

崇寧二年特奏名 李階勉子。〔二〕

紹興五年特奏名 李純德誥孫。

十八年戊辰 黃克仁

淳熙五年戊戌 黃渙第二人。

紹熙四年癸丑 李文子

嘉定四年辛未 李閱祖 李壯祖閱祖弟。

七年甲戌 李方子文子兄。

薦辟、人材賢者雜見列傳中。

有傳

李巽 李誥弟詳、子深、勉。勉孫階、郁。孫純德、玄孫閱祖、壯祖。方子、文子。

上官拯 上官基 吳璋 黃

克仁 黃渙

李巽 字仲權。博學能文，有《土鼓》等賦。郡人登第自巽始。爲江西提刑，明恕第一。遷兩浙轉運使，與王禹偁善。

李誥 舉進士，官至太常博士，陳瓘稱其真率樂易，有古人風。弟詳。子深。孫純德。曾孫呂。玄孫閱祖。呂，見韋布。

詳 字自明。幼警悟，善屬文，議論純正。知潯州，立學校，革夷俗。遷太僕丞。

深 字叔平。舉進士，調濟陰簿，歷鄱陽、遂平二縣，以清慎稱。召爲編勅所詳檢役法文字，與蔡京、章惇廷爭，奪一官。已，叙復遷朝散郎，陞辭，以言事罷。崇寧中，安置復州，入元祐黨籍。四年，移建昌軍，改青州。五年，復官。有《杭州集》二十卷。弟勉。子階、郁。

勉 字安道。舉進士，知允溪、順昌二縣，素負氣節，多忤於時，遂謝事休致。亦入黨籍。

階 字進祖。崇寧二年禮部第一，特奏名。安忱對策，言使黨人之子魁南宮，多士無以示天下，遂奪

階出身。遇赦，復官，調鹽城尉。建炎初，攝臨安府比較務，州卒陳通脅叛，階叱之，遂遇害。事聞，贈右承事郎，與一子官。

郁 字光祖。少從舅氏陳瑩中游。踰冠，見楊龜山，請業，龜山奇之，妻以女。初，郁聞龜山之論，退而求之，不合，乃獨取《論》、《孟》讀之不懈，久也，渙然有得。龜山歿，以其學淑後進，嘗語學徒曰：「聖賢遺經，讀之又讀，而於無味處，益致思焉，至乎群疑並興，寢食不置，然後當驟進耳。」陳淵稱：「光祖之學，口目俱到，未見其比。」紹興中，以遺逸薦，召對，陳當世大務，高宗改容傾聽，除勅令所刪定官。不久，憂去。既免喪，以秦檜用事，築邑西山以居，家計屢空，曠然不爲意。久之，辟福建帥府機宜文字，日訪民情，休戚利病，以告其長而罷行之。一日，帥用小人言，欲毀民居數十爲列肆，酤酒以牟利，郁白其非便，帥不悅，郁卽移病告老，帥悟慚漸謝，郁爲強起，卒於官。郁天資粹美，涵養有方，事上以恭，御下以嚴，平居不惰，誨人靡倦。兄階，死賊，事嫂如母，恤侄如子。其於世務人情，官政文法，靡不習知。朱文公表其墓，惜其未究於用。所著有《易傳參同契》、《論孟遺稿》。

純德 字得之。少治《周禮》兼《左氏春秋》，爲文簡古。諸弟嘗問善人之道，曰：「臨事而無陰據便利之心。」邑嘗以民兵屬純德，爲制戰陳、擊刺之法，以時閱習，甚有可觀。令欲以聞，冀其勳賞，純德笑謝之。紹興五年，以特奏恩，將人奉廷對，先卒。朱文公銘其墓，以「好德有常之士」稱之。

閔祖 字守約。父呂，見韋布。閔祖早受家學，已，與其二弟從學朱門，篤志強力，精思切論。舉進士，調臨桂簿，提刑方信孺、漕使陳孔碩，咸咨以決臺事。暇日，詣學與諸生講解，士習丕變。辟古田令。改廣西帥幹，勤慎明恕，諸司論薦改秩，未赴，卒。黃榦、李燾、張洽、陳淳，皆敬重之。有《問答》十卷。弟

相祖、壯祖。相祖，見韋布。

壯祖 字處謙。與閩祖同第。調閩清尉，初至，求教朱文公，文公爲語爲學之要。真德秀嘗以典州人物薦之。

方子 字公晦。呂之孫。端謹純篤，初見朱文公，文公謂曰：「觀公爲人，自是寡過，但寬大中要規矩，和緩中要果決。」遂以「果」名齋。居家，竟日危坐，對賓客一語不妄發。舉進士，調泉州觀察推官，真文忠爲守，稱其「學邃氣平，本經術，明世事」，每有大事，必咨決之。秩滿，不肯援故事通書廟堂。久之，始除國子錄。將選人，官僚不少貶以希合，或指爲德秀黨，論罷之。既歸。學者群登其門，嘗語人曰：「吾間學未能周盡，幸於大本有見，此心常覺泰然。若得真實務學之人，發明綱領，斯道庶幾不墜耳。」起通判辰州，尋卒。寶慶二年，德秀官樞密，與尚書袁甫取其所著《禹貢解》以進，特旨授朝奉郎致仕，與一子恩澤。元虞集稱方子「於朱學確守不變，所謂毫分縷析，致知力行，蓋終身焉」。弟文子。

文子 字公謹。亦從朱文公游。歷知閩、潼二州，吏譽藹然。持麾蜀中二十年，以道學倡，人宗仰之。

上官拯 字公濟。舉進士，調建寧丞，聽訟明敏，奸黠無所肆。遷上杭令，亦有政聲。孫行，知解州，號令明信。

上官基 字子固。知將樂縣，操履有稱。會寇起，募邑人廖恩殲焉。

吳璋 字南玉。知韶州，蠻夷從化。子南老，有孝行，知廣州。孫漢傑，以廉直稱，知賀州。

黃克仁 字己任。舉進士，陳書萬言，忤時相，歷守真、化、雷三州。



黃渙 字德亨。父敦義，以《六經》教子，七子皆有成立。渙志篤學博，嘗從呂祖謙游。守岳州，罷廚傳，蠲魚稅，捕淫巫，治績甚著。兄謙，字德柄，亦游朱、呂之門。

### 皇朝科第

舉人 進士子、午、卯、酉屬舉人，辰、戌、丑、未屬進士。

洪武十七年甲子 黃伯珪

十八年乙丑 黃伯珪

三十二年己卯 黃寧

永樂三年乙酉 黃迪 官冕 黃勉

六年戊子 周仕能

十二年甲午 黃正 高用 江禮初

十五年丁酉 侯端 官銘

十九年辛丑 侯端

二十一年癸卯 傅璿 朱光顯

宣德十年乙卯 高敬

正統六年辛酉 李舟

九年甲子 危俊 鄧敬

正德八年癸酉 金山廣東中式。

九年甲戌 金山

萬曆四年丙子 鄧秀實

二十五年丁酉 何本盛

二十八年庚子 朱應芳

四十六年戊午 鄧應淳秀實子。

薦辟、人才、貢士賢者雜見列傳中。

有傳

黃孟舟 危孚 官懋 高巒 李性 吳文茂 郭冕 蔡天爵

黃孟舟 國初以材幹授江浦巡檢。宣德初，應求賢舉，擢慈利令，廉能謹慎，愛民如子。卒，民肖像立祠。

危孚 字克誠。永樂四年貢士，令慈谿，知桂陽州，俱有惠政。性至孝，在任分俸養親，曆三年，聞母病，疏乞致仕。年四十餘卒。

官懋 天順間以監生知景寧縣，恬靜明敏，政事有序。

高巒 成化中以貢知陽山縣，修建學舍，積稻備凶，廉介有爲，百廢俱舉。

李性 字昭衷。居家孝事二親。成化間，以貢任烏程丞，乞歸。未幾，母喪，哀慟過情，相繼而歿。

吳文茂 正德間以貢歷瓊山、保昌二縣丞。告歸，捐數百金爲邑人建橋梁者二，出粟濟貧，捐棺送死，邑人利之。

郭冕 字宗周。萬曆四年貢士。家貧苦學，竭力事親。父病漏腮，親吮膿血，日夕祝天，願以身代。三仕教職，陳情歸養者數四。母患目，舌舐之，迨卒，號泣幾不能生，當道表閭，給廩帛旌異。

蔡天爵 萬曆中以歲貢任惠安訓導，坦易謙冲，脯贄一無所問。卒於官，邑無知不知，咸哀憐焉。

### 泰寧縣（二三）

#### 宋科第

寶元元年戊寅 蕭汝翼

皇祐五年癸巳 葉祖誼

治平四年丁未 蕭汝器

熙寧三年庚戌 葉祖洽狀元。

六年癸丑 鄒棐

紹聖元年甲戌 鄒括棐弟。

元符三年庚辰 蕭韶

崇寧二年癸未 葉兌

宣和七年乙巳釋褐 黃應南

紹興五年乙卯 黃庚

十二年壬戌 江廷賓

慶元二年丙辰 鄒應隆狀元。

五年己未 蕭舜咨

嘉泰二年壬戌 鄒應麟 任亨之

開禧元年乙丑 鄒應博應隆弟。

嘉定元年戊辰 鄒恕

寶慶二年丙辰 趙離夫

薦辟、人材賢者雜見列傳中。

有傳

鄒棐弟括。

葉兌 黃應南

鄒應隆從弟應博。

蕭舜咨

鄒棐 字堯叟。仕終宣城令。少有文名，工詞賦。比壯，游四方，從中山劉彝爲學，浸灌《六經》，穿

貫百氏，各得其宗。其蒞官，雖雜冗必盡力，而處之裕如。楊龜山聞棐名，晚得從之游，其卒也，爲哀辭哀之。弟括。

括 字仲發。知寧化縣，建學，訓導以恩信，懷獷悍民。後知亳州，適蔡京當國，退閑二十年。李綱在朝，書勸之出，括亦謝之。

葉兌 字夢授。性方重，知建康，營行宮，民不知擾。遷江南西路轉運使，有治績。

黃應南 字南仲。歷湖廣江浙提刑，舉動檐整，俸祿外一介不苟，時稱中興廉吏之著。

鄒應隆 字景初。舉進士第一。端重夷曠，丰神峻邁，髭鬣如成人，出人里巷間，瞻視步履率有常

處。弱冠習《春秋》，家貧無書，手抄《三傳》。其學有得於《孟子》「不動心」、「好善優天下」之說。初擢秘書，出知南安軍，召爲正字，遷校書郎兼實錄院檢討官。遭父喪，徒跣扶襯歸。服闋，仍校書郎，改著作兼資善堂直學士侍書。開禧初，兼直講，遷起居舍人及玉牒所檢討官。與韓侂胄不合，以龍圖閣出知贛州，建慈幼院，收養不舉子，括諸邑通租贖焉，寒暑疾病，襁負盪櫓，各有掌者，所全活甚衆。明年，除江西提刑兼郡事。侂胄誅，擢中書舍人，兼太子庶子。嘉定元年夏，假戶部尚書，充金賀生辰使。回，具言虜主望之不似人君，其國必亡。除詹事中書舍人。二年，兼權吏部侍郎，給事中兼詹事右庶子。言事直切，遂以待制寶文閣知泉州。以賈胡簿錄之貲請於朝，大修郡城，卽明倫議道堂，開六經閣，造石橋於筍江下流，長百五十餘丈。時南內宗子商於泉者多橫，應隆以法繩，其稔惡者，造謗相撼，殊不顧。五年，因祖母喪，乞祠，以待制龍圖知建寧。既得祠，尋除寶謨閣學士，知池州。值歲歉，減兵餉，賑饑民，與總司忤。九年，進直煥章閣，經略廣西，平黎州盜及邕蠻之亂，誅首惡，縱協從。十三年，進直敷文閣，帥湖南。以母喪歸，值邑水災，自發粟賑濟。理宗卽位，首召不起。寶元改元，除工部尚書，人見，論金虜利害，稱旨。改刑部侍郎，知貢舉數月，以敷文閣學士再守贛，言者迎合論之，卽丐祠，家居凡八年。紹定二年秋，汀寇作，避地鍾山，告急於閩帥，兵不發，乃聞於朝，請以淮旅平之。及還里，以墓墳召讐，乞致仕，不許。俄州兵亂，土豪負怨者相圖，禍逮平民，因爲具牛酒解之。端平初，除顯謨閣學士，知太平州，言卽前寇事攻之，仍奉祠去。理宗詢其動靜，拜禮部尚書，五辭始入覲。時郊祀雷雨，因陳恐懼、修省、主器之說，且辭錫賚。未幾請去，弗許，仍命修玉牒兼侍講。值北邊有警，疏十事極剴切。進經筵官，勸講有法。嘉熙元年，陞端明殿大學士，知樞密院，權參知政事，舉賢才，抑近小，夙夜以天下爲念。屢以老請，

適諫官有言，即日就道。朝廷遣中使諭止之，竟不復。乃授資善堂學士、沿海制置使，亦不拜。歸林下，徜徉泉石之勝，理廟親書「南谷」二字賜之。屢召不起，加太子少保、光祿大夫，賜紫金魚袋、開國公，食邑三千九百戶、食實封三百戶。卒，贈少保，諡典有加。應隆自魁天下，至參大政，未嘗以得位爲悅，累值權貴勢焰薰灼，未嘗少屈；處心簡靜，不求人知，立朝有論列，皆削其稿；所薦引士，並登顯要，履歷州郡，利興害除。嘗抗疏請留真德秀、魏了翁，爲當路所忌，再諷言者擠之，亦不自辯，賴朝廷知信，卒保其終。從弟應博。

應博 受學於廖德明。寶慶中，監行在都進奏院，奏對引書危微精一，以朱熹之說進。嘗知婺州、蘇州，提點江南西路刑獄，爲真德秀所薦。

蕭舜咨 仕終江西提刑，剛介特立，所至有聲。

元科第無考。

黃元實

黃元實 字廷美。嗜學凝重，動循矩度。天曆間，試浙闈乙榜，授郡文學，以剡薦未授而歸。至正癸巳，邑有妖民爲亂，令延元實議討賊計，賊奄至，遂遇害。女貞，奔哭罵賊，賊殺之。

皇朝科第

舉人 進士子、午、卯、酉屬舉人，辰、戌、丑、未屬進士。

永樂三年乙酉 蕭吾義

六年戊子 李兆 楊善榮

九年辛卯 王賢 鄒勝安 梁福慶 黃清

十二年甲午 李紹宗 伍寧 王禴 黃端 李義貢士，應天中式。

十三年乙未 李紹宗

十五年丁酉 黃回祖 范永昭誤作「危永照」。

蕭能貴

十八年庚子 蕭胤一作葉。

宣德七年壬子 余智建寧學。

八年癸丑 黃回祖

正統三年戊午 鄒允隆

六年辛酉 陳秉中

七年壬戌 鄒允隆

景泰元年庚午 阮肇

四年癸酉 葉茂

成化十年甲午 江福

十六年庚子 梁嵩

萬曆三十四年丙午（一四） 江日彩 李春燁

三十五年丁未 江日彩

薦辟、人才、貢監賢者雜見列傳中。

有傳

何道旻 梁禮 李紹宗 李義 蕭胤 鄒允隆 徐宗靜 蕭永泰 李孟誠 蕭熙 雷昂 馮鑑  
蕭重熙 江一龍 李純智

何道旻 字伯清。洪武末，擢大理評事，讞獄多平反。有強盜疑獄，久不決，高廟臨問，責理官受賄，道旻犯顏力爭，竟白其事。遷監察御史，持節照刷四川文卷及問齊邸謀叛事，皆稱旨。陞江西副使，贛賊陳平爲亂，討戮渠魁，釋其誣誤。移湖廣，建言時事得失，皆見嘉納。後坐事免官。永樂初，起廣東按察僉事，首奏黜憲使貪墨。行部雷陽，修復壞閘，溉田七十萬頃。尋督工匠營造北京，凡六寒暑，病者與藥，死者與葬。宣德初，陞知永州府，遇事躬親處畫，吏不能欺，民以不病。再期，請老。道旻姿貌光偉，聲音如鐘，介持若不可犯。至其仁心愛物，藹然可親。宦游四十年，敷歷中外，清白著聞，所在有績。

梁禮 字敏和。通《五經》。洪武六年，以儒士任本邑訓導。陞沙縣教諭。

李紹宗 字仕遠。授監察御史，奉命視海南珠戶逋，及巡按山東、山西、遼東，所至皆有聲績。宣德二年，擢浙江僉事，明決仁恕，平反冤獄。丁內外艱歸，行李蕭然，素貧自甘。服未闋，卒。

李義 領鄉薦，任肇慶教授，明經博學，士多造就。

蕭胤 永樂中以貢士任柳州教授。爲人端謹，穎敏嗜學。

鄒允隆 名昌，以字行。博學多才，舉進士，授太常博士，陞寺丞，改太僕丞。天順改元，與翰林侍講學士王諫並使安南。時安南經黎季犛之變，久昧朝儀，允隆與諫據禮裁正，夷酋悚服。還復命，丁外艱。服除，仍承太僕。尋轉廣東提學僉事，教諸生以立身行道，不徒習章句文詞而已。尋卒。



徐宗靜 蚤歲失怙，奉母力學。正統中，以貢知崇善縣，陞河池知州。歷宦清澹，緣以訓俗。著有《敦本八議》。

蕭永泰 以貢監授廉州府推官。先是，流賊既破廉城，尚嘯聚山洞間爲患，當道使永泰往撫，永泰直抵木頭等洞，諭以禍福，賊四千餘人皆投戈復業。居六年，陞濟寧州同知，致仕，莫聰贈以詩曰：「誰云林下一人無，眼底賢哉此大夫。隨我入山清似鶴，任他世上媚如狐。」歸二十餘年，鄉人稱其高節。子貴用，繇貢仕紹興訓導，有孝行。

李孟誠 天順甲申，以太學生授廣東長樂令。時兩廣猺獞剽掠抵縣，躬率民兵奮殺。未幾，以憂去。改仁化，長樂民祠祀之，狀事以聞，詔賜祠額曰褒功。

蕭熙 弘治中以貢任龍川知縣。簡默恬退，歸休二十餘年，不通邑。子書。

雷昂 嘉靖中以選貢任歙丞，廉介守法，兩署邑事，爲民節用，不媚事上官。郡守嘗有貴客，欲盛具待之，昂草野進。在邑五年，清白如一日，僚吏咸嗤之曰：「徒自苦耳！丞貳格無顯仕，守此欲何爲耶？」陞府經歷。

馮鑑 嘉靖中以貢三任教官，終韶州府教授。事母至孝，心行稟古，所至端楷，爲多士師。

蕭重熙 生平砥行，希蹤聖賢。以選貢令靖安，地苦賊而民疲，多方綏靖。以艱子乞休，空橐而歸，饘粥不繼。

江龍 以貢任榮府教授。髫年能孝。四十喪偶，不再娶。歸林，惟率諸生講學，集縉紳續志而已。壽九十三。

李純智 以恩選任温州通判。仁厚正直，人稱慈母。以宦餘立田祭祖，仍置田祀兄。

建寧縣〔一九〕

宋科第

治平四年丁未 謝訥

熙寧三年庚戌 李紳

元豐五年壬戌 謝皓訥孫。

紹聖元年甲戌 謝黻訥子。

四年丁丑 李師聘

元符三年庚辰 王防

紹興十八年戊辰 王人鑑

二十一年辛未 劉孝恭

二十四年甲戌 張敦義

二十七年丁丑 丘哲 趙汝舟

乾道二年丙戌 俞豐魁廣南漕薦。

紹熙四年癸丑 張壽

嘉泰二年壬戌 張汝明一作謝。

嘉定四年辛未 劉剛中

十六年癸未 廖復之

寶慶二年丙戌 趙崇游

紹定二年己丑 丘登

淳祐元年辛丑 連翼之

十年庚戌 吳酉

景定三年壬戌 余凭 趙良砮 謝煥 謝廷薦

咸淳四年戊辰 張朝英

薦辟、人才賢者見列傳中。

有傳

謝訥子黻，孫皓。

王人鑑

張敦義

丘哲侄翔。

俞豐

張汝明一作謝。

劉剛中

廖復之

謝訥 字成甫。聰穎絕倫。皇祐中，郡守宋咸親程諸生之文，聚於學官，常千餘人，訥年十四，五試皆第一。既冠，舉於鄉。第進士，調臨川令，戢譁健，省追呼，人謂之「謝冰壺」，又謂之「謝銅釘」，言其清且剛也。復宰清江，歲饑，發粟出賑。當除夕，家人以書趣歸，批紙末云：「歲節不歸，第不飲數十盃酒耳。令不飲也，而民失食，二者孰先後？」後守汀州。累贈宣奉大夫。子黻。侄皓。（二六）

黻 字彥章。七歲爲《論語解》。年十二侍父清江，郡守聞其才，命爲廳記，一見驚異。登進士，授宣德郎，除提舉河北常平，因改鑄大錢一當十，黻言：「誘民爲奸利，舊錢且盡，不可。」蔡京惡其不附己，出

通判虢州，未至，責監漳州稅，出納惟謹。漕使行部謂曰：「公嘗供奉赤墀，何躬行筭庫事耶？」黻曰：「乘田委吏，聖尚勤思，黻敢憚勞！」後通判潭州，繼除吏部郎中，復通判潭州，改興化軍。以親老奉祠。後除知和州，改建昌軍，未赴，以主客召借太常少卿，接伴高麗使。卒年八十四。

皓 字德夫，一字商老。幼孤，受學於詞，痛自刻厲，至忘寢食。既冠，入太學，與游權老、龔吉老齊名，時人目爲三老。登進士，調南劍司戶，歷瑞、洪二州司理，獄無苛留，吏不敢欺。改知歷城，以政績聞。除荆湖路提舉，尋除運判，召對，改兩浙通判，擢金部郎。大觀三年，遼使至，要索無藝，接伴張瓘等不能對，徽宗命皓代之。既還，以對語錄奏，徽宗大悅，曰：「明年卿可復使。」乃借太常少卿充賀正旦國信使。既至，虜待之甚厚。及宴射，一發破的，虜主駭服。既還，凡北界山川、地理、名物、虜中情狀，具條以聞。遷司農少卿，出歷建昌、南劍、絳州三郡，考績皆最。親舊有謁者，皆輟俸贈之，且曰：「吾平生不以公事作人情。」嘗誨其子弟曰：「居官持公廉二字足矣。」請老奉祠，卒年八十。

王人鑑 字克明。博學能文，人目爲策虎。官至贛州判。

張敦義 字行可。尉醴陵，以廉能稱。調衡州司理，多所平反。有尉獲盜，未應賞格，乃羅織平民充數，敦義被憲檄閱實，得狀。憲與尉同里，怒其不爲尉地，欲劾之，敦義曰：「天可欺乎？吾寧以一官易數人命。」秩滿，以通直郎致仕。

丘哲 字元明。清修苦學，爲汀州司理，以通直郎致仕。侄翔。

翔 字元鳳。博學能文，仕至梧州教授卒。有《食芹集》。

俞豐 字應南。尉建陽，捕盜，當賞不受，曰：「是利民爲盜也。」樞密劉珙聞而器之。再調柳州教，

有危教授舉者，以衍聖公女爲妾，豐謂曰：「師儒風教所關，聖人之後，可爲妾乎？」時張栻爲帥，亦以諭舉，遂得適士人。繼辟四川茶馬幹官，買馬增舊。改秩宰濠陽，以惠愛聞。諸司薦擢陞朝。累遷司農丞，稽覈財用出入，俱得其實，孝宗嘉之。出知秀州。先是，郡務及公庫醞酒，例有所謂「効力酒」，守、倅而下，各分送有差，多至于瓶，少亦不下二三百。又，郡所管犒軍庫十一所，每年見錢八萬貫，多爲官吏侵漁。豐並條奏罷免之，於是歲課增羨至百萬緡，最聞。召赴行在，除金部郎，繼除浙西提舉，改浙東提刑，就除直秘閣，又除太常少卿。時光宗晏駕，懿宗梓宮亦未發，金臺議禮先後不決，豐引聖經「先輕後重」之語爲證，議遂定。累遷中書舍人，繼除吏部侍郎。隨才授任，有資格未應者，雖親舊有求，亦悉拒却。一日人朝，見蘇師旦在班，趨之者衆，卽浩然有歸志，遂引年求退，除文華閣待制，奉祠歸。卜築雲谷，號雲谷老人。謝饒仁常志其出處之跡，繼於漢二疏、唐白樂天、宋之范蜀公。閒居十年，除中順大夫致仕。

張汝明一作謝

字晦叔。舉進士，兩調民曹，繼辟宜章令。邑有大盜，號飛虎，汝明結以恩信，遂伏

調馭。又有神曰武靈侯，廟有神老數十輩，倡妖言惑衆，每歲迎奉，謂不樂從橋，必涉水以濟，人邑，令其避堂居之，否則大災。邑民惑焉，兩軍至有爭祭而交兵者。汝明於神來時，亦自出郊迎之，諭衆曰：「神欲人安，從橋則安。」又言：「令與神，分理顯、幽，神寧可憩公宇？宜居寺舍。祭在誠不在物。」其以蔬菜奠。神老不悅，謂必大災。汝明置神老於獄，詣之曰：「災，則焚汝以謝。」民皆泣拜具伏。邑亦無災，民惑遂解。後判漢陽軍，時行公田法，躬閱四郊，雨雪不改，稅均一路。嘗辟爲漢陽錢監，董築黃州城。建議齊安城外磨旗山虞至可瞰城中，請築外城環之，齊安民賴焉。再辟四川餉幹，卒於道。

劉剛中 字德言。少慷慨力學，好爲文詞，喜莊、荀、揚書。及登朱文公之門，遂篤志正道，文公爲易

其字曰近仁，與黃榦切磋友善。既歸，築室講學，號曰琴軒，遠近人士翕然從之。兩薦於鄉，舉進士，調漢陽簿，再調蘭谿丞，卒。有《述師友問答》一卷。

廖復之，字仁叔。初調阮陵簿。再調陵水教，帥使董規愛其才，俾攝宜州倅。適幹腹有警，命復之往南丹結約羅蠻。即日就道，諭以大義，諸蠻翕聽，方列薦於朝，未遂而卒。

皇朝科第

舉人 進士子、午、卯、酉屬舉人，辰、戌、丑、未屬進士。

洪武二十九年丙子 程冕

建文元年己卯 吳琬初領薦，因違官程，黜爲江夏典史，復登湖廣榜。

二年庚辰 吳琬

四年壬午 李普安

永樂六年戊子 張誠 余隆

七年己丑 張誠

九年辛卯 官望

十二年甲午 黃原昌

十三年乙未 黃原昌

十五年丁酉 張義

十八年庚子 謝信

二十一年癸卯 謝顯

宣德七年壬子 余智

正統十二年丁卯 黃瑞

景泰元年庚午 董英

四年癸酉 胡昇

天順三年己卯 余志應天中貳。

八年甲申進士 余志先是，七年癸未春二月，會試場屋災，詔移秋八月，至是春三月始廷對。

成化七年辛卯 李夔

十九年癸卯 吳綱

弘治二年己酉 余師

三年庚午 吳綱

十一年戊午 余相

正德十四年己卯 李寧

嘉靖八年己丑 李寧

薦辟、人才、教、貢監賢者雜見列傳中。

有傳

曾伯輿 謝子才 吳琬 余隆子志。 黃昌 張誠 黃原昌 余靖 董英 吳綱 李寧弟賓。

宋子平

曾伯輿 養志山林，行修學進。洪武三年舉明經，署儒學事，卒於官。有《鳴缶集》。

謝子才 博通今古，恥隨流俗。洪武十九年舉明經，任儒職，卒於官。

吳琬 字德圭。仕戶部員外，操履清約，公餘惟經史是好，卒於官。

余隆 字孟高。聰敏慷慨。仕吏部員外郎。居官恬退自守，不履豪貴門。少師楊文貞、楊文敏，先後冢宰蹇義及師達、黃福皆器重之。子志。

志 字志學。官刑部主事，陳備邊事二策。爲人豪邁。有言其罪者，憲宗察其非辜，置不問。同時被誣得釋者，皆不敢辯訴，志獨上言：「臣自弱齡留心載籍，伏見異代臣工遭逢世主，罔不砥節樹勳流芳後世，心竊慕焉。雖知類通達，不能仰追古人，然立志堅定，亦不敢苟以自棄，不意異己者反以不自修飭虛被臣身，聖意優容，固爲大造，然小臣私誼，實有未安。倘臣言非，臣不宜再廁班行，若臣言是，乞置對辯。」於是皆下吏再鞠，具得實狀，乃斥黜言者志亦出判廣州，安輯流民三萬口，丈田增稅四千餘石。滿考，陞知石阡府，夷民安之。

黃昌 字順德。縣太學生歷象州、六安、一州同知。所至鋤強伐暴，興學勸農。陞光祿署正，以老引歸。

張誠 字自明。任監察御史，用法平恕，遇事敢言。巡歷交趾，彈劾鎮守大臣及中貴之不法者。繼巡浙江、湖廣，所至有聲。

黃原昌 舉進士，爲人持重有氣節。宣德改元，以行人領詔占城，夷昧朝典，原昌講明新朝之禮，君



長叩首請罪，贈以金帛、奇物，悉却之。復命人對，上悅，陞戶部員外郎。時奔競風熾，原昌恥隨流俗，請老歸。

余靖 字義安。豁達多識。繇國子生知武定州。再知鄭州，撫字多方，剏治有聞。滿考，百姓苦留，命復令其邑。

董英 成化中知興寧縣，和易近民，裁決穎利。前此縣中供應皆出於民，英一切禁止之。

吳綱 字宏舉。任工部主事，奉委疏濟河，輸漕運，開泰山三十六泉，以便水利。捐俸修孔、顏廟。丁艱，墓廬。服闋上京，適劉瑾方熾，瑾人告綱於路曰：「欲遷官，非百金不得也！」綱歎曰：「吾豈人賄中貴，博一資哉？」瑾聞大怒。綱拂袖歸林下，二十餘年不跡公府。

李寧 字懷德。鄉薦，辭縣贖。登進士，試政戶部，被簡領金三十萬賑陝，計羨千，不入私橐，悉散諸饑民。授揚州推官，平決疑獄。檄視淮、嶧，商人投以金，覲減手實，悉却。未幾卒。弟賓。

賓 字懷用。繇選貢人監，授岳州府判，總理屬邑糧餉，豪猾莫敢遁匿。適朝廷修太和山，撫按檄賓董役，賓料理當經始亟，以勞陞五品俸。歸家，散所得俸金於貧族，而賢者倍之。

宋子平 字衡甫。以孝友好施聞。入國學，授南丹衛經歷。署賓州，不俟報，發倉濟饑。改委荔波，民苦征擾，有變志，委曲慰解之。陞賓州判官，適水災，亟請院司停歲征。泰山香錢，吏多私之，子平罄入輸公。以疾卒。

〔校記〕

〔一〕「光澤縣 泰寧縣 建寧縣」九字，各本原脫，據本書體例補。

〔二〕「邵武縣二」四字，各本原脫，據本書體例補。

〔三〕「河南府戶曹參軍」上，當脫「除」字。

〔四〕「六代史書」，原文如此。

〔五〕「官」字，各本原脫，據《宋史·職官志》補。

〔六〕「其囊中」上，各本原闕一字。

〔七〕「御史」下，各本原闕「字」。

〔八〕疑爲「時天大旱」。

〔九〕「光澤縣」上，各本原衍「邵武府」三字，據本書體例刪。

〔一〇〕「李詳異弟」，傳記目錄及《李誥傳》均謂李詳爲李誥弟。

〔一一〕「李階勉子」，傳記目錄作「勉孫階、郁」，《李深傳》又作「弟勉、子階、郁」。

〔一二〕「子深」，據傳記目錄及《李勉傳》，當作「子深、勉」。

〔一三〕「泰寧縣」上，各本原衍「邵武府」三字，據本書體例刪。

〔一四〕「萬曆三十四年丙午」，各本原作「萬曆二十四年丙午」，據《明史·選舉志》改。

〔一五〕「建寧縣」上，各本原衍「邵武府」三字，據本書體例刪。

〔一六〕「侄結」，本卷「宋科第」及傳記目錄作「孫皓」。

## 閩書卷之一百十七

英舊志 縉紳(二)

漳州府 龍溪縣一

### 唐選舉

萬歲元年丙午明經 陳珣見君長。

貞元八年壬申明經 周匡業

元和十一年丙申進士 周匡物匡業弟。

十三年戊戌進士 戴歸德 戴添應歸德弟。 周漢傑匡物子。

南唐進士 戴洪宗歸德孫。 戴秉權洪宗子。以上科年無考。

### 周匡物

周匡物 字幾本。以詩歌著名，未第時，嘗作《古鏡歌》，有「欲向高臺對曉開，不知誰是孤光主」之句。王播見之，大加賞異，曰：「當爲此子作孤光主。」及播知貢舉，而匡物及第。漳人登第，自匡物始。始匡物應舉，家貧，徒步經錢塘江，乏僦船資，久不得濟，乃題詩公館。郡牧出見，遂罪津吏，自是命勿取

舉選人錢。及第後，以詩謝播。後官至高州刺史。兄匡業，爲鄱陽令，與匡物齊名。子漢傑，令漳浦。孫鄱，明經術，有祖風。五世孫仁祚，宋初補郡經業長。匡物《錢塘公館詩》：「萬里茫茫天塹遙，秦皇底事不安橋？錢塘江口無錢過，又阻西陵兩信潮。」今按施肩吾亦有此詩：「天塹茫茫連沃焦，秦皇何事不安橋？錢塘渡口無錢納，已失西興兩信潮。」

宋科第

淳化三年壬辰 陳夢周

大中祥符元年戊申 蘇頌

天聖五年丁卯 余曄 蘇逢

景祐五年戊寅特奏名 蘇迪

慶曆二年壬午 林曼

六年丙戌 陳箴 林修

皇祐元年己丑 蕭漢臣 曾華旦

五年癸巳特奏名 林載周

嘉祐二年丁酉特奏名 李中孚籍縣無考。

四年己亥 余績

六年辛丑 蔡援

治平二年乙巳 劉衍 李亨伯 鄭俊

四年丁未 歐陽紳 黃彥臣

特奏名 陳昌弼籍縣無考。

熙寧三年庚戌 王聘 葉宗古籍貫無考。

六年癸丑 曾旼 李絳 陳珏

九年丙辰 陳璟 蕭彥

特奏名 李宗卿

元豐二年己未 林磐 余侔睦孫。 陳玠璟兄。

特奏名 何中衡 蘇傳自中衡而下，籍縣無考。

五年壬戌 王巽

特奏名 葉偉自王巽至此，籍縣無考。

八年乙丑 吳桓 王梁材

特奏名 黃龜 魏茂

元祐三年戊辰 施象

特奏名 林元 鄭預

六年辛未 林討

紹聖元年甲戌 王文中 劉鎔

四年丁丑 張仲友 蔡圭

元符三年庚辰 蔡鋒 陳敦德玠侄。

特奏名 李文伯 舒坦 陳謬

崇寧三年甲申釋褐 吳揆

五年丙戌 余峰 黃穎彥臣第五子。

特奏名 陳援

大觀三年己丑 黃預彥臣第三子。 吳勳 黃碩彥臣第二子。 蕭韓 魏太原 戴天澤

政和二年壬辰 何靜 陳大謨援了。 李仁籍縣無考。 黃類彥臣第四子。(二)

特奏名 盧炳 戴天秩天澤弟。 謝錫 蔡庸 林几

五年乙未 李功懋 王亢 陳王猷 張公懋

恩例 陳錫謬子。 陳彥籍縣無考。

重和元年戊戌 蔡嶸 蔡章 江輯 黃良臣 鄭廷芳自良臣而下，籍縣無考。

宣和三年辛丑 韓鉉 劉庭筠 鄭曄 陳贛

特奏名 蔡袞侯 吳瓘 陳舜庸 留浚 黃碩侯

六年甲辰 劉巡 王綬 葉知新

特奏名 陳和一作知。 秦椿年秦一作余。 蘇紹

建炎二年戊申特奏名 鄭若德 陳美成

紹興二年壬子 黃世昌 黃京

特奏名 陳阜謨 黃文思自阜謨而下，籍縣無考。

五年乙卯 戴覺

特奏名 蕭汝規 陳建侯

八年戊午特奏名 陳大訥援次子。 林駢 陳嘉績 陳淑自林駢而下，籍縣無考。

十二年壬戌 蔡晟援曾孫。 顏師魯 王羽儀 林觀國籍縣無考。

特奏名 李則 王逢中 林行中 吳南公 李確 李實自李確而下，籍縣無考。

十五年乙丑 李恂 鄭閎 楊汝南

特奏名 姚邦憲 謝恂直

十八年戊辰 林翰

特奏名 歐陽慤 薛徽 陳元 李顯

二十一年辛未 陳彥文 林麟

特奏名 蔡中行 王文柔 盧廷言 楊大猷 王白

二十四年甲戌 陳彥德 王機

特奏名 林章 陳孝昌

二十七年丁丑 黃渙

特奏名 林檉 蘇良翰

三十年庚辰 陳兢

特奏名 林黃中 李慶孫 劉賡 鄭方慶 蔡振 劉隆 胡騰 楊凱

隆興元年癸未 丁邦友

特奏名 陳鴻 許升 朱同寅 蕭聲顯 薛大鼎 陳敦厚 陳緣 黃琳 林夢翼 葉作新 蔡中

孚 郝鈞自中孚而下，籍縣無考。

乾道二年丙戌 鄭公顯 林宗臣 鄭瀚 余震曾孫。 李時中 余有徽震弟。 陳宏規

特奏名 陳上達 鄭升 陳文達 李恢 王朝俊

五年己丑 鄭公敏公顯弟。 陳師孟景孫。 趙伯遜

特奏名 蔡如松

八年壬辰 王遇羽儀子。 陳衡

淳熙二年乙未 孫昭先 余端人震弟。 蔡盡忠環六世孫。 黃萬中 謝師孟 陳經 黃符 鄭元

實自黃符而下，籍縣無考。

特奏名 高發 陳孝寧

五年戊戌 林孔昭 郭延世 林士蒙 黃樵仲預孫。 陳方 趙伯穀 楊枏 蔡迪 黃杰彥臣曾

孫。 陳東 歐陽俞

特奏名 林雲 崔公澤 王淵

八年辛丑 趙師程 許元老 鄭灝

特奏名 林諭 黃體中

十一年甲辰 余嘉 蕭玠 林復亨 鄭閭 盧甫 陳介之 丘轍 王材



特奏名 陳藻 沈洪 鄭天麟 蕭珞 蔡維翰

十四年丁未 黃樞預孫 許伯鳳 蕭珏

特奏名 林雷 蕭輜

紹熙元年庚戌 林士頤上蒙兄

特奏名 陳宗一 林師德 盧興嗣 余有猷 何適道 涂次禹 陳宗說 孫開先 劉果 呂幽

高文煥 陳果 黃行可 陳國體 程文成自盧興嗣而下，籍縣無考。

四年癸丑 鄭名卿 蔡舊忠瑗六世孫

慶元二年丙辰 林孟肅 廖公輔 蕭里 姚東 楊志銳

特奏名 余端夫 施澤 陳衍

五年己未 李愍

特奏名 郭公贊 陳師阜 丁知幾 黃籲 丘聞

嘉泰二年壬戌 陳鉉才欲作欲 宋聞禮 陳萬言 黃應辰 鄭介

特奏名 施總

開禧元年乙丑 趙汝襲

特奏名 林祀 王炎 係彰元

嘉定元年戊辰 劉士龍

特奏名 林埜

四年辛未 朱春 林嶸

七年甲戌 梁傳 程桂 劉旦七龍弟。

特奏名 林蒙亨 梁渭 蔡恭

十一年丁丑 孫叔謹昭先子。 黃桂符孫。 涂子可自黃桂而下，籍縣無考。

特奏名 石宗光 林能千 陳淳 余伯謹一作瑾。

十三年庚辰 蔡履忠環六世孫。 李師言愍子。 吳士廉 黃澤籍縣無考。

特奏名 施興詩 梁勵臣 潘武 謝元修 顏信仲顏一作顧。

十六年癸未 黃學皋 潘戴一作戴。武弟。 林幼安宗臣子。

特奏名 何尚忠 曾啓之 謝渙 林揆 陳渥淳兄。

寶慶二年丙戌 楊汝賢 顏耆仲師魯孫。 蔣逢泰 江泰夫 黃敬自蔣逢泰而下，籍縣無考。

特奏名 何宗德 鄭申卿 陳元揚以上三人，籍縣無考。

紹定二年己丑 戴開覺子。

特奏名 林慶忌 何相 李萬言 許伯鳳

五年壬辰 張雷震

特奏名 方正子

端平二年乙未 吳浩 趙孟傳 陳沆 趙必修

嘉熙二年戊戌 江敏夫

特奏名 楊士復籍縣無考。

淳祐元年辛丑 楊應求

特奏名 黃元泰

四年甲辰 宗子與倣

七年丁未 吳源浩弟。

吳光勳四世孫。

莊光華 趙若澆(三)光華、若亮，籍縣無考。

咸淳四年戊辰 胡顯辟授承務郎。志夫子。

七年辛未 陳森沈子。

鄉貢、薦辟、任子賢者雜見列傳中。

有傳

林積 蔡瑗 劉衍 李亨伯 黃彥臣子顯、碩、預、穎、曾孫杞、朴、樵仲、樵、(四)侄孫渙。(五) 李絳 林磐

陳玠從侄孫兢。

吳桓 王梁材 陳諤 蕭韓 黃濤 黃京 顏師魯子徹，孫振仲、耆仲、(六)頤仲。 黃羽儀

七(子遇。

李則 李恂 楊汝南孫承祖。 鄭公顯弟公敏。 林宗臣 李時中 陳宏規 蔡如松 陳衡

孫昭先子叔謹。

陳經 林孔昭 林士蒙 余嘉 林師德 蕭里 姚東 丁知幾 林大年 宋聞禮

陳淳 潘武 黃學舉 胡志夫

林積 字公濟。慶曆中判循州，廉勤方嚴，嘗覆強盜獄，出五十八人於死，忤部使者意。部使者初欲

薦積，因是已之。積笑曰：「失一薦而活五十八人，吾何憾焉？」

蔡瑗 字希遠。文章政事有名於世，而聲律尤長。歷典五郡。徽宗登極，上封書請法商三宗，嚴畏

周文王《無逸》，徽宗嘉納。除江、淮、荆、浙、福建、廣南等路大提點坑冶。所著有《鵝城集》。

劉衍 字成之。授英州推官，應材識兼茂科，概言時務，諷及新法，報罷。後知潮陽縣，歲大歉，發縣帑，傾家資運廣米，民得不飢。改知新州，以禦妖賊功，特授朝奉郎。秩滿，詣京師，會知杭州趙抃同日引見，議青苗不合，安石叱之曰：「公等不讀書故爾！」抃未能對，衍曰：「三皇五帝所讀何書？」安石默然。力乞致仕，年纔三十八。累辟不起，扁亭曰樂全，與郭祥正徜徉其間。其後章惇等用事，排擯朝士千八百餘人，衍與趙抃不與焉。壽八十餘。按衍所對安石，世以爲抃，而不知出衍也。

李亨伯 字安止。授懷安尉，遷知東莞縣，掩捕海島中積歲劇盜。遷知梧州，興學勸士。丁內艱，不許解任，五上章哀乞，乃得。是秋，甘露降庭栢上，張商英紀之，名亭曰澤露。知澧州、全州，諸蠻服其威名。終忠州防禦使，掛冠歸。王鞏作神道碑，劉安世書碑陰曰：「自嘉祐以來，引年而去者，如歐陽永叔以五十五，范景仁以六十三，公則六十四耳。目所睹，三人而已。立朝時與張商英、蘇軾相友善。軾子過，跋其遺文曰防禦。公以破賊功，知名南服。還漳，過浮羅，爲先君留十日飯。過方侍行，具見其事。不踰時，公還朝，宰相薦換右列，付方面，蓋欲以功名委焉。公峻循退避，終老鄉里。此非進退出處在我，安能以清節照世乎？」子大方，以文名。

黃彥臣 字叔燦。歷南寧、長汀、南安三縣簿，泉、廣二州倅，莆、汀、劍、建四郡守，累贈少師。彥臣倅郡時，有強盜獄，守欲法之，彥臣疑其冤，故緩焉，果獲真盜。在汀州，有販私鹽百餘人，計斤當死，彥臣堆鹽庭中，久之化滷滅斤，不應死格矣。劍、建俗生子不舉，令保正月報，給錢贖之。凡其所至，陰德在人。彥臣父概，好學力行，孝事父母，是生彥臣。彥臣所生七子，四子登第知名，曰願、曰碩、曰預、曰穎。

彥臣之卒也，莆人都曹曾拱妻死七日，忽扶童曰：「人生在世，切宜修福。前知軍黃彥臣，陰德在民，陰府以朱砂書籍，不惟令官，其後乃昌。」

願 字修可。以父任補官，起家晉江尉。嘗裝飾一轎，以奉彥臣，彥臣焚轎，貽書責願，願益自奮勵。遷知上杭、清流二縣。靖康初，知楚州，值京東震恐，有劉士忠者，肆爲浮言，願便宜梟士忠首安衆，乃請罪於朝，璽書嘉獎。既車駕巡幸，觀城壁修固，軍民晏輯，除直徽猷閣。及駐蹕維揚，加龍圖閣。徙知揚州，安撫淮南東路。三年春，虜騎至城下，時相黃潛善倉皇命願赴京口，因坐失守，削秩。高宗卽位，原除復官。孫杞。

碩 字若冲。同兄登進士。調建昌教授，外臺交薦，自江陵法曹，累官朝散大夫。恬於仕進，奉祠里居，教授生徒。及卒，郡守李彌遜祭以文，比之楊亢宗、馬少游。子淵激，孫茂先、朴，曾孫用之，皆補郎官。

預 字幾先。調汝州教授，以薦除太學正。時舍法盛行，預篤意訓導。出知桐廬縣，有惠政。人爲監察御史，直言忤蔡京，貶宜祿縣。尋起廣東倉，未行，復貶宜祿，卒。有《書解》行世。孫樵仲、樵。

穎 字秀實。以上舍免省解。赴廷試時，彗星見，指陳時政，靡忌諱，抑殿丙科。調宗德簿，歷樞密院編修官，俄遷中書舍人，有忌其材，出爲提點太平觀。爲人溫柔廉介，工書隸。有《周禮解義》、《春秋左氏事類》行世。子澤，將仕郎。孫樵，五試禮部。

杞 字景華。以世賞補官，初仕寧化尉，用捕盜功改秩，知浦城縣，有清介聲。再調平陽，有盜鼎者，自言折肱，杞曰：「果爾耶，卽與爾鼎。」其人舉之去，杞曰：「此折肱者耶？」遂坐罪。通判太平府，有圩

田廣表，每歲役民修築，杞召豪戶，與免差役，使爲之。留守胡元質深加器重，每論薦必首杞。除知肇慶府，陛辭，奏對稱旨，孝宗目送之。丞相周必大、參政留正屢薦於朝。將有內除，力求便郡，因知潮州。尋奉祠。時朱文公守郡，最爲所重。子煜，知揭陽縣，有能聲，閩帥辛棄疾嘗薦之，煜，潯州推官，炳、煌，俱以慶壽恩補官。

朴 字文卿。用世賞補懷集尉，攝邑事，或以少年易之。一日寇至，官吏失色，調鄉兵自率禦之。以薦調陽江尉，攝邑事。邑有大豪，持吏短長，前後吏皆畏憚，朴數其過，置之法。胡尚書銓，自海上召還，取道陽江，聞朴名，曰：「當備爲薦首。」未幾，海寇劉承興犯高、雷、化三州，且吞南恩，朴卽率客船十餘艘，出港迎擊，賊聞風宵遁。改秩安溪，崇學校，課農桑。京尹陳輝出帥五羊，處朴於幕下，朴與舶使爭事不阿。秩滿，倅邵武，又倅福州兼西外宗丞。時帥相梁克家召還，朴攝州、宗二事二司，公給一無所取。力乞祠。克家舉所知，以朴爲首，而朴逝矣。子用之，增城丞。

樵仲 字道夫。端方渾厚，杜門著書。登進士，調永福尉，再調汀州錄參，俱有善政，俸外添支，一無所受。謝事歸，每旦率子弟，衣冠見家廟，退則默坐，或至終日。飲食衣服，不求鮮美。居喪三年不歡。里有不義，惟恐其知。朱文公守漳，禮請入學，及聽其講小學書，再三稱善。卒日，神采自若。文公遣倅翁德廣經紀後事。所著有《禮記解》、《小學口義》行世。

樵 字實夫。家居及在太學，授業常數百，浙、廣名士多出其門。淳熙中，以舍選人對，獻十論於相王淮，升進士丙科。調南劍教授，日以龜山、了翁之學勵士。終宣教郎。有《詩解》、《中庸語孟解》。

渙 彥臣侄孫也。父頤，以文行推於鄉。渙初任歸善簿，廉謹著稱。攝尉，獲盜。當改秩，以遜同

僚。遷循州推官，再爲廣東帳幹，檄攝潯州，再攝撫州，皆有聲。

李絳 字伯華。初知貴州，秩滿，除編修國史。出爲福州參議。尋知建州，歲荒，捐俸糴米賑濟。左翼軍叛，絳出誘諭之，皆庭拜。子寧國，朝奉大夫，光國，承議郎，安國，承奉郎。孫可復、可待、可行，皆郎官。

林磐 字定國。任汀州教授。知千乘縣，蝗不入境。歷知邵武軍，乞祠。終朝散大夫。

陳玠 字待賓。初調建之法曹掾，知南劍州沙縣，監泉州市舶司，遷承議郎。家豪於財，父愛其二弟，輒推與之。從侄孫兢。

兢 字戒叔。宣和間以特科調貴州法曹，當路交薦。既舉進士，初尉長汀，再授恩平、新興二州教授，終龍南令。有《周禮解》及雜文數卷藏家。

吳桓 字孟文。熙寧間，陳三要、二術，甚切時務。官至朝散郎。高於文詞，人爭慕之。子南公，嘗進《中興北廷錄二十事》，詔與特恩授弋陽尉，不就。

王梁材 字廷矜。既舉進士，上書陳朝政，乞減省後宮及行幸不急之費，神宗嘉納，除京西運判，遂爲夔州路轉運使，以母老，上表辭謝，不允。復移利州路常平使，再乞就養。未至家，母卒，廬墓。服闋，改廣南坑冶提舉。人見，哲宗慰勉之，特轉朝散大夫、廣東轉運判官。子元忠，知高要縣，以行經界有條理，辟陽春令。

陳譔 字昌國。累試太學不効，歸，教授里人，一本之忠信、孝弟。初在太學，聞父喪，晨夕奔返。兄弟友愛，居不分異。崇寧舉八行首，授岳州文學。

蕭韓 字棠仲。初調古田尉，獲強盜三十餘人，爲減贓免死，調南康丞。遷福清，有誣告平民妖術者，爲之申雪，全數百家。知南恩州，道遇賊曰：「聞公德政，願與更生。」韓招徠之。郡苦海寇，爲築城，植刺竹。舊未建學，作學舍，市田聚生徒教養之。乞祠歸，家居廿餘年，開門授徒，門徒尊之曰蕭夫子。年八十九卒。

黃濤 字壽公。靖康間以薦補充行營使司準遣。至紹興間，倅廣州，廉潔有守，諸公踵薦於朝。

黃京 字華叔。與高登友善，同年擢第。調連州戶曹，以清白聞。秩滿歸里，年未四十，聞登以直言斥，恬無仕進意。居家樂善，人稱長者。

顏師魯 字幾聖。舉進士，歷知莆田、福清二縣，嘗決水利，闢陂洫綿四十里。歲大侵，發廩賑，不遏糴。召爲官告院，遷國子丞。除江東提舉，時天雨，土日無光，都人相警。師魯陛辭，言田里未安，犴獄未清，政令未當，忠邪未辨，願詔中外極言得失。改浙江常平使，時役法敝甚，民遇役輒破家，師魯下教屬邑，預正流水籍，稽其役序，寬比限，免代輸，人咸便之。鹽課歲百鉅萬，本錢久不給，亭竈私鬻，禁不可止。師魯樽節帑緡，盡償宿負，戒官吏毋侵移。舉課獨最，高宗謂執政曰：「儒生能此，予職直秘閣。」農民有墾曠土成田未及受租者，奸豪多爲己利。師魯奏：「但當正其租賦，不應繩以盜種法。」奏可，著爲令。人爲監察御史。有葛揆者，自外府得內殿宣引，將補御史闕員。師魯亟奏：「宋璟召自廣州，道中不與楊師最交談。李鄴恥爲吐突承瓘所薦，堅辭相位。士大夫立身之節，當法璟、鄴。今其人朋邪，朝廷乏才，寧少此輩？」臣雖不肖，羞與爲伍。」命乃寢。繼論除職帥藩者：「比年好進之徒，交結權倖，一紆郡紱，皆培植以厚苞苴，故昔以才稱，後以貪敗。」高宗出其疏袖中，行之十年。縣太府少卿爲國子祭酒，首奏宜



講明理學，嚴禁穿鑿。與諸生言孳孳以治己，立誠爲本。除權禮部侍郎，尋兼吏部。有旨改官班，特免引見，言：「祖宗法度，不可輕弛，願始終持久，自強不息。」又言：「賜帶多濫，應奉微勞，皆得橫金預外廷，會如觀瞻何？且臣下非時之賜，過於優隆，梵舍不急之役，亦加賜資，萬有爲國制變禦侮，建功立事者，將作何旌寵？」高宗升遐，師魯與太常少卿尤袤、鄭僑議廟號曰高宗，卒從所定。充顯仁皇后遺留使。初，使至金，金虜必令簪花聽樂。師魯陸辭，言必死守之，不輕徇非禮以弱國勢。既至，據陳誼，反復慷慨，金人不能奪。遷吏部侍郎，尋除吏部尚書兼侍講。累章請老，以龍圖閣直學士知泉州。至泉，以真誠平易行政率下。戢官吏之巡城搜稅者，罷永春上供銀之預借於民者，停免安溪官田、職田、民田之逃亡者，嚴除行之禁令，戒丁錢之培克。朱文公請行經界法，詔下，條其利害，師魯條上二利、三害，議者謂有失有得，而亦尋止。二年冬，進煥章閣學士，令再任，累乞致仕，光宗勉從其請，進寶文閣學士，提舉玉隆萬壽宮。去郡，巖谷漁樵之民，相與提携花酒戀獻。光宗聞之，復令再任，累章辭。未奉旨，卒，年七十五。官至大中大夫，爵漳浦郡侯，食邑千戶，贈宣奉大夫，謚定肅。子徹、衡、孫煥仲，俱蔭補官。

徹字介肅，一字子通。警敏力學，莊尚氣節。以茂才薦，授南外、西外陸宗院。遷知永福。歷外任，屢登薦剡。官奉議郎。在水福，作《自公齋記》，闢廳事東數椽爲宴息地，名曰自公，《羔羊》之義也。考之傳註，或謂「自其公而退食於家」，或謂「出公門，入私門，終無私交之行」。惟鄭氏以退食爲減膳，以自公爲從於公，余謂得《詩》本意。大抵侈心勝則利心生，利心生則私心作。天下正直之理，惟躬行節儉者得之，內而家，外而國，大而天下，事無巨細，一意樽節，私無妄用，公無妄費。在物者，不足爲吾役，則酬酢泛應，皆人乎天理之自然。物來能明，事至能應，而莫非公矣。《書》云：「恭儉惟德，無載爾偽。」蓋此

之謂。書載座右，以識命名。子振仲、耆仲、頤仲。

振仲 字景玉。以祖澤補登仕郎，宰安溪。尉執平民曰盜，振仲物色之，知其傭作，有主家，遂得釋。守游九功褒其事。倅莆陽，嘗課不足，至振仲乃有羨。嘗攝郡，飛雄軍被調遣，資糧不足，課於市，振仲出問知故，撫諭之，自以倅廳所積錢給軍，軍感悅膜拜。官至朝散郎。

耆仲 字景英。以祖澤補官，授福州海口鎮，遷知鄭縣，歷倅臨安府。既登進士，除知江陰軍，蒞政公勤。召爲吏部郎，以直秘閣提舉淮東。陛辭，論君子、小人所以異。除樞密院承旨，歷太平府少卿，丐祠冲祐觀。耆仲雅愛上類，所至崇學校，獎風誼。初鎮海口，鎮有書院闕廩，耆仲置莊田，製祭服，鎮人祭祀之。家居，置平湖桂莊，以歲入錢糧贖計偕士。官至中奉大夫，爵龍溪縣開國男。子鎮，韶州司法，鑰，惠州鹽場，銖，通仕郎。

頤仲 字景正。理宗朝以祖澤補官，歷寧化尉，轉知西安縣，皆有美政。累知嚴州，時錢楮中半之令初行，吏民震恐，頤仲曰：「郡人納純用楮，而責以見錢，是強其所無也。」又曰：「忤旨獲戾，罪止一身，便門自營，害延千里。」朝廷不能奪。入爲司農丞，攝金部郎，除直秘閣、兩浙轉運判官。時禁旅饑，出諄諄聞輦轂下，頤仲撫定之。除戶部郎，知臨安府。浙西安撫卒諄語如前，頤仲曰：「昨撫諭從權弭變，爾事定矣，有罪宜討。」進將作監兼府事。輪對，言：「兵驕楮賤，皆繇寬而不嚴，所以致玩；散而不斂，所以積輕。」理宗是之，復諭頤仲：「楮尚折閱。」頤仲奏：「物少則貴，多則賤。邇者楮幣印造數多，知散而不知斂，臣謂約浮就實，全在節用。」理宗稱善。進太府少卿，京尹如故。嘉熙初，除廣西轉運判官，奏罷瓊崖、儋、萬四州鹽本錢，并蠲免二十五州身丁錢。三年，赴行在奏事言：「早被數路，潮囓隄岸，民死虜、死

盜、死饑，不聊其生。今年陷襄，明年失蜀，又明年破淮，國勢岌岌如此。乞下哀痛之詔，風勵有位。」除太府司農卿，兼左司。四年，權戶部侍郎，以直寶謨閣知寧國府，一如嚴州之政。淳祐改元，除浙東提刑，尋以舊職奉祠。二年，起知泉州，以秘閣修撰兼福建提刑。罷溪糴，減商稅，教宗室，養孤老。四年，起知溫州。明年，遷右文殿、知慶元府、沿海制置使，奏罷官渡錢。六年，詔頤仲職事修舉，陞集英殿制置大使。七年，除寶章閣待制，因歲饑，遣艘往廣收糴郡倉，抵價折納，甲戶按籍勸分籍，境內四十餘萬口，排日賑糴，以官倉及俸米倡之，不足，以甲戶富商均認之數濟之，又不足，以廣州米濟之，猶不足，奏乞常平二萬餘石，半濟半糴。詔俞其請，全活甚衆。八年，除兵部侍郎，疏乞祠。十二年，以刑部侍郎召內引，奏言：「臣歷閩、浙被水之郡，建爲甚，劍次之，衢、嚴又次之，願更加賑恤。」兼勅令所詳定官，除權兵部尚書。俄權刑部兼知臨安府。明年，以吏部尚書、寶章閣學士提舉玉隆萬壽宮。抗章請老。景定二年卒。

王羽儀 仕徽州通判，徽一作衢。博學能文，尤長於詩。子遇。

遇 字子合。少受業張南軒、呂東萊之門，而與廖德明、黃榦、陳淳友善。舉進士，調臨江教授，再調處、蘄二州。在蘄，日與諸生講說，漏二十刻，猶徘徊學舍。注懷安丞，閩帥詹體仁、鄭僑延置幕府，裨贊甚多。丞相趙汝愚聞其賢，將擢用之，而偽學之禍起矣。久之，以薦知長樂縣，樽節浮費，大修水利。轉贛州通判，薦章交上。時韓侂胄當國，遇不少貶以求合。侂胄敗，召爲太學博士。未幾，除諸王宮教授。適毗陵大旱，命爲之守，力講荒政，民被實惠。浙東大饑，詔以提舉浙東常平。入對，請「齋戒以飭躬，剛大以進德，急聞直言以救闕失，樂從公議以扶正道。當斷絕斜封、墨勅之原，常存親民如傷之念」。至官，留心賑濟，一如毗陵時。除大宗正。遷右曹郎中。嘉定四年，校策殿廬，事異而卒。遇居官，所至介然，

招之不來，撼之不動。黃榦稱其學識之精，義利之明，拔出流俗之表。學者稱東湖先生。子仲訥，以蔭官羅源令。

李則 字康成。少孤力學。試太學不偶，浩然東歸，教授生徒至百餘人，如楊汝南、李恂輩，皆師事之。累薦鄉書前列。自號益壯翁。初授桂嶺簿，攝富川令，調泉州德化令，皆有政聲。轉通直郎，致仕。則之學，兼得蘇、程二家。其教人，皆以仁義爲本。

李恂 字願言。性敏好學。舉進士，任縣尉，以捕盜賞，改知晉江縣。後知邵武軍，以宮觀致仕。初，恂登第，與史浩同甲，及浩當軸，累召不起，時論高之。子必直，必正，皆蔭補官。必直，任興化軍。

楊汝南 字彥侯。自其少年，試輒不利。鄉貢計偕，待捷旅邸，夜夢被人提油灌頂，如是者三。科紹興乙丑，揭榜之夕，明燈張博，拉侶劇歡，曰：「爲我達旦，使我不夢。」其僕卧西牖下，忽作魘魘聲。亟振醒之，具言：「夢二人扛油鼎登樓，顧見乃公在坐，轉執注僕，僕怒而爭，作如是魔。」汝南憮然名心都絕。

榜出，則得名，視其名次，黯有油跡，乃嘆，曰：「士遇不遇，蓋有天哉！」既登第，調贛州教授。改廣州，仍前職。嘗撫《詩》、《春秋》、《中庸》要旨經說三十篇，以授學者，仍表進於朝。祭酒楊椿覽之曰：「真師範也！」用薦，改知古田縣，修學舍，置學田，日謁學官，考德勸業，士人德之。汝南與郡人高登、廬陵楊萬里，並以節義相砥。爲文語意清新，有騷人典則。自初仕，即以廉平公勤自勵，故所至有聞。孫承祖。

承祖 字慶襲。博學工詞賦。以祖澤補官。初，調邕理曹，斷獄得情。再調循州推幕，改知安溪縣，勞心撫字，去日，民遮道借留。再倅循陽，父老迎謂曰：「故清廉推官也！」攝守惠陽，廣憲王涉以廉吏首薦。擢知新州，帥洪伋辟守恩平，改知梅州。赴闕奏事，極言二廣便宜。未幾，奉祠，上別墅介保福、隆壽。

兩山間，與郡守傅伯成，及鄉寓少卿孫昭先，封守陳經，爲《真率集》。子思恭，程鄉尉；思安，新懷簿。

鄭公顯 字隱之。初調建州司戶，秩滿造朝，獻時事十論，除潮州教授。改知同安縣，有惠政，召監進奏院。遷宗正簿，應詔進三說，謂：「指陳大政而毋摭細故，直書事實而毋尚繁文，此其二，在大臣。親覽審擇，此其一，在陛下。」除大府寺丞兼勅令所刪定官，歷侍右郎官兼左司郎中。公顯問學淵深，尤長儷語，在玉牒所時，初誕皇孫，表賀重華云：「怡神珍館，詎知天之非人，而人之非天？毓秀濬源，果見子又生孫，而孫又生子。」又表賀生皇孫：「千年生一聖人，固曰非常之慶，一日見三天子，尤爲甚盛之休。」又表賀雪，以重華比舜，以壽成王皇后比王母，有「侍姚虞於玉圓，奉王母於瑤池」之句，時人誦之。弟公敏。

公敏 字明之。幼孤，與兄苦學，時號二鄭。舉進士，歷福清簿，有政聲。以薦調古田教官，廣學宮，新祭器，建講道堂，闢射圃，日與諸生講明理學。嘗以文謁憲使楊萬里，大奇之。子崧，番禺令。

林宗臣 字寔夫。受業高登之門。官至主簿。一見陳淳，心異之，謂曰：「子所習科舉爾，聖賢大業則不在是。」因授以朱文公所編《近思錄》。淳卒爲儒宗，宗臣啓之也。

李時中 字守正。由延平通守軍器監丞，出知袁州。秩滿，除廣東倉。所至，俸錢悉人寄庫，不以歸家。

陳宏規 字獻可。父雄卿，以長者聞。宏規少年獵科第，長吏事。初爲永春令，有聲。後以軍器監丞出知潮州，增置韓江東岸石州二橋，闢養濟院以處廢疾無告者。召爲吏部郎，歷朝請大夫。潮人祀名宦。

蔡如松 字勁節，襄之族。慷慨有志，與顏思魯、吳獬友善。歷四會令、新興推官。晚節不樂仕，乞祠歸。

陳衡 字季平。初調高要尉，以擒海寇獲賞，改寧都尉。薦除福建帥幹，遷知廉州，陛辭，奏差役之弊。至郡，再上章乞祠。丞相京鏞曰：「恬退上也。」除宜州，力申前請。慶元初，除知興化軍，著《十論》以裨朝議。有携權貴書有求者，衡曰：「寧身常謗，不官物徇人。」樽節用度，增糴備凶，邦人立祠鐫碑。子少清、少時，皆縣尉。孫，監淮西，總司北軍。

孫昭先 字延父。舉進士，調興化簿，以直道聞。知安溪縣，簡易寬恤，科役有法，民有先期充賦者。修學舍，躬課業，斥廢寺田以贍教養。嘉泰初，以丞相薦，差幹辦行在諸司審計司。人班行，論謹名器，嚴法度，寧宗嘉之，除司農寺簿。時大農告匱，朝旨委都戶部同寺官推究弊源，昭先條具甚悉。都城火，疏言五事，「下失則五行上汨，善政修此則和氣應彼」。遷寺丞，出知衢州，修學校，葺城壁、津梁、驛舍，無廢不興。歲旱，精意禱雨。小歉，則減於秋苗至萬餘斛。復爲民輸折帛二稅，發廩勸分，隨地賑糴。臺閭合舉，治行冠一道。召對，言：「外攘急在治內，內治要在安民。」歷浙東提刑，每牘至前，必反覆推究，或有擬獄，卽延幕屬上下共議。每行部，戒官吏無得供餉，資糧屨悉自齎辦。踰年，劾去奸昏屬吏幾二十餘人。嘉定中，召赴行在，再除吏部郎，人對，言朝綱未清，邦用未節，士氣未振，民病未蘇，凡四事。除樞密院檢詳諸房文字。歲旱，詔百僚上封事，昭先條陳四病甚悉。俄除右司郎中，遷大府少卿，再除直寶謨，提點江東刑獄，改主管成都府玉隆觀。尋乞致仕，卒年八十。有奏議、詩文若干卷。子叔謹，見下；叔諧，廣南市舶提舉。孫敏學，監隆興苗米倉，強學，桂陽簿，志學，賀州司法。

叔謹 字信之。以郊恩補官。調揭陽尉，縣有稅務，距州務七十里，而近民困重征。叔謹一日攝令事，力言郡弛其禁。踰年，除大理評事，持法守正。輪對，言旱蝗爲虐，所在荒亂，乞責長吏以賑卹實政，課守帥以備禦實功。舉進士，除知莆田縣。迎父侍養，官事悉以諮白。憲使劉應祖露章薦其治最。秩滿，授泉州通判。丁艱服除，遷大理寺丞。理宗卽位，陞對，乞修明君德，振舉治綱，謹好惡於出令，審輕重於用權。又言：「長民之吏，推剝弊多，總戎之官，掊剋風熾。請遴選監司、太守，精擇制閫主將。」理宗嘉納，署大理正卿。獄囚有聽奏者，朝旨劄下府尹，遣吏至寺門已二鼓，必啓鑰入，叔謹曰：「此非出囚時，少俟翼旦。」吏意沮，頗出異論。後聞於朝，卒是其說。越二年，遷大理正。陞對，進正心持久之說。丐外，知潮州，五鼓出聽事，訟牒數百，剖決如流。州兵惰弱，中嚴教閱，課伎藝。常俸外，悉捐爲修學費。新思韓堂，訪求昌黎手澤，刊置堂壁。出羨錢二萬餘緡，爲三邑代輸下戶鹽役，邦人像祀之。去日，擁送以數舍。

陳經 字叔綸。知福清縣，首務教化。歷判循州，知欽、封二州。工詩文，一時名士若趙汝諱、敖陶、孫危積、傅伯成，皆推服之。威惠廟建通仙樓，衆屬經記，經對客援筆，以「丈夫當廟食，仙人好樓居」爲發端。楊長孺帥廣，得其封州《軫民》、《訓兵》二詩，謝之曰：「一封無已帖，兩首樂天詩。」

林孔昭 字潛夫。宰福清有聲。丞相周必大薦士三十五人，孔昭預焉。歷國子監簿，遷丞。復用薦者言其風力才望，出守處州。族侄士蒙。

士蒙 字子正。調歸善尉，遷梅陽推官，律已潔而馭吏嚴。尋攝郡，崇學校以厲修士，嚴法禁以懲亂民。改知東莞，政事益修。

余嘉 字若蒙。任惠、潯二州教授，進《聖域記》，特授浙西倉幹。復進《皇朝職志》、《高宗政範》，差監樞密院激賞庫。進《資時十論》，伏闕上書，論韓侂胄。又上書力沮和議，復爲《古鑑錄》以進。及上書論邊事，進《天門類例》、《括象志》。改通直郎，主管嶽祠。所著《周禮解》、《禹貢考》、《春秋地例增釋》、《紀年錄》、《雜論》、《五音姓譜》，哀前後上書曰《代庖集》、《骨鯁集》。

林師德 字叔正。文長駢儷，爲學者師。游太學，與黃樞齊名。尉東莞，以獲盜功，改武岡軍僉判。秩不稱才，士論惜之。

蕭里 字元舉。力學好古，以《周禮》名家，經解受者多爲門人。任同安尉，一介不取，再調廣州教授，卒。楊士訓銘其墓，稱其「與人交，上無諂，下無狎，嗜學如饑，赴義若渴」。

姚東 字明仲。仕長溪簿，旱禱卽雨，民曰主簿雨。令丞解火，簿廳無恙，民謂主簿留之。再調保昌丞，憲臺知其廉察，屢委疑獄，囚不忍欺。

丁知幾 字潛仲。簿潮陽，有聲。解官歸，與伯兄貢元知微鑿港道通柳營江，自文甲西至石美東，凡三十里，化鹹爲淡，水利大興，鄉民利之。皇朝洪武間，守王仲謙令民祠知幾其鄉。

林大年 字壽卿。年八十二，以《書》義再領鄉書，謝啓有云：「滅伏生之八歲，加太公之二年。」後不赴南宮。郡延爲州學正，年九十餘矣。日與生徒討論未見書，終老於湖山。

宋聞禮 字叔履。教授叙、化二州，知海陽縣。有《易禮記詩解》行世。

陳淳 字安卿。少而識趣端高，學務求實，間取濂洛遺書，伏而讀之，曰：「若與吾會，循牆闔門，未身其奧，吾心慙焉。」及聞朱文公講道武夷，歎曰：「是濂洛的派，羸糧願從。」厄於無資。會文公來守漳，



袖所爲《自警詩》爲贊，文公讀之，恨相見晚，與語，知其用工久且深，直以上達之理發之。淳聞語深思，益求所未至。文公去郡，每語人：「南來，吾道以得一安卿爲喜。」淳退，更講明義理，洞究淵微，日用著察，有以見天理流行之妙，胸中洒落，隨其所處，莫不有從容順適之意，如是者十年，復不遠千里，往質文公。文公有喟然與點之嘆，則又告之曰：「當大作下學之功，毋專任上達之見。當如曾子專事於所貫，毋遽求一。當如顏子專事於博約，毋遽求卓。」淳歸，而更無書不讀，無物不格，凡經傳子史之所載，紀綱制度之詳，禮樂刑政之用，古今興衰治亂之原，得失利害之機，與夫異端邪說似是之非，淺深疏密難明之辯，周匝究勘，徹上徹下，而於文公所以教，無復遺恨。文公沒，淳僻處陋澤。曩時朱門諸老皆已零落，後來者率累於科舉，習於見聞，惟鄰郡泉、蒲間，有相信從者。嘉定丁丑，以特試寓中都，四方友皆來叩質，朝士大夫爭館迎焉。嚴州守鄭之悌聞其至，招致學宮，坐臬講道。彼一時也，有竊似亂真，自立門庭者，教人默坐求心，謂一蹴可至，而以致知格物爲支離，認人心爲道心，後生晚出，喜奇便簡，群然和之。淳極力排軋，所以發明正學，以求指歸，則有《道學體統》等四篇。所以排軋異端，中其膏肓，則有《似道似學二辯》。既歸，泉人士師事益衆。淳與講解，率至夜分，惟恐聽者之勞，而在已曾無倦色。惟慮夫人無以受之，而不憚傾倒所有以告。於是門人隨其口授筆之，於《書》、《大學》、《論》、《孟》、《中庸》則有《口義》。仁義禮智、心意性情之類，隨事剖析，則有《字義》、《詳講》。仙溪陳沂，久往來淳門，輯一時間答之言，爲《筠谷所聞》二卷，其深切著明者也。惟淳之道，至晚益尊，行著於鄉，德形於言，胸中明瑩，若太空無雲，而其辯說條暢，浩乎水涌而出。其推己及人之心，甚於饑渴嗜慾，不能自遏。嘉定戊寅，授迪功郎，主安溪簿。泉南諸生，預竊自幸有以終教，及將之官而遂卒，於是相與哭之，哀曰：「後學之不幸也！」

潘武 字叔允。與陳淳爲道義交。以特科兩任嶽祠，循資至文林郎。邑子弟多從之游，如進士趙希流、吳仲修，皆出其門。

黃學臯 字習之。博通經史，尤長於《詩》、《書》、《春秋》。以特奏名薦，入試南宮，策問三舍法弊，學臯舉伊川請改試爲課，及制尊賢堂、待賓齋以答，有司大書曰：「此必偽學之流。」黜之。嘉定十六年，始登第，簿番禺。趙帥師楷每事必咨決。而丞相崔與之，時料院虞衡，尤所器重。再轉鄱陽丞，待制李性傳延人郡齋，校勘朱文公《續語錄》，因薦之，調泉州察推。需次於家，郡守方未屈居學職。哀《論孟議》數章，辯析界限，以訓諸士。比至泉，以廉稱。年七十乞歸。

胡志夫 父騰，仕員外郎。志夫，嘉定十七年辟承受節郎、江東安撫使司將領，使金國，不屈死。謚忠惠。

### 元科第

至正七年丁亥鄉試 周佑 第一人。林唐臣

八年戊子 林唐臣 尚有郭時晦，未詳何科進士。

薦辟、人才賢者見列傳中。

有傳

林廣發 黃元淵 周佑 王吉才

林廣發 字明卿，別號三溪。嘗謂陳安卿號北溪，高彥先號東溪，蔡汝作號南溪，而已號三溪，將兼而匹焉。生平孝友，規言矩行，通貫《六籍》，融會百氏。郡學三聘爲諸生師。以部使薦，授安溪學職，邑

僚師事之。會寇作，奉府檄招降，以勞版授其縣主簿，仍謀軍府事。每俘至，委訊，輒曰：「此平民也。」府帥問曷辨，曰：「獲於巢穴者賊，捕於井里者民，此皆自井里得之。」福建分省，請置汀、漳屯田萬戶府，以廣發爲其府經歷。屢有差遺，不得理府中事，兵民請諸分省曰：「願還此官，活我邊人。」所著有《三溪集》傳世。子唐臣，人皇朝改名弼，有傳。

黃元淵 字君翊。父進，本縣學諭。元淵，至正中薦知漳州路學錄。秩滿，陞泉州路學正，卒。郡有朱文公祠，宋守方未所建，人元，其地爲寺。元淵自出私錢，買城東北隅地，別建之，作大成殿，以祀先聖先賢，作祠堂祀文公，以黃榦、陳淳配，別作講堂齋舍，處師弟子。天曆四年，告成。至順三年，國子助教陳旅告學士虞集曰：「捐家業以爲浮屠老子之宮，求福利益者，世不勝數。元淵觀鄉邦之寥寂，慨斯文之泯墜，節衣食之資，以成義舉，書院成，而家已貧矣。君子其有取於斯乎？公其爲之記！」

周佑 字于一。質淳學正，爲古文詞，雄深雅健。閩海僉事有左姓者，督師漳南，佑撮取邊事顛末以獻，左曰：「史才也！」薦爲同安文學，進其書於朝。由是，館閣諸老皆知佑名。

王吉才 篤志古學，尤明典禮，郡守延爲弟子師，後爲泉州學正。吉才親終，皆及期，而己老矣，哀慕痛毀，有如蚤喪。雖在家庭，亦冠衣斂容，人未嘗見其遽言怒色。學者稱爲益齋先生。

〔校記〕

〔一〕「續紳」二字，各本原脫，據本書體例補。

〔二〕「類」，《黃彥臣傳》作「類」。

〔三〕「趙若澆」，下文作「若亮」。

〔四〕「曾」字，各本原脫，據《黃彥臣傳》、《黃願傳》、《黃預傳》補。

〔五〕「渙」，各本原作「煥」，據本卷、宋科第及本傳改。

〔六〕「書仲」，各本原置「孫振仲」上，據本卷、宋科第及《顏師魯傳》、《顏徹傳》移。

〔七〕「黃羽儀」，本卷、宋科第及本傳作「王羽儀」。

〔八〕「顏思魯」，疑作「顏師魯」。

# 閩書卷之一百十八

英舊志 縉紳

漳州府 龍溪縣二

## 皇朝科第

舉人 進士過子、午、卯、酉屬舉人，辰、戌、丑、未屬進士。

洪武十七年甲子 劉海 郭實應天中式。

二十年丁卯 盧奮 郭深道 陳應祖俱府學。

二十一年戊辰 劉海

二十三年庚午 蔡廣 張賢 柯志德 林珪一作保。

二十七年甲戌 林珪

二十九年丙子 柯祐 蘇尚德 謝勝祖俱府學。

建文元年己卯 顏隆一作澄。宋頤仲裔孫。 王誠

永樂元年癸未舉人 鄭宗 王昇 陳英 胡春同 黃仲珪按舊志有洪武三十五年一榜，考是歲革除，故元年闕

科而明年甲申會試。

二年甲申進士 王昇 黃仲珪

三年乙酉 顏珪 陳坤奇俱府學。 陳彧以貢，應天中式。

四年丙戌 顏珪

六年戊子 郭邦寧教諭惠弟。 顏旺祖 盧成祖

十二年甲午 方觀府學。 陳陞

十三年乙未 陳坤奇

十五年丁酉 林懋 蔡睦俱府學。 謝璉 蔡槎

十六年戊戌 蔡槎

十八年庚子 洪祖 陳秉質俱府學。 許安 黃璋 蘇疇 王振

一十九年辛丑 王振

二十一年癸卯 汪凱解元。 戴驥府學。 黃璧

二十二年甲辰 汪凱

宣德元年丙午 林僑元廣發曾孫。

二年丁未 謝璉探花及第。

四年己酉 郭潮府學教諭惠子。 陳寵 鄭嘉深道子。順天中式第四人。

七年壬子 楊衡 戴傳俱府學。 李騰

十年乙卯 林兆 徐通 林巖應天中式。

正統元年丙辰 林兆

三年戊午 趙賢 林鈞僑從侄。

六年辛酉 盧涓府學。鄭敞 陳盛 李勤 林敦巖子。隨任廣西中式。

九年甲子 鄭和 周宣 潘榮 侯由俱府學。蔡浩 蔡英 楊紹 鄭頤

十年乙丑 周宣會試第三名。

十二年丁卯 鄭賢 黃巖俱府學。李弼騰子。

十三年戊辰 鄭和 潘榮 楊紹

景泰元年庚午 盧潭 戴耀 林泰 郭鏗邦寧子。徐福俱府學。陳舒曠子。林雍 陳惠 劉孜

復姓吳。

四年癸酉 李驥 戴經 郭舒惠孫。顏格宋尚書師魯十一世孫。馬環 黃恭仲瑄孫。丁鵬漳州衛前所

軍生。俱府學。楊述 謝維 汪範凱子。卒於火場。莊同

五年甲戌 林雍 郭舒 劉孜

七年丙子 陳讓舒弟。第二名。戴和 胡壘春同子。俱府學。陳耀 蔡靖 王豫 林同 宋球

天順三年己卯 蕭璿 董安漳州衛中所軍生。翁輝 顏拳師魯九世孫。

四年庚辰 林同

六年壬午 余珪第五名。涂慶 馬龍右所應襲副千戶。俱府學。

八年甲申進士先是七年癸未春二月會試場屋災詔移秋八月至是春三月始廷對唱名 蕭璿

成化元年乙酉 魏富 陳順俱府學。 李寶

二年丙戌 陳惠 顏格 魏富

四年戊子 陳炎 黃熒貢士。嵩侄。

五年己丑 陳耀 董安

七年辛卯 顏亨第三名。 陳璋 魏朔

八年壬辰 黃熒

十年甲午 鄭發

十三年丁酉 張松 何乾 張綽俱府學。 張壇 高顯 黃霆 陳清

十六年庚子 顏櫨旺祖曾孫。 吳玘 黃亮

十九年癸卯 蔡杲 曾逸俱府學。 陳璜

二十二年丙午 鄭訥和孫。 林琰雍侄。 林富 黃圻俱府學。 顏寔

二十三年丁未 蔡杲 曾逸

弘治二年己酉 吳守正府學。

三年庚戌 吳玘

五年壬子 蔡定府學。 顏榮隆曾孫。

六年癸丑 張綽



八年乙卯 陳文祥 洪異俱府學。

九年丙辰 黃圻

十一年戊午 袁佐府學。 黃正

十四年辛酉 林魁 盧琛俱府學。

吳法孜子。

十五年壬戌 林魁

十七年甲子 王中府學。 鄭瀚

正德二年丁卯 洪哲 張觀漳州衛右所軍生。俱府學。

鄭慶

五年庚午 黃玠 楊表

八年癸酉 顏階格孫。 鄭衷

九年甲戌 楊表

十一年丙子 曾圻逸子。 鄭臨俱府學。 鄭復臨兄。

十四年己卯 林啓 高琅

嘉靖元年壬午 吳昇府學。 張堅

五年丙戌 高琅

七年戊子 徐衍

十六年丁酉 陳韞 謝彬俱府學。

十九年庚子 林應奎 袁文選 王承祐漳州衛前所軍生。俱府學。

黃泮第二名。焚孫。

二十二年癸卯 洪公諧異孫。柯應鳳 李文華俱府學。 洪一泰

二十三年甲辰 謝彬 洪公諧 林應奎

二十五年丙午 顧會 吳旻俱府學。 蔡文南靖學。

二十六年丁未 蔡文

二十八年己酉 顏若愚橫孫。 楊埜卿 嚴世同俱府學。 李上達後改士達。

二十九年庚戌 顏會

三十一年壬子 蔡應春府學。 李湖

三十二年癸丑 呂旻 李湖 黃泮

三十四年乙卯 方一正府學。 林煉 黃可久 郭廷用舒曾孫。 許衍以貢，順天中式。

三十七年戊午 黃甲 陳哲俱府學。 吳善

四十年辛酉 徐檀 金鉉俱府學。

四十一年壬戌 吳善

四十三年甲子 蔡乾釜 陳燁漳州衛前所軍生。 劉文徵漳州衛前所軍生。俱府學。 吳儻 趙宗鳳以貢，順

天中式。

四十四年乙丑 金鉉

隆慶元年丁卯 黃萼 葉一清 吳道遷俱府學。 蔡應科 鄭時章

二年戊辰 吳道遷 蔡應科

四年庚午 余一愚第五名。府學。 楊鼎臣 趙德懋 張廷榜綽曾孫。以貢，順天中式。

五年辛未 鄭時章

萬曆元年癸酉 謝文炳府學。 王學孝通判澤子。 韓濟 袁懷魁 吳原業以貢，順天中式。

二年甲戌 韓濟 張廷榜 蔡乾釜

四年丙子 劉廷蘭解元。 蔡廷札 涂表俱府學。 張廷棟廷榜兄。 韓紹忠濟弟。 王應麟 張惟方

以貢，順天中式。

七年己卯 黎時中第五名。 徐孔仁 許暹俱府學。 黃文炳 蔡宗周 高則賢以貢，（一）順天中式。

八年庚辰 謝文炳 蔡宗周 張廷棟 王應麟 劉廷蘭

十年壬午 楊聯爵 蘇任俱府學。 陳從彝 林廷蘭 謝應謨

十一年癸未 張惟方 黃尊

十三年乙酉 徐學益更名來熙。 陳汝錄俱府學。 李弘施 王希夔 陳翰 蕭儲卿翰、儲卿，並順天中

式。

十四年丙戌 王希夔

十六年戊子 林仕挺府學。 楊求誠 蔡懋賢同安學。

十七年己丑 蔡懋賢

十九年辛卯 王邦俊學孝子。 金璋 柯紹卓 吳培 黃誦俱府學。 王廷鳳 林士振士挺弟。 劉

鼎新南靖學。 戴以讓以貢，順天中式。

二十年壬辰 戴以讓

二十二年甲午 黃鰲伯府學。黃聯甲舉曾孫。張燮廷榜子。洪時蕃異玄孫。黃敬常 吳廷柱

鄭懷魁以監，順天中式。徐鑾選貢，順天中式。

二十三年乙未 鄭懷魁 徐鑾 王廷鳳

二十五年丁酉 胡日暘 陳惟貞俱府學。徐遵宗孔仁子。莊懷珍 蕭鳳 陳翼飛平和學。呂貞以

貢，順天中式。

二十八年庚子 鄭可選府學。馬鳴起

三十一年癸卯 楊光賓聯爵子。鄒孟都 何出圖俱府學。黃天鸞 陳正學 李彬 郭王鎮更名成

鎮。陳復亨 鄭鼎 程應龍 鄭爵魁懷魁弟。監生，順天中式。王允昇貴州中式。

三十二年甲辰 黃天鸞 陳惟貞

三十四年丙午 李應改名夢星。黃有賢以臨桂教諭，廣西中式。(二)

三十五年丁未 洪時蕃 程應龍

三十七年己酉 許應聘 謝宗澤 楊志燾 曾忠同安學。復姓王。蔡一熊惠安學。黎會中時中弟。監

生，應天中式。

三十八年庚戌 馬鳴起 徐遵宗 陳翼飛

四十年壬子 蔡澄 蔡孟顯應孫子。劉其忠

四十三年乙卯 徐時炳 郭維鸞 高明英 趙懷玉 姚士鴻 許茂莘 謝應璋 林名香

四十四年丙辰 劉其忠

四十六年戊午 戴國章解元。 黃道周 李光熙 顏繼祖 石公胤俱府學。 戴堯雲

四十七年己未 顏繼祖

薦辟、人才、貢士、監生賢者見列傳中。

有傳

林弼 胡宗華弟士蒙、子宜衡、春同。春同孫舉。 劉宗道 鄭深道 張賢 郭惠孫舒。 陳孟貞侄瑛。

戴泰一 朱珪 王昇曾孫龍、澤、五世孫學孝。 顏寶 陳陞 程規 汪凱 謝璉 黃嵩曾孫玠、侄焚。焚子琳，

孫誥。 林敦 蔡浩 周宣 侯繇 鄭賢 李弼 鄭和 潘榮 楊紹 魏誠 戴耀 馬環 林雍

吳孜子法附。 施惠 翁輝 林同 陳惠 魏富 陳源 張壇 陳璜 曾逸 吳玘 張綽曾孫廷棟、廷

榜。 洪異 李增 林魁 洪哲 張觀 顏階 鄭衷 楊表 鄭復 林岱弟啓。 郭仁 高琅 陳

富 柯應鳳 謝彬 蔡文 顏會 呂旻 施仁 吳善 蔡應科 韓濟 黎時中 王應麟 黃誦 鄭

懷魁 徐鑾

林弼 字元凱。元廣發長子也，故名唐臣。嘗登至正進士，授郡幕官。元亡，著述山中。洪武二年，

郡以名儒聞於朝，太祖遣使三徵之，更名弼，與宋濂、王禕、曾魯等修《元史》，書成，賜黃金束帛。尋授吏部考功主事，使安南，封其世子曰燾爲王。王前後持黃金二斤爲壽，悉謝却。王遣使裝金以請於朝，太祖曰：「小國事大，使臣不辱，既兩得之，可持金歸。」安南，古交趾也，漢唐以來稱臣奉貢，比內諸侯矣。元時，徵其重貨，責其躬朝，蠻夷弗恭，出不遜辭，復有鑄金爲人，夜光爲目之徵，而夷心益離，使者至，多貪

夫，悅金貝，坐致褻侮，至是乃服中國有人。遷豐城令，吏有作奸者，度弼且置之法，遂誣其受傭金一緡，緩傭死。逮繫詔獄，而太祖識其名，曰：「此却安南金者，謂受傭物耶？」援御筆草書「休問」二字，遂得免。改判饒州，尋改巨曲令。適安南國內亂，朝廷復遣使，言官復薦弼，遂命之。既還報，召至順天門，親加慰勞，擢禮部郎中。轉吏部考功郎中，出知登州，有惠政。卒於官。弼博洽群書，究心正學，著作跌宕雄偉，根極理道，雅精臨池，嘗與王太史禕談書法，謂用筆須偏正兼備，乃臻妙境，近世趙孟頫側鋒太多，不能逃筆牀月旦。禕時時語人曰：「林元凱在閩，毛中之麟，介中之龜也。」禕來判漳，詠《清漳十詩》，有「風流今孰繼？林子亦其徒」，蓋指弼也。所著《梅雪齋稿》及《使安南集》，學士宋濂序之。始，弼豐城被逮時，舟次湖口，夢一木人，口眼俱動。覺曰：「吾不免矣。」既得御筆「休問」二字，乃知「休」於字爲「木人」，而草書「問」字，口眼皆動象也。弟虞臣，薦明經，授本府訓導，陞中都國子助教。孫僑，仕東莞訓導，長於教誨，東莞科目從此盛。唐臣，漳志以因元禁，改名弼。讀宋學士序，乃知以國禁改。

胡宗華 宋員外騰七世孫。隱居武林赤石巖，自號草澗居士。潛心理學，楷式鄉邦。洪武三年，以明經薦本府訓導。講說經籍，闡析微奧。有《草澗集》。弟士蒙。子宜衡、春同。春同孫舉。

士蒙 洪武三年以明經薦授龍溪教諭，清約方正，勸課不懈。胡自草澗，兄弟父子以至孫曾，代有文學，雖無顯仕，推重鄉邦。

宜衡 名橘，以字行。性敏嗜學，謹厚莊重，孝事繼母，漳人及門甚衆。永樂十七年，以賢良薦，授翰林院中書舍人，與修成、仁二廟《實錄》，上《爲善陰陽詩》，賜金帛、文綺，陞大理左評事。居官清苦。尋引疾致仕。

春同 字宜年。溫厚清苦，篤學好修。幼失怙恃，事二兄愛敬。歷義烏、柳州、吉安教官，開導弗怠，衣冠肅然。卒官，諸生爲服喪，吉人李昌祺哭之哀，曰：「善人云亡，士類嗟惜！」

舉 仕授餘姚學諭，擢永寧令，尚節儉，革冗費，平冤獄。值歲饑，賑活千餘人。永寧前丞夫婦暴死，家人將鬻其子以歸，舉收鞠之，具裝送還。罷官歸，家徒四壁，郡守羅列延教多士，餽之俸貲，悉以賑貧乏。卒日，諸生爲具殮。有《寒齋集》。孫應東，曲靖府經歷，嘗委勘土官安索忠等爭襲及功臣龔世爵田土，持廉秉正，滇人服之。署印江縣，有惠政。善詩文，精篆、隸、真、草書。

劉宗道 名駟，以字行。洪武初以秀才被徵，強逼再三，而後受命。及入試，預試者八千人，宗道對朝政、家治稱旨，賜第一。上命學士詹徽密察德行尤異者，徽復首宗道，上賜宴內殿，與同時趙肅、申甫皆以布衣入侍，尋拜都察院左都御史。時有狂人人座，詔求直言，宗道條上格君心、澤民物二十事，並見嘉納。自是，每侍食華蓋殿，商議大政，顧宗道多所譏切，遂爲邵質、董希賢所搆，有詔徙南詔。不久貫還，所過郡邑持之，宗道因遜於播州，以俟朝命之定。上疑宗道胡久不至，命索其家。都察院檄取父寶詣京面質，使人滇索之。寶行至蜀之蘭陵，以憂病卒。後有詔復取鄰戚，令與朝使分索，得宗道乃已。其門人陳拯遇之播州，告之故，遂赴水死，時洪武二十一年也。宗道明程氏學，好修家禮，鄉人稱「愛禮先生」。有《愛禮集》十卷。

鄭深道 名文玄，以字行。父可敬，以明經薦清流教諭。深道領鄉薦，會試不第，被旨視兩淮鹽運司獄，廉出非罪數人。比還，其人各懷金尾舟謝，峻却之。授程鄉學諭，遷寧波府教授，典順天、湖廣、江西、廣東四省文衡。永樂末，陞司經局校書。時仁廟在邸，屢承諭問，及卽位，召見，賜膳侍宴，有「學問老成，

操履清慎」之褒。陞梁府紀善，正言讜論，輔益爲弘。年七十，乞致仕。正統間，鎮海衛新立學舍，生徒延主教事。年八十二卒。

張賢 知新昌縣，爲政有方，不避權要，群守不法，直劾去之，僚佐有才幹，悉薦舉焉。

郭惠 字邦文，元進士時晦之子。惠居家孝友，重義輕利。嘗著《兄弟訓》，立義學。洪武間，郡守白壽以學行舉授府學訓導。陞保昌教諭，以外艱改增城。擇少俊諸生教誨之，晝夜講解，後與薦書者七人。終瓊山教諭。孫舒。

舒 字端莊。以行人使蜀諭祭，王酬以金帛，不受。繼使廣東，布政某餽藥五十丸，裏金表蠟，到京剖得，亟遣齎還。復使禁茶邠州，知州饒白金千兩，曰：「故事，公無疑。」舒曰：「疑，請始我。」悉謝之。遷南戶部員外，踏勘蘆洲，中貴請佃，皆不可，惟以給平民。後知池州，先撫字後催科，與巡按御史不協，致仕。家居淡整，口不及利。

陳孟貞 宋俊卿後。洪武二十二年，以耆老薦，廷試第二人，授知州，轉河東鹽運使司。永樂六年，召赴京，賜勅歸。尋復召，掌金華府事，居官廉潔。九載，疏請還家。洪熙元年，詔賜月米一石，終其身。年九十，卒。侄彥。

彥 永樂初中式，補太學生，與修《永樂大典》。歷刑部員外郎，蒞任公勤，持法明恕。子舒，見韋布。

戴泰 永樂元年，郡守錢古訓以茂才薦，授和州知州，改知均州。恪慎有爲，清白卒官。

朱瑤 字楚善。與戴泰一並薦茂才，授知鄒縣。性地明敏，吏民善惡，纖毫具知，而德量有容，人畏



愛之。作新學舍及子思書院、孟子寢廟。孟氏子孫困於丁役，悉蠲免之，勸身就學。歲侵民饑，脫其帶白金及妻簪珥，易粟賑濟。民耕乏牛，勸富室借之。躬行阡陌，撫勞勸督。所用鞭朴，率實以綿，民感服不忍犯，秩滿，兩詣闕乞留。卒於官，民築墳立祠，歲祭之。

王昇 字日初。舉進士，改庶吉士，授安福、羅田令，俱有惠政。歷大理左寺正。宣德中，朝廷選擇賢守，分布中外，降勅賜宴，乘傳以行。昇在選中，出爲撫州知府。至郡，重學校，停禮俗。年饑，捐俸賑救。九載當遷，民詣闕借留，進正三品，復任三年，懇乞致仕。昇孝友慈惠，篤於行誼。爲諸生時，教授茂名人陳思賢被逮，行時密寄白金若干。教授死，昇爲位哭醺，仍歸金於茂名。其爲寺正時，出錦衣張千戶於死，後千戶偶役於閩，道建溪，昇亦行溪中，與千戶舟相前後，昇舟觸湍石覆，前舟倉皇來救，則千戶也，執手相悲咤。子彝，見閭巷。曾孫龍、澤。五世孫學孝。

龍 字虞臣。弘治初以貢授四會丞。民有叔侄訟者，令具衣冠行家庭禮，因感泣悔罪，邑民化之。鄰邑開建多盜，被檄往署，設策平之，招撫逃移，復業者數千人。擢知英德，以外艱歸。服除，補乳源，捐俸修學，出粟賑饑。邑有虎患，牒告城隍，虎遂去。年七十，致仕。

澤 字虞雨。嘉靖二年以貢授思州府推官，後陞梧州通判。耿介自持，不通關節，當道累檄採大木，勘坑冶，稽核旁郡倉庫，調度戰艦兵餉，所至清白無染。以勞悴卒官，還鄉無以葬。

學孝 字欽求。事繼母至孝。教諭定遠、蕭山二學，所至以古道率士。陞衢州府推官，數署郡縣篆，清標自勵。歲饑，親履閭巷，設法施粥，出贖鍰羨餘佐之，勸民平糶，全活甚多。再推官高州，攝郡。郡苦旱，齋素步禱烈日中，夜則燃燭視事，拮据焦勞，疾作乞歸，報遷台州府同知而卒。子邦俊，萬曆中舉人。

又昇五世孫有名「畿」者，訓導泉州，爲德諸生間，後官泰州教諭。

顏寶 字太和。任四會知縣，奏除詭名田糧，作新孔廟，下至橋梁、圩岸之屬，悉致堅完。藩臬、郡守文章論薦，稱爲「嶺南獨步」。

陳睢 字子晦。授建昌府學訓導，遷南國子學正、常州府學教授，司廣東鄉試、禮部春闈文衡。卒於官。睢爲文多出新意，逸氣橫厲，游寓京師，館閣諸公皆知名。論德林誌嘗稱睢爲狷介之士，而有己之病未忘，及其自建昌來，則進非昔比，浩乎其言，而欲乎其心矣。

程規 字惟範。永樂中以太學生判南雄，明敏材辨，興學校，崇賓射。始興虎爲患，禱神捕得之。

汪凱 字克寧。豁達魁偉，善屬文，舉鄉試第一，聯登進士，授禮部主事。撫湖湘饑有方，陞浙江僉事，以清介風勁聞。

謝璉 字重器。宣德二年及第，第三。除行在翰林院編修。上幸太學，試史館諸臣詩，獨璉稱旨。嘗從謁長陵，對述稼穡、閭閻甚悉。丁內艱，哀毀盡孝，家有香竹之瑞。服除，與修《宣宗實錄》、《大明會典》、《聖鑒日曆》諸書。因災異，直言請出宮人，赦無辜，除連坐法。正統十年，遷侍講，時朝廷選講讀以下儀表俊偉者習制誥於東閣，以備內閣之選，璉與焉。十四年，上治安策十五事，中言石亨難獨任，于謙、胡濙、王文可托。而龍巖縣築縣城及建守禦千戶所，皆出璉議。故事，居翰林者，優游養望，筆翰相高而已。至璉，始慷慨論列天下事。景泰元年，以講讀秩滿，陞南京戶部右侍郎，署部事，釐奸剔蠹，創便宜六條。明年，虞犯大同，詔兼掌兵部務。四年，以疾卒官，詔中使蒞喪賜葬祭。卒之日，橐中惟欵賞銀幣、圖書、公服耳。大學士高穀嘗遺璉書，稱其操行端潔，中外具知。璉報之曰：「僕僕行但率性，遑計知否。」

黃嵩 字中立。正統己未以貢授廣東都司經歷，嘗三上章乞除弊政，皆見採行，當道交薦。景泰間，擢平樂知府，以德化撫綏猺獞。恭城猺叛，嵩約民戰守，賊聞備解去。復遍歷諸寨峒勸諭，悉降之。九載秩滿，民保留，復任三年。乞致仕，遮泣車輶，如失所恃。曾孫玠，見下文；繭，見韋布。侄熒。

玠 字孝徵。擢漢川知縣，平陳大經巨寇。再知平樂，旁邑民饑，發金助賑。遷守石屏州，教行鄉約。陞魯府長史，匡輔以正，陳政要十事，舉宗約三十六條，士敬憚之。已，乞歸，敦倫睦族，表率鄉閭。

熒 字敦實。授玉山知縣，節愛撫民，逋移復業，有訟至庭，諭遣以禮法。入爲御史，條官民利害十餘事，孝廟嘉納。出按長蘆，釐鹺弊，汰墨吏。再按雲、貴，潔白簡靜。武將有驚不法者，見熒，委心降服。擢四川按察副使，以母老致仕。母歿，哀毀欲絕，有群鳥繞屋之祥。壽九十五。子琳。孫誥。

琳 字子器。以貢任歸善知縣，弛刑興教，糧料令自稱納，出遇路柵，給米埋瘞。致仕歸，立家規以教子孫，年九十五。

誥 字廷綸。謹厚孝友。與莆鄭洛書爲莫逆交，洛書稱其表裏如一。嘉靖中，應貢赴京，以母老，疏授教職歸。子泮，爲御史，出守太平，威惠並行，奸宄屏跡。

林敦 訓導潮州，恩義待士，士感懷之。陞邵陽教諭。

蔡浩 計偕北上，邑博劉袁寄百金歸家，至三山，聞哀訃，即携金以歸其孀。或告曰：「試期逼矣。」浩曰：「功名事得之有日，死生之際安忍相負？」後爲御史，抗直有聲。知瓊州府，興利除害，愛民如子，惟玩法佔終不貸。嶺南多災異，瓊適地震，衆視爲常，浩曰：「此守土者責，匿勿告，罪也。」具文頒行十府，匿災者慚之。卒官，歸裝如舊，郡人哀焉。

周宣 字正舉。正統中授戶部主事。英廟北征有日，部臣放支芻蕘給軍，率慮不當委，宣獨承之，曰：「此易耳！」至草場，令鑿數門出芻蕘，一時給盡。出爲潮州知府，修文廟，葺韓江橋，築海堤。擒殺海寇黃于一，撫諭其餘黨，放回被虜，招撫善良千餘家。已，山賊羅列寧等聚衆焚劫惠州。出不意，搗巢穴，大破之。時從賊有楊田、黃寨等民，省臣欲乘勝盡殲之，宣謂脇從罔治，聽復業者七十戶，全活以數萬。賊平，當道請改宣於惠，潮民遮留不得，赴闕上疏，而潮守已新銓矣。亡何，海寇復亂，攻圍潮縣，殺通判，指揮，破堤水淹民廬萬餘區。潮士民白當道，非前守周公不可。當道具書請宣，宣慨然爲行。入境，出榜約日招降，至期，賊駕船數百艘，皆披堅執銳，渠魁棘輪而至。宣謂曰：「既欲從良，何爾爾？」賊投戈羅拜，宣向之慟哭，衆亦哭，遂單騎詣壘，遍歷二十四村，且慰且諭。顧賊心猶懷狐疑，翌日，宣問曰：「何遲遲也？」曰：「此中有神，卜之不吉。」宣曰：「第再卜。」夜人祠告神：「民欲從良，神何示凶昧順逆耶？」次日，賊復往卜，報吉。使人觀之，猶團營結寨如故，宣告當道曰：「賊疑矣，群心不協，可殲也。」鼓而殲之，潮地悉平。事聞，朝廷遣官賚表裏賞勞，陞山西行太僕寺少卿。尋陞太僕寺卿，仍掌寺事。丁母憂，卒於家。宣少有文名，家貧銳學，或行路注心，目不他矚，遇有意會，輒然而笑，人目爲「書顛」。莆人周翠渠瑛，爲宣傳曰：「公，官顛也。夫其理得於內，無人乎外。」書顛固宜，乃至三人賊壘，三平賊亂，不知有身，何況知人？論周公者，合爲二顛，乃得其平生仕學之概矣。」

侯繇 爲監察御史，浙江僉事，居官簡靜，以古行聞。

鄭賢 授壽州學正，嚴課條，勤教誨，捐俸以助貧士。歷典順天、江西、廣東文衡，致仕歸家。人重之。

李弼 有學行。任廬州同知，居官得民，民奏留之。

鄭和 字肅雍。天順九年以南戶部郎中修《英廟實錄》。成化四年，陞雲南參議。凡上官更代文移，關涉有司者，有司多利其苞苴，若爲故事。和一處以至公，風清弊絕。捧表入京，携蒼頭一人而已。尋卒於旅舍，司正林雍搜橐蕭如，爲釀金經紀。和居家孝友，待宗族疏戚得宜，極口揚善，見人惡，輒閉絕不談。孫納，鄉薦諭，有學行，及貢而卒。

潘榮 字尊用。景泰元年授吏科給事中，參駁彈劾，務存大體。朝廷詔禮部看詳章奏，有觸犯忌諱者罪之。榮言：「陛下卽位之初，當開廣言路，此令一下，天下將謂朝廷諱言。」上是之。學士倪謙丁憂，謀起復，榮疏斥謙：「聞喪日久，逗留京師，意圖僥倖。經筵風教所關，豈可使在列？」陞左給事中，充荆府冊封副使，不受餽送。歸省，賜楮幣及道里費。未幾，值父喪，毀瘠骨立，事母不離側。以服闋復任，充蜀府冊封副使。天順六年，以吏科右給事中，受一品服，充冊封琉球使。至，則宣布威德，爲其國王記中山八景圖，國人爲之刻石。及舟歸，值颶風大作，榮拜禱舟次，忽有一火星飛止檣上，惡風旋止。復命，擢本科都給事中。成化六年，陞南太常寺少卿，遷南戶部右侍郎，總督糧儲。尋改南都察院右副都御史，仍總督糧儲兼理屯田事。制奸剔弊，省落漕運盤剝諸費，得羨餘米數萬斛，賑濟有備。人爲戶部侍郎，特旨掌部事。英國公張懋等四十三人，自陳祖父以奉天靖難，勦除叛亂等功，封爵受祿，傳於無窮，其後子孫承襲，所司輒擬減除祿米，非祖宗報功意。事下部，榮言：「爵祿，天下公器。賞賚，天子人權。懋等無事之時，欲請增祿，若其有功，何以勸賞？況頻年水旱，倉廩缺乏，所人有限，所出日滋，非經久計。」上是之。已，兩浙貢價鹽課甚急，榮特爲奏免。會漕運蹇澀，命往視漕，不踰月，漕悉通，賜宴慰勞。陞南戶部

尚書，一以節財恤民爲務。考滿，詣闕乞骸，疏前後三上，優詔許之，命給驛還。家居十載卒，年七十八。贈太子少保，贈祭葬。榮爲人寬弘平易，洞見底裏，自處淡如無競。岳文肅正贈榮文：「尊用自給舍拜都給事中，一官二十年矣，循資緣例，始得一調。此巧宦之所譏笑，而正所據以知其爲賢者也。」

楊紹 爲戶部主事，督理德州錢糧，守法不避權要，以公過免歸。家居不求謁於人，士論稱之。

魏誠 正統十四年以貢授富陽知縣，有惠政，三考皆蒙勅書獎勞。

戴耀 爲鳳陽同知，招撫逃移四千戶，賑濟饑民八萬口。陞知府，致仕。

馬環 爲貴州普安州學正，變夷爲夏，科第始興。秩滿，陞靖江王府長史，導王立家法，正體統，諸將軍毋得侵擾平民。奏革鎮守官欺凌王府者。王雅重之。

林雍 字萬容。初授行人，以母老，乞歸養。終喪，起就職。憲宗初政，上疏勸修德格天，親賢講學。復請進周敦頤、程顥、程頤、朱熹於顏、曾、思、孟之後，列爲八配，又請祀陳淳兩廡，並不報。遷爲司正。先是，諸行人出使，往往以賄聞，雍厲操先諸公，諸公皆自愛惜。屬吏部考察，雍獨不赴，曰：「使某不勝任，黜之可也，安能隨行俛首言科目籍貫耶？」陞駕部郎中。未幾，乞歸。命下，忻然就道，長安縉紳賢之，相與咏歌其事。歸，結廬龍山，從布衣陳真晟相師友，日與徒侶講明正學，謀之林僉憲克賢、姜郡守諒，建祠祀北溪芝山麓。又與鄉人月爲一會，修藍田呂氏鄉約。累徵不起，年七十餘卒。陳真晟稱雍學始終本末，有序有要。督學周孟中稱其居官冰蘗，未老乞歸，清風高節，海內傾仰。漳人謂：北溪之後，得正學之傳者，真晟與雍二人而已，尊之曰蒙庵先生。

吳孜 仕贛州知府，興學養士，賑濟旱荒，贛人稱之。子法，知興國州，清苦勞瘁，信義孚民。

施惠 字師僑。景泰七年以貢任武強知縣，清介自持，門無私謁。有劇賊入境，單車往諭，皆解散。戚里奪民田地三百餘頃，奏復之。以忤當道歸，家貧，授徒自給。

翁輝 以台州訓導陞文昌知縣，嚴治里胥，民以不擾。時鎮守官家人往往下縣，至文昌，不得一錢也。

林同 字進卿。授工部主事，歷戶部郎中。撮錢穀樞要，作《指南錄》，嗣政者皆以爲便。成化六年，保定饑，奉勅賑濟，全活甚多。擢江西左參議，權貴請託，皆格不行，坐調廣西。弘治三年，永福賊出掠，太府檄同偕總兵官馬俊禦之。賊平，擢浙江左參政。痛陳恭愍選以直道齟齬死，爲賁石刻張元禎之文，以表其墓。起運兌，軍倍責耗米，力陳兩臺阻遏之。陞廣東右布政使，轉左布政使，條小吏病二十餘事下郡縣，勸民行呂氏鄉約，及文公家禮。巡按御史王哲，奏同廉能第一。故事：藩憲大吏見巡撫、都御史有常儀，自韓雍督兩廣始尊重，三司官至庭，跪伏謁。唐珣繼來，禮猶仍雍。同曰：「唐公昔爲福守，且長揖上官，況方伯耶？」亦第長揖而已。然珣竟不懌，以事挫之，同不爲動。未幾珣卒，珣子過廣，同乃厚遇之。久之，上疏乞骸。同柔外剛中，勇於爲義。居官四十年，祿隨得隨散，卒日，家無餘貲。侄祺，見草布。

陳惠 字啓順。授監察御史，擢知廣信府。清慎勤自勵，廨中公用不取諸門庫，廨且傾，買小木支維而已。巡行屬邑，齎糧往，不以煩民。舉右族公正耆士十六人，優禮之，與謀郡政。未踰年，政平訟理。部使者至，賢其能，惠以「得人」告，益賢之。三年卒官，殯殮無資，十六人者爲治喪歸。

魏富 字仲禮。少孤。學於布衣陳真晟、翰林謝璉之門。舉進士，授監察御史。時天下諸司人覲，

途多盜，命富巡按譏察之。富戒行，先裁其同事官卒之不入約束者。盜聞，惶喙駭去。繼按廣東，林蠻洞蛋爲厲，廉得不法吏若干人，置於理，蠻蛋皆復隸編戶。遷浙江僉事，陞副使，捕緝私鹺因而爲剽掠者。縣有健令，爲豪猾所誣，久坐繫，同官莫敢直，富直而釋之。修蕭山、諸暨石塘堤以捍田。發粟賑嘉、湖、寧、台饑，存活六萬餘人，仍積粟萬斛爲後備。陞江西按察使，吉安故多訟，富建議增置推官專理之。每僚佐巡歷歸，必問曰：「去吏墨幾何？直民冤幾何？」擢右僉都御史，巡撫順天畿內地。中貴人及將領、守臣多操利匿亡，互相倚援。富部分將領，授以成算，一時無犯者。疾作乞歸。後起用南京大理卿，值集議大事於群衆中，時出論斷，隱然繫留都重輕者垂十年。正德改元，陞刑部右侍郎，乞致仕，給驛歸。富歷仕四十餘載，隨事盡職，未嘗立異，譽輒隨之。疏衣糲飯，自奉泊如。泉南黃河清見富，以宦業爲請，富曰：「賢輩當古人自待。吾無可言者。」其子嘗藉富行事，富見而火之：「吾不欲有聞也。」

陳源 成化四年以貢授阿迷知州，教民婚禮，士不知學，誘而進之，陋俗一變。

張壇 授廣德州學正，以異績陞青州通判。九載，擢大理府同知，單車宣諭麓川數年叛夷，以功擢刑部員外。居父喪，致毀卒。子麟，見韋布。

陳璜 字朝貢。講《易》有得，漳士多從游。授樂安訓導，樂安人祀之名宦。遷龍游論。前後歷典廣東、順天、廣西文衡，所取多名士鉅夫。擢知全州，陞廣州同知，聽斷精明，剽劇有聲。布政使下其均徭法式諸郡。擢南京戶部員外郎。過家省親，卒。子鳳至，揭陽教諭。

曾逸 字世超。郎工部，治張秋河，興錢塘水利，皆有功。嘗疏論便宜，爲劉尚書所器重。後以養病歸。逸弱冠取科第，恬仕安貧，居鄉謙謹。子沂，英山知縣。



吳玘 字子瓌。授撫州府推官，有折獄才。每公出，裹糧自隨。選御史，懇直敢言。巡按山東，卒。

張緯 字本寬。終刑部郎。明慎敏練，爲尚書閔珪所器。爲人內行淳至，恤兄弟孤如己子。既貴，悉推父產畀同生。與人交，憫窮赴急。嘗從林方伯同受《尚書》，聞同訃哭，越旬不視事，其敦崇師誼如此。曾孫廷棟、廷榜。

廷棟 字國材。授行人，後先奉使諸藩，贈餉一無所受。居職十載，屏跡權門。改禮部主事，卒。廷棟性度純深，飲人以和，事母至孝，有不懌，免冠長跪，意解乃起。

廷榜 字登材。授太平令。太平荒朴，廷榜至，集子衿士，日課之，得一佳語，輒命酒食相慰勞，自屬草式之。旁邑士皆來從太平令游。以真獨簡任，不善事上官，擢鎮江丞，竟爲上官摭論罷，年方三十餘。晚而舟居，泛宅浮家，瀟然無繫。子燮，舉鄉薦，有文名，與予善。

洪異 字大同。宋長泰令仁璉後。教通州，令崇德，擢御史，出爲四川僉事，以母老終養。服除，改浙江，轉廣東參議，乞歸，卒。異美丰容，動止有模範，教通七年，造就作人，前後莫比。令崇德，擒江淮劇賊，開天長河，通江潮數十里，溉田萬餘頃。爲御史，巡刷兩廣，檄海道副使江鉉平夷寇亂。爲參議，鎮靜自持，不嚴而治。

李增 弘治十三年貢士，知樂昌。先是，邑東西山猺寇嘯聚，流毒三省。增訓兵緝捕，所向皆克。後流賊千餘攻圍邑城，開門延敵，斬獲甚衆。三省會征，湖兵執黃圃民誣爲賊，增請兵憲王大用至營，躬覈而釋之，後民立大用生祠，舉增配享。

林魁 字廷元。自幼博聞強記，落筆多奇。既釋褐，益肆力墳典。林公俊、楊公一清嘆爲「南閩才」。

士。授戶部郎。永壽伯朱德方見幸，武廟欲廢太平倉賜之，魁具疏請尚書率闔部諍，西僧大乘法王奪民田百頃，力疏其不法，皆得行。遷知鎮江府，修武備，蠲逋負。桂文襄尊爲令名強項，魁廷責之。入覲，上記吏部，言其政。未幾，擢山西提學副使，以請乞不遂，爲有力所啣，調雲南兵備，撫鐵索箐夷諸酋有功。正德末年，陞廣東參政，而魁已乞休矣。嘉靖初，文襄人相，寓書起魁，魁堅卧不應。所居海上之白石村，葺草堂先墓左，扳輿奉母。葛巾芒屨，睥睨海天，或獨行空山白雲中，商歌慷慨，不知身在天地之外也。所著有《白石稿》、《歸田錄》。又精字書，往往見之壁勒琅刻。

洪哲 教諭金華，正身行教，郡守劉蒞延爲子師。判紹興，築海寧堤岸。遷潮州同知，居官勤慎，內行好修。

張觀 訓導休寧，正身率物。擢郴州，苦旱，禱責，甘澍隨應。賑饑捕寇，嚴絕僧尼，以嚴明寬厚稱。居家孝友，謹歲祀，以禮法教族人。

顏階 字崇升。幼孤，力學行誼有聞。教諭香山，訓迪端嚴，魏恭檢校爲學使者，雅重之。擢印江知縣，都御史徐問疏其治行第一。陞楚雄府同知，擢南京戶部員外郎，致仕。

鄭衷 字世和。自幼向上，學務踐履。嘗游周瑛之門，每見稱許。事父及繼母以孝聞，丁繼母憂，念喪母年幼，追服三年。令南康，俸給外一毫不取。以不善事上官，謫廣德州學正。提學顧陽和薦其古行古心與世殊。調轉揚州教授，陞武陵令，致仕。家居讀書守禮，築精舍文山之坡，鄉人稱文坡先生。

楊表 字汝中。授南京戶部主事，督鳳陽倉，竣事，軍民赴京保留者數百。陞本部員外郎、郎中，擢知長沙府。改知雷州，興學政，表節義，濬水利。境內多猛象，作文責城隍驅出之。陞浙江鹽運使，浙入

稱其廉口：「嵯司三十年來，楊公一人而已。」陞廣西參政，以憂歸，不履城邑，用廉終身。

鄭復 字一陽。與弟臨同領鄉薦，初授嘉興訓導，師範端嚴。歷樂清、樂昌、龍水三縣令，潔己惠民，執法不阿。九載，士民詣兩臺乞留。決意告歸，林居二十年，四壁授徒，躬耕自給。臨，任南城、麗水二縣，亦以清介聞。

林岱 字伯鎮。嘉靖十二年以貢授海豐教諭，廉而能施，寒士贊，悉謝却之。弟岱。

岱 字仲鎮。令東莞縣，有廉行，息獄訟，均里甲，正科斂。春耕出郊勸農，承檄討平黃秀山海寇。再遷汝府長史。平生義不妄取，卒之日，囊橐蕭然。

郭仁 字明倫。嘉靖二年以貢任梧州訓導，勵名節，正師道。莆人林、柳二姓者，商於潯，寄金百餘，去不反。仁病垂絕，囑其長子褒曰：「商人來，則與之；不來，告歸郡帑，毋私也。」褒如其命。《梧州志》又載其事曰：「同郡人林潤，客於梧，病篤，以金二百屬仁治後事，曰：『餘以謝也。』」林卒，仁捐己金爲治棺殮寺後，募僧守之。明年，仁病且瞑，急命其子薦以所屬金寄官庫，封識宛然。督撫林富義之，爲表其墓。」

高琅 字瑩夫。善爲制舉之文，漳人稱：「陳睢善古，高琅善今。」舉進士，授廣州推官，卒。有才無年矣。

陳富 字大有。家貧力學，爲諸生，有行。義父喪，夢神告以葬穴，結廬墓左，有紫荆之祥。兄弟五人同居，食無私。諸弟歿，恤其孤如己出。歲饑，伐木易米，以給餓夫，見路傍棄兒，爲收養，有暴骸，輒瘞之。天寶塘，先世所遺，廣可數十畝，共之鄉人，不自私。應嘉靖七年貢，授永康司訓，舉僚友喪，却貧

士餽，修理廟學。轉蒙陰教諭，誨誘切至，士民感其忠誠，請爲禱雨、祈雪、祭蝗，往往有應。擢周府東會王教授。東會稱周王爲兄子，王縱不聽東會王救正，東會王以聞於朝。周王疑富所爲，怒而將加刑焉。富從容陳臂，王感泣謝。以老乞休，二王贈詩，有「任久心知赤，辭官鬢見蒼」之句。抵家，聚徒講學，著《澄心》、《平氣》二箴，書座右，自號「古迂」。郡守盧璧時造其廬，設麥粥菜羹啖之。明日，盧遣吏餽白米十石，富悉以分給里中不舉火者。家人有微言，富笑曰：「我猶有助，彼何助乎？且安得隱賢大夫賜也？」年七十八終。

柯應鳳 字文徵。爲武進教諭，遷珙縣，坐事調會同。擢判鳳陽，以內艱去。服除，補惠州，致仕。應鳳所至，寬平徭役，消弭盜賊，廣厲教化，平反獄訟。而其大指，乃在潔白刻厲，毫髮無緇染。珙，蜀邊窮邑也，會在瓠海之外，吏皆脫目疎節，弛繩簡治，文書苟且了事。而應鳳獨矜修綜核，在珙時，有疑獄，與郡貳車爭之強，曰：「是獄也，明府不過襲他縣誤，非有成心，心地尚渾含也，若下縣灼見其情，從明府依違轉徙，不惟成明府無心之過，而下縣心地已死矣。」在會同，爲之守者，泉有史朝宜，以清節名海外，而應鳳與埒。郡紳海忠介瑞，嚴冷不可一世，見應鳳治行，與爲莫逆交。判鳳陽，攝守篆，庭無滯牘。判惠州，單騎入劇寇李文標巢，撫諭之，皆涕泣解散。珙及會同，後先祀名宦。

謝彬 字文華。起家南戶部郎，出爲廣州知府，擢山東按察副使，罷歸。彬在南部，嘗作《度支志》，泉人趙恒序之曰：「君自少學古人書，能通其意，欲見之用。既舉進士，郎南戶部，日與所知講求天下事，慨然負經世志。其言：『天下之患，莫大積貯之不充。積貯不充，則上用乏。上用乏，則國家貧，而上下無以相親，則盜賊內起，戎狄外攻。夫惟積貯充，然後以守則固，以戰則強。我國家之興，天下戶口可若

千，而今倍之者若干。墾田之數可若干，今倍之者亦若干。然而天下之積貯，何今昔相懸哉？此無他，在審其奢儉之端而已矣。欲審奢儉之端，在謹出入之數。今夫出與人之數，一歲之事也，而欲使國有數十年之貯，必自一歲始。夫歲之人也有常，而其出無常，使無常者視有常以爲定，是之謂儉。一歲儉未可知也，繇之數歲積貯之充，必自茲始矣。使有常者視無常以爲定，是之謂奢。一歲奢未可知也，繇之數歲積貯之竭，亦必自茲始矣。於是推本國家百八十年贏縮之故，著之於書，以爲《度支志》，大要使人讀其書，而知若是則可謂儉，若是則謂奢，若是可謂謹其出入，若是則謂不能謹其出入。又曰：『吾書之所言，皆爲上之積貯言也。』詩言：『千斯倉，萬斯箱是也。』又曰：『乃積乃倉，乃裹餼糧，此爲下之積貯言也，是吾書之所未言者也。』夫古之治人者，非能家賜戶與之也，惟其使天下之人耕紃、織紉，當歲平而自爲貯。故上有數十年之貯，下不可無數年之貯，雖遇荒年，不待出上所有以賑之，而下無不足。若歲平而厚取之，及荒年而賑給之，則積貯闕矣。積貯闕，則復重斂矣。故爲謝君之論，言節兵，不言增兵；言省官，不言增官。欲以是推而行之，使下自爲貯，而不待出上之所有以爲賑。『讀古人之書，而古人之意見於書者，如是也。』家居，爲郡守羅青霄作漳志，叙事詳核，質過其文，郡人以爲信史。

蔡文 字孚中，宋汝作之裔。舉進士，選庶吉士，出爲兵部郎。陞廣西參議，治柳州，除劇盜及暴橫上酋。潮寇猖獗，兩廣總督檄署蒼梧分守，力贊戎事。賊平，賞銀幣。尋轉副使，治兵府江，立班船，令首尾相啣，互鈴束，以遏搖賊出沒道。卽城隍爲走馬傳籌法，嚴督巡警，有竊發者，輒擒之。遷江西參政，治撫州，時岑崗、下歷、三沙三巢，叛服不常，有司議征剿，文請推誠撫之，負固盡服。遷浙江按察使、河南右布政使。轉貴州左布政使，未入境，會督撫方調兵征水西，僕人云：『公期尚遠，兵務倥傯，可遲行。』文不

聽，晝夜馳至，則官兵已敗，設方略撫定之。陞本省巡撫、右副都御史。貴，故兼轄滇、蜀、楚、廣四省，文恩威並行，獷悍懷服。而都麻嚮大華三酋，猶憑險跳踉，乃督兵大征，嚴令誓師，不妄殺一人，凡三奏捷，俱受恩賚。以母憂歸，不出。文天性沉毅，風節慕古人。當浙臬時，內臣李佑以督造至，作尊甚，文獨與抗。江陵相柄政，人爭附麗，文以同年又同官史館，尋常寒暄而已。有《一得語聞見錄》，又輯《職方抄》數十卷，皆郎兵部時識歷朝沿革之大者。

顏會 知潮陽縣。愷悌愛民，督行鄉約。修濂溪書院，群子弟教之。築海堤，以興水利。開疏礪山路，以通行人。陞南刑部主事。

呂旻 字仁甫。九歲能屬文，郡貳龍遂召試《平岡賦》，擢管文就，大奇之。嘉靖丙午，以《禮經》鄉薦，時尚垂髻。癸丑，成進士，選翰林庶吉士，授編修。庚申，三殿災，藏書就燬，惟《永樂大典》無恙，閣臣請重錄副本，上命詞臣十人讎校，旻與焉。遷侍讀，掌誥勅，分考南宮，所取士相踵爲執政達官。隆慶改元，《大典》成，遷左諭德，請告歸。中皆議，謫判廬州，尋遷南太僕丞，不起。復起太僕，遷國子司業，再遷祭酒，充經筵講官、禮部右侍郎。無何卒。旻天性和易，才藻風流，爲館閣先輩所愛重。其侍郎禮部時，謂京官任子多從恩假，非所以重名器，請自三品以上非滿三年考者，不得蔭。遂得著爲令。

施仁 字近甫。少以聖賢自期，襟懷胸次，每流露詩篇間。同邑林魁一見奇之。弱冠，負笈游莆者三載，於黃未軒、周翠渠諸先，靡不論世尚友。歸而躬行孝弟，父母兄弟間，動相規切，期諭諸道。聞潘鳴時倡學漳浦，遂與締契，率侄三畏，共修共証十餘年。當道如沈龍、周賢宣、姜寶，延致講院，以訓多士。嘉靖丙寅，選貢北上，復與貢安國，參証異聞。選授紹興司訓。王龍溪畿，其邑人也，時過從論說。已，轉

諭建安，與諸上會水西觀，以實修相砥。所梓有《建安興學錄》、《復古議》、《太上感應篇》、《八事圖說》，無非誘翼人心，還之古道。用薦，擢龍門知縣，第挈一僕往，作袴襦三，與僕更遞濯滌。懸趙清獻遺像於退食之堂，而亦焚香告之曰：「儻有負心，願公示譴。」暇與諸生反覆學問之道，自縣治至村落，並開立社學、鄉約，課督曉解，有期會。期年，用最改視篆東莞，所受俸薪而已。以內艱歸，四壁恬然，坐次左右，經史矻矻。誦讀倦，則正襟危坐，凝神定慮無間。危病困頓中，身接引後學，提關啓鑰，心口無留隱也。所著有《修正要語錄》。妻某氏，事舅姑亦以孝聞，舅沒，哭之至泣血。

吳善 字元夫。爲人重厚質任。初授刑部主事，恤刑廣東，平反明允。擢永寧兵備。永寧諸獠所聚，多反覆，善芟夷其巢柵，列爲編民，皆向化。以軍功擢按察使，再遷廣東右布政、江西左布政。擢應天府尹，尋以副都御史巡撫廣西。時府江猺叛，平樂兵又告變，所在焚掠。善躬人險阻，斬馘平定之，詔加秩賜金，陞南工部侍郎。未幾，以兵部侍郎督兩廣軍務，罷諸苛條，而責成吏治獨蒸切。卒官，加贈，予祭葬，蔭一子。

蔡應科 字思成。起家瑞州府推官，質任不見知，浮湛邊遠地，後乃漸陟踐。萬曆末，以右副都御史巡撫廣西，首禁土酋趾不得入鎮城，文武將吏不得納土酋琛幣，不得以訟牒追呼，及聽細人言輒驚擾土民。有不馴，手爲文告，宣諭朝廷威德，明利害之鄉與更始，莫不感泣。交州流寇蹂欽州，兩廣督臣奉旨大索賊，廣西任犄角。應科誓諸將吏曰：「是役也，東方之師爲戎首，我不敢尸。夫小醜也，壓以中國餘力，卽欲樂人顛爲京觀，易耳，所貴不妄殺一人。今與公等約：整我西人爲東援，第遏其逃奔，摧其侵軼，廣招其降人，能招降，全活招多者，論功視克捷之令。殺降、殺良，戮無赦。」諸將吏皆如約，交人喜如更

生，縛首禍三人以獻。卒官，贈太子少保，予祭葬。應科雅善清言，巧發微中，尋常好爲吉祥，語有凶穢字，必易之。事其舉主晉江蔡一槐甚周至，蔡氏之莊，無如應科者也。

韓濟 字克濟。初授工部主事，管理盔甲戎器一新，歲省所司金錢無算。歷刑部郎，出守河南，練習漸次，案牘俱手治。丁外艱，復除武昌郡。連歲歉，力請大吏賑給之。以勞瘁中奇疾，郡人狂走不知所爲，數絕竟起。擢湖廣按察副使，開鎮吳門。至吳，時中外方報倭警，吳中貴游子弟恃財賄客，私署主屬名目，覬謂可應倉卒變。仇人上告中丞臺，中丞坐以不軌，覬捕反爲功。濟曰：「是白面狂生，酒酣耳熱，叱咤狗屠，張目里中者耳，安能反？」力爲轉移，獄不大沸。擢湖廣參政，以疾乞歸，卒。

黎時中 字慎甫。弱冠魁閩省。久之，謁選壽昌令。壽民故刁薄，屢訟令。時中在邑多善政，而性狷介果任，諸豪猾不便其所爲，懼發覺，復相率誣訟，郡案驗無實，竟左遷韶州經歷。丁艱，補潮州。遷感恩令，未任卒。時中羸弱，急義勇，孝友出至性。俯育弟妹七人，哺啜公均。父有婢子，其大母戒弗舉，寄養老僕家，時中密爲置室焉。病革，猶請母氏命還黎姓。惇德尚行，坎珂以歿，漳人惜之。

王應麟 字仁卿。初授溧陽縣，人誣謗之大府，應麟人見大府辯之，大府驚曰：「此公遠到，將來必有大位」其事遂白。其後浮沉官序，竟以都御史巡撫吳中。清操終官，不貳其守。

黃誦 知靈璧，靈璧人志之名宦。

鄭懷魁 字輅思。讀書過目成誦，家貧，從人借抄，巾笥百數十種，靡不淹貫。坐而叩之，信口倒囊，不事翻閱。既舉進士，謁選司農，主北新大軍二解。積困，故以《千字文》爲標，黠者偷移旁罔，懷魁易以韻書，偷者莫別，其弊遂絕。已，移署上供，大璫素珠貝睛綠甚急，魁抗疏：「微臣不能化砂礫爲明珠，乞



就中裁省。」言甚痛激。明日有旨：「減十之三。」尋請告。久之，復起，出守處州，安其風土，簡訟而速判之。郡故乏科第，多贖書籍以授青衿。丙午，芝生學宮之柱，是歲鄉薦者三人。擢浙江按察副使，備兵三衢，設戈艇偵賊，以便商旅，冤獄多平反。會有以飛語中者，遂拂衣還。懷魁儀狀魁偉，而土木形骸，不自潔修。其胸次坦夷，無有垣限。善爲駢儷之文，咄嗟立辦，乃典瞻若夙構。其守處州時，自公多暇，延客賦詩。括蒼令一日扣門求謁，門者以爲白事也，令曰：「第語鄭公，欲相從賦飲。」懷魁欣然款納。家居，日與林茂桂、戴燦、陳翼飛、張燮輩稽談名理。而其弟爵魁，亦以高才舉孝廉。兄弟家學，自相師友，閩人方望其握文符，振風雅，而懷魁卒矣。

徐鑾 字鳴卿。仕揚州府推官。人爲兵部主事，進武選、職方二郎。爲人有才氣，主考出東，分考會闈，所得皆知名士。

〔校記〕

〔一〕「頁」字，各本原脫，據文義補。

〔二〕「式」字，各本原脫，據文義補。

# 閩書卷之一百十九

英舊志 縉紳

漳州府 漳浦縣 龍巖縣(一)

漳浦縣(二)

唐進士

元和十三年戊戌 潘存實

薦辟、人才賢者見列傳中。

有傳

潘存實 王彥昌

潘存實 字鎮之。與龍溪周匡物相友善，讀書天成山，後自修業於梁山，時稱周潘二先生。初應舉，以《晨光麗仙掌賦》及《雙陸子賦》得名。元和十三年，庾承宣侍郎，下試《禮耕情田賦》及《玉聲如樂詩》，人格登第。初授東宮左庶子，累遷戶部侍郎。浦人登第，自存實始。始，存實有用世志，覽郭璞《閩城記》曰「南臺沙合，公輔卽出」，自是，凡遇自閩來者，輒問南臺江可揭衣未也。有《孟嘗、春申、平原、信陵

四公子贊載《唐文粹》，其詞曰：「四人爲身，萬二千人爲耳目。四人爲梁，萬二千人爲榱桷。有危可平，有死可生。豈彼威憑？實惟義爭。嗟乎！人之家，或財不自與，心不自是，妻不睦夫，父不慈子，而況乎萬二千士乎哉？恨不覩此。」

王彥昌 先瑯琊人，自東晉肅侯彬王導從弟，封都亭侯，謚肅。遷於閩，爲漳浦人。彥昌，唐末官至檢校司空。時當寇亂，能扞禦強梁，爲鄉邦之依。

### 宋科第

元豐五年壬戌 吳與

崇寧五年丙戌 林彥質

紹興二年壬子 高登

紹熙元年庚戌 蘇叔和

嘉定元年戊辰 黃克寬

寶慶二年丙戌 鄭少嘉 涂邁

咸淳四年戊辰 林乾 陳登龍

有傳

吳與 林彥質 高登

吳與 字可權。初爲四會令，改餘干。嘗論事於憲臺，臺官燕若蒙厲聲曰：「欲効漢唐令耶？」與曰：「固願學之，恨不至耳！」復改懷安。累遷奉議郎，通判潮州。時故人張天覺當國，或譏使見，與曰：

「平生與天覺語皆忠義，今呈身求進耶？」歷官七任，悉以俸餘收書，所藏至二萬卷。宋世海內藏書，鄭夾漈推重者四家，而首漳吳。有文集、《荔支總錄》、《新記錄》。嘗爲《漳州圖經序》稱：「漳中山川清秀，原野坦平。梁山記董奉之游，九侯傳夏后之祀，趙佗故壘，越王古城，營頭之雉堞依然，嶺下之遺基可識。陳將軍忠貞冠代，王使君勳烈標時。周先輩之奇才，潘侍郎之重德。大同有九虬之瑞，開元出祥雲之符，靈跡應祈，筋山屏盜。遺芳未泯，勝概可尋。蔚爲江外之名邦，不特閩中之要地。」其文燦然可觀也。

林彥質 字彬叔。歷官州縣，俱有廉名。一二蔡用事，不肯阿附，遂寢中除之命。遷兩浙舶使，移廣右條舶司，上利病於朝。秩滿，歸鄉里，幅巾野服，將終身焉。

高登 字彥先。徽宗時爲太學生，與陳東等上書乞斬蔡京、童貫、王黼、梁師成、李邦彥、朱勔六賊。廷臣復建和議，奪种師道、李綱兵柄，登與東再抱書詣闕，軍民不期而會者數萬，帥臣王時雍縱兵欲盡殲之，登與十人屹立不動。欽宗卽位，擢吳敏、張邦昌爲相，敏又白李邦彥無辜，乞復用之，登上書曰：「陛下踐祚之初，人人跂足以待維新，乃兵革擾攘，一切未遑，首擢吳敏、張邦昌爲相，又納敏黨，與之言李邦彥將復進用。夫邦彥當太上之時，久處政府，紀綱紊亂，民庶愁怨。方且日進治安之言，誘誤聖聽，以致太上倉皇南幸，不獲寧居，主辱臣死，此曹當盡伏誅戮。乃偃然自恣，朋比爲奸，蒙蔽天日。臣恐從敏所請，天下將以陛下爲不明之君，人心自此而離。」不報。再言：「陛下有太甲之不明，而朝無阿衡，靡明皇之有初，而相同林甫。臣身微賤，臣言繫宗社存亡，未可忽也。」自是凡五上，皆不報，因謀南歸，忽聞邦昌各與遠郡，一時小人相繼罷斥，與所言偶合者十七八，喜曰：「可盡言矣！」復爲書，論敏未罷。復不報。初，金人至，六館諸生將遁去，登獨與林邁等請隨駕隸羣山帳中。而帝不果出，金人退師，敏遂諷學官羅

織登等屏斥還鄉。紹興二年，廷對，極意盡言，無所顧避。有司惡其直，例作「文理紕繆」，授下州文學。尋有旨附第五甲，乃授廣州富川主簿。憲臣董彙聞其名，檄讞昭、賀、龔、藤、潯、梧六郡獄，復命兼賀州學事。學故有田舍法，罷歸買馬司，登請復舊。守曰：「買馬、養士，孰急？」登曰：「養士急耳。」守曰：「抗長吏耶？」曰：「天下所恃以治者，禮義法度也。既兩棄之，尚可言？」守不能奪。命攝獄，有囚殺人，守欲奏免之，曰：「陰德可爲。」登曰：「陰德豈可有心爲之？殺人幸免，如死者何？」秩滿，士民乞留不獲，相率餽錢五十萬，不告姓名，白守曰：「教授貧無以養，願太守勸之受。」登辭不可，請置學買書，以謝士民。歸至廣，會新興大饑，帥連南夫檄發廩賑濟，復爲糜野食之，願貸者聽，所全活萬計。歲適大稔，償亦及數。民投牒乞留以數百輩，因奏辟終其任。紹興八年，赴政事堂審察，遂上疏萬言，作《蔽主》、《畫國》、《害民》各上下二篇上之。高宗稱善，下中書，秦檜惡其譏己，格之。授靜江府古縣令，道出湖州，湖守汪藻留與修《徽宗實錄》，固辭。或曰：「是可以階改秩。」登曰：「但意未欲爾！」遂行。廣西帥沈晦問登何以治縣，登條十餘事。晦曰：「此古人之政，今日詐疑，胡可行也？」對曰：「誠不至耳，不者，雖之蠻貊可矣。」豪民秦琥，武斷鄉曲，持吏短長，號「秦大蟲」，邑大夫以下，爲其所屈。登至，頗革。登因喜其遷善，補處以學職。他日，琥乘間請屬，登謝卻之。琥怒，遣子弟要奪士人財物於路，有被其傷者，登受詞追對，琥遽摔在學諸生，以出具宣言：「縣令止有一年半，不知古縣有秦大蟲耶？」會有愬其侵貸學錢者，登呼至面數，琥奮臂厲聲曰：「何預君事？」登叱下，告衆白郡及諸司，必置之法。琥忿而死，一郡稱快。古縣，秦檜父舊治，檜實生此，帥胡舜陟謂登祠之。登曰：「檜爲相亡狀，曷以祠爲？」舜陟佛然曰：「汝欲爲好人耶？」既，又令市熊掌、牛乳，登曰：「踐雪而搏猛獸，將春而奪之牛，此人上耶？」舜陟大怒，移荔

浦丞康寧代登。適登以母病，亦自乞去。舜陟遂創櫓祠，而自爲記，且撫秦琥事，誣以專殺罪，詔送靜江獄。舜陟遣健卒捕登。屬登母死舟中，棄葬水次，航海詣闕，請納官贖罪。故人有爲右司者，謂曰：「丞相云嘗識君於太學，能一見，終身事且無憂，上書徒爾也。」登曰：「某知有君父而已。」既而中書奏納官贖罪無故事，仍送靜江獄。登歸葬其母，訖事詣獄，而舜陟先以事下獄死矣，事卒白，勅還家。至廣，漕帥鄭隔、趙不棄辟登攝歸善令。是秋，委考試潮州，登摘經史要語命題，策閩、浙水災所繇，皆屬意時事。郡守季仲文馳達檜，檜怒，坐以舜陟所奏，取旨編管容州，隔不棄亦坐鑄一官，南省至揭登名爲考官戒。時登出試院還矣，省符下漳州，遣使臣謝大作持示之，登讀畢即投大作，上馬。大作曰：「少人告家人，無害也。」登曰：「君命敢稽？」大作愕然。比夜，巡檢領百卒挾兵刃至，登曰：「若賜死，亦當拜勅乃就法。」大作感登忠義，爲泣下，奮劍叱巡檢曰：「汝欲何爲？省符在我手中，無他語也。」登謫居，授徒自給，聞朝廷政事少失，輒彈蹙不樂，大失，則慟哭隨之。臨卒，所言皆天下大計。後二十年，丞相梁克家、守何萬、傅伯壽，相繼以其事聞，追復迪功郎。後五十年，朱文公爲守，奏乞褒錄，贈承務郎。登學以慎獨爲本，事母至孝。母舟行阻風封康間，方念乏晨羞，忽有白魚躍人。母病，思食鹿肉，夜有虎啣鹿置門去。所著有《家論》等篇，及《東溪集》。皇朝成化間，縣舉人吳震請立祠專祀，從之。

## 皇朝科第

舉人 進士子、午、卯、酉屬舉人，辰、戌、丑、未屬進士。

洪武十七年甲子 周宗起

十八年乙丑 周宗起

二十年丁卯 張哲 林璟

二十三年庚午 吳旭 許瑛

二十九年丙子 盧伯可

永樂三年乙酉應天中式 藍通孫貢士。

六年戊子應天中式 黃鳳孫貢士。

九年辛卯 蔡肅

十二年甲午順天中式 張知新

十八年庚午 陳翼 陳亶翼弟。

二十一年癸卯 鄭憲

宣德十年乙卯 張昶

正統元年丙辰 陳亶

六年辛酉 魏璧 蔡貴 楊盛以貢，應天中式。

十二年丁卯 楊武盛弟。

景泰元年庚午 謝祐 侯亞 陳鐔 吳原 詹肅

四年癸酉 蔡章 吳森原從兄。 周瑛 葉穆應天中式。

天順元年丁丑 吳森

三年己卯 趙超

八年甲申 吳原先是，癸未二月，會試場屋災，詔移八月，至甲申三月廷對。

成化元年乙酉 周仁 林表

四年戊子 吳越 陳免妻侄孫。 吳震原弟。

五年己丑 林表

十一年乙未 陳免

十三年丁酉 高聳 沈章 丘峻應天中式。

十四年戊戌 吳超

十六年庚子 黃貞 徐弼 吳泰原弟。 趙渾超子。龍溪學。

十七年辛丑 趙渾

十九年癸卯 程貴其先開化人。縣學教諭孟子之子。附籍。 陳維

二十年甲辰 吳泰

二十二年丙午 徐輔弼弟。

弘治二年己酉 陳琛

十一年戊午 王謹

十四年辛酉 吳暄森子。 詹惠 林容 吳夢麒原子。順天中式。

十七年甲子 曾琅

十八年乙丑 陳琛



正德二年丁卯 陳烈臺侄孫。

三年戊辰 詹惠

五年庚午 劉友仁

六年辛未 陳烈

八年癸酉 劉友德友仁弟。 涂爲憲 李逸

十一年丙子 林梅

嘉靖八年己丑 林梅

十年辛卯 沈仁章府學。 徐表 林功懋訓導廷臣子。以儒士。

十一年壬辰 林功懋 徐表

十三年甲午 林策 林一陽策從兄。 王會應天中式。

十六年丁酉 陳謨 沈叶夢章侄。 鄭守德縣莆田學。

十七年戊戌 林策

十九年庚子 丘時庸 王健 葉期遠 林一初一陽兄。自期遠而下，並應天中式。

二十年辛丑 陳梧

二十二年癸卯 林成綱一初從弟。 王滴後改名春澤。

二十五年丙午 林一新一陽弟。 陳常道

二十六年丁未 王春澤 林一新 王健

二十八年己酉 蔡大壯 朱天球 徐鼎 王應顯 林敬順天中式。

二十九年庚戌 朱天球 王應顯 徐鼎

三十一年壬子 吳瑛 蔡楠後改名一楠 蔡明復 江潮 林煜梅子。以儒士中式。

三十二年癸丑 林敬 葉期遠

三十四年乙卯 童環 胡文遠 熊大楠 王克家 林士弘功懋子。縣府學。 湯應科縣龍溪學。

三十五年丙辰 江潮 蔡明復 湯應科

三十七年戊午 林士章 楊守仁並縣府學。 陳魁士 胡文耀 熊鰲 林梓 林楚士章從兄。順天中

式。

三十八年己未 林士章探花。

四十年辛酉 吳華縣府學。 林偕春 黃義方 盧維禎 林紹 戴維則縣鎮海學。

四十一年壬戌 蔡一楠

四十三年甲子 黃如金縣府學。 林德 張純 吳昭瑛子。 游春霖 劉文芳 趙宗鳳順天中式。

四十四年乙丑 胡文耀 林偕春 林紹 張純 楊守仁 林梓

隆慶元年丁卯 吳瑄瑛弟。縣府學。 陳公相 黃雲繪 趙範 曾嘉偉

二年戊辰 盧維禎

四年庚午 沈汝梁縣府學。 陳一洙 蔡時鼎 吳顯原玄孫。 郭廷良 丘養舉後改名鳳騰。 林鵬飛

林三 張時迪順天中式。 林四

五年辛未 趙範 吳珪 林鵬飛

萬曆元年癸酉 吳一檜 袁有鳳 林續振並縣府學。 康濟時縣龍溪學。 陳煜 劉祥鸞 丘汝植

張常 薛士彥

二年甲戌 林續振第七。 蔡時鼎第九。 吳顯 沈汝梁

四年丙子 劉庭蘭解元。 蔡昂後改名呆。 劉庭芥庭蘭兄。 劉霖 劉庭蕙庭蘭從兄。 林汝詔 張震

黃朝英 蔡琮縣府學。

五年丁丑 劉庭芥 劉霖 袁有鳳 陳一洙

七年己卯 陳錦 林士旂一新子。 李希白以儒士。 丘汝才(五)時庸子。 吳啓泰 林有初

八年庚辰 薛士彥 林士弘 蔡昇 蔡琮 丘汝材 劉庭蕙 劉庭蘭

十年壬午 張裴第四名。 陳日章 林維熊 江環 何日謹 程可以 詹兆忠惠孫，後改名子忠。 沈

油然縣府學。 王志遠會係。縣龍溪學。

十一年癸未 郭廷良 吳華 陳公相 張常 陳錦

十三年乙酉 胡寓文遠子，改名寔。 胡賓墀文耀子。 張維聰 吳啓蒙 趙從誼 吳曜 黃龍濟 黃

廷金 王志尹 黃鳳鳴縣府學。

十四年丙戌 林茂桂 林汝詔 江環

十六年戊子 黃昇 陳一清 方梅並縣府學。 黃季成 湯日章 商文昭 盧挺維祺侄。 趙仕魁縣

仙游。改名命台。 林志學 王仁並海豐中式。

十七年己丑 蔡杲 王志遠 黃季成

十九年辛卯 劉履惇庭蘭子。 陳建中 楊烈 陳儻民並縣府學。 方鼎鉉 林宰梓子。 陳元輔日章

子。 楊一葵守仁子。順天中式。

二十年壬辰 胡賓墀 楊一葵

二十二年甲午 黃士瑛 朱一鶚 陳廷應 徐煒並縣府學。 吳宗顯子。 丘懋灼 李希濂順天中式。

胡廷宰廷宴弟。應天中式。

二十三年乙未 吳宗 胡廷宴 方鼎鉉 商文昭

二十五年丁酉 胡起龍改名文燦。 朱琬 丘懋煒縣府學。 蔡宗禹大壯子。 趙從詔宗禹從詔並順天中

式。

二十六年戊戌 朱一鶚會試第七名。

二十八年庚子 蔡思充第二名。 湯思敬 連蓋 徐肇鼎表孫。 盧化鰲縣府學。 王志遠志遠兄。蘇龍

溪學。

二十九年辛丑 林宰 蔡宗禹

三十一年癸卯 江灝 商經並府學。 吳鳳來 陳鏞 許士永

三十二年甲辰 江灝 丘懋煒 陳鏞

三十四年丙午 陳士表改名可一。 林有樑 徐繩祖鼎孫。 曾一炳 蔡一橙宗禹子。 楊守伯 王

志道志遠弟。 沈懋魁 戴輝讓 林宰梓子。順天中式。

三十五年丁未 蔡思充

三十七年己酉 商家俊第三名 吳廷燦贈子 程紹南 顏容暄 蔡朋並縣府學 張經國 吳長

盛華子。 劉正中順天中式第三名 (六) 涂績以貢順天中式

三十八年庚戌 顏容暄

四十年壬子 林萃社縣府學 李啓明縣惠安學

四十一年癸丑 程紹南 劉正中 王志道 吳廷燦

四十三年乙卯 林應聚 林檜 陳一淳 謝應昌 林耀 徐天福

四十四年丙辰 林應聚維熊子 盧化鰲

四十六年戊午 林鍾秀 陳朱圖 曾用修 李世奇 李長庚 石公胤

四十七年己未 石公胤

薦辟、人才、貢士賢者雜見列傳中。

有傳

張伯庸 周宗起 張哲 黃鳳 陳璜 陳壽侄孫 俞文 楊武 陳鐔 葉穆 吳森從弟 原

弟震。 趙渾 黃昇 戴琇 吳超 徐弼 林垣 林秀桂 林梅 林廷臣子功懋 功懋子士弘。 徐表

林、陽從弟 王會 劉輔仁 朱天球 徐鼎 王應顯 林楚弟士章 士章子汝詔。 林偕春 林續振

吳顯 蔡時鼎 陳一洙 劉庭蘭 陳錦 蔡杲 黃季成

張伯庸 洪武間以明經薦知壽州。鄉閭楷其學行。居官剔蠹植良，以循吏稱。

周宗起 任寺丞。靖難兵人，父子俱自投琴川死。永樂改元，宗族懼誅，悉皆逃散。

張哲 任戶部郎中。成祖人定內難，衆方迎謁，哲忽隕於叢衆中，人皆異之。

黃鳳 任德安教諭，經明行修，旌別淑慝，士多砥礪。九年，陞教授。

陳璜 縣歲貢授衢州教諭，學行純正，士師之。

陳璽 字尚勉。授戶部主事，遷吏部考功郎中。瓦剌犯邊，守臣失策，作備邊禦戎策以獻。天順四

年，廣東盜熾，廷議謂必得璽乃可，除廣東布政使。時英廟初辟，勵精爲治，召入內殿，錫宴遣之。既至，密相機宜，撫捕互用，討平新興，撫定德慶、蓬州等峒獠賊。尋以疾求退。璽政事文章爲時推重，所著有

《梅菴存稿》、《經籍要覽》。侄孫免。

免 初授工部主事，陞員外郎，監濟寧閘及浙江商稅，總督北畿、山東河務，俱才諳見稱。弘治庚戌，韃靼寇邊，軍餉告急，改戶部郎中，奉勅總督賜膳，給傳以行。免催督有方，應期而辦。及歸，欽賜鉉寶。

陞貴州參議。都勻寇起，當道命掌司事，徵發及時，餽運不絕。賊平，乞歸。

俞文 字懋學。正統九年，貢人太學。遭父喪歸，治塋村落。時郊寇縱橫，文草宿無怖。會大帥統兵至，文儒冠謁轅門，盛言王師之道，弔伐爲本，賊雖蔽野，多脅從，殲渠可矣，慎毋暴掠。帥善其言，憐其在疚，遺以糗糒，不受。景泰癸酉，謁選吏部，時同邑故人陳璽在考功，請稍須美除，文正色拒之，竟授常州府照磨。單車赴官，日坐郡幕磨勘，廉介正直，不少阿徇。監司有不決疑獄，多檄文治之。在任八年，以公委至京，疏老疾乞歸。過常，吏民攀留，且醵金爲道里費，文覓小舟，夜亡去。居二年卒。鄉人士相與號曰正菴先生。

楊武 字德毅。任冀州訓導，嚴立科條，教有成績。陞寧都教諭，屢聘爲河南、山東、廣東主考。道有私謁者，諭之曰：「以薦賢而以爲私也，不媿於人，不畏於天？」其人慚負退。丁內憂，復除永新教諭，訓迪益勤，監司掄薦，引疾歸。

陳鐔 字曰宣。初授太原判，清慎自持，督民兵守邊，與同甘苦。陞徽州同知，改嚴州，案無留牘，民無冤訟。

葉穆 字式文。授汾州知州，執法不撓，民有犯死罪者，餽金五百求貸，叱之。其人復訟冤於朝，法司訊鞫無異。以論事忤當道，坐劾，改調吉州，汾民相率赴吏部辯，不能直。至吉，興學校，賑饑民，流亡就食者千餘家。以最陞河間府同知，滿考，致仕。家居，茹蔬衣敝，不事干謁，邑長就質政治焉。

吳森 字以時。官禮部郎。歷浙江參政，品量紹興等郡徭役，輕重適均。江山草寇負險弄兵，設法捕之。在浙十年，廉靖公勤，凡有設施，皆平恕寬仁之政。子暄，舉人。從弟原、泰，俱進士。泰，端謹有文名，未仕卒。

原 字道本。天順中授兵科給事中，時憲廟初辟，首陳正心、任賢、重爵賞、節用度、斥異端五事。憲廟未子，萬貴妃顯寵，成化四年，偕同官疏乞溥恩惠以廣嗣續，愷切忤旨。十五年，陞都給事中。汪直用事，初置西廠，專伺察，原言非舊制，革之便。時安南窺滇，女真犯邊，極言守臣貪恣誤國。既又攻一二大臣附西廠者，爲所中。久之，乃遷太僕卿。弘治初元，擢戶部右侍郎，總督京儲。先是，盜芻糧者發覺，皆箠擊幾死，始送刑部，原曰：「有法在，奚箠爲？」親藩旗尉領祿米，至縛官吏自爲支放，原嚴加禁治。四年，陞左侍郎。五年，兩浙大水，民饑，奉勅兼左僉都御史往視，勸分平糴，且積且賑，蠲累年逋負數百

萬。防寇盜，抑豪強，築海隄，塞礦穴，嚴生女不舉之禁。九年，致仕，卒。原寬厚樂施，性善記憶，凡奏牘累萬言，默視至再，輒能舉其辭。湖南宣慰司奏狀，印篆微異，立辨其偽。公暇手不釋卷，喜讀《左傳》，與客談某國某人，能舉其始末。

震 原弟。少負氣節，憤先賢高登不入祀典，疏事於朝。官至廣東提舉。

趙渾 父超，南京國子博士，有文名。渾舉進士，歷戶部郎，出知雲南思恩、雷州三府，廉介自持，決獄無冤。遭劉瑾之禍，致仕歸。居家四十餘年，教誨子孫，不問戶外事。年八十餘卒。

黃昇 成化六年貢士，授祁州訓導，苦志力學，以孝義聞。

戴琇 成化十年以貢授松江通判，訓民以禮葬埋，親死毋委水火。撤淫祠，清僧寺，毋令民男女惑浮屠，不吝施舍，而匿賦逋徵不急於公上。以福建晒鹽法教上海竈戶，俾鹽課以登。卒官，民像祀之。

吳超 字華越。授工部主事，監杭州商稅，稅以充，課不人私。管徐州洪三年，尤著聲望。遷廣西參議。晚節益勵，告疾家居，淡薄杜門，鄉人重之。孫珊，應嘉靖中貢，高尚不仕，屢空晏如，行年八十，手不釋卷，鄉人稱曰古先生。

徐弼 字良佐。初知海陽縣，修築陷潮大隄，縣民蒙其利。因忤當道，改保昌，爲民蠲無徵米千餘石，當道旌薦，以不賂逆瑾，格不行。遷梧州府判，竟以不賂瑾故，致仕。瑾敗，起判漢陽，攝府事。漢陽無城，大盜往來江上，迫郡有日。弼倚城架木，人得哨守，賊不敢犯。擢廉州同知，踰月卒官。子興觀，發其篋，得《海陽去思卷》、《保昌循良德政錄》、《漢陽晴川卧轍》、《漢水遺思贈言》若干卷而已。

林埧 字廷樂。成化二十年以貢授寧府審理正，據理守正，爲寧康王所知。繼事宸濠，屢諫弗聽，乞



歸。宸濠怒杖之，竟爲請，進階長史致仕。方墳乞歸時，人莫測其意，後十餘年，宸濠反。家居操履端嚴，好學不倦。壽九十終。

林秀桂 字必芳，號恥獨齋。幼有志行，父歿，事繼母盡孝。正德中應貢謁選時，劉瑾有掛號常例，秀桂曰：「以賂進，非士也！」改之南雍，托咏飛雪，有「狂憑風雨張聲勢，亂人庭除任積堆」之句。尋行取人選，堅辭不赴。歸，講明《易》學，成就後進。浦中論明經修行之士，以爲稱首。

林梅 字以和。歷戶部主事、郎中，督課江州，覺察內帑，儼運糧儲。所至持正不撓，坐忤權貴，出安泰州。歷同知慶遠、南安二府，陞南京禮部郎中，卒官。慷慨有氣節，爲文博雅，人推重之。

林廷臣 字敬侯。嘉靖中貢士，授長樂訓導，以母老不赴。居家繩檢自律，鄉稱長者。歲大饑，倡諸富室爲糜，鄉里賴全活，郡守盧璧、督學朱衡，表其閭。年八十二終。子功懋。孫士弘。

功懋 字以謙。初授東莞知縣。嚴馭吏胥，寬恤里甲，滯獄積案一清。嘗榷稅番舶，夷人貨賄毫無所受。時指揮王寵偕行，見功懋，感歎曰：「獨文臣不愛錢乎？」亦峻却之。有巨寇許折桂，既降而恣，執懋之，斃於獄。陞南京戶部郎，擢知贛州府。巡撫朱執操法嚴切，功懋濟之以寬。遷四川按察，兵備松藩。邊將何卿，故老兵，間有名於時，功懋法繩之，遂致阻撓，告歸。隆慶改元，起用遺逸，歷轉廣西按察使，卒。爲人沉毅恢廓，有大節。每論天下事，策畫敷折如指掌，好義樂善，綽有父風。

士弘 字仁甫，功懋子。執父母喪，三年不入私舍。分箸庶弟，任所意欲。撫孤甥如己出，遇執友若父師，宗鄰貧不能婚，喪不能窆者，悉資給之。歲侵，蠲私租施棺槨。舉進士，授行人，遷刑部郎。出守承天，力疏致仕。蒞官所至，清慎平恕，無矯矯尤異之習，而內行鞠躬，聞然爲君子。

徐表 初授上饒縣，歷陞刑部郎中。有邊將失機，當坐法，遍賂權貴求解，表固執不從，坐忤，謫湖廣布政理問。

林一陽 字復夫。判濟南府，革糧例，歲以萬計。年饑，賑濟得法。以漕運後期，調霍丘令。振義勇，均庸調，行鄉約、保甲法，正鄉飲酒禮。操江都御史洪朝選、督學御史耿定向深器重之。顧諸部使者不悅其惇質，卒遷唐府審理。去，民立石紀政，請兵部侍郎喻時碑之。一陽學以居敬窮理爲宗，謂道至程、朱，有何不盡，何須別立教門。其爲人坦夷寡慾，不言躬行，宗族鄉黨莫不稱信。耿定向後來撫閩，亟問故霍丘安在，而宿草滋矣，檄有司祭於社，表其墓。從弟策。

策 字直夫。知蕭山縣，爲縣人築閘家堰，捍堤以石，立法蓄泄，溉民田數萬頃。稽理徭賦，隱括小冊，布之民間，胥吏無所得夤緣，暇則進諸生課文講德。終江西按察僉事。

王會 字延亨。繇龍溪選貢，授太湖教諭。嘉靖中，領應天鄉薦，復任太湖，陞國子監學錄。冬至，班曆內廷，士譁，大司成以下俱奪俸；會，館中士獨恭謹以師範。擢知道州，罷里正供具，寬逋負，賑饑民，招撫叛猺，悉歸編戶。適三廣大征，師出於道，兵使者邏得避兵者八十一人，曰：「盜也。」下州訊，會察其冤，上牘白狀。使者怒，至繫胥役刑劫之，不爲動，八十一人竟得釋。時急通逸賊龔廷虎等，兵使者授會意，令斬撫猺鄭虎僑等五人頭以當廷虎，會謝不能，第求去而已。遷曲靖同知，攝府事，率屬嚴正。勘黔國夫人奏沐朝弼謀奪公爵事，責朝弼不宜事嫂少恩，而治其細人離間者，勳爵竟定。時征土酋那鑑，會齎金督賞，賊以象來戰，布政徐樾死焉，會爲收散卒，護輜重歸。攝守人覲，事竣乞休。林居二十載，著述自娛，有《北雍春陵滇中歸田集》、《建文野史》、《夢齋筆談》若干卷。

劉輔仁 力學能文，應嘉靖二十年貢。初授河間訓導，歷陞深州學正。家本五世同居，輔仁復事母至孝，同胞四人蒸睦相先。辛酉饒寇之變，挈家出避賊，賊欲火其屋，中一賊止之曰：「此劉公家，五世不忍分居人也。」皆引去。

朱天球 字君玉。父瑄，有士行。天球弱冠登進士，授南工部主事。滿考人京，會楊忠愍繼盛論死西市，招泉州薛天華，與同志楊豫孫、董傳策往收之，語在《天華傳》。歷南駕部及禮曹郎，擢湖廣按察僉事。丁艱，服闋，補廣東，移廣西提督學政，陞浙江左政參議，轉山東副使。復提督學政，擢南京太僕寺少卿。莊皇帝登極，天球入賀，給諫石星言事忤旨，廷杖幾斃，因上疏千餘言，乞宥星罪。京師相語曰：「朱公向履虎尾，今批龍額，非烈丈夫孰當此哉！」越明年，外調，拂衣歸。治草舍郊南，若將老焉。萬曆中，復起廣東按察副使，旋內召南太僕寺少卿，遷太僕、大理二寺卿，復遷南刑部右侍郎。尋改工部左侍郎，南京掌院、南工部尚書。上疏乞骸，奉旨溫留至三乃許。年八十三卒，贈少保，賜祭葬。天球貌莊而靜，言寡而中。尚風誼，嚴取與，慎交游。家居高潔恬素，所著有《湛園存稿》。

徐鼎 字思重。祖仕耕，見閭巷。鼎，舉進士，授臨川令，清虛糧，均徭役，崇學校，恤犴獄。擢南戶科給事中，轉北禮科。疏陳六事，復糾撫臣之不飭者。奉使過里，屬有兵興之役，民苦轉輸，貽書當道，請分續運如詔安例。復上疏，請還浙省原借糧銀，以紓閩中官私之急，鄉人德之。陞工科都給事中，歿於京邸。臨川人爲祀名宦，置祭田焉。鼎至孝，事二母無間。爲宗人置穀百餘石，如范文正義田也。

王應顯 字君謨。知秀水縣，縣治後圃多桃，鹽之以佐飯。縣患倭，與郡守劉懋合謀守禦，日給糧餉，治器械，撫循士卒。夜楚服行城壘，士女避寇從田間來者萬計，監司令繇女牆緹入，應顯曰：「緹且幾

何？賊倖至，盡矣。」矯令啓之人，甫畢，倭薄城，無一遇害者。擢雲南按察副使、湖廣參政，分守襄陽。道殣相望，發粟賑濟，全活數萬。轉浙江布政使，潔己奉公如爲令時。遷太常寺卿，值江陵相憂制奪情，部、寺俱上疏保留，應顯獨不具，竟以是拂衣歸。應顯起家單門，及歷貴顯，每與里中兒叙舊故，斗酒相勞，人服其厚。壽九十一。

林楚 通判雷州。受學於薛中離侃。著《衍書旨摘》、《性對輯》、《思經原儒》、《釋玄谷子》、《解老》諸篇。弟士章。

士章 字德斐。嘉靖及第第三人，終南禮部尚書。爲人沉默凝遠，溫恭下士，居顯持恬，不醖不縵。爲江陵相所不喜，致仕歸。其卒也，大學士于慎行銘其墓曰：「方柄臣之隆也，附者嚮其利，公也集於枯。及其更也，又皆竊藉爲名，公默默也恪守厥舊模。夫惡識其卓犖而魁梧哉！」子汝詔。

汝詔 字君綸。初授永州推官，以平恕清慎名。擢南吏部考功郎。出藩兩浙，秉憲徽寧，威惠並著。去之十年，已不當列，南都計吏中忽撫誣考功時事，謫其官，人情愕眙，閥然訟冤。久之，推行人司副，且漸用矣，而遂卒。

林偕春 字元孚。初改庶吉士，授檢討，歷編修。以文華氣節推一時。當管諄勅，爲江陵相父撰述，相欲增改數語，偕春執不更，曰：「王言有體。」相啣之，出爲湖廣副使，拂衣歸。與友人書曰：「僕賦性過愚，殖學無聞，誤塵華貫，實非其分。顧自釋褐以來，幸從諸公後，獲接緒論，蓋非一日短長之効，昭然可見。今當塗者以此處僕，不知謂僕能乎？謂僕不能也？僕雖音操土風，行乖流俗，至於是非利害之際，坦然明白。輕重緩急，亦當有繫。人謂僕不能，僕不敢也。然而名不登於首列，交不及於顯官，終日窮年兀

然自守，不惟朱門先達或笑彈冠，至山林俗士亦多白眼。平生所自信知己者，不過一二人耳。人謂僕爲能，僕不敢也。夫以僕之能不能，尚不敢自決，而況於當塗乎？當塗者，既不以僕爲能，而又不欲顯然斥之，則亦未敢決然以爲不能也。能不能之塗，既無所處，則亦庸常畜之耳。家有青山，戶有流水。朝露方晞，稻苗盈疇。搔首其間，行人樹外。牛羊自出，鹿豕自游。農扈誇年歲之豐，童稚眇衣冠之後。知我者希，則我自貴，又安能貶胸中奇崛，徇他人面目之歡哉？又僕自幼嗜睡，長而多疾，讀未五車，名倖第一。迨叨中秘，始事涉獵，然而日循故事，數卷僅終，虛應課程，三冬奚足？意未嘗不欲窮墳典之巔，探載籍之底，採述作之精，剝藝林之實也。故得錢卽以購書，燃燈卽以開卷，意之所怡，他不能易。今必欲使之俛首以就簿書，易轍而視戎馬，世情日新，狂態猶昨，一無所成，萬有餘喪矣。誓將築室雲山之麓，洗耳漳水之濱，慕匡鼎之解頤，希貢公之折鹿，搜壁藏之餘蘊，發高閣之異同，考經緯之彌文，講太平之遺跡。庶幾心茅旣除，面牆無壅，目牛全解，書粕盡融，然後芟諸史之繁蕪，粹百家之散佚，續千古之道術，成一代之文章。語云：『人各有能有不能。』此則僕所能也。」相死，起兩浙提學，其所取士，多在牝牡驪黃之外，始若疑駭，久悉懸驗。仍以骯髒自喜，忤臺使者，掛彈章。後復起南贛兵備，遷湖廣參政，竟不能與世合，歎曰：「宇宙如許，莫能容一林元孚！吾逃之醉鄉已矣！」歸與故人痛飲劇談，絕口時政。乃里中有不平事，無問縉紳士庶，輒怒目苛責，不少含茹。人皆曰：「此古道也，今也則亡。」林公操此以仕也，屢起屢頤，又奚怪哉？」

林纘振 字公悅。父祈峰，以貢授武學訓導。纘振自其少小，爲文輒咄嗟辦，華采流麗，機軌趨捷，若生於天。萬曆初，第進士第七人，授工部主事。工部，劇曹也，而後庫允劇，纘振又年最少，人曰：「林

公悅，文人耳，安能工部？」續振曰：「我自饒爲。」視事數日，有中貴人僞言縣官欲造象牀者，索庫金且萬計，續振移內監訊之，則詐也。歲終，庫掾進羨金數百曰：「公合得之。」續振呵掾出。自有後庫以來，巡視者惟給事中自貴倨，第以天子守藏吏目工部耳，續振視之蔑如也。語稍侵續振，續振曰：「當職不法，公卽上聞，工部承命守藏，不承命媚乃公也。」給事面發赤，續振徐徐引給事去。未幾死，橐餘俸金一餅、時服數襲，年二十七耳。

吳顯 字景猷。初知六安州，五閱月，時高郵寶應湖堤壞，總河難，守郵者特疏請，顯遂得更調。拮据五載，修越河，築老堤，植柳護堤岸，屹然爲壯河。江陵相命其子迎母入京師，道過郵，役驛夫以八百人。時相方厲濫驛之禁，犯者重得罪，顯力裁之。相家奴人州治，大詬詈，徐徐誘顯入其舟，出數婢奪州印去。顯曰：「州太守奉汝家相君法，何絮也？」直指監司聞之，頓足歎曰：「大不諳事。」急馳解，得罷，相亦竟不敢問也。遷刑部員外郎、江西僉事、廣東參議副使。所至有聲，第以端介不能隨俗，竟左調，乞疾歸。

蔡時鼎 字台輔。起家桐鄉知縣。丁父憂，復補元城。兩邑刁醇異俗，時鼎一以勤慎廉約，勸學右善爲質，吏民悅而安之。十一年，選授監察御史，內官田玉提督太和山場，兼分守湖廣行都司等處，請給符驗、關防、令旗、令牌，科臣爭不得，禮部遂爲請，鑄給關防。時鼎言：「太和山場提督內官始宣德間，未有兼分守，兼分守自成化末年。隆慶初，太監呂祥倚勢虐民，被巡按御史參奏，下兵部覆，革久矣。田玉承命提督，但當恪守舊章，乃欲復攬威權。夫湖廣地方，有巡撫統之，有巡按監之，有三司經理之，烏用一內臣兼分守者？且刑餘之人，假之以權，將來賣弄威福，肥己濟私，復何制掣？陛下徒謂成命已下，執奏

遂阻，臣竊以爲聽納之公，不但當行於有司，而亦不可爲左右所潛移；禁遏之明，不但當施於疏遠，而亦不可爲褻近所默格。今事干外廷者，隨奏隨行；事干內臣者，輒言輒寢，臣恐內外異趣，言路靡通，聖心聰明未免有蔽。願皇上卓然獨斷，報罷仍舊。」疏人不行，然中官實憚畏之。明年，奉勅巡鹽兩淮，咨訪宿弊，相度時要，以裕課通商，因列便宜十事以上，復繼陳六事。居頃之，監察御史丁此呂參論左侍郎高啓愚前主應天己卯鄉試，其試目爲「舜亦以命禹」，意實阿奉江陵，故并及累年場屋之弊，又稍干時相子。啓愚以此坐去。吏部尚書參此呂誣賢亂政，不宜置臺列，蒙旨調外。已，王士性、江東之、李植等，閥然群起攻尚書，而又有爲尚書保留者。一時閣部、臺省，彼此求勝，紛若聚訟。時鼎復上疏曰：「臣竊惟我祖宗設科以來，最近公道。近日漸生弊端，豈惟奸欺獲售，即大臣子弟以真才進者，亦苦見疑。誠有如此呂所云，至訐考官試目，似乎過激。然自高啓愚試目一出，縉紳之列，青衿之儔，有一人不切齒者乎？即故相未必敢有此心，啓愚未必敢以此阿故相。然疑似之跡，既不能釋於人言，則采衆論聞當寧，正所以杜邪媚、懾儉壬，即激何害直，而可遽罪以誣賢亂政？臣謂方今之時，群枉已退，不必過爲搜求攻擊，使人人避讒畏譏。但能反其本心，行其真是，勿少有觀望依附之意，則言路自清，國是自定。若必以言官喜事求勝，匪抑制之無以壓服其心，枉塞其口。臣恐朝廷之上，公議難泯。防人甚於防川，天下有志之士，未肯從風而靡也。」巡鹽故有成例，席其餘足自潤，時鼎盡斥，以充淮安、寶慶汜光湖開築越河之費，自是河堤三十五里間，舟行無間。又二年，事竣復命。而是秋順天鄉試，內有陰囑不售者，遂積憾。考官交構中貴，中貴因而覘伺播擻，錄中有二浙籍，遂造爲飛語，達上前。上降內旨，枷浙籍兩生項，褫奪主考提學官。時鼎復疏言：「臣伏見近事，有徑從中出，不繇外廷糾奏，遂使舉朝惶惑，皆謂挾私之徒，造爲飛語，

密揭直達御前者。夫匿名告揭，律有明禁，在外諸司，尚不得妄投，何況宮禁清嚴之地？縱其事盡公，其言盡實，猶恐啓讒間之門，廣告訐之路。矧又假實濟誣，因公遂私。臣願陛下自今凡百幾務，仍普示外廷，明辨是非，毋以群臣之言皆不足信，毋以親狎之言概不足疑。」疏上，落職馬邑典史，即日就道。至，則問民瘼，訪虜情，備詢阨塞、要害之處。居二年，量遷太平推官。又二年，陞南刑部主事。尋轉吏部驗封，復上疏論時相之失，反覆數千言，大要謂其假上旨以濟私意，害進妨賢。又二年，改南禮部郎中。已，推江西學使，擬改尚寶司丞，並不見允，自是棄置不復問及矣。時鼎以吏隱之餘，肆力文章，篝燈誦閱，自經史百代，以至陰陽、醫卜，靡不研究。尤嗜《周易》，常手一編，畫圖別爻，窮極同異，註疏解釋，期於成書，而遽卒，得年四十有三而已。

陳一洙 字國潢。父銓，有士行。一洙舉進士，授靈川知縣，遷戶部郎，擢副使，歷按察使。爲人爽朗廓落。其所歷粵西、江右、楚、蜀地，並慷慨任事，爲公私計長久。居家孝友，鄉人稱之。

劉庭蘭 字國徵。少至貧，王父以與其兄庭芥携之讀書山中，饘粥鹽醢僅具，而敝韋不掩肘。然其謾謾稜稜，已有干日凌雲之氣。萬曆丙子，與庭芥及其從兄庭蕙舉於鄉，而庭蘭衰然爲解首。是年，北畿解首則南樂魏允中懋權，南畿解首則無錫顧憲成伯時，皆以制舉業傳誦海內，而庭蘭與鼎立爲三，於是兩挈雙提，而「漳浦三劉」之名，聞於天下。既萬曆庚辰，北魏、南顧並取上第，庭蘭亦以魁選薦南宮，相得驩甚也。江陵相當國，汰而喪節違物，庭蘭與顧、魏兩人並負氣誼，仗感慨，相推伏，謂相不可與勸誨，謀上書次相許公國，指畫國家計，駁擊時趣，甚壯且哲。而庭蘭書稍後，不及上，遽以父喪歸。庭蘭所友，自魏、顧外，有泰和郭子章、晉江蘇濬、吉水鄒元標、同邑林纘振一時海內扼腕而談氣節文章者，咸知有庭



蘭。乃庭蘭服父喪，竟死不及官。維漳浦十年之間，前有續振，後有庭蘭，俄頃奄忽，士林嗟嘆，謂：「天真無意文人耶？」庭芥，仕至紹興知府。庭蕙，廣西參議。

陳錦 字端實。初令海康，誠醇謹，政尚廉平。稍遷刑曹郎，十年不調。久擢松潘憲副，以疾卒官。錦少師事朱天球，篤孝力學，言笑毀譽不輕苟。自微至貴，嗛嗛未嘗意氣加人。歸櫬之時，鄉人累百迎哭之數十里外。

蔡杲 字弘中。少有文譽，與弟昇同領鄉書，並列魁選。初授太倉州知州，清白嚴介。遷南京吏部郎中，考察京朝官，輿論稱平。擢光祿寺丞，陞尚寶司卿，卒。杲豐下修髯，神氣道上，藻鑑明晰。推引士類，孳孳不怠。寓京邸，先後五六載，棲止道院，僧寮，蕭然一榻。其卒也，同年友人經紀之。

黃季成 父日宣，貢士。季成初授東陽令，聽斷得情，訊畢即遣，不入鍰金。擢工部主事，分管鑄造局，局故繁瑣，頗涉吏竇，季成一以淡薄處之。方推舉銓曹，而季成卒矣。

#### 龍巖縣(八)

##### 宋科第

治平四年丁未 周純

熙寧三年庚戌 龔原

六年癸丑 周綽純弟。

重和元年戊戌 黃琮 黃靖琮弟。

宗和三年丁丑 龔克原子。

紹興二年壬子特奏名 龔時可原。(九)

二十四年甲戌特奏名 陳登

二十七年丁丑 張嶸

乾道五年己丑 龔嶠克子。

八年壬辰 林尚德 周邠純孫。

嘉泰二年壬戌特奏名 龔惟叙原曾孫。

紹定二年己丑 連寅

淳祐元年辛丑特奏名 林雨若

四年甲辰 龔頤原五世孫。

七年丁未 連夢魁

有傳

周純弟綽。龔原 黃琮(一〇)

周純 字潛文。知建安縣。建賊廖恩剽掠南劍，純募死士千人，跡賊薄戰。恩窘甚，至三日無所得食，會詔書許招撫，乃罷。更任普寧、項城二縣。元祐初，蘇轍舉純善治財賦，自御史臺主簿提舉江西常平，救荒多所全活。歷京西運判、淮南提刑、戶部員外郎，出知應天府。居家不治田宅，構室東湖，竟蔽風雨。弟綽。

綽 與純齊名。同任戶部員外，人有「大小戶部」之稱。爲元祐黨人。

龔原 字安道。邵武御史穎之後也，寓居龍巖。歷國子司業、朝奉郎，知連州。累贈通議大夫。元豐間，朝廷方以財用爲急，所在皆務朘刻希上意，原獨寬平不迫。子時可，知寧德、安溪二縣，遷龍溪，而子孫多顯者。

黃琮 知封州。州當廢併之後，琮開學宮，出官羨營署，置學田以養封士。

### 皇朝科第

舉人 進士子、午、卯、酉屬舉人，辰、戌、丑、未屬進士。

洪武二十年丁卯 朱佛聰 翁茂並應天中式。

二十六年癸酉 顧玄珩

永樂元年癸未舉人舊志有洪武三十五年一榜，（一一）考是歲革除，故元年癸未開科而明年甲申會試。

王源 楊真

二年甲申進士 王源

三年乙酉 張觀

六年戊子 蔣志道復姓杜。

九年辛卯 蘇英應天中式。

十三年乙未 蔣志道

十五年丁酉 陳獻 鄧誠

十八年庚子 陳義安 劉銳

十九年辛丑 劉銳

宣德元年丙午 王應

四年己酉 蔣輔

尚有進士林元，不知何科。

正統三年戊午 倪庸

六年辛酉 蘇窪

十二年丁卯 賴旺

景泰元年庚午 周寅

四年癸酉 王超

天順六年壬午 蘇鑣

成化七年辛卯 蔣陽復姓杜。

十四年戊戌 蘇鑣

十六年庚子 黃文中

二十二年丙午 陳冕

弘治五年壬子 林玘 陳和

八年乙卯 王驥源孫。

十一年戊未 陳和

嘉靖二十八年己酉 丘鏞

隆慶元年丁卯 蔡夢說龍巖所千戶。

四年庚午 石應岳龍巖所應襲千戶。順天中式。

五年辛未 石應岳

萬曆六年甲戌 蔡夢說

七年己卯 王以道順天中式。

十年壬午 連繼芳

十六年戊子 魏鳴朝

十九年辛卯 王尚賢

二十年壬辰 連繼芳

二十五年丁卯 辛焜 連榜以貢，順天中式。

二十八年庚子 王命璫尚賢子。

三十二年甲辰 王命璫

三十四年丙午 陳宗陽 林伯憲

貢士、監生賢者雜見列傳中。

有傳

林瑜 王源 張觀 蔣輔 陳璣 丘昂 張冲 蘇孔機從孫鏞。 杜陽 黃文中 陳和 黃芹

## 石應岳 連繼芳

林瑜 字子潤。洪武中以太學生推選五軍右斷事，聽斷稱旨，陞江西僉事。贛有豪，以索逋殺人，賄侄殺伯母。安福有劇盜，未獲，奸民誣爲富家所匿。瑜皆廉實麗法。陞本司副使。長沙流民爲寇，奉檄往治，殲除巨魁，撫綏餘黨。陞浙江左參政，時布政使以下員皆闕，瑜至，獨任繁劇，躬勤早夜。踰年，坐火延公舍，被逮，卒。瑜居官二十年，所至樂易寬恕，禮賢下士，自奉無異韋布。每誦汪信民「咬菜根」之語以自勵。其卒也，楊文貞士奇誌其墓。父用作，見元末閭巷。子京，見韋布。

王源 字啓澤。選庶吉士，出知深澤縣。修學教士，築長堤捍水。禁嫁娶論財。累疏言民事，有旨召用。時西蕃有異僧來朝，成祖厚待之，源至，條陳時事併及焉。成祖怒，下錦衣獄。會赦，復原職，有「雨不出疆，蝗不入境」之謠。秩滿，陞春坊司直郎。時仁宗爲太子，源侍太子與諸王讀，方講說間，王他顧，源曰：「臣所講皆治平要道，猶懸置之耳。」王爲改容。及仁宗卽位，屢有賜賚，改衛府紀善。尋遷松江府同知，奏罷奉額及逋負糧數十萬石。刁民褚路等誣奏左道二百餘家，逮繫甚衆，悉平反之。以母老，乞終養。服闋，用兵部尚書王驥薦，入爲職方郎中。出知潮州，修學宮，課生徒，舉其鄉人蘇克善、林洪中爲揭陽、程鄉學博。郡有暴虎，方募人打捕，忽報云，渡惡溪去矣。城西湖山多怪石爲祟，命除之。郡治火發，仰天禱，尋反風滅。致仕歸，年八十卒。源博綜子史，下筆數百言立就。所著有《韋庵集》、《書傳補遺》、《家禮易覽》及《異端辯》。

張觀 任監察御史，巡按湖廣，貪墨聞風解印，時號張虎。官終廣東僉事。

蔣輔 字廷佐。父永迪，見韋布。輔任廣安州學正，歷金谿訓導，稟城、吉水教諭，寧國府教授。教

育人才，以文學稱。應會試考官者一，鄉試者二。秩滿，乞歸。爲人恬淡有識鑒，謹事繼母。好觀書史，教人志學，以存心爲本。與鄉人講行藍田鄉約。年八十三卒。所著有《泉巖集》。

陳璣 正統初以監生任昌化知縣，慈愛勤儉，奏革撫黎土官，積患遂免。縣多浮沙，薄土田，易旱，教民築堤蓄水，民甚德焉。

丘昂 字致謙。父存質，見韋布。昂，正統五年以太學生受岳州府通判。賑饑有法，奏免累年逋稅千餘斛，在岳七年，清譽顯著。以外艱歸，補任揚州府。擢順天府治中，致仕。母章年九十雙瞽，朝夕扶持。俸餘悉以修先塋，立祭田及置第宅。公之兄弟子侄。爲本縣奏請築城，并調官軍守禦，本縣人德之。子岳，弘治間貢，連州訓導。

張冲 正統間以監生知進賢縣。嚴明廉幹，禮士愛民，重名器，抑僥倖。創學宮，築城垣，增圖籍，置義倉。時致野蠶成繭，瑞蓮、靈芝之異。

蘇孔機 名囑，以字行。正統間以貢入太學，授永州同知，有善政，秩滿，郡人具奏借留。又數年，始告老歸。家居，置義倉以贍族，歲歉發粟，秋成還倉。敦尚古誼，邑人稱之。從孫鏹。

鏹 字仲戡。爲崇府右長史，盡心輔導，以清節聞。汝寧荒，啓王減免莊田祿米。王愛重之，奏加正四品。憂歸，王遣祭優渥。召復任，晚節益堅。正德改元，進階正三品。爲人和厚，家庭無叱咤聲。鄉鄰有怨者，及蹈難，反救援之。

杜陽 爲廣東布政司經歷。清修苦節，士論重之。

黃文中 仕交河教諭、廉州教授。以文行稱，尤邃於《易》。

陳和 字廷雍。知桐廬縣，擢南御史，按治有聲。遷河南僉事，撫民平寇，以功陞山東副使，備兵徐、揚等處，所至問民疾苦，折獄明允。乞疾歸。嘉靖間，起補湖廣，未行，卒。和志趣高潔，清儉恭謹，卒無以殮。桐廬、封丘俱爲立碑。

黃芹 字伯馨。喜怒不形，端謹無情。從學蔡文莊，所著有《易圖識漏》、《易經口訣》、《史圖纂要》、《家禮易行》等書。正德九年，以歲貢授海陽訓導，篤厚儒雅，無媿師職。以親老求歸，士咸惜之。

石應岳 字鍾賢。舉進士，選庶吉士，歷戶、禮二科給事，禮科都給事中。數言事，如請祀陳真晟於鄉，經筵乞命史官入直，登記得失，科場典省試宜用京朝官其大者。擢太僕少卿，督爲卿。尋晉應天府尹，會海忠介瑞爲御史大夫，大相矜契。改尹順天，值潞藩就國，所部驛騷，應岳主持，公私便之。奉勅提督操江，協理院事。擢兵部侍郎，召人爲戶部侍郎，尋罷。應岳奉身儉約，處世溫和。居恒薄汲長孺之斥平津曰：「三公雖尊，若必潔修，寸絲尺帛，亦何自到？」歿而其家甚貧。

連繼芳 授德清知縣，孜孜勸民，恥爲操切。竟以不善俛仰，左遷州別駕，終廣西副使。蓋浮沉仕途且三十年矣，而夷然而安之。早夜殫精，任事殊無挫抑。無錫顧憲成贈之文曰：「人之於世，如公所經涉，往往有之，却往往以境轉我，弛然而自廢。惟公能以我轉境，抑而愈振，遏而愈張。積勤累辛，成其遠大。夫不爲憂患摧志者，必不爲安樂肆志也。」繼芳有文名，善四六。

〔校記〕

〔一〕「龍巖縣」三字，各本原脫，據本書體例補。



〔二〕「漳浦縣」三字，各本原脫，據本書體例補。

〔三〕〔四〕「林」下，各本原闕其名。

〔五〕「丘汝才」，次年作「丘汝材」。

〔六〕「式」字，各本原脫，據文義補。

〔七〕「洪」字，疑誤。

〔八〕「龍巖縣」上，各本原衍「漳州府」三字，據本書體例刪。

〔九〕「原」下，當有脫文。

〔一〇〕「黃琮」，各本原闕，據本傳補。

〔一一〕「有」字，各本原脫，據文義補。

閩書卷之一百二十

英舊志 縉紳

漳州府 長泰縣 南靖縣 漳平縣 平和縣(一)

長泰縣(二)

宋科第

淳化三年壬辰 楊令問

熙寧六年癸丑特奏名 戴瑜

淳熙二年乙未 楊友諒今閩孫。

慶元五年己未 楊博友諒次子。

嘉定四年特奏名 黃子信第二人。

十一年丁丑 洪鍾

紹定二年己丑 葉惟寅 楊應友諒子。

淳祐四年甲辰 吳遇聘

七年丁未 張漢傑

寶祐元年癸丑 王師禹

四年丙辰 鄭夢霖 薛一正

有傳

### 黃子信

黃子信 應嘉定四年特奏。文章履行爲學者師。初調新會鹽場官，清介不阿。帥楊長孺以其老，榜爲監，每心易之，常捃摭其簿書。子信投詩，拂衣去，長孺嘆相知晚也，繇是加禮，竟不留。有《散翁集》。

元

### 楊稷

稷 字宗璉。好古慕學，隱居不仕。至正間，邑庠缺官，令林幹兒強聘攝學事，以義理行誼爲教。所著有《田家樂歌》，人能誦之。其詩：「田家樂，田家樂，樂在堯天事耕鑿。大兒北壠種白雲，小兒南澗飲黃犢。婦姑談笑課蠶桑，深夜寒機響茅屋。」

### 皇朝科第

舉人 進士 遇子、午、卯、酉是舉人，辰、戌、丑、未是進士。

洪武二十年丁卯 董幼穎

二十一年戊辰 董幼穎

二十三年庚午 黃文史應天中式。

永樂元年癸未舉人舊志有洪武三十五年一榜，考是歲革除，故元年開科而明年甲申會試。

戴同吉 盧燧

二年甲申進士 戴同吉 盧燧

三年乙酉 林濬 林晶

九年辛卯 楊驂應天中式。

十二年甲午 唐泰第四名。 蔡昇泰 薛瑩 張宗

十三年乙未 張宗 唐泰

十五年丁酉 劉和 薛琇 蔡銘

十八年庚子 林震 陳信宗 林皞 吳成 王麟 許顯 陳光賢

宣德五年庚戌 林震狀元。

十年乙卯 郭隆第三名。

正統三年戊午 洪聰 朱榮

六年辛酉 林堅第四名。

七年壬戌 朱榮

九年甲子 歐輝

十三年戊辰 歐輝

景泰元年庚午 莊乾

五年甲戌 楊釜

天順三年己卯 謝炫

六年壬午 許淙

成化七年辛卯 蔡腆

十年甲午 戴昀 葉儀

十三年丁酉 陳鵠

弘治二年己酉 黃耀

八年乙卯 黃元

正德二年丁卯 陳瑄

五年庚午 林明

八年癸酉 戴時宗昀子。

九年甲戌 戴時宗

嘉靖七年戊子 王瑩之 薛炳普安衛籍。雲貴第一名。

薛春普安衛籍。雲貴中式。

十六年丁酉 盧岐嶷

十九年庚子 王惟恕瑩子。

二十三年甲辰 盧岐嶷

二十八年己酉 劉一檜

二十九年庚戌 劉一檜

三十一年壬子 王擢第二名。

四十年辛酉 盧穎岐舉子。

四十三年甲子 林春容 劉四爲改名孟智。

隆慶元年丁卯 唐堯欽 戴燿

二年戊辰 戴燿

四年庚午 劉志尹

五年辛未 唐堯欽

萬曆十年壬午 林景中 王協夢 許亨魁 陳一經 戴燦時宗曾孫。

十三年乙酉 盧碩岐舉子。

十四年丙戌 戴燦

十六年戊子 陳鼎震 戴廷朴 王一范

十九年辛卯 王基石

二十年壬辰 盧碩

二十一年甲午 林秉漢 楊鍾英 張士黃 戴廷采以貢順天中式。

二十三年乙未 林秉漢會試第八名。

二十五年丁酉 薛參 沈維毗 陳台衡 王敷恩 戴燿

二十六年戊戌 王一范

二十八年庚子 楊泰順天中式。戴榜並以貢士。

二十九年辛丑 楊鍾英

三十一年癸卯 盧春蕙岐嶷孫。楊瑩鍾泰子。楊鼎鍾瑩鍾弟。

三十二年甲辰 楊瑩鍾

三十四年丙午 戴燭

三十五年丁未 戴燭 沈維毗

三十七年己酉 戴燭 章文炳 丘問禮 薛衍慶普寧州籍。雲南中式。(三)

四十年壬子 盧經 戴燭燭子。戴相榜弟。劉其中

四十三年乙卯 柯彥

四十四年丙辰 戴燭

四十六年戊午 楊灼

四十七年己未 戴燭

貢士賢者雜見列傳中。

有傳

黃文史 戴同吉 唐泰 吳耿 蔡銘 蔡琨 林震 歐輝 楊釜 戴昀子時宗、增宗、曾孫廷槐、玄孫

燭、燭。 葉儀 葉玘 林明 王廷和 王瑩之子惟恕。 林文 盧岐嶷子碩。 劉邦憲 劉一檜 唐堯

欽 林秉漢

黃文史 字廷實，晚號遜叟。穎悟通博。洪武二十二年應貢，庚午試南畿，《五經》題兼作，以違式取旨。太祖讀其《天下一家論》，大見稱異，御批特置第一，免會試，授刑部主事。以言事忤旨，貶撫州推官，字民以恩，而待屬過嚴，竟爲所陷，謫戍大同。後改漳州衛，卒。子汝剛，見韋布。

戴同吉 字慶之，號魯叟。郎戶部，有聲。歷浙藩參議，時運糧病民，上疏請立倉庾，以節勞逸，選大臣以詳鎮察。洪熙中，陳時務五事，仁宗嘉其言，且大用之，而同吉卽世矣。

唐泰 字師廓。資稟穎異，通曉《五經》，尤邃於《易》。舉進士，知祁州，有惠政。後以文學辟薦，召入，御試文淵閣，賦《麒麟頌》、《明倫論》、《野渡橫舟歌》，稱旨，欲大用之，因大駕北征，遂留京師。乞歸侍養。四方之士，受業日衆，如布衣陳真晟、侍郎謝璉、修撰林震、考功陳豐，皆出其門。

吳耿 永樂十二年歲貢，授澄邁訓導。學問老成，教育有方。以母憂還家，居喪以制。所有行資，俾其弟取三之一，殯葬諸費，不使與焉。四十喪偶，不再娶，人勸之，曰：「有子足矣。」致仕歸家，持身嚴謹，年九十五而終。

蔡銘 字邦任。授番禺訓導，簡默純篤，作養有方。致政歸，作《寓安集》以見志。痛二親蚤違，永思不懈。歲饑，出所有濟乏。其子買族入屋廬，取券還之。

蔡琨 字惟圭。永樂十七年以歲貢入太學。任南京留守衛經歷，陞新蔡知縣，以侍養告歸。民懷其政，詣藩省保留。事聞，詔禮徵之，不就。年八十餘卒，貧不能喪，官爲具焉。

林震 字敦聲。事繼母至孝。家貧力學，每樵耕，挾書自隨，休卧樹下，仰讀不輟。宣德五年，狀元及第，授翰林修撰。正統二年，以疾告歸，娛心書史，非公事不至郡邑之庭。廣藩兩聘主試，號稱得人。



卒於家。震登第時，家中井鳴三日。及卒，星墜其戶。

歐輝 字貞明。正統中，自戶部郎累遷廣東僉事，廉介不阿，扶弱刈強。時強盜數千，依山剽掠十餘年，下詔捕之，盜相謂曰：「吾屬授首矣！」渠魁五六，密遣輝金。輝佯受之，進兵勦捕，遂悉平除，仍上盜所遺金。上還賞之，固辭不受。陞湖廣副使，未任，卒。

楊釜 字受調，元楊稷裔。授監察御史，巡歷山東、浙江，按劾閹尹擾民及權橫時宰，直聲大震。以母憂歸，宦囊蕭如。其卒也，東魯、浙右聞之感嘆。

戴昀 字正中。父弘亮，有陰德，昀事之至孝。令樂清，政令廉平，嚴禁溺女之俗，築陂灌田，民名爲「樂陂」。以侃直棄官，更號「稼翁」。子時宗，進士。增宗，曾孫廷槐、廷桂，皆貢士。燿、燦、燿、燦，皆進士。廷采、廷朴、燦、燦，皆舉人。

時宗 字宗道。舉進士，授刑部主事。有錦衣怙勢殺人，匿弗出，時宗持之急，錦衣自詣尚書所，不囚服，長跪，尚書亦跪禮之，時宗曰：「法司也，何至與囚抗禮？」拂袖，忤尚書意，乃改屬他司。調吏部考功主事。武廟南巡，與同舍郎張衍慶等諫留，忤旨，罰廷跪三日，仍杖三十，直聲繇此起。歷考功文選郎中，塞倖門，清選法，杜請託，拔幽滯。霍文敏輅薦起給事中陳洸，旨下吏部，時宗詣文敏，力言洸不可用。執政欲用吏爲某官，時宗曰：「非例也。毫髮假借，末流濫觴矣。」南都缺兵書，權要欲用王瓊，時宗獨不署，奏曰：「王固有才，然與彭澤皆邊方得罪之臣，遽復本兵，功罪不明，無以示天下。」其持正不阿，多類此。陞大理寺左少卿。世廟嗣位，皇嗣未生，行人薛侃奏召藩王人侍，世宗震怒，下法司廷鞫之。張文忠孚敬，欲株連不附己。時宗力言侃狂瞽不足深罪，且羅織非上意。壬辰河決，魚臺運道阻塞，陞都察

院右僉都御史，躬行詢覽，條上三策，用有僱工。值達虜大人，特旨改提督薊州軍務，星馳赴鎮，勉循將士，懸示賞格，敗之密雲，敗之馬蘭峪。又奏募土著之人，以實行伍。革黃花鎮鎮守內臣，以免殘害，軍民稱快。未幾，罷歸。臺諫薦起巡撫鄭、襄。鄭、襄承大罵之後，旱蝗相繼，餓殍盈野。大發倉穀賑之，全活至二十餘萬。增築鄖陽鎮城，改置上津縣，廟川堡於要害地。尋以平竹溪金州賊，蒙賜金幣，陞都察院右僉都御史，協理院事。被誣回籍，臺省交章薦起，竟不報。時宗少負經綸應變之才，老而彌練。所至恩澤及民，又精聽斷，吏不敢欺。所爲詩，興致清遠，一時名公如薛蕙、鄭繼之、顧璘、許宗魯輩，相與往來唱和，大加許可。文廓達莊雅，成一家言，自命《朽庵存稿》。

增宗 知貴縣，抑土官，復鹽稅。繼補武緣，當大征，給饋餉不絕。以賢能，轉判常州。

廷槐 字元植。爲諸生時，作《海潮喘息論》，爲學使姜寶所賞。隆慶初，恩貢人南京，適姜寶爲大司成，廷槐與姑蘇張幼於齊名館下。尹遂安，修學宮，興人才，經術飭吏，邑以顧化。

耀 字德輝。起家新建知縣，歷布政使，所至有聲。家居，里中有變，出身扞禦，用是以邊材著稱。

歷廣西巡撫，轉兩廣制臺，累加兵部尚書。在二廣十餘年，政理安靜，蠻夷妥帖。年八十餘，卒。子壘，進士。從弟燦。

燦 字亨融。早有文譽，起家行人，選南御史，出爲山東僉事，歷江西副使。家居久之，最後起補貴州提學副使，轉四川參政。蜀中有奢酋之變，蜀城被圍月餘，燦眠食樓櫓中，墨守不懈，賊竟退。論功陞級，竟以四川按察使卒官。朝廷論守蜀功，加贈予蔭。燦風流韞藉，視財利如糞土，沒而無以爲家。

葉儀 弘治中令恭城，繕城垣，修學校。提學副使周孟中作記美之。

葉玘 字公重。弘治五年以歲貢授桂平令，清慎慈恕。時猺亂，兵費煩興，玘籌治得宜。有逋繫數十年，察其冤，釋之。憂歸不起。

林明 字達宗。繇鄉薦任河間管馬通判。例有產馬人錢，及馬斃，復入錢補馬，明至，悉除之。剛介廉明，政譽彰著。擢長沙貳守，卒官，歸櫬之日，百姓攀哭。

王廷和 爲東流知縣，撫流民，息囂訟，有割股之孝。

王瑩之 名瓊，以字行。事父母至孝，喜愠不形，甘貧力學。領鄉薦，判辰州，署府事。朝議以其地分封宗藩，瑩之力陳非便，說得行。以直道調雷州，築海岸，捍民田萬頃。歷知全州，遷金華郡丞，政教及民。繼轉後軍都督府經歷，致仕。子惟恕。

惟恕 字行甫。歷刑部郎中，遷副使，轉廣西左參政，皆有聲稱。以直道調。歸，卒於途，鸞衣釵爲殯具。人稱其持身如處子，任官如治家，事父母如奉嚴君，對妻孥如肅賓客，金玉君子也。

林文 嘉靖十八年以歲貢授鉛山訓導，敦朴古雅。事繼母以孝聞。居官善教。祀名宦。

盧岐嶷 字希稷。舉進士，除歸安令。當賦重役繁之區，爲之節約均融，以貲產高下相配隸。人爲戶部郎。嘉靖庚戌，北虜直犯都城，下保定，巡撫楊守謙領兵入援，岐嶷運芻茭往來營中。時烽火徹大內，天子懸賞格：得一胡人首，予百金。保定兵皆請戰，楊禁弗許，岐嶷謂楊曰：「今主上震怒，士卒願決死，奈何禁之？」楊曰：「吾孤軍無援，士未見大敵，若輕舉爲所襲，則大事去矣。」岐嶷曰：「若大營不動，而以偏師獵其游騎，若何？」楊無以應，持疑不決，以及於禍。丁外艱，服除，補兵部武庫主事，歷車駕武選郎中。坐糾舉吏不法，自劾失察，出補寧國府通判，轉廣信府同知，遷江西按察僉事。岐嶷自其爲郎

時，精意讀書，及蒞官江西，值境內多壘，乃有治軍之材。其同知廣信時，適廣東叛卒八百人，自福建道鉛山，聲言欲掠永豐。永豐無城郭，百姓逃入山，爲他盜剽掠。岐嶷召坑兵千人爲中軍，扼其來路，選丁壯三千，分兩翼，從傍夾攻，募力士數十，爲軍鋒，持白挺，賊趨南昌，竟敗。其僉事時，分司九江。辛酉，嶺南寇盜大人，屠戮湖東西，囚殺憲臣，焚廬舍，斃墳墓。撫臺檄岐嶷攝湖西守巡事，令其屯兵袁州。岐嶷乃趨之臨江，出牛酒犒守江卒，整舟艇，備火器、藥弩。下令士：賊至，發擊之。如是者數，殺傷其十餘人。復用屯軍，施曲鉤，二人持竿鉤其旗卷之，而持兵者繼之，連奪賊旗，擒酋二人，殺傷二百餘人，賊潰去。泰和縣謀報，廣寇號「震天雷」者，沿途殺巡尉戶將，湖西震驚。岐嶷勒兵趨泰和，繇泰和趨樟樹鎮，下新淦，邀其來路。日中至河均，督兵攻之。食頃，生擒百餘人，餘斬馘皆盡。居頃之，廣寇數千屯陽湖，焚掠樟樹鎮，約期攻豐城。又一支數千人，將繇撫州犯進賢。時二邑皆告急，一日數至。岐嶷曰：「進賢城堅，無兵不害。豐城無城，莫可守也。」檄豐城備二萬人餉，督瑞昌兵逆流上，約豐城令具輕舟數十，乘夜發抵樟樹鎮。諜者至，言賊今日屠牛置酒，令婦人行酒，大歡飲。岐嶷大喜，蓐食赴陽湖，五鼓至，賊尚未覺。賊五千人，分爲五營。官兵、鄉兵僅千人，賊衆我寡，攻其東、中兩營，我兵已盡。岐嶷下令：自一里至十里，各設火炮，發則俱發，使賊莫測多寡。未明，鼓譟進，賊倉卒出拒。岐嶷預令士爲小袋數百，裝石子繫之，既合戰，賊營高數尺，士盡出袋中石，仰高投擲，皆應手倒，生擒劇賊四百餘人及其酋葉子青、謀主陳用等，斬馘千餘級。餘黨遁入撫州，可二百人。岐嶷復屢疑亂之，賊晝防夜伏，不得靜喘息，盡遁去，臨、吉、撫、建盜皆絕。壬戌，大征饒寇張璉，有旨發江西兵夾攻，撫臺復令岐嶷護軍。撫臺張寅用岐嶷計購璉，得之。復以偏師攻降林瓚七十二寨，通汀、漳道。又以舟師邀袁三餘黨於鄱湖，斬戮無遺。癸

亥，委署贛州兵備，適巢賊萬人出劫，移檄招諭，皆悔禍聽撫。凡岐嶷先後平賊功，中外交薦，輒爲嚴相子世蕃所抑，竟叙遷雲南左參議，攝行安普守道事。時易門、嶧峨、昆陽、南安、新化五州縣賊首阿方、李向陽等，聚衆二萬，攻圍易門所城，岐嶷出師擒之。尋甸狂夷積歲寇盜，岐嶷復計擒其巨首虧遮，連戰十餘日，殺賊役數百家，破其巢穴，餘黨乞降。遷雲南右參政兼臨安兵備副使，獲賊部落萬人，頻出抄掠，爲臨患。岐嶷牒兩臺發土兵三千，自將邀捕之，先後獲賊酋七人，從賊三百。丙寅，鳳繼祖叛，招殺土舍。鳳誥總管鄭竑等七十餘人謀據武定城，朝命討之。巡撫呂光洵檄岐嶷與副使張天復、楊守魯分道進，而以張僉事澤督尋甸兵守普渡河，截其走道，咸聽岐嶷節制。澤獨不聽岐嶷，先發與戰，被獲見劫質，及岐嶷兵至武定城下，賊殺澤，從直勒渡江去，渡訖悉瘞匿其舟，遁入會里州，依阿茄匿山箐山中。岐嶷收軍入城，計捕賊黨殺澤者，斬以徇。因與張副使遣人之元謀縣金沙江，採木造船，以備渡江。度里屯兵開通餉道，部署已定，懷疑莫發。岐嶷白光洵自督之，行至直勒江，破直勒洞，得洞中夷，知繼祖所埋舟處，發而乘之，順流下直勒。先得繼祖於會里州之青鷄羅山中，殺之，函首軍門，剖其心以祭張僉事。師還，光洵獨歸岐嶷功，而同事者心嫌之。丁卯，轉貴州按察使，竟爲嫌者所中，罷。岐嶷居自爲言：「凡人尋常蒞官，喜怒過差難無，若兵戎大事，必須行一不義，殺一不辜，雖立致萬戶侯，不爲，然後爲天地鬼神所佑。」又言：「功賞欲厚，糧餉欲核。厚賞勸功，雖費有限。漫糧不核，所冒無涯。」滁陽胡松爲江西巡撫，語人：「方今文武，習兵可當緩急者，教練節制，莫若俞虛江；紀律嚴明，莫若譚二華；若料敵設章，能以少禦衆，則惟盧君。」虛江者，俞都護大猷。二華者，譚大司馬綸也。《臨江志》言岐嶷爲臨江人，殺賊料敵，設機刻期調遣，疾若風馳，秘寂莫窺，薄暮惟聞傳令饋食，旦未及炊，俘馘相望於道，市里晏然。其讚頌

之如此。岐嶷讀書，倣秦少游《精騎集》，編輯《金膏瓊液》、《鈎玄類纂》等書。汪司馬道昆故爲同舍郎，以古文辭相砥，有遺脂香油皂於汪者，汪問：「在古何云？」岐嶷曰：「唐人謝賜口脂、豆澡，此二物也。」宴席有糖獅象，復問：「於古何云？」曰：「漢光武禁倪糖，不許高大，此是矣。」其少參雲南時，部使者梓《大學衍義補》二書，選縣令博士校讎，至「正先死，趙高橫」，博士繙《二世紀》、《李斯傳》無「正先」，疑有誤，部使問岐嶷，岐嶷曰：「是在《漢·京房傳》，言秦時有正先非，刺趙高，不勝而死。高威自此成。」部使亟稱其博雅。時海內作者並起，自詫先秦、兩漢，岐嶷曰：「太史奇偉變化，非專侂屈贅牙，今欲學子長，乃誤作樊宗師。」子穎，舉鄉薦，以慧孝稱，碩，見下。

碩 字伯立。授南寧府推官，仁明清慎，力雪久繫冤獄。淮稅兩江，罷檳榔息子錢。擢戶部主事，卒。碩未第時，常發粟賑饑。得第後，燔券免貸。卒，而里巷思之。

劉邦憲 嘉靖二十七年貢士，任高要訓導。奔母喪，途次遇劇盜，詢知爲邦憲，能誦其試文甚悉，歎服護歸。人謂其文章信義行於盜賊。陞東莞諭。

劉一檉 字士奇。授大理寺評事。以疾乞歸，卒。能文精醫，嚴分宜病，請之醫，不應也。

唐堯欽 字寅可。授中書舍人，選工科給事中，轉兵科左給事中、刑科都給事中。有錦衣鄭承憲，乞鄭福葬地。福，皇貴妃祖也。上給與墳價五十兩，堯欽疏言：「祖宗成憲，妃祖無與葬之例。祖既如此，父當如何？妃祖如此，后祖謂何？」雖上意難回，貴戚肅然憚之。司禮監張鯨估權贖貨事，上罪，諸黨附者邢尚智等誅遣有差，念鯨侍奉多年，姑予供事如故，堯欽復抗論之。時與同官李沂同日疏上，上大怒，杖沂，而姑宥堯欽。陞太僕寺少卿，遷南太僕寺卿。歸，居家儉約好禮。卒，賜祭葬。

林秉漢 以御史巡按廣東，言楚宗事，被謫以卒。

#### 南靖縣〔四〕

##### 宋科第

大觀三年己丑 許光亨舊屬龍溪。

建炎二年戊申特奏名 許宗彥舊屬龍溪。

紹興十八年戊辰 許登宗彥子。

##### 皇朝科第

舉人 進士子、午、卯、酉屬舉人，辰、戌、丑、未屬進士。

洪武十七年甲子 蔣復初府學。 黃仁義

十八年乙丑 黃仁義

二十九年丙子 盧遂 黃功應天中式。

永樂三年乙酉 許英

六年戊子 余朝生

九年辛卯 李貞 賴清 江澄 張驥 盧閏

十二年甲子 許敬

十三年乙未 李貞第二人。 江澄

十八年庚子 韓琰

宣德七年壬子 李嶠

正統九年甲子 張寬 余慈 王玘 蔡麟順天中式。

十三年戊辰 王玘

景泰元年庚午 楊參

二年辛未 張寬

四年癸酉 陳爵

六年壬午 李榮

天順八年甲申進士先是，七年癸未春二月，會試場屋災，詔移秋八月，至是春三月始廷對唱名。

陳奇

成化元年乙酉 林蟾一作侗，又作塘。

七年辛卯 陳懋 林惟聰 陳昂順天中式。

十三年丁酉 張表寬子。 王麟

十九年癸卯 陳佐爵弟。

弘治十一年戊午 戴文祚

十七年甲子 韓珪

正德十四年己卯 吳悌府學。

嘉靖二十五年丙午 黃美中府學。



三十一年壬子 許國忠儒士。

三十四年乙卯 王命爵

四十年辛酉 張極

萬曆七年己卯 吳宗熹 許文俊府學。

八年庚辰 吳宗熹會試第七名。

十三年乙酉 羅廷輯

十六年戊子 盧奎順天中式。

二十五年丁酉 楊聯芳第二人。 許邦壁

二十九年辛丑 楊聯芳

三十一年癸卯 胡士芳

四十年壬子 楊志清 林曾

四十三年乙卯 陳士奇

四十四年丙辰 俞曰都

四十七年己未 林曾

貢士賢者雜見列傳中。

有傳

何晚齡 李貞 王玘 楊參 陳爵 林惟聰 吳悌 王命爵 吳宗熹 宋常清

何晚齡 洪武二十五年歲貢，同知黃州府事，有政聲。擢知府，廉明果斷，九載滿去，行李蕭然。

李貞 志行超群，文章振藻。永樂十三年及第第二人，授翰林院編修。成祖命諸儒臣編輯《四書五經性理大全》，貞與焉。書成，賞賚有差。後以不肯預修佛書，貶高州府教授，卒。

王玘 字弘璋。授禮部主事，歷戶部員外郎，監督淮安糧儲，出納公明。有中使同事擅權侵利，玘欲按之，中使懼，乃止。遷郎中，九載，擢雲南右參政，以親老乞終養，三疏得請，詔賜寶鏹數百。父沒，以哀毀成疾，相繼而逝。

楊參 授南豐知縣。講學好古，清勤自勵。人覲，以母老辭。既遷貳守矣，竟不就官。母沒，廬墓，終身不跡公門。

陳爵 字良貴。授揭陽知縣。歲庚辰，嶺南山海寇並起，賊酋魏崇輝、羅劉寧各據要害。爵親詣賊舸諭之，不從，乃下令撤民廬舍，取其材木外匝，從中築城濬池。未幾，賊大至，環甲登陴守之，月久不能下，賊皆遁去。已，朝廷勅閩藩督諸軍來討，爵復率民兵應之，賊酋相繼投首。事聞，進階六品，掌縣事。尋擢韶州知府，以憂歸。服闋，改高州，未一載，卒官。輿觀過潮，潮民奔奠，立祠祀之。

林惟聰 少孤，承慈訓，力學不倦。任南昌府推官，有廉能聲。已，課最，行取矣，以不得迎養母，朝夕思慕，比見寧藩有逆志，即解組歸。人稱其慕親之孝，見幾之哲。

吳悌 字大友。任宜春教諭。擢令興寧，簡靜愛民，持廉執法。監司以私意故出人，堅執不從，坐左遷常州府教授。陞太常寺博士，致仕。悌三世同居，一家雍睦。在常州官舍，有猫相乳之瑞。唐荆川順之，素重其人，因為作《續猫相乳說》。

王命爵 字仁卿。父教諭良佐，嘗陷賊，命爵入賊巢求代，賊感其孝，兩釋之。初授密縣教諭，遷廬江令、南京兵馬、韶州同知。從征羅旁，築西林城有功，加四品服俸。陞太平知府，轉兩淮鹽運使。以母喪歸。復除河東，歲歉，捐俸賑饑。河東舊有鹺庠，勤課督士，連掇二解。致仕家居，布袍蔬食。年八十餘卒，稱貸以斂。

吳宗熹 字伯焜。年十九舉於鄉，尋成進士，授海寧令，以儒飭吏，拊循惠愛。顧少年醇質，不能脫上官色，竟改景州學。還國子丞，一意修古。徙工部主事，屬修九門，城工日手一編，吾伊不輟，工竣而詩亦成帙，出示客，笑曰：「此吳司空城旦書也。」辛卯，主粵西試，所錄多名士。還朝，卒，年二十三。宗熹爲郎時，與予及其鄉人戴燦亨融、永春李開藻叔玄相善，一意揚挖風雅，所撰述，穠縟芳潤，才情有餘，天假之年，當追古矣。

宋常清 以貢，萬曆三十四年爲歸化學諭。品格端方，學行超卓，重德行，後文藝，亶亶誘迪，常若不及。

#### 漳平縣（五）

##### 宋科第

治平四年丁未 劉弼舊屬龍巖。

元祐六年辛未 劉棠弼子。

有傳

劉棠

劉棠 字君美。元祐間解元，登進士。歷樞密院編修，編成哲宗御書，累兩浙路常平提舉，數歷中外，有善政。乞致仕，得旨，許省親。力乞祠，尋致仕。棠與進士所試《論舜不窮其民策》、《六》《孔孟勸農》二篇，場屋以爲楷式。朱子嘗言：「劉子澄言本朝有四篇好文字：《太極圖》、《西銘》、《易傳序》、《春秋傳序》。因傷時文之弊，謂張才叔《書義》自靖自獻於先王，胡明仲醉後每誦之，劉棠《舜不窮其民論》，爲歐公所喜。」

皇朝科第

舉人 進士子、午、卯、酉屬舉人，辰、戌、丑、未屬進士。

成化十三年丁酉 陳王振

嘉靖四年乙酉 曾汝檀以貢士，應天中式。

十一年壬辰 曾汝檀

三十年壬子 陳朝烈

三十四年乙卯 陳見可

四十年辛酉 陳九叙 陳九仞九叙從弟。

隆慶二年戊辰 陳九仞

萬曆二年甲戌 陳九叙

四年丙子 蔣時馨以貢士，順天中式。

五年丁丑 蔣時馨

四十一年壬子 陳三經

貢士賢者雜見列傳中。

有傳

陳雍 黃斌 曾元清子汝檀 陳九叙 蔣時馨 林松聲

陳雍 宣德初以歲貢人胄監，除戶部主事，陞員外郎。爲人孝友，居官清慎。

黃斌 弘治三年繇歲貢歷南寧、高州二府推官，有善政。早退不仕，安貧守素。

曾元清 正德中以歲貢知利津縣，清勤介廉。以子汝檀貴。自陳致仕，敦尚孝義，不跡公門。

汝檀 字惟馨。以貢人南雍，受學於湛文簡若水。既成進士，授都察院都事。時文簡爲禮部侍郎，

朝夕親炙，及其轉南禮部尚書，汝檀亦求改南，從之，遂遷南戶部員外郎。歷禮部郎中，擢知撫州府，首建

陸象山、吳草廬、吳康齋三賢祠。立五經閣，教鄉約，月朔臨視，獎善勸農。政暇，與諸生講明正學。以拂

當道意，調南寧，治如撫州。時安南內亂，久不貢，廷議屢勅行勘，藩臬難其事，檀卽請行。未幾，疏乞終

養。既釋服，起補安慶知府。景王之國，道經郡，當道議拆民居爲行宮，汝檀移於城東空闊處。及王至，

供億整辦。尋陞山東鹽運使，逾年卒官。汝檀篤信文簡之學，以戒懼謹獨爲本，勿忘勿助爲功。所至，四

方士多從之游，號廓齋先生。

陳九叙 初爲刑部主事，歷員外郎中，出守處州，左遷驍司。尋丁艱。起補桂林府同知，久之，歸。

九叙少學曾汝檀之門，以易簡中正爲宗。沈古林、王東涯、耿楚侗諸先輩咸推重之。

蔣時馨 字德夫。初授新喻令，不爲當道所喜，調嘉魚，稍遷南廷評，歷北京吏部考功、文選二郎，謝病歸。時馨始爲令時，清慎自守，人莫之知。廷評南都，與鄒元標、潘士藻諸公研解磨勵，名繇此起。及家居，李材、孟誠謫戍海上，唱道講學，時馨復師事焉。

林松聲 萬曆中教諭光澤，資身簡約，不較贊饋，稱貸貧生，常不責償。

平和縣〔七〕

皇朝科第

舉人 進士子、午、卯、酉屬舉人，辰、戌、丑、未屬進士。

成化元年乙酉 吳瓌舊屬漳浦。

五年己丑 吳瓌

弘治八年乙卯 杜表舊屬南靖。

嘉靖十六年丁酉 謝瑚

三十一年壬子 許鼎以貢士，應天中式。

四十年辛酉 蔡應吾 柳伏昭

四十三年甲子 李文餘 李繼岐

四十四年乙丑 李文餘

萬曆元年癸酉 張佐治以貢士，順天中式。

二年甲戌 張佐治

十年壬午 謝綱解元。本縣人。 張一棟

十三年乙酉 吳啓蒙 張居方 李棠

十四年丙戌 張一棟

十九年辛卯 李志弘 陳廷對

二十二年甲午 陳起龍 曾萬選

二十五年丁酉 許學純

二十八年庚子 李宸詔

二十九年辛丑 張居方

三十一年癸卯 曾喻門 李時啓

三十四年丙午 曾注

三十五年丁未 李時啓

三十七年己酉 吳養中以貢士順天中式。

四十年壬子 陳揚美 張士良

四十七年己未 張士良

貢士賢者雜見列傳中。

有傳

張寬 吳環 杜表 李世浩子文察 朱孔陽 張佐治

張寬 字弘周。舉進士，爲御史。天順元年，以劾忠國公石亨，忤旨下獄。值天變得釋，出知安定縣，禦寇有功，卒於官。寬苦學好義，爲德於鄉，有開陂作圳之功。兄周民，見韋布。

吳環 字仲偉。授南京駕部主事，進員外郎。部檄催督應天等郡賠償種馬，奏蠲其不能償者。轉庫部郎中，擢貴州參議，以平夷功，遷雲南參政。奉勅整理鹽法，嚴私鬻插和之禁，客商鬻至，鹽法復通。陞本司右布政使。土酋黎姓者，殺其叔，奪之位，時議欲寬假之，環執不可，竟置法。以外艱去，卒於家。環性質儉，與鄉人處，無異隱約時。卒之日，遺棄蕭然，邑里稱歎。

杜表 字廷標。知金谿縣，以清慎誠懇稱。正德壬申，江西巨寇攻城，樹木柵，募勇上，設方略，與民死守。丁外艱，服闋，補任海豐，加意撫綏，流移復業。後遷廣東都司經歷，以母老，乞歸養。子价，教諭。

李世浩 字碩遠。正德十五年，繇歲貢授南海訓導，遷教諭，陞寧波教授，所至得士心。致仕歸。世浩敦樸好古，少游蔡文莊門。既而講王文成、湛文簡之學，創家規，正宗法，修鄉約，建聚賢堂，設義倉，倦於陸族錫類。子文察、文餘。

文察 字廷謨。究心樂律，家居構一樓，上懸律呂，以審氣候。或簞笠坐屋角，頽櫛風雨，夜而假寐，饑則家人以乾糲縋絙上。如是者三年，繇是知黃鍾損益之分，歷撰職掌之謬。嘉靖中，以歲貢謁選常州倅，因奏樂律改章數萬言，世宗大悅，卽授太常寺典簿，命禮部及太常郊廟祀樂如其議，酌行之。久之，欲拔爲少卿，不果。當外遷，太宰李默擇出守磁州，謂磁邇京輔，上卽急召，可旦夕至也。文察往，廉節自



勵，以內艱歸。補晉州，擢思恩同知，解組歸。文餘，仕工部郎。仕途屯蹇，顧其立心忠亮，事師恭謹，久久不易。

朱孔陽 字玉輝。嘉靖九年，以歲貢授嚴州訓導。丁憂，復補杭州，陞感恩諭，卒於官。所至以身教率人，餽遺一無所問。

張佐治 令高淳，以治行調繁長興、高明二縣。嘗承檄丈田，屏驢從，徒步原阪間。遇歲旱，步禱。還寶慶同知。丁艱，服除，再補紹興，擢金華守。再丁艱，起補寧波。行一處，見蝌斗無數，夾道鳴噪，皆昂首若有所訴，佐治異之，下輿步視，蝌斗皆跳躍爲前導，至田畔，三屍疊焉，佐治挈視之。其下一屍微動，湯灌之，復活，曰：「我，商也。道見二人肩兩筐適市，皆蝌斗，意傷之，購以放生。二人曰：『此皆淺水，放必見獲，前有清淵，此放生池。』我三人從之至此，不覺斧出焉。二僕有腰纏，求之不獲，必解金與購也。」佐治立命捕之，人金皆得。還寧紹兵備副使，尋轉參政，備兵天津。時朝鮮有倭警，佐治開關屯田，他諸綢繆甚具。權璫重取葦稅，力爭之，得減十之五。以勞瘁卒官。佐治天性悃悃，而高潔有特操。歷知三邑兩郡，單車之官，垂橐歸里。始爲令時，淳人未知，及丞紹興，嘉譽流聞。歲大計，以卓異賜宴。及病革，僚屬省候，布被粗席而已，莫不歎服其廉。

〔校記〕

〔一〕「南靖縣 漳平縣 平和縣」九字，各本原脫，據本書體例補。

〔二〕「長泰縣」三字，各本原脫，據本書體例補。

〔三〕「式」字，各本原脫，據文義補。

〔四〕「南靖縣」上，各本原衍「漳州府」三字，據本書體例刪。

〔五〕「漳平縣」上，各本原衍「漳州府」三字，據本書體例刪。

〔六〕下文作「舜不窮其民論」。

〔七〕「平和縣」上，各本原衍「漳州府」三字，據本書體例刪。

# 閩書卷之一百二十一

英舊志 縉紳

漳州府 詔安縣 海澄縣 寧洋縣 鎮海衛(一)

詔安縣(二)

宋科第宋未有詔安，諸進士皆割地後遷其里居列名。

政和二年壬辰 翁待舉舊屬漳浦。嘉靖、萬曆漳州二志皆云待舉知興化軍，而皆以《興化弘治志》人待舉傳中，不知知興化軍者乃汪待舉，西安人，《舊志》明載其知興化。而此則姓翁。又《通志》並無傳。而後知瓊州，瓊州人又不載之名宦。誤無疑也。

紹興二十一年辛未 陳景肅舊屬漳浦。

慶元二年丙辰 楊仕訓舊屬漳浦。

嘉定十三年庚辰 楊仕謹仕訓弟。

淳祐四年甲辰 陳寯立景肅孫。

咸淳四年戊辰 陳登龍舊屬漳浦。

有傳

陳景肅孫植 楊仕訓

陳景肅 字仲和。師事高登。舉進士，授仙游令，薄賦輕徭，旌善伐惡。縣有宿盜藍飛仙，潛劫鄰郡。獲其黨，誅之。有陳亨運者，父母沒，廬墓三年，召而旌之粟。官至朝議大夫，知南恩州。孫植。

植 字寢立，以字行。幼學於世父安卿。十八，以祖澤補太學生，調龍溪令，轉漳州司理。淳祐四年，登進士，提督嶺南海路兵馬。帝昺浮海，植提領海舟，見事危，斷維出港，自以六舟泊梅嶺，收亡命，馳檄諸蠻，圖立宋後。聞世傑覆舟，元人索捕急，遂變姓名，匿於大芹、白華、九侯間。臨終，命葬海濱，南望崖山。弟格，爲宋海舟監簿，帝昺既亡，從容就死，忠義形於《六詠》，植斂袍笏招靈，葬於漸山書院。今漳浦人並祀之。

楊仕訓 字尹叔。朱文公守漳，延置賓賓齋，與共學。時年最少，醇靜警敏，體聖賢遺書而躬行之。舉進士，調古田尉，再調海陽丞，政尚寬和。遷永福令，推誠待物，留意興學。湖廣總領請於朝，願得廉靜吏董軍餉，遂監鄂州糧料院，至舉荆襄兩路軍儲以屬。仕訓慨然任責，上下相慶爲得人。未踰月，遽卒，友人黃幹、陳淳皆深痛之。仕訓蚤孤，事母至孝，比死，喪葬盡禮，廬墓三年，哀毀慘怛，鬚髮爲白。初，建陽游九思亦嘗爲古田尉，仕訓文行政事，與相伯仲，九思亦常稱之。

### 皇朝科第

舉人 進士子、午、卯、酉屬舉人，辰、戌、丑、未屬進士。

成化四年戊子 許潛舊屬漳浦

弘治十七年甲子 李旦

正德二年丁卯 許判潛子。

五年庚午 許選潛孫。

六年辛未 李旦

十四年己卯 葉璽

十六年辛巳進士 葉璽是年以武廟南巡故，(三)改庚辰爲辛巳。

嘉靖十年辛卯 辟雍第三名。廣東中式。 陳天資第五名。

十三年甲午 陳進

十四年乙未 陳天資

二十八年己酉 胡文 沈喬楠廣東中式。

三十五年丙辰 胡文

三十七年戊午 黃見可

隆慶元年丁卯 沈水

四年庚午 胡士鰲文子。

萬曆元年癸酉 沈鈇

二年甲戌 沈鈇

五年丁丑 胡士鰲

十年壬午 蔡肇慶

十一年癸未 蔡肇慶

十三年乙酉 張敏

十六年戊子 林而興

二十五年丁酉 胡士意貢士，順天中式。

三十四年丙午 許琯

四十年壬子 林日煊而興子。

四十一年癸丑 林而興

四十四年丙辰 林日煊

四十六年戊午 張作範敏子。 沈起津鈇子。

薦辟、人才賢者雜見列傳中。

有傳

陳汶輝 許潛子判，孫選。 葉璽 胡文子士繁附。 蔡方平 林騰

陳汶輝 字耿光，元光之後。父君獻，當元時，調明經，爲南勝縣訓導，家教有方。汶輝，幼通賓儒，稽經、子，達武書，尤邃天文地理。結廬南阜，磨礪師友。比壯，游燕、越以觀群雄。嘗與趙子貞、柳舜舉談笑於軍門六七載，又與劉伯復、余叔紳登臨衡湘。尋奉書東濟，以諭降賊。以真主未興，乃歸隱於越，結雲庵初溪潭上，樹種山果、寒瓜秋蔬，命僮嘯似，卽景賦詩。及我太祖渡江，秦元之、陳遇交薦之，因降書徵辟，時張士德聘幣亦至，汶輝並不敢應。太祖復使徵之，比之伊、呂、孔明。汶輝欲往，門生陳原震、

彭修、楊允恭、朱仲舉咸勸留之，繼而徐達復遣使檄起，亦復不至。太祖既定天下，遂以經明行修應詔，使大臣較其學行，第一榜，曰八閩元士，而陳原震亦與焉。頃之，原震見法律森嚴，悚懼乞歸，惟汶輝條論十事，詞氣英爽。授禮科給事中，遣如蘇州，按視民瘼吏弊。還奏：「吳松閬數千里之地，墟港所泊無犯，貨食物悉有征稅，此皆承襲元污，未盡更刷，乞弘《大學》生財之規，體《孟子》仁義之訓，一切掃除之。」復疏言：「自古文武並用，所以靖禍亂、綏太平者，未嘗有縉紳、縉流雜居同事可相濟也。臣觀勳舊耆德思欲去位，而縉流憊夫加以譏間，如劉基、徐達之見疑，李善長、周德興之被謗，視蕭何、韓信之危，相去不遠。府生、太學生之斥，視宋臣詠檜貽譏之逐，能幾何哉？伏願自腹心以至耳目啓行喉舌之司，皆處以德行文章之彥，則天下之賢可舉而收，天下之治可漸而成。」復承制奏論政，疏請法程灝。所陳十事，言之至再。太祖謂其志大言迂，不達時變，徒泥成語，紛更朝事。汶輝因自劾，不許，以爲大理寺丞。適有疑獄，又上疏曰：「伏覩十二月大理僚屬所評張廉使、李知府諸刑，奉有內旨，不敢准理。臣聞張某在山東因杖一僧人，李某爲知府因忤一屯道，翰林學士只撰文犯諱忌字，皆非大奸惡，刑部及本寺僚屬因得內降，但欲纖獄，夫廉使、知府非一考六年可至，必疊課積資以得。伏惟念得賢之難，少加愛惜。」既，奉詔恤刑獄於山東、浙江。歸，轉本寺少卿。李善長之獄，汶輝上書力爭。善長死，太祖思汶輝疏，遣內臣召人，賜宴，與侍臣卽景賦詩，名「黃花宴」。宴畢，仍以鞍馬賜歸。一日，太祖問：「卿幾子，朕當擢用。」汶輝對曰：「臣有三子，長在太學，次蒙吏部選除序班，季尚幼。」太祖嘉賚，賜白金、綵緞，并及三子。汶輝挈子人謝，復留賜宴。因問閩中藥物，汶輝誤對稱「俺」，給事劾汶輝倨傲無禮，汶輝謝罪，乞休，不許。頃之，山東張憲使某，不奉勅諭，鞭笞內戚，太祖欲處以大辟，汶輝力爭，封還御旨。太祖怒，遣御前指揮押赴刑部，行經

金水橋，投水死。太祖聞而悼之，詰指揮胡不救，遂坐指揮死，製文諭祭，賜葬鳳凰山，時年九十餘矣。所著有《南阜集》。

許潛 字時昇。知平樂縣，不隨家累，盡心職業，剖決明公，訟息民服。親爲諸生講解經義，招撫洞獠，遂免戍守。卒於官，民哀之。子判。孫選。

判 字資獻。通判瑞州，嘗舉「催科中撫字，刑罰中教化」一語以爲名言，時時誦之。治將六載，上下悅服。擢貳辰州。辰雜蠻瓠，悉安教化。嘗著《家禮》及諸書附註，以相發明，而約歸於《儀禮》、《禮記》之義。爲《禮圖》及《慎終集》、《歐蘇譜例》、《古深衣訂》，皆可傳述。

選 字舜徵。署嵯縣、上饒二學事，端己教人。典河南、陝西試事，拔識多名士。擢潁州太和知縣，請蠲泗州無徵米若干石，塞學宮之不利形家者。後倅岳州，致仕。爲人天性謙和，自童至耄，不忤不訾。年踰九十，當道詣宅，修養老之禮。

葉臺 字世暉。少孤力學，初爲漳浦縣學生，上書乞追制母服，廬墓三年，有馴虎之祥。舉進士，授南城知縣，有惠政。歷河南僉事、廣西參議，致仕。先是，鄉人奏設詔安縣，臺在京師，有宣言之力。及得設縣，版籍爲漳浦吏胥淆亂，復言當道正之，縣人被其利。

胡文 仕按察副使。敦朴有古風，詔人敬重之。子士鰲，守杭州，調登州二守，遷守青州。礦璫陳增暴橫三齊，益都令吳宗堯不勝憤，上章，特爲增所反嚙，名之爲墨。有詔逮宗堯，士鰲歎曰：「吳令強項，豈墨也哉！」資其行，護其孥出境，申揭政府部院，爲之白冤。增聞，遂併搆焉。有旨，降河東鹽運同知，竟歿。



蔡方平 萬曆六年以貢知淳安。拯荒捕盜，修隄疏濬，恬澹清介，有譽於鄉。  
林騰 萬曆中以貢任惠安訓導。介直矜重，不類今人。

#### 海澄縣〔四〕

宋科第 宋未有海澄，諸進士皆割地後潮其里居列名。

熙寧六年癸丑 謝伯宜

政和五年乙未 顏晞孔

重和元年戊戌 謝程年伯宜子。

紹興二年壬子 顏晞哲晞孔弟。

十五年乙丑特奏名 顏大猷

三十年庚辰 林文蔚

特奏名 謝堯年伯宜子。

乾道五年乙丑 顏敏德教授槤玄孫。 蔡易

淳熙八年辛丑 顏質槤玄孫。

紹熙元年庚戌 謝明之伯宜孫。

慶元五年己未 蘇竦

開禧元年乙丑 顏敏則敏德弟。

嘉定元年戊辰 楊志

七年甲戌特奏名 顏贊大猷子。

十三年庚辰 蘇溥竦子。

十六年癸未特奏名 鄭申秀 顏幾敏德子。

紹定二年己丑 顏戴健三世孫。

特奏名 顏貢贈朝奉郎公衮子。

五年壬辰 顏純幾子。

淳祐元年辛丑 顏復之質子。

薦辟、人材、澤蔭賢者雜見列傳中。

有傳

顏慥孫晞哲，玄孫敏德，五世孫子幾，（五）六世孫復之。

謝伯宜曾孫明之。

蘇竦 楊志 鄭申秀 顏公衮

顏慥 裔出水春。初與蔡襄讀書，以文章德行相砥。慶曆間，襄爲郡幕，辟本州教授。襄遷去，慥遂卜隱於青礁，倡明道學，教授生徒。孫晞孔、晞哲，俱登第。曾孫唐臣，見韋布。玄孫敏德。五世孫幾。六世孫復之。

晞哲 舉進士，歷同安丞。時行經界法，被檄古田縣覈實，官吏服其公平，立祠，與其邑宰饒公並祀之，作碑曰「饒顏碑」。改秩，知福清，監司、郡守列薦於朝。

敏德 字克和。知循州，除邕管安撫，官至朝奉大夫。邕數有峒寇，敏德遇以威信，卒不敢犯。

殲 字子治。歷事多在海外，以安黎蠻有功，就改京秩。海外之民呼之爲爺。諸峒剽掠昌化軍，討捕平之。詔改昌化爲南寧，使守之，就除瓊管安撫，奏變差役爲僱役，及請舉士依四川例，與殿試陞等推恩，士民懷焉。

復之 字子開。有能賦聲，試禮部。尋補太學，已，遷太學錄，調惠陽教授，再調湖南庠幹，卒於官。爲人貌溫氣和，不苟訾笑，輕財好義，表裏如一。侍郎葉某，薦十賢於朝，復之其一也。

謝伯宜 字希聖。知長興縣，開水利，蝗不入境。遷奉議郎，賜緋，官至奉議郎。歷任凡六司，議蠲者四，平反爲多。秩滿家居，疏通九十九坑水，築海成田，繇是八、九二都皆成沃土。都人以其爲里中開衣食之源，與陳太保並祀。陳太保者，名香，亦爲其都人開水利者也。曾孫明之。

明之 字惟學。調雷州教授，被檄攝守，取印函之，不視郡事。後守至，以此重之。及倖潮陽，攝郡三年，以廉平稱。尋知邕州，秩滿還家，詩酒自娛，與陳經、楊承祖爲真率之會。

蘇竦 字廷儀。調肇慶府推幕。博通經史，玩心理學，集先儒《詩》、《易》、《三禮》傳，折衷己見。履行純篤，士流慕之。子溥，知光澤縣。

楊志 字存誠。令長溪，視篆數月，百廢俱舉。砌王頭陀、楊梅二嶺，建金波橋，民名其嶺及橋曰楊公。暇輒吟咏自樂，邑人傾慕之。

鄭申秀 字實之。少力學，三預鄉書。初調南海尉，次調陽江令，歷古田、懷安，多有政聲。

顏公衮 字鼎卿。以父澤補官。紹定間，令興寧。時強寇陳三谿、羅勳天迫境，公衮與主簿徐千能出諭，賊怒不聽，公衮與千能厲聲罵之，皆被執，死於文廟之前。邑人哀而祠之。詔贈朝奉郎，官其子

貢。後貢特奏進士。

皇朝科第

舉人 進士子、午、卯、酉屬舉人，辰、戌、丑、未屬進士。

洪武二十年丁卯 陳炯舊屬龍溪。

二十一年戊辰 陳炯

永樂六年戊子 盧琦府學。

十五年丁酉 王昭府學。

十八年庚子 張紳府學。

宣德七年壬子 林雍府學。

景泰元年庚午 陳宣府學。

四年癸酉 陳宏

大順三年己卯 沈源

六年壬午 張至忱 楊忱府學。舊俱屬龍溪。

八年甲申進士先是，七年癸未春二月，會試場屋災，詔移秋八月，至是春三月始廷對唱名。

成化元年乙酉 林謙府學。

十年甲午 曾瑛府學。

十六年庚子 林晏

陳宏 沈源

十九年癸卯 謝傑

弘治二年己酉 陳謨宏侄。府學。

八年乙卯 陳魁 蘇霄並府學。舊俱屬龍溪。

九年丙辰 謝傑

十七年甲子 吳元

正德二年丁卯 林浩

五年庚午 張賀

八年癸酉 陳英

十一年丙子 陳令 鄭要並府學。謙至要，舊俱屬龍溪。

十四年己卯 陳遷宏孫。府學。

嘉靖七年戊子 高寬府學。舊屬龍溪。

十九年庚子 陳師曾遷子。

二十八年己酉 陳師旦宏曾孫。府學。

三十四年乙卯 黃文豪府學。 蔡楠 江汝松

三十五年丙辰 黃文豪

四十年辛酉 林武府學。舊屬龍溪。

四十三年甲子 林嘉春舊屬龍溪。

隆慶元年丁卯 許玉成 李維岳府學。

四年庚午 李文晰以貢士，順天中式。

萬曆元年癸酉 柯挺解元，順天中式。

四年丙子 陳映 陳石卿府學。

七年己卯 蘇大襟府學。 劉期梅原名期中。

八年庚辰 陳石卿 柯挺 陳映

十年壬午 黃一龍文豪子。府學。 郭子弘 溫如璋 李良材 柯完甫 郭應時府學。 蔡騰蛟 許

一敬以貢。順天中式。

十一年癸未 許一敬

十三年乙酉 蘇民俊 馬如龍

十四年丙戌 郭應時

十六年戊子 靳一派 高克正 潘廷禮府學。 倪大器順天中式。

十七年己丑 黃一龍 溫如璋

十九年辛卯 李甫選維岳子，更名甫甲。 周尚德 李甫文 李廷檣晉江學。 陳浹以貢，順天中式。

二十年壬辰 蘇民俊會試第十人。 高克正第十五人。 倪大器 李甫文

二十二年甲午 林日所 林楨 郭應選應時兄。 陳聖選 郭夢弼 張時聲賀曾孫。

二十五年丁酉 林應酉府學。 陳以珪映子。以監，順天中式。

二十八年庚子 周起元解元 曾應榮 高垓

二十九年辛丑 曾應榮 周起元 林日新

三十一年癸卯 陳儀 林一奇 張時泰以貢，中順天第四名。

三十四年丙午 高廷鳳

三十五年丁未 陳儀

三十七年己酉 蔡國禎 林見龍 陳可冲 朱汝相

三十八年庚戌 李廷樞

四十年壬子 曾朝儀 林見龍 黃鳳彩

四十一年癸丑 蔡國禎 黃鳳彩

四十三年乙卯 甘汝挺解元 蘇光濱

四十四年丙辰 謝宗澤

四十六年戊午 周琦尚德子。

貢士賢者雜見列傳中。

有傳

陳宏曾孫師旦。 沈源 林謙 謝傑 林浩 張賀 陳英 陳令 鄭要 蔡楠 柯挺 周一陽孫

起元。 潘鳴時 黃一龍 高克正

陳宏 字丕顯。授監察御史，視兩浙鹽課及按淮、揚諸郡，揚激凜然。成化間，誓掃台迫斗，詔求直

言，宏與御史林誠等交言大學士商輅當景泰中不能保護儲位，都御史程信剛愎，尚書姚夔黷貨，並宜罷。遷湖廣按察僉事。沅江有豪民與人爭貨產，輒聚黨數百，持刃鼓噪。宏按首惡，畀之法。荊州巨賊封敬中聚洞庭，擁衆剽掠，殺官軍。宏出奇捕獲，殲其餘黨，以功超陞副使。丁母艱，卒於家。宏凝重剛正，老成詳練，遇事敢言，方擬大用，年不竟志，識者歎之。孫遷，監察御史。曾孫師旦。

師旦 初授曲江知縣，清慎自持。繼調廣西永康，立社學，禁火化，教以禮義之俗，葬祭之禮，荒遐之域，鬱如文區。卒官，旅櫬蕭然，民請其衣冠葬於利村。

沈源 字宏鑑。授南御史，疏薦編修章懋爲理學名臣。又因天變，疏修德弭災十事，皆譏切朝政。巡視上汝，法嚴令肅，盜不敢犯。時留都諸勳貴怙寵恣行，源點視團操，一繩以三尺，諸勳貴不能堪，因交疏詆源，坐貶廬氏令，臺省連章救弗得。至縣，興學均徭，節費清訟，政教盛行，當道特薦大用，而源卒矣。源博極群書，製作甚富，然少傳於世。其《自咏詩》有云：「明月滿船無惹苳，清風一擔有圖書。」恬澹簡遠，可概見也。

林謙 任盱眙令，廉平不擾，捐俸賑饑，醵贖不入，祀名宦。陞高唐州同知，有惠政。盱眙舊民，往往相率問安否。

謝傑 字洵卿。知泰州，敷政安和，不苟不縱。值旱，徒步懇禱，甘雨沾渥。尤崇學教，躬講礪士。建學宮，增齋舍，費不及民。陞南雄府同知。

林浩 字克和。嚴毅有節概，居母喪，三年獨處，兄歿，不赴禮闈，人難之。初令南海，裁冗費，均徭役，豪勢無所假借。卒以取忤，改教南雄。丁艱，服除，衢州，復堂齋號舍之法，黎明出公座，分齋背



誦，然後陞堂講說，已，退業於號舍，每三日課試較第。士有孝友忠信者，倍加特獎，貧者周之。其於勤學興禮，靡所不力。擢國子博士。遷遼府長史，以正匡王，王敬重之。久之，謝歸。立祭田，以公族人，給貧乏。子孫異代同居，雍睦無間。又爲鄉人障海儲泉，鄉人碑頌焉。卒年八十三。

張賀 字國儀。授寧海教諭。遷知松陽，政尚清簡，聽訟求情，儉私養慎，公費不徇額斂濫應付以阿媚上官、取悅賓客。前令持庫金去，密以私俸補之。及外艱歸，庫吏言之後令，人乃知張公長者也。服除，補景陵。以忤當道，改永州教授，申飭學規，教人行文，公家禮俗爲一變。卒於官。

陳英 任滋陽教諭，悉心敷教。陞定海知縣，公清愛人，教崇正學，爲諸生倡白。以性直不諧，乞致仕歸。弟薦，見韋布。

陳令 初任廬州府通判，調江西斷事，慮民思之。及之任，署寧州，有善政。轉潮州通判，適漳大饑，通潮穀以濟鄉人，鄉人頌焉。

鄭要 歷東陽、雲夢、興寧知縣，簡易近民，而中精緻。在東陽，被調，邑民赴京保留。去雲夢三年，復取道過縣，吏民遮迎數萬，父老饋金爲饋，一無所受。

蔡楠 以舉人知澄海縣，築城救荒。陞知崖州，親撫黎巢，有異政。

柯挺 字以拔。授南樂令，有聲。擢監察御史，從祭獻陵、神廟壽宮，經營費帑金幾二百萬矣。有上書請他移者，挺素曉堪輿，周遭相視，曰：「是吉壤也，所不如法者，向耳。」遂以聞。詔詣壽陵面對，上喜，賜食。御史召對賜食，異典也。已，欽天監不利易向，以景命相妨爲言，議遂輟。丁亥歲大侵，疏請發臨、德二倉穀二十萬石賑之。出按楚，值鄖陽兵亂，馳入境，誅三卒以殉。歲饑，設粥賑民，議處宗藩祿米，平

亂賊劉汝國等。尋督留都學政，所鑒拔皆知名士。丁內艱歸。久之，爲欲議移壽宮者所齟齬，謫補外，遂不復□。〔七〕樂建安山水，卽家焉。

周一陽 字養初。究心理學。隆慶間，新設本縣，當徙置弟子員，督學蔡公國珍知一陽，令徙學員數百，〔八〕一陽爲首。其年，遂應貢，授南城司訓。遷惠安諭、儋州學正，投檄歸。一陽之言曰：「〔大學〕言誠，〔中庸〕言中，〔論語〕言仁，〔孟子〕言仁而兼義，乃虞庭授受祇一中爾。故曰：中者，天下之大本也。其未發，性也。會一未發，櫺柄則隨所作用，無施不可。」孫起元。

起元 字□□。〔九〕知浮梁，有聲，入爲御史。天啓初，以都御史巡撫吳中。蘇、松歲供織造料銀四萬，已經完解，而太監李實誣論掌織造同知楊姜違抗，被旨繫治。起元爲白雪，坐是爲實所恨，誣奏起元，聞忠賢內主窮治之。起元逮繫，竟死獄中，吳中人無不爲起元發憤者，幾成激變。聞誅，天子復起元官，加贈尚書，予謚。

潘鳴時 字徵求。家貧，就傳，採薪問道。其所棲止，左畫八卦，右圖八陣，邈然有文武經世之思。既得王文成《傳習錄》讀之，遂負篋吳會，謁王龍溪畿、錢緒山德洪，相與探討。歸而聚徒講論，行鄉約，積義倉，練鄉兵。爲政粉榆間，會五寨草寇發，竟以鄉兵擒之。隆慶戊辰，領恩貢入太學。歸則講徒日衆。久之，叙選判信陽州，以拂當道，謝去。逾年卒，門人相與創祠南山寺之潛雲室祀之。所著有《讀易偶見》、《頑菴八和樓》二錄。

黃一龍〔一〇〕 字鱗伯。父文豪，廉州知府，有聲。一龍爲諸生時，則以古文詞知名士大夫間矣。舉孝廉，道杭州，謁見張佳胤、蕭甫於軍門，以文爲贊。佳胤稱其今古文若出一轍也。舉進士，授行人。分

試京闈，所收多名士。授監察御史，督理河東鹽政。河東故有先師廟，歲久傾圮，亟捐俸修葺之。建標興文，於子衿多所成就。嗣命按廣東，會丁母憂，道卒。所著有《延露編》。一龍爲諸生時，所嚴事者，則其鄉先輩盧岐嶷，而最被推獎，則郡司理新建丁此呂。及爲行人，與予及長泰戴燦諸子同在京師，時時取諸子所論著，雜以當代名公文詞，隱其名氏，取裁一龍，得一龍標揭，無不躍然自喜者。嘗夢人語之曰：「子文大行昭夏間。」覺而解曰：「昭者，明也。夏者，大也。其當大明之世乎？」其自負如此。

高克正 字朝憲，宋高登裔。選翰林庶吉士，授檢討，忽二親相繼亡，訃至，慟絕，上疏乞終六年喪。下禮曹議，先王制禮，不可過也，請許加在籍二年，報可。服闋，置官。癸卯，典浙試，以與同考者爭解選，遂被讒中，銓曹擬外遷，命未下，丁大母艱，歸卒。嘗自述云：「維桑梓之地，何意氣可以加人？苟名節所關，卽銖銖猶若浼也。」

## 寧洋縣（二）

### 皇朝科第

舉人 進士子、午、卯、酉屬舉人，辰、戌、丑、未屬進士。

永樂十八年庚子 劉銳

十九年辛丑 劉銳以布政司吏中式。

萬曆二十五年丁酉 廖天瑞

有傳

劉銳

劉銳(一一) 字伯剛。授行人，陞戶部員外郎，人號劉清水。乞恩歸省，適沙賊鄧茂七作亂，其黨侵逼龍巖，衆欲逃去，銳曰：「不戮力討賊，非忠也。坐觀宗黨殄滅，非孝也。」於是從者數百人。會官兵至，進與賊遇，不利，遂退守郡城。銳獨率衆力戰，被執，罵賊不屈，死。

鎮海衛(一一)

皇朝科第

舉人 進士子、午、卯、酉屬舉人，辰、戌、丑、未屬進士。

正統四年癸酉 周瑛莆田人。有傳，見莆田。

景泰七年丙子 鄭晉府學。

成化五年己丑 周瑛

十年甲午 林儉六鰲所人。府學。

十六年庚子 吳稜解元。莆田人。 陳杰漳浦學。

二十年甲辰 陳杰

二十二年丙午 陳珠

弘治五年壬子 石腆府學。 林文煥六鰲所人。府學。 張璘官生。

十二年己未 石腆 林文煥

十四年辛酉 陳一中杰子。府學。

十七年甲子 吳仕典府學。

正德三年戊辰 吳仕典

十一年丙子 吳大奎

嘉靖七年戊子<sub>(二四)</sub> 丘有翼陸鰲人。漳浦學。 鄭景昂

十年辛卯 余勳以貢士，順天中式。

二十二年癸卯<sub>(二五)</sub> 俞鼎以貢士，順天中式。

二十八年己酉 唐文燦銅山人。府學。 游天廷本衛學。順天中式。

二十九年庚戌 游天廷

三十一年壬子 吳世美玄鑑人。本衛學。

三十四年乙卯 黃鏌銅山人。本衛學。

三十五年丙辰 黃鏌

四十年辛酉 張孟觀銅山人。本衛學。 鄭嘉秀陸鰲人。本衛學。

四十三年甲子 鄭恭陸鰲人。貢士。

四十四年乙丑 鄭恭

隆慶元年丁卯 俞咨禹 吳瑩然俱銅山人。本衛學。 劉惠喬廣東中式。

二年戊辰 張孟觀 唐文燦

四年庚午 俞與孝銅山人。 吳潔俱衛學。 姚養科儒士。

五年辛未 劉惠喬

萬曆元年癸酉 黃曰謹 林茂桂本衛學。

四年丙子 林雲龍貢士，順天中式第三名。

五年丁丑 黃曰謹

十年壬午 陳九德

十一年癸未 陳九德 俞咨禹

十三年乙酉 彭應科貢士，順天中式。 游字天廷孫。 更名圖。 貢士。

十四年丙戌 林茂桂會試第四名。

十六年戊子 康萬有 朱瑛 林藹更名弘卿。 江得龍 陳臣表

二十年壬辰 陳臣表

二十二年甲午 黃一熊更名一驥。

二十五年丁酉 林雨潤

二十八年庚子 吳廷璽登然子。 黃廷賞曰謹子。 順天中式。

三十一年癸卯 文三俊 涂一榛 翁竟成 陸元楨

三十二年甲辰 林雨潤 涂一榛

三十七年己酉 陳國器

三十八年庚戌 文三俊

四十年壬子 鄭龍東 康采蘋 陳逢復 俞曰都鼎孫。順天中式。

四十一年癸丑 陸元楨

四十三年乙卯 陳士奇

四十六年戊午 薛士擢 鄭王都

有傳

陳杰子一中。 林文煥 吳仕典（一六） 黃曰謹 陳九德 陳奇可 林茂桂

陳杰 負才識，崇氣節。舉進士。早卒。子一中。

一中 以《詩經》名家，授桃源訓導。陞汝州學正，四方之士皆來受學。卒於官。

林文煥 授戶部主事，督稅臨清鈔關，清操自勵。陞員外郎，家不增一椽一瓦，時人府城，徒步而已。未幾卒，官人咸哀之。

吳仕典 歷衡州知府。置祭田，立家譜。待寡姊諸弟有恩。

黃曰謹 字元祇。歷廣西參政，內行淳備。事兄嫂，撫孤侄有恩。往者衛庠初建，賦已額定，士廩於庠，第虛名耳。曰謹力陳之郡守，請以衛官員缺俸充廩。復置海頭，港稅以資學宮之費。出橐金遍給庠士，闡衛德焉。

陳九德 字懋夫。授秀水令，樸茂澹泊。抵任時，韋布蕭然，絳袍不具。每聽訟，不加鞭朴，詳審舉情，上下敬信。卒官，幾不能殮，邑人賻輓以歸。

陳奇可 字仲卿。自爲諸生時，慷慨鯁直，常赴人急。萬曆十九年，以歲薦授饒州通判兼理窑捕。時中貴人潘相方橫，諸奸多盤據，奇可一正持之。燒造夫馬之費，悉從裁減，爲中貴人所啗。會人郡署事數月，中貴人鞭撻鎮民，不勝毒楚，遂衆譟，焚中貴人廠。奇可偶於是日抵鎮，譟者復大呼曰：「無驚動廠東陳通判也！」中貴人愧且忿，遂中以鼓亂。奏人，被逮，兩臺交救不得，竟死錦衣獄。科道官疏請賜葬，不報。海內聞而哀之。

林茂桂 字德芬。起家高第，銓深州知州，一意爲民。有人命，立往視之，雖窮鄉遠村，必親至，人初死，而獄之虛實已決定矣。深故有二屬邑，皆進士爲之，往時州守與爲敵禮，而茂桂執故事如屬官，竟被其中罷。茂桂爲詩文，下筆立就。與戴亨融燦、張紹和變，及予有夙好。其家居，文酒相命，四壁蕭然，人謂廉吏不可爲矣。

〔校記〕

〔一〕「海澄縣 寧洋縣 鎮海衛」九字，各本原脫，據本書體例補。

〔二〕「詔安縣」三字，各本原脫，據本書體例補。

〔三〕「武」字，各本原脫，據文義補。

〔四〕「海澄縣」上，各本原衍「漳州府」三字，據本書體例刪。

〔五〕「子幾」，《顏慥傳》及本傳作「幾」。

〔六〕「衢州」上，當有脫文。



〔七〕「遂不復」下，當有脫文。

〔八〕「令徙學員數百」，各本原作「令徙學員數自」，據文義改。

〔九〕「字」下，各本原闕二字，《明史》本傳作「仲先」。

〔一〇〕「黃」字，各本原脫，據本書體例補。

〔一一〕「寧洋縣」上，各本原衍「漳州府」三字，據本書體例刪。

〔一二〕「劉」字，各本原脫，據本書體例補。

〔一三〕「鎮海衛」上，各本原衍「漳州府」二字，據本書體例刪。

〔一四〕「戊子」二字，各本原脫，據本書體例及方詩銘《中國歷史紀年表》補。

〔一五〕「癸卯」二字，各本原脫，據本書體例及方詩銘《中國歷史紀年表》補。

〔一六〕「吳仕典」，各本原作「吳仕興」，據本卷「皇朝科第」及本傳改。

閩書卷之一百二十二

英舊志 縉紳

福寧州

唐進士

乾符二年乙未 林嵩

景福二年癸丑 曹愚

乾寧二年乙卯 黃詵侯官璞子。

四年丁巳 卓文

有傳

林嵩

林嵩 字降神。召除秘書省正字。黃巢亂，東歸，觀察使辟爲團練巡檢官，轉度支使。秉公贊理，舉賢翊化，雖在軍旅，不忘俎豆。後除《毛詩》博士，官至金州刺史。嘗著諸賦，詞藻宏麗，咸寓規諷。《唐書·藝文志》載其有賦一卷。子揆，令順昌，遂家焉。揆子保，團練判官。

宋科第

端拱元年戊子 周希古

治平四年丁未 謝黨

元豐二年己未 林積仁

八年乙亥 高崇

特奏名 朱敏修 閩縣敏中之弟。

元祐六年辛未 林豈

元符三年庚辰 丘允

崇寧五年丙戌 楊惇禮 黃薦可

特奏名 陳復

大觀三年己丑 林介卿

政和二年壬辰 王俊 朱庭佐 敏修子。

五年乙未 陳遇 復子。

重和元年戊戌 丘達

宣和六年甲辰 朱倬 庭佐子。 陳遷 遇弟。

建炎二年戊申 謝邦彥 洪清臣 陳遠 遷弟。

紹興十五年乙丑 林仰 豈子。

十八年戊辰 王亮功 王萬修

廿一年辛未 王履初亮功弟。馬千里 林楠

二十四年甲戌 王萬章萬修族兄。王少愷亮功叔。林同仰子。莊行成 王汝弼

二十七年丁酉 王宗己亮功族。周直亮 卓慶集 陳善 鄭永年

三十年庚辰 林湜同作。楊興宗惇禮孫。高曇 林良 王成 王定方亮功子。繆夢弼 林彪同

子。

隆興元年癸未 王仁 黃子張 林師莘同弟。林淳湜兄。王瀛 李渙 林光祖 韓必大 丁尚

友

乾道二年丙戌 王推宗已從弟。朱大寶 張叔振 吳景辰 周文擢直亮侄。楊謙之興宗侄。

五年己丑 林隶 高融疊從侄。繆仲虎夢弼侄。鄭舜卿 鄭鈞 林汝能同從弟。黃楫訖孫。

八年壬辰 陳晃國 楊繼祖 謝時舉 陳繹

淳熙二年乙未 許成 謝達 程翼 林涇楫 王子陽 高邁融族。王萬全萬修弟。

五年戊戌 林劉舉同侄。王宗浩宗已從弟。楊楫興宗從弟。張古心 薛士穎

八年辛丑 楊武 謝牧 楊是甫

十一年甲辰 陳雄 黃奕

十四年丁未 林煒楠弟。張德明 繆倬 黃致一 楊祖堯堯一作先。高齡

紹熙元年庚戌 邢必學 錢易直 黃相 高松融子。

特奏名 王東老 王子俊 王仲應 王萬侯 蔣具瞻 王叔介 黃文仲

四年癸丑 陳從

慶元二年丙辰 黃沐之楫子。 王興

特奏名 王宣旦 王沂 林冲

五年己未 林申彪子。 薛君用 陳千能 林贊

嘉泰二年壬戌 王之制 吳楠

特奏名 王大臣 章正國 郭師穎 陳偉

開禧元年乙丑 陳時 鄭璜 蔣衡具瞻子。 鄭邦俊

嘉定元年戊辰 陳登 任一震 楊公衍 周平子

四年辛未 林庠涇楫孫。 周叔茂 許彥能 陳哲夫 馬經德 陳遇明 余易

特奏名 林淵明 莊起宗 林欽夫《三山志》作羅源人。

七年甲戌 王伯大萬全子。 林甄汝能子。 朱宏孫

十年丁丑 尹煥 林少嘉 陳光遠 李潤之 鄭士龍 陳道天 黃鑑

十三年庚辰 陳燁 姚遇 陸聞雷 林瞻龍 林應龍 姚德輝 郭宗儀 張嵩 黃上華 黃履

姚鏞

十六年癸未 陳良驥 楊夢龍 吳行可 薛士困 陳大章 高遷齡弟。 姚敬德輝兄。

特奏名 陳則厚 林伯大 李端行 楊文煥

寶慶二年丙戌 林孟治湜孫 高嘉 鄭夢登 王維伯大侄。

紹定二年己丑 王昱宗浩子。 郁中 葉邁 高錢松孫。 王大舉 繆正叔 莊克家 王從龍 翁

治 黃鯨

特奏名 梁應龍梁一作王。

五年壬辰 韓伯修 黃居正 周還淳 陳申 孫附鳳 孫翼鳳附鳳弟。 楊淳 鄭著

特奏名 林克己 林昭卿

端平二年乙未 林孟雲龜子。 王夢炎 林正道

特奏名 薛鸞兒

嘉熙二年戊戌 王復 林雲龍 林孟辰 林企孟雲兄。 林暉

特奏名 林舜俞 林角 王雲 鄭湜 黃士奕

淳祐元年辛丑 鄭溥 王熙 林元孫 黃困奕孫。 陳夢受 林思咨 林祖中

四年甲辰 黃拱辰 裘珏 繆元德 楊肅 孫應鳳 唐玠

七年丁未 王長孺 林桂發 裘堅珏弟。 臧堂 鄭能應 莊元龍 林孟煥 陳夢龍 王元野

姚遂 王宗洙 薛廉生 林應發 曹有開

特奏名 林暹孟煥父。 丘應方 謝敬 馬護才 鄭剛中 卓台辰 周士曾 魏清之 林澡 葉

三益 謝石孫

十年庚戌 徐碩 王敬伯大從孫。

咸淳四年戊辰 鄭君老 林天書

七年辛未 楊混

薦辟、恩蔭賢者雜見列傳中。

有傳

周希古 丘允 楊惇禮孫興宗、梅。 洪清臣 林珣 王宗已 林湜(一) 高曇從侄融。融子松。 張

叔振 王萬全子伯大。伯大侄維。(二) 黃沐之 黃幹 陳燦 孫翼鳳 鄭君老 林天書

周希古 字信叔。以收辰州功，除著作郎。歷秘書丞，知蓬州。政蹟昭著，兩被璽書獎諭，終朝請大夫。

丘允 字執中。父腴，少孤，傭書養母，撫育弟妹，鄉鄰有爭，率來取平，士大夫有疑事，亦從質焉。

允舉進士，授欒城尉，適採砲石軍暴橫，允申明禁戢之。調知臨湘，三日平反冤獄五十餘人。太守鞏璘喜曰：「令皆如此，天下何憂不治？」改知鄧城，除官府買絹之害。調知新建，嚴治道流之恃勢凌人者，道流訴闕，大臣欲加罪，徽宗曰：「愛民之吏，罪之曷勸？」調知柳州，論廣西鹽課之弊，朝廷下其法於兩廣，民以爲便。南渡後召對，請上稽天意，內勤政事，任賢遠奸，克儉邦家，無或豫怠。高宗嘉納，除知惠州。焚巫祠，開藥局，以破俗陋。致仕，卒贈左朝議大夫，爵縣男，服三品，食邑三百戶。

楊惇禮 字穆仲。舉進士，調興國軍司法，改陝、彭、泉、宿四州教授。轉太學錄、太學博士，時與鄉人黃薦可、林介卿並命，有「北鄉三博」之語。乞外出，判秀州。丐休。建炎元年，以司勳員外郎召，以疾謝。踰年，再以監察御史召，力辭。得旨，以朝請郎守本官致仕，許在家言事，時年未六十。衆稱惇禮有

三奇：有田不買，有官不做，有子不蔭。孫興宗、楫。

興宗 字似之。少師鄭夾漈。後從宦莆田，執經林光朝。舉進士，調鉛山簿。孝宗登極，上封事，末陳以守爲攻之策，有旨召赴都臺審察，時湯思退主和議，使御史尹檣要口：「登對，願無立異，當以美職相處。」却之，連書抵東府，爭和議非便，思退大怒。孝宗嘉其志，除武學博士。既而陳俊卿舉充館職，召試條對，言兵冗，切中時弊，除秘書正字，遷校書郎，與林光朝同校文省殿。擢鄭僑、蔡幼學、陳傅良，時稱得人。修《四朝會要》，轉宣教郎，擢尚書司勳郎。論張說不當與趙汝愚同除拜，不報。又駁楊和、王存中封爵太優，堅不書勳，忤虞相允文。乞祠，出守處州，政甚有聲。除知温州，以親嫌，改嚴州，除湖廣提舉。有《自觀文集》。

楫 字通老。剛介不苟合，與楊方、楊簡俱朱門高第，號三楊。舉進士，調莆田尉。閩帥程叔達移縣括逃田，楫歷疏不便，忤帥意，秩滿上府，叔達怒曰：「尉格帥命乎！」楫徐條對，無所屈，罷去。漕使林祈曰：「尉敢格帥，大是奇事。」遂薦之，累官司農寺簿，劄論進君子、退小人，獎廉靖之操，絕奔競之風。除國子博士，轉少卿。臺臣或干以私，答曰：「臺省紀綱，學者規矩，當各守職，無相侵越。」尋出知安慶，移湖南提刑、江西運判，終朝散郎。著奏議、《悅堂集》。

洪清臣 字直侯。官至朝散大夫，知邵武軍。篤厚誠慤，清白著聞。邑有火災，四鄰皆燼，其家獨存，人謂廉獎。

林珣 字德潤。紹興初求直言，上《砭石論》四十七篇，勅補文資。尋召對，進三劄，高宗面諭云：「前見《砭石論》，今復得此劄，知卿忠義不減唐馬周也。」改秩，歷無錫、宣城令，以薦知無爲軍太平州。



王宗已 字子游。令增城，治績最嶺外，高宗書名御屏。秩滿，調常熟縣，除登聞鼓院。尋知廣州，遷知蘄州。待闕者千餘人，孝宗指其名示宰執曰：「是嘗令常熟者，宜授之。」官終朝奉大夫。

林湜 字正甫。調富陽尉，部弓手截金亮之黨，擒鹽徒行劫者。改知晉江，適造戰艦，不忍斂民，諸番義之，助其役。判南劍州，太守議官自賣酒，湜力争不可。守自爲奏，朝廷視無通判署，疑之，守奏遂格。除監察御史，疏言：「陛下托股肱於宰執，而所授皆小人；寄耳目於臺諫，而彈擊皆君子。治亂之大，無過於此。」爲殿試詳定官，某士對策剴切，湜擬第一，朝廷不用。及侍御史劉光祖下遷，湜曰：「可以行矣。」再論靜江知府錢之望，出爲江西轉運判官，免贛州科罰，罷龍南、安遠折變，減興國淮衣絹，除南安聖節銀及水潦州縣窳名之在漕司者，歲捐數萬緡，而漕計不虧。歷太府司農卿，充孝宗遺留使，虜國通名，虜以服賜湜，湜揮擲之曰：「正統相承，服視其品。今易左衽，有死而已。」虜不能屈。復命，光宗迎謂曰：「卿守禮甚堅，國體不失。」韓侂胄讎逐正士，呂祖儉上書爭之，貶嶺外。湜見余丞相曰：「呂子約南行執奏收回，大臣責也。」力請外，除湖北轉運副使，進直龍圖閣，致仕。朱文公被斥，士皆遠嫌，湜獨執弟子禮不變，未歿前數月，猶馳書問疑義。著《榮隱集》。

高曇 字子雲。孝宗朝爲太學博士，疏言訓練士兵，久任帥守。孝宗稱其老成歷練，遷秘書省著作郎，兼皇孫平陽王府教授。再對便殿，悉常上意，御批其札送中書，既退趨出，目送之。光宗在儲宮，以官僚入宴，恩意浹洽，手書「容齋」二字以賜。容齋，曇號也。嘗修《乾道會要》，轉朝散郎。有《易說》及詩文二十卷。從侄融。

融 字光中。舉進士，調餘杭尉，愛護細民，不撓藝家。見中傷，罷。後起爲衡州司戶參軍。融蕭然

退藏，不滯於物。嘗選勝泉石，作無餘堂、小亭三四所其上，以娛朋來。間從兩僮，簪衣羸糧，訪幽人數百里外，遇意象可觀，輒忘歲月。晚讀佛氏，曰：「是《易》之無思、無爲，《中庸》卒章之旨也。」陳傅良志其墓，稱之曰：「隱君曰融，故登進士。試吏州縣，非隱者也。德足堪此，以故名之。」子松。

松 字國楹。少游陳傅良之門，又從朱文公學。舉進士，授台州教授，啓迪有方，一時州縉紳皆出其門。故例，撰講章，據案抗聲讀，名曰講書。松曰：「是何所發明耶？」令更進迭問，疑難交發，滿意而退，士人懽服。葉水心銘其墓。

張叔振 字振之。弱冠橫經講授，狀元木待問師事焉，一時衣冠多出其門。累知浦城縣，通判岳州，人朝四遷爲太府丞。凡三登對，所言皆當世急務，孝宗嘉納，而一時權貴多忌之。出知信州，卒。

王萬全 字子昌。知青田縣。前令王師古，愛民恤訟，惟恐傷之，縣人名師古。而萬全治官蒞政，亦與之埒。子伯大。

伯大 字幼學。舉進士，授國子學正，歷南劍州通判、江東提舉常平兼知池州、知臨江軍。歲旱饑，置荒政局，延客究古今賑濟法，第甲、乙、丙、丁戶，作紅、黃、黑、白圈識別之，全活甚衆。遷國子監丞，民置祠祭祀，凡有十三所。累直秘閣、江東提舉常平兼知池州。端平三年，召至闕下，遷尚右郎，累直寶謨閣、樞密副都承旨兼左司郎官。進對言：「今天下大勢，如江河之決，日趨日下。其始也，縉紳之論，莫不交口誦詠，謂太平之期，可矯足待。未幾，則以治亂安危之際爲言矣。又未幾，則置治安不言，而直言危亂矣。又未幾，則置危亂不言，而直言亡矣。嗚呼！以亡爲言，猶知有亡。今也，置亡不言矣。人主之患，莫大乎處危亡而不知。人臣之罪，莫大乎知危亡而不言。陛下親政五年，干茲盛德大業，未能著見於

天下，而招天下謗議，何籍籍也！議逸欲之害德，則天下以陛下爲商紂、周幽之人主。議戒宦近習之撓政，則天下以朝廷爲恭、顯、許、史、武、韋、仇、魚之朝廷。議姦僞佞朋之誤國，則天下又將爲漢黨錮、元祐黨籍之君子。數者，皆犯前古危亡之轍。忠臣懇惻而言，志士憤激而和，陛下雖日御治朝，親儒者，修辭飾色，而終莫能弭天下之議。言者執之而不肯置，聽者厭之而不憚煩，於是，厭轉爲疑，疑增爲忿，忿極爲復，罪言黜諫之意，藏伏於陛下之胸中，而凡迕己者，皆可逐之人矣。中人之性，利害不出一身，莫不破瓦絕角以阿陛下所好。其稍畏名義者，則包羞閔默，有跋前疐後之憂。若其無所顧戀者，則皆攘袂遠引，不願立王之朝矣。陛下試反身自省，不徒見夫嬖昵之多，選擇未已，排當之聲，時有流聞。陛下試反之宮闈之內，不徒見夫內降干請數至，有司裏言除臣，每實人口。陛下試反之朝廷政事之間，不徒見夫剛方峭直之士，昔者所進，今不知亡，柔佞闖茸之徒，適從何來，而遽集於斯也？陛下誠布所失於天下，不必曲爲回護，凡人言所不貸者，務赫然盡去之。蠹根悉拔，孽種不留，如日月之更，風雷之迅，則天下之謗不弭自息。」又極言邊事，曲盡事情。以直竇謨聞知婺州。莆人方大琮上丞相李宗勉書：「若使王幼學立朝，似有淮南寢謀氣象，朝廷豈不能著一骨鯁之臣以自壯乎？」累兼權刑部侍郎，以集英殿修撰提舉太平興國宮。起再知婺州，辭免，復舊祠。淳祐四年至闕，授權吏部侍郎兼權中書舍人，累刑部尚書。七年，拜端明殿學士，簽書樞密院事兼權參知政事。八年，拜參知政事，以御史陳珪論罷，以資政殿學士知建寧府。寶祐元年，卒，謚忠文。無子，蔭兄子積翁，則獻地圖以降元者。所著有《四留銘》、《韓昌黎集音釋》。其序《音釋》曰：「昔人謂杜詩、韓文無一字無來處，竊謂必盡所云，而後可讀二公之書。」侄維。

維 字魯山。任國子學正兼內外宗教。質性恬淡，有唱和詩集。

黃沐之 讀書恥章句。既冠，登進士，調義烏尉。土豪寇竊，見尉少年易之，沐之與屬約曰：「必勦是，始黃汝。」賊有鐵彈子者，負險格敵，躬拔其穴，縛以歸。州守檄視民田，意在增賦，沐之曰：「吾敢忤太守耶？然不忤，守則忤民矣。」爭之，卒減六七。陞上杭縣，去日，不持一錢。知麗水縣，有上戶欲移下戶，戒之曰：「下戶實不堪命。」方將總脉賦源，立程式以惠來者，而遂卒官。

黃幹 字尚質。師朱子，著述甚富，餘于饒魯、寧德、李鑑皆師之。所著有《梅鑑語》、《五經講義》、《四書紀聞》。官至直學。

陳達 字明孟。累官宗正寺丞，剛直敢言，權奸惡之，出知邵武軍。

孫翼鳳 字昭端。父文祥，字元吉，開禧間，自浦城解館歸至霍童，暮投宿，夜半聞內寢哭聲，問故，有夫婦曰：「吾兒不肖，已賣此屋，明當遷去。」文祥曰：「子孫貧，故賣屋耳。吾爲爾謀。」曰：「果爾，當厚報。」旦起，則荒塚，心異之。少選，衣褐一人，挾錘畚至，主者從之，問其故，曰：「家貧，粥祖墳於人，將徙矣。」文祥曰：「貧，我賑汝，慎無徙墳。」傾囊與之。尋夢寄宿主人，捧二鳳人，拜曰：「厚恩莫酬，二雛爲謝。」遂孕二子，名其長曰附鳳，次曰翼鳳。翼鳳穎悟絕倫，以鄉舉入太學，時史嵩之以父憂謀起復，率同舍生黃伯愷、金九萬等同攻之。又斥和議事，言甚剴切。紹定壬辰，與附鳳同登進士，累官御史大夫、簽書樞密院事。立朝數十年，勇擔荷任，多所諫諍，贈太師、中奉大夫。附鳳亦官簽書樞密院，第附賈似道以進。

鄭君老 字邦壽。咸淳進士，乞歸養親。連丁內外艱，未起而宋亡矣。元初，知君老者交薦於朝，累徵不起。君老十歲能詩，十二能綴文，十六領鄉薦首選，十七登第。家居事父母、處兄弟，內外無間。喪

亂之後，學守獨立，鄉後進宗師之。卒，學者私謚曰靖節先生。

林天書 名詔，以字行。勵行濟貧。咸淳四年，授晉江尉，思「尼父不入危邦」之訓，以疾乞歸。後八年，宋亡。元初，屢薦不起。

### 元進士

泰定元年甲子 林仲節

薦辟、人材賢者雜見列傳中。

有傳

王都中 陳天錫子陽益 林仲節 高公玉 陳文積

王都中 字邦翰，宋伯大之孫，積翁之子也。積翁始以宋圖籍獻元，後爲元奉使日本，遇害，追封閩國公，謚忠愍。都中生三歲，卽以恩授順昌尹。七歲，賜平江田八千畝，宅一區。特授平江路治中，時年十七，遇事剖析，動中肯綮，僚吏皆愕眙不敢欺。秩滿，除浙東宣慰副使。金華有毆殺人，當論死，受賕，以爲其人死於病，都中摘屬吏覆按，得遂伏辜。改荆湖北道宣慰副使，值歲侵，拯饑歷山谷，全活以數十萬。武宗詔更鈔法，行銅錢，以都中爲通才，除江淮泉貨監。凡天下爲監者六，惟江淮所鑄錢號最精。

改郴州路總管，溪洞猺獠往來強猾，都中恩煦而威攝之。郴民喜鬪爭，都中大治學舍，作籩豆、簠簋、笙磬、琴瑟之屬，使其識先王禮樂之器，延宿儒教學其中，開曉以義理。鄰州茶陵富民覃乙死，無子，惟一小妻及其贅婿，妻誣其婿拜屍成婚，隱藏玉杯、夜明珠，株連八百餘人。奉使宣撫移其獄委之都中，悉得情，正罪。總饒州路總管，年饑，米價翔踊，都中糶官倉米，定下等價，使民得食。未報，又於下等價減十之

二，使就糴之。時宰怒其專擅，都中曰：「饒去杭幾二千里，比議定往還，非半月不可。人七日不食則死，安能待耶？」民亦相與語曰：「公爲我輩減米價，果得罪，我輩當鬻妻子代公償。」時宰聞，乃罷。以母憂去。復除兩浙鹽運使，未上，擢海北、海南道肅政廉訪使，遍歷三十四場，驗竈戶物力高下，損益之，役平課足。遷福建宣慰使、都元帥，改浙東，徙廣東，拜河南行省參知政事。至正元年，卒，贈太師、中書左丞相，謚清獻。都中歷任四十餘年，所至著譽，治郡尤績。時南人以政事之名聞天下而位登省憲，都中一人而已。

陳天錫 字載之。以文學薦，授本州學正，繼爲泉州學正，造大成樂，鑄禮器、簠豆、簠簋，率以法度。繼簿南安，陞佐府幕，每以興學崇化爲先。累遷建陽尹，寬洪好善，不尚刑威。重修廟學，集孔子及從祀諸賢封號，詔制，勒碑於大成殿前，以示學者。秩滿，以六事兼舉聞於朝，加奉議大夫，知福清州。年未六十，卽致仕。八十以壽終。有《鳴琴集》。子五人，俱能詩：陽至，舉賢良，汀州知事；陽盈，襲蔭。嫡孫端孫，登武舉，見弁韜。

陽盈 以父蔭，累縣尉，調泉州府稅課司副使。丁艱歸。至正中，草寇攻州，知州王伯顏檄陽盈率民兵拒敵，奮不顧身，遂陷賊。賊帥王善脅使降，陽盈大罵，不屈遇害。事聞，勅贈敦武校尉、安溪縣尹，旌表其門閭。

林仲節 字景和。少聰敏，中浙江行省解元，舉進士。有《四靈賦》見稱於時。授州判，以恃才降句容司稅，陞華亭尹，遷知吳江州。

高公玉 至正十二年，閩寇康顏攻州，王州尹被害，至桐山高千戶天璧家，公玉與天璧設宴計縛之。

時閩途梗塞，獻俘於溫分閫，首繇松山，得姻家許必達引至，溫帥吳世顯授公玉、天璧爲州同、州判，必達爲行軍都事。

陳文積 字崇善。繇陸叙授永春簿，歷四遷爲長泰縣尹。公勤廉能，始終一節，爲長泰人始作縣城。

### 皇朝科第

舉人 進士子、午、卯、酉屬舉人，辰、戌、丑、未屬進士，洪武十七年始定爲例。

洪武十七年甲子 薛晟一作盛

十八年乙丑 薛晟

二十年丁卯 吳廷進

二十一年戊辰 吳廷進

二十九年丙子 周悌

三十二年己卯 鄭憲 張全

三十五年壬午 吳同一作童 王澄俱應天中式。

永樂二年甲申進士按元年革除，故甲申廷試。 吳同 馬忠《通志》不載。

三年乙酉 林春 麥鐸

六年戊子 林棠 徐泉

九年辛卯 鄭瑄 林良

十二年甲午 盛福

十六年戊戌 林良

十八年庚子 陳昱

二十一年癸卯 謝嵩一作崧

宣德七年壬子 卓勳 黃澄

景泰元年庚午 卓越 劉安

成化元年乙酉 王淮

十六年庚子 林琦 林文孟

二十年甲辰 王淮

弘治五年壬子 杜應麟

十一年戊午 杜子新 鄭師

十四年辛酉 林遂

正德九年甲戌 林遂

十一年丙子 張嵩

十四年己卯 吳鉦 黃乾清 翁廷相

嘉靖四年乙酉 周璞

十年辛卯 林愛民



十九年庚子 黃乾德乾清弟。

二十二年癸卯 陳良謙

二十三年甲辰 林愛民

二十五年丙午 宓子賢

二十八年己酉 黃乾行 張孔修 鄭漢

三十二年癸丑 黃乾行

隆慶元年丁卯 游朴

萬曆元年癸酉 鄭昌國漢子。

二年甲戌 游朴

十年壬午 黃蒙憲乾清孫。

十三年乙酉 張大光順天中式。

十九年辛卯 鄭洪圖

廿五年丁酉 吳文祥 歐廷試 林可立

薦辟、貢監賢者雜見列傳中。

有傳

琦 劉鐸 王淮 杜子新 鄭師 林遂 葉森 盛仕春 俞昌嘏 吳鉦 陳任 陳良謙 林愛民  
蔣悌生 林珙 曾寶 陳宗顏 林文獻 鄭憲 盛福 曹福 周睿孫璞、珉。 鄭遜 卓越 林

盛繼 黃乾行 陳富春 袁希白 游朴

蔣悌生 字仁叔。檢身勵行，雅不仕元。洪武初，舉明經，任本州訓導，教誘諄諄，多所成就，著《五經叢測》五卷，微詞隱義，多發前人。

林琪 字仲恭。總帥同鄭軾從韓信同游，篤信力行，爲文以理勝。晚年教授生徒，開誘來學。舉明經，不受，強補本州儒學訓導，未半載，以疾辭。

曾寶 字楚善。洪武間御史，出宰鄱陽，治聲著江右。

陳宗顏 字希賢。以人材應舉，太祖問曰：「官汝方面，有何施爲？」對曰：「臣爲上爲德，爲下爲民。」稱旨，授陝西布政使，多善政。卒官。

林文獻 一姓陳，字孔徵。博通經學，旁及子史。舉明經，授國子助教，立教有方，生徒仰之。

鄭憲 字孟成。義烏訓導，調信豐。歸修《長溪志》，著《休休亭記》、《老農傳》、《漁父問答》等文。

盛福 字伯祈。授上虞訓導。丁艱服闋，赴闕，宣宗命選年深教職有學識者試《端陽閱武詩》，援筆立就，稱旨，進國子學錄，賜勅獎勵。

曹福 字道謙。永樂中以貢授三汭知縣，調弋陽，有善政。卒官，民感之，爲扶柩歸舍。

周睿 字汝通。剛方有苦操，諸書過目成誦。父歿，事母孝，遜田百餘畝與兄弟。正統中，以貢任寧國推官。子君祿，有父風，有爭田者，君祿語之曰：「此物乃鬼神賞善罰惡之具。」爭者感愧。孫璞、珉。

璞 從呂涇野柵講學，以潛心力行見稱。判廣州，覈番舶，斥絕常賂。署肇慶四月，鑿石礮學街，新守至，嘆之，及廉其紙贖商稅二百金悉籍庫，頓加敬禮。時有事安南，軍興數萬，一無所染。陞上思知州，

諄諄講論，蠻俗一變。經營物力以築城門，歲成一門，四門成，擢思恩同知。尋擢知本府，首戒九司曰：「地方多事，皆因爾輩爭立，今若覲素，繼法毋貸！」呂馬者，岑猛黨也，聚衆爲梗，兵備曰：「有周守在，毋憂。」旬月，馬服罪，且納金爲謝，累却之。九司歲入公費冒破者，瑛徵來歲以濟訛，瑛量出儉用，更補前欠。人覲，乞休不允，徑歸。粵民兩齋撫按檄至州，促復任，竟不起。瑛與人交，若飲醇，有過婉，諷俾自悟，而中介有不可徇者。

珉 字勝玉。性至孝，少喪父，哀毀如成人。事兄猶父，白首尚嚴。嘉靖中，以貢爲新昌虹縣學官，本身爲教，雖其對人淳淳惟恐有傷，而士無敢弗率者。在虹，憂歸。服闋，將之官，兄曰：「吾老矣，弟兄相聚能幾時？」珉感泣，遂不復仕。

鄭遜 字伯恒。正統間以歲貢知興寧縣，廉而尚寬，建創儒學，規制甚悉。五載引歸。

卓越 字彥材。知永嘉，廉而有爲，事上不阿。提舉市舶，中官徵求擾攘，挺身折之。改金鄉縣。越將生時，其母臥室軋軋有聲，驚疑他徙，已，室後山崩壞室，裂石有「卓越」二字，故以越名。後赴禮部，途遇賊，匿水中，覺有人捧其足。天順癸未，禮闈火，越遇巨人，蹴背踰牆出。人稱三異。

林琦 字師韓。性純孝，母病侍湯藥，不解衣，履趾至爲腐，因而諳醫，時時用醫濟人。知高淳縣，平易近民，民有病者，輒藥痊之。

劉鐸 字彥振。成化中貢士，授仙居訓導，以母老歸養。母卒，喪葬盡禮，有鷹日棲軒樹，人謂孝感。事二兄友愛。及卒，學正閔鶚私謚曰貞孝。有《介庵集》。仙居人以從祀古靈祠。

王淮 字宗豫。知德慶州，公勤廉介。時值征勦，區處得宜，民用不擾。

杜子新 字自明。廉介重義，有二友人窘急，子新得束修百金，出三之一賙之。仕吳江教諭，爲令所重，有浼求解於令者，悉拒絕之。

鄭師 字從善。爲宿遷訓導。有本州解果品上京，多滯損，向師求濟，挈囊助之。福安張景真遭剽掠，凍餒，素無平生，輒衣食焉，佐以行資。宿遷高令，與師素不合，師數稱身長於鄉之顯者，高聞媿服，遣子就學。

林遂 字元成。父輅，以貢任廣平訓，却餽助葬，年未四十，致仕。遂，弘治中舉於鄉，歷安吉、象山、松陽教諭。舉進士，授南京大理評事，轉寺副。嘉靖初，陳八事，曰：恒敬心，遠邪佞，容懲直，公是非，重守令，謹刑罰，修武備，革弊俗。世宗嘉納之，擢湖廣按察僉事。賑襄、沔饑，不足，請太和山香價，守閩難之，往復抗論，存活萬餘人。除鄖陽部運徵賠之害，革榔、永老女不嫁之俗，創巡司於麻城界河，守禦治盜，奏設縣治興國、瑞昌間。進四川副使，設簿稽餉，築城防邊。人工採木有剩餘者，權貴欲取之，執不與。後再值採木，遂得其應用，勞費大省。西陽亂，平之，西陽人以金甌十、白金四錠謝，卽送修萬縣學。歲饑，檄郡縣各修葺其學，或謂不可，曰：「此范文正遺意。」四川歲旱，後麥熟長至丈，巡撫宋公以瑞麥進賀，遂謂：「大寒之後，必有陽春，何足爲瑞？」獨不署名。聽獄一剖得情，人稱曰不解擔，又曰升米林。陞貴州參政，致仕家居，至脫室人翟冠市米給饘粥。爲人真率剛耿，侃侃論天下事。有《石壁集》。子應鴻，始興教諭，亦以耿介稱。

葉森 字廷茂。精研天文、地理、醫卜之說，著《梅花百咏》、《金陵尋游集》。弘治中，以貢授肇慶訓導，與同庠游喬齊名，時稱「葉詩游論」。

盛仕春 字仁仲。弘治中以貢任泗州訓導。泗科久曠，選旁齋生馬玉教之，遂得擢桂。耽書至忘食，經史百家、星象地理及悟真韻學，靡不淹貫。有失，則書「悔」字以自艾。壽八十一，州士夫私謚文抑先生。

俞昌嘏 字天福。正德初以貢授衢州訓導，仗義輕利，周給貧族。家居，雖甚暑，未嘗去衣冠。時授經於建善寺，有僧自鳩死，誣諸生，昌嘏挺然直之。

吳鉦 字汝礪。教諭宣城，卻贊恤貧，師鄒東廓守益、汪東麓佃，講學淑士。令公安，以不阿歸。宦橐蕭然，書十數篋而已。叔琿孤寒，鉦爲立嗣，勻以己產。兄鐸死，無子，敬禮寡嫂。弟鱗早逝，撫其二孤。庠友程珩疾革，偕周璞旦夕省侍，及沒，珩妻李亦亡，偕璞舉其二喪焉。

陳任 字司重。通曉星象、兵法。鬻產倡遷州學。嘉靖初，以貢訓導萍鄉，有徭戶貧甚，粥子得數金完役，任知之，還其金，俾贖子以歸，損其徭。有賈爲投文者，入縣庭，乃出刃馳上，知縣秦吉驚却，踰垣避之，帑具被劫，任率健士數十人，獲七賊。擢教諭城武，愛士恤貧，清節著聲。丁艱，復除陽江，卒於官。

陳良謙 字德益。令安義，勤撫字。以黠直忤當道，調會同，鋤奸治盜，自學官以至道路，葺治一新。陞潮州府判。

林愛民 字子之。初授戶部主事，三餉強邊，談形勝如指掌。榷稅潯陽，舟至，無不卽渡關者。關令：「救溺貨有賞。」愛民令：「救人者，賞倍之。」出羨金置周濂溪、陶淵明祭田。嘉靖庚戌，虜入都下，邊兵入援，芻料乏，尚書獨呼：「林員外助我！」乃率城夫馳收菽，格取民車，與守者三爭門而出，賴以不絕。管銀藏，斤斤出納。時羽士方有寵，歲費香金十七萬，以虜人故，直不時給，商賈權閥，欲發老庫銀給

之，爭不可，曰：「老庫備非常，非奉旨，誰敢發者？」聞怒，廉其私，無所得。累忤大司農，自郎中謫興國州同知，署大冶。縣當吳、楚之交，寄莊仇殺累年不解，一勘平之。判嘉興，值倭變，守北樓四十日，築桐鄉城，工成而寇至，賴以不破。再判保定，均驛馬政，省下邑糜金數千緡。復郎戶部，擢廣東海北僉事，散珠盜百餘艘，值朝命採珠，率屬矢神，不敢私一顆。竟以忤部使歸。子子淡，諸生也，博學多識。

盛繼 字朝善。嗜學慕古。父患瘍，昕夕洗拭，疾篤，籲天請代，朔望祈禱，逾一紀。父沒，哀毀骨立。嘉靖中，貢上春官，訓導遂昌，銘勇克軒以自省。擢諭興寧，郡守萃九庠雋乂，延致經館爲之師。虔峒酋爲梗，啣撫臺命，單車諭服之。遷姑孰，膳金故歸掌教，繼悉付諸生。同寮蕭祿不贍，則周之，疾且死，藥之，而歸其喪。轉國子助教，以母老乞休。性端嚴無情，日惟校讎卷帙，迨老不衰。

黃乾行 字大同。父子厚，青田訓導，嚴直不阿。子四：長乾清，恂恂孝友，會試下第，製絹衣，父知詰之，跪伏自責。仲乾德，知宣平，鋤強戢吏。乾行，舉進士，授行人，歷戶部郎中，出守重慶，誨士阜俗，卒於官所，著有《禮記春秋日錄》，四方傳之。乾行倜儻負義，兄乾清夜覓醫於鄉，遇虎不顧，乾清子復早卒，爲昏嫁其女，孫及孫女。弟乾道，天無子，養其嫠終身。

陳富春 字必亨。隆慶中以貢選判濟寧，主督州賦，大著冰蘖，當道委收泰山香稅，不私一錢。爲同官所忌，擠去，空橐不能歸，傭醫轉徙，卒於京邸。里人與濟寧人爲之棺殮及募舟歸櫬，舟子適濟寧人，曰：「陳判公耶？願減他舟之直三分。」蓋其去州之日久矣。

袁希白 萬曆中任南平訓導，有清節，課士甚勤，悉自辦供具，所獎拔咸稱得人，諸生碑頌之。

游朴 郎刑部，精法比恤刑，錄任刑部者多師之。官至湖廣右布政。

〔校記〕

〔一〕「林湜」下，各本原衍「從」字，據本傳及本書體例刪。

〔二〕「伯大」二字，各本原脫，據本傳及本書體例補。

閩書卷之一百二十三

英舊志 縉紳

福寧州 福安縣 寧德縣(二)

福安縣(二)

唐進士

神龍二年丙辰 薛令之

有傳

薛令之

薛令之 字珍君。初居山，聞龍吟，及第。開元中，遷右庶子，與賀知章並侍肅宗東宮。知章自右庶子遷賓客，授秘書監，而令之以右補闕兼侍讀，積歲不遷。又官次清淡，令之題詩壁間曰：「明月上團圓，照見先生盤。盤中何所有？苜蓿長闌干。飯澀匙難縮，羹稀飭易寬。只可謀朝夕，何繇度歲寒？」玄宗幸東宮，見之，索筆題其傍：「啄木嘴距長，鳳凰毛羽短。若嫌松桂寒，任逐桑榆暖。」令之因謝病，徒步歸。玄宗聞其貧，命有司資其歲賦，令之量受而已。肅宗立，以舊恩召令之，而令之已卒，因勅其



鄉曰廉村，水曰廉溪。著《明月先生集》。侄芳杜，見韋布。

### 宋科第

熙寧九年丁巳 姚世舉

元豐二年己未諸科 卓鈞

崇寧二年癸未特奏名 繆昌道

大觀三年己丑 陳雄

特奏名 繆剛

政和二年特奏名 姚能舉

五年乙未 陳昂

宣和三年辛丑 陳最

六年甲辰 陳宗禮 劉晉

紹興二年壬子特奏名 劉發 姚祖虞

十二年壬戌特奏名 陳賓

十五年乙丑特奏名 夏寅

十八年戊辰 劉季裴晉子。

二十四年甲戌 陳驥雄侄。

二十七年丁丑 陳元禮 陳駿驥弟。

三十年庚辰 繆從龍昌道孫。

特奏名 羅輝

三十二年壬午釋褐 陳義元禮兄。

隆興元年癸未 劉更生 陳渥 薛黼令之十二世孫。 陳文卿 姚瀛

乾道二年丙戌 陳所得 陳朝 劉去病 劉確去病從侄。

特奏名 陳庇

五年己丑 張觀

特奏名 劉慶祖 劉季山去病弟。

八年壬辰 劉邵

特奏名 羅寅 吳待聘 劉季雲季山弟。

淳熙二年乙未 葛緋 劉烈慶祖子。 陳接

五年戊戌 姚祖賡瀛弟。 劉嶽季裴弟。

特奏名 繆守愚 繆翬

八年辛丑 王知章

特奏名 繆椿

十一年甲辰特奏名 薛召令之十三世孫。 林可大

十一年丁未 鄭之悌

特奏名 繆興宗 蘇晉

紹熙元年庚戌特奏名 姚正國 何既濟 阮大用 張時敏

四年癸丑 陳奕驥子。

特奏名 劉季虞 繆翥

慶元二年丙辰 阮幡

諸科 趙萬年 黃夢攸

五年己未 陳經 王士奇知章兄。

特奏名 繆傳梅

嘉泰二年壬戌 阮文子

開禧元年乙丑特奏名 劉燦明

嘉定元年戊辰 姚洽祖慶侄。 薛會右子。

特奏名 黃豐

四年辛未 阮賓

七年甲戌 黃翼 陳汲

十年丁丑 羅雲中

特奏名 陳絲 姚遇

十三年庚辰 林垌

十六年癸未 陳端平絲子。上官公舉

寶慶二年丙戌 林子雲 陳翥奕弟。葛炎緋弟。阮國寶

紹定二年己丑 鄭宗之悌從侄。

特奏名 繆蟾守愚子。

五年壬辰 黃質夢攸子。張翊 吳福元

特奏名 徐登 張濱子

端平二年乙未 陳準驥侄。

特奏名 陳甦 劉泳 池光庭

嘉熙二年戊戌 繆烈 羅珪 劉龍發

特奏名 黃逢時

淳祐元年辛丑 劉自 劉濬自兄。林舜咨 阮許迅

特奏名 羅洪直 劉友

四年甲辰 鄭利宣

特奏名 陳埜肅兄。吳權

七年丁未 康維新 陳德元汲子。

特奏名 羅榮孫

十年庚戌 林之泳

兩優釋褐 繆幼節

寶祐元年癸丑 黃景師質子。 陳昇 吳元龍 柳燮 姚君元 陳贊

四年丙辰 陳錫榮最玄孫。 許安國 鄭會龍 劉域 張全

咸淳四年戊辰 倪文一

薦辟、恩蔭賢者雜見列傳中。

有傳

陳最 張希紹 劉季裴 王定國 姚瀛 張觀 何既濟 黃夢攸 趙萬年 陳經 王士奇 張

權 繆元龍 林子雲 鄭宗 繆烈 劉自 陳贊 鄭虎臣 倪文一

陳最 字季常。授新昌丞，會杭卒叛，最單騎諭之，皆曰：「此公忠義，宜送之歸。」召對稱旨，授諸司糧料院，佐鄭剛中使川陝，與虜分畫地界。虜使乃賀景仁之子，屢與最爭，最責之曰：「子受本朝大恩，何乃若是？」賀氣沮，卒從所議。還朝以聞，高宗喜。秦檜主和議，最力沮之，出知興國軍。

張希紹 游學京師。建炎間，倡義集河南兵，敗金虜於平陽軍，授郎官。和議成，調秣歸尉。

劉季裴 字少度。歷秘書丞、監察御史，起居郎兼太子左庶子，終朝散郎、秘閣修撰。乾道間，作《十論》以進，中一篇論何承矩屯田，規畫甚詳。高宗方欲行兩淮屯田事，大見稱賞。上殿奏事，笏偶跌碎，徐拾碎笏，遂敷陳謂：「今日之事，有不可忽者，即如此笏。」高宗曰：「季裴膽大如身。」每經筵顧問，對皆稱旨。所著有《論孟》、《周易解》、《頤齋遺稿》、《四川形勢論》、《司馬溫公傳》。

王定國 字安卿。紹興末，叩閭上邊宜十策。高宗幸金陵，復進十五事。命從趙瑞招撫山東，張浚

留致宣幕。時海州爲紅巾所據，遣定國與魏勝收復之，就攝判官，兼州事。改泗州推官。隆興間，陳敏知高郵，辟爲判官，協力守城，與虜兵九十三戰皆捷，孝宗大悅，時創高郵軍簽判以處之。丁內艱，改舒州，宰執列薦召對，孝宗謂大臣曰：「王定國忠義勇略，真英士也。」除知高郵軍，政績甚著。終朝奉大夫。

姚瀛 字子山。七歲能誦《班》、《史》。十七歲應舉，居太學，以文章著名。四任爲教官。嘗辨太玄潛虛之數，所著有《鳳渚集》。

張觀 字達之。紹興中人太學。隆興，金虜渝盟，侵擾淮甸，率太學生七十二人上書，請斬湯思退、王之望、尹穡，竄其黨洪适、晁公武，而用陳康伯、胡銓等以濟大計，言甚切直。仕終新城令。

何既濟 字通甫。授湘鄉丞，治民有聲。七年致政，曰：「窮達有時，吾順之耳。」

黃夢攸 字伯荀。授池州計議官，處事端飭，不事紛擾，民便之。

趙萬年 字方叔，趙清獻裔。爲襄陽制置司幹辦官。開禧一年，金人破神馬城，遂渡江圍襄陽，肆掠，宣帥諸司相繼逃匿，陳折二都，機誘之去。萬年曰：「人患不得死所耳。死王事，得所矣。」一丈自爲身計則可，何至以此教人！」繕兵貯糧，力贊招撫使趙淳，勉諭諸司幕各以死國爲心。作書反問虜帥，復請壯士三千，據大望山，絕虜糧道。相距九十餘日，虜遁。初魏帥敗於神馬坡，統制呂渭係謂魏必死，脅求兵印。萬年以強虜在外，內變若成，則襄陽危矣，乃往說之曰：「武科中，材力如足下，建節封侯可唾手，但不宜太驟。足下手殺朱勝，自副將而統制，已遷四職，都統制，懷中物耳。果能却虜，節鉞且旦夕，況都統制乎？」歸報招撫，時魏已入城，與招撫飲。黎明，呂人馬自北門入，報者曰：「呂渭係欲殺魏，爲魏所殺。」頃昇呂屍至，皆萬年力也。以功進武德大夫。

陳經 字正甫。官終奉議郎、泉州泊幹。癖嗜書史，啓益後學。有《書解》五十卷及《詩講義》、《存齋語錄》行世。

王士奇 字求叔。弟知章，爲達州教授。士奇舉進士，適聞其訃，遂不赴廷對，往蜀護喪。後就試，當得官，以母老，丐祠。當國者高其行，以堂除凡二十三考，方任莆田法曹，真德秀語嘗路曰：「王法曹文行俱美，當於古人中求之。」後以奉議郎賜緋致仕，優游田里，手不釋卷，多所著述。卒年八十四。

張權 字有準。少穎悟，爲文典雅。判福州，尚寬厚，以敦風俗。

繆元龍 字雲卿。知蘄水縣。天性廉介，惠澤及民。時值兵荒，捐俸賑饑，活者甚衆。

林子雲 字質夫。除融州教授，潛心聖學，躬行實體。著《易說》十卷。

鄭宗 字載伯。任殿中侍御史，奏劾王瓚、龔基先、胡清獻，鐫秩罷祠，遷侍御史。疏言：「比年以來，舊章寢廢，名器甚輕。若使名器重於上，則人心不敢輕於下。」遷左諫議大夫、端明殿學士、同簽書樞密院事。以御史陳求魯論罷，提舉洞霄宮。淳祐五年，福安新開縣治，宗爲詩奏御，理宗題扇以賜，又書「北山澄庵」賜之。宗謝表云：「皇度恢弘，赦常侍登牀之罪；榮光焜耀，頒聖人賜筆之書。敢不肅刊琬琰，昭示雲仍？」

繆烈 字允成。嗜學孝親。上舍、省試皆第一。舉進士，添差福州教授，日率子弟講明正學。遷正字，授撫漕侍郎。著《春秋講義》、《仲山集》。

劉自初 名堯咨，字從聖。通《五經》，年十四應漕舉，四科不第，改名「自遂」。省試第一，登淳祐進士，授梅州教。時重儒官之選，兩請召館職，除秘書省正字，陞刑部郎中，終朝請郎。有《歸田集》十卷。

陳贊 字成父。自湘潭尉轉工部架閣。時史、賈用事，正人竄逐，贊面折廷諍，執政忌之，遂罷歸。

鄭虎臣 字廷翰。德祐初爲會稽尉。殺賈似道於木綿庵，語具建置志。

倪文一 字元芳。授安仁尉。鄰境峒蠻竊發，單騎撫諭之。再授潮州，劉憲召致幕下，有疑獄輒委識。秩滿，行李蕭然。陞知清流縣。人元，隱居不起。以壽終。

皇朝科考

舉人 進士 遇子、午、卯、酉屬舉人，辰、戌、丑、未屬進士。

洪武三年庚戌 林德亨

四年辛亥 林德亨 時科目未定，故有庚戌鄉試、辛亥會試，洪武十七年始有定期。

二十三年庚午 陳英 鄭山

二十六年癸酉 陳錡

三十二年己卯 鄭富

永樂元年癸未 蕭顯 林壽

二年甲申 林壽 蕭顯 洪武三十五年榜。是歲革除，故元年開科，甲申會試。

三年乙酉 陳琦

六年戊子 林輔 張轅

九年辛卯 陳希 陳倍

十年壬辰 陳琦



十二年甲午 王熊 陳新

十五年丁酉 鄧□〔三〕 薛佛 陳弼 郭殷

十八年庚子 崔敏 鄭謙 鄭璧

二十一年癸卯 林銘

正統六年辛酉 鄭儒

景泰元年庚午 劉安

成化十九年癸卯 康盛

二十二年丙午 林資

正德八年癸酉 陳瑜

嘉靖七年戊子 郭文習

十六年丁酉 黃釧

二十二年癸卯 郭文周

二十三年甲辰 郭文周

三十四年乙卯 繆一鳳

萬曆二十八年庚子 郭三鳳

三十七年己酉 王九韶

薦辟、貢監賢者雜見列傳中。〔四〕

有傳

高頤 陳宗億 陳錡 蕭顯 陳琦 陳新 孫賦 黃釗 繆載 繆鳳

高頤 字應昌。孝友天至，臨財以義。親沒，廬墓三年。教授鄉校，旬暇輒至墓所拜哭。洪武間舉孝廉，太祖問曰：「何爲孝？」對曰：「臣父母俱沒，結廬守墳，曰獨守耶。」與妻子共乎？」對曰：「獨守。」又問：「何爲廉？」對曰：「讀書修身，雖貧，取予不苟。」遂授海鹽知縣。卒於官。

陳宗億 字仕達。性至孝友，喪父母，廬墓三年。洪武初，舉孝廉，授荊州知府。備堤防，開溝渠，築砌秦川臺口石路及長堤以衛水。民名堤曰陳公堤，路口角帶街。

陳錡 字器之。洪武間授御史。永樂間，監軍竹肅，號令嚴明。虜寇猖獗，錡奮兵拒戰，數日不走，被執，罵賊甚厲，賊怒，殺之。事聞，成祖爲流涕曰：「忠臣也。」

蕭顯 永樂初從成國公征交趾，副帥清遠伯攻眉盤江，命顯撫之。顯單車造壘宣諭，衆感悟，納款。授峽山知縣，考滿，行，民赴英國公張輔、尚書黃福告留，詔仍治峽。後調連山令，勸農興學。

陳琦 字公刻。累官江西按察僉事，通敏平恕。行部至筠，方大旱，引咎自責，齋沐致禱，甘雨隨注。一日，堂上有大蛇，長數尺，翹首向琦，若有所訴。琦異之，蹤得古井中有遺屍，乃張甲妻通李乙，因與乙殺甲，棄井中。捕至，服罪，筠人以爲神。

陳新 字鼎夫。永樂十二年以貢人國子，從楊文敏公學。知海陽縣，時賦重民困，求其弊，悉去之。每春，巡省田野，勸課農桑，始終不倦。

孫賦 字國用。正統間以監生知龍川，輕徭薄斂，重農勸學，數載間，增墾田米三百餘石，奏蠲屯田

賠徵米五百餘石。黃蕭養亂，捍禦強寇，招集流亡，上下〔五〕

黃釗 字珍夫。任温州府同知。爲人英毅有略。乙卯冬，倭寇犯溫，釗奉檄擊賊，稍稍去，或曰：「胡不亟追？」釗曰：「吾不畏死，以未得勝算也。」自是，集部兵訓練之。丙辰春，倭自福寧向溫，釗發兵拒戰於水北洲，身先士卒，賊伏四起，官軍潰，同事者欲遁，釗怒把其袂曰：「吾黨官屬，寧効卒伍耶？」其人解衣奔竄，釗自麾兵抗賊。賊支解之。事聞，贈右參議，蔭子立祠。王世貞輓詩：「刳後杲卿空有舌，哭回弘演已無肝。從教一蹶星同殞，留得孤忠璧自完。」

繆載 嘉靖間以歲貢授龍川訓導。有徭戶粥子納差，載還徭戶金，俾贖子。太守顧言，考載居最。

繆一鳳 字朝雛。樂善重義，同試舉人王貫途卒，爲扶輿歸旅邸。鄰嫗死，解裝賻之。令寧都，卻坊里餽金。府需丸蠟，忤意，掛冠歸。

### 寧德縣

#### 宋科第

開寶二年庚午 阮環

六年癸酉 鄭罕

太平興國二年丁丑 鄭浮罕子。

淳化三年壬辰 阮睿環子。

紹聖四年丁丑 鄭密

元符三年庚辰 鄭楫密侄孫。

崇寧三年甲申釋褐 鄭南密從侄。

大觀三年己丑 陳彥卿

政和二年壬辰 劉溫伯

五年乙未 陳邦彥

太學舍選 阮大成 龔文昌

重和元年戊戌 鄭鬲南弟。

宣和三年辛丑 鄭昌齡梅子。

紹興二年壬子特奏名 林確 林彬確子。

林晟 程嘉德 周亨明 程嘉成嘉德弟。

太學舍選 鄭昭叔 阮昇 高準

十五年乙丑 王石

十八年戊辰 劉公特溫伯侄。

二十一年辛未 陳莊 周肅 張翹

特奏名 陳煜

二十四年甲戌特奏名 謝成章 何晉之

三十年庚辰 陳謐 阮先 陳元應

隆興元年癸未 余直方余一作俞。 鄭嗣誠梅侄。 楊秀實 陳德明 陳言應元應兄。

特奏名 詹羽 林丙 阮上舉 陳景程

乾道元年乙酉童子科 高應 何邁

二年丙戌 鄭穎 張翰翻兄。

五年乙丑 陳駿

太學舍選 陳成父駿子。

八年壬辰 秦膺剛

淳熙五年戊戌 陳宋輔 彭夢賜

特奏名 周亨升亨明弟。

八年辛丑 林焯晟子。 王宗傳

特奏名 何升之晉之弟。 朱可必 余昭攀 吳炳 黃亮

童子科 黃樞

太學舍選 林士麾 林士榮俱焯子。

十一年甲辰 周牧一作峻。 黃移忠

十四年丁未 鄭肇

紹熙元年庚戌 余復狀元。 薛蔣

特奏名 林煒彬子。

四年癸丑特奏名 陳肆 徐師臣 余吳復從兄。

慶元二年丙辰 李應辰 余爰復侄。

五年己未 余汝益余一作俞 林時英煒侄 高頤

特奏名 吳秀山 劉頌 龔梅卿 鄭日學密孫。

嘉泰二年壬戌 余宗 陳溥 張翔

特奏名 謝夢誠成章弟 鄭懷

漕舉 張安修

開禧元年乙丑 黃肯

嘉定元年戊辰 林士夔

特奏名 陳堯卿煜侄。

七年甲戌特奏名 林仲麟士夔叔。

十年丁丑 黃夢雷 翁由誨 李鑑

十三年庚辰 梁剛中

特奏名 林介卿仲麟從弟 程少壯嘉德孫 龔邨梅卿侄。

寶慶二年丙戌 薛熙載

紹定五年壬辰 陳鸞祥 黃履翁移忠侄孫。

特奏名 黃應辰肯族弟 周韋章一作景章。

端平二年乙未 莊師熊 鄭士懿一作鑑。

特奏名 林仲彪仲麟弟。 翁祿田壽子。

嘉熙二年戊戌 彭夢林

淳祐元年辛丑 陳彭年 張文虎

特奏名 黃起叔皆侄。

四年甲辰 陳伯錢

特奏名 林舜井

七年丁未 林祖恭士變子。

特奏名 孫汝勉 余以正 黃夢鑑 黃裳榮

十年庚戌特奏名 黃體仁

寶祐元年癸丑 姚夢兆

特奏名 賴夢齡

四年丙辰 段舜咨 周森

特奏名 陳价 陳振起莊孫。 林士柄

咸淳元年乙丑 阮登炳大成裔孫。

四年戊辰 鄭同翁上懿子。

薦辟、恩蔭賢者雜見列傳中。

有傳

鄭褒 鄭昌齡 鄭昭叔 陳嗣光<sup>(六)</sup> 張翰 陳駿 陳宋輔 陳應龍 王宗傳 余復 高頤

鄭日學 張安修 陳紀 黃肯 林仲麟<sup>侄上夢</sup> 李鑑 薛熙載 黃履翁 鄭士懿

鄭褒 字寵之。太平興國四年舉明經，授江州司法，明允無冤滯。有疑獄數年不決，焚香祝天，一日，吏誤以他牘進，閱之互見，遂得直，人謂誠感。

鄭昌齡 字夢錫。耿介不苟合。秦檜當國，聞其才名，欲處以美官，命客以書諭意，昌齡爲詩謝之，有口：「先生傲睨醉客傍，不覺滂沱入醉鄉。來書恐是醉中語，使我大笑幾荒唐。」後以太常寺簿召，不赴。召本路機宜文字，官終承議郎。

鄭昭叔 字顯仲。紹興中知仙游縣，誠心愛民，政先自反。時朝廷行經界法，昭叔讀戶部事目，未盡曉，而僚吏請亟行之，昭叔曰：「己尚未曉，何以使人？」閉閣覃思旬日，通悟，乃集同官更令析辨，而同官亦無不曉者。始定差保正、長，恒取丁、土、產高者分二等，大者以備都副、保正，小者以備大保長。分書姓名兩帖，帖分四類，或物力高強，或人丁衆盛，或才智足任謀畫，或筋力可備走使。凡選一都一保，必兼取四者，使相協濟。差役既定，給以事目，又爲陳說大意，使退講論，期以一日畢集縣庭，咨其疑問，悉以己意詳爲講說，力疲氣乏，則請同官更番應之。既悉通透，然後散遣打量，不兩月，而次第就理矣。朱文公守漳，備錄其法，申諸司，乞上之朝省，下之屬部。致仕家居，壽九十六。

陳嗣先 字朝倚。以廉孝稱宗黨間。紹興十年，應孝廉，舉邑簿。陸游爲立孝廉坊旌之，而且爲之贊。

張翰 字雲卿，號坎翁。以學行爲鄉先生，高頤、余復皆其高弟也。居官蒞民，所至有聲。所著有



《觀過錄》二十四章。

陳駿 字敏仲。爲大冶丞，從游朱文公之門。著《論語孟子筆義》，又著《毛詩筆義》，未就而卒。子成父，見韋布。

陳宋輔 字公弼。累官郴州教授，尚節概，重然諾，士流敬憚之。從兄致遠，經明行醇，入國學，有才名。

陳應龍 字定夫。爲人豪放英邁，精《尚書》、《春秋》，喜讀孫吳書。淳熙五年，就試右庠，陳傳良持文衡，見其所作，詫曰：「館閣人物也。」置首選，注修仁尉。徐應持憲廣右，以應龍緩於趨迎，督過之。應龍書六十韻以呈，徐閱之曰：「豪傑士也！」遂加敬焉。

王宗傳 字景孟。學問該博，尤長於《易》。教授韶州，開門授徒，戶屢恒滿。有《易傳》行世。

余復 字子叔。少從張翰學，精於《周官》。紹興初，策士大廷，光宗覽，復對，稱其直而不訐，擢置第一，賜之詩。寧宗卽位，詔入史館，兼《實錄》檢討。歸，擇邑南佳勝，辟園構軒，觴咏其間。

高頤 字元齡。祖確，嘗與陸游爲詩友，稱善士。頤經明行修，從游者幾千人。以《禮記》魁鄉薦，登慶元進士，知永州東安縣。居官臨民，卓然有聲。其學以《大學》、《中庸》爲宗，治身行事，一主誠實。嘗曰：「吾身任大責重，無天地生物之功，而有其心；無經國子民之位，而有其志。」又曰：「學者，學爲聖賢，非止讀書作文，求仕進而已。」著《鷄窗叢覽》百五十卷，《詩集》、《傳解》各三十卷，詩文五百餘篇。子伯壘，嘗魁漕舉，學行醇正，有《會粹古今事類》二百卷，集關洛諸公語爲《傳心直指》十卷，及《一得錄》、《愚齋類稿》等書。

鄭日學 字可久。仕平江僉判，有廉能仁愛之稱。

張安修 字孟堅。領漕舉，以子文虎登第，引年賜承務郎。博通經史詩賦，達官貴人爭致賓席。詩文流落江湖者，士大夫多愛重之。文虎亦有時文名。

陳紀 字仲禮。強敏有大志，試胄監，呂東萊置之首選，繼以舍選登第，再領不礙格，漕舉皆首列。李景和使虜，以中郎辟紀偕行。自知邵陽，歷柳藤、英德三郡，並有聲。

黃肯 字景仁。累知德慶州，文章政事，有聲於時。嘗追和東坡《仕錄戒知足詩》，即乞休。又嘗掇取聖賢言可鑑者百餘條目，曰《提身錄》。所著《胖軒》等集。

林仲麟 字景冲。紹熙五年試太學第一，忠鯁有聞。慶元間，趙汝愚以讒被貶，仲麟同楊宏中等六人伏闕疏救，編管毗陵，時稱「慶元六君子」，著籍偽學逆黨。嘉定戊辰，奉旨褒錄，官終廣東都府參軍。弟仲虎，見弁翰。侄士夔。

士夔 字汝咨。父偉，學問該博，與高頤、余復爲友。士夔學行俱粹，以廉能見稱，官通直郎。子祖恭，知建昌軍。

李鑑 字汝明。官終廣東提舉。初從黃幹、楊復游，得聞敬義之旨。歸與龔剡創《六經》講社，推明師說，誘掖後進。居官平易近民，尤曉兵事。嘗督捕贛寇，提兵深入梅州界，擒陳、羅二賊。後梅寇猖獗，授以州符，賊憚鑑威名，遁去。及蒞廣西，值西浙大饑，鑑運米千艘，(七)全活甚衆。

薛熙載 字景能。學問醇正，操履謙和。以《周禮》詣江東漕舉，登上庠，調懷集簿。

黃履翁 字吉父。學問該博，以林駟所著《源流至論》未備，復爲《彙纂別集》一十卷。

鄭上懿 字從之。讀書過目成誦，經傳百家，靡不竟究。授始興教授，判婺州。王文憲公柏雅嘉敬禮。遷太學博士，出知武岡軍，公明廉慎，教化大行。每上書論朝政缺失。

元

至正十九年己亥鄉試 陳亮

二十二年壬寅鄉試 陳孟龍宋駿之裔。

薦辟、人才賢者列後。

有傳

孫駢 阮德柔

孫駢 少入太學，同舍生俞晰善經學，駢師事之。既登進士，官浙中，猶造晰廬考業。既老，務學如年少。至正三十年，掌本縣教事。

阮德柔 字伯剛。元末任建寧路總管。國初，王師下福建，遣使納款，詔德柔以原官守本郡，尋爲陳友定所害。

### 皇朝科第

舉人 進士遇子、午、卯、酉屬舉人，辰、戌、丑、未屬進士。

洪武三年庚戌 鄭廷實

四年辛亥 鄭廷實時科目未定，故有庚戌鄉試、辛亥會試。洪武十七年始有定期。

五年壬子 周斌

八年乙卯 湯宗誠應天中式。

十七年甲子 鄭公質應天中式。

十八年乙丑 鄭公質

二十年丁卯 趙宣 黃衍 曾寅上二人，俱應天中式。〔八〕

二十一年戊辰 曾寅

二十三年庚午 陳宗孟元孟龍從侄。 黃僧保

二十六年癸酉 林觀 陳添宗孟從兄。 林保童

二十七年甲戌 林保童

二十九年丙子 林宗學

三十二年己卯 黃宜 姚熊

三十三年庚辰 黃宜

永樂元年癸未 林泰舊志有洪武三十五年一榜〔九〕是歲革除，故元年開科，甲申會試。

二年甲申 陳宗孟 林泰

三年乙酉 陳炫 陳靖 高濬 謝霖 陳玘

四年丙戌 謝霖

七年己丑 高濬

九年辛卯 陳彬玘從侄。 陳璣彬侄。

十二年甲午 林縉

十三年乙未 陳彬

十五年丁酉 陳紀 林尹保童子。

陳善靖從侄。

十八年庚子 湯景 張昭

二十一年癸卯 林魁 林思勉

宣德四年己酉 林榮

正統三年戊午 林聰觀子。

四年己未 林聰。

六年辛酉 趙儀

景泰元年庚午 韓璟 龔膺 鄭永慶

四年癸酉 陳和

天順三年己卯 李廷韶 李廷美廷韶兄。

四年庚辰 李廷美

八年甲申 龔膺先是，癸未春二月，會試場屋災，詔移秋八月，至是春三月始廷對。

成化四年戊子 林著 陳寓和子。 左濬

五年己丑 陳寓

七年辛卯 李廷儀廷韶弟。

十年甲午 崔昌

十六年庚子 林初

弘治三年庚戌 李廷儀

五年壬子 林文迪解元著子。

十一年戊午 龔道膺子。

十四年辛酉 鄭世貴

十七年甲子 李源廷儀子。

十八年乙丑 林文迪

正德五年庚午 林道初子。

八年癸酉 陳褒和孫。 陳褒褒弟。

九年甲戌 陳褒

十四年己卯 黃鎔

嘉靖二年癸未 陳褒

萬曆元年癸酉 阮鑽宋大成裔孫。 陳勗

二年甲戌 陳勗

三十七年己酉 林桂 崔世召

四十年壬子 吳國華

四十三年乙卯 陳邦校

四十四年丙辰 吳國華

薦辟、貢監賢者雜見列傳中。

有傳

周斌 陳孟龍從侄宗孟。宗孟子。濬曾孫瑄。(一〇) 鄭公質 林保童 張永耕 彭棟 林觀子聰，侄

著。(一) 著子文迪。觀玄孫師則。(一二) 林泰 陳玘 謝霖 林思勉 崔鑑 龔膺 左濬 陳寓侄

襄。(一) 黃瑑 陳瓊 楊文端 薛公應 鄭文賢 林以誠 黃元采 陳勗 陳桂芳 蔡景榕

周斌 字質夫。閑雅夷曠，明《詩》、《禮》二經。教授建寧，嚴立教條，作新士習，與郡大夫語，皆政教

大端。雲南平，進賀表稱旨，賜金幣。秩滿，太祖召至便殿承顧問，以質直見重。拜中都國子司業，約度

明信，諸生悅服。陞齊府左長史，輔翼開陳，一以正道。丁內艱，卒。楊文敏公微時，斌一見奇之，親授以

業，語之曰：「子器識非常，他日遠到，惜子老不及見也。」子縉，精畫筆，以雅淡見稱。

陳孟龍 字霖卿。父自新，見韋布。孟龍博學能文，洪武初舉明經，擢廣東僉事，改石州知州，謫嘉

定知縣。從侄宗孟。

宗孟 字公孫，以字行。領鄉薦，入國學，即乞歸養。親沒，廬墓三年。與子姓同居無間。登永樂進

士，知易州，鋤強扶弱，賑民饑，革吏奸。爲人謹重廉慎，胸次磊落。善談論，工詩賦。爲秀才時，陳五事

於都運譚公，罷設鹽場，鄉人德之。子濬。

濬 字源清。爲諸生時，捐貲爲孤侄贖產娶婦。貢人太學，選萬全衛知事，以內艱，補海寧。正指揮

亂政之罪，核軍校剝削之奸，平劇盜五百餘人。所得俸資，盡散親舊。孫亮，龍川教授，廉，見閩巷。曾孫瑄。

瑄 字諧卿。隆慶間貢，歷官江北，擢會同令。爲政有聲，海忠介瑞紀其蹟。林居四十餘年，不問生產，表正鄉黨，有太丘之風，年九十餘。

鄭公質 字孔文。舉進士，授兵部主事，擢監察御史。太祖嘉其廉介，賜勅書，免其一家徭役。

林保童 字子成。令綏寧，文學政事，表裏一時。子尹，亦有時名。

張永耕 字希尹。性孝友。洪武二十二年，貢人太學。宣德間，邑人林保童知綏德縣，客死黃州，傍無至親。永耕適至，爲之殮葬，檢行囊，得白金二斤，併其遺稿封識如初，歸還其子。

彭棟 字仕韓。博學通醫。洪武中，署寧德學教事，士類推重。

林觀 字善甫。蚤失怙，居喪盡禮，事母盡歡。教諭程鄉，生徒多貸貲於武豪，稍負輒被辱。觀爲疏達，竟戢服。嘗陳六事，稱旨。以母老，歸養。邑陷海田稅爲民宿患，疏以聞。復起餘姚教諭，修學建祠，考滿，赴部，被命勘徐州蝗災。既還，當陟官，陳乞舊職，遂調玉山，遷江山，致仕。子聰。孫著。曾孫元慶，見閩巷。玄孫師則，以謨謨見韋布。

聰 字季聰。爲刑科給事中，景泰元年，轉都給事。時當英廟之世，承平日久，言路弗塞，聰感激論事無諱。及英廟北狩以後，益與同官葉文莊盛矯厲奮發，所彈劾皆切近內侍及當柄大臣，多因以下獄去者。迨虜也先將送英廟還，廷議迎駕，景帝既卽位有日，不利駕還，心欲薄其禮，聰獨請備饗與鹵簿。景帝廢英廟皇太子，自立己子，衆唯唯署牘，聰獨難之，方欲極論而罷。也先遣使人貢，書稱「大元田盛可



汗」，朝廷難於答之，下詔廷議，聽言：「也先邀留上皇，入寇京師，比歲復自弑其主，遣使來報，驕倖莫甚。然使其不畏天道，不顧醜類，不懼中國之討，即稱可汗於其國中，孰得禁之？乃尚遣使於我，誠覘中國有人否爾。雖曰王者不治夷狄，亦豈可遜詞厚禮與之通問？今若從所自稱，則長逆賊之志，謂中國無人；若稱其故號爲太師，則恐激犬羊之怒，莫若待之常禮，賜勅來使，命歸，語以君臣上下之分，順逆吉凶之道，庶幾國體不失。廷議大臣乃欲徇彼請，謂可汗者，酋長之稱，隋唐以來，夷狄常號，不知稽之於史，謂夷狄之稱可汗，猶中華之稱皇帝。此唐時四夷君長，亦稱太宗爲『天可汗』也。若曰不從彼請，必召邊釁，理固然矣。借使從而稱之，復求不已，則邊釁亦生，又將若何？且虜於往年，亦嘗求我遣使彼中，群議紛然，賴陛下剛決斷絕，數年以來，邊境亦靖。臣愚以爲不稱，它日人寇，尚可暴示其罪，恭行天罰，鼓動天下豪傑義士，發憤敵愾之心。稱可汗，則陛下亦與之矣，行將何以號召豪傑義士與與事乎？」帝竟從諸大臣議，稱可汗答之。尋遷春坊司直，大學士商輅言，六科不可無聰，仍補吏科都給事中，領司直俸。戶部侍郎張賚、國子祭酒劉鉉並用母喪奪情，聰上疏：「侍郎六卿之亞，祭酒師儒之宗，忠孝大節，不可少欠，乞命依例守制。」不聽。復上言：「君親人道大倫，忠孝臣子大節，未有忠君不繇孝親，薄親能厚君者也。禮臣有父母之喪，君三年不呼其門。高皇帝定制，斬衰之服，父母皆一。冒喪匿喪，具有罰禁，所以扶綱常，維世教，豈不嚴哉！曩者逆虜不庭，國家多事，內外近侍、方面等官，奪情起復，此令共濟時艱，一時權宜也。今邊事寧謐，方面已皆不許，而在京猶或踵舊。臣誠愚昧，以爲大臣之中，有一身去就，係國安危，猶若可言。若一概爲例，弊且貪戀名爵，廉耻不顧，視天親若路人，希異數如常事。伏望當金革之不試，舉先朝之舊章，裨益世道，殊非淺鮮。」景帝所立太子薨，聰上大寶八事，及修德弭災二十條，中言：

「今三尺兒童，悉念太上皇德，獨恥皇太子見深何故見廢，時日曷喪之謠繼出，臣不知爲誰，陛下幸而聽臣，仍將太子立爲東駕。」又言：「陛下宜虛己省躬，戒玩好之蕩心，戒嬪御之燕溺，戒用度之過奢，戒逸樂之忘返，戒爵濫施，戒罰濫及。」又言：「唐虞三代，無有釋道之教、齋醮之事，然而享壽益高，傳祚益久，庶政惟和，萬事咸寧。自漢以後，或捨身施佛，或迎骨人禁，信非不專，奉非不至，而壽未見隆，祚未見永，治未見古，若二教亡益明甚。近者在京寺觀，既有齋糧以飯僧，又有燈油以供佛。一月而齋幾度，旬日而醮幾壇，甚至內府亦行修設。供俸之費既多，齋觀之儀不少，雖曰內帑，實出民脂。以爲爲民祈福，而民艱自如；以爲爲國禳災，而天災屢見。伏望悉行停罷，庶幾當務爲急。」聰平居恂恂，不爲奇異，遇事正色議論，確不可奪。景泰中，諫議之臣惟聰與葉盛爲首稱。嘗領會試考官，汲汲焉恐失一士，吏部選註，未嘗或徇，私請輒指斥改易。當事者外雖敬憚，中實啣之。尚書何文淵以選法不公，爲聰論罷。聰復時忤大學士陳循、都御史王文循、文諷諸御史劾聰，十三道漕等奏：「聰自劾去何文淵之後，數挾制吏部尚書王直，紊亂選法。」詔多官廷鞫，以大臣專擅選法，論坐當斬。并劾直等阿勢聽囑。而大學士高穀獨持正議保持之。禮部尚書胡濙亦曰：「給事，七品官也，擬以大臣；囑託，公事也，擬以選法，二者不合。」遂不與。疏歸，卧病不朝。上遣中使往問，對曰：「臣故無疾也，聞欲殺林聰，不覺驚悸。」景帝始知聰被搆，左遷國子學正。英宗復辟，超遷左僉都御史，賑山東饑，全活甚衆。還，遷右副都御史，捕江淮鹽賊，籍其魁而已。三年，丁內艱。明年起復，固辭終制，不允。至署院，曹欽反，錦衣官校報復仇怨，凡欽姻識，一切逮繫，人心知冤，度無免理。聰力争出之。又一時幸功者，妄取首級，京師人至不敢夜出門。聰按論捕賊功，必生獲其人。成化二年，江淮旱饑，人相食，右僉都御史吳深巡視民瘼無狀，命聰代之。九載秩滿，陞

右都御史。七年，出巡撫大同，逾年致仕。越二年，起掌南院事。又三年，召入爲刑部尚書，加太子少保。十五年，按事遼東，與汪直鞠遼東守臣獄，馬文升強珍坐謫。或責備其偏徇，然其持大體，秉公論，終不可得掩也。明年，乞致仕，不許。十八年卒，贈少保，謚莊敏。

著 字文章。得舉時，聽方掌內臺，著斂跡退避，所至官府不知。知浙新城，一廉自持，以不善奔趨，罷。子文迪。

文迪 字廷吉。性敏質粹，學博識醇。舉閩省第一，登進士，授刑科給事中，遇事敢言。奉命清糧，卒於廣西。弟文遷，並與文迪工詩，不干勢利。

師則 以字行。隆慶間貢，任順昌訓導、壽昌教諭、道州學正。真誠率物，教人以忠孝氣節，所至皆有去思。

林泰 字文亨。永樂進士，擢監察御史。搏擊不避勢，有中貴不法，泰力攻之。補惠州推官，致仕。

陳玘 字廷瑜。任寧國教諭，材能學識，推重一時。擢行在兵科給事中。

謝霖 字用謙。選庶吉士，有文名。嘗著《白馬賦》，爲時稱頌。

林思勉 字懋臣。授萊州通判，擢荊州同知。蒞官廉勤，寬猛得中，嘗被賜獎勅。

崔鑑 字克明。宣德間貢，授河南都司經歷，九載乞休，冢宰王公翹賢而留之，擢鎮江同知。尋致仕。鑑問學精邃，端謹寬厚，識達治體，時稱良吏。子昌，知河源縣，廉勤平易，以憂歸，不起。昌子挺，嘉靖間貢，授肇慶訓導，渾厚不華，士林重之。

龔膺 字惟善。歷官戶部郎，湖廣參議，督理糧儲，民不困而事集。子道，舉人，工詩善書，早卒。孫

邦卿，嘉靖間貢，負奇狷介，著書稱詩，數奇不遇，以廣文致政歸。

左濬 字希哲。授餘干訓導，謹身立教，却餽周貧。知仁化縣，興學善俗，愛民節費，率兵拒守鄰寇。調高要縣，縣爲兩廣之衝，供給旁午，事集而民不擾，用節而上不疑。乞歸，薦起判惠州，躬搗賊巢，平之。又以親老乞歸。歷官四任，家無餘貲，陳獻章爲詩贈之。年四十喪室，不再娶。弟漢，亦致仕歸，構四可亭，相與觀書吟詩以自適。子序、廉。序，嘉靖間選貢，授九江訓導，陞虞城教諭、臨江教授。儀度端嚴，見郡守不跪，守卿之，遂拂衣歸。廉，嘉靖間貢，仕清江訓導，荔浦教諭，耿介礪名節。序子承芳，嘉靖間貢，令澄海縣。值城邑殘破之後，海賊林鳳乘虛入寇，軍民危急，承芳制以鎮靜，邑竟無事。

陳寓 字時安。父和，無爲州學正，卒於官，四子俱幼，長子寧，撫三弟，爲婚媾，增殖無私蓄。寓和仲子也。孝友尚氣節，舉進士，知休寧縣，搜剔吏蠹，一言折獄。遷南京刑部郎，有死囚越獄，衆爲危之。寓方著《失囚解》以見意，頃獲囚，囚叩頭祈哀，寓聲色安和，勉使就獄。囚臨當決，越衆拜謝，而後就刑。擢廣西按察副使，所至苗獠避伏，右田寇發，殲其魁渠。改湖廣，進山西按察使。忤權貴，九載不遷，卒官。歸，笥索然，良賤遮哭。兄寧，見方伎。弟宇，見韋布。子方，嘉靖間以貢任桂陽訓導、大城教諭，性資直諒，以義迪人，年九十餘，無疾而終。輪，嘉靖間貢，訓導湘鄉，捐貲修學宮，造祭器，減月俸以周貧士。範，嘉靖間慶遠經歷，鄉人稱其剛正。

褒 字邦進，寓弟宇之子。嘉靖進士，選侍御史，疏劾胡侍郎提督大同逗留，疏立獻廟，疏廖冢宰私闕臣所親。因乞終養，十餘年起復，巡按江西。夏文愍爲相，欲毀民居以益苑囿，書諷夏相，以「費鵝湖之變，幾至滅族，相公方締歡魚水，當造福子孫」。霍韜嘆曰：「真御史也。」左遷韶州推官，復謫判泗州。久

之，爲慈谿令。敏幹廉能，毀淫祠以祠吳相闕澤、唐相房琯之澤於慈者。遷松江同知，值新設清浦縣，委之經略，縣成，擢廣西左江兵備僉事，征勦柳州馬平獠賊，功垂成而免。子訪，隆慶戊辰恩貢，丞青浦，有耿介聲。

黃瑑 字朝佩。推官永州，理刑明允。屬道州急變，欲刃其守，臨諭解之。尋陞桂林通判，飄然初服。

陳瓊 字廷玉，正德中以貢授徐聞訓導，博極群書，人號書籠。

楊文端 嘉靖四年以貢任峽江訓導，端方謙直，嘗語人曰：「矯激吾弗敢，側媚弗能也。」致仕，祖饒塞途，諸生有越境不忍別者。

薛公應 字宗舉。嘉靖十七年貢士，訓導盱眙，教諸生以躬行實踐之學。三年乞休。子孔洵，事公應孝，有士行，學者稱爲企泉先生。

鄭文賢 字宗儒。嘉靖十九年貢士，博學善詩賦，喜彈琴，尤精書法。仕湖廣右布政司都事。子滌，績學通武，文賢沒，廬墓者數載。

林以誠 字格夫。嘉靖四十三年貢士。歷嚴州教授，署分水縣事，政平民安，有朝命之獎。

黃元采 隆慶貢士，授南平訓導。公直勤勵，寡言笑，捐俸倡義，約諸生賓興者，割坊價共置學田，增設祀品，遷壽寧教諭。

陳勗 字世勉。知餘姚縣，廉慈敏斷，吏畏民懷。守南北部郎，擢四川憲副，風紀肅然，諸番內附。擢廣東參政，再起粵西，協勦楊應龍有功。亡何，皮林陸梁，奉命監軍，渡淮深入，生擒苗首，蕩平獻俘，撫

降萬計，竟以瘁卒。論功，贈太僕卿，賜諭祭。歸政績所至有聲，未究其用，至服官清節，居鄉懿行，尤人難及。

陳桂芳 字世馨。萬曆二年貢士，歷邵武教授，模範端嚴，恩義具至。致仕家居，庠士常遣人存問，及沒，不遠致祭。

蔡景裕 字尚秀。幼聰穎，不作隨俗態。嘉靖辛酉歲，被虜入日本者三年，禿頭跣足，吟咏自如。有番僧後，可憐其才，送商船以歸。萬曆間，以貢授興化訓導。歷官香河、興國、隨州，率以正大表儀多士。林居，詩酒自娛，趨迎不染。所著有《海國生還集》行世。

何子曰：善乎！學使馮公燧之遺予書也，是一省之大家乘也。大賢、小賢，其又何分焉？要其條貫多寡之倫，文詞豐約之會，足論世矣。於戲！彼其道德文章，事功節概，表表於夫，人安所置疑。信哉。至如郡邑之吏，文學之長，仕於其官者，里人不知也。居於其里者，天下之人不知也。居於其里者，非夫吾里之人，誰明章之哉？仕於其官者，雖其家之子孫，亦未之知也。吾舍海內州縣之志，奚稽焉，而又奚擇焉？若夫八郡之中，其有以志書來者，吾亦不得而疑之也。且夫仕於官者，必有強幹敏練之才，以此取聲，而以之居鄉，多蹶弛。居於鄉者，必有長厚遲頓之意，以此名德，而以之居官，多淹晦。居官之評，居鄉之論，亦莫得而並尊。丈夫之仕也，猶女子之嫁也。嫁而宜其夫家，父母之家何論焉。丈夫之不能仕，而宜於鄉也，猶廉賈之賈也，折閱損贏，亡傷賈德。煌煌乎閩之先哲也，朱文公哉！朱文公哉！若夫呂惠卿、蔡京、卞、確、章惇、黃潛善之流，代自有史書，吾鄉之先輩也，予不忍述之矣！予不忍述之矣！

贊曰：閩之爲疆，大海之陬，山溪間錯，隘郭儉疇。乃有君子，爰比魯鄒。高翼孔孟，次展念猷。歐陽開先，考亭闡休。毓靈胤秀，項背相侔。於維福郡，宋首烈襄。揆采披華，大風泱泱。才子十人，享我泰陽。桓桓司空，迎駕虜疆。林氏一門，袁楊謝王。楚楚吏部，振藻披閭。維我泉郡，以晉名江。風流斯遠，德業亦崇。受遺定策，猗維魯公。莊留若傅，耆碩巋巋。丘學宗朱，釣磯銀同。密箴演蔡，疑典續蒙。小山石鼓，高峙淨峰。參知軌宋，四門遂雙。建州之學，朱門冠屨。聖經有五，四稟傳註。碩碩文敏，王魏同趣。輔我三朝，高振天步。延平立雪，稟自河南。李氏開朱，青出於藍。汀州峒微，人林孔武。簪纓不絕，所修羅伍。廖賴丘雷，亦世其戶。墜地三絲，徵夢明主。莆仙在興，壤北曹滕。領袖冠冕，霞鬱雲蒸。其在李唐，九牧英騰。齊方聯鄭，引武繩繩。君謨應求，廊廟吟噌。紅泉夾漈，文獻斯徵。明兩司寇，韓歐廉稜。御史處士，寢草懷冰。亦有頑臣，絕頸斷肱。伊邵之陽，忠定在宋。護國康人，南渡倚重。漳水瀾瀾，昔賢所止。北溪匪遐，剩大孔邇。子衿六人，頑臣同軌。福寧一州，在昔石堂。觀星測象，不讓保章。有頑莊敏，抗疏夕郎。晚遵明哲，嘿容孔彰。揭揭儀刑，皇皇昭夏。我述鉅人，以告來者。

〔校記〕

〔一〕「寧德縣」三字，各本原脫，據本書體例補。

〔二〕「福安縣」三字，各本原脫，據本書體例補。

〔三〕「鄧」下，各本原闕一字。

〔四〕「雜見列傳」，各本原作「列見雜傳」，據文義改。

〔五〕「上下」下，當有脫文。

〔六〕「陳嗣光」，本傳作「陳嗣先」。

〔七〕「鑑運米千艘」，各本原作「鑑運朱千艘」，據文義改。

〔八〕「式」字，各本原脫，據文義補。

〔九〕「年」字，各本原脫，據文義補。

〔一〇〕「溶」字，各本原脫，據《陳溶傳》及本書體例補。

〔一一〕「侄著」，《林觀傳》作「孫著」。

〔一二〕「觀」字，各本原脫，據《林觀傳》及本書體例補。

〔一三〕「侄褒」，各本原作「侄褒」，據本卷「呈朝科第」及《陳褒傳》改。



